


Juziñamui Ñuera  
Uai



New Testament in Huitoto, Minica

**Juziñamui Ñuera Uai**  
**New Testament in Huitoto, Minica**

copyright © 2011 Wycliffe Bible Translators, Inc.

Language: Minica Huitoto (Huitoto, Minica)

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Huitoto, Minica

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-08-06

## Contents

SAN MATEO . . . . .	1
SAN MARCOS . . . . .	57
SAN LUCAS . . . . .	92
SAN JUAN . . . . .	150
LOS HECHOS . . . . .	189
ROMANOS . . . . .	238
1 CORINTIOS . . . . .	263
2 CORINTIOS . . . . .	286
GALATAS . . . . .	301
EFESIOS . . . . .	310
FILIPENSES . . . . .	319
COLOSENSES . . . . .	325
1 TESALONICENSES . . . . .	331
2 TESALONICENSES . . . . .	336
1 TIMOTEO . . . . .	339
2 TIMOTEO . . . . .	346
TITO . . . . .	351
FILEMÓN . . . . .	354
HEBREOS . . . . .	356
SANTIAGO . . . . .	378
1 PEDRO . . . . .	384
2 PEDRO . . . . .	391
1 JUAN . . . . .	395
2 JUAN . . . . .	400
3 JUAN . . . . .	401
JUDAS . . . . .	402
APOCALIPSIS . . . . .	404

## JUZÍÑAMUI ÑUEFUE SAN MATEO LLOGAFUE El Santo Evangelio Según San Mateo

*Jesucristo nánoramaci  
(Lc 3.23-38)*

<sup>1</sup> Benomo cuega mámeceiaí Juzíñamui Jitó Jesucristo nánoramaci. Jesucristo jaiái illaíma David náiraímona comuídímie. Daje izóí afémie David nánoramie Abraham náiraímona comuídímie.

<sup>2</sup> Afe Abraham Isaac moo, íemo jiái Isaac Jacob moo. Iemo Jacob Judá ie ámatiaíri íaioi moo. <sup>3</sup> Iemo Judá Fares Zara diga íaillinoi moo. Afe íaillinoi ei Tamar. Iemo Fares Esrom moo. Iemo Esrom Aram moo. <sup>4</sup> Iemo Aram Aminadab moo. Iemo jiái Aminadab Naasón moo. Iemo Naasón Salmón moo. <sup>5</sup> Iemo Salmón Booz moo. Afe Booz ei Rahab. Iemo Booz Obed moo. Afe Obed ei Rut. Iemo Obed Isai moo. <sup>6</sup> Iemo Isai illaíma David moo. Iemo illaíma David, Urías tilla mei Urías ai ote. Iemo David íaillinoi jitó Salomón.

<sup>7</sup> Iemo Salomón Roboam moo. Iemo Roboam Abías moo. Iemo Abías Asa moo. <sup>8</sup> Iemo Asa Josofat moo. Iemo Josofat Joram moo. Iemo Joram Uzías moo. <sup>9</sup> Iemo Uzías Jotam moo. Iemo Jotam Acáz moo. Iemo Acáz Ezequías moo. <sup>10</sup> Iemo Ezequías Manasés moo. Iemo Manasés Amón moo. Iemo Amón Josías moo. <sup>11</sup> Iemo Josías Jeconías naa ie ámatiaíri moo. Aféruillaído Israel nairaí Babilonia éniemo lláviano uigáiaioi.

<sup>12</sup> Afe mei Jeconías Salatiel moo. Iemo Salatiel Zorobabel moo. <sup>13</sup> Iemo Zorobabel Abiud moo. Iemo Abiud Eliaquim moo. Iemo Eliaquim Azor moo. <sup>14</sup> Iemo Azor Sadoc moo. Iemo Sadoc Aquim moo. Iemo Aquim Eliud moo. <sup>15</sup> Iemo Eliud Eleazar moo. Iemo Eleazar Matán moo. Iemo Matán Jacob moo. <sup>16</sup> Iemo Jacob José moo. Afe José, María ini. Aféngomona comuide Jesús. Afémie jiáici Cristo.

<sup>17</sup> Be daií Abrahámona Davidmo itígima catorce méidígimaiaí. Daje izóí David illágimamona Israel nairaí lláviano Babilonia éniemo uillágimamo catorce méidígimaiaí. Iemo jiái afénomona catorce jiáigima Cristo comuíllanomo.

*Jesucristo comuíllafue  
(Lc 2.1-7)*

<sup>18</sup> Jesucristo jocoina bie izóí joide. Ie ei María ja jicánogango Josemo iníreillena. Nai José diga iñena llezica, María Juzíñamui Ñuera Joreño riinodo, ja úruereacade. <sup>19</sup> Ie ini José ñue jaícina itímie, mei íadi uáfodo comini eróicana Maríana oni dotáacañede. Mei jiáifodo báinino buna onóñeno aféngona oni fiéacade. <sup>20</sup> Bíemo comécilla llezica, ie ínia anado ángel daínámie, Juzíñamui abi ímie íemo cíocaide. Iena daide:

—José, David izíe ímie, meáiruiñeno o iri. María o aiza o oíri, mei afengo jocolle jitó Juzíñamui Ñuera Joreñodo comuídeza. <sup>21</sup> Afengo jitó jócoite; ie mei Jesuna ie mámecei jítaitio. Afémie daií mámeceireite, mei ie comínina íaioi fiénidifuemona jílloteza, —daide.

<sup>22</sup> Nana bie íficaide, jaiái Juzíñamui uai jino llóraíma dáinana ñue ícoimo fúitallena. Afe uai llóraíma bie izóí daide:

<sup>23</sup> Nai inínide jitaingo úruereacade; íemona jitó cómite.

Afémie mámecei Emanuel daílle.

Afeci daíacade, Juzíñamui cai diga ite.

<sup>24</sup> José nicáirillamona cazíllano Juzíñamui abi ímie íemo ocuilla izóí finode. Maríana ie ai izóí ote. <sup>25</sup> Mei íadi María jitó jócuano, afe íaillinoi ua ini izóí iñédiaillinoi. Jócuano Jesuna ie mámecei jítade.

## 2

### *Magos dainámaci ucúduaido ráfuenta baitáдино Jesuna méiñuabitiaioi*

<sup>1</sup> Jesús Belén jófuego jococa. Afe Belén Judea éniemo ite. Aféruillaido Herodes aféniemo illáimana ite. Iemo dáamaci jítoma billáfene imaci Jerusalemo dúcidiaioi. Afémaci ucúduaido ráfuenta baitáдино. <sup>2</sup> Dúciillano jicánotiaioi:

—¿Ninomo ite jococa Judíuái illaíma? Mei jítoma billáfenemo ie illano onótate ucúduna cióidicaíza. Afémie cáimadollena benomo biticai, —daídíaioi.

<sup>3</sup> Bífuenta Herodes fídiamona, afémie comeci llícide. Daje izói jái nana Jerusalén comini afemo comeci llícioidiaioi. <sup>4</sup> Iemona Herodes nana lletáriraini illaini, íemo ocuica uaillai llófuetino diga dáanomo jírillano jicánote. ¿Mei nie jófuego afe Cristo jécille? <sup>5</sup> Jira íena daídíaioi:

—Afémie Belén jófuego jécille, mei jaijai Juzíñamui uai llóraini bie izói dáideza:

<sup>6</sup> Belén jofue Judá éniemo ite.

Afe éniemo ite jamánomoide jófueмона afe Belén dinó dúeñeite;

mei afénomo cue nairai Israel úiñoite illaíma cómuíteza, —daí daídíaioi.

<sup>7</sup> Afe mei Herodes ucúduaido ráfuenta baitáдинона báinino uáidote. Uáiduno íaioimo jicánote: “¿Níie monado afe ucúduna cióidomoi?” <sup>8</sup> Iaioi llua méifomo, Belemo íaioina orede. Oriano íaioina daide:

—Afénomo omoi jai. Jaillano afézana ñue jaícina omoi jicánori. Afeza omoi báyadi, cuemo lluáibiri, mei afézana cáimaduaiacadícue, —daide.

<sup>9</sup> Afe illaíma daí íaioina daina mei, ucúduaido ráfuenta baitáдино jáidiaioi. Ie mei jítoma billa dibénemona íaioi ciona ucudu, meine abido íaioina ífóicaide. Ífóicaillano afe úrue illánomo mózizaide. <sup>10</sup> Baitáдино afe ucudu mózizaillana cióillano, iere cáimacaidiaioi. <sup>11</sup> Iemo afeco eromo jaillano, afézana ie ei María diga cióidiaioi. Iemona afézamo cañici ana dújuillano, íena cáimadotiaioi. Afe mei íaioi atica raa túiñuano, afézamo fecádiaioi. Ua oro, íemo uguci, íemo “mirra” daina ráifide ziórede raa, afézamo fecádiaioi. <sup>12</sup> Afe méifomo, Juzíñamui nicáirillado íaioimo llote; Herodes illánomo íaioi jáiñeillena íaioina daide. Afemona oni jáie iodo íaioi éniemo jáidiaioi.

### *Jesús moo íaillinoi Egíptomoto bótaja*

<sup>13</sup> Ucúduaido baitáдино meine jailla méifomo, Juzíñamui abi ímie (ángel dainámie) nicai anado Josemo cíocaide. Cíocaillano íena daide:

—¡Náidacai! Náidacaillano úrue ie ei diga Egipto éniemo omoi bota. Afénomo cue daílle dinó omoi iri. Mei Herodes bie úrue fállena jénoíteza, —daide.

<sup>14</sup> Mei jira José náidacaillano, úrue naa ie éioiri naio Egíptomoto botádiaioi. <sup>15</sup> Afénomo ua Herodes tílle dinó itíaioi. Bie izói íficaide, Juzíñamui uai llóraíma jaijai daina uai ñue ícoimo fuitállena. Afe uai be níie: “Egíptomona cue Jitó uáidotícue.”

### *Herodes nana úruiaína fazítate*

<sup>16</sup> Iemo Herodes ucúduaido baitáдино afémie jifánodoiana fidíillano, afémie jamánomo ríicaide. Iemona nana Belemo ite mena fimona fuitade úruiaína fazítate. Afe jofue áinodo ite úruiaína daje izói fazítate. Naui ucúduaido baitáдино úrue jocóinana Heródesmo llua izói, mena fimona fuitade úruiaína fazítate. <sup>17</sup> Bie izói jaijai Juzíñamui uai llóraíma Jeremías lloga uai fuite. Be níuái:

<sup>18</sup> Rama jófuego zúurede uai cácaíte; cáillicaiilli eia uai cácaíte.

Nairai uzuma Jacob ai Raquel báifene jica ia cómuitaga úruiaíri éhena.

Aféngomona jica ia úruiaí cómuitatino eia jaca buna fíranide, mei afengo úruiaí fazílliaioíza, daí Jeremías daide.

<sup>19</sup> Mei afe Herodes tilla méifodo Juzíñamui abi ímie nicaí anado batí Egíptomo Josemo cíocaide. Cíocaillano íena daide:

<sup>20</sup> —¡Náidacai! Náidacaillano úrue naa ie éioiri abido Israel éniemo omoi jairi, mei nauí baie fáiacadino nana ja tíidiaioi, —daide.

<sup>21</sup> Afemona José afe úrue naa ie éioiri abido Israel éniemo jáidiaioi. <sup>22</sup> Mei íadi Arquelao ie moo Herodes ifomo illáimana íllana fidíillano, José afe Judea éniemo jáillana jacíruite. Iemo Juzíñamui nicaí anado afémiemo llúamona, afémie afénomo jáiñeno Galilea éniemo jaide. <sup>23</sup> Afe Galiléamo dúcia méifodo, Nazaret jófuemo fiébizaide. Bifue bie izói joide, jaiái Juzíñamui uai llóraima daína uai ñue ícoimo fuitállena. Be níuui: “Jesús Nazaret ímie daiírena.”

### 3

#### *Juan Bautista táizicimo rafue jino llote*

*(Mr 1.1-8; Lc 3.1-9, 15-17; Jn 1.19-28)*

<sup>1</sup> Aféruído Juan Bautista Judea éniemo ite táizicimo lletámaizaibite. <sup>2</sup> Daide: —Omoi comeci ífuiai mai méidori, mei monamo ite Juzíñamui illáimana illírui ja íanori íteza, —daide.

<sup>3</sup> Bie Juan jaiái Juzíñamui uai llóraima Isaias llogámie. Afémie jica ia bie izói Juaado cuete:

Ficire úritimie uai táizicimo cácaide.

Afémie daide: “Juzíñamui bille io ñue fínua izói, omoi comeci ñue omoi finori.

Afémiemo io jaícina dénuu izói,

Omoi comeci íaifuiái omoi féitari”, —daide.

<sup>4</sup> Aféruillaído Juan jítáogaroi camello itíraiaí níinaroi. Ie ciraigi ífe rille igoí finoína. Afémie jaca fíuui rífirede. Daje izói cíiji jírofirede. <sup>5</sup> Jerusalén comini afémie úrillamo cacáreizaibitiaioi, daje izói nana Judea énie imaci, íemo jíái Jordán imani abi comini ie úrillamo cacáreizaibitiaioi. <sup>6</sup> Íaioimo ite fiénidífuiai jino íaioi llua méifomo afe Juan Jordamo íaioína báutizade.

<sup>7</sup> Mei íadi fariséuaimona, jíái saducéuaimona aillo comini Juan diné ie báutizajonomo bitiaioi. Afémaci bíllana Juan cíoillano, íaioína daide:

—¡Titade jaióniaimona comuídino izóidiomoi! Ja ánozide duere zefuílífuemona omoi botállena ¿bu omoi llua? <sup>8</sup> Omoi comeci ífue méidoiacanana ñúfuedo uáfodo jino ácatari. <sup>9</sup> Dani ómoimona “Abrahámona comuídinodicaí cai íllamona Juzíñamui íena iticaí,” afe izói daiíñeno iri, mei táinoza. Mei bie noficiaimona, Juzíñamui jítáíadi Abraham comínina comúitaredeza, daií ómoína daidícue. <sup>10</sup> Fiénide amena tiéllena jata jicaída jónonia izói, fiénidino duere finoille jae ñue mameca. Nana figo llizíñede amena tíiano iraimo zocana uillano jobaica. (Tiéfirega zena izóidiomoi.) <sup>11</sup> Uáfuenta bimaci comeci ífue íaioi méidua jira, jáinoido íaioína báutizadícue. Mei jíáfodo cue méifodo bíitimie, comínina Ñuera Joreño úcaitaite. Daje izói iraimo raa ñue zia izói afémie comínina íáinino ñue fínoite. Afémie iere cue baímo ríinorede, cue bie jamáimiedícueza afémiena dama ñue jacíruiredícue. <sup>12</sup> Afe cue méifodo bíitimie arroz biájidimie izói ja ie llocofe llícabite. Afémie arroz bíamona ícuai oni eneno ua izói, ñúemacimona fiénidinona oni eneno óite. Ñúemacina ie illánomo ñue ráiruite, mei jíáfodo fiénidícuai izóidinona jaca dúíñeite iraimo jóbaite, —dinori Juan úrite.

#### *Jesús báutizaina*

*(Mr 1.9-11; Lc 3.21-22)*

<sup>13</sup> Jesús Galiléamona imani Jordamo Juan illánomo bite, afe Juan ie báutizallena. <sup>14</sup> Jesús bítemo Juan íena báutizaacañede. Jira Jesuna daide:

—Cue bie odo báutizaregacue. ¿Nibái mei cue dinena bitio? —daide.

<sup>15</sup> Jira Jesús íena daide:

—Dama daiítadeza, birui cue daina izói fino, mei nana Juzíñamui jitaina izói finóredicocozá. Afe coco finolle cócomo ñue jóbide, —daide.

Iemona Juan ja fairíote. <sup>16</sup> Afemona Juan Jesús báutizade. Báutiza mei Jesús jáinoimona jino bite. Afe llezica mona raire túijicaide. Afe dáaruido Jesús Ñuera Joreño fíiciri ana billa izói bíllana ciode. Afémiemo ráinazaibite. <sup>17</sup> Mei íemona monámona daa úrilla uai cácaide. Afe úrilla daide:

—Bie iere cue izíruiga Jitó. Afémiemo jamánomo ióbioidicue, —daide.

## 4

### *Taife Jesús facátate*

*(Mr 1.12-13; Lc 4.1-13)*

<sup>1</sup> Afe mei Ñuera Joreño Jesús táizicimo uite, afénomo Taife afémie fiene facátallena.

<sup>2</sup> Afénomo Jesús cuarenta dígarui güiñeno ite. Mona naio diga afénomo güiñeno ite. Afe mei afémie iere jamánomo jufínaite. <sup>3</sup> Ie jufínailla llezica, Taife Jesús facátallena áinozide. Iena daide:

—Ua Juzíñamui Jitona o íadi, mai bie noficiai paana mei fino, —daide.

<sup>4</sup> Jira Jesús uai ote:

—Jaiái Juzíñamui Cuegáuai daide: “Fia güílledo come ínide, mei jááfodo nana Juzíñamui lloga uaido írede,” —daide.

<sup>5</sup> Iemo Taife Jesuna ñuera Jerusalén jófuemo uite. Afénomo ite gairíraco emódomo caifo jica Jesuna uite. <sup>6</sup> Uillano íena daide:

—Ua Juzíñamui Jitona o íadi, benómona ana batí mai ticai, mei Juzíñamui Cuegáuai bie izói dáideza:

Juzíñamui ie abi imácina ona uíñotaite.

Iaioi ónoido ona moziñoitiaioi, o éiba noficiaimo íziñeillena, —daide.

<sup>7</sup> Jira Jesús uai ote:

—Jaiái Juzíñamui Cuegáuai nane daide: “O ocuide Juzíñamui mai facátañeno,” —daide.

<sup>8</sup> Nane dáanommo Taife iere caifónedumo Jesuna uite. Afénomona Taife nana éniemo ite náiraina ie ácatate, naa íaioimo ite ebíredifuiari. <sup>9</sup> Iemo nane íena daide:

—Cañícido cue anamo dújuano cuemo o caimátaiadi, nana bie omo íitícue, —daide.

<sup>10</sup> Mei jira Jesús daide:

—Taife, mai oni jai, mei Juzíñamui Cuegáuai dáideza: “Dama ocuide Juzíñamuimo caimátairena. Dama afémie ocuífiregamiena o iri,” —daide.

<sup>11</sup> Afemona Taife Jesús fáicanocaillano oni jaide. Afe mei dáarie Juzíñamui abi ímiai Jesuna cánuabite.

### *Jesús Galilea éniemo como fueñe táijizaide*

*(Mr 1.14-15; Lc 4.14-15)*

<sup>12</sup> Jesús Juan Bautista llavéinana fidíllano, oni Galilea éniemo jaide. <sup>13</sup> Mei íadi Nazaremo fiébiñeno, Capernaum jófuemo jaide. Afe jofue Galilea jorai fuédamo ite. Iemo afe jofue Zabulón éniemo ite. Daje izói Naftalí énie áinomo ite. <sup>14</sup> Jaiái Juzíñamui uai llórama Isaías lloga uai ñue fuitállena, bie izói íficaide. Afe uai daide:

<sup>15</sup> Zabulón énie, Naftalí énie diga áillue jóraimo jóide io áinori ite.

Afénie Jordán ruicáfellemo ite.

Afénie judíoñedinomo dúide Galilea daina énie.

<sup>16</sup> Aféniaino ite comini jítinomo itino izói Juzíñamuina onóñediaioi.

Mei íadi ja birui afémaci como aillo egáñotena ciódino izói, Juzíñamuina uáfodo onódiaioi.

Iemo jiái afe tíide izói Juzíñamuina ónoñedino jae egáiñogaiaioi, Juzíñamui zíñona illífuenta íaioi maiñóllena.

<sup>17</sup> Afe mei Jesús jino comínimo ie llófuelle uai fueñe tainede. Daide:

—Omoí comeci ífuiái méidori, mei monamo ite Juzíñamui illáimana illirui ánozideza, —daide.

*Jesús cuatro dígamie facófredino uáidote*  
(Mr 1.16-20; Lc 5.1-11)

<sup>18</sup> Jesús Galilea jorai fuédado macádemo, mena ama íaillinoína baite. Dámie mámecei Simón, afémie jiáifodo mameina Pedro. Jiáie baigámie mámecei Andrés. Afe íaillinoí facóraini. Afe llezica llóiji jóraimo dotáiaillinoi. <sup>19</sup> Iemo Jesús íaillinoína daide:

—Mai cuedo bi, comini llófuellena íaioí jénoitimiena ómicoína jóneiticue, —daide.

<sup>20</sup> Iaillinoí llóiji fiénocaillano afémiedo jáidiaillinoí.

<sup>21</sup> Nane afe báifenemo Jesús mena jiáie ama íaillinoína cíozaide. Afe íaillinoí Zebedeo jitó Santiago Juan diga. Afe íaillinoí áillue nocaemo ie moo diga íaioí llóiji ñue finódiaioí. Jesús íaillinoí uáidote. <sup>22</sup> Afe llezica, áillue nocaemo íaillinoí moo fiénocaillano, Jesudo jáidiaillinoí.

*Jesús nágagobiaimo aillo comini llófuete*  
(Lc 6.17-19)

<sup>23</sup> Afe mei Jesús Galilea éniendo nágafenedo jaide. Nana Juzíñamui uai llófueriracuaimo llófuerite. Afémie Juzíñamui illáimana illirui ñúefuedo jino llócaide. Daje llezica nana jiáifodorie irárede comini jíllotate. <sup>24</sup> Nana Siria éniemo Jesús finoca ñúefuiai jalleide. Iemona Jesumo jiáiforiede dúicuaimo duere zefuídino atídiaioí. Iemo jiáiforie izi cácadino, íemo fiénide jóraí uícaigamaci, íemo chémemo raamo jíridino, íemo tízitaitino, nana bie izóidino Jesumo atídiaioí. Iemo nana afémacina Jesús jíllotate. <sup>25</sup> Iemona diga jiáinuiaimona bitíaioí Jesudo jáillena. Galilea éniemona bitíaioí, íemo Decapolís jófuiaimona bitíaioí, íemo Jerusalén naa Judea éniemona bitíaioí. Daje izói imani Jordán ruicáfellemona Jesudo bitíaioí.

## 5

*Caifónedumona Jesús lloga are uai*

<sup>1</sup> Jesús afe aillo iedo jáidinona cíoillano, caifónedumo ráinazaide. Iemona ie llófuegamaci afémie abido ofídiaioí. <sup>2</sup> Afe mei Jesús bie izói como íaioína llófuete:

*Caímare ióbidino*  
(Lc 6.20-23)

<sup>3</sup> “Comeci dinena dúeredicai” daiífiredino ióbidiaioí, mei monamo ite Juzíñamui illáimana illarui afémacimo dúideza.

<sup>4</sup> Comécina zúuredino caímare itíaioí, mei Juzíñamui íaioí fíraiteza.

<sup>5</sup> Comécina mánaidino caímare ióbidiaioí, mei Juzíñamui jica ia íaioíena mameca énie máiñoitiaioíza.

<sup>6</sup> Júbiena méinegamie iere güíacana izói, Juzíñamui comeci jítaina izói iere íacadino caímare ióbidiaioí, mei Juzíñamui afe íaioí íacanana izói íaioí íllena afémacina cánoiteza.

<sup>7</sup> Jiáimacimo dúecaifiredino caímare ióbidiaioí, mei Juzíñamui íaioímo dúecaiteza.

<sup>8</sup> Comécina íainidino caímare ióbidiaioí, mei Juzíñamuina cíoitiaioíza.

<sup>9</sup> Ícírafuena oni orédino caímare ióbidiaioí, mei Juzíñamui afémacina “Cue jitódiomoí” dáiteza.

<sup>10</sup> Juzíñamui jítaina íaioí fínuari duere zefuídino caímare ióbidiaioí, mei monamo ite Juzíñamui illáimana illarui íaioímo dúideza.



<sup>11</sup> Comini omoi báinua, omoi duere íaioi finua caimare íobidiomoi. Daje izói cue ícoinia taino uailai ómoimo íaioi nitáadi caimare íobidiomoi. <sup>12</sup> Afena náfueño íóbicana caimare omoi iri, mei monamo ite áillue ebíredifue jirídoitíomoi. Mei jaijai nai omoi íñena llezica ite Juzíñamui uai llóraini daí duere finóllena racácaiaioi.

*Sal ñue finua izói, afe izói comini ñue finódinona itíomoi; daje izói bínie egáñotínomoi (Mr 9.50; Lc 14.34-35)*

<sup>13</sup> Omoi, sal izói, bínie comini ñue finódinona itíomoi. Mei íadi sal ie ríino íñenia güllena caimáretañede. Afe rínonide sal ¿miníado meine ríretade? Jaca meine ríretaninamona jaca ráifíñede. Comini zaizíllena macáranomo dotárega.

<sup>14</sup> Omoi finoca ñúefuiai finuamona, bínie comini ñue íllena egáñote raa izóidiomoi. Iemona caifónedumo ite uáfori cíocaide jofue jaca retáidonina izói itíomoi. <sup>15</sup> Uneca mechera nogo eromo retáidollena unéñediomoi. Mei jíáfodo caifo uáfori cíoidinomo uneda ráinafiredíomoi, jofo eromo itínomo ñue egáñollena. <sup>16</sup> Afe izói ómoimo Juzíñamui comuítaga omoi finófirega ñúefuiai jino comini eróicana finócana omoi uiri. Daí omoi ñue finócafuiaina ñue íaioi cíoilleza. Uáfori íaioimo cíotari, monamo ite omoi Moomo ñúefuiai íaioi jóonellena.

*Jesús Moisés ocuica uai dibénedo llófuete*

<sup>17</sup> “Moisés ocuica uai cáitajaibite,” daí cuemo omoi coméciño iri. Daje izói jaijai Juzíñamui uai llóraini llófuia féitajaibiñedicue. Jaca afe uailai féitajaibiñedicue, mei jíáfodo afe uailai ñue ícoimo fúitaibíticue. <sup>18</sup> Uáfueña ómoína dáíticue, mona naa énie diga nai fúíñeille dino bie ocuica uáillaímona daa uai oni ónide. Nana áfemo lloga ífcaítífuiaí nai zuíñena llezica, afe uailai jaca íte. <sup>19</sup> Ie jira afe ocuica uáillaímona daa uai íere duere íadi dáamie náfueñenia, monamo ite Juzíñamui illáimana illáruimo afémie jamáimiena jáite. Daje izói afémie náfueñena izói jíáimacina “Cai náfueñeilli” daííadi, íere jamáimiena jáite. Mei jíáfodo aféuailai náfuetinona íemo jíáimaci afe uaina náfuetadinona, “Bimaci Juzíñamui illáimana illáruimo jamánomoidinona,” daíille. <sup>20</sup> Mei birui ómoína dáíticue: Juzíñamui jíáinana ñue ícoimo fuitállena, ocuica uai llófuetino, fariséuai diga íere áfena nícidotiaioi. Mei íadi íaioi nícidoga baimo omoi fínoñenia, monamo ite Juzíñamui illáimana illáruimo dúciñeítíomoi.

*Jesús comini icírilla dibénedo llófuete (Lc 12.57-59)*

<sup>21</sup> Omoi jaiáidígimaci dáinana cacáidiomoi. Afe daina be ñie: “Jíáimana titáñeno iri, mei jíáima titádimie jícanuano duere finolle.” <sup>22</sup> Mei íadi afe emódomo nane dáíticue. Ninó dáamie ie aino come diga ícírria, afémie áferi jícanuano duere finolle. Daje izói ie ámana íaire daídímie Jamánomo Ríillaini afémiemo jícanuano duere finolle. Iemo jíái ie ámana “O abina onóñedimedio,” daííadi afémie áferi jaca ninomo dúíñede iraimo orérede.

<sup>23</sup> Iemona Juzíñamuimo o úriacana llezica, daje izói afémiemo fia fecáacaga raa o izájiacana llezica, o aino come diga o ícírillamo o uibíoicaiaí, <sup>24</sup> afe o izájiacaga raana izáíñeno iri. Fueñe afémie diga ñue o finori, caimare uái ómícoi íllena. Afe ñue ómícoi finua méífomo, o izájiacaga raana fecáredío. Ja Juzíñamuimo úriredío. <sup>25</sup> Iemo jíáfueumo omoi cacai. Íaífue omo mamédimie diga raire o úrizairi, afe íaífue záilleza. Jicánoracomo nai ona uíñena llezica, mai jino io anamo ñue ómícoi záítari, jícanoraímamo o ie úíñeilleza. Daí o fínoñenia, afe jícanoraíma fiénidino llaitáfiredinomo ona izájite. Iemo afémaci ona llavéracomo íbaitiaioi. <sup>26</sup> Uafue ona dáíticue, o llavétatímie jícala úcube ie jícaja dieze o íbañenia, afécomona jaca jino bíñeítío, —daídicue.

*Jesús comini finoca jiruífue dibénedo llófuete*

<sup>27</sup> Jaiai daináuai cacádiomoi. Afe be nñe uai. Jiáie ringo diga jiruídoño o iri. <sup>28</sup> Mei íadi ómoína daidicue: Omoímona dáamie ringomo eróicana fiéni comeci facáadi, afémie jae afengo diga ie comécido jiruífue finode.

<sup>29</sup> Mei o ciona raamo o éroillamona fiénidífue mo ona baiítaia áfemo eróiño o iri. Ua, o uíji nabeji o fitajamona o eróinino o illa izói, afe izói o fiéniruitate raamo eróiño o iri. Afe uíji júbene o fitañenia izói, fiénide raamo éroillano o fáicanocaiñenia o abina nana iraimo dotáate. Ie jira o abímona daa íeizi iñena izói, nana o abi táinocaille baímo iere ñuera. <sup>30</sup> Daje izói o finóacanafuiái fiénidífue mo ona baiítaia, aféfuiái finóño o iri. O onoi nabezi o jáitajamona aféfuiái o finónino o illa izói, afe o fiéniruitate ráfuiaina o fáicanocairi. O jáitañenia izói, o fáicanocaiñenia, o abina nana iraimo dotáate. Ie jira o abímona daa onoi iñenia izói, nana o abi táinocaille baímo iere ñue ite.

*Come ai dótafirena dibéndo Jesús llófuete*  
(Mt 19.9; Mr 10.11-12; Lc 16.18)

<sup>31</sup> Daje izói jiáie jaiai daina uai bie izói joide: “Nínó daa come ie ai dotáadi, afe bie ringona benómona óñeiticue dainabe aféngomo írena.” <sup>32</sup> Mei íadi birui ómoína daidicue: Dáamie ie ai dotáadi, afémie aféngona jiruífuretaite. Mei íadi daa ráfuedo dotárede. Afefue be nñe: Afengo inírede ia jiáie iima diga íadi afengo dotárede. Daje izói dotácango aina otímie afe úamona afémie afengo diga jiruífue finode, mei Juzíñamui eróicana, afengo nai fueñeidimie ai.

*Jesús táinona uafue daiíllena Juzíñamui mámecei llínuado llófuete*

<sup>33</sup> Daje izói omoi jaiáidigimamona cacádiomoi. Afe be nñe uai: “Juzíñamui eróicana ie mámecei o llínuano o dainana ñue ícoimo záitari.” <sup>34</sup> Mei íadi birui ómoína daidicue: Uafue daiíllena jaca mona mámecei llínonidíomoi. Mona Moo Juzíñamui illánoza, áfedo iere uafue daiíño iri. <sup>35</sup> Daje izói énie íbogido uafue daiíño iri, mei aféniena Juzíñamuimo jaináideza; fia ie idai jóonera izóideza. Daje izói o llógana uafue daiíllena Jerusalén mámecei llínoño iri, mei afe jofue Nahíllaimamo, ua Juzíñamuimo dúideza. <sup>36</sup> Daje izói dama o ífócido uafue daiíño iri, mei o ífótirai úzetiraina méidonidíomoi, daje izói jítitiraina orénidíomoi. <sup>37</sup> Iemona jiáie uaina nabáiño “Jii fínoiticue” daiíri. Mei jiáifodo “Jii fínoiñeiticue” daiírena. Uafue daiíllena bie izói o daina baímo jiáie uaina o nabáiadi afe uai Taifémona bite.

*Jiáimamo iba úado Jesús llófuete*  
(Lc 6.29-30)

<sup>38</sup> Daje izói jiáie jaiai nanómona dainana cacádiomoi. Afe daina be nñe uai: “Dáamie jiáimie ui fitáadi afe ibana afémie ui fitárega. Daje izói dáamie jiáimie ízido ditáadi afe ibana afémie ízido ditárega.” <sup>39</sup> Mei íadi birui ómoína daidicue: Dáamie fiéni omoi finóadi, ibana afémiemo riire úriño o iri. Mei jiáifodo dáamie o uiéco putáadi daje llezica enéfene putari íena o daiíri. <sup>40</sup> Dáamie taino omo jítajano, o caifóferoi bairóadi, afe llezica o jinófenemo jítararoi caifóferoi diga naga afémiemo o fecari. <sup>41</sup> Daje izói dáamie mei policía izóidimie méere raana daa kilómetro riífuedo o abítaiadi, afe baímo mena kilómetros ícírino o uíri. <sup>42</sup> Nane dáamie raa ómoimo jicáadi, afe íemo o fecari. Jiáimie “Nano íanori cuemo fia feca” daiíadi, afémiemona oni jíjicaiño o iri.

*Cai ícírillamacina izíruiredicai*  
(Lc 6.27-28, 32-36)

<sup>43</sup> Daje izói jaiai nanómona daina uaina cacádiomoi. Afe be nñe uai: “Omo caimare úrifrenamiéna izíruiri, íemo o ícírillamiéna éoiri.” <sup>44</sup> Mei íadi birui ómoína daidicue: Omoi ícírillamiéna omoi izíruiri. Omoi faidódimiéna caimare íemo omoi finori. Omoína éoidinona ñue omoi finori. Omoi báínotino, íemo jiái ómoína fiéni finócadino diga

afémaci éna Juzíñamuimo omoi jicari. <sup>45</sup> Daií omoi íllemona monamo ite omoi Moo Juzíñamui jitótiaina jáitiomoi. Mei afémie ñúemaci ie jitómana egáiñotadeza, daje izói jáíie fiénidimaci éna egáiñotadeza. Iemo, comécina jáicina jóidinomo afémie nocina bíitate, daje izói comécina jáicina jóiñedino éna nocina bíitate. <sup>46</sup> Mei dani ómoína izíruitinona omoi izíruiadi, ¿áfemona minica jiridoitiomoi? Jaca jiridoñeitiomoi. Omoi jámairuiga gobierno raiñoca úcube llínofiredino da afémaci izíruitinona izíruitiaioi. Afémaci baímo izíruiarediomoi. <sup>47</sup> Dama omoi ámatiai caimare omoi uáidoiadi, ¿ñíie ñúefue finódiomoi? Juzíñamuina onóñedino bie izói illa. Afémaci baímo nana comini caimare uáidorediomoi. <sup>48</sup> Monamo ite omoi Moo Juzíñamui íaífuenide comécina figomíena illa izói, afe izói omoi iri.

## 6

### *Jesús cai finófirega ñúefuiai dibénedo llófuete*

<sup>1</sup> Jesús nai úrite; daide: Omoi finófirega ñúefuiai comini eróicana afémaci ómoímo cáimacaillena omoi finóñeno iri. Daií omoi finóadi monamo ite omoi Moo Juzíñamui ómoína minícana jirídotañeite. <sup>2</sup> Ie jira dúeredino o cánua llezica nana comini lloñeno, uái daií omoi canori. Jino omoi macáramo, daje izói Juzíñamui uai llófueriraco eromo diga táinona abi ínotino bífirediaioi. Afémaci comeci figóñedimaci illa llezica jino finócafuiaimona ñúemacina eróidiaioi. Iaiói finua izói finóñeno omoi iri. Afémaci daií finófirediaioi jáíimaci íaioído ñue úrillena. Mei uafue ómoína dáitícue: Comini íaioído caimare úrillado, íaioi jirídoacaga raana jae íaioi jirídoga. <sup>3</sup> Mei jáíifodo dúeredinomo daa raa o fecalle llezica o izíruiaga aino cómemo lloñeno uái daií o fecari. <sup>4</sup> O finófirega ñúefue báinino o finori. Iemona o Moo Juzíñamui o báinino finoca raana cíoiteza. Afemona óíena mameca raana o jirídotaitenza.

### *Jesús Juzíñamuimo úrillado llófuete (Lc 11.2-4)*

<sup>5</sup> Juzíñamuimo omoi úrilla llezica, abi diné ñue cíoidimaci finua izói finóñeno omoi iri. Afémaci Juzíñamui uai lloraco eromo caífo naidáillano ficírede uaido Juzíñamuimo úrilla izói finódiaioi. Iemo jofue cígímo ite aillo comini ofíranomo daje izói finófirediaioi, comini íaioína cíoillena. Uáfuenta ómoína dáitícue, afe bie comini íaioído ñue úrillado, íaioi jirídoacaga raana jae jirídotiaioi. <sup>6</sup> Mei jáíifodo Juzíñamuimo o úrilla llezica, o jofu eromo jaillano o naze íbairi; íemo afénomo o diga ite Moo Juzíñamuimo o úriri. Afemona o Moo Juzíñamui o báinino úrilla uaina cacáillano, óíena mameca raana o jirídotaitenza.

<sup>7</sup> Juzíñamuimo o úrilla llezica, Juzíñamuina onóñedino finua izói, taíno uaillai diga icaiño lloñeno o iri. Afémaci bie izói comécidiaioi: “Are cue úrillado Juzíñamui níbaí cuemo cacáreite,” daidíaioi. <sup>8</sup> Afémaci izói íñeno o iri, mei nai o jítaille raa o jicáñena llezica o Moo Juzíñamui uícodo onódeza. <sup>9</sup> Ie jira bie izói afémiemo omoi úrifíreiri:

Cai Moo Juzíñamui, monamo itio; o mámedido ñúefue nitácaza.

<sup>10</sup> O illáimana illirui raíre bíiteza.

Dinomo monamo o comeci jítáíllafue íaioi finua izói, afe izói bie éniemo finótáíbiteza.

<sup>11</sup> Cai nágarui jitaiga güílleniai, birui caímo fecari.

<sup>12</sup> Cai finoca fiénidífue íba caímo oñeno iri, mei afe izói jáíimaci fiéni caímo finódiaioi íadi, afémacimo íbana oñédicai.

<sup>13</sup> Íaífuemo cai baííñellena caína uíñori.

Iemo afe llezica nana fiénidífuiaimona caína jíllotari.

Mei bínie comini jaca o illáimana illa anamo itíaioi.

Afémaci illáimaillena ríino jaca omo ite.

Daje izói jamánomo ñue ébífue jaca omo ite.

Ja daiítadeza.

<sup>14</sup> Mei uafue, ómoimo fiendi finódino finoca fiénidifuena omoi féitaia, afe izói monamo ite o Moo o finoca fiénidifuena féitaite. <sup>15</sup> Mei íadi aféfuiaí omoi féitañenia, omoi Moo omoi fiénidifuiaína féitañeite.

*Jesús comini fímairilla dibénedo llófuete*

<sup>16</sup> Iemo nane Jesús daide: Dama Juziñamuimo izire omoi comeci facállena güillena güiñeno omoi fímairilla llezica, omoi uiecona zuure finóñeno omoi iri. Jínofene ñue cíoina mei íadi comécina íáiredino daí finódiaíoi. Iaiói fímairilla llezica abina iere zuure finódiaíoi, comini íaioina cioillano “Baie fímairitino,” íaíoi daíllena. Uafue ona daíticue, afe izoide comini íaioina dáinado íaíoi jirídoacaga raana jae jirídotiaíoi. <sup>17</sup> Mei jíáfodo güiñeno o fímairilla llezica o uieco ñue jocori; o ifo ñue júiri, <sup>18</sup> ona comini “Baie fímairitimie” daíñeillena. Iemona o diga ite báiñidena cíofirede Juziñamui, áfena dama cioille, íemona afémie áfena ona jirídotaitaite.

*Monamo cai jirídollena ofítaredicai*

*(Lc 12.33-34)*

<sup>19</sup> Iemo nane Jesús daide: Biniemo aillo ráaniaína ofítañeno o iri, mei biniemo diga raa ícuai güífíregaza, íemo jíáie raana ráataífiredeza, íemo jíái merírífiredino merífífiredeza. <sup>20</sup> Mei jíáfodo Moo Juziñamui jítainana o finófireiri; caífo monamo ie illánomo ñúefuiaí o ofítari, mei afénomo ite raana ícuai güiñédeza, íemo jíái afeno raa zabíñede, íemo afénomo merírífiredino meríndiaíoi. <sup>21</sup> Mei uáfueza, o gaiga raa ofítajanomo dáanomo daje izói o comeci íiteza.

*Cai illafue ñue egáiñote raa*

*(Lc 11.34-36)*

<sup>22</sup> Ñúefuemo o comécilla omo ñue egáiñote raa izoide. Jira bobaie egáioinamona o uído cíonana o íobitaja izói, afe izói ñúefuiaí o jítáigana o comeci ífuena caimare itátaite. <sup>23</sup> Mei íadi ñúefuemo o comécíñenia, fiénidífuedo mácaja izói itio. Nana o comeci ífue zuure íteza. Mei Juziñamui omo jóonega ñuera comécido dama fiénidífueemo o comécía nñi jamánomo jítifomo o illa izoide. ¡Nñi jamánomo jítirena!

*Juziñamuimo cai jainaina llezica úcubemo jaináinidicai*

*(Lc 16.13)*

<sup>24</sup> Daje llezica mena ocuídímie anamo buna ínide, mei ménamiède anamo o íadi dáamie éoitio, íemo jíáimie izíruitio. Daje izói dáamiemo ñue tájjiitio, mei íadi jíáimiena jamairuitio. Afe izói Juziñamuina abi o náamataja llezica úcubemo abina náamatanidio.

*Juziñamui ie úruiaína jáidinona ñue úiñote*

*(Lc 12.22-31)*

<sup>25</sup> Jira ómoína daíticue, nágarui omoi jitaiga güille naa jirole diga áfemo comeci faiñeno omoi iri. Daje izói daa o jítalle ínícíuromo comeci faiñeno omoi iri. Cai ñue illafue güille baímo ráífide. Daje izói cai caana abi iníroi baímo ráífide. <sup>26</sup> Mai monamo feede ófocuizaimo omoi comécíiri. Afémaci güilleniána riñediaíoi. Daje izói llíziena jofo oñediaíoi, íemo jíái güille ñue finóranomo ofítañediaíoi. Mei íadi monamo ite omoi Moo afémacina ecáfírede. Omoi bie ófocuizai baímo iere ráífina. <sup>27</sup> Omoimona, comeci iere fáiamona ¿mei bu ie zairilla caífomo medio metro zairirena? Buna jaca daí ínide. Dama Juziñamui ona díñori o zairítaja. Afe izói o güillena ócuite, jira áfemo comeci faiñeno omoi iri.

<sup>28</sup> Iemo jíái ¿nibái mei ínícíuromo iere comeci fáífirediomoi? Jazícimo ite záfiamo omoi comécíiri. Raamo tájjiñediaíoi, daje izói íníroina niñediaíoi. Mei íadi iere ebire cíoidiaíoi. <sup>29</sup> Iemona ómoína daíticue jaiái illaíma Salomón iere ráarede íadi, bie záfia ebírena izói, ebírediroina jítáñede. <sup>30</sup> Mei Juziñamui ráitíaimo ebire cíoitaiadi, afémie

ómoimo jeruíñeno iníroina jítaite, mei afe ráitíai íanori ebire eróideza. Iemo afe jiáiruido ja jobáicaza.

<sup>31</sup> Iemona nana jiáie raamo comeci faiñeno omoi iri. “Cai güille iñédeza, ¿minica güíticai?” daiñeno omoi iri. Daje izói jiái “¿Minica jíroíticai?” daiñeno omoi iri. Iemo jiái, “Iníroinidicaiza, ¿minica jítaiticai?” daiñeno omoi iri. <sup>32</sup> Mei uafue, bíníemo ite Juziñamuimo ínoñede comíni bífuiaimo iere comécidíai; mei íadi omoi Moo monamo ite. Afémie bie izoide raana omoi jítáillana onode. Jira óómoimo iñede raamo comeci fáinidíomoi.

<sup>33</sup> Mei íemona Juziñamui illáimana illáruimo duide raamo raíre uícodo járitáifíreiri. Daje izói jiáie ie ocuícáfue raíre uícodo omo fínofíreiri. Afe mei nana bie omoi jitaiga raana óitíomoi. <sup>34</sup> Uire jiti cómuitifuemo comeci faiñeno omoi iri, mei uire aferui dama ie comeci uille ráfueníai átiite. Nágaruillaído comuide comeci fáille ráfuíai ja figo báiteza, baimo nabáinide.

## 7

### *Jiáima jánana fieni úriñeno o iri* (Lc 6.37-38, 41-42)

<sup>1</sup> Juziñamui óómoimo izire jícanoñeilla, mai jiáima jánana fieni úriñeno o iri. <sup>2</sup> Mei jiáima jánana riire o úrilla izói, afe izói Juziñamui riire óómoimo jícánoite. Jiámamo raana fácano omoi feca izói, afe izói afémie óómoimo fácano fécaite. <sup>3</sup> ¿Mei ñie izói o ama uimo ite jéenide ráaruaina cíodio, mei íadi afe dáaruido dama o uimo jéerie rarúnguai íllana náfueñedio? (Afena dáiacade: Aillo fiénidífue omo illa llezica, ¿ñie izói due jiza oni nibéfodo baíidímie jánana úriredio? Urinidio.) <sup>4</sup> Iemo afe jéerie rarúnguai dama o uimo íadi o ámana ¿ñie izói daíredio: “O uimo ite jéenide ráaruai cuena otátari”? Daiñidio. <sup>5</sup> ¡Abi díne ñue cíoide comécina íáiredímedio! Fueñe dama o uimo ite jéerie rarúnguai oíri. Afe o ua mei, afe o ama uimo ite jéenide ráaruaina jino óredioza.

<sup>6</sup> Juziñamui ñue finoca raa, Juziñamuina íairuitinomo fecáñeno iri; fecadíomoiniadi áfena jámairuillano afémaci óómoina tíbítaitíai. Daje izói perla izoide ráfidífuíai meróníai izoide íaífuíairedinomo lloñeno iri; llotíomoiniadi meróníai ríiríifirena izói bimaci óómoina uáitaíbitíai. Afe izoide ñuefuíai fieni íacadinomo llónide.

### *Juziñamuimo cai jicalle bie izói jóide* (Lc 11.9-13; 6.31)

<sup>7</sup> Mai omoi jicari, íemona Juziñamui óómoimo fécaite. Mai omoi jenori; báitíomoiiza. Nazémoma caímare omoi uáidori; óómoimo tuizáibiteza. <sup>8</sup> Mei jicádimie llínoteza. Daje izói jenódimie báiteza; íemo jiái nazémoma caímare uáidotímiemo túigaza.

<sup>9</sup> Mei óómoimona dáamie ie jító pan jícaja llezica ¿meita nofícina írede? ¡Jaca ínide! <sup>10</sup> Iemo afémie chamu jícaja llezica ¿meita jaiona írede? ¡Inide! <sup>11</sup> Mei fiénidinodícaí íadi, ñuera raa cai úruiaimo fécajana onódicai. Mei íadi afe baimo monamo ite omoi Moo, afémiemo jicádinomo jamánomo ñuera raa fécajana onode.

<sup>12</sup> Mei íemona omoi jitailla jiáimaci íaióí óómoimo fínua dieze, dájeze afémacimo finóredíomoi. Mei Moisés ocuica uai bie izói jóideza. Daje izói jaíai Juziñamui uai lloraini cuega uai afe izói jóideza.

### *Rillírede monamo duide io rafue* (Lc 13.24)

<sup>13</sup> Mei afe rillírede monamo duide iodo omoi jai. Niné tánocaitaitinomo jóide io iere áilloo. Daje izói áfeo boilla jamánomo áillue. Afeodo aillo comíni jailla. <sup>14</sup> Mei jiáífodo zíñona cai cáailinomo jóide io jaícina jóide íadi rillírede. Daje izói áfeo boilla rillírede. Afeodo jáidino dúemaci.

*Naga amena ie llizílledo onórede**(Lc 6.43-44)*

<sup>15</sup> Diga comini “Juzíñamui dibénedo úriticai” daidíai, íadi taino llotíai. Afe izoide comínimona abí omoi rairuiri. Afe bimaci ebire jifédino izói ómoimo bitíai. Uáfueza, illáinide ovéjaiaí izói ómoimo bitíai, mei íadi comeci dine illáirede jánallari izóidino.

<sup>16</sup> Afémaci finócafuaído íaioina uáfodo ónoitiomoi. Mei jíirede ñecínamona jírícue óñegaza. Daje izói jíirede monáigimona jíficolliaí óñegaza. <sup>17</sup> Mei daí nana ñuera amena ñue llizide. Daje izói nana fiénide amena fiénidijiaína llizide. <sup>18</sup> Ñuera aménamo fiénide ráajiaí llizínide. Daje izói fiénide aménamo ñuera ráajiaí llizínide. <sup>19</sup> Nana ñuera ráajiaína llizíñede amena tíano iraimo jobaica. <sup>20</sup> Bie izói baie ómoimo bitínona íai, finócaigafuedo uáfodo ónoitiomoi.

*Nana comini monamo ite Juzíñamui illáimana illíruimo jáiñeitiaí**(Lc 13.25-27)*

<sup>21</sup> Nana cuena “Ocuíraima” daífiredino monamo ite Juzíñamui illáimana illánomo jofo jáiñeite. Dani monamo ite cue Moo comeci jitaillana finódino jofo jáirena.

<sup>22</sup> Aféruillaimo dúcia llezica, diga comini cuena dáitiaí, “Ocuíraima, Ocuíraima, o mámecido úrifiredicai. Daje izói o mámecido fiénide joriaína jino orédicai. Daje izói o mámecido ciórainina raana uaido comúaticai.” <sup>23</sup> Mei íadi afémacina dáiticue: “Jaca ómoína onóñedicue. Diga íaifuaí comúidiomóiza, cúemona oni ii,” dáiticue.

*Ménade jofo nillino rafue**(Lc 6.47-49; Mr 1.22)*

<sup>24</sup> Mei afe bie izói joide. Cuena cacádimie íemo cue ocuícana finódime jofo nillana baitádimie izoide. Afémie mairídimie ie jofo nite. <sup>25</sup> Riire noci biide, íemo ille riire renaide, íemo riirede jairifo afécomo jaiñode; mei íadi afeco jainóñede, mei mairide éniemo nígaza. <sup>26</sup> Mei jáifodo cuena cacádimie mei íadi cue ocuícana finóñedime jofo nillana figo baitáñedime izoide. Afémie ídiaidino ie jofo nite. <sup>27</sup> Afe mei riire noci biide, íemo ille riire renaide, íemo riirede jairifo jaiñode. Iemona afécona jainode. Nana ana baiíllano due fiébiñeno niné táinocaide. Jesús dinori úrite.

<sup>28</sup> Jesús úrilla méfomo, nana comini ie llófuemarillari caimare fáigacaidiaí, <sup>29</sup> mei riinoredime izói íaioína llófuezeza. Jaiaí ocuica uai llófufiredino riinonide llófuia izói afémie llófueñede.

**8***Jesús chíinaitimie jíllotate**(Mr 1.40-45; Lc 5.12-16)*

<sup>1</sup> Jesús caifónedumona ana billa llezica, diga comini afémiedo jáidiaí. <sup>2</sup> Iemo irárede chíinaitimie Jesumo ánozide. Afémie Jesús anamo dújuillano daide:

—Ocuíraima, o jitáiadi bie dúicono cúemona oréredio. Cúemona oreri, —daide.

<sup>3</sup> Iemona Jesús ie ónoído afémiena jétano daide:

—Jii, ona jíllotaiacaducue. Benómona ja íainitioza, —daide.

Daí daína llezica ie iráretade chiie jacáibicaide. <sup>4</sup> Iemo Jesús íena daide:

—Cácarei, bifue bumo lloñeno iri. Dama lletáriraimamo o abi o ácatari. Afe llezica Moisés ocuica o abi ja íainide daítate raa afénomo mai o fecari. Afemona nana comini o chiie ja jacáillana ónoitiaí, —daide.

*Romano illaíma ocuífíregamiena Jesús jíllotate**(Lc 7.1-10)*

<sup>5</sup> Capernaum jófue mo Jesús jailla llezica, Romano illaíma Jesumo billano izire jicade:

<sup>6</sup>—Ocuíraima, cue ócuifirega jítócome iere irárede. Batí jofomo bíide. Afémie tíziri iere jamánomo izi cácade, —daide.

<sup>7</sup>Jira Jesús íena daide:

—O jofomo jaillano afémiena jíllotaiticue, —daide.

<sup>8</sup>Jira illaíma Jesús uai ote:

—Ocuíraima, cue jofomo o jáillena, cue iere jamáimedicue. Jicana o uaido o ocuri, afémie jíllolleza. <sup>9</sup>Mei dama cue jáíllaíma uai anamo iticue. Daje izói cue anamo cue úiñoga fuiríraíni ite. Dáamiena “Bi” cue daíía, afémie bírede. Jáímiena “Jai” cue daíía afémie jaide. Daje izói cue ocuífiregamiena “Bie fino” cue daíía, afémie áfena finode, —daide.

<sup>10</sup>Jesús áfena cacáillano, caimare fáigacaillano afémiedo jáidinona daide:

—Uáfuenta ómoína daidicue: Nana Israel náiraímo bie izói ínnote come jaca baiñédicue.

<sup>11</sup>Omoína daidicue, nágafeniaímona aillo oni jicánemaci bíitiaíoi. Afémaci monamo ite Juziñamui illáímana illánomo jofo ráinazaillano, daane Abraham, Isaac, Jacob diga güítiaíoi. <sup>12</sup>Mei íadi fueñe jáiredino, jino jítinomo dotálliaíoi. Afénomo afémaci iere éenaicana murímuritiaíoi, —daide.

<sup>13</sup>Iemona afe illáímana daide:

—Mai o jofomo jai. O ínuaize íteza, —daide.

Daíí daína llezica afe irárede jítócome jíllode.

*Jesús Pedro jifaiño jíllotate*  
(Mr 1.29-31; Lc 4.38-39)

<sup>14</sup>Afe mei Jesús Pedro jofomo jaide. Afénomo Pedro jifaiño abi cuaríllari irare bíinana cíóizaide. <sup>15</sup>Iemo Jesús afengo onoi llínua llezica ie abi cuarilla llícaide. Afemona afengo náidacaillano afémaci jitailla bai atide.

*Jesús aillo iráredinuiaí jíllotate*  
(Mr 1.32-34; Lc 4.40-41)

<sup>16</sup>Aferui jitoma jímaicaidemo diga fiénide jóríai ogano Jesumo atídíaíoi. Iemona daade uaido afe fiénide jóríai jino orede. Daje izói nane nana duícotaidinuiaí afémie jíllotate.

<sup>17</sup>Nana bie izói zúide, jaiyai uai lloiraíma Isaías lloga uai fuitállena. Be afe uai: “Cai íraniaí afémie uite. Daje izói cai duícuaí afémie oni orede.” Daíí Isaías llote.

*Jesudo jáiacadino bie izói írediaíoi*  
(Lc 9.57-62)

Afe mei jorai fuédamo illa llezica, <sup>18</sup>diga comíni Jesús abido nágafene gairíllana cíoillano, afémie “Mai jorai ruicáfenemo cai jai,” daide. <sup>19</sup>Iemo ocuica uai llófueráima Jesumo billano daide:

—Llófueráima, nana o jáiacana diné odo jáiacadicue, —daide.

<sup>20</sup>Jira Jesús ie uai ote:

—Nana jazici rílleniaí uái ífireillino ite. Daje izói caifodo féedinuiaí uái íaíoi ráíillino ite. Mei íadi Nanoide fima Jitódicueza, dáanori uái cue illino iñede, —daide.

<sup>21</sup>Iemo jáíie ie llófuegamacimona dáamie íena daide:

—Odo jáiacadicue, mei íadi fueñe cue ore cue moo tílle dinó cue ílleza, íemo íena ráíiacadicue; afe méifomo odo jáíticue, —daide.

<sup>22</sup>Jira Jesús ie uai ote:

—Mai cuedo bi. Juziñamuiimo náfueñedino tíide izóidimaci; mai mei jadíe ua tíitímie afémaci ráílleza. O cuedo bi, —daide.

*Jesús jairifo naa jorai bagua diga llícaitate*  
(Mr 4.35-41; Lc 8.22-25)

<sup>23</sup> Ie mei Jesús naa ie llófuegamaci diga áillue nocaedo jáidiaioi. <sup>24</sup> Afe mei jorai ruicáfenemo jáidiaioimo, daa jamánomo riürede jairifo náidacailla. Afe jairífojona jorai bagua afecae acónillaina íbáiacade izoide. Mei íadi afe llezica Jesús inide. <sup>25</sup> Iemona ie llófuegamaci ie cazítatiaioi. Cazítajano íena daidíaioi:

—¡Ocuíraima, cai jállota! ¡Ja buízaidicaiza! —daidíaioi.

<sup>26</sup> Jira afémie uai ote:

—¿Nibái mei iere jacínaitiomo? ¡Omoi nai figo ínoñediomo! —daide.

Iemona afémie náidacaillano jairifo naa jorai diga lletade. Daí ie daína llezica jorai bagóñeno uái ite. <sup>27</sup> Iemona afécaemo itímiaí caimare fáigacaidiaioi. Fáigacaillano daidíaioi:

—Bie mei, ¿ñie come? ¡Bímie daína uaina jairifo naa jorai diga ínote! —daidíaioi.

*Gerasa éniemo ite fiénide joríaí úicaiga íaillinoi rafue*

*(Mr 5.1-20; Lc 8.26-39)*

<sup>28</sup> Afe mei Jesús jorai enéfenemo Gerasa éniemo dúcidemo, mena íima raiáfuaímona Jesús diné bite. Afe íaillinoi fiénide joríaí úicaiga. Afe íaillinoi jamánomo jacire illáirede. Afedo jóide iodo buna jáinide. <sup>29</sup> Jesús afe íaillinoi lleta llezica caillíoidiaillinoi:

—Jesús, Juzíñamui Jitódioza. ¿Nibái mei cócomo jíricaidio? ¿Nai aferui dúciñedemo benó coco duere fínuaíbitio? —daidíaillinoi.

<sup>30</sup> Afe llezica afe áinori tóica meróniaí güitíaioi. <sup>31</sup> Jira afe fiénide joríaí Jesumo izire jicádiaioi:

—Bie come íaillinoimona jino cai o oréadi, táinomo oréñeno baie meróniaímo cai oreri, —daidíaioi.

<sup>32</sup> Jira Jesús íaioína daide:

—Mai afénoimo omoi jai, —daide.

Afe fiénide joríaí afe íaillinoimona jino billano meróniaímo jaide. Afe mei afe meróniaí jorai arímo ite íconido jabida jóraímo cocídiaioi. Afénoimo coróbaizidiaioi.

<sup>33</sup> Iemona afe meróniaí úíñotino jacínaillano botádiaioi. Jófuemo dúcillano nana aféfuiaí llotíaioi. Daje izói fiénide joríaí úicaiga íaillinoimo finócafue llotíaioi. <sup>34</sup> Iemona nana afe jofue comíni Jesús illánomo jáidiaioi. Afémiena cíoillano, afe íaioi éniemona oni jáillena izire jicádiaioi.

## 9

*Jesús tízitaitímie jállotate*

*(Mr 2.1-12; Lc 5.17-26)*

<sup>1</sup> Afe mei Jesús áillue nocaemo ana jaillano jorai enéferaimo ruica jaide. Iemo dama ie jófuemo dúcide. <sup>2</sup> Afénoimo tízitaitímie Jesumo atídiaioi, naa ie bírallu diga. Afémaci ínuana Jesús cíoillano, iráredimíena daide:

—Cue izíruigamie, mai caimare íi, mei omo ite fiénidífuiaí jae dógaza, —daide.

<sup>3</sup> Jira ocuica uai llófuetinomona dáarie comeci anado daidíaioi: “Bímie baie jíáímie fiénidífuiaí dóina dánado Juzíñamuina ícírítade.” <sup>4</sup> Jesús afémaci comécido dánana onóillano daide:

—¿Nibái mei fiéni omoi comeci facádiomo? <sup>5</sup> Mei daí daína ménade uáimona ¿ñie uai iere llotáinina? Afe ménade uai be ñie: O fiénidífuie muiñócaza. Iemo jíáie uai bie izói daína: Náidacaillano, maca. (Íiraie uai jamánomo llotáirede, mei omoi eróicana íficaideza.)

<sup>6</sup> Ie jira Nanoide íima Jitódícueza, bíniemo cue illa llezica, comínimo ite fiénidífuie cue muiñolle ríino jino ómoimo cíotaitícue, —daide.

Afemona afe tízitaitímiena Jesús daide:

—Mai náidacai, náidacaillano o bírallu llínota o jofomo jai, —daide.



<sup>7</sup> Afemona tízitaitimie náidacaillano, ie jofomo jaide. <sup>8</sup> Nana comini áfena cíoillano iere jacínaitiaioi. Afemona Juziñamuimo ñúefuena nitádiaioi: “Mei Juziñamui áillue ríino bie cómemo fecádeza,” daidíaiioi.

*Jesús Mateo uáidote*

*(Mr 2.13-17; Lc 5.27-32)*

<sup>9</sup> Jesús afénomona oni jaide. Jaillano Mateo dainámiena ciode. Afémie gobierno ibátaga úcube llínoraíma. Ie jira afe úcube oránomo ráiide. Jesús íena daide:

—Mai cuedo bi, —daide.

Ie jira afe Mateo náidacaillano iedo jaide.

<sup>10</sup> Afe jiáiruido Jesús naa ie llófuegamaciri jofo eromo íaioi güilla llezica, aillo jiáie úcube llínofiredino naa jiáie fiénidino dáanomo güitíaiioi. <sup>11</sup> Mei íadi Fariséuai áfena cíoillano afémie llófueganomo jicánotiaioi:

—¿Ñibái mei omoi llófuetimie úcube llínofiredino diga naa fiénidinori güite? — jicánotiaioi.

<sup>12</sup> Afena Jesús cacáillano, íaioina daide:

—Iociredino iránidino daje izói manóriraimana jítaiñediaioi, mei jiáifodo iráredino manóriraimana jitailla. <sup>13</sup> Bie jaiiai Juziñamui Cuegáuai dáinana omoi onóizairi. Afe be níuui: “Conímana omoi duéruillena daje izói cuena omoi duéruillena jítáidicue. Mei íadi omoi fatá cuemo fia fecaca ríllenai jítáidicue,” daide. Ie jira dani ñúemacina abi mamédinona uáiduaibiñedicue, mei jiáifodo fiénidino íaioi comeci ifue méidollena biticue, —daide Jesús.

*Íaioi fímairillena Jesumo jicánotiaioi*

*(Mr 2.18-22; Lc 5.33-39)*

<sup>14</sup> Afe mei Juan Bautístado jáidino Jesumo dúciillano jicánotiaioi:

—Mei cai bie fariséuai diga ¿ñibái fímairitagacai, mei íadi o llófuegamaci fímairiñediaioi? —daidíaiioi.

<sup>15</sup> Jira Jesús uai ote:

—¿Airena rafue llezica áfemo uáidogano, meita zúurenari güínidiaioi? Daí íñédeza; ringo otímie íaioi cigimo illa llezica caimare güitíaiioi. Mei íadi ringo otímie íaioimona báiruaibillirui dúcite. Aféruído comeci zúurenari güíñeitiaioi. Ringo otímie izói birui cuedo jáicadino cigiri itícueza, —daide.

<sup>16</sup> Jesús nane jiáie onótatífue llote:

—Jaca ninomo dáamie tífoñegaroi mona jaitada jácaie inícuíromo nitáñediaioi. Daí nitáadi afe cómoroi jácaroina fiéni finode; mei nai jócoñega cómoroi jofo jainánua mona jácaroimo ite cúaidinona aillo oni cuatácana jaide. <sup>17</sup> Daje izói comue vino jácara igorai finoina iciru izoide raamo totánide. Dámie daí totáadi afe comue vino afe jácara iciruna eroide raana cúataite. Afemona afe iciru naa vino diga táinomo fáifite. Iemona comue vino comue igorai finoina iciruna eróidemo jónefírega. Iemona afe naga ñue éenoga. (Afe bie dáinado Jesús ie comue llófueinafue, íemo íaioi jaiiai llófuegafue dáanomo ínonide, dáanomo náfuenide, íaioimo llófue.)

*Jairo jiza íemo jiáingo Jesús iniroi jétaibitíngo Jesús jílloate*

*(Mr 5.21-43; Lc 8.40-56)*

<sup>18</sup> Jesús bífuiaido úrilla llezica, judío illaíma Jesumo dúcide. Dúciillano, afémie anamo fueco dine bíjicaillano daide:

—Cue jiza ja tíide, mei íadi o bíllaza, mei aféngomo o onoi bítaibiri afengo jíllolleza, —daide.

<sup>19</sup> Afe jira, Jesús náidacaillano afémie diné jaide naa ie llófuegamaciri. <sup>20</sup> Afémie iodo jailla llezica, jiáie iráredingo afémiemo bite. Afengo afe irárenamona doce diga fimona dícotaita. Jesús comini cígido rillire jailla llezica, afengo Jesús jinófene dinena ie iniroi fueda jétabite. <sup>21</sup> Mei afengo comécido daide: “Daa ie iniroi cue jetáadi jílloiticue,” daide.

<sup>22</sup> Iemona Jesús meine abido gírecaillano aféngona cíoillano daide:

—Ízruigango, caimare o iri. O ínnumona ja jíllodioza, —daide.

Daí daina llezica afengo jíllode. Afemona afengo ja íocirede.

<sup>23</sup> Jesús illaíma jofomo dúcia llezica, aillo comini come tíllari cáillicailli éediaíoi. Afe llezica jiáimaci toticai zuure fúudiaíoi. <sup>24</sup> Jesús áfena cíoillano daide:

—Benómona oni omoi jai. Afeza tíñedeza fia inide, —daide.

Afémie dáinari comini íemo zadáidiaíoi. <sup>25</sup> Mei íadi Jesús afémacina jino orede. Oriano jofa jaide. Jofa jaillano afe tídingo ónoído líinote. Líinua llezica afengo caífo náidacaide.

<sup>26</sup> Iemona Jesús finócafue nana afe éniemo itígobiaído jica jalleide.

### *Jesús mena uínidimie jíllotate*

<sup>27</sup> Afénomona Jesús jáidemo, mena uínidimie ie óodana caillícana bite. Daídíaillinoi:

—Davidmona comúidimie Juzíñamui oreca Mesía ímie, maí cócomo dúecai, —daídíaillinoi.

<sup>28</sup> Afe mei Jesús jofa eromo jáidemo, afe íaillinoi Jesumo dúcide. Iemo Jesús íaillinoína daide:

—Cuemo ómicoi jicácafueña finóredicueza ¿meita ínnotiomicoi? —daide.

Jira afe íaillinoi daide:

—Ocuíraíma, jii ínnoticoco, —daídíaillinoi.

<sup>29</sup> Iemona Jesús íaillinoi ui jetánota daide:

—Ómicoi ínua dieze, ómicoímo cómuíteza, —daide.

<sup>30</sup> Daí ie daina llezica, íaillinoi ui ñue cíoide. Afe mei Jesús íaillinoína riire daide: “Bie ómicoímo cue finócafue bumo lloñeno ómicoi iri,” daide.

<sup>31</sup> Afena afémie rairuide íadi, afe íaillinoi jino billano, nana afénomo Jesús ui mánuana llócadiaillinoi.

### *Jesús uáinidimie jíllotate*

<sup>32</sup> Afe mei Jesús afénomona jáidemo, fiénide joríaí úicaiga uáinidimie, Jesumo atídiaíoi.

<sup>33</sup> Iemona Jesús afe fiénide joríaí jino orede. Afemona uáinidimie ja úrite. Aferi comini caimare fáigacaillano daídíaíoi:

—Bie izóidífueña jaca Israel nairai cígimo cíóñedicaí, —daídíaíoi.

<sup>34</sup> Mei íadi fariséuai daídíaíoi:

—Jesús dama fiénide joríaí illaíma ríinodo afe úicaigamie fiénide joríaína jino orede, —daídíaíoi.

### *Jesús comínimo dúecaide*

<sup>35</sup> Afe mei Jesús nana aféniemo ite jófuaímo naa onífedo itícuaido llófuaíide. Afénuaímo ite Juzíñamui uai llófueriracuaido llófuete. Afémie Juzíñamui illáimana illarui ñuera rafue llocana uite. Iemo nana jiáiforiedemo izi cácade iráredinona jíllotate. <sup>36</sup> Meita nana daí itínona cíoillano, afémacimo Jesús dúecaide, mei úiñoñegano izóidiaíoi. Ie jira oni ráide ovéjaíai izóidiaíoiza. Afémaci duere finócaíaiíoi, daje izói duere zefuide buna ráiruiñegano izói itíaíoi. <sup>37</sup> Afemona Jesús ie llófuegamacina daide:

—Uáfueza, jacáfaimo ite raa ailla llezica jofa óitino íñena izói, birui Juzíñamui illáimana illánomo jofa órega comini aillo ite. Mei íadi afémaci jofa óitino figo íñede. (Afe jofa óitino jiáimacimo ñúefue llóitino.) <sup>38</sup> Ie jira jacafai Naama izóidimíemo jiáie ñúefue llóitimacina omoi jicari, afémaci afémie oréllena.

## 10

*Jesús doce dígamie ie oni oréllino nizede  
(Mr 3.13-19; Lc 6.12-16)*

<sup>1</sup> Afe mei Jesús doce dígade ie llófuegamaci uáidote. Uáiduno fiénide jóríai comínimona oni orelle ríino íaioimo fecade. Daje izóí nana jiáiforiede duico ogano jíllotalle ríino afémacimo fecade.

<sup>2</sup> Be afe doce dígadimaci oni oréllino mámečiai: Nánoramie Simón, dáamiena Pedro daína, íemo ie ama Andrés, íemo Zebedeo jitó íaillinoi Santiago Juan díga, <sup>3</sup> íemo Felipe, íemo Bartolomé, íemo Tomás, íemo gobierno íbátaga úcube llínoraíma Mateo, íemo Alfeo jitó Santiago, íemo Lebeo dáamie mámeçi Tadeo, <sup>4</sup> íemo íere Járidotimacimo jaináidimie Simón, íemo uire Jesús fécaitimie Judas Iscariote.

*Jesús ie llófuegamaci jiáigobíaimo llófuellena orede  
(Mr 6.7-13; Lc 9.1-6)*

<sup>5</sup> Jesús bie doce dígamiena ie oréacana llezica íaioi táijille izóí llote. Daide:

—Judíoñedino éniemo omoi jáiñeno iri. Daje izóí Samaria éniemo ite jófuiaimo jáiñeno iri. <sup>6</sup> Mei jiáifodo Israel náiraímo ovejai féiraila izóí féiraitinomo omoi jairi. <sup>7</sup> Monamo ite Juzíñamui illáimana illirui ánozillana llocana omoi uiri. <sup>8</sup> Íraredinuíai omoi jíllotairi. Tíidinuíai meine abido omoi cáatari. Daje izóí íáire chíñaitimíaiña ñue omoi finori. Daje izóí comínimo ite fiénide jóríai jino oreri. Bie izóí omoi táijille ríinona raiñoñeno ómoimo fecádícue, íemona áfedo jiáímacina raiñoñeno omoi canori.

<sup>9</sup> Jabe omoi jaille llezica úcubena uiñeno iri. <sup>10</sup> Omoi cirítico uiñeno iri. Jaca daa o abímo jíidíroi díga jairi. Daje izóí ídai icona uiñeno iri, íemo jiái macara jigüida uiñeno iri. Mei jiáímacina omoi cánua jira, áfemo táijiraíma jaca raiñoñeno écafiregaza.

<sup>11</sup> Omoi jáillinomo ite comíni jófueмо omoi dúcia llezica, ñue ínofíregamie illano omoi jeno. Afénomo nai oni omoi jáiñeille díno uái omoi iri. <sup>12</sup> Jofo jaillano, afémaci ñue daíí uáidori. “Caímare uái omoi iri,” afémacina daííri. <sup>13</sup> Afe jofo comíni caímare omoi llínoiadi, omoi afémaci ie ñue mameca uai afémacimo fiébiteza. Mei íadi omoi daína uaina afémaci náfueñenia, afémacimo omoi mameca ñue uai abido ómoimo bííteza. <sup>14</sup> Mei íadi afémaci ómoína llínoacañenia, daje izóí omoi llógamo cacáreacañenia, afe jófómona, daje izóí afe jófuemona oni omoi jai. Omoi jailla llezica omoi éibamo ite íaie afémacimo teténocairi. Afedo íaioi comécimo ite íaifue nai íaioimo íllana ónoítiaioi. <sup>15</sup> Mei ua ómoína daíítícue, íiraicaiño ríire jícanolliruímo dúcina llezica, bie ómoína ruífruite comíni, Sodoma Gomorra díga jófue comíni duere zefuilla baímo, íere duere finólliaioi.

*Cristo ícoínia duere cai zefuillííue*

<sup>16</sup> Omoi cacai. Ovejai illáirede jazici jíco cígímo óría izóí ómoína orédícue. Jaio abí rairuilla onona izóí abí omoi onoiri. Mei íadi afe llezica fíiciri illáienina izóí omoi iri. <sup>17</sup> Ñue abí omoi rairuiri, mei comíni jabóidillainímo ómoína fécaítiaioíza. Juzíñamui uai lloraco eromo omoi fáítiaioíza. <sup>18</sup> Íemo ríillainímo, daje izóí jamánomo ocuídillainímo cue ícoínia ómoína uitíiaioíza. Íemo afe omoi íaioi úlledo afe illáinímo cuedo úritíomoi. Daje izóí afe judíoñedínomo cuedo úritíomoi. <sup>19</sup> Mei íadi illáicomínímo omoi íaioi uille llezica, “¿Ñíe izóí úritícai?” daínamo comeci faiñeno iri; daje izóí “¿Ñíe uailaí llóítícai?” daííñeno iri. Mei omoi úrille llezica, Juzíñamui ómoína úritaíteza. <sup>20</sup> Afe llezica dani omoi comeci izóí úríñeítíomoi. Moo Juzíñamui Ñuera Joreño ómoído úrilleza.

<sup>21</sup> Afe llezica comíni dani íaioi nahí ámana Crístomo íñotimíena illa jira, jiáímacimo íena fállena fécaítiaioi. Daje izóí móotíai dani íaioi Crístomo íñote jíótíai fállena fécaítiaioi. Íemo jiái jíótíai dani íaioi móotíaido éocana eróítiaioi, íemo íaioína tíátaitiaioi. <sup>22</sup> Nana comíni

cue ícoinia ómoído éoícana eróitiaíoi. Mei íadi fuillínomo fáicanocaiñeno ñue ínoicaitimie dama jílloite. <sup>23</sup> Daa jofue comini omoí duere finóadi, jiáie jófue mo omoí jairi. Mei ua ómoína dáititue, nana Israel jófuiado nai omoí jáiñenia uícodo raire dúcíticueza; mei Nanoide fima Jitó Crístodicue.

<sup>24</sup> Llófuegamacimona llófuetimie baimo jamánomoidimie iñede. Daje izói ocuífirgamie ie ocuídime baimo ocuínide. <sup>25</sup> Llófuegamie ie llófuetimie illa izói írede. Daje izói ocuífirgamie ie ocuídime illa izói írede. Jofo naama izóidicueza, Beelzebú daina Taife mámecei cuemo íaíoi jítáadi, jofo ero úruiaí mámeceina dájena jítaitiaíoi. Iemo afe úruiaína cue baimo fieni úritiaíoiza.

*¿Ñimienajacíruiñe dái?*  
(Lc 12.2-7)

<sup>26</sup> Ie jira comínina jacíruiñeno iri. Mei nana báinino daina uailaí jino uáfodo cíozite. Daje izói nana báinino itífuiaína jino uáfodo onuille. <sup>27</sup> Birui jítifomo úrilla izói báinino ómoímo cue llógana, uire uáfodo monari comínimo omoí lloiri. Daje izói ómoína báinino cue daina uai, comini dáanomo uáidota ficire lloiri. <sup>28</sup> Omoí íeizi títaitinona jacíruiñeno iri; mei omoí joreñona títánidiaíoiza. Mei jiáífo boode iraimo cai íeizi naa cai joreño duere finótaitimienona omoí jacíruiñe.

<sup>29</sup> Onódiomoiza mena duera ófocuízaí duera úcubedo íbárega. Mei daí íaíoi ráifíñede íadi, afémacimona omoí Moo Juzíñamui daíñenia dácuiño tiide izói ana báíñeite. <sup>30</sup> Mei uafue, omoí ífócimo ífótiraíai illa dígatiraí facádoga. <sup>31</sup> Mei daítadeza jacíruiñeno omoí iri. Omoí, aillo ófocuíñuai baimo ráifídiomoi.

*Comini eróicana Jesuna jíeruitino*  
(Lc 12.8-9)

<sup>32</sup> Comini eróicana nana cuena jíeruitinona monamo ite cue Moo eróicana jíeruiticue. <sup>33</sup> Mei íadi comini eróicana cuena jáanotinona, afe izói monamo ite cue Moo uíecori afémacina jáanoiticue.

*Comini conímána ruifíruitatallena biticue*  
(Lc 12.51-53; 14.26-27)

<sup>34</sup> Comini dájena uái illifue bínimo lluaíbiticueza daíñeno iri. Mei jiáífodo dájena uái illifue lluaíbiñeno, fuirilla izoide lluaíbiticue. <sup>35</sup> Cuemo ínuamona dáamie ie moo dínenona íena ruifíruicaite. Afe daí cue bíllamona dájena uái íñeitiaillinoí. Daje izói ei cuemo ínuua jira afengo jiza dínenona ruifíruibicaite. Afe daí cue bíllamona dájena uái íñeitiaínguaí, íemo jiáí cuemo ínuamona mio ie jifaiño dínenona ruifíruibicaite. Afe daí cue bíllamona dájena uái íñeitiaínguaí. <sup>36</sup> Iemona illa dígamie dama ie jofo ero comini dínenona éoigamienona mámeitiaíoi.

<sup>37</sup> Nínó daa come ie moo, ie eina cue baimo izíruia, afémie cuemo dúinide. Daje izói nínó daa come ie jítana, níbai ie jízana cue baimo ie izíruia, afémie cuemo dúinide. <sup>38</sup> Iemo jiáí, comini dama afémie títácanamo náfuiano cuedo jáiacañedimie afémie cuemo dúinide. <sup>39</sup> Ie jira ie cáanano rairuácadimie áfena táinomo fáifitaite. Mei jiáífodo cue ícoinia ie cáanano táinomo fáifitimie afe fáifidena baimo ziiño illínona máíñoite.

*Jirídua izóidífuiaí*  
(Mr 9.41)

<sup>40</sup> Iemo Jesús nai úrillano daíde: Omoína caimare uáidotino, daje izói cuena caimare uáidote. Iemo cuena caimare uáidotino daje izói cuena orédimienona caimare uáidote. <sup>41</sup> Juzíñamui uai jino llóraíma Juzíñamui díbénedo bíllado afémienona caimare uáidotimie, dájeze afémie jíridua izói jíridoite. Daje izói ñuemienona caimare uáidotimie afe jiáímie ñue íllado, afémie jíridua izói jíridoite. <sup>42</sup> Daje izói nínó daa come cue llófuegamacimona

jabóidimie mo daa due jiza mánaide jáinoina jirótaadi, afémie cuedo jailla jira, afe jirótatimie uáfueña íeiena mameca raana jirídoite, —dinori Jesús ie oréllimacimo llófuete.

## 11

### *Juan Bautista orécano (Lc 7.18-35)*

<sup>1</sup> Jesús ie doce dígade llófuegamaci íaioi táijille izói llófuiana fuilla méifomo, Jesús oni afe éniemo ite jófuiaimo jaide, afénomo ite comini llófuellena.

<sup>2</sup> Aféruido Juan Bautista llavéracomo illa llezica afémie Jesús finócafuiaina fidide. Ie jira iedo jáidinomona dáarie Jesumo jicánuaítate. <sup>3</sup> Jesumo dúcillano jicánotiaioi:

—¿Meita o biite Cristo dainámiedio? ¿Nibai nai jáíie bíitimie úñoredicaí? —daidíaiioi.

<sup>4</sup> Jira Jesús afémacina daide:

—Omoi ciona, omoi cacana izói Juaamo omoi llujáiri. <sup>5</sup> Bífuiái afémiemo llujáiri: Uínidino ñue ciódiaioi, macáñedino macádiaioi, íaire chíñaitino íaioi chíemona ñue jacáitagaiaioi. Iemo jefona cacáñedino ñue cacádiaioi, íemo dáarie tíidino meine abido cáadinona jáidiaioi. Daje izói dúeredino jílona uaina llogáiaioi. <sup>6</sup> Cuemo íñoñeilli uaina baiñédimie íóbite.

<sup>7</sup> Juan orécano meine abido jailla méifomo, Jesús Juaado cominimo úrite; daide:

—Mei táizicimo ¿minícana cióizaidiomoi? Nibai dáamie ie daina uaina méidofiredimiena cióizafirediomoi. <sup>8</sup> Afe izóidimiena omoi cióizaiñenia, ¿mei ñie izóidena cióizaidiomoi? ¿Meita nibai ñue cíoide ráifide iniroi jítáoidimie cióizaidiomoi? Onódiomoiza ráifide ñúecueroi jítáoifiredino jaca illaini jofomo ífirediaioi. <sup>9</sup> Mei írainomo ¿minícana cióizaidiomoi? ¿Nibai Juzíñamui uai jino llórainana cióizaidiomoi? Jí. Uáfueza. Juzíñamui uai llórainana baímo jamánomoidimiena cióizaidiomoi. <sup>10</sup> Juan baie Cuegáuai dainámie. Jaiai uícodo nai cue biñena llezica, aféuaimo Juzíñamui, afémie dibéñedo cuena daide:

O bille io ñue finóllena izói, comini íaioi comécido ñue omo jíeruillena, cue llujáitimie o uícodo orédicue.

<sup>11</sup> Uáfena ómoína dáitícue, nana cominimona ite Juzíñamui uai llórainimona Juan Bautista baímo jamánomoidimiena íñede. Mei jáífodo Juzíñamui illáimana illánomona jabóidimie Juan baímo jamánomoide.

<sup>12</sup> Mei íadi Juan Bautista bíllamona ua biruimo aillo comini ríifuedo raa báirua izói, monamo ite Juzíñamui illáimana illánomo iere izire jofo jáiacadiaioi. Afe ríifuedo afénomo jofo jáiacadino bie izói comécidiaioi: “Afe illánona anáfenuano jofo jáiticaí,” daíí comeci facádiaioi. <sup>13</sup> Nana Juan uícodo ite Juzíñamui uai llóraini naa Moisés lloga ocuica uai díga Juzíñamui illáimana illáruido úritiaioi. Íaioi úrilla méifodo Juan bite. <sup>14</sup> Iemo jáífue ómoimo llóitícue. Omoi íñoiacaniadi, bífuena íñorediomoi. Naui lloga bíite Elías be níimie Juan; mei Juan Elías dainámiena bíteza. <sup>15</sup> Mai cacáreacadino, omoi cacai.

<sup>16</sup> Iemo Jesús nai úrillano daide: Biruúllaido itínona, ¿ñie izói íaioína mámeitícue?

<sup>17</sup> Jofue cigi ibírino jífánote úrue izóidiaioi. Afémaci conímamo ebírede rúado caimátaiacadiaioi, mei íadi áfena fairíoñediaioi. Daje izói conímama zúurede rúado fíraacadiaioi, mei íadi daje izói áfemo cacáreiacañediaioi. <sup>18</sup> Afe bie izói ómoimo ite. Mei Juan Bautista billa llezica afémie fímarillano figo güñede, daje izói ríiji jiróñede. Ie jira “Fíénide joríaí úcaigamiedio” íena daidíomoi. <sup>19</sup> Afe mei cue, afe Nanoide fima Jító dainámiedicue biticue. Billano, jáíimaci izói güitícue, íemo jiródicue. Afemona nane bie izói cuena daidíomoi: “Bímie iere güilláredimie, jéerie jírofredimie. Fíénidino nabáidimie. Daje izói gobierno íbátaga úcube llínoraini nabáifredimie.” Daíí cuedo úritiomoi. Comini

Juziñamui orécanona bie izói fieni daidíaiói íadi, Juziñamui baitácafue dama ie finócafuiaido jino cíozite, —dinori Jesús daide.

*Jófuiaimona dáarie Jesús uaina cacáreacañediaíoi*  
(Lc 10.13-15)

<sup>20</sup> Iemona Jesús jiáie jófuiái comíni íaiói íinoñena jira fueñe lletade. Mei afémie uaido daína comuide cíorainina ráamona nabene afémaci cígimo finódeza. Mei íadi afeno comíni íaiói comeci ífuena nai méidoñediaíoi. Afémie daide:

<sup>21</sup> —¡Corazín jofue comíni nñi dúerena! ¡Daje izói Betsaida jofue comíni nñi duere zefuilla! Mei íaiói cígiri cue finoca cíorainina raa, áfena Tiro comíni daje izói Sidón comíni cígimo nauí finódicuenia, nibai raire jaiái uícodo íaiói comeci ífuena méidotiaíoi. Uafue íaiói comeci ífuena méiduamona, ja diga fimona jaide. Afe llezica zúunaia jitáfírega jítiroi jitáacadiaíoi. Daje izói aféruimo íaiói zúunailla jino ácatallena jízefo ífomo jutáacadiaíoi.

<sup>22</sup> Mei jiáifodo ómoína dáitícue, íraicaiño riire jicánolliruimo Tiro Sidón diga duere finóbina baímo Corazín íemo Betsaida comíni duere finólliaíoi, —daí daide.

<sup>23</sup> Iemo Capernaum jofue comíni Jesús lletade. Afémaci dibénedo daide:

—¿Meita íaiói íinoga jofue monamo úirede? ¿Daí comeci facádiaíoi, ero ua? Mei jiáifodo íaióina daidícue, tíidino illánomo ana dotaca izói niné táinocaitalliaíoi. Mei íaiói cígimo cue finoca cíorainina raa nauí Sodoma jófue finódicuenia, afe jofue nai biruimo nia íte.

<sup>24</sup> Mei íadi jiáifodo Capernaum comínina dáitícue, íraicaiño riire jicánolliruimo Sodoma comíni baímo jicánolliaíoi, —aquíe izói Jesús íaióina lletade.

*Cuomo billano omoi ocózinairi*  
(Lc 10.21-22)

<sup>25</sup> Aféruillaído Jesús daide:

—Mona Ocuíraíma Moo Juziñamui, omo ñúefue jóoneitícue, mei Juziñamui dibénedo onóigafuiái úrue izoide, comécina níifuenide jamai comínimo jino cíotatioza; mei íadi bíníe ráfueña baitádinomona aféfuíai o retáidoga. <sup>26</sup> Jíi, Moo, mei o daí jitáidíza.

<sup>27</sup> Jesús nai úrioido: Cue Moo, nana uafue onóigafuiái ja cuemo llotio. Moo Juziñamui, o Jitódícue, mei íadi buna uáfodo cuena ñue onóñena. O cue Móodioza, dama o ñue cuena onódio. Daje izói buna uáfodo ona ñue onóñena. Cue, o Jitódícueza, dama ona ñue onódícue. Iemo jiái daje izói o Jitó onótaacagano ñue ona ónoitiaíoi.

<sup>28</sup> Iemo comínina daide: Omoi ñúefuíaí finóacanamona zefuínaitino cue diné omoi bí; íemo jiái fiénidí fue ábiana méeruitino daje izói cue diné omoi bí. Omoína ocózinaititícueza. <sup>29</sup> Mai cue diga táijífírena izói ñúefuíaína finóllena omoi onoiri; mei omoi diga táijífíredicueza. Afe dájena táijínana cúemona omoi onoiri. Mei comécina jaridoñedicueza. Daje izói comécina mánaidícueza. Afemona omoi comeci uái ocózinailinona báitímoíza. <sup>30</sup> Omoi diga cue táijínana féinide. Daje izói ómoímo cue ocuíllafue jaca ómoína zéfuitañeite, —dinori úrite Jesús.

## 12

*Jesús llófuegamaci ocózinailaruimo trigo ímoíai dícoiano otá güitíaiói*  
(Mr 2.23-28; Lc 6.1-5)

<sup>1</sup> Aféruído Jesús naa íe llófuegamacírí ocózinailaruído trigo ritino jacafai cígido macade. Afe llezica íe llófuegamaci íere jufínaillano, trigo ímoíai otá güitíaiói. <sup>2</sup> Afena fariséuai cíoillano Jesuna daidíaiói:

—Ero, o llófuegamaci ocózinailaruimo rairuírede táijínamo táijídiaíoi.

<sup>3</sup> Mei íadi Jesús íaióina daide:

—¿Omoi íco jaiái illaíma David finócafue cúegana facádoñediómoí? Afémie naa íe nabáíñairi íere jufínaitiaíoi. <sup>4</sup> Afe llezica Juziñamuimo gairíracomo jofo jaillano

rairuica panes otá güitíai. Mei íadi afe páaniai afémiemona rairuírede, daje izói ie nabáñiaimona rairuírede. Afe pan dama lletáriraini güirede. <sup>5</sup> ¿Mei nane jíaié Moisés ocuica uai cüegana facádoñediomoi? Afénomo daína: Juzíñamui gairíracomo táijide lletáriraini, ocózinaillaruimo ocózinañediai, mei daií íaii illa fiénidífueñede. <sup>6</sup> Mei ómoína dáitícue, birui benomo afe gairíraco baimo jamánomoidimie ite. <sup>7</sup> Bie jíaié Juzíñamui Cuegáuai llógana nai onóñediomoi. Afe be níuui: “Fatá fia fecaca rille baimo cuena izíruillena jitáidícue.” Bíuaina omoi onóadi níufuena finóñedinona “Duere cai finótalli” dáíñeitiomoiza. <sup>8</sup> Mei uáfueza, ocózinaillaru Nanoide íima Jitó Cristo dainámie ocuilla uai anamo ite.

### *Onoína llirídimie rafue*

*(Mr 3.1-6; Lc 6.6-11)*

<sup>9</sup> Afe mei Jesús afénomona jaide. Jaillano Juzíñamui uai llorácomo jofo jaide. <sup>10</sup> Afeco eromo ónoína llirídimie ite. Afe comini Jesumo fiénidífue jitállena jenódiaí. Iemona afémiena jicánodoídiaí:

—¿Meita iráredimie ocózinaillaruimo jíllotarede? —daídíaí.

<sup>11</sup> Jira Jesús afémaci uai ote:

—Omoi mona daa cómemo oveja íadi, afe oveja ocózinaillaruimo ífomo baíadi ¿meita caífo óñega? <sup>12</sup> Mei uafue, daa come oveja baimo jamánomo ráífide. Afemona ñúefue ínuana ocózinaillaruimo rairuíñega.

<sup>13</sup> Iemona Jesús afe iráredimiena daide:

—O onoi jino zúita, —daide.

Jira ie onoi zúitamona, enéfene izói ñuera. <sup>14</sup> Iemona fariséuai jino jaillano, Jesús fállena mamérizaidiaí.

### *Jaii uai llórama Jesudo daína uai como zuilla*

<sup>15</sup> Aféfuena Jesús fidíillano, afénomona oni jaide. Ie jailla llezica aillo comini afémiedo jaide. Iemo Jesús nana iráredino jíllotate. <sup>16</sup> Afe llezica afémie íaiína llotátañede: “Cue bie izói íllana bumo lloñeno iri,” íaiína daide. <sup>17</sup> Bie izói zuide jaii uai llórama Isaías lloga uai ñue ícoimo fuitállena. Afe uai be ñie:

<sup>18</sup> Bímie nizada cue oga ocuífiregamie.

Afémiena iere izíruiticue, íemo afémieri iere íóbidícue.

Cue Ñuera Joréñona afémie úicaitaiticue.

Afémie cue mameca jaícina jóidífuiaina náiraímo jino llóite.

<sup>19</sup> Afémie ríífuedo llóñeite.

Daje izói cáillicailli úriñeite.

Iemo jíai jofue cigi macáraodo ie uaina cácañeille.

<sup>20</sup> Comécina náinidinona ruífruiñede. Afémie íaií comécina náiretaite.

Daje izói dúiacade uillide mechera meine abido omoi boota izói, afe izói jabo ínote comini

afémie fáicanocaiñeite. Fáicanocaiñeno ñue íaiína ínotaite.

Afe ícoimo nana duéredinona fáicanocaiñeitemo afémie jaícina illáimana illíruimo dúciite.

<sup>21</sup> Iemona nana náiraíai afémiemo ocúritiaí.

### *Taife ríino Jesumo illa afémiemo jitádiaí*

*(Mr 3.19-30; Lc 11.14-23; 12.10)*

<sup>22</sup> Afe mei uínidimie Jesús diné atídiaí. Afémie fiénide jóraí uícaiga úrinidimie. Afémiena Jesús jíllotate. Iemona afémie ja ciode, daje izói ñue úrite. <sup>23</sup> Ie jira nana comini áferi caímare fáigacaillano daídíaí:

—¿Meita afe be nímie jaii illaíma Davidmona comuítagamie? —daídíaí.

<sup>24</sup> Fariséuai áfena cacáillano daídíaí:

—Bímie fiénide jóriai illaíma Belzebú dainámie ríinodo afémacina jino oréfirede, — daidíaiói.

<sup>25</sup> Jesús daíí íaiói comécido dáinana onóillano íaióina daide:

—Nínó daje náiraina ite comini conima diga fuiriadi, afe nairai ráidoizillano niné táinocaite. Daje izói daje jofue comini eneno ráidoiziadi, afe jofue are íñeite. Iemo jáíí daaco ero comini eneno ráidoiziadi, afémaci are íñeite. <sup>26</sup> Iemo daje izói, mei Satanás dama íemo jaináidino jino oréadi, dani Satanás mairídino oni énenorie jáitíaiói. Mei íemona afémie ocuille ríino íñeite. <sup>27</sup> Omoi cuena: “Belzbumo ite ríinodo fiénide jóriai jino oréadio,” daidíomoi. Afe omoi daina uáfuedenia, jáífue ómoimo jicánoiticue. ¿Mei bu ómoids jaidino fiénide jóriai jino orelle ríino iga? Ie jira dani afémaci ñue onóñeno taino omoi llua jino cíotatíaiói. <sup>28</sup> Mei jáíí fodo Juzíñamui Ñuera Joréñodo afe fiénide joriaína jino orédicue. Iemo bifue bie izói daííacana: Juzíñamui illáimana illarui ja ómoimo dúcide.

<sup>29</sup> Mei uáfueza, ríiredimiena fueñe o máíñenia, ¿ñie izói dáamie ie jofomo jaillano ie jofu ero ráaiena bairóredio? Bairónidío. Nano fueñe afémie máirede. Ie mei ie ráaiena bairórede. (Afe daíí Cristo Taífena jaca anáfenorede.)

<sup>30</sup> Cue dibénemo íacañedimie cuena uáitate. Cue diga dájena táijiñedimie, cue raana oni jutádimie izoide, mei afémie jáíimaci cuena ínotañedeza.

<sup>31</sup> Ie jira ómoína dáitícue, naga come ie finoca fiénidífue, Juzíñamuimo jicáadi dórede; daje izói nana ie úrilla fiénidífue dórede. Mei íadi ninó dáamie Juzíñamui Ñuera Joréñona íaire dáííadi, afe uai jaca dónide. <sup>32</sup> Iemo jáíí ninó dáamie Nanoide Hima Jitó Crístona íaire dáííadi, afe afémie mo ie lloia dórede. Mei íadi Juzíñamui Ñuera Joreño jánana fiéni úritimie afe ie úrilla íaífue birui dónide. Daje izói uire jaca ninomo dónide.

*Naga amena ie llizíllajido onórena izói, daje izói naga come ie úrillafuíaido ónorede (Lc 6.43-45)*

<sup>33</sup> Ñuera aménamona ñuera ráajina llizide. Daje izói fiénide amena jaca fiéni llizide. Mei uáfueza naga amena ie llizíllado ónorede. <sup>34</sup> Jaio izóidinodíomoi. Ja fiénidinodíomoiiza ¿ñie izói ñue úriredíomoi? Mei uáfueza, cai fue cai comécimo jebuide raado úrite. <sup>35</sup> Ñuera come ñúefuedo úrite, mei ie comécimo ñúefue íllaza. Daje izói fiénidimie fiéni úrite, mei ie comécimo fiénidífue íllaza. <sup>36</sup> Iemo nane ómoína dáitícue, íraicaiño Juzíñamui caimo riire jicánolliruimo, nana ráiruiñega fiéni cai úrilla uai, daje izói abi cai rairuiñena úrilla uai diga, jáanoñeno “jii” daííredicai. <sup>37</sup> Mei uafue, o úrilla dieze Juzíñamui omo izire jicánoiteza. Jáimiena “O níífuenidimiedío” dáíte; ie mei jáíimiena “Dama o ícoínia daíí ítio,” dáíte.

*Fiénide comini cíorainina raa fínóllena Jesumo jicádíaiói (Mr 8.12; Lc 11.29-32)*

<sup>38</sup> Afe mei fariséuaimona dáamierie Jesuna daidíaiói, daje izói Ocuica Uai llófuefiredino diga:

—Llófueraíma, cíorainina raa o fínuana cíóacadícaí, — daidíaiói.

<sup>39</sup> Jira Jesús afémaci uai ote:

—Bigíma fiénidino botade jiruíredingo izoide ja Juzíñamuina zóofetiaíoi. Iemo cíorainina raa cuemo jicádíaiói. Mei íadi nauí Juzíñamui uai llóraíma Jonás onótagafue baímo jáíífueña llóñeíllíaiói. <sup>40</sup> Mei Jonás daaruíamani íemo daamani naío afe áíllue chamu eromo illa izói, afe izói Nanoide Hima Jitó Cristo éñie anamo daaruíamani íite, daje izói daamani naío. <sup>41</sup> Jaíai Nínive jófue mo ite comini bigíma comínimo riire jicánolliruimo bimácimo fiénidífue jítaitíaiói. Mei Nínivemo ite comini Jonás Juzíñamui uai íaióimo llua llezica íaiói comeci ífueña méidotíaióiza. Mei íadi birui benomo Jonás baímo jamánomoidimie ite. <sup>42</sup> Daje izói sur dibénemo jica ite nairai illaíngo, bigíma comínimo riire jicánolliruimo,



bimácimo fiénidifue jítaite, mei afengo jica énie fuédamona Salomón comeci onóigafuemo cacáreizaibiteza. Mei íadi birui benomo Salomón baimo jamánomo baitádimie illa.

*Jino oreca fiénide jóriai meine dáamiemo bite*  
(Lc 11.24-26)

<sup>43</sup> Jesús nai llíicaiñeno úrite: Fiénide jóriai cómemona jino jáiadi, táiziciaido ie uái illino jenócana uite. Ie uái illino baiñenamona bie izói comeci facade: <sup>44</sup> “Meine abido cue billa cómemo jáitícue,” daide. Afe jóriai meine afe cómemo bítemo, jofo taico izoide baizáibite. Daje izói rafode ñue finócaco izói baizáibite. <sup>45</sup> Iemona afémie siete diga jamánomo afémie baimo fiénide jóriai uájide. Afémaci nana afe cómemo jofo jáidiaioi. Afemona afe come nauí ie fiénina baimo biruí jamánomo fiénide. Afémiemo illa izói, afe izói ómoimo íficaite, mei bigíma fiénidigimaza.

*Jesús ei naa ie ámatiairi*  
(Mr 3.31-35; Lc 8.19-21)

<sup>46</sup> Jesús nai comínimo úritemo, ie ei naa ie ámatiairi dúcide. Afémaci jofo jinófecomó itíaiói. Afémie diga úriacadiaioi. <sup>47</sup> Afe llezica dáamie Jesuna daide:

—O ei, o ámatiairi jino benomo itíaiói. Afémaci o diga úriacadiaioi, —daide.

<sup>48</sup> Mei íadi Jesús afe llúaíbitimiena daide:

—¿Mei bu cue eina? Daje izói ¿mei bu cue ámatiaina? —daide.

<sup>49</sup> Daí daínamona afémie llófuegamacina fuedo uidánote. Uidánuano daide:

—Bimaci cue eina, daje izói bimaci cue ámatiaina. <sup>50</sup> Mei ninó dáamie monamo ite cue Moo comeci jitailla izói finódimie bie come cue ámana, daje izói cue miríngona, daje izói cue eina, —daí Jesús afémacina daide.

## 13

*Afémaci onótaité ríjifiredimie rafue*  
(Mr 4.1-9; Lc 8.4-8)

<sup>1</sup> Afe monado Jesús jofómona jino jaillano, jorai fuédamo ráinazaide. <sup>2</sup> Iemo afémie illánomo aillo comini ofilla jira, afémie bai nocaemo ráizazaide. Afe llezica nana comini fuédamo fiébidiaioi. <sup>3</sup> Mei áfemona diga ráfuiaina afémaci llófuete. Afémaci onoiga izóidedo afémie íaiói llófuete. Daide:

—Jacáfaimo rífredimie rizájilla. <sup>4</sup> Ricana ie uilla llezica, afe júdaica íjiaimona dáarie iomo baide. Baiilla mei ófocuiñuai güizáibitiaioi. <sup>5</sup> Ie mei jáíjiaí énie figo iñena noficiaimo baide. Aféjiaí raire zicode, mei afe énie llíaideza. <sup>6</sup> Iemo jáinaonideza jítoma egáiñuamona, zafénaillano tíidiaioi. <sup>7</sup> Ie mei nane jáíjiaí éegiaí cígiri cocídino. Afe éegiaí móonaillamona aféjiaí íracotaillano tíidiaioi. <sup>8</sup> Mei íadi jáíjiaí ñuera éniemo baide. Aféjiaí ñue ailla. Dáaride cien diga llizíllajiaí comuítate. Jáíiri sesenta diga llizíllajiaí comuítate. Iemo jáírimo treinta dígaí comuide. <sup>9</sup> Bíemo cacáiacadino mai cacai.

*Nibái mei bie comini onoiga izóidedo úrilla, Jesús jino llote*  
(Mr 4.10-12; Lc 8.9-10)

<sup>10</sup> Iemona ie llófuegamaci billano Jesumo jicánotiaioi:

—¿Nibái mei comínimo íaiói onoiga izóidedo úritio? —daidíaioi.

<sup>11</sup> Jira Jesús uai ote:

—Monamo Juzíñamui illáimana illirui uáfodo ónoñega ráfuiaina, afémie ómoína onótate. Mei íadi baie comini áfeniaina ónotanidiaioi. <sup>12</sup> Mei ua, Juzíñamuina iere onóacadimie mo ie báitaja baimo jáiiena írede. Iemona afémiemo aillo íite. Mei íadi Juzíñamui dibénedo onóacañedimie mona íemo ite due jiza onónana bairórede. <sup>13</sup> Ie jira afémacimo íaiói onoiga izóidedo úritícue. Mei afémaci ñúefuena ciódiaioi, mei íadi nai cíoiñedino izói itíaióiza. Daje

izói cacádiaioi, mei íadi nai cacáñedino izói itíaiioi. <sup>14</sup> Mei áfemona Juzíñamui uai llóraima Isaías afémacina jicana daina uai ñue ícoimo fuilla. Be níuui: Omoí uáfodo cácaitiomoi mei íadi afe dáinana óñoñeitiomoi.

<sup>15</sup> Mei bimaci comeci riiredinona abido jaide.

Daje izói afémaci figo cacáacañediaioi.

Afémaci ui ibaica izói ite. Daií itíaiioi íaiioi uído cíoiñeillena, íemo jíái íaiioi jefodo cácaiñeillena; daje izói íaiioi comécido ñúefuiai óñoñeillena.

Iemona íaiioi cue jíllotallena abido cuemo bínidiaioi, daií Isaías daide.

<sup>16</sup> Mei íadi dani omoí uído omoí ciónamona, daje izói dani omoí jefodo omoí cacánamona ióbidinodiomoi. <sup>17</sup> Uáfuenta ómoína dáitícue, diga Juzíñamui uai llóraini bie omoí ciónana cíocadiaioi, naa aillo jíáie ñue comíniri. Mei íadi áfena cíóñediaioi. Daje izói bie omoí cacánana cacácadiaioi, mei íadi cacáñediaioi.

*Jesús ríjifredimie rigájiai rafue ñue jino lloste*  
(Mr 4.13-20; Lc 8.11-15)

<sup>18</sup> Jira bíemo omoí cacáreiri. Rífredimie rafue bie izói jino daide. <sup>19</sup> Monamo ite Juzíñamui illáimana illarui uaina dámie cacáadi, mei íadi afémie áfena íinoñeniadi, afémie comeci afe bie io izoide. Jíi, afe rigájiai iomo baídino izoide. Afe izói comécido jabo ie onoiga ñuera uaina Taife báiruaibite. <sup>20</sup> Afe rigájiai níi afe nofíciai emódomo cocidino jana, ñúefuaina raire cacáillano caimare otino coméciai. <sup>21</sup> Mei íadi afémaci raire zicode raa riire jaináñena izói, Juzíñamuimo afémaci figo jaináñenamona are íñediaioi. Mei íadi ñuera uai ícoinia jacire facátafuiai, íemo duere finóllena rácafuiiai afémacimo comuíadi, ñúefuena fáicanocaitiaioi. <sup>22</sup> Afe éegiai illano jana Juzíñamui ñúefuena cacádiaioi ia, bínie ráaniaimo comécina fáifredino. Iere ráanaiacana afémacina jífujete. Nana aféfuiai Juzíñamui ñúefuena íracotaila izói ínotañede. Iemona afe uai afémiemo ñue áide izói íñede. <sup>23</sup> Mei íadi afe rigájiai níi afe ñuera éniemo baídino jana bie izói ite. Bimaci Juzíñamui ñúefuena cacáillano afe uaina jeire otíaiioi, mei áfena ñue onódiaioiza. Uamona iere aite rigájiai izói afémaci aillo ñúefuiai finófrediaioi. Afémacimona dáarie jamánomo aillo ñúefue finódiaioi, íemo jíáimaci aillo ñúefue finódiaioi. Iemo nane jíáie fia jabo aillo ñúefue finódiaioi.

*Riga trigo cígimo fiénide raróciai zícua rafue*

<sup>24</sup> Iemo nane Jesús bie íaiioi onoiga izóidífue lloste:

—Monamo ite Juzíñamui illáimana illarui bie izoide. Dámie ñuera íjiai ie jacáfaimo rite. (Aféruillaido comíni diga ráaniai daane riñeno énenorie ritíaiioi.) Bímie ie jacáfaimo jíáiena jaicuíñeno daa trigo rite. <sup>25</sup> Mei íadi naama ínia mei ie diga ícírítimie trigo cígimo fiénide raróciai rizáibite. Rillano oni jaide. <sup>26</sup> Afe trigo móonailamona ímoiaí comuilla llezica riga fiénide raróciai cíozite. <sup>27</sup> Afemona táijítafiregano jacafai náamamo llujide: “Ocuíraima, o ritátaga cai ríganíai níbai ñuera. Mei afe cígimo fiénide ráitíai ¿nínómona comuide?” <sup>28</sup> Jira afefai naama daide: “Níbai níno cue diga ícírítimie bie rizáibiga.” Mei jira afe táijítafiregamaci íena daide: “¿Afe fiénide ráitíai cai áiruailleza meita airótatio?” <sup>29</sup> Mei afémie íaiioína daide: “Dama íteza, aíñoñeno iri, mei afe fiénide ráitíai aíñódiomoina naa trigo diga aíñódiomoiza. <sup>30</sup> Dama trigo diga daane móonaiteza, aíñoñegania ñuera. Afe mei jofo ollíruimo, cue táijítafiregano óreitícue fueñe afe fiénide ráitíai óllena. Afe uano afe ráitíai jobaille eneno icútuaina maitátaitícue. Afe mei cue trígona éenoracomo éenotaitícue.”

*Mostaza daina riga raa íjiai rafue*  
(Mr 4.30-32; Lc 13.18-19)

<sup>31</sup> Iemo nane Jesús bie jíáie onótaitífue lloste:

—Monamo ite Juziñamui illáimana illarui mostaza daina riga raa íjiaí izoide. Dáamie afe íjiaí ie jacáfaimo rite. <sup>32</sup> Uáfueza, afe íjiaí nana jiáie rífiregajiaí jofomo jéenide. Mei íadi móonalla llezica nana juzítotiaí caifomo are zairide. Afe llezica caifo amena dinori aillo zairide. Afemona áfena ícairuaimo feede ófocuiñuaí jillaina nizáibitiaíoi, —daide. (Afe izói Juziñamuimo ínotino dúemaci íadi, jamánomo aíllomacina jébuioicaitiaíoi.)

*Levadura daina pan fáitara rafue  
(Lc 13.20-21)*

<sup>33</sup> Iemo nane Jesús bie jiáie onoiga izóidifue llote:

—Monamo ite Juziñamui illáimana illarui pan aillo fáitate levadura izoide. Daa ringo daámani julleco harínana oruítajano, áfemo due jiza levadúrana tamede. Iemona nana afe iféllana mullétano oni aillo fáitate, —daide. (Afe izói diga jiáimaci Jesumo ínuamona, Juziñamuimo jaináidino aillo jébuitiaíoi.)

*Jaiái daináuaí fuitállena Jesús íaíoi onoiga izóidifuaíido comínimo úrite  
(Mr 4.33-34)*

<sup>34</sup> Nana bífuaí Jesús íaíoi onoiga izóidifuaíido comínimo llote. Onótaitifue afémie llóñenia comínina nñie izói daiñede. <sup>35</sup> Jaiái Juziñamui uai llóraima daina uai ñue ícoimo fuitállena, afémie daií llófuete. Afe be níuuaí: Onótaitifuaíido jino úriticue.

Juziñamui énie fínua llezícamaña figo ónoñegafuaí jino llóiticue.

*Trigo cígimo comuide fiénide ráitiaí ífue Jesús jino llote*

<sup>36</sup> Afe mei Jesús nana comíni jino fíiano jofo eromo jaide. Afécomo Jesús llófuegamaci afémiemo jicánuaíbitiaíoi:

—Jacáfaimo comuide fiénide ráitiaí rafue caímo jino ñue llóiri, —daídaíoi.

<sup>37</sup> Jira Jesús íaíoina daide:

—Afe ñuera íjiaí ritímie jana Nanoide íima Jitó Cristo. <sup>38</sup> Afe jacafai jana bie énie. Afe ñuera rigájiaí jana Juziñamui illáimana illáruimo jaináidino. Afe fiénide ráitiaí jana Taífemo jaináidino. <sup>39</sup> Afe fiénide ráitiaí rizáibitimie dama Taífe. Afe llizíllajiaí jofo otá éenua jana énie fuillírui. Iemo afe llizíllajiaí jofo otino jana Juziñamui abi imaci. <sup>40</sup> Ie mei afe fiénide ráitiaí jobáillena oni eneno jóonia izói, afe izói énie fuillírui fiénidinomo zúite. <sup>41</sup> Aféruimo Nanoide íima Jitó Cristo ie abi imaci óreite, jiáimana fiénidifue finótatino eneno óllena, naa fiénidifue finódinori. <sup>42</sup> Afémacina iraimo dótaite. Afénomo iere éenaitiaíoi; iere izi cácaillamona murímuritiaíoi. <sup>43</sup> Ie mei Juziñamui jitailla izói finóidino íaíoi Moo illáimana illáruimo jítoma uíeco meáire egáíñua izói íaíoi maíñoca Juziñamui ebíredifuenta jino cíotaitiaíoi. Omoí cacáacania, cacai.

*Retáidoga ráifide raa jino onótaitifue*

<sup>44</sup> Monamo ite Juziñamui illáimaitagamacina íacadino bie izói fínoitiaíoi. Enie anamo ónonino retáidoga ráifide raa jénua izói fínoitiaíoi. Nñie monado daa come afe retáidoga ráifide raa baite. Bailla mei, abido dáanomó áfena retáidote. Afe mei jofomo íóbicana jaillano nana íemo ite raa fécajide. Raa fécajano oga úcubedo afe retáidua énie íbajide.

*Perla daina iere ráifide zírjii jino onótaitifue*

<sup>45</sup> Nane daje izói monamo ite Juziñamui illáimaitagamacina íacadino perla jenoda fécafiredimie izói fínoitiaíoi. Afémie jicado jenode. <sup>46</sup> Iere ráifide perla daa ie baía, nana íemo ite ráaniaí fécajano, ie ciona ráifidiji íbajide.

*Chamu ora llóiji onótaitifue*

<sup>47</sup> Daje izói nane monamo ite Juziñamui illáimana illarui, jóraimo dótafirega chamu ora llóiji izoide. Afe llóiji nana jiáiforiede chámuna ote. <sup>48</sup> Afe llóiji oruilla llezica, facódino oní fuédamo jainácana uite. Afénomo raináillano, ñuera chamu diga nizédiaioi. Fiénidino oní dótano ñuera chamu íaioi cirígaimo iráidiaioi. <sup>49</sup> Afe izói énie fuillíruimo comínimo íite. Juziñamui abi imaci billano ñuemaci fiénidimacimona oní eneno ofítaite. <sup>50</sup> Iemo fiénidinona iraimo óreite. Afénomo iere éenaitiaioi. Izi cácanamona murímurítiaioi.

### *Comue ráifide raa naa jácaie diga*

<sup>51</sup> Afe mei Jesús íaioina jicánote:

—¿Meita omoi nana bífuiaina onódiomoi? —daide.

Jira afémaci daidíaioi:

—Jii, Ocuíraima onódicai, —daidíaioi.

<sup>52</sup> Iemona Jesús íaioina daide:

—Cue ocuica uaina ñue llófuefiredimie, monamo ite Juziñamui illáimana illirui dibénedo llófuia llezica bie izói íficaide. Aillue jofo naama ie éenoga ráamona comue raa jino úana onode. Iemo jiáiruido jácara raa mei íadi nai ñuera raa, jino úana onode. Afe izói afe ñue llófuefiredimie nana ie onóigafuiaimona cue cómfue naa jaiái lloga jácafue diga jino llúana onode, —daide.

### *Jesús Nazaret jófuego jaide*

*(Mr 6.1-6; Lc 4.16-30)*

<sup>53</sup> Jesús nana bie jino ñue onótatifuiaí llua méifomo dama ie éniemo jaide.

<sup>54</sup> Dúciizaillano afénomo ite Juziñamui uai llorácomo llófue. Aferi comíni caimare fáigacaidiaioi. Daidíaioi:

—Bímie ¿ninómona diga ráfuiaina onode? Bie ciórainina raa ¿ñie izói finode? <sup>55</sup> Bímie baie rabíciáimo táijifiredimie jító. Ie ei María. Daje izói afémie ámatiaí Santiago, José, Simón, Judas benomo cairi ite. <sup>56</sup> Daje izói ie miríngotiaí cai cígimo itíaioi. ¿Mei ninómona nana bífuena onode? —daidíaioi. <sup>57</sup> Iemona afémie llógamo náfueacañediaioi. Mei jira Jesús íaioina daide:

—Nana jiáimaciaí Juziñamui uai llóraimana jiéruitiaioi, mei íadi dama ie comuíllano comíni íena jámairuitiaioi, daje izói naa ie jofo ero comíniri, —daide.

<sup>58</sup> Ie jira afénomo ciórainina raana aillo finóñede, mei afémaci afémiemo íinoñediaioiza.

## 14

### *Juan Bautista tílla*

*(Mr 6.14-29; Lc 9.7-9)*

<sup>1</sup> Aféruillaído Galilea énie ocuídillaima Herodes, Jesús jalléinana fidide. <sup>2</sup> Fídiano ie diga itínona daide:

—Bímie tíllamona meine abido cáadimie Juan Bautista. Iemona afémiemo ciórainina raa finolle ríino ite, —daide.

<sup>3</sup> Mei jaiái nano Herodes Juaana maitá llavéracomo uitátate. Mei nauí Herodes ie ama Felipe aí Herodías daínango aina ote. Ua mei, Juan Heródesna ríire lletádeza. Ie lleta jira íena llavétate. <sup>4</sup> Juan daína uai be ñie:

—O bie ríngo o aí izói uícainidío, —daide.

<sup>5</sup> Daií daína jira Herodes Juaana fáiacade. Mei íadi comínina jacíruite, mei “Afe Juan Juziñamui dibénedo úrifiredeza,” daidíaioi. <sup>6</sup> Afe méifodo, Herodes ie jocóinamona jiáie fimona fuilláruimo dúcide. Aféruído ie cumpleaños rafue fínua llezica, iráizillena llogano eróicana Herodías jiza bai zaizájide. Afengo záillana Herodes iere ebíruite. <sup>7</sup> Afena iere gáinamona Herodes rírede uaido daide:

—Ninó o jicáacanana rairuíñoeno íredicue, —daide.

<sup>8</sup> Iemona afengo ei uícodo llua izói Heródena daide:

—Juan Bautista ifoci plátomo jóoneta cuemo ati, —daide.

<sup>9</sup> Aferi ocuídillaíma Herodes zúucaide. Mei íadi uícodo riírede uaido dáinana nana iráizillena llogano cacádiaíoi. Jira jiáifodo méidoñeno nano fueñe ie daína izói ocuide.

<sup>10</sup> Iemona llavéracomo llaveca Juan ifócina jaitátate. <sup>11</sup> Afe mei jáitano plátomo jóoniano aféngomo izájidiaíoi. Afe méifodo afengo afe ifócina ie eimo ite, afengo Juan ua tíllana onóillena.

<sup>12</sup> Afe mei afe Juan diga jáicadino uillano ie abi raiájidiaíoi. Afe mei Jesumo lluájidiaíoi.

*Jesús cinco mil comini ecade*

(Mr 6.30-44; Lc 9.10-17; Jn 6.1-14)

<sup>13</sup> Jesús Juan fáajana fidíillano dama ruica táinomo nocaedo jaide. Mei íadi comini ie jáillana fidíillano naga jófuiaimona ie illánomo arido jáidiaíoi. <sup>14</sup> Iemo Jesús afe nocáemona ari jailla llezica, diga comini ofíllana ciode. Cíoillano íaioimo dúecaide. Afémiemo atica iráredinuiaína jíllotate. <sup>15</sup> Ja nauízaila llezica ie llófuegamaci afémiena daiízaibitiaíoi:

—Ja nauide. Benomo buna iñede. Nana comínina mai jófuemo oreri, afe áinori ite dúegobaiimo íaioi güille íaioi íbajillena, —daidíaíoi.

<sup>16</sup> Jira Jesús afémacina daide:

—Afémaci nai jáinidiaíoi. Afémaci dani omoi eca, —daide.

<sup>17</sup> Jira afémaci uai otíaíoi:

—Cinco diga páaniai, íemo mena chamu afe baimo jiáiena caimo iñede, —daidíaíoi.

<sup>18</sup> Jira Jesús íaioina daide:

—Mai áfena cuemo ati, —daide.

<sup>19</sup> Afe mei nana comínina daide: “Ráitiai emódomo ana omoi ráii,” daide. Afe llezica Jesús cinco diga páaniai mena chamu diga llínnota, monamo érocailano Juziñamuina “Figora” daide. Daií daína méifodo Jesús afe pan ditada ie llófuegamacimo ite, afémaci nana comínimo fecállena. <sup>20</sup> Afe güillano nana comini ñue jeírediaíoi. Íaioi güilla mei, güiga állana ie llófuegamaci doce cirigai oruítatiaíoi. <sup>21</sup> Afe güitino cinco mil diga ííñiai. Iemo afe baimo ringóniai naa úruiaíri fácadoñega.

*Jesús jainoi emódodo macade*

(Mr 6.45-52; Jn 6.16-21)

<sup>22</sup> Afe mei Jesús ie llófuegamacina daide: “Mai ifódino ruica enéferaimo nocaedo omoi jairi. Afe llezica bie comini ráinoiticueza,” daide. <sup>23</sup> Comini ráinua mei Jesús caifónedumo dama Juziñamuimo úrizaide. Nauízaila llezica Jesús afénomo dama ite. <sup>24</sup> Afe llezica íaioi jailla nocáe bai dáaferaimo ite. Mei íadi jorai bagua meine íaioina ñuitáñuitade. Afe llezica jairifo meine íaioina fúuoide. <sup>25</sup> Como monáioicaidemo Jesús jainoi emódodo afémaci diné macácana jaide. <sup>26</sup> Afe jainoi emódodo jáillana cíoillano, caillíoidiaíoi. “Janaba billa,” daínano iere jacínaitiaíoi.

<sup>27</sup> Mei íadi Jesús íaioina daide:

—Cueza, jacínaiñeno omoi iri. Abí omoi mame, —daide.

<sup>28</sup> Jira Pedro afémiena daide:

—Ocuíraíma, mei ónia, o illánomo mai jainoi emódodo cue mácata, —daide.

<sup>29</sup> Jira Jesús íena daide:

—Mai mei bi, —daide.

Iemona Pedro nocáemona ana jaillano jainoi emódodo Jesús diné macácana jaide.

<sup>30</sup> Mei íadi jairifo riire jáiñua cacáillano abi jácidote. Afe llezica afémie ja anábaiacade. Anábaiocailla llezica afémie caillide:

—¡Ocuíraíma, iñédicueza, cue llíno! —daide.

<sup>31</sup> Daií daína llezica, Jesús ónoído llínnota daide:

—¡Nii o due ínua! ¿Nibái mei o ínogafuena fáicanocaidio? —daide.

<sup>32</sup> Nocaemo caifo íaillinoi jailla llezica, afe jairifo llícaide. <sup>33</sup> Iemona afécaemo itino, Jesús anamo dújuillano íena daide:

—Uáfueña, Juzíñamui Jitódioza, —daidíai.

*Jesús Genesaret éniemo ite iráredino jíllotate*  
(Mr 6.53-56)

<sup>34</sup> Jorai ruica jáitajano Genesaret éniemo dúcidíai. (Afe énie jáífodo mameina Galilea.) <sup>35</sup> Iemo afeno comini ñue afémiena onónamona, nana afénomo itígobaiemo conímana fidítai. Afemona afénomo ite iráredinuiaina Jesumo atídíai. <sup>36</sup> Daa afémie inícuero fueda jetánollena izire jicádíai. Iemona nana ie inícuero fueda jetádino jíllodíai.

## 15

*Cómena íaire finode raa*  
(Mr 7.1-23)

<sup>1</sup> Afe mei dáarie Jerusalémona bite fariséuai naa ocuica uai llófuefiredinori Jesumo jicánuaibitíai:

<sup>2</sup> —¿Nibái mei o llófuegamaci cai uzútíai daina uaina oni caitáfiredíai? Mei afémaci fiénidífue múiñua jana, nai güiñena llezica onoi jócuana finóñediaoiza, —daidíai.

<sup>3</sup> Mei afe ibana Jesús íaiemo jicánote:

—¿Mei nibái omoi Juzíñamui riire ocuica uai oni caitáfiredíai dani omoi jaii daina uaimo náfuellena? <sup>4</sup> Mei Juzíñamui caina daide: “O moo o ei diga caimare omoi uicairi. Dámie ie moona ie ei diga íaire dáia, afémie títeza,” daide. <sup>5</sup> Mei jáífodo daífiredíai. Dámie ie moona ie ei diga bie izói daífrena daífiredíai: “Moo, ona canónidíe, mei nana cuemo ite raa Juzíñamui fecállena cue mamécaza.” <sup>6</sup> Iemo ninó dáamie daí dáia, ie moo ie ei diga canolle afémiemo dúñede, daí daífiredíai. Daí omoi dánamona Juzíñamui ocuica uai jámairuitadíai, dani omoi jaii daina uáillaemo náfuellena. <sup>7</sup> ¡Comeci diné ráatailla mei, abina ñue cíoidinodíai! Jaii Juzíñamui uai llóraima Isaías ie ciegánicomo omoi dibéneo uáfodo úrite. Be afe uai:

<sup>8</sup> Bie comini fia fuedo cuemo ñúefue mamédíai, mei íadi íai comececi diné íairedeza, cuemo jaináñede.

<sup>9</sup> Diga ebírede ráfuiado cuemo caimátaidíai íadi, afe caimátailla ráifíñede, mei afémaci jáimaci llófua jamai come ocuica uáillaiza.

Isaías Juzíñamui daináuai bie izói cuete.

<sup>10</sup> Afe mei comini uáidota Jesús íaiena daide:

—Cacáillano ñue omoi onoiri. <sup>11</sup> Come fuedo jofo jaide raa afémiena íairetañede. Mei jáífodo come fuémoma bite uai, afémiena íaretate, —daide.

<sup>12</sup> Afe jira ie llófuegamaci Jesuna daízaibitíai:

—¿Meita onódioza, o daina uáillaína cacáillano fariséuai icíritíai? —daidíai.

<sup>13</sup> Mei íadi Jesús jáífodo uai ote:

—Naga Juzíñamui uáfueña jaináñedíe monamo ite cue Moo ríñega raa izóidíai. Afémaci come gáñega riga raa naa jáinaori aiñólle izói táinocaitallíai. <sup>14</sup> Afe baie fariséuai dama daítadíoiza; áfemo lloño. Mei afémaci únidíno izóidíno. Iemo afe llezica jáie únidíno ifódíai. Únidíe jáie únidíe ifóadi, nágaillinoi dáafomo báitiaillinoi, —daide.

<sup>15</sup> Jira Pedro Jesuna daide:

—Bie uai jino caimo féinino llone, —daide.

<sup>16</sup> Jira Jesús jicánote:

—¿Omoi jái nai onóñedíai? <sup>17</sup> ¿Onóñedíai, fuedo jofo jaide raa jébegeoimo jaide; afe mei abímona jino faiga? <sup>18</sup> Mei íadi come fuémoma jino bite uáillaína comécimona

comuide. Afe bie uailai dama afémiena íáruitade. <sup>19</sup> Mei diga íaifuiái come comécimona comuide. Fieni comeci fácafuíái comuide. Daje izói daje comécimona jíáima fáiacanafuíái comuide. Iemo jíáima ai diga íacanafue come comécimona comuide, naa jíáie iere jiruírenafuíairi. Iemo jíái meríillafuíái come comécimona comuide. Daje izói táinona úrilla uailai, naa jíáimana íáire daináuailairi come comécimona comuide. <sup>20</sup> Afe bífuíái cómena iere íáruitanona orede. Mei íadi fiénidífue múñua jana onoi jócuana finóñeno dáamie güíadi, áfena cómena íaifueredimiena oréñede, —daide.

*Jicánemaci ringo Jesuna ínote*  
(Mr 7.24-30)

<sup>21</sup> Afénomona Jesús oni jíáie éniemo jaide. Afénomo Tiro jofue Sidón jofue diga ite.  
<sup>22</sup> Afénomo Canaán énie ingo Jesús diné caillícana bite:  
—Cai ocuífirede jaiái illaíma David comuítagamie, cuemo dúecai. Cue jiza fiénide jóriái uícaigaza, iere duere zefuide, —daide.

<sup>23</sup> Mei íadi Jesús aféngona ñie izói daíñede. Mei jira ie llófuegamaci íemo izire jícaíbitiaíoi:  
—Mai ie uai fáirio, mei cai méifodo duere caillícana bíteza, —daídíaíoi.

<sup>24</sup> Jira Jesús daide:  
—Juzíñamui dani Israel náiraímona oni féiraite ovejai izóidino mameda cuena orede, mei afémaci Juzíñamui lloga uailai jeire oñediaíoiiza, —daide.

<sup>25</sup> Mei íadi afengo Jesús diné billano afémie anamo dújude. Dújuillano afémiemo jicade:  
—¡Ocuíraíma, mai cue cano! —daide.

<sup>26</sup> Jira Jesús aféngona daide:  
—Uruíái izoide Judíuai ónoimona pan bairoda jicóniaí izoide jicánemacimo illa fiénide, —daide.

<sup>27</sup> Mei afengo jaca nai daide:  
—Cai Ocuíraíma, jii uáfueza, mei íadi jicóniaí naama güígamona ana baide íruaina güífirediaíoi, —daide.

<sup>28</sup> Mei jira Jesús aféngona daide:  
—O íco iere ínotioza. Cuemo o jícaze, daí íteza, —daide.  
Daí daina llezica afengo jiza jíllode.

*Jesús aillo iráredinuaí jíllotate*

<sup>29</sup> Afénomona Jesús oni jaillano Galilea jorai fuédado jaide. Afe mei caifónedu ícoímo ráizaide. <sup>30</sup> Iemo afémie illánomo aillo comini garilla. Afe jáidino diga jíáíforie iráredino uitiaíoi. Afémiemo ídainidino atídiaíoi, íemo únidinuaí, íemo uáinidino, íemo ónoinidinuaí, íemo diga jíáie iráredino afémiemo atídiaíoi. Dieze átiano Jesús anamo jóonetiaíoi. Iemona afémie nana afémacina jíllotate. <sup>31</sup> Afe afémie fínuari comini caimare fáigacaidiaíoi, mei eróidiaíoiimo uáinidino úritiaíoiiza. Iemo ónoinidino ñue jíllodiaíoiiza. Iemo ídainidino ñue macádiaíoiiza. Iemo únidino ñue ciódiaíoiiza. Iemona Israel náiraí Juzíñamuimo ñuefue nitádiaíoi.

*Jesús cuatro mil dígade comini ecade*  
(Mr 8.1-10)

<sup>32</sup> Afe llezica Jesús ie llófuegamaci uáiduano daide:  
—Bie comínimo dúecaidicue. Ja daruíamani benó cue diga itíaíoiiza. Iemo íaíoi güíllena ja íñede. Afémacina íaíoi jofomo ecáñeno oréacañedicue, ío anamo íaíoi zafénaiza dáí, —daide.

<sup>33</sup> Iemo ie llófuegamaci íena daídíaíoi:  
—Mei benomo comini jofue íñedeza, bie aillo comini ecállena ¿ninómona óiticaí? —daídíaíoi.

<sup>34</sup> Jira Jesús afémacimo jicánote:

—¿Omoimo niga páaniai ite? —daide.

Jira afémaci daidíai:

—Siete diga pan ite íemo due chámuna ite, —daidíai.

<sup>35</sup> Afe mei nana comínina: “Ana omoi ráii,” daide. <sup>36</sup> Daí daina méifomo siete dígade panes naa chamu diga llínota, Juziñamuina “Iere figura” daide. Afe mei ditada, ie llófuegamacimo ite, afémaci nana comínido fecállena. <sup>37</sup> Afena nana güitíai. Iaiói güilla mei nana ñue jeírediaí. Afe mei íaiói güiga állana siete diga cirigai oruítataí. <sup>38</sup> Afe güitino cuatro mil dígadimaci. Afe baimo ringóniaí naa úruiaíri fácadoñega. <sup>39</sup> Afe mei Jesús afe gairide comini rainode. Ráinua mei ana nocaemo jaillano oni Magdala éniemo jaide.

## 16

*Fariséuai naa saducéuai diga ciórainina raa finóllena jicádíai*  
(Mr 8.11-13; Lc 12.54-56)

<sup>1</sup> Fariséuai naa saducéuai diga Jesumo eróizaidiaí. Iemo afémie fiéni facátallena monámona comuide ciórainina raana finótaacadiaí.

<sup>2</sup> Mei íadi afe llezica afémie jiáifodo uai ote:

—Nauíacana llezica mona jiaírenia uire jiti ñue mónaite daíífrediomi. <sup>3</sup> Iemo jítiramo dibénemo mona jiaíre nairíadi, bie mona fiénite, daíífrediomi. ¡Comeci íaírena mei, jino abi diné ñue cíoidinodiomi! Uire jítiramo ñue mona monaille llote raana ñue onódiomi. Mei íadi birui omoi cígimo cue finoca onótatifuiaína onóñediomi. <sup>4</sup> Biruido ite íñoñede fiénidino ciórainina raana finóllena jicáfirediaí. Mei íadi naui Juziñamui uai llóraíma Jonásmo zúidífue íaiói onótatifue. Afefue baimo jiáífueña llóñeilliaí, —daide.

Daí daina mei, afémacina fáicanocaillano Jesús oni jiáinomo jaide.

*Fariséuai taino llófrenafue levadura daina pan aillo fáitate raa izoide*  
(Mr 8.14-21)

<sup>5</sup> Jesús llófuegamaci jorai ruícafenemo jailla llezica, pan féideza uiñediaí. <sup>6</sup> Afe mei Jesús íaióina daide:

—Ero, fariséuai naa saducéuaimo ite levadura daina pan aillo fáitate raa izóidemona abí omoi rairuiri, —daide.

<sup>7</sup> Mei jira llófuegamaci dani conímána daidíai:

—Nibai pan cai atíñena jira afémie daí daide, —daidíai.

<sup>8</sup> Jesús áfena comécido onóillano daide:

—¿Nibái mei páanidicai daidíomi? ¡Omoi ico nai figo íñoñediomi! <sup>9</sup> ¿Nai cinco páaniaí ditada cinco mil comini cue écamo jaca úbicaiñediomi? ¿Nai áfena ñue onóñediomi? Aféruido fiébidinona ¿niga cirigai oruítatiomi? <sup>10</sup> Iemo daje izói siete dígade páaniaí cuatro mil comínimo cue feca mei ¿niga cirigai fiébidinona iráidiomi? ¿Afemo jiái daje izói úbicaiñediomi? <sup>11</sup> ¿Minícamo jizídiomi levadúrado cue úrillana nai onóñena? Naui fariséuai, naa saducéuaimo ite levadúramona abí omoi rairuiri cue daina uaina jamai paando úriñedicue; jiáífue lloticue.

<sup>12</sup> Afemona ie llófuegamaci ie dáinana ñue onódiaí. Pan aillo fáitate levadúramona abí rairuillana lloñeídeza. Mei jiáifodo fariséuai naa saducéuai jino lloga taino llófuiamona abí rairuíredeza.

*Pedro Jesús Crístona jino jaícina llote*  
(Mr 8.27-30; Lc 9.18-21)

<sup>13</sup> Afe mei Filípomo dúide Cesarea éniemo Jesús dúcina llezica, ie llófuegamacimo jicánote:

—Cue Nanoide fima Jitódicueza. Afe dibénena ¿ñie izói comini daidíai? —daide.



14 Jira afémaci daidíaiói:

—Dáamierie “Bie Juan Bautista” daidíaiói, jáímaci “Bie Elías” daidíaiói, íemo nai jáímaci “Nibai Jeremías, nibai jáie Juzíñamui uai llóraima,” —daidíaiói.

15 Mei jira Jesús daide:

—Omoi ¿mei nñe izói cuena daidíomoi? —daide.

16 Jira Simón Pedro uai ote:

—Juzíñamui nizeca Cristo dainámiedio. Daje izói caade Juzíñamui Jitódio, —daide.

17 Jira Jesús afémie uai ote:

—Jonás jitó Simón, o iere ióbidio. Mei ailli o daina uai cómemona omo llóñegaza. Mei jáífodo monamo ite cue Moo Juzíñamui omo lloga. 18 Ona Pédrodio dáitícue. Mei jae cuena o daina uai riirede oni dotánide nofici izóideza. Iemona afe bie riirede nofici izoide uáitanide dainamo cuemo ínotinona comúitíticue. Iemona titáfirede ríino cuemo ínotinona anáfenoñeite. 19 Iemo jái monamo ite Juzíñamui illáimana illano naze zuitáfirena llave izoide raa omo ítíticue. Iemona biniemo o rairuícafueña, daje izói monamo ráiruiteza. Afe izói biniemo o ráiruiñegafueña monamo ráiruiñelle, —dinori Jesús daide.

20 Afe mei Jesús ie llófuegamacina Crístona ie íllana bummo jino llotáñede.

### *Jesús ie tülle llote*

(Mr 8.31–9.1; Lc 9.22-27)

21 Aféruimona Jesús Jerusalemo ie jáizaillena ie llófuegamacimmo jino uáfodo llote. Iaioina daide: “Jerusalemo cue dúcille mei ocuífirede éicomini, naa lletáiraini illáiniri, íemo jái ocuica uai llófuefiredinori nana iere cuena duere fínoítiaíoi. Omoimmo llotícueza cuena titáitíaiói, mei íadi daruíamani íllemona meine abido cáadimiena ítíticue,” daide. 22 Afe jira Pedro Jesús bai uillano íena lletade. Daide:

—Ocuíraima cacai, Juzíñamui afe izói gáñede. ¡Aféfuiai jaca omo zúíñeiteza! —daide.

23 Mei jira Jesús oni gírecaillano afémiena daide:

—Satanás uícaigaoza. Cúemona oni jai; cue llótáidotioza. Juzíñamui comeci faca izói o comécina facáñedio. Jamai come comeci faca izói o comécina facádio, —daide.

24 Afe jira Jesús ie llófuegamacina daide:

—Ninó dáamie cuedo jáiacania dama ie comeci jitáillana féitarede. Féitano cuedo jáirede. Afémie cuedo jailla ícoinia tíidena, afémie áfena izire ónide. 25 Mei ninó dáamie ie cáananona rairuíacadimie áfena táinomo fáifitaite. Mei jáífodo cue ícoinia ie cáananona táinomo fáifitimie afe fáifidena abido máíñoite, jaca ninomo zíñona ie íllena. 26 Mei daa come nana bñie ráaniai aillo náamataadi, íemo afe llezica dama ie comeci afémie táinocaitaiadi, nana ie maíñoica ráaniai afémiena jíllotañeite. Mei daa come ie comécina ¿nieze íbárede? 27 Mei uáfueza, Nanoide fima Jitódicueza. Cue Moomo ite ebíredinuiái naa ie abi imáciri uire bíitícue. Iemona illa dígamie íaiói finócaza fécaíticue. 28 Uáfueña ómoína dáitícue, benó cue diga ítinomona dáarie nai tíñeítiaíoiimmo illáimana cue bíllana cíoitíaiói, —daide.

## 17

### *Jesús abi jáífo méidoficaide*

(Mr 9.2-13; Lc 9.28-36)

1 Seis dígarui jailla mei, Jesús Pedro, Santiago, Juan diga uite. Dígamie dani eneno iere caifónedumo uite. 2 Afénomo íaiói eróicana ie abi jáífo méidoficaide. Ie uíeco jitoma izói queníreficaide. Daje llezica ie ínícuiro jamánomo úzereficaide. Luz egáíñua izói úzere. 3 Afe llezica, Moisés, Elías, Jesús diga úrillana cíodíaiói. 4 Jira Pedro Jesuna daide:

—Cai Ocuíraima, nñi cai benó caimare cai illa. O jitáíadi daámani jofóchupi benó cai nilli; daa óochupi, jáie Moisés ie, íemo jáie Elías ichupi, —daí daide.

<sup>5</sup> Daií Pedro úrioina llezica, iere quenírede mona ero uíllie, íaioi ferínocaide. Afe uílliemona da uai cacacaide. Afe uai daide:

—Bie iere cue izíruiga Jitó. Afémiemo omoi cacáreiri, —daide.

<sup>6</sup> Afe uaina cacáillano ie llófuegamaci éniemo fueco diné bíjicaidiaioi. Afémaci iere jacínaitiaioi. <sup>7</sup> Afe méifomo Jesús íaioina jetánota daide:

—Jacíruiño caifo omoi náidacai, —daide.

<sup>8</sup> Afemona érocaidiaioimo, ja buna cióñena. Dama Jesús ciódiaioi.

<sup>9</sup> Afe íduaimona fei íaioi billa llezica, Jesús afémaci ocuide:

—Bie omoi ciona rafue bumo lloñoeno iri. Nanoide fima Jitódicueza, tíllamona nai meine abido cue cáañeille dinó lloñoeno omoi iri, —daide.

<sup>10</sup> Iemona ie llófuegamaci Jesumo jicánotiaioi:

—¿Nibái mei ocuilla uai llófueraini Elías raire uícodo bírena, daiífirediaioi? —jicánotiaioi.

<sup>11</sup> Jira Jesús uai ote:

—Uáfueña Elías fueñe bille. Billano naga ráaniaina ñue fínoite. <sup>12</sup> Mei íadi: “Elías ja bite” ómoína daidícue. Mei bimaci afémiena onóñediaioi. Afémiena onóñenamona afémaci comeci óiacana izóí afémiena finódiaioi. Iemo birui Nanoide fima Jitódicueza, afe izóí cuena duere zefuítaitaioi, —daide.

<sup>13</sup> Iemona ie llófuegamaci, Jesús Juan Bautístado íaioimo úrite, comécido daidíaioi.

*Jesús fiénide joríaí uícaiga jitócomena jílloata*

*(Mr 9.14-29; Lc 9.37-43)*

<sup>14</sup> Idumona ana comini illánomo bitíaioimo, dámie Jesús anamo dújuzaibite. Dújuzaibillano daide:

<sup>15</sup> —Cai Ocuíraima, mai cue jitomo dúecai. Fiénide joríaí íena naillítafirede. Aferi afémie iere duere zefuide. Afémie diga ícaño iraimo baiífiredi; jíáiruido illemo baiífiredi.

<sup>16</sup> Benomo o llófuegamacimo cue atica, mei íadi afémaci afémiena jíllostanidiaioi, —daide.

<sup>17</sup> Jira Jesús uai ote:

—¡Aiii! ¡Níiena jamánomo ínofinidiomoi! Níufueña jámairuitiomoi. Omoi ñue cue rairuíllena, ¿ñie dinó omoi cígimo íredícue? Afe jitócome cuemo ati, —daide.

<sup>18</sup> Atia mei, Jesús afémiemo ite fiénide joríaí izire rairuide. Rairuíllano jino orede. Afe daií daína llezica, afe jitócome jíllobicaide.

<sup>19</sup> Afe mei Jesús llófuegamaci bai eneno Jesús diga úrite; jicánotiaioi:

—¿Mei nibái cai afe fiénide joríaí orénidícai? —daidíaioi.

<sup>20</sup> Jira Jesús íaioina daide:

—Omoi nai figo ínoñediomoiza, afe fiénide joríaí nai jino orénidiomoiza. Uáfueña ómoína dáitícue, ua due omoi ínoiadi iere Juárezifueña finórediomoi. Omoi ínogafue mostaza íji jamánomo dúena izoide íadi, áfedo iere Juárezifueña fínoitíomoi. Bie áillue caifóneduna “Oni jai” o daiíadi, afedu oni jíáinomo jáite. Uáfueña omoi ínoiadi, jánaideza finónide raa ómoimo íñeite. <sup>21</sup> Mei íadi bie izoide fiénide joríaí dama cai güíllena güíño fímaírillado íemo jíái Juzíñamuimo cai úrillado jino orérede.

*Jesús nané íe tílle dáanomo jino llote*

*(Mr 9.30-32; Lc 9.43-45)*

<sup>22</sup> Galilea éniendo íaioi macácailla llezica, Jesús íe llófuegamacimo íe tíllifueña íaioimo llote; daide:

—Nanoide fima Jitódicueza, nairai duere finóllena uillícue. <sup>23</sup> Afe mei cuena títaítiaioi. Mei íadi daruíámami íllamona meine abido cáadimiena ítícue, —daide. Aféfueña cacáillano iere zúucaidiaioi.

*Juzíñamuimo gairíracomo dúide úcube Jesús íbade*

<sup>24</sup> Jesús naa ie llófuegamaciri Capernaum jófue mo dúcidiaioi. Dúcina llezica, Juziñamuimo gairíracomo dúide úcube jicáfiredino Pédro mo jicánuaidiaioi:

—¿Omoi llófueraima afe raiñoca úcube ñabaiñete? —jicánotiaioi.

<sup>25</sup> Jira Pedro:

—Jii, ñabate, —daide. Afe mei Pedro jofo jailla llezica, Jesús fueñe Pédrone daide:

—Simón, ¿ómona ñie izói cíoi? Bini illa ñi ñie comínimo úcube jicáfirediaioi? ¿Meita dani ie comínimo? ¿Mei jiáifodo jicánemacimo? ¿Ñie comínimo? —daide.

<sup>26</sup> Jira Pedro:

—Jicánemacimo, —daide.

Iemo Jesús íena daide:

—Ie jira dani ie comini ñabandiaioi. Iemona afe ailli omo íaioi jicaca raiñoca úcube ñabandicue, ¿ero ua? Jii, ñabandicue. <sup>27</sup> Mei íadi bu cai íciñeilla, áfena ñabaticue. Ie jira jóraimo jaillano fácuai. Fueñe riáibite chamu o oíri. Otá ie fue eromo daa úcubetuni báitioza. Afe úcubetuni cócomo jicaca úcube záitaiteza. Afétuni uano afémacimo o ñbari, —daide.

## 18

*¿Ñie come iere jamánomoina?*

*(Mr 9.33-37; Lc 9.46-48)*

<sup>1</sup> Aféruido ie llófuegamaci dáonomo gairíllano Jesumo jicánotiaioi:

—Monamo ite Juziñamui illáimana illáruimo ñie come iere jamánomoina? —daidiaioi.

<sup>2</sup> Afemona Jesús daa jíiza uáiduano íaioi cigiri naidánete. <sup>3</sup> Daí ñiano daide:

—Uáfueña ómoina daidicue, omoi illafue jamai comécina mánairede úrue illa izói méidorediomo. Afe izói omoi ññenia jaca monamo ite Juziñamui illáimana illánomo jofo jáiñeitiomo. <sup>4</sup> Mei íadi bie úrue izoide dama ie abi jacire maméñedimie monamo ite Juziñamui illáimana illáruimo jamánomoidimie. Iemo daje izói bie nífuenide úrue illáfueña dama ie illáfueña méidotimie, afémie jamánomoina. <sup>5</sup> Daa come cue mámedido bie izoide dúeza llínoiadi afémie ja dáaruido cuena llínote.

*Fiénidifueño come bailla iere jacírede*

*(Mr 9.42-48; Lc 17.1-2)*

<sup>6</sup> Ñie come daa bie izoide cuemo ñnote dúeza fiénidifueño baítaiadi, afémie jamánomo duere finórede. Monáillaji iere afóredinomo ie cimomo áillue nofici cuinada dotalle baímo ñuera. <sup>7</sup> Jiáie comínina fiñi finótaocaidino ñni dúerena! Oni ñibéfodo fiénidifueño baítifuaia jaca ífiredi; mei íadi afémie afémaci fiénidifueño baíta ícoina afémie ñni dúerena!

<sup>8</sup> Iemona, o finócafuedo oni ñibéfodo fiénidifueño o baítadi, dama o onoi jáitaja izói, afefue finuana fáicanocairi. Daje izói ñinó o jáillado fiénidifueño o baítadi, dama o idai jáitaja izói, afénomo jáillana fáicanocairi. Mei júbene onoi diga daje izói júbene idai diga izói o íllana zíñona illánomo o jáiadi iere ñuera, mei íadi nágafezi diga, comini duere finólliraimo o baítadi iere figóñede. <sup>9</sup> Daje izói minícamo o eróillamona fiénidifueño o baítadi, dama o uíji cuerónota oni jica dota izói, áfenaimo eróillana fáicanocairi. Mei júbene uina fídimie zíñona illánomo o jáiadi jamánomo ñuera. Mei íadi mena ui diga comini duere finólliraimo o dotabiadi iere figóñede.

*Oveja oni féiraila izoide rafue*

*(Lc 15.3-7)*

<sup>10</sup> Bie úruiaimona daaza jámairuñeno omoi iri. Mei ómoína daidícueza, afémacimo uñnote Juziñamui abi imaci, monamo ite cue Moo uiécomo jaca ífrediaioiza. <sup>11</sup> Mei Nanoide fima Jitódicueza, oni nibéfodo féiraitino jílotaibiticue.

<sup>12</sup> Omoimona ¿ñie izói comeci facádiomoi? Daa cómemo cien diga ovéjaiaia ia, íemo afémacimona daa oveja féiraiadi, afémie afe noventa y nueve diga ovéjaiaia ie cirínoracomo fiénocaite, afe féiraite oveja jénuaillena. <sup>13</sup> Afe féiraite oveja bailla llezica, áferi afémie jamánomo ióbide. Ua nana jáie noventa y nueve diga féiraiñede ovéjaiaia baímo, afe baiga féiraitimieri jamánomo ióbide. <sup>14</sup> Afe izói monamo ite Moo Juziñamui bie dúezaiaimona jaca daa féiraitaacañede.

*Cai ámatiaimona dámie omo fieni íadi, afémiena caimare uáidorediomoi  
(Lc 17.3)*

<sup>15</sup> O ama omo fieni úriadi, uái daí jaillano dama afémiemo úrizairi; afémie fieni illa afémiemo ñue lloiri. Afémie áfena náfueiadi, ja afémiena ñue cáimacaitadio. Afémie diga ñue nabáiritio. <sup>16</sup> Mei íadi afémie áfena náfueñeniadi o uai nábaítana mena come járiri. Afe mei afémiemo úrizairi, mei afémiemo nana nitácafuiia mena come nibai daámani come uai nabáifirenado záitarede. <sup>17</sup> Mei íadi afémie afémacimo cácareacañenia, Juziñamuina ínote aillo dáanomo gairídinomo lloiri. Iemo afémie afémacina nai náfueñenia mai afémie Juziñamuimo ínoñedimiena omoi mameri. Daje izói gobierno raiñoca úcube íáirede jicáfiredinona omoi jámairuia izói afémiena omoi jámairuigamiena mameri.

<sup>18</sup> Uáfueña ómoína dáitícue, biniemo nana omoi féitañega jáíimaci fiénidifuiia, daje izói monamo féitañega. Iemo jáífodo biniemo omoi féitaga jáíimaci fiénidifuiia, afe izói monamo féitaga.

<sup>19</sup> Nane dáanomo ómoína dáitícue, ómoimona ménamie bie éniemo dájena mamedada Juziñamuimo jicáadi, monamo ite cue Moo ómicoi jaca izói íñoiteza. <sup>20</sup> Mei mena come, nibai daámani come cue mámeçido dáanomo gairíadi, afénomo afémaci cígimo itícue, —daide.

<sup>21</sup> Iemo Pedro Jesumo jicánote:

—Cai Ocuíraíma, cue ama cuemo fieni ítena ¿nígacaiño caimare íena uáidoredicue? ¿Meita siete dígacaiño caimare íena uáidoredicue? —daide. <sup>22</sup> Jira Jesús uai ote:

—Siete dígacaiño daíñedicue. Mei jáífodo jamánomo aillo dígacaiño íena caimare uáidoredio. Uafue jaca ñinomo o ámana caimare uáidoredio, —daide.

*Caimare uáidoiacañede tájitañeregamié izoide rafue*

<sup>23</sup> Jesús nai úrioicaide; daide:

—Ie jira monamo ite Juziñamui illáimana illirui biniemo ite illaima finócafue izoide. Aféllaíma nana ie tájitañeregano íemo íbáacaga raana záitaiacade. <sup>24</sup> Afe záitalle táinia mei daa tájitañeregamié illáimamo atídiaoí. Afémiemo jamánomo aillo íballe ite. <sup>25</sup> Mei íadi afémie úcubende. Ie jira ie ocuidimie daide: “Mai bímie, ie ai naa ie úruia riire ocuífirellinona feca, cuemo dúide ie íbárega raa záitalleza,” —daide. <sup>26</sup> Iemona afe tájitañeregamié ie ocuífiredimie anamo dújullano íemo izire jicade: “Cue Ocuidimie, cuemo járitaño. Fíaicana nana omo íbaiticue,” daide. <sup>27</sup> Iemo afe ocuidimie afémiemo dúecaide. Dúecaillano afémie íbárega raa íbátañede. Afe llezica ja afémiena rairuñeno macátate. <sup>28</sup> Mei íadi afe tájitañeregamié oni jailla llezica, jáie afémie izói tájitañeregamié baizájide. Afe tájitañeregamiemo fuéñeidimie omo íballena due ite. Ie jira ie cimoí llínota íena títate izói finode. Afe llezica daide: “Mai cuemo íbárega raa íba,” daide. <sup>29</sup> Iemona ie llaitádimie anamo dújullano íemo izire jicade: “Cuemo raire járitaño. Fíaicana nana omo íbaiticue,” daide. <sup>30</sup> Mei íadi afémie áfena náfueño llavéracomo íena llavétate, ie íbárega íbañelle dino. <sup>31</sup> Jáie tájitañeregano áfena cíoillano, iere zúucaidiaioí. Iemona nana

afe llezica íficaillafuena íaioi ocuídímíemo llujáidiaioi. <sup>32</sup> Iemona ocuídímíe nanóidímíena jírítade. Jírillano íena daide: “Iere fiene táijitafíregamíedio. Mei izire cuemo jicádoza, nana cuemo o íbárega raana dínó fáicanocaidícue. <sup>33</sup> Omo cue dúecailla izóí, daje izóí o nabaimo dúecairedí,” daide. <sup>34</sup> Afe jira afe ocuídímíe iere rícaide. Rícaillano ie nabaimo dúecañedímíena riire duere finótate, nana ie íbárega íbañelle dino.

<sup>35</sup> Bie izóí dáinado Jesús ie úrillana zátate. Daide:

—Illa dígamíe comécido ñue ie ámana uáidoñenia monamo ite cue Moo afe izóí ómoína duere fínoite, —daide.

## 19

### *Fima ie ai dótajado Jesús lletade*

*(Mr 10.1-12)*

<sup>1</sup> Jesús bie uaido úrilla méifomo Galilea éniemona jaide. Jaillano Jordán imani ruícafellemo ite Judea éniemo dúcide. <sup>2</sup> Diga comíni Jesudo jailla, íemo afénomo aillo íraredínuiaina jílloate.

<sup>3</sup> Afe mei fariséuaimona dámierie Jesús zanóllena facátaíbitiaioi. Afémíemo jicánotiaioi: —¿Meita daa come ie áina fia come comeci dáinamona dotárede? Afe izoide ¿meita rairuírede? —daidíaioi.

<sup>4</sup> Jira Jesús uai ote:

—¿Jaiai Juzíñamui Cuegáuaina facádoñediomoi? Afénícomo bie izóí llote. Fueñe comíni comuítatímíe ringo íima diga finode. <sup>5</sup> Nane dáanomo daide: “Bie izóidemona dáamíe ie moo ie ei diga fáicanocaite, afe ie ai diga dájena íaillinoi íllena. Iemona afe íaillinoi daade come izóí íite.” <sup>6</sup> Afemona ménañedeza, daade come izoide. Ie jira jae Juzíñamui daade come finócaza, comíni oni eneno dotánide, —daide.

<sup>7</sup> Mei jira jicánotiaioi:

—¿Iemo nibái mei Moisés lloga uaimo áina dotárede daide? Dótatímíe ie dotaca aimo cuegábena írena. Afébena aféngomo íllano, afémíe aféngona dotárede, —daide.

<sup>8</sup> Jira Jesús íaioína daide:

—Mei afe omoi comeci ínoacañenamona Moisés omoi ai dotállena rairuíñede. Mei íadi nanómona daíí mámeñega. <sup>9</sup> Cue ómoína dáitícue, daa come ai jiruíreiñeniadi dotáadi, jíáie ringo óiadi afémíe fiénide jiruífue finode. Daje izóí oni dotácango otímíe jiruífue finode, —daide.

<sup>10</sup> Iemona ie llófuegamaci íena daidíaioi:

—Mei o lloga ringo íima nabaina jaca íadi, ua ráfueza, ¿meita áireiñeno fia cai jáicaille iere baímo ñuera? —daidíaioi.

<sup>11</sup> Jira Jesús íaioína daide:

—Nana comíni bífuenta ónonidiaioi. Dama Juzíñamui onótallíno bífuenta ónoite. <sup>12</sup> Híñiaimona dáamíe áina ónidiaioi. Dáarie fiene jocóinamona áina ónidiaioi. Jíáimíai comínimona finócari áina ónidiaioi. Iemo jíáimíai Juzíñamui illáimana uai llócaillena jaca áina oñediaioi. Bie uai jeire óredímíe jeire óiteza, —dínori Jesús úrite.

### *Jesús úruiai ñue íllena finode*

*(Mr 10.13-16; Lc 18.15-17)*

<sup>13</sup> Afe mei úruiai Jesumo atídiaioi, ie onoi afézaimo bítano afémíe Juzíñamuimo afémacido úrillena. Mei íadi ie llófuegamaci úruiai atídino rairuide. <sup>14</sup> Mei jíáfodo Jesús daide:

—Dama úruiai cue díne bíteza; afémaci rairuíñeno omoi iri. Mei monamo ite Juzíñamui illáimana illáruimo jáitino bie úruiai izóidiaioi, —daide.

<sup>15</sup> Jesús afe úruiaimo onoi bítano íaioína ézicite. Eziciano oni jíáigobemo jaide.

*Ráarede jitócome Jesús diga úrilla  
(Mr 10.17-31; Lc 18.18-30)*

<sup>16</sup> Iemo jiáiruido daa jitócome Jesumo úrizaibite. Dúciillano íemo jicánote:

—Ñuera Llófueraima, zíiñona cue illino cue maiñóllena ¿nie ñúefue fínoiticue? —daide.

<sup>17</sup> Jesús íena daide:

—¿Nibái mei cuena ñúemiedio daidio? Dama Juziñamui ñuena. Abi diné jiáie ñúemiena iñede. Mei jiáfodo zíiñona illínomo o jáiacania, Juziñamui cai ocuilla uai jeire o oíri, —daide.

<sup>18</sup> Jira afe jitócome íena daide:

—¿Nee mei aféuai? —daide.

Jira Jesús afémiena daide:

—Jiáimana titáñeno iri. Jiruíreñeno iri. Meríreñeno iri. Jiáie cómemo taino lloñeno iri.

<sup>19</sup> O moo o ei diga caimare jacírui. O abina o izíruilla izói, o jiáie cómena o izírui, —daide.

<sup>20</sup> Jira afe jitócome íena daide:

—Nana bífuiaina jízananomona jeire oticue. ¿Afe baimo nifue nai cuemo fiébilla? —daide.

<sup>21</sup> Jira Jesús íena daide:

—Nífunino comécina jaícina jóidimie o íacania, mai jaillano omo ite ráaniai o fecari. Fécano afe iba úcube dúredinodo fecari. Afemona monamo ite zíiñona ráifide raa óiena íteza. Afe nana o fecalle mei, mai cuedo bi, —daide.

<sup>22</sup> Mei íadi afe jitócome Jesús daí dáiñana cacáillano abido zuure jaide, mei afémie iere ráaredeza.

<sup>23</sup> Iemona Jesús ie llófuegamacina daide:

—Uáfueña ómoína dáititcúe, iere aillo ráaredimie mei íadi ie ráaniaina cue baimo afémie izíruiadi, iere férede Juziñamui illáimana illíruimo jáillena. <sup>24</sup> Nane dánomo dáititcúe, caméllona mameide áillue rille eedo uífodo enéfemo jailla juánide, mei jiáfodo aillo ráaredimie Juziñamui illáimana illíruimo jaille iere juárede, mei ie ráaniai cue baimo afémie izíruiteza, —daide.

<sup>25</sup> Ie llófuegamaci áfena cacáillano iere fáigacaidiaioi. Iemo dani jofo conímaiaimo jicánotiaioi:

—Iemona ¿níimie jíllorede? —daidiaioi.

<sup>26</sup> Jesús íaioimo eróicana daide:

—Comínimona bie izóidifue finónide, mei íadi Juziñamuimona nana finórede.

<sup>27</sup> Iemona Pedro íena daide:

—Cai Ocuíraima, caimo ite raana nana fiénocaillano odo ja jáidicai. Iemona mei ¿minica máiñoiticaí? —daide.

<sup>28</sup> Jesús íaioina daide:

—Uáfueña dáititcúe, uire jiáiruido naga ráfuiái cómofuiaina jáite. Aféruimo Nanoide íma Jitódicueza ebírede illaíma ráíiranomo ráititcúe. Afe llezica omoí cue diga jáicana jira, doce dígade illaíma ráíiranomo ráititcúe. Afenamona doce dígade Israel náiraiaí ñue jaícina jicánotitcúe. <sup>29</sup> Iemo cue ícoínia naga jofona fiénocaidimie, daje izói ámatiaí naa ie móotiaíri fiénocaidimie, daje izói naa úruiaíri fiénocaidimie, íemo jiái ie illano zóofenocaidimie, afémaci cien dígacaiño íballiaioi. Daje llezica afémaci zíiñona illínona máiñoitiaioi. <sup>30</sup> Mei íadi birui aillo uícoficaidino aféruimo óodaficaite. Daje izói birui aillo óodaficaidino uícoficiaioi.

<sup>1</sup> Monamo ite Juzíñamui illáimana illirui jírícure naama finoca izoide. Afémie jítiramo raire ie táijiramaci jénuaide, ie jírícue óllena. <sup>2</sup> Afémie ie táijiramaci íballena afémacimo jaícina lloste: “Daarui táijina iba dieze úcube illa dígamie íbaiticue,” daide. Daí dainano ie jacáfaimo táijillena orede. <sup>3</sup> Afe mei jitoma nuévemo ítemo oni gairíranomo jíáie táijitino jénuaide. Afe gairíranomo dáarie táijíñeno itino baite. <sup>4</sup> Iaióina daide: “Mai batí cue jacáfaimo táijizairi. Nauife dibénemo ómoimo ñue íbaiticue,” daide. Iemo afémaci dinomo táijizaidiaioi. <sup>5</sup> Afe jacafai naama jitoma jaíciri ítemo meine nane jíáie táijitino jénuaide. Daje izóí nane nauife dibénemo jénuaide. <sup>6</sup> Iemo nane ja nauízaidemo ocuídime gairíranomo jíáie táijitino jénuaide. Dinomo jíáie táijíñedino baizájide. Iaióina daide: “¿Ñibái mei omoi nágarui táijíñeno benó ífirediomo?” daide. <sup>7</sup> Jira afémaci íena daidíaioi: “Mei bu caina táijitañede,” daidíaioi. Iemona afémie íaióina daide: “Omoi daje izóí cue jacáfaimo táijizairi. Iemona ómoimo dúide dieze ñue íbaiticue,” daide. <sup>8</sup> Ja nauídemo, jacafai naama táijitagano úiñotimiena daide: “Mai táijidino dáanomo uáiduano iba. Írainomo jáidino fueñe ibari, íemo nano fueñe jáidino méifodo ibari,” daide. <sup>9</sup> Iemona nauízaiacademo jáidino dúcidiaioi. Afémacimona illa dígamie ñue íaióí táijina iba llínotiaioi. Daa denario daina úcube illa dígamie llínotiaioi. <sup>10</sup> Afe mei nano fueñe táijizaidino ducina llezica, “Jíáimaci baimo aillo úcubena llínoiticaí,” daí comécido facádiaioi. Mei íadi nana illa dígamie dájerize daarui táijina iba dieze úcube llínotiaioi. <sup>11</sup> Ucube llínua llezica, ocuídime ríicaidiaioi. <sup>12</sup> Iena daidíaioi: “Bie írainomo dúcidino daa hora táijidiaioi. Mei íadi daa cai o íbaze íaióina íbáidío. Cai náamonaze uzíredemo táijidicaí,” daidíaioi. <sup>13</sup> Mei íadi afe ocuídime íaióina daide: “Omoi cacai. Omoimo fiñi íñédicue. Fueñe cai úrilla llezica ¿ómoimo dáaruina táijina iba dieze úcube íbaiticue daíñédicue? Jíi, daidicue. ¿Afe llezica áfena jíéruíñediomo? Uáfueza, jíéruitiomo. <sup>14</sup> O táijina iba llínota, mai jai. Bie írainomo dúcidinona daa o cue íbaze íbáacadicue. <sup>15</sup> ¿Meita cue úcube cue dotáacana dieze dotánidicue? ¿Meita jíáime cue dúecaillano aillo cue fécarí úradoidío?” dinori ocuídime úrite. <sup>16</sup> Afe izóí fueñedino óodaficaitiaioi, íemo jíái óodaidino uícoficaitiaioi. Mei uafue, jíirigano aillo ite, mei íadi nizécano dúemaci, —dinori Jesús daide.

*Jesús nane dáanomo ie tñille lloste*  
(Mr 10.32-34; Lc 18.31-34)

<sup>17</sup> Jerusalén iodo Jesús jailla llezica, doce dígade ie llófuegamaci bai eneno uillano daide: <sup>18</sup> —Birui omoi ciona izóí Jerusalemo jáidicaí. Daje izóí Nanoide Hima Jitódicueza onódiomo. Afénomo lletáriraini illaíma, naa ocuica uai llófueraini cue titállena mámeitiaioi. <sup>19</sup> Mámiano onínemacimo cuena fécaítiaioi, cue íaióí jífánodoillena. Daje izóí ráziaido cuena fáitíiaioi. Afe mei cuena cruzmo córaítiaioi. Mei íadi daruíámani íllemona meine abido cáadimiena jáitíicue, —daide.

*Santiago Juan díga íaillinoi ei Jesús díne daa rafue jícánuaíbite*  
(Mr 10.35-45)

<sup>20</sup> Afe mei Santiago Juan díga íaillinoi ei Jesuna daízaíbite. “Mai cuemo dúecairi,” daide. Bíaillinoi moo Zebedeo. Afengo naa afe íaillinoiri Jesús anamo dújuzaíbitiaioi. <sup>21</sup> Jira afémie aféngona jícánote:

—¿Minica óiacadio? —daide.

Jira afengo daide:

—Ílláimana o illíruimo dúcille llezica, cue jító íaillinoimona dáamie o nabézimo rainari, íemo jíáime o jarífezimo rainari, —daide.

<sup>22</sup> Jira Jesús íaióina daide:

—Omoí cuemo jicaca raana nai figo onóñediomoi. ¿Meita duere cue zefuille izói zefuirediomicoi? Cue duere íaioi finolle izói ¿meita ocuirediomicoi? —daide.

Jira afe íaillinoi: —Jii, —daide.

<sup>23</sup> Iemona íaillinoína daide:

—Iere uáfueza. Duere cue zefuilla izói duere zéfuitiomicoi. Daje izói cue duere íaioi finua izói afe izói duere finólliomicoi. Mei íadi cue nabezi, cue jarífezimo ómicoi ráinaille cue daiñidicue. Dama cue Moo uícodo mamécamié ráirena, —daide.

<sup>24</sup> Jáie diez dígade ie llófuegamaci afe jicánua cacáillano, afe íaillinoímo ráicaidiaioi.

<sup>25</sup> Iemona Jesús dáanomo nana íaioi uáiduano daide:

—Onódiomoiza náiraiái illaini íaioi úiñoganona ocuíoifirediaioi. Iemo íaioimona iere ocuídillaini afémacimo ite ríinodo iere jacire ocuífirediaioi. <sup>26</sup> Mei íadi omoi cígiri daí íñeite. Mei jíáfodo ómoimona jamánomoidimiena íacadimie, omoi anamo táijidimie izói írede. <sup>27</sup> Daje izói ómoimona uícofiacadimie omoi riire ocuícamié izói írede. <sup>28</sup> Afe izói Nanoide Ima Jitó omoi cígimo ite. Mei jii, jíáimaci cuena canóllena biñédicue, mei jíáfodo nana comini cánuaibitícue. Uafue aillo comini íaioímo ite fiénidifuiái oni dóllena tízaibitícue, —dinori Jesús úrite.

*Jesús mena únidimie jllotote*

*(Mr 10.46-52; Lc 18.35-43)*

<sup>29</sup> Jesús naa ie llófuegamaciri Jericó jófueмона jino jailla llezica, díga comini afémiedo jáidiaioi. <sup>30</sup> Jáidiaioímo afe io abímo mena únidimie ráidiaillinoi. Ja Jesús afe íaillinoi abído jáizaillana cacádiaillinoi; cacáillano riire daidíaillinoi:

—Ocuíraíma, jaiái illaíma Davidmona comuítagamié mai cócomo dúecai, —daidíaillinoi.

<sup>31</sup> Jira comini íaillinoína rairuíaioi. Afe íaillinoína, “Uriñeno, llícaí,” daidíaioi. Mei íadi afe íaillinoi llícaíñeno jamánomo caillíoidiaillinoi:

—Ocuíraíma, jaiái illaíma Davidmona comuítagamié, mai cócomo dúecai, —daidíaillinoi.

<sup>32</sup> Jira Jesús mózide. Mózillano afe íaillinoi jíirillano jicánote:

—¿Ñie izói jitáidiomicoi afe izói ómicoi cue finóllena? —daide.

<sup>33</sup> Jira afe íaillinoi uai ote:

—Ocuíraíma, cíóacadicoco, —daidíaillinoi.

<sup>34</sup> Jira Jesús afe íaillinoímo dúecaillano, íaillinoi ui jetade. Jeta llezica ñue cíódiaillinoi. Afe mei Jesúoiri jáidiaillinoi.

## 21

*Jesús Jerusalemo jofo jaide*

*(Mr 11.1-11; Lc 19.28-40; Jn 12.12-19)*

<sup>1</sup> Ja Jerusalemo áinozidiaioímo, Betfagé duera jófueмо dúcidiaioi. Afe jofue Olivo daína idu áinori ite. Afénomona Jesús ie llófuegamacimona ménamié orede. <sup>2</sup> Oriano íaillinoína daide:

—Baie ómicoi uícomo ite duera jófueмо ómicoi jai. Afénomono cuinaca búrrana cíoitomicoi, naa ie úrue díga. Afe zuitada cuemo atíri. <sup>3</sup> Afénomono comini jíáfodo dáíadi, “Cai Ocuíraíma jítaíllano jícácaza; bie búrrana raíre abído omo óreite,” daíri, —Jesús daide.

<sup>4</sup> Bífuiái íficaide jaiái Juzíñamui uai llóraini cueda uai ñue ícoímo fuitállena. Afe uai daide:

<sup>5</sup> Jerusalena mameide jofue comínina daíri:

“Ero, o illaíma comécina mánaidimie izói billa.

Burra emódomo ráicabite.

Afe méerede raa abífirede burra úrue emódodo bite,” —daide.

<sup>6</sup> Afe mei ie llófuega íaillinoi jaillano Jesús íaillinoi ocuilla izói finódiaillinoi. <sup>7</sup> Afe burra naa ie úrue atídiaillinoi. Atiano íaioi ínícuirona afe búrrana jobédaioi. Afe mei Jesús afe



emódomo ráinazaide. <sup>8</sup> Afe llezica aillo comini Jesús jáillao inícuirona jobé diaioi. Jáimaci rafóruai jáitajano íemo jobé diaioi. <sup>9</sup> Dáarie Jesús úicodo jáidí diaioi; jáimaci ódana jáidí diaioi. Nana daje izóí riire úrití diaioi:

—Jaii illaíma Davidmona comútagamiemo ñúefue mai cai daiílli. Juzíñamui mámeçido bitímie caimare íteza. Juzíñamuimo ebíredí fue cai mamelli, —dai dí diaioi.

<sup>10</sup> Jesús Jerusalemo jofo jailla llezica afe jofue comini diga rafue júfidotí diaioi. Diga comini afémie dibénedo jícanotí diaioi:

—¿Bie bu? —dai í zítí diaioi.

<sup>11</sup> Jira jáimaci dai dí diaioi:

—Bímie Galiléamo ite Nazaret jofue ímie. Afémie Jesús, Juzíñamui uai jino llóraíma, —dai dí diaioi.

*Jesús Juzíñamuimo gairíracó ráfua izóí ñue fínode*  
(Mr 11.15-19; Lc 19.45-48; Jn 2.13-22)

<sup>12</sup> Afe mei Jesús Juzíñamuimo gairíracómo jofo jaillano, afeco eromo ite ráaniai fecá dino naa íbárioidinori jino jiude. Afénomo ite úcube méidofiredino táijinabani Jesús oni cáicoide. Daje izóí fíicirillai fecá dino íaioi ráiracuai Jesús oni cáicoide. <sup>13</sup> Afémacina daide:

—Juzíñamui Cuegáuai daide: “Cue jofo daa cuemo úrifireracona íte.” Mei íadi biconá merírifiredino jofo izóí finó dío moi, —daide.

<sup>14</sup> Afe Juzíñamuimo gairíracómo Jesús illa llezica dáarie uínidímíai, naa ídainidino Jesumo bití diaioi. Afémie afémacina jíllotate. <sup>15</sup> Mei íadi lletáriraini illaini, naa ocuica uai llófuetinori Jesús uaido dáinamona comúdena cíoillano ríicaidí diaioi. Daje izóí afe gairíracó eromo ite úruiai Juzíñamuimo caimátailla uai cacáillano bimaci iere ríicaidí diaioi. Mei afe úruiai dai dí diaioi: “Jaii illaíma Davidmona comútagamie iere ebíredeza,” dai dí diaioiza. <sup>16</sup> Jira bimaci ríicáillano Jesuna dai dí diaioi:

—¿Baie úruiai úrillana cacáñedio? —dai dí diaioi.

Jira Jesús íaioi uai ote:

—Cacádicue. ¿Bie rafue úrilla cúeina uaina facádoñedio moi? Afe jaii David daina uai Juzíñamuina bie izóí daide:

Uruiai ebire ñúefuena óiena jae rotátatio, —afe dai í Jesús íaioimo llote.

<sup>17</sup> Afe mei ie jícanotínona fáicanocaillano Jesús oni Jerusalémona Betania jófue mo íniaide.

*Jesús llizíñede higuera daina amena faidode*  
(Mr 11.12-14, 20-26)

<sup>18</sup> Afe jítiramo Jesús meine Jerusalemo bítemo iere júfínaite. <sup>19</sup> Afe io abiri higuera daina aménana ciode. Jesús afénomo ánozide, afena llizilla riéllena. Mei íadi llizíllajiaína íñédeza, daa íe íbiaína ciode. Mei jira Jesús afe higuérana daide:

—Jaca benómona llizíñeitio, —daide.

Dai í daina llezica afe higuera dúide. <sup>20</sup> Ie llófuegamaci afena cíoillano fáigacaidí diaioi. Íemo Jesumo jícanotí diaioi:

—¿Ñie izóí ite bie higuera amena raíre dúilla? —dai dí diaioi.

<sup>21</sup> Jesús íaioi uai ote:

—Uáfueña ómoína dai dicue, ua o íinoiadi daa bie aménamo cue fínua izóí finóredío moi, íemo jái afe baímo aillo finóredío moi. Bie caifóneduna “Caífo áijicaillano oni monáillaimo baízai” o dáíadi, afe bie caifónedu o uai jeire uano, oni dínomo baízate. <sup>22</sup> Juzíñamuimo omóí úrilla llezica, ua o ínoia nana omóí jícána ñue llínoitío moi, —daide.

*Illáicomini Jesús ocuífirena ríino jicánotiaioi  
(Mr 11.27-33; Lc 20.1-8)*

<sup>23</sup> Afe mei Jesús Juziñamuimo gairíracomo jofo jaide. Jaillano afénomo llófuemarite. Afe llezica lletáriraini illaini naa judíuai eicomíniri Jesumo jicánuaidiaioi:

—¿Nié ríinodo o raana finófiredio? ¿Afe ríino bu mei omo fecaca? —daidiaioi.

<sup>24</sup> Jira Jesús íaioi uai ote:

—Cuemo omoi jicánua izói, ómoimo daafue jicánoiticue. Cue jicánolle uai ñue omoi óiadi, bie raa cue finua ríino ómoimo llóiticue. <sup>25</sup> Mei Juan ¿bu comini báutizallena ocuica? ¿Meita Juziñamui ocuica? ¿Mei nibai comini ocuica? —daide.

Mei íadi uai oñeno, áfena dani conímamo júfidotiaioi; daidiaioi:

—Juziñamui ocuica cai daíadi, Jesús caina dáite: “¿Níbái mei afémiena ínoñediomoi?”

<sup>26</sup> Mei jíáfodo, comini ocuica, cai daíadi, comínina jacíruiticai; mei nana comini “Juan Juziñamui dibénedo úrifirede” daidiaioiza.

<sup>27</sup> Iemona bie izói Jesuna daidiaioi:

—O jicánoga jaca onóñedicaí, —daidiaioi.

Jira Jesús íaioina daide:

—Daje izói bie raa cue finua ríino ómoimo llóñeiticue, —daide.

*Mena jitó iaillinoi illa izoide rafue*

<sup>28</sup> Daí daina mei, Jesús íaioina daide:

—Bíena ¿nie izói daidíomoi? Daa ima mena jitórede. Iaillinoi moo dámienna daide: “Cue jitó, mai cue jíricore illánomo táijizairi,” daide. <sup>29</sup> Afe jitó uai ote: “Jáiacañedicue.” Mei íadi afe mei ie comeci jíáfodo fácano, afénomo táijizaide. <sup>30</sup> Afe mei afe moo jíáie jitomo úrizaide. Daje izói íena daide. Iemo bie jíáito íena daide: “Jíi, táijizaiticue.” Mei íadi afémie táijizaiñede. <sup>31</sup> Meita bie ménaillinoimona ¿nie jitó ie moo jitáinana finua? —daide.

Jira íena daidiaioi:

—Nanóidimie, —daidiaioi.

Jira Jesús íaioina daide:

—Uáfueña dáititcúe, gobierno jicátáfirega úcube llínotino, naa ímamo jiruífiredede ringóniari naa jíáie afe izoide fiénidino Juziñamui illáimana illánomo raire omoi úcodo jáitiaioi. <sup>32</sup> Mei nauí Juan Bautista ñue omoi íllena llófuiaibite, mei íadi áfena ínoñediomoi. Mei jíáfodo afe úcube llínoraini naa jiruífiringotiairi ie dánana ínotiaioi. Mei íadi omoi baimaci comeci ifue méiduana cíodiomoi íadi, afémie mo ínollena omoi comeci itífuaína méidoñediomoi, —daide.

*Fiénide táijnamací izoide rafue  
(Mr 12.1-12; Lc 20.9-19)*

<sup>33</sup> Mai bie jíáie ráfue mo omoi cácarei. Jacafai naama jíricojiai éroide úvaiai rillino finode. Fínuano afeno nágafene cirínote. Cirínuano afe úvaiai zaizíllico finode. Afe llezica caifo jica tígicaco nite nana afe rigánaimo ñue rairuíllena.

Afe mei afémie afécaie ie úiñotimacimo fecade, ie biñena dino. Afe dígamona íemo íbádiaioi. Daí fécano afémie jíáie éniemo jaide. <sup>34</sup> Afe mei úvaiai llizille llezica, ie ocuífirégano orede, náamamo dúide dibene jicállena. <sup>35</sup> Mei íadi afe táijidino jacafai naama orécano llaitádiaioi. Lláitano dáamienna rázido fatíaioi. Jíáimienna titádiaioi, íemo jíáimienna nófienna níjidiaioi. <sup>36</sup> Ie mei jacafai naama nane jíáie ocuífirégano orede. Nano fueñe ória baimo orede. Mei íadi afénomo táijidino daje izói nane nana afémacina fiéni finódiaioi.

<sup>37</sup> Iirainomo afe jacafai naama ie jitó orede. “Afémiena nibai caimare náfueitiaioi,” daide. <sup>38</sup> Mei íadi naama jitó bíllana cíoillano afe táijidino conímama daidiaioi: “Bímie bie

énie uire máiñoitimie. Mai cai falli. Afe mei bie énie dani cáieiteza,” daidíaiói. <sup>39</sup> Afe mei afe jitó llaitádiaiói. Lláitano jacafai baimo uillano íena titádiaiói.

<sup>40</sup> Mei jira Jesús jicánote:

—Afe jacafai naama billa llezica, afénomo táijidinona ¿níie izói níbaite? —daide.

<sup>41</sup> Jira íena daidíaiói:

—Afémie afe táijitatinomo dúecaiñeno íaioina títaite. Afe mei jíáie ñue táijidinomo ie énie nano íanori fécaite, mei náamamo dúina dieze llizíllaji raire afémie mo izájifireitiaióaiza, —daidíaiói.

<sup>42</sup> Jira Jesús daide:

—¿Cue dibénedo Juzíñamui Cuegáuaina jaca facádoñediomoi? Aféuai bie izói daide: Jofo níraini jámairuillano oni fádoica jáillirai ja ñuera jáillirai izóidena jaide. (Bie daíacade comíni jámairuillano ruifíruigamie ja ñuera jica jalleide illáimana jaide.) Bie cai Moo Juzíñamui finoca.

Afefue iere caimo ebire cacaide.

<sup>43</sup> Mei íadi ómoína dáititue, Juzíñamui illáimana ómoimona oni bairolle. Afe mei Juzíñamuimo duide dibene ízaifiredinomo ie illáimana fécaite. <sup>44</sup> Iemo afe nofici daínamiemo éicitaitimie niné tibérotaitaite. Iemo afe nofici jáimie mo baiíadi jízefo izói afémiena finoite, —daide.

<sup>45</sup> Lletáiraini illaini naa fariséuairi Jesús afe izoide ráfuiai llúana cacáillano daidíaiói, “Afémie ico caido úrite,” daidíaiói. <sup>46</sup> Iemona afe Jesuna llaitácadiaíoi, mei íadi comínina jacíruillano llaitáñediaíoi. Mei nana comíni, “Jesús Juzíñamui dibénedo úrite,” daidíaióaiza.

## 22

### *Airena llezica finoca ráfue mo mameca uai*

<sup>1</sup> Jesús nane dáanommo úrizaide. Afémie jíáifuemo mameca uaido úrizaide. Íaioina daide:

<sup>2</sup>—Monamo ite Juzíñamui illáimana illirui bie izoide. Illaíma ie jitó áirena llezica rafue finua izoide. <sup>3</sup> Ie ocuífregano orede, nauí uícodo llogano jírrillena. Mei íadi afe uáidogano bíacañediaíoi. <sup>4</sup> Ie jira afémie jíáie ocuífregano dáanommo orede. Uáidoganona bie izói daíri daide: “Íráiziñi güille ja nana ñue uédeza. Farede juráreto fatícueza. Ja nana ñue finócaza. Airena ráfue mo mai nana omoi biri.” <sup>5</sup> Mei íadi áfemo íráizillena llogano náfueñediaíoi. Afémacimona dáamie ie jacáfaimo jáizaide. Jáimie ie ráaie oni fécajide. <sup>6</sup> Jáimaci illaíma oreca jírrizaidino llaitádiaíoi. Lláitano íaioina duere finoda titádiaíoi. <sup>7</sup> Jira afe illaíma iere ráicaide. Ráicaillano ie úiñote fuiríraini orede, ie orécano fatino titállena; afe llezica afémaci jofue jobáillena. <sup>8</sup> Afe mei nane jíáie ie ocuífreganona daide: “Airenafue nana ñue finoca. Mei íadi fueñe uáidogano fiéni itíaíóaiza bínidiaíoi. <sup>9</sup> Iemona jofue cígido macáraommo omoi jai. Afénommo nana o cíoillimacina íráizizaíbiri o daíri,” daide. <sup>10</sup> Iemona afe ocuífregano jino macáraommo jáidiaíoi. Jaillano nana íaíoi cíónamacina: “Íráizizaíbiri,” daidíaiói. Fiénidino naa ñúemaciri nana dáanommo íaioina gairítate. Afemona íráizillico ja comínina oruide.

<sup>11</sup> Afe mei afe illaíma ie jírriganona onóillena jofo jaide. Íaioimmo eroilla llezica daa áirena ráfue mo jítaífregaroi jítaíñediomiéna ciode. <sup>12</sup> Jira íena daide: “O áirena ráfue mo jítaífregaroina jítañeno ¿o nie izói jofo bitio?” daide. Mei íadi afémie uai ollíuai íñede. <sup>13</sup> Ie jira illaíma güirábanimo táijidinona daide: “Bímie riire omoi maíri; maíano afémie jino jítifommo dotari. Afénommo afémie duere éheiteza, daje izói izírenari murímuriteza,” daí afe illaíma ocuide. <sup>14</sup> Iemo Jesús nai úrillano daide: Uáidogamací iere aillo ite, mei íadi eneno nízécano dúemaci, —daide.

*Gobierno íbátaga úcube rafue  
(Mr 12.13-17; Lc 20.20-26)*

15 Iemona fariséuai Jesús úrilla uai féitaiacadiaioi. Féitajano fiénidifue afémiemo jóoneacadiaioi. Afe izói finóllena dáanomo maméritiaioi. 16 Iemona afémacimo jaináidino, daje izói naa Heródesmo jaináidinori Jesuna daíllena orédiaioi:

—Llófueraima, onódicaiza ua rafue daífiredio. Daje izói Juzíñamui diné cai jáillio uáfuea llófuefiredio. Afe llezica comini daináuaimo náfuefinidio. Iemo jino cíoidifuiaina comínimo riire jicánoñedio. 17 Ie jira o comeci dainafue jino caimo lloiri: ¿Romano jamánomoidillaíma ibátaga úcube ibádicainia ñuera? ¿Ñibai fiénide? —daidíaioi.

18 Mei íadi Jesús afémaci facátamarillana onode. Jira íaioina daide:

—Comeci íairena mei abina ñue cíoidinodiomoi. ¿Ñibái mei cuena jíitaiacadiomoi?

19 Afe ibátafirega úcubetuni cuemo ácata, —daide.

Iemona daa denario daina úcubetuni atidiaioi. 20 Afena cíoilano Jesús íaioimo jicánote:

—Afétunimo ¿bu uíeco jana illa? Iemo afétunimo ¿nie come mámecei cúeina? —daide.

21 Ie uai otíaioi:

—Romano jamánomoidillaíma mámecei illa, —daidíaioi.

Jira Jesús íaioina daide:

—Jamánomoidillaímamo dúide diga mai íemo fecari. Daje izói Juzíñamuimo dúide diga Juzíñamuimo fecari, —daide.

22 Afena afémaci cacáillano iere fáigacaidiaioi. Iena zóofiano oni jáidiaioi.

*Tiide comini meine abido cáaillena jicánotiaioi  
(Mr 12.18-27; Lc 20.27-40)*

23 Aféruido saducéuaimona dáarie Jesumo úrizaidiaioi. Saducéuai: “Tíidino meine abido cáaiñeite,” daífirediaioi. Afe daí Jesumo jicánuaibitiaioi:

24 —Llófueraima, Moisés caimo cuetá fiécabemo daide: “Daa come tíia, afémie ama ie fecíngona órede, afémie úruiaí ie tiide ama méifomo comuíllena.” 25 Mei nauí cai cígimo siete diga ámaredimíaina ite. Nanóidimie áireillano nai úruenidemo tiide. Tíillano ie méifoide ama afe fecíngo ote. 26 Iemo daje izói afémieri íficaide. Afe mei nane jíáimie daango ote. Afémiemo daje izói íficaide. Daí fiébiñeno nana fuitíaioi. 27 Afémaci nana tilla méifomo afengó nane tiide. 28 Iemona tíidino meine abido cáailiruimo, mei siete dígamie daango óteza, ¿afengó nie íima aina mámeite? —daidíaioi.

29 Jira Jesús íaioi uai ote:

—Juzíñamui Cuegáuai naa afémiemo ite ríinori omoi onóñenamona fiéni úritiomoi.

30 Tíidino meine abido cáailano áinitiaioi. Daje izói jíáinomo íaioi jízaníai ínreitañeitiaioi.

Mei jíáifodo monamo ite Juzíñamui abi imaci ízoitiaioi. 31 Mei íadi tíidino meine abido caana dibénedo ¿afe Juzíñamui ómoimo Cuegáuaina facádoñediomoi? Afémie bie izói daide:

32 “Dáaruido Abraham Juzíñamuidicue, naa Isaac, Jacob diga,” mei afémaci Juzíñamui illánomo cáadiaioiza. Mei uáfueza, Juzíñamui tíidino íeñede mei jíáifodo cáadino ie, —daide.

33 Daí Jesús dainana cacáillano comini ie llófuemarillari fáigacaidiaioi.

*Iere jamánomo íñnorega caimo ocuina uai  
(Mr 12.28-34)*

34 Fariséuai Jesús saducéuai líicaitajana cacáillano, dáanomo gairídiaioi. 35 Afémacimona daa ocuica uai llófueraima Jesús facátaiacade. Jira íemo jicánote:

36 —Llófueraima, nana ocuica uáillaímona ¿ñíuaina jamánomoina? —daide.

37 Jira Jesús daide:

—“O Juzíñamui nana o comécido izírui, naa o joréñori, íemo o ífoci úrillado.” 38 Aquíe uai nana ocuica uáillaímona jamánomoina. Afe uai raire uícodo íñnorede. 39 Afe méifoide uai daje izoide. Aféuai daide: “Dama o abina o izírui illa izói, afe izói o jíáie cómena izírui.”

<sup>40</sup> Bie ménade ocuilla uai nana Moisés ocuilla uaillai jillaci. Daje izói Juzíñamui uai jino llóraini llócaiga uai bíemona comuide, —daide.

*¿Mei bu jító Cristo?*

*(Mr 12.35-37; Lc 20.41-44)*

<sup>41</sup> Afe fariséuai nai dáanommo itíaiommo, <sup>42</sup> Jesús íaiommo jicánote:

—¿Crístommo nie izói comécido daidíommo? Afémie nano ie comuítatimie ¿mei bu? —daide.

Jira íena daidíai:

—Afémie Davidmona comuítagamie, —daidíai.

<sup>43</sup> Iemona Jesús íaiommo daide:

—Mei ¿nie izói David, Juzíñamui Ñuera Joreño llúado afémie jítommo “Cue Ocuíraima” daírede? David daí daína uai cúeina:

<sup>44</sup> Monammo ite cai Moo Juzíñamui cue Ocuíraimommo daide:

“Bené cue nabézimmo o ráiri, o éoigamací cue anáfenolle dino.”

<sup>45</sup> Mei David afémienommo “Cue Ocuíraima” daíadi, ¿nie izói Cristo Davidmona comuítatimienommo mamérede? —daide.

<sup>46</sup> Daí daína uai buna ónide. Iemmo aféruimommo jíai facátalle jicánua uai maméñediai.

## 23

*Jesús fariséuammo naa ocuica uai llófuetinorí íaiommo fiénidífue llote*

*(Mr 12.38-40; Lc 11.37-54; 20.45-47)*

<sup>1</sup> Afe jira Jesús nana comínimmo naa ie llófuegamaciri daide:

<sup>2</sup> —Ocuica uai llófuefiredino naa fariséuairí Moisés ocuica uai jino llóllena mamécaiai.

<sup>3</sup> Afemommo afémací llógana jeire omommo oíri. Daje izói nana afémací ómoina dáinana náfuere.

Mei íadi afémací illa izói iñeno iri. Mei comínimmo íaiommo úrilla izói iñediai. <sup>4</sup> Afémací comínimmo iere riire ocuide. Afe íaiommo ocuica uaina comínimmo finónide. Mei íadi dani afémací

afe ocuica uaina due jiza jetáacañediai. <sup>5</sup> Núemací daíllena nana íaiommo finócafuiací comínimmo

eróicana taino finófirediai. Daje izói núemací daíllena Juzíñamui uai cúeina ozócimmo

jítajana gáidiai. Afe izói afe uai jíaimací ie ónommo maitá úcaillena gáidiai. Iemmo

jíai íaiommo jítáfirega áreoi fuemmo ite ebire cíoilena jíaimací baímommo finófirediai. <sup>6</sup> Iemmo

ráfuemmo íaiommo güizájadi afémací ñuera ráillinuai jenófirediai. Daje izói Juzíñamui uai

llorácommo íaiommo jáiadi illaini ráiranuai jenódiai. <sup>7</sup> Afe izói jino jofue cígimmo ite macáraodo

íaiommo jáiadi, comínimmo camare íaiommo uáiduana gáidiai. Daje izói “Cai Llófueraimadío” dáinana

gáidiai.

<sup>8</sup> Mei íadi “Cai Llófueraimadío” daí daítañeno iri. Mei nana omommo ámatiai; íemmo jíai omommo

Llófueraimommo jaca daade; afémie Cristo. <sup>9</sup> Afe izói bie éniemmo buna cue Móodio daíñeno

iri. Mei omommo Moo dáadeza. Afémie monammo ite. <sup>10</sup> Daje izói jíaimacína “O cai Illáimadío”

daítañeno iri. Mei o Ocuítimie dáadeza. Afémie Cristo. <sup>11</sup> Omommona jamánomoidimienommo

jíaimommo canófiredimie. <sup>12</sup> Mei uáfueza, jamánommo abí jacire mamédimie jamáimienommo

jáite. Mei jíafodo abí ñnoñeno jiba cómedicue daidímie jamánomoidimienommo jáite.

<sup>13</sup> Ocuica uai llófuetinommo naa fariséuairí, comécimmo íairena mei abina ñue cíoidimommoza,

ñimmo omommo dúerena! Mei comínimmo jofo jáiñeillena, monammo ite Juzíñamui illáimommo il-

lano nazena íbáifiredimommo. Mei díga Juzíñamui ñue ocuítatimienommo lluanommo, aféfuaiommo

abido náfueñedimommoza, dani o illafue ñue jáicimmo joiñena jira. O lloga iodo uáfue

jáiñedioza. Afe llezica afénommo jofo omommo jáiacañedimommo. Daje izói afénommo jofo jáiacadino

rairuítimommo.

<sup>14</sup> Ocuica uai llófuetinommo naa fariséuairí, comécimmo íairena mei abina ñue cíoidimommoza,

ñimmo omommo dúerena! Fecíngotiai jofónimmo bairófiredimommo. Afe llezica núemací daíllena

comini eróicana Juzíñamui are úrifirediomi. Ie jira omoi jiáimaci duere zefuille baimo duere finólliomoi.

<sup>15</sup> Ocuica uai llófuetino naa fariséuairi, comécina íairena mei abina ñue cíoidiomoi, jñi omoi dúerena! Nágagobiaido jáidiomoi daa come omoi ñnoga uai dibénemo omoi itátallena. Itata mei, afe come omoi baimo fiénidimiena oréidiomoi. Iemona omoi afémieoiri, comini duere finolle iraimo zíñona duere zefuúllena mamécaomoi.

<sup>16</sup> Uina cíoiñede io ifódino izóidiomoi, jñi omoi dúerena! Comínina bie izói daiífirediomi: “Daa come iere uafue daiúllena, Juzíñamui ico mámece llínoiadi afefue ráañede. Mei íadi afémie afécomo nitaca oro mámece llínoiadi ie daina uai jeire órede,” daidiomoi. <sup>17</sup> ¡Abina onóñede uínidino izóidiomoi! ¿Ññe mei jamánomoina? ¿Meita afe jamai oro? Ieñedeza. Mei afe oro Juzíñamui ico jóniamona ñuera raana jáideza. <sup>18</sup> Nane jáífue daiífirediomi: “Daa come iere uafue daiúllena, altar daina Juzíñamui íena rille fecárabani mámece llínoiadi afefue ráañede. Mei íadi afémie afénomo fecaca raa mámece llínoiadi ie daina uai jeire órede,” daidiomoi. <sup>19</sup> ¡Abina onóñede uínidino izóidiomoi! ¿Ññe mei jamánomoina? ¿Meita afe fecaca rille? Ieñede. Afe Juzíñamui fecárabani afénomo fecaca raana ñue finode. <sup>20</sup> Mei jñi, Juzíñamui íena rille fecárabani mámece llínotimie daa afe ibani llínoñede, mei jiáifodo nana afébanimo fecaca raana llínote. <sup>21</sup> Daje izói Juzíñamui gairíraco mámece llínotimie daa afe gairíraco llínoñede, mei jiáifodo afeco ite Juzíñamui mámece llínote. <sup>22</sup> Nane daje izói iere uafue daiúllena mona mámece llínotimie, Juzíñamui illáimana ráirano mámece llínote. Dai llínua llezica Juzíñamui mámece llínote, mei afe Juzíñamui afénomo ráideza.

<sup>23</sup> Ocuica uai llófuetino naa fariséuairi, comécina nai íairena mei abina ñue cíoidiomoi, jñi omoi dúerena! Nana omoi ríganiamona jamánomo jéenide rábiaina Juzíñamui íena oni jónefirediomi. Menta daina jéenide rábiai, naa anis daina dúebiai diga, íemo jiái comino daina rábiai facádota oni eneno jónetiomoi. Mei íadi ocuica uáimona jamánomo jitáiredifuiaina náfueñediomi. Afe jitáirediui be ññe: come comeci jáicina jóoinana, íemo jiáimaci dúecaifirena, íemo Juzíñamui ñnofirena. Nai afe jiáifuiiai omoi zóofeñena llezica, afe bífuiiai raire fueñe jeire órediomi. <sup>24</sup> Táino omoi llúamona uina cíoiñedino io ifódino izóidiomoi. Ráañede uáillaimo iere izire nícidofirediomi, mei íadi jamánomoide ñuera uaimo náfueñediomi.

<sup>25</sup> Ocuica uai llófuetino naa fariséuairi comécina nai íairena mei abina ñue cíoidiomoi, jñi omoi dúerena! Mei jiróraco naa plato diga jinófene ñue jocódiomi, mei íadi afe ero dinena íairede. Daje izói comini cíoicana abi ñue finódiomi, mei íadi omoi comeci dine merírilla, naa jiáie comini raa báruamona ógana oruide. <sup>26</sup> Uina cíoiñede fariseo ímie: Mai jiróraco naa plato diga ero jócuia izói omoi illafue ñue méidori. Iemona omoi comeci ñúefuiaina oruíbicaite. Afemona afe jiróraco jinófene íainina izói, afe izói omoi jinófene íainiteza.

<sup>27</sup> Ocuica uai llófuetino naa fariséuairi, comécina nai íairena mei abina ñue cíoidiomoi, jñi omoi dúerena! Uzeredena biga ñue cíoide tíidino ráillena nigaco izóidiomoi. Jinófene ebire cíoide mei íadi ero dine tíidino ícuruaina oruide, nana jiáifoide íairedinuiiai diga. <sup>28</sup> Omoi comeci dine afe izóidiomoi. Comini eróicana jinófenena ñue cíoidinodiomoi. Mei íadi comeci dine jiáimacina fiéni jífuefirenana oruide, íemo jiáie fiénide uáillaina oruide.

<sup>29</sup> Ocuica uai llófuetino naa fariséuairi, comécina nai íairena mei abina ñue cíoidiomoi, jñi omoi dúerena! Mei jaiiai Juzíñamui uai jino llóraini raiafo ebire finófirediomi. Daje izói jaiiai ñue itino emódomo jónega nofíbicina ebire finódiomi.

<sup>30</sup> Daií finuano daiífirediomi: “Cai jáiaigima illáruillaido itícainia, afe Juzíñamui uai jino

llórainina fatátañedicai,” daiífirediomoí. <sup>31</sup> Daií dainado afe Juzíñamui uai jino llóraini fatino erófene igímadicai daidíomoí, —daide. Jira Jesús afémaci diga icírrillano bie izóí daina:

<sup>32</sup> —¡Omoí jáiaigima taineca fiénidifue ñue ícoimo omoí fuitari! —daide.

<sup>33</sup> Jesús nai afémacimo úrite:

—¡Jaióniai izóidiomoí! ¡Omoí nairai titade jaizai izoide! ¿Mei ñue izóí duere finóbille iráimona jíloitiomoí? <sup>34</sup> Afe jira Juzíñamui uai llóraini, íemo iere baitádino naa llófuefiredinori ómoimo óreiticue. Mei íadi afémacimona dámerie titaitiomoí. Daje izóí jiáimacina córaitiomoí. Iemo jiáimacina Juzíñamui uai lloraco eromo rázido fáitiomoí. Iemo jiáimacina naga jófuiado rácaitiomoí. <sup>35</sup> Daií omoí íllamona nana jaiiai ñuemaci titáfírena ícoiniadi ómoimo daií íficaite. Uáfueza, jaiiai Abel fáinamona benomo Berequíás jitó Zacarías omoí faja llezica, nana afémaci ícoinia duere zéfuitiomoí. Juzíñamuimo gairíracó íemo Juzíñamuimo rille fecárabani dáafenedo afe Zacaríana fatíomoí. <sup>36</sup> Uáfuenta ómoína dáititue, nana bie fagano ícoinia birui itino duere zéfuitiaíoi.

*Jerusalén jófueri Jesús eede  
(Lc 13.34-35)*

<sup>37</sup> Jerusalén comínimo dúecaidicue. Juzíñamui uai llórainina fáfirediaíoi. Daje izóí Juzíñamui orécanona nófiene níjidiaíoi. Diga icaiño átava ie úruiai íaicona bícuia izóí íaíoi na ríidoiacadicue. Mei íadi íaíoi cue ríiduana gáñediaíoi. <sup>38</sup> Cacaí, Juzíñamui ómoína zóofeiteza. <sup>39</sup> Mei ómoína daidicue, meine abido cuena cíofneitiomoí. “Juzíñamui mámeçido bitímie ñue finóbilleza,” omoí daiille dino cuena cíofneitiomoí, —dino Jesús úrite.

## 24

*Juzíñamuimo gairíracó júdaizille Jesús llote  
(Mr 13.1-2; Lc 21.5-6)*

<sup>1</sup> Daií daina mei Jesús Juzíñamuimo gairíracomona jino jaide. Jino jailla llezica ie llófuegamaci: “Bie ebire finoca gairíracomo éroi,” Jesuna daidíaíoi. <sup>2</sup> Mei íadi Jesús íaíoi uai ote:

—¿Bie nana ciódiomoí? Uáfuenta ómoimo llóititue. Bie niroca nófie daa fiébiñeno nana niné jújicaite. Afeno jofue nana niné táinocaite, —daide.

*Enie fúiacana cai onuille rafue  
(Mr 13.3-23; Lc 21.7-24; 17.22-24)*

<sup>3</sup> Iemona Olivo daina ídumo jáidiaíoi. Afénoimo Jesús ráinana mei ie llófuegamaci báinino íemo jícanotiaíoi:

—O daina jofue niné táinocaillifue, ¿ñiruído daií zúite? Afena cai llone. O meine bíllena cai onótaita raa, ¿nie izóí eroide? Daje izóí énie fúillena ¿nie izóí onóiticaí? —daidíaíoi.

<sup>4</sup> Jira Jesús íaíoi na daide:

—Comini omoí jífueiza abí rairuiri. <sup>5</sup> Mei diga comini cue mámeçido billano “Crístoditue” dáititiaíoi. Afémaci aillo comínina jífueitiaíoi. <sup>6</sup> Aillo jobáirillana fidiitimoí. Dáarie áinori cácaitiomoí, íemo jiáiena jica cácaitiomoí. Mei íadi áferi jacínaiñeno omoí iri, mei daií íficairedeza. Mei íadi énie fuillíruíñede. <sup>7</sup> Mei jii daa nairai jiáie nairai diga fúirite. Iemo daa énie jiáie énie comini diga jobáiritiaíoi. Afe llezica aillo náirai íaíoi júbietaitiaíoi, íemo aillo dúicuai íite, íemo ñuizaingo diga ígobiana ñúite. <sup>8</sup> Comini duere zefuíllemona nana bífuiái como tainéinafue.

<sup>9</sup> Afe llezica ómoína duere finóllena fécaitiaíoi. Duere finoda ómoína titaitiaíoi. Cue ícoinia nana comini ómoína éoitiaíoi. <sup>10</sup> Aféruillado aillo comini Juzíñamuimo ínuana féitaitiaíoi. Dani conímana éoitiaíoi. Daje izóí conímana fállena fécaitiaíoi. <sup>11</sup> Afe llezica taino llotino iere íite. Afémaci: “Cai bie Juzíñamui dibénedo úriticaí,” dáititiaíoi. Afémaci aillo

comínina jífuecana uite. <sup>12</sup> Aféruimo diga fiénidifuiái comuállamona, aillo comíni conímana izíruillana féitaitiaíoi. <sup>13</sup> Mei íadi fuitállinomo ñue nífuenino íitimie jílloite. <sup>14</sup> Iemo afe bie Juzíñamui illáimana illano ñuera rafue nágagobiaído llóitiaíoi, nana náiraíai áfena onóillena. Afe mei énie fuillíruimo dúciite.

<sup>15</sup> Jaiái Juzíñamui uai jino llóraima Daniel, írairuimo biite íaire fínuaíbitimiedo úrite. Afe bíitimie diga ráaniaina táinocaitaite. Afe fiéni fínuaíbitimie Juzíñamui gairíraco eromo ite rairuírede ñúenomo jáillana o cíoadi, jica botárediomoi. Bíuai facádotimie afe uaina ñue onoiri. Onóillano abí rairuiri. <sup>16</sup> Afemona Judea éniemo itino oni caifóneduaimo botárede. <sup>17</sup> Daje izói daa come ie jofo caifófebanimo íadi, ie jofo eromo ite raana jofo jaillano bairóñeno afénomona bótaiteza. <sup>18</sup> Daje izói jacáfaimo íitimie abido ie jofomo ite inícuiruaina uáibiñeite. <sup>19</sup> Aféruillaído namócingotiana, ¡nií dúerena! Daje izói monoi jirode úrue llíidingotiana, ¡nií dúerena! <sup>20</sup> Nocíruillaído jino o bótañeillena, Juzíñamuimo jicari. Daje izói ocózinaiaruimo o bótañeillena o jicari. <sup>21</sup> Mei aféruimo iere aillo duere zefuállifuiái íiteza. Enie comuállanomona bené afe izóidena íñede. Iemo jíái afe méifomo afe izói íñeite. <sup>22</sup> Mei jii, aféruillai Juzíñamui due mozíñoñedenia buna jílloñena. Mei íadi ie nizécanona izíruillano, aféruillaina afémie nano íanori mozíñoite.

<sup>23</sup> Iemona dáamie ómoína: “Be Cristo,” daííadi, daje izói: “Cristo batí ite,” daííadi afémieimo íñoñeno omoi iri. <sup>24</sup> Mei Crístona abí mamede jífueridino bíteza. Daje izói afémaci: “Cai bie Juzíñamui dibénedo úriticai,” daíítiaíoi. Afémaci uaido dáinamona áillue comuídena fínoítiaíoi, naa fáigacaitade ráaniairi. Afedo comínina jífueiacadiaíoi. Dama Juzíñamui nizécanona jífuefillena facátaitiaíoi, mei íadi jífueañeítiaíoi. <sup>25</sup> Ja nana bífuiái uícodo ómoímo llotícueza. <sup>26</sup> Ie jira: “Ero bai batí táizicimo Cristo ite,” afémaci daííadi afénomono jáiñeno omoi iri. Daje izói: “Ero, bico eromo Cristo ite,” daííadi afémieimo íñoñeno omoi iri. <sup>27</sup> Mei ameo fuiri llairilla llezica jica afáífene ícoímo cíocailla izói, afe izói cue billirui jica cíocaizaíbite; Nanoide íima Jitódicueza. <sup>28</sup> Iemo inóniaí gairízaífirenamona rille rifáillanona ñue omoi onona izói, afe izói abido cue cíocaillemona raíre ómoína duere finóllena uáfueña ónoítiomoi.

*Nanoide íima Jitó Cristo billirui nie izoite*

*(Mr 13.24-37; Lc 21.25-33; 17.26-30, 34-36)*

<sup>29</sup> Afe duere zefuállirui záailla méifomo, jítoma dúite. Daje izói fiui égaiñoñeite, íemo jíái ucúduai monámona ana cócítiaíoi. Afe llezica nana monamo ítinuiaí riire mozíoide ráaniaí niráírcaite. <sup>30</sup> Afe mei Nanoide íima Jitó Cristo bille jana monamo cíocaite. Afena cíóillano nana énie náiraí éenaitiaíoi. Nanoide íima Jitó Cristo ana bíllana cíóitiaíoi. Afémie mona ero uílliedo bite, naa íemo ite ríino naa ebíredino diga. <sup>31</sup> Afe mei ie abí imaci óreite, afémaci riire bainada fúullemona nana Juzíñamui eneno nizécano nágafeniamona dáanomono jíirillena. Iemona jica énie fuédaíaimona, íemo énie enéfeniamona bíítiaíoi.

<sup>32</sup> Higuera daína aménamo mamécafuena omoi onoiri. Ie onócairo como fueñe zícua llezica, ja fimona ánozide, daídíomoi. Daje izói afe amena rábiaí jino firuilla llezica, ja fimona ánozide daííiredíomoi. <sup>33</sup> Afe izói jítoma dúilla, íemo afémonado nana jíáie zuide raa omoi cíoiadi, íraírui ánozillana ónoítiomoi. “Ja dúciacade,” daííredíomoi. <sup>34</sup> Uáfueña ómoímo llotícue, bigíma nai tííñeille llezica nana bie raa jino zúite. <sup>35</sup> Mona énie diga fuite, mei íadi cue uailai jaca fúíñeite. Cue lloga raa nana zúite.

<sup>36</sup> Mei íadi cue billirui óñoñega. Daje izói cue bille hora buna onóñena. Juzíñamui abí imaci onóñediaíoi. Daje izói Juzíñamui Jitó áfena onóñede. Dama Moo Juzíñamui ónoíga.

<sup>37</sup> Noé illágimamo comíni fiéni illa izói, afe izói Nanoide íima Jitó billíruimo comíni daííítiaíoi. <sup>38</sup> Aféruillaído aillo noci nai bíññena uícodo, comíni Noé llogáuaimo náfueñeno daa güilla llotíaíoi. Güillano jiróírediaíoi. Afe llezica íaíoi fiéni illafue meídoñeno, áireoidiaíoi,



íemo íaioi jízaniai iníreitaoidiaioi. Jaca daíí itíaiói abina Noé áillue nocáe eromo jaide. <sup>39</sup> Iaiói duere zefuíllemo due jiza comécíñediaioimo áillue noci íaioimo bíide; áferi coróbaizidiaioi. Nanoide íima Jitó billírui afe izóí íite. <sup>40</sup> Aféruimo mena íima jacáfaimo illa llezica, afe íaillinoimona dáamie Juzíñamuimo ínotímie caífo monamo uille, ie mei jíáimie fiébicaite. <sup>41</sup> Daje izóí mena ringo trigo lláia llezica, daango caífo uiga, jíáingo fiébicaite.

<sup>42</sup> Caade izóí abí omoi onoiri, mei cai Ocuíraíma billírui ónoñegaza. <sup>43</sup> Mei íadi bífuenta onódiomoiiza; jofo naama merírizaíbitímie bíllana onóadi, afémie ie jofo rairuíllano iníñeno cáate. Daíí afémie merírizaíbitímie ie jofona tuiñotañeite ie raa meríllena. <sup>44</sup> Ie jira jica ia abí ñue omoi finori. Mei due jiza comeci fácañeítimoiimo, Nanoide íima Jitó bíteza.

*Ínofírede ocuífíregamie naa ínofínidímie díga  
(Lc 12.41-48)*

<sup>45</sup> Ínofírede ocuífíregamie omoi comécíiri. Afémie ñúefue baitádimie. Ie ocuídímie nana jofo ero comínina uíñotaite. Güille hóramo dúcia llezica afémie afémacina écaite. <sup>46</sup> Naga ie naama ocuícana ñue finófíredímie afémie billíruiimo caímare íte, mei ie ocuica ñue finuana cíoi zaíbíteza. <sup>47</sup> Uáfúena ómoína dáitícue. Afemona jofo naama nana ie jofo eromo íte ráaniaína afémiena uíñotaite. <sup>48</sup> Mei íadi ocuífíregamie fiénidímiena jáiadi, íemo afe llezica: “Cue ocuídímie are bíñeite,” comécido dáíiadi, afe ocuífíregamie jaca ínofínide. <sup>49</sup> Daíí daina mei afémie jíáie ócuífíregano duere fínoite. Afe llezica afémie jífáidino díga güizájite. <sup>50</sup> Iemo ie ocuídímie billíruiimo afémie comécíñeítemo, ie naama dúciite. Daje izóí ocuífíregamie ónoñega hóramo dúciite. <sup>51</sup> Dúciillano afémiena jamánomo duere fínoite. Afe mei comeci diné nai íáirena mei abina ñue cíoidino iere duere zefuilla izóí, afe izóí afémiena duere zefuítáite. Afemona afémie iere éite. Eiano izírenari murímurite, —dínori Jesús úrite.

## 25

*Diez dígade jítaíngomo mamécafue*

<sup>1</sup> Jesús nane jíáífue llote:

—Monamo íte Juzíñamui illáímana illírui diez dígade jítaíngo izoide. Aféngotíai iníreille ráfúemo jáidiaioi. Jailla llezica íaioi mechéraíai uitíaiói. Ringo otímie íaioi uáidollena aféno mo jáidiaioi. <sup>2</sup> Afénguaimona cinco dígango finóbiñeno ebena jaide. Iemo jíáie cinco dígango ñue finóbillano jáidiaioi. <sup>3</sup> Afe finóbiñeno ebena jáídingotíai íaioi mechéraíai fuilla mei méidolle íjina uíñediaioi. <sup>4</sup> Mei jíáífodo afe ñue finóbídingotíai íaioi méidolle íjina botéllado uitíaiói jíái íaioi mechéraíairi. <sup>5</sup> Mei afe ringo otímie are bíñenamona, nana jítaíngotíai ja iníacadiaioi. Iemona ua iníaidiaioi. <sup>6</sup> Afe mei dáaferui llezica riire uáidua uai cácaaide: “Ringo otímie ja bíteza. Raíre afémie omoi uáiduaíri,” daíde. <sup>7</sup> Afemona nana afe jítaíngotíai náidacaillano íaioi mechéraíai unediaioi. <sup>8</sup> Afe llezica afe cinco díga finóbiñeno ebena bitínguai, jíáie cinco díga ñue finóbídingotíaina daíde: “Cai mechéraíai ja bóoñedeza. Omoímo íte eneno atica íjimona cai íne,” daídíaioi. <sup>9</sup> Mei íadi afe ñue finóbídingotíai finóbiñedingotíaina daíde: “Omoímo fecánidícai. Mei ómoímo fecádicainia caímo fiébiñede. Afe izóí ómoímo fiébiñede. Batí fecáriracomo dani jénuaídiomoinia ñuera.” Jira aféngotíai jáidiaioi. <sup>10</sup> Mei íadi finóbiñedingotíai oni aceite íbajilla llezica, ringo otímie dúcide. Afe ñue finóbídingotíai afémie díga áirena ráfúemo jofo jáidiaioi. Afe mei afémie naze íbaide. <sup>11</sup> Íbailla mei aceite íbajídingotíai dúcidiaioi. Dúciillano daídíaioi: “Ocuíraíma, naze caímo tuiño,” daídíaioi. <sup>12</sup> Mei íadi afémie jofona uai ote: “Uáfúena ómoína onóñedicue,” daíde.

<sup>13</sup> Iemo Jesús nai úrillano daide: Nanoide Hima Jító Cristo billirui ónonideza, iníñeno abí omoí rairuiri. Ie bille mona ónonideza. Daje izóí ie dúcille hora buna ónoñega, —daide.

*Talenta daina ráifide úcubemo mamécafue*

<sup>14</sup> Jesús nane jiáifue llote:

—Monamo ite Juzíñamui illáimana illarui bie izoide. Daa ocuífiredimie oni jiáigobemo jáiacana llezica, ie ócuífirregano uáidota íemo ite úcube afémacina úiñotade.

<sup>15</sup> Ocuídímie afémacimona daa cómemo cinco mil úcubetuni fecade. Iemo jiáimíemo mena mil dígatuni fecade. Iemo nane jiáimíemo daa milna fecade. Afémacimona illa dígamie ie ifoci onona dieze fecade. Daií fécajano oni jiáie éniemo jaide. <sup>16</sup> Cinco mil dígatuni igámie, afe úcubena afémie níciduamona, afe baímo cinco mil áfemo bai nabaide. <sup>17</sup> Daje izóí mena mil dígatuni igámie afe baímo jiáie mena mil áfemo bai nabaide. <sup>18</sup> Mei íadi daa milna igámie ie ocuídímie úcube oni énie ifomo retáidote.

<sup>19</sup> Afe mei, are íllamona afe ocuídímie ocuífirregamíai diné meine bite. Billano íaiói úiñoga úcube onóillena afémacimo jicánote. <sup>20</sup> Cinco milna igámie fueñe billa. Billano afe baímo ie nabaica jiáie cinco mil ie ocuídímíemo izáibite. Izájillano daide: “Cue Ocuídímie, o cuemo iga cinco milna baímo jiáie cinco milna nabáidicueza. Be o diez mil dígatuni,” daide. <sup>21</sup> Jira ie ocuídímie íena daide: “Cue ocuícana iere íñofiredio. Cue ñuera ocuícamiedio. Due omo cue fecácana ñue íñotio. Afemona afe baímo jiáiena ona úiñotaiticue. Cue illáimana illánomo mai caimare coco jai,” daide. <sup>22</sup> Afe mei nane mena milna iga ocuífirregamie dúcide. Afémie daide: “Cue Ocuídímie, mena milna cue itio. Afe bai nane jiáie mena milna nabáidicue. Be o cuatro mil dígatuni,” daide. <sup>23</sup> Jira ie ocuídímie íena daide: “Cue ocuícana iere íñofiredio. Cue ñuera ocuícamiedio. Due omo cue fecácana ñue íñotio. Afemona afe baímo jiáiena ona úiñotaiticue. Cue illáimana illánomo mai caimare coco jai,” daide. <sup>24</sup> Mei íadi afe mei, daa mil dígatuni iga ocuífirregamie dúcillano ie ocuídímiena daide: “Cue Ocuídímie, o iere ríimienana onódicueza. O ríñeganomona jaca ófiredio. Daje izóí trigo tuiránomo táijiñeno afénomona trigo ófiredio. <sup>25</sup> Ie jira ona jacíruillano o cuemo iga úcube éniemo cue retáidoga. Mei íadi o úcube meine cue atícaza. Be ñie,” daide. <sup>26</sup> Iemona ocuídímie íena daide: “Fiénide ocuífirregamiedio. Daje izóí ráiraierede ocuífirregamiedio. Cue ríirenana onódio ia, ¿ñibái mei bie izóí itio? Cue ríñeganomona cue ófírenana onódio. Daje izóí trigo tuiránomo táijiñeno, afénomona cue ófírenana onódio. <sup>27</sup> Afemona cue úcube jóneranomo fecáredio. Iemo meine cue bíllemo afe úcubena naa jiáie baímo nabáicatuni diga llíñoredicue,” daide. <sup>28</sup> Iemona ocuídímie afénomo itínona daide: “Bímíemo ite mil dígatuni otá, afe diez mil dígatuni ofítatímíemo ine. <sup>29</sup> Igámie nane baímo írega. Afemona afémíemo baímo aillo íite. Mei íadi íñegamíemo due íemo ite meine baírórega. <sup>30</sup> Iemo bie ráifiñede ocuífirregamie jino jítifomo dota. Afénomo éeheiteza. Afe llezica izírenari murímuriteza,” daide. Daií daide Jesús.

*Nana náiraiamo izire jicánollirui*

<sup>31</sup> Jesús nai úrioide: Mei Nanoide Hima Jító Crístodícueza, illáimana ana cue bille llezica, nana cue abi imáicai diga bíiticue. Billano ebire finoca illaíma ráíiranomo ráíizaíbiticue. <sup>32</sup> Nana náirai comíni cue uícomo gairítalliaíoi. Afe íaiói bille llezica, ovejai úiñoraíma chívuaímona ovéjaíaina oni eneno nízia izóí, afe izóí Nahí Illáimana cue íllemona nana náiraiaina oni enénorie jóoneiticue. <sup>33</sup> Cue nabézimo ovejai izóidíno jóoneiticue. Iemo chívuaí izóidíno cue jarífezimo jóoneiticue. <sup>34</sup> Afe mei cue nabézimo itínona dáititicue: “Cue Moo ñue finócamaci, mai omoí bi. Juzíñamui énie comuítaja llezica ómoiena mameca illáimana illínomo jofo jai. <sup>35</sup> Mei cue jufíruilla llezica, cuena ecáidío. Daje izóí cue

jiróacana llezica cuena jirótatio. Iemo jiái jífocinino cue mácaja llezica cuena jofu inítatiomoi. <sup>36</sup> Iemo cue inícuironina llezica cue itíomoi. Daje izói cue dúicotaila llezica cuena uáidotiomoi. Daje izói llavéracomo cue illa llezica, cuena méiñuaibitíomoi,” daide. <sup>37</sup> Iemona cue nabézimo ite nífuenidino cuena dáitíai: “Cai Ocuíraima, ¿mei níruí o jufíruillana cióillano ona ecádicaí? Daje izói ¿mei níruído o jiróacana llezica ona jirótaticai?” <sup>38</sup> Iemo jiái, ¿mei níruído o jífocinino o mácaja llezica ona inítaticai? Iemo jiái ¿níruído o inícuironina llezica o iticai? <sup>39</sup> Iemo jiái ¿níruído o dúicotaila llezica o méiñuaidicaí? Daje izói llavéracomo o illa llezica ¿níruído o méiñuaidicaí?” daidíai. <sup>40</sup> Jira Illaíma cue íllamona uai óitícue: “Uáfúena ona dáitícue, nana afe bie comécina mánaide cue ámatíaimo omoi finócafuíai, aféfuíai ja cuemo finódiomoi,” dáitícue.

<sup>41</sup> Afe mei cue Illáimana cue ráirano ie jarífezimo itínona dáitícue: “Cúemona oni omoi jai. Omoi fiéni faidócanodiomoi. Comini zíñona duere finolle iraimo omoi jai. Afe irai Taífe, nana ie abi imaci diga íena finoca. <sup>42</sup> Mei cue jufíruilla llezica cuena ecáñediomoi. Cue jiróacana llezica cuena jirótañediomoi. <sup>43</sup> Afe izói jífocinino cue jáicana llezica cuena jofu inítañediomoi. Cue inícuíro iñena llezica cuena iñediomoi. Duico cue ua llezica, daje izói llavéracomo cue illa llezica cuena uáiduaibifinidiomoi,” daide. <sup>44</sup> Jira afémaci cuena dáitíai: “Cai Ocuíraima, mei níruí o jufíruillana ciódicaí, daje izói o jiróacanana, íemo jífocinino o macácana, íemo o inícuíro iñénana, íemo o irárenana, íemo llavéracomo o íllana, ¿mei níruído daíí o íllana ciódicaí ia, ona canóñedicaí?” dáitíai. <sup>45</sup> Iemona afe llezica íaíoina dáitícue: “Uáfúena ómoína dáitícue, bie comécina mánaide cuemo jaináidinomona dáamíemo omoi fínoñegafuíaína, aféfuíaína ja cuemo finóñediomoi,” dáitícue. <sup>46</sup> Afe mei afémaci zíñona duere finolle iraimo jáitíai. Iemo Juzíñamui jóonega comécina nífuenidino, caimare zíñona cáallinomo jáitíai, —dínori Jesús úrite.

## 26

### *Jesús llaitállena maméritíai*

(Mr 14.1-2; Lc 22.1-2; Jn 11.45-53)

<sup>1</sup> Jesús nana bífuíai llua méifodo, ie llófuegamacina daide:

<sup>2</sup> —Onódiomoi za benómona ménarui íllamona pascua rafue íiteza. Aféruído Nanoide íima Jitó Crístodicueza cruzmo coráillena cuena fécaítíai, —daide.

<sup>3</sup> Afe llezica lletáriraini illaini, daje izói ocuica uai llófueraini, naa judíuai eicomíniri dáanomo gairídíai. Lletáriraini caifóidíllaima Caifás ñúeco ibírímo gairídíai. <sup>4</sup> Afénomo Jesús jífuíano llaitállena maméritíai. Afe llezica afémíe titállena maméritíai. <sup>5</sup> Mei íadi afémaci daidíai:

—Nana comini áferi fáillifaillíñañeillena, rafue ana íena lláitañeíticai, —daidíai.

### *Ríngo zióredijina Jesús ífo jillaide*

(Mr 14.3-9; Jn 12.1-8)

<sup>6</sup> Jesús Betania jófúemo ite. Afémíe, chíinaitimíena maméidímíe Simón jofomo ite. <sup>7</sup> Afe llezica, afénomo daa ríngo alabastro daína nofíci finoina icítirudo zióredíji uite. Afeji íere ráífide. Jesús güirábanimo ráína llezica, afengo afe ziórede cáiredíji Jesús ífomo totade.

<sup>8</sup> Ie llófuegamaci áfena cióillano ríicaidíai. Dani conímána daidíai:

—¿Níbái mei áfeji táinomo fáífitaga? <sup>9</sup> Afeji aillo úcube óllena fecárede. Afedo oga úcube, dúeredinomo írede, —daidíai.

<sup>10</sup> Jesús daíí íaíoi úrillana cacáillano íaíoina daide:

—¿Níbái mei bie ríngo jifánodoídiomoi? Bie ríngo cuemo finoca raa íere ñuera. <sup>11</sup> Omoi cígímo dúeredino jaca ífírede, mei íadi omoi cígímo are íñeítícue. <sup>12</sup> Bie ríngo cue

abimo totaca ziórede cáiredijina, cue raillínomo dúide. Afedo afengo ñue cuena finode. <sup>13</sup> Uáfueña ómoína dáitícue, náganomo bie éniemo bie jílloille uai jino llóyadi, bie ringo cuemo finócana jino llóitiaioiza, afémaci aféngomo uíbicaifireillena, —daide.

*Judas Jesuna ie éoidinomo fecade*

*(Mr 14.10-11; Lc 22.3-6)*

<sup>14</sup> Afe mei doce dígade llófuegamacimona Judas Iscariote lletáriraini illáimamo úrizaide. <sup>15</sup> Afémacina daide:

—Jesús ómoimo cue fecálleza, ¿nieze cuemo íbaitiomoi? —daide.

Jira “cuatro fiui táijina iba dieze, omo íbaiticai” dainano, treinta diga ráifide úcubetunillai aféniemo fecádiaioi. <sup>16</sup> Iemo áfemona afe Judas Jesús íaioimo ñue fecállino jenode.

*Jesús páscuamo íraicaiño güillafue*

*(Mr 14.12-25; Lc 22.7-23; Jn 13.21-30; 1 Co 11.23-26)*

<sup>17</sup> Afe rafue nanóidiruimo fáitañega pan güífirediaioi. Afe llezica Jesús llófuegamaci billano jicánotiaioi:

—¿Pascua rafue llezica güillena, uícodo ninomo cai finuaille? —daidiaioi.

<sup>18</sup> Afémie íaioina daide:

—Batí jófueño jaillano, cue dainámie jofomo jai. Afémiena daiíri: “Cai Llófueraima ona daide: Cúeiena mamécaruimo ja dúcizaideza. Pascua rafue güífrenana o jofomo cue llófuegamaciri güíticue,” —daide.

<sup>19</sup> Iemona ie llófuegamaci ie ocuilla izói pascua ráfueño güillena finuaidiaioi.

<sup>20</sup> Ja nauilla llezica, Jesús ie doce dígade llófuegamaciri afénomo güizájidiaioi. <sup>21</sup> Afénomo íaioi güilla llezica Jesús daide:

—Uáfueña dáitícueza, ómoimona dáamie cuena fécaite, —daide.

<sup>22</sup> Iemona afémaci iere zúucaidiaioi. Zúucaillano illa dígamierie Jesumo jicánotiaioi:

—Cai Ocuíraima, ¿meita cue? —daidiaioi.

<sup>23</sup> Jesús íaioi uai ote:

—Birui cue diga daje plátomona güítímie, nii cue fécaitimie. <sup>24</sup> Nanoide Ima Jitó Crístodicue; jaiai Juzíñamui Cuegáuaimo lloga iodo jáitícue. Mei íadi cue fecádimie ¡nii dúerena! Afémie nanómona jaca jéicíñegania figura, —daide.

<sup>25</sup> Iemona afe fécaitimie Judas Jesuna daide:

—Llófueraima ¿meita cue? —daide.

Jira Jesús uai ote:

—Jii, o. O cue fecalle.

<sup>26</sup> Ie güilla llezica, Jesús pan llínnota, Juzíñamuina “Iere figura” daide. Daina mei ditada, ie llófuegamacimo fecade. Fécajano daide:

—Bie güi. Bie cue abiza, —daide.

<sup>27</sup> Afe mei jiróraco llínnota, Juzíñamuina “Iere figura” daide. Dainano ie llófuegamacimo fecade. Feca mei íaioina daide:

—Nana bicúrimona omoi jirori. <sup>28</sup> Mei bie cue díeza. Cue die, dájemo Juzíñamui llínoga comue uai uáfueña daiítate. Aillo comini íaifue muiñóllena cue die totalle. <sup>29</sup> Mei íadi dáanomo bie uva íjina meine jiroñeíticue. Cue Moo illáimana illirui nai dúciñeille dino aféjina jiroñeíticue. Afe bille llezica cómojina omoi diga jíroíticue, —daide.

*Pedro Jesús jáanollena Jesús uícodo llote*

*(Mr 14.26-31; Lc 22.31-34; Jn 13.36-38)*

<sup>30</sup> Juzíñamuimo íaioi rua fuilla mei, jino Olivo daina ídumo jáidiaioi. <sup>31</sup> Afénomo Jesús íaioina daide:

—Bie naio cueri méaicaillano nana omoi cuena feitiomoi. Mei jaijai Juziñamui Cuegáuaimo omoi dibénedo bie izói daide: “Ovejai úiñoraima cue fáiticue, íemona afe ovéjaii rainólliaioi,” daide. <sup>32</sup> Jesús nai úrite: Mei íadi meine abido cue cáaille mei omoi uícodo Galiléamo jáiticue, —daide.

<sup>33</sup> Jira Pedro uai ote:

—Nana comini ona fáicanocaitiaioi ia, cue ona fáicanocaiñeiticue, —daide.

<sup>34</sup> Jira Jesús afémiena daide:

—Uáfuenta ona dáiticueza. Bie naio átava nai úriñenia, daámani dígacaiño cuena jáanoitioza, —daide.

<sup>35</sup> Pedro íena daide:

—O díga cue tillena iere jitáirede ia, ona jáanoñeiticue, —daide.

Afe llezica nana llófuegamaci Pedro daína izói daidíaioi.

*Getsemanímo Jesús Juziñamuimo úrite*

*(Mr 14.32-42; Lc 22.39-46)*

<sup>36</sup> Afe mei Jesús naa ie llófuegamaciri Getsemaní mámeciredinomo dúcide. Afénomo íaioina daide:

—Bai batí Juziñamuimo cue úrizaila llezica benomo omoi ráiri, —daide.

<sup>37</sup> Daí daína mei Pedro, naa Zebedeo jitó íaillinoiri Jesús bai uite. Afe llezica Jesús iere zúucaide. Zúucailla llezica comécimo duere zefuilla izói cácaide. <sup>38</sup> Iemona íaioina daide:

—Cue comeci iere zúurede. Afe zuufue cuena titade izói finode. Benó omoi fiebiri. Iníñeno cue omoi úiñori, —daide.

<sup>39</sup> Daí daína mei afe baimo íanori jaide. Afénomo éniemo fueco dine bíjicaillano Juziñamuimo úrite; daide:

—Cue Moo, o finórenia bie duere finóllinomona cue jíllotari. Mei íadi cue comeci jítaina izói finóñeno iri. O comeci jítaina izói finori, —daide.

<sup>40</sup> Afe mei daámani ie llófuegamaci illánomo meine bite. Inídiaioina cíozabite. Iemo Pédrona daide:

—¿Nano íanori omoi cue díga iníñeno cáadino izói ínidiomoi? <sup>41</sup> Fiénidifueмо omoi báinelleza, iníñeno abí omoi rairuri. Daje izói Juziñamuimo comécido omoi úriri. Uáfuenta omoi joreño jiéredeza, mei íadi omoi abí nánide, —daide.

<sup>42</sup> Afe mei nane Jesús Juziñamuimo úrizaide. Bie izói daide:

—Cue Moo, bie duere cue íaioi facátallemona cue o jíllotareñenia o comeci jítaina izói fino, —daide.

<sup>43</sup> Afe mei nane meine bite. Bítemo ie llófuegamaci inídena cíozabite, mei íaioi uimo ínie iere íllaza. <sup>44</sup> Iemona nane afémacina fiénocaillano bai Juziñamuimo úrizaide. Ja daámani dígacaiño úrizaide. Ie mei nane daje uaido úrite. <sup>45</sup> Afe mei nane ie llófuegamaci illánomo jaide. Afémacina daide:

—¿Nai ínidiomoi? ¿Nai ocózinaidiomoi? ¡Cacai! Nanoide íima Jitódicueza, ja cuena fiénidinomo fecalle hóramo dúcidez. <sup>46</sup> Omoi náidacai; jáiticaiza. Cue fécaitimie ja dúcidez, —daide.

*Jesús ja llaitada uitíaioi*

*(Mr 14.43-50; Lc 22.47-53; Jn 18.2-11)*

<sup>47</sup> Daí Jesús nai úrioina llezica Judas dúcide. Afémie doce dígade llófuegamacimona dáamie. Afémie aillo comini díga bite. Lloéfaillai naa bigíniari atidiaioi. Afémaci lletáriraini illaini orécaiaioi. Daje izói judíuai éicomini orécaiaioi. <sup>48</sup> Fécaitimie Judas Jesús íaioi onóillena llaitalle uai uícodo íaioimo llote:

—Nímie cacai ñítaiticueza; afémie llaitada omoi uiri, —daide.

<sup>49</sup> Afemona Jesumo ánozillano daide:

—Llófueraima, caimare itio, —daide.

Afe emódomo Jesuna ñitade. <sup>50</sup> Jira Jesús ie uai ote:

—Cue nabai, ¿minícamo bitio? —daide.

Daií daina mei, comini billano Jesús llaitádiaioi. Llaitada llavéllena uitíaioi. <sup>51</sup> Afe llezica Jesús nabáñiaimona dáamie ie lloefai otá, lletáriraini illaíma ocuífíregamie jefo cotade.

<sup>52</sup> Jira Jesús íena daide:

—Jadí o lloefai oni joone. Mei nana lloéfaido fuirídino, afe lloéfaido tíitiaioi.

<sup>53</sup> ¿Onóñedioza cue Móomona doce dígazie ríiduaibitinona jicáredicue? Daií jicádicuenia afémie biruimo raire cuemo orérede. ¿Afena onóñedio? <sup>54</sup> Mei íadi birui afémaci cue llaitáñediaioinia, ¿nie izói Juzíñamui Cuegáuai daina ñue ícoimo zúite? Aféuai bie íficaidífuiaí ie zuílle llote, —daide.

<sup>55</sup> Afe mei Jesús comínina daide:

—¿Ñibái mei merírfiredimie izói cue llaitaibitiomoi? Mei lloéfaillari íemo bigíniari cuemo bitíomoi. Nágaruillaído Juzíñamuimo gairíracomo ráicana ómoína llófuefiredicue. Afénomo jaca cuena llaitáñediomoi. <sup>56</sup> Mei íadi nana bie íficaide, jaiái Juzíñamui uai jino llóraini lloga ñue ícoimo fuitállena, —daide.

Afe llezica nana Jesús llófuegamaci afémie fáicanocaillano botádiaioi.

*Jesús jamánomoidillaini uícomo uitíaioi*

*(Mr 14.53-65; Lc 22.54-55, 63-71; Jn 18.12-14, 19-24)*

<sup>57</sup> Afe Jesús llaitada oni uitino Caifás uícomo uitíaioi. Afémie lletáriraini caifóidillaíma. Afénomo ocuica uai llófuefiredino naa eicomíniri dánomo ofídiaioi. <sup>58</sup> Mei íadi afe llezica Pedro Jesús uilla óodana caifóidillaíma jofo ibírino jaide. Afénomo dúcillano jofo jaide. Jaillano afeco úiñotino díga ráide. Afémie dinomo ráide Jesús llaitaja ñue ícoimo fúillana cíoillena.

<sup>59</sup> Lletáriraini naa eicomíniri, íemo nana jamánomoidillainiri Jesumo fiéni jónellifue jenódiaioi. Uafue jónellifue íaioi báñenia “Táinofue nitaiticai,” daidíaioi, “áfedo afémie cai titátalleza.” Afe llezica aillo comini billano taino uailai afémiemo jónetiaioi. <sup>60</sup> Mei íadi afémiemo íaioi jónellena baiñediaioi. Afe mei íraínomo ménamie taino llófiredino íaillinoi dúcide. <sup>61</sup> Afe íaillinoi daide:

—Baie Jesús bie izói daiífírede: “Juzíñamuimo gairíracona júdairedicue. Afe mei daaruiámani íllamona meine caífo níredicue,” —daidíallinoi.

<sup>62</sup> Jira lletáriraini caifóidillaíma náidacaillano Jesuna daide:

—¿Ñibái mei uai oñedio? Bie omo íaioi jónegafue ¿nie izoide? —daide.

<sup>63</sup> Mei íadi afe llezica Jesús jaca uaina oñede. Ie jira lletáriraini illaíma íena daide:

—Caade Juzíñamui mámedido o úritadícueza, urí. Uáfueña daiíllena riire o ocuídícue. O, Juzíñamui Jitó Crístona o illa caímo lloiri, —daide.

<sup>64</sup> Jira Jesús daide:

—Jii, o daina izói nímiedicue. Nane ómoína dáitícue, Nanoide fima Jitó Crístodícueza, ríinorede Juzíñamui nabézimo cue ráillana cíoitíomoi. Afe llezica mona uílliedo ana monámona cue bíllana cíoitíomoi, —daií daide.

<sup>65</sup> Afena cacáillano lletáriraini caifóidillaíma jamánomo ríicaide. Daií ríicaillana ácatallena ie jitáoigaroi cuatade. Afe mei daide:

—Bie íima ie daina uáillaído Juzíñamuina íaire úrite. ¿Ñibái mei nai jíáie uai nábitino jitáidicai? Omoi dani ie fiénide dáinana cacádiomoi. <sup>66</sup> ¿Mínica afémiemo dúina? —daide.

Jira afémaci daidíaioi:

—Dama ie ícoínia tíirede, —daidíaioi.

<sup>67</sup> Afe mei ie uíecona tuádiaioi. Rázido íena fatíaioi. Jíáimaci ie uíeco púcoidiaioi. <sup>68</sup> Daií ñiano íena daidíaioi:

—Mei Crístodioza, ¿nímie o faja? Jino llone, —daidíaioi.

*Pedro Jesús onode íadi jáanote*

*(Mr 14.66-72; Lc 22.56-62; Jn 18.15-18, 25-27)*

<sup>69</sup> Afe llezica Pedro jinófeco ibírimo ráiide. Afénomo ie illa llezica ocuífirregango afémiemo billano daide:

—O daje izói Galilea ímie Jesús diga macáfiredio, —daide.

<sup>70</sup> Mei íadi Pedro comini eróicana afémiena jáanote; daide:

—O dáinana onóñedicue. ¿Minica llotio? —daide.

<sup>71</sup> Afe mei Pedro jofo nazemo jáidemo jiáingo íena ciode. Cíoillano afénomo itínona daide:

—Bímie daje izói Nazaret ímie Jesús diga macáfiredo, —daide.

<sup>72</sup> Afengo daií daína llezica, Pedro nane íena jáanote. Rírede uaido daide:

—Afe ímana jaca onóñedicue, —daide.

<sup>73</sup> Afe mei íanori íllamona afénomo itino Pédromo ánozillano daidíai:

—Uáfueza, afémaci ímiedio, mei dama o úrillado onódicaiza, —daidíai.

<sup>74</sup> Afe jira Pedro uafue daiíllena Juzíñamui mámece llinota ríire daide:

—Afe báimiena jaca onóñedicue, —daide.

Daií ie daína llezica ítava úrite. <sup>75</sup> Afemona Pedro Jesús uícodo íena dáinamo úbicaide. Afe be níuui: “Atava nai úriñena llezica, daámani dígacaiño cuena jáanoitioza.” Afemo úbicaillano Pedro jino iere zuure éecana jaide.

## 27

*Pilátomo Jesús izájidiai:*

*(Mr 15.1; Lc 23.1-2; Jn 18.28-32)*

<sup>1</sup> Mona monáizailla llezica, nana lletáriraini illaini, naa judíuai eicomíniri, dáanomo gairíllano Jesús titállena nana daje izói maméritiaioi. <sup>2</sup> Afe mei Jesús maiano, afe énie úiñote illaíma Poncio Pilátomo izájidiaioi.

*Judas tíllafue*

<sup>3</sup> Judas, Jesús fecádimie, Jesuna íaioi coráiaillana cíoillano comeci ifue méidote. Iemona treinta diga úcubetuni meine lletáriraini illáinimo izájide, ocuide eicomínimo diga. <sup>4</sup> Izájillano daide:

—Iere fiénidifue finódicue; nífuenidimie titállena fecádicueza, —daide.

Jira afémaci uai otíaioi:

—¿Afefue caimo mei níbai? Dama ófue, —daidíai.

<sup>5</sup> Ie jira Judas afe úcube gairíracomo ana jutade. Afe mei afémie jaillano dama cimoí cúinajano aménamo ágüicaide. Daií afémie tíide.

<sup>6</sup> Lletáriraini illaini, afe jutaca úcube iráiano daidíai:

—Juzíñamuimo fia iga úcube jóoneracomo bie úcube jóonenidicai, mei come títaja úcubeza, —daidíai.

<sup>7</sup> Afe mei afémaci afe úcubedo énie íballena dájena comécidíai. Iaioi íbaca énie mámece Nógora Orano. Afébiri íbádiaioi jicánemaci tíadi afénomo ráillena. <sup>8</sup> Afe jira nai biruimo afébiri Díebirina daiífirrena. <sup>9</sup> Daií íaioi ínuamona jaijai uai llóraíma Jeremías lloga uai ñue ícoimo fuite. Be níuui: “Israel nairai cue íaioi fécaja úcube abido llinotiaioi. <sup>10</sup> Llinuano Nógora Orano íbádiaioi. Daií Juzíñamui cue ocuide.”

*Jesús Pilato uiécomo jóonetiaioi*

*(Mr 15.2-5; Lc 23.3-5; Jn 18.33-38)*

<sup>11</sup> Afe mei énie úiñotillaíma uícomo Jesús uitíaioi. Afénomo afémie Jesumo jicánote:

—¿O meita judíuai illaíma? —daide.

Jira Jesús daide:

—O daina izói nímiedicue, —daide.

<sup>12</sup> Iemo lletáriraini illaini naa ocuide eicomíniri Jesumo fiénide uaillai jóonia llezica, afémie jaca uai oñede. <sup>13</sup> Jira Pilato íena daide:

—¿Aquíe omo íaioi jóonegafuiai cacáñedio? —daide.

<sup>14</sup> Mei íadi Jesús jaca afe llezica uai oñede. Iemona uai ie oñénari énie úiñotillaíma fáigacaide. Ie daíille uai onóñede.

*Jesús titállena mameca*

(Mr 15.6-20; Lc 23.13-25; Jn 18.38–19.16)

<sup>15</sup> Aféruillaido afe rafue ana, llaveca fiénidinomona dáamie Pilato zuitáfirede. Afémie comini uaido zuitácamie. <sup>16</sup> Mei afénomo ite mámecina jica jalleide fiénide maigámie. Afémie mámecei Barrabás. <sup>17</sup> Illáicomini dáanomo gairilla llezica Pilato afémacimo jicánote:

—Bíailinoimona ¿níimie ómoimo jino zúitaiticue? ¿Barrabás, mei nibai Cristo daina Jesús? —daide.

<sup>18</sup> Mei Pilato, comini úradoillamona Cristo íaioi fécajana ñue onode.

<sup>19</sup> Pilato, riire jicánofiredimie ráiranomo ráina llezica, Pilato ai uai orede. Afe be níuui: “Afe jadímie nífuenidímieza afémiemo jírcaíñeno iri. Mei ja naio afémiena cue nicáirilla llezica iere duere zefuídicue,” daide.

<sup>20</sup> Mei íadi lletáriraini illaini naa ocuide eicomíniri, nana jíáie comini Pilátoma daílluai riire llotíaioi. Barrabás zuitállena Pilátomo jicátatiaioi. Daje llezica Jesús titállena jicátatiaioi. <sup>21</sup> Afe énie úiñotillaíma nane dáanomo jicánote:

—Bíailinoimona ¿níimiena cue zuitátatiomo? —daide.

Jira: —Barrabás zuita, —daidíaioi.

<sup>22</sup> Iemo Pilato íaioimo jicánote:

—Iemona bie Crístoma mámeciredimie Jesús ¿nie izói níibaiticue? —daide.

Jira nana uai otíaioi:

—¡Cruzmo corai! —daidíaioi.

<sup>23</sup> Iemona Pilato íaioina daide:

—¿Níbái mei? ¿Nie fiénidífue afémie finode? —daide.

Mei íadi comini dáanomo riire daidíaioi:

—Cruzmo corai, —daidíaioi.

<sup>24</sup> Pilato ie uaina íaioi ínoñenana ciode. Daje izói nana comini aféfuiairi jamánomo cáilliana cacade. Ie jírari “Onoi cue jocólleza jainoi atí” daide. Jócua llezica daide:

—Afe bie nífuenidímie tülle cuemo jíñede. Dani ómoífueza, —daide.

<sup>25</sup> Iemona nana comini uai otíaioi:

—Afémie tülle caimo jíite, daje izói cai úruiaimo, —daidíaioi.

<sup>26</sup> Afe jira Pilato Barrabás zuitade. Afe mei Pilato Jesús rázido fatátate. Fatata mei Jesuna afémacina coráitate.

<sup>27</sup> Afe mei énie úiñotillaíma fuiríraini áillue gairíracomo Jesús uitíaioi. Afénomo nana jíáie fuirírainiaí afémie onífenedo gairídíaioi. <sup>28</sup> Afe mei ie iniroi dúiñuano, illaíma jítáfirega jáicuiro afémiemo jítádiaioi. <sup>29</sup> Afe llezica ifo icuifoí eegi nínacuifoína afémiemo jítádiaioi. Iemo jíái illaíma llíifirega bigina íena llínotadiaioi. Daí ñiano afémie anamo dújudiaioi. Dújuillano jifánodoiano íena daidíaioi:

—Judíuai Illaíma are íitioza, —daidíaioi.

<sup>30</sup> Afe llezica afémaci ie túallaitiaioi. Afe dáanomo ie llíiga bigi báiruano, ie ifoci púcoídiaioi. <sup>31</sup> Daí ie íaioi jifánodoia mei, afémiemo íaioi jítaca jáicuiro dúiñuano, dama ie iníroina jítádiaioi. Afe mei afémie coráiaidiaioi.

*Jesús cruzmo coráidiaioi*

(Mr 15.21-32; Lc 23.26-43; Jn 19.17-27)



<sup>32</sup> Jofue jinomo íaioi coráiailla llezica, Cirene énie ímie baitíaioi. Baillano Jesús uiga cruzna rocátatiaioi. <sup>33</sup> Daií Gólgata mámeciredinomo dúcidiaioi. Gólgata daina “come ifócorai illano.” <sup>34</sup> Afénomo eriredena jaicuica vónona Jesús jirótatiaioi. Mei íadi Jesús áfena due fácano, jiróacañede.

<sup>35</sup> Jesús ja íaioi coraia méifodo, fuiríraini Jesús iniroi illa dígamie íaioi máíñuana onoíllena, onótaraji dotádiaioi. Daií jaiái uai llóraini lloga uai ñue ícoimo fuite. Afe be níuui: “Onótaraji dótajano, cue iniroi conímaiaimo fecádiaioi.” <sup>36</sup> Afe mei afémiedo éroíllena afénomo ráiediaioi. <sup>37</sup> Ie ifo acónimo cuezábici netádiaioi. Afébicimo níufue ícoinia duere finoca daina cúeina. Afébicimo cuega bie izóí daide: “Bie Jesús, Judíuai illaíma.”

<sup>38</sup> Afe llezica afénomo mena merírifiredimie coráidiaioi. Dáamie Jesús nabézimo coráidiaioi. Jáimie ie jarífezimo coráidiaioi. <sup>39</sup> Afe llezica áfeodo jaide comini Jesuna íáire úritiaioi. Uaido iere riire íena táigoidiaioi. <sup>40</sup> Daií fieni ie táigoiano íena daidíaioi:

—Juzíñamui gairíraco júdaiano daaruiámani ille mei meine níticue daífredioza; mai, o abi jíllota. Daje izóí Juzíñamui Jitona o íadi, jadíe cruzmona ana bi, —daidíaioi.

<sup>41</sup> Daje izóí lletáriraini illaini, íemo ocuica uai llófuetino, íemo fariséuai naa ocuífiredé eicomíniri íena áifeduardo conímana daidíaioi:

<sup>42</sup> —Diga jáímaciaina afémie jíllotafiredé, mei íadi dama ie abina jíllotanide. “Uafue Israel Illaíma o ia, jadíe crúzmona ana bii, áfemona omo cai íinolleza,” íena daidíaioi. <sup>43</sup> Nai ie áifeduardo íena úritiaioi:

—Mei afémie Juzíñamui ínoteza, mai mei birui Juzíñamui ie jíllota, Juzíñamui ie jíllotaiacania. Afémie caina “Juzíñamui Jitódicue” daide, —daidíaioi.

<sup>44</sup> Daje izóí ie diga coraica merírifiredé íaillinoi íena íáire úritiaillinoi.

### *Jesús tilla*

*(Mr 15.33-41; Lc 23.44-49; Jn 19.28-30)*

<sup>45</sup> Afe llezica nániena jítireficaide. Jitoma jaíciri íllamona batí ana ítemo jítireficaide.

<sup>46</sup> Ja jitoma arífemona ana ítemo Jesús riire caillide:

—Elí, Elí, ¿lama sabactani? —daide. Afe uai daífacana: “Cue Juzíñamui, cue Juzíñamui, ¿nibái mei cue zóofetio?”

<sup>47</sup> Afénomo itínomona dáarie áfena cacáillano daidíaioi:

—Bímie jaiái Juzíñamui uai llóraíma Elías jírite, —daidíaioi.

<sup>48</sup> Daií daina llezica afémacimona dáamie aizida esponja daina fíllicide raa uájide. Erírede vínomo riáitano Jesús jiróllena caifo rázido ñuitádiaioi. <sup>49</sup> Mei íadi jáímaci daidíaioi:

—Dama íteza. Jetáñeno, Elías ie jíllotaíbiadi, cai cíoilleza, —daidíaioi.

<sup>50</sup> Afe mei Jesús dáanomó riire caillide. Daií cáillia méifodo ja tíide. <sup>51</sup> Ie tilla llezica Juzíñamui gairíraco eromo fetácaroi caifona ana eróicana atóroido oni cúajicaide. Afe llezica énie docaide, íemo jíái jéerie nofíciái bócoizite. <sup>52</sup> Iemo daje llezica, comini raíáfuai túicoizite. Afe llezica aillo tíide Juzíñamui ínotinuiái meine abido cáadimacina jáidiaioi. <sup>53</sup> Afe bimaci íaioi raíáfuaímona jino bitíaioi. Iemo Jesús abido caana mei, ñuera Jerusalén jófuego jáidiaioi. Afénomo aillo comini bie como meine abido cáadimacina cíodiaioi.

<sup>54</sup> Iemona fuiríraini illaíma naa afémie diga Jesús úíñotinori, énie docailla, naa jáíe comuídfuíaína cíoillano, iere jacínaitiaioi. Jacínaillano daidíaioi:

—Uáfueza bie Juzíñamui Jitó, —daidíaioi.

<sup>55</sup> Afénomo diga ringóniaí jicana eróiediaioi. Aféngotiaí Galiléamona Jesudo jáidiaioi. Aféngotiaí Jesuna canófrediaioi. <sup>56</sup> Aféngotiaí cígimo, Magdalena énie ingo María ite. Iemo jíái María, Santiago José íaillinoi ei ite. Iemo jíái Zebedeo ai ite. Afengo mena jíitórede.

*Jesús raitíai**(Mr 15.42-47; Lc 23.50-56; Jn 19.38-42)*

<sup>57</sup> Ja nauilla llezica Arimatea énie ímie José bite. Afémie ráaredimie, íemo jiái afémie Jesudo jáicaifirede. <sup>58</sup> Afe jira Pilátomo Jesús abi jícajide. Iemona Pilato Josemo afémiena ite. <sup>59</sup> Iemo José Jesús abi ana uano ñuera áilloroina junide. <sup>60</sup> Juníllano dama ie comue raiáfomo jóonete. Afe raiáfo nofícimo finoca. Raia mei áillue nofícina naze íbáillano jaide. <sup>61</sup> Afénomo Magdalena énie ingo María naa jiáie María diga raiáfo uícori ráidíai.

*Jesús raiáfo uíñoitnona jóonetiaí*

<sup>62</sup> Afe jiáiruido, ocózinaillarumo jitaica raa finua mei, lletáiraini illaini, naa fariséuairi Pilátomo úrizaidiaí: <sup>63</sup> —Ocuídime, afe taino llóraima Jesús dáinamo úbicaidícaí. Afémie caana llezica, “Daruíamani ille mei, túllanomona meine abido cáaiticue,” daíifirede. <sup>64</sup> Ie jira afe raiáfo daruíamani fidi riire o finori, ie llófuegamaci ie abi naio mériaíbiñelleza. Mériano comínina “Ja Cristo tíide meine abido caade,” dáitíai. Ie llófuegamaci daí finóadi, íaií íirainomo lloga táinofue, fueñe lloga táinofuiai baímo fiénite, —daí daidíai.

<sup>65</sup> Jira Pilato daide:

—Batí omoi úiñote fuíríaini ite. Afémacido afe raiáfo omoi onona izói riire omoi finori, —daide.

<sup>66</sup> Iemona raiáfomo jaillano, afénona riire finódiaí. Afe mei afe raiáfo emodo íbailla nofícimo túiñoñeillena jana finódiaí. Afe mei jóoneide fuíríaini afénomo fiiano oni jáidiaí.

**28***Jesús túllanomona meine abido cáadimiena jaide**(Mr 16.1-8; Lc 24.1-12; Jn 20.1-10)*

<sup>1</sup> Ocózinaillarui jiáiruido, semana fueñedirumo mona monáiacana llezica, Magdalena énie ingo María, jiáie María diga raiáfo méiñuaidíai. <sup>2</sup> Afe llezica énie riire docáiricaide. Juzíñamui abi ímie ángel daínámie monámona ana billa énie níraídua. Afémie Jesús raiáfomo dúcillano afe íbailla nofíci oni tuiñode. Tuiñuano afébicimo ráide. <sup>3</sup> Afémie abi mona borilla izói quenire cioide. Iemo afémie iniroi jaíllici izói iere úzerede. <sup>4</sup> Afémiena cióillano, jóonete fuíríaini iere jacínaitiaí. Cuidíridiaí. Afe llezica tíidino izói jáidiaí. <sup>5</sup> Afe mei Juzíñamui abi ímie afénomo jaide ringóniaina daide:

—Jacínaiño. Onódicueza, coraica Jesús jénuaíbitiomo. <sup>6</sup> Afémie ja benó íñede. Omoína ie daína izói, ja meine abido caade. Ie íaií raiano eróizaíbi. <sup>7</sup> Afe mei ie llófuegamacimo omoi llujáiri. Bie izói lloiri: “Ja afémie tíide íadi meine abido cáadimiena jáideza. Afémie ja omoi uícomo Galiléamo jaide. Afénomo íena cíoitíomo.” Be ómoimo cue llóiacagafue, —daí daide.

<sup>8</sup> Iemona ringóniái afe raiáfomona raire abido jáidiaí. Aféngotíai iere íóbicaidiaí íadi, naí jacíruioidimaci.

<sup>9</sup> Iodo íaií jailla llezica Jesús íaiímo cíocaide. Cíocaillano íaiína uáidote. Aféngotíai íemo ánozillano íemo cáimadotiaí. Ie ídai meníñotiaí. <sup>10</sup> Jira íaiína daide:

—Omoi jacíruiño. Cue ámatíaimo llujáiri, Galiléamo raire íaií jáilleza. Dinomo cuena cíoitiaí, —daide.

*Raiáfona uíñotaga fuíríaini llogafue*

<sup>11</sup> Ringóniái jailla llezica, raiáfo jóonete fuíríainimona dáarie jófuego jáidiaí. Afénomo dúcillano lletáiraini illáinimo nana íaií ciónana llotiaí. <sup>12</sup> Aféllaini ocuide eicomínimo ñue íaií onóillena llujáidiaí. Ie jira aillo úcubena afe fuíríainimo itíai. <sup>13</sup> Illano íaiína daide:

—Bie izói omoi daiíri: “Naió cai ínía llezica ie llófuegamaci mériano ie abina uitíaiói.”

<sup>14</sup> Iemo énie úiñotillaima aféfuena fidiadi, omoi ñue íllena dani cai afémiemo úrizaiticai. Afemona afémié ómoína duere fínoñeite, —daií daidíaiói.

<sup>15</sup> Iemona afe fuiríraini úcube llínotiaíói. Llínota íaióina daina izói fínuaidiaíói. Iemona judíuai nai biruimo Jesús meine abido cáanana uáitadiaíói; uáitano bie izói daiífirediaíói.

*Jesús ie orécamacimo jóonega uai*

*(Mr 16.14-18; Lc 24.36-49; Jn 20.19-23)*

<sup>16</sup> Afemona Jesús once dígade llófuegamaci Galiléamo jáidiaíói. Uícodo Jesús íaióimo lloga ídumo jáidiaíói. <sup>17</sup> Afénoimo Jesuna íaiói cíoillano, afémiemo cáimadotiaíói. Mei íadi dáamierie nai figo íñoñede. <sup>18</sup> Jira Jesús afémacimo áinozillano daide:

—Nana monamo ite ocuilla ríino, naa éniemo ite ríino diga ja cuemo fecaca. <sup>19</sup> Ie jira nana éniemo ite comínimo omoi jairi. Afémacina cue llófuegamacina oreri. Afe mei Moo Juzíñamui mámecido, daje izói ie Jitó mámecido, naa ie Ñuera Joreño mámecido íaióina bautizari. <sup>20</sup> Nana omoi cue ocuilla uáillaina afémaci jeire omoi otátari. Afe llezica bíena omoi onoiri, cue nágarui omoi diga ífireiticueza. Jaca omoi diga íticuemo énie fuillíruimo dúciite. Daiítadeza; ja ñie.

## JUZÍÑAMUI ÑUEFUE SAN MARCOS LLOGAFUE El Santo Evangelio Según San Marcos

### *Juan Bautista táizicimo lluáibite*

(Mt 3.1-12; Lc 3.1-9, 15-17; Jn 1.19-28)

<sup>1</sup> Juzíñamui Jitó Jesucristo lloga ñúefue bie izói tainede.

<sup>2</sup> Jaiái uícodo Juzíñamui uai jino llóraíma Isaías cuete:

Mai cacai, o uícodo cue rafue llotímie orédicue, o jáille io ñue ifóllena.

<sup>3</sup> Táizicimo caillídímie uai ñue cacaide; daide:

Mai omoi Ocuíraíma jaille io ñue finori; ie macalle io jaícina tuiñori, —daide.

<sup>4</sup> Afe izói báutizaráima Juan táizicimo cíocaizaibite. Dinomo comíni jitáirede báutizaillena afémie ñue lluáibite. Iaióina daide:

—Omoi comeci ifue ñúefuena méidoredíomoi. Ie mei báutizaredíomoi. Iemona Juzíñamui omoi comeci fiénidífuiaí dóite, —daide. <sup>5</sup> Iemona nana Judea énie imaci, Jerusalen comíni diga, Juan llógamo cacáreizaidiaíoi. Cacáillano íaíoi comécimo ite fiénidífuiaí uáfodo jino llotíaíoi. Daíí íaíoi llua méifomo imani Jordámo Juan báutizagaíoi.

<sup>6</sup> Juan jitaca iniroi camello itíraíai finoína. Ie ciraigi llaitáinafe igorai finoína. Fíuai rite; jazici ie cíiji jirófírede. <sup>7</sup> Comínimo llócaillano daide:

—Fui cue méifodo bítímie, iere cue baimo riire ocuífíreitímie. Iemona ie idai ico igai zuitánidícue, mei jofófene jamáimiedícueza. <sup>8</sup> Jae jáinoido ómoína báutizadícue, ñuera iodo omoi jáiacana jino llóllena; mei íadi afe bítímie Ñuera Joreño do ómoína uícaitaite, ñuera iodo éicitaiño ñue omoi jáillena, —daíí daide Juan.

### *Jesús báutizainafue*

(Mt 3.13-17; Lc 3.21-22)

<sup>9</sup> Aféruillaido Jesús Nazarémona bite. Afe Nazaret jofue Galilea éniemo ite. Billano Juan illánomo dúcide. Afénomo Juan íena Jordámo báutizade. <sup>10</sup> Jáinoimona jino billa llezica Jesús mona tújjicaillana ciode. Daje llezica Ñuera Joreño fíiciri izói Jesumo ana bíllana Jesús ciode. <sup>11</sup> Afe llezica monámona uai cácaide; daide:

—O iere cue izíruiga Jitódio. Ori iere caimare iticue, —daide.

### *Taife Jesús facátate*

(Mt 4.1-11; Lc 4.1-13)

<sup>12</sup> Afe méifodo raire Ñuera Joreño Jesuna táizicimo orede. <sup>13</sup> Dinomo tóiñega rílleniaí cígimo Jesús cuarenta dígarui ite. Afénomo Satanás (Taife jíáifodo mámeçiredímie) Jesús facátate. Aféruillaido Juzíñamui abi imaci ángeles daínámaci Jesús cánuai bitiaíoi.

### *Jesús Galiléamo llófuiafue táiniaide*

(Mt 4.12-17; Lc 4.14-15)

<sup>14</sup> Ie mei illaíma Herodes Báutizaráima Juan llavétate. Juan llavébilla mei, Jesús Galilea éniemo jaide. Jáillano Jesús, Juzíñamui ñuera rafue lluájide. <sup>15</sup> Jesús bie izói daide:

—Ja aféruimo dúcide. Ianori íllamona Juzíñamui nana íemo jaináidímaci dáaziena caimare íllena gairítaibiteza. Iemona jíllonafue omoi ínuano, omoi comeci ífuiaí méidori afémacimo dájena omoi jaináillena, —daide.

### *Jesús cuatro dígamie facóramaci uáidote*

(Mt 4.18-22; Lc 5.1-11)

16 Jesús Galilea jorai fuédado mácajide. Jaillano Simona ciode ie ama Andrés diga. Facóramo íaillinoi. Llójiji jóraimo dotáfirediaillinoi. 17 Jesús íaillinoina daide:

—Mai cuedo ómicoi bi. Chámuniaí ómicoi jenófírena izói, afe izói comini jenórainina ómicoina jóneiticue, —daide. 18 Raíre íemona íaillinoi llójiji fíanona, afémiedo jáidiaillinoi. 19 Ie mei Jesús bai jabo jaillano Zebedeo jitó, Santiágonaciode, ie ama Juan diga. Iaiói llójiji cúaidino, nocáe ero ráicana niródiaillinoi. 20 Jesús íaillinoi jíríte. Iaillinoi moo Zebedeo nocaemo fiénocaillano ie canóramaci diga, Jesudo jáidiaillinoi.

*Capernaumo fiénide jóriaredimie Jesús jíllogata*  
(Lc 4.31-37)

21 Ja Capernaumo dúcidiaíoi. Ie mei ocózinaiillaruimo Jesús Juzíñamui uai llófueracomo jofo llófuiaide. 22 Afémie llogáfueri fáigacaidiaíoi. Ua nibai riímie izói ñue llófullofuede. Ocuícafue llófueraini afe daí llófueñediaíoi. 23 Afe llezica Juzíñamui uai llófueracomo fiénidena jóriaredimie ite. 24 Afémie ja Jesumo caillide; daide:

—Nazaret ímie, Jesús, ¿ñifue cócomo illa? ¿Cai fatátaibitio? Ona onódicue. Juzíñamui íaifuenidimiedio; afémie rafue ñue llúaíbitimiedio, —daide.

25 Iemo Jesús fiénide jóriaimo riire úrite; daide:

—¡Líicai! Bímie fáicanocaillano oni jai, —daide.

26 Iemo fiénide jóriai afémiena izire docáitate. Ie mei jamánomo caillídemo afémienona oni jaide. 27 Ie jira nana nairai jacínaitiaíoi. Jira conímamo jicánotiaíoi:

—¿Bie minica? ¿Minica bie como llófueinafue? Bie Jesumo riire ocuíllafue ite, fiénide jóriai oréllena. Afe fiénide jóriai afémiena ínofírediaíoi, —daídíaíoi.

28 Ie jira Jesús mámece nana Galilea énie fuédado raíre jica jalleide.

*Jesús Simón Pedro jifaiño jíllogate*  
(Mt 8.14-15; Lc 4.38-39)

29 Juzíñamui uai llófueracomona jino billano, Jesús, Simón ie ama Andrés íaillinoi icomo jaide, Santiago, Juan diga. 30 Dinomo Simón jifaiño abi cuaríllamona iníranomo bíide. Afengo irárenana Jesumo llotíaíoi. 31 Iemona aféngomo ánozillano, Jesús afengo onoi llínota, íena caifo naidánete. Afe llezica afengo abi cuarilla aféngomona líicaide. Daje llezica jarire íaíoi jitailla güille afengo bai íaíoiimo atide.

*Jesús aillo iráredino jíllogate*  
(Mt 8.16-17; Lc 4.40-41)

32 Aféruído, jítoma ana zójicaidemo, ja nauíoicailla llezica, nana afénomo ite iráredino, fiénidena jóriaredino diga, Jesumo atídíaíoi. 33 Nana dino jofue nairai afeco naze fue ibírímo gairízitiaíoi. 34 Jesús aillo íaíoiimo ite diga ie duico jíllogate. Afe llezica aillo fiénide jóriai Jesús jino comínimona orede, mei íadi Jesús afe jóriai úriñeillena íaíoiimona rairuide, mei afémiena onódiaíoiiza.

*Jesús Galiléamo llujide*  
(Lc 4.42-44)

35 Ja monáioicaidemo, nai jítireoidemo, Jesús cazíllano jino jófuemona oni tñ daídínomo jaide, dinomo Juzíñamuimo úrillena. 36 Afe mei Simón ie nabáñiaíri Jesús jénuaidiaíoi.

37 Baillánona íena daídíaíoi:

—Nana o jenódiaíoi, —daídíaíoi.

38 Iemo Jesús íaíoiina daide:

—Ainori itícuaímo mai cai jai, dinomo daje izói ñúefue cai llujillena; mei afe jira jino bitícueza, —daide.

<sup>39</sup> Daií Jesús nana Galiléado macade. Naga illánuiamo Juzíñamui uai llófuerriracomo llócaide. Afe llezica comínimona fiénide jóriaí jino orede.

*Chínaite izóidimie Jesús jíllotate*  
(Mt 8.1-4; Lc 5.12-16)

<sup>40</sup> Jesumo chíinaite izóidimie áinozide. Ana dújuano daide:  
—Cue o jíllotaiacaniadi cuena jíllotaredio, —daide.

<sup>41</sup> Ie jira Jesús afémiemo dúecaide. Jira ónoído jétano daide:  
—Jii, ona jíllotaiacadicue. Mai o abi jácaiteza, —daide.

<sup>42</sup> Daií dáinamona afe duico iráredimiemona cióbicañena. Jae ñúemie. <sup>43</sup> Iemo Jesús afémi orede. Daje llezica riire ocuállano daide:

<sup>44</sup> —¡Cacai! Bumo lloñeno iri. Dama lletáriraima sacerdote dainámie jaillano, o abi ácatari. Dáaruido Moisés jaiaí ocuica abi duafue ráana, mai afémiemo izájiri. Iemona comini o abi jíllotana fidiitiaíoi, —daide.

<sup>45</sup> Mei íadi afémi jaillano nana comínimo afe ie jíllonafue llujáide. Iemo aillo comini Jesumo izire gairíodiaíoi. Ie jira ja Jesús bu jófuemo uáfodo jáinide; mei íadi jino jofue iñénanomo mácajide. Mei íadi nágagobiaimona bizájidiaíoi afémiena cíoillena.

## 2

*Jesús tízitaitimie jíllotate*  
(Mt 9.1-8; Lc 5.17-26)

<sup>1</sup> Ie méifodo nano nígarui íllamona Jesús meine abido Capernaumo jaide. Afémi jofomo íllana ja fididiaíoi. <sup>2</sup> Iemo aillo nairaí ie jofomo gairídiaíoi. Jofo comínina oruállamona iere rillírede; ja naze fuemo íaíoi íllino íñede. Iaíoiimo Juzíñamui úrillafue Jesús jino llote. <sup>3</sup> Iemo cuatro dígamie tízitaitimie atídiaíoi. <sup>4</sup> Iere comini íllaza, Jesús illánomo dúcinide. Ie jira jofo emódomo caífo jaillano, Jesús illa llezícamo jofo emodo íbáicano cúcoidiaíoi. Cúcoianona aféfodo tízitaitimie ana agüínetiaíoi, naa afémi bírallu díga. <sup>5</sup> Afémaci comeci ínuana cíoillano, Jesús tízitaitimiena daide:

—Jitó, o fiénidífue jae ñue dófide, —daide.

<sup>6</sup> Dáarie ocuícáfue llófuerraini, dinomo ráidino, íaíoi comeci facáodiaíoi: <sup>7</sup> “¿Ñibái mei bímie daí úrite? Juzíñamuina fiéni úrite. Dama Juzíñamui fiénidífueña dua. Abi díne bu Juzíñamui izói fiénidífueña doñena.” <sup>8</sup> Mei íadi dama Jesús ie comécido afémaci comeci úrillafueña onode. Jira daide:

—¿Ñibái mei omoi comeci daí facádiomoi? <sup>9</sup> ¿Ñie iere júanina iráredimiena daíllena: “O fiénidífue dófite,” ñibai jíáifodo daína: “Náidacai, o bíira líinota ui, mai maca”? ¿Ñie iere júanina? <sup>10</sup> Ie jira jíáifuena ómoimo fidítaiticue. Bíniemo comini fiénidífuiaina oni muiñolle riino cuemo ite. Nanoide íima Jitódicueza, —daide. Iemo tízitaitimiena juare daináfueña daide:

<sup>11</sup> —Ona daidicue: Caífo náidacai. O bírallu líinota mai o jofomo jairi, —daide.

<sup>12</sup> Ja iráredimie raire náidacaillano ie bírallu líinote. Líinuano dinómona jino jaide. Ie jáillana nana comini cíodiaíoi. Jira áferi fáigacaidiaíoi. Daje llezica Juzíñamuina cáimadotiaíoi. Daidíaíoi:

—Jaca daítadífueña cíorainidicai, Juzíñamui o iere jamánomoidimiedio. Mai Juzíñamuimo cai íóbilli, —daidíaíoi.

*Jesús Leví uáidote*  
(Mt 9.9-13; Lc 5.27-32)

<sup>13</sup> Ie mei Jesús meine abido jorai fuédamo jaide. Nana comini íemo áinozidiaioimo, afémie íaioina llófuete. <sup>14</sup> Jesús mácajilla llezica, Levína ciode. Leví Alfeo jitó. Afémie gobierno íbátaga úcube llínoranomo ráiide afe úcube llínollena. Iemo Jesús íena daide:

—Cuedo bi, —daide. Jira Leví náidacaillano afémiedo jaide.

<sup>15</sup> Afe méifomo Jesús Leví jofomo güizájide. Dinomo aillo jíáie gobierno íbátaga úcube llínoramaci Jesús dáanomo güirábanimo ráiiediaioi naa fiénidimaciri. Mei íere áillomaci afe izóidino afémiedo jáidino. Afe dáanomo Jesús llófuegamaci ráididiaioi. <sup>16</sup> Mei íadi dáarie ocuícáfue llófueraini fariséuai diga, Jesús nana afe fiénidimaci diga naa íáiruiga íbátaga úcube llínoramaciri dáanomo güíllana ciódiaioi. Iemona Jesús llófuegamacina daidíaioi:

—¿Nibái mei omoi llófueraima afe íáiruiga íbátaga úcube llínoramaci diga güífiredede, jiróífiredede? Daje izóí, ¿nibái mei jíáie fiénidino diga güífiredede? —daidíaioi.

<sup>17</sup> Aféfuena Jesús cacáillanona duera ráfuedo íaioina daide, nie ícoina mei íáiruigamací diga íe güífrenana íaioi onóillena. Be níífue:

—Íránidimaci manóriraimana jítáíñediaioi; dani duícotaidino da manóriraimana jítaina. Mei ñúemacimo cue uáiduaíbiticue. Fiénidino uáiduaíbiticue afémaci jíllloillena, —daide.

*Daa mona güíllena fímairillena Jesumo jicánotiaioi  
(Mt 9.14-17; Lc 5.33-39)*

<sup>18</sup> Jíáíruido Bántizaraima Juaado jáidino fariséuaido jáidino diga nana güíñeno fímairitiaioi. Aféruimo dámierie Jesumo jicánuaíbitiaioi:

—¿Nibái mei Juaado jáidino fariséuaido jáidino diga nana güíñeno fímairitiaioi, mei íadi o llófuegamaci fímairiñediaioi? —daidíaioi.

<sup>19</sup> Jesús uai uano ráfuemo mámano íaioi llófuete, afémiedo jáidino finócana jíáimaci féinino onótallena. Daide:

—Airenafuemo uáidogamací ringo otímie íaioimo illa llezica ¿meita fímairirediaioi? ¿Nibái fímairinidiaioi? Ringo otímie íaioimo illa llezica jaca fímainidiaioi. <sup>20</sup> Mei íadi ringo otímie íaioimona bairóbicailliruimo dúcite; aféruimo uáfuena fímairitiaioi.

<sup>21</sup> Iemo daje izóí ñue onótallena jíáie ráfuemo mámano íaioi llófuete; daide:

—Buna jaiáicuiro inícuero cúaidinomo comue jofo gájicaiñede iniroi nitácapu dájemo jofo jillíñede, mei comue gájicaiñede nitácapu afe jaiáicuiro onífenado nane ráataitade. Iemona cúaidino jae íere aillóite. <sup>22</sup> Daje izóí comue vino jácara igorai íe finoina botéllamo jóonenide. Jácara botéllamo comue vino jóoneadi, afétella bójicaide. Iemo nana vino táinomo tójicaide. Daje izóí afe igorai finoina botella bójicaillano meine finónide. Ie jira comue vino comue igorai finoina botéllamo jóonerede, —daide.

*Jesús llófuegamaci ocózinai llaruimo trigo llizíllaticiai tícoidiaioi  
(Mt 12.1-8; Lc 6.1-5)*

<sup>23</sup> Daa mona ocózinai llaruimo Jesús ríganíai cígido mácajide íe llófuegamaci diga. Afénodo jaillano íe llófuegamaci arrozna eroide trigo llizíllaticiai ja tícoiaidiaioi. <sup>24</sup> Iemo fariséuai íena daidíaioi:

—¡Erocai! ¿Nibái mei o llófuegamaci rairuírede jetádiaioi? Afena ocózinai llaruimo rairuírede, —daidíaioi.

<sup>25-26</sup> Mei íadi afémie íaioina daide:

—¿Jaca nibái David finócana facádoñediomoi? Afémie naa íe nabáiñiairi güille íñena llezica, júbietaillano Juzíñamui jofomo jaide. Ua Abiatar lletáriraini illáimana illáruído, David jofo jaide. Afe jofo eromo Juzíñamuimo eneno mameca rairuírede panes íte. Dani Juzíñamui lletáriraini afena güírena; jíáimacimona afe rairuírede. Afe panes David uánona güite; íe mei íe nabáiñiaimo fecade.

<sup>27</sup> Iemo nane Jesús íaioina daide:

—Hima ocózinaiillarui íena fínoñega, mei íadi ocózinaiillarui ìima íena mameca. <sup>28</sup> Jira Nanoide Hima Jitona cue íllamona, ocózinaiillaruina ocuiredicue. Aferui Náamadícue, —daide.

### 3

*Jesús ónoina llirídime jíllotate*  
(Mt 12.9-14; Lc 6.6-11)

<sup>1</sup> Jesús dáanomo Juzíñamui uai llófueriracomo jofo jaide. Afénomo ónoina llirídime ite. <sup>2</sup> Afénomo itínomona Jesumo iere eróioidiaioi, ocózinaiillaruimo Jesús bímiena jíllotajana onóillena, áfedo Jesumo fiénidífue jíállena. <sup>3</sup> Ie jira ónoina llirídimeia Jesús daide:

—Náidacai; jofo bené cígimo bi, —daide.

<sup>4</sup> Dáanomo jíáimacimo jícanote:

—¿Minícana ocózinaiillaruimo ómoiri finóredicue? ¿Nibai fiénidífue fínoíticue, nibai ñúefue fínoíticue? ¿Nibai omoi jíllotaiticue, nibai omoi títtaiticue? —daide Jesús.

Mei íadi afémaci ja uai oñédiaioi. <sup>5</sup> Jira Jesús íaioiri ríicaide. Daje izói zuure íaioimo eroide, mei íaioi onóiacañena jira. Iemo afe íimana daide:

—Mai, o onoi zúitacai, —daide.

Ie jira ie onoi zuitácaide. Iemona ja ie onoi ñuera. <sup>6</sup> Afe mei fariséuai, naa Herodes imaci díga jino jaillano, Jesús fallífue raire mamédiaioi.

*Aillo nairai jorai fuédamo gairídiaioi*

<sup>7</sup> Jesús ie llófuegamaci díga, jorai fuédamo jaide. Iemo aillo nairai Galilea imaci, íedo jáidiaioi. <sup>8</sup> Mei áillue ráfueña, afémie finócafuiaina, fidíillano aillo Judea énie imaci bite, Jerusalem imaci díga. Daje izói Idumea énie imaci bite; Jordán imani ruicáfelle imaci bite; Tiro, Sidón díga áinori itímaci bite. Nana dáanomo bitíaioi; Jesús eróizaibitiaioi. <sup>9</sup> Ie jira Jesús ie llófuegamaci ocuide nocáe atíllena, aillo nairai iere rillire íemo íñeillena. <sup>10</sup> Mei iere aillo nairai jíllotate. Iemona nana jíáie iráredino rillire afémiemo gairídiaioi, ie jetánollena. <sup>11</sup> Iemo afénomo itínomona dáarie fiéni joríairediaioi. Afémiena cióillanona, afémie uiécomo ana dújudiaioi. Dújuillano caillíoicaidiaioi:

—O Juzíñamui Jitódio, —daide.

<sup>12</sup> Mei íadi Jesús fiénide joríaina izire rairuide; daide:

—Juzíñamui Jitona cue íllana daiñeno iri, —daide.

*Jesús doce dígamie nizede, oni íaioi óriano afémaci ie ñúefue llujillena*  
(Mt 10.1-4; Lc 6.12-16)

<sup>13</sup> Ie mei Jesús ídumo caifo jaide. Dinomo jaillano Jesús comeci óiacagamie dígamie nizede. Afémiemo bitíaioi. <sup>14</sup> Doce dígamie Jesús níziano ote. Afémaci ie oréllimacina Jesús mamede. Ua íaioina ote ie abimo íllena, ie uai llóitínona jáillena. <sup>15</sup> Dáanomo ríinona igáiaioi iráredino jíllotallena, íemo jíái fiénide joríaí jino oréllena.

<sup>16</sup> Afe nizécamaci doce dígamie. Afémaci mámeciai: Simón, nímiemo Jesús jíáie mámecina jíta, Pedro; <sup>17</sup> ie mei Zebedeo jíto íaillinoi Santiago ie ama Juan díga. Afe íaillinoimo Jesús jíáie mámecí jíta, Boanerges. Afe mámecí daina: Iocímie íaillinoi. <sup>18</sup> Ie emódomo jíáie nizécamaci mámeciai: Andrés, Felipe, Bartolomé, Mateo, Tomás, Alfeo jíto Jacobo, Tadeo, íemo iere Járidotímacimo jaináidímie Simón, <sup>19</sup> ie mei Judas Iscariote. Afémie méifodo Jesús ie éoidinomo fécaitimie.

*Fiénide joríaí ríino Jesumo ite táinona daiñrediaioi*  
(Mt 12.22-32; Lc 11.14-23; 12.10)



Afe méifomo Jesús ie llófuegamaci diga jofomo jofo jaide. <sup>20</sup> Nane dáanomo aillo nairai gairízitiaioi. Iemona Cristo ie nizécano diga ja güinidiaioi. <sup>21</sup> Afefue fidíillano ie onoiga nabáñiaí bitiaioi ie oni uíllena, mei afémie uáiritaide daidíaioi.

<sup>22</sup> Daje llezica Jerusalémona bite ocuícáfue llófueraini, bie izói íeri úritiaioi; daidíaioi:

—Bímie Beelzebumo jaináidímie. Afe Beelzebú fiénide jóriaí illaíma, (jáíci ie mámecei Taife). Afe Beelzebú rínodo fiénide jóriaí afémie jino jiude, —daidíaioi.

<sup>23</sup> Ie jira Jesús íaioi jíirite. Jírilla mei, onoiga ráfuiaí íaioímo llote:

—¿Nie izói afe Taifedo Taife jíúrede? ¡Jiúnide! <sup>24</sup> Daa nairai énenorie jáíziena oni bójicaillano are íñeitiaioi, mei nágazie conima diga fuirífrediaioiza. <sup>25</sup> Daje izói eneno dani jofóredino íaioi bójicaíadi, are íñeitiaioi. <sup>26</sup> Mei jira Taife dama ie diga fuiríadi, íemona dama ie bójicaíadi, afémie are íñeite. Ua áfedo fúbicaite.

<sup>27</sup> ‘Máirimie jofomo, buna jofo jáinide, ie ráaie bairóllena. Dama afémie máia méifomo jofo jaillano bairórega.

<sup>28</sup> ‘Uáfueña ómoímo lloticue. Comini fiénidífuiaí nana dórede, daje izói nana íaioi fue borefue diga dórede. <sup>29</sup> Mei íadi Juziñamui Ñuera Joréñomo fiéni úritímie ie fiénidífuiaí jaca ua oni dónide. Dama ie ícoínia jaca íemo jíite, —daide.

<sup>30</sup> Daí daide, mei afémie fiénidena joriaírede daidíaioi.

*Jesús ei ie ámatiaí diga Jesuna uáiduaíbitiaioi  
(Mt 12.46-50; Lc 8.19-21)*

<sup>31</sup> Iemo Jesús ei ie ámatiaí diga dúcidiaioi, mei íadi jino fiébidiaioi. Dinómona jofo gairídinona daidíaioi:

—Mai ie jíirizai, —daidíaioi. <sup>32</sup> Jesús abido ráíiedino íena daidíaioi:

—O ei, o ámatiaí diga jino ite. O jénuaíbitiaioi, —daidíaioi.

<sup>33</sup> Mei afémie daide:

—¿Buoí cue eina? ¿Buoí cue ámatiaína? —daide. <sup>34</sup> Afe mei ie abido ráíiedínomo eróillano daide:

—Be mei cue éitiaí. Be mei cue ámatiaí. <sup>35</sup> Mei Juziñamui ocuícáfueña jeire otínona bie cue ama, bie cue miringo, bie cue ei, —daide.

## 4

*Ríjiraíma ie ífue  
(Mt 13.1-9; Lc 8.4-8)*

<sup>1</sup> Meine dáanomo jorai fuédamo Jesús llófue. Ie illánomo aillo nairai gairídiaioi. Jamánomo aillo comini illa jira, Jesús jóraimo ite nocaemo ráizaide. Nana comini guamáemo fiébicaídiaioi. <sup>2</sup> Iemo diga ráfuiaí íaioímo llófue. Ua íaioi onóigafuiaído llote. Ie llogáuai daide:

<sup>3</sup> —Bíemo cácarei: Ríjiraíma ríjizaide. <sup>4</sup> Ricana jailla llezica dáarie rillájiaí iodo cocide. Iemo ófocuizai áfena güizáíbitiaioi. <sup>5</sup> Jáíe rillájiaí noficiaímo énie íñénamo cocide. Afe rigájiaí raire zocade, mei afe énie figo íñédeza. <sup>6</sup> Mei íadi jítoma billa llezica uzídiaioi. Jáinao íñénamona dúidiaioi. <sup>7</sup> Jáíe rillájiaí éggiaí cígímo cocide. Afe éggiaí zoca anamo itábicaídiaioi. Meita jaca llizíñediaioi. <sup>8</sup> Mei íadi jííe rillájiaí ñuera éniemo baíde. Zocádiaioi; ie mei ñue comuíaioi. Mei ñue llizídiaioi. Daji rígamona zocano aillo llizide; jíájiaí afe baímo llizide; jíájiaí ie baímo ua aillo jamánomo llizide.

<sup>9</sup> Ie mei íaioína daide:

—Omoímona cacáacadíno cacai, —daide.

*Afémie nibaí íaioi onóigafuiaí cígído llófuefírede  
(Mt 13.10-17; Lc 8.9-10)*

<sup>10</sup> Afe mei Jesús dama fiébilla llezica, afémie áinori itino ie doce llófuegamaci diga íemo jicánotiaioi:

—Bie onóigafue ¿nie izói daiíacade? —daiíaiioi. <sup>11</sup> Jira íaioina daide:

—Juzíñamui ie uáfodo onóñega illáimana illirui rafue ómoimo llóiacade. Afedo ja lllóimoi. Mei íadi jino ite íemo jaináñedino jaca íaioi onóigafuiaido llogáiaioi. <sup>12</sup> Daií cue llófuegaiaioi, íaioi cióillano nai uina cióñedimaci izói íaioi fiébicaillena. Afe izói cácaitiaioi íadi ónoñeitiaioi. Daií llófuegaiaioi íaioi comeci ifue méidoñeillena; íemo jíai íaioi comeci fiénidifuiái dóficaiñeillena.

*Jesús afe ríjiraíma onóigafue ja ua jino llote*

*(Mt 13.18-23; Lc 8.11-15)*

<sup>13</sup> Dáanomo Jesús jicánote:

—¿Omoi bie onóigafue onóñediomoi? ¿Nie izói daií mei jíaiena ónoitiomoi? <sup>14</sup> Afe riraíma Juzíñamui ñuefue lloraíma izóidimie. <sup>15</sup> Dáarie comini afe iodo cocide rigájiaí izóidiaioi. Afémaci afe cue llogáfueмо cacáreidiaioi. Mei íadi áfena cacáillanona, Taife íaioi comécimo lloga ráfueña raire báiruaibite. <sup>16</sup> Jíaié comini afe noficiaímo énie iñéñanomo cocide rigájiaí izóidiaioi. Afe cue lloga uaina cacáillano raire caimare llínotiaioi. <sup>17</sup> Mei íadi figo jánaonide rigájiaí izóidiaioiza, dama íanori íllado ñue itíaioi. Afe mei lloga uai ícoinia facátáfuiái bíadi, níbai duere íaioi zefuáadi, íaioi íinoñenamona íaioimo lloga uaina raire meine abido zóofetiaioi. <sup>18</sup> Jíaié comini afe égiaí cígiri cocide rigájiaí izóidiaioi. Lloga uaina cacádiaioi, <sup>19</sup> mei íadi bie éniemo ite raamo comécillano aféfuiaímo iere járitaitiaioi. Bínie raa íaioina jífujete. Iemona jamánomo aillo ráaniaina óiacadiaioi. Nana bie jofu comeci óiacaigafue íaioimo lloga uaina niné féitate. Ja mei féitagaza; ja ie comécimo llizilla izói iñede. <sup>20</sup> Mei íadi dámierie lloga uaina cacáillano áfena ñue jeire otíaioi. Afémaci ñuera éniemo cocide rigájiaí izóidiaioi. Afe izói íaioi íllamona, ñúefuiaína ñue aite izói finódiaioi. Afémacimona dáarie afe daji rígamona zocano aillo llizilla izóidiaioi. Iaiomona jíaimaci afe baimo llizilla izóidiaioi. Jíaimaci afe ie baimo aillo jamánomo llizilla izóidiaioi.

*Mechera iedo cai onóigafue*

*(Lc 8.16-18)*

<sup>21</sup> Jesús nai úrite; íaioina daide:

—¿Nogo anamo jóonellena mechera meita atica? ¡Atiñega! ¿Daje izói inírabani anamo rainállena mechera atícaza? ¡Atiñega! Naga mechera caífo jica raináfírega, ñue egáiñollena. <sup>22</sup> Mei ja nana báinino ite raa jino uáfodo cíocaitade. Daje izói nana jáanoga rafue ñue onóigafueña jáite. <sup>23</sup> Omoimona cacáacadino cácarei.

<sup>24</sup> Afe emódomo íaioina daide:

—Omoi cacánafueña ñue omoi onoiri. Naga raa omoi faca izói, afe izói Juzíñamui íbana ómoimo fácaiteza. Ie mei afe baimo afémie jamánomo aillo ómoimo íite, mei ñue cacádiomoiiza. <sup>25</sup> Mei iéredimie mo jíaiena ille; mei íadi iénidimie mo, íemo due ite raa meine bairolle.

*Eniemo rigají zócajamo mameca rafue*

<sup>26</sup> Nane dáanomo daide Jesús:

—Juzíñamui illáimana illirui bie izoide. Daa iima éniemo rigájiaí júdaia izoide. <sup>27</sup> Rillano afémie abina íniaide. Ie mei cazide. Naio mona diga jaide. Afe llezica rigájiaí zocade; zócano ñue zairide, mei íadi nie izói comuídeza afémie onóñede. <sup>28</sup> Mei ñuera éniemo rigájiaí énie zocátaga. Nano fueñe ie ina jino billa, ie mei llizíllachecoí comuíde, ie mei afe llizíllachecoí íjiaína oruide. <sup>29</sup> Ja ie jeia llezica, riraíma afe llizíllajiaína uájide. Mei afe jofu uáruimo ja dúcideza.

*Mostaza llizíllají iedo onoiga rafue*  
(Mt 13.31-32; Lc 13.18-19)

<sup>30</sup> Jesús nane daide:

—Juzíñamui illáimana illarui, ¿níé izoide? ¿Ñíe onóigafuedo daje izóí fácaiticaí?

<sup>31</sup> Juzíñamui illáimana illarui mostaza llizíllajiaí rilla izoide. Afe íjiaí nana énie llizíllajiaimona da jaca iere jéjinide. <sup>32</sup> Mei íadi rígamona, nana raróciaí ie baímo áillo nana jaide. Ie ícairuaí áarie. Iemona féedino ófocuzai ie ícairuaímo ráinazaidiaíoi. Afe jánamo uái ráiiediaíoi, —daí Jesús daide.

*Jesús jaca onoiga ráfuiaímo mámano llófuefirede*  
(Mt 13.34-35)

<sup>33</sup> Daí Jesús ie jino llóiacagafuiaí aillo bie izóí onóigafuiaído jóonecana uite. Iaióí onóillinomo daí llócaide. <sup>34</sup> Onóigafue llóñeniadi, afémacina llófueñede. Mei íadi Jesús ie llófuegamaci diga oni eneno daní íaióí illa llezica nana áfena jino íaióímo llote.

*Jesús jairifo naa jorai bagua diga llícaitade*  
(Mt 8.23-27; Lc 8.22-25)

<sup>35</sup> Aferui nauídemo Jesús ie llófuegamacina daide:

—Jorai ruícafenemo mai cai jai, —daide.

<sup>36</sup> Ie mei comíni fíiano, Jesús uitíaíoi. Afémie illácaedo jáidiaíoi. Daje llezica jíáicaeiaído afémiedo jáidiaíoi. <sup>37</sup> Iemo iere rírede jairifo náidacaide. Iemona jorai bagua nocáe eromo cocide. Uafue, nocáe jáinoína orúbicaide. <sup>38</sup> Afe llezica Jesús moífecaemo ífo jobéracadamo bícana inide. Afémie cazítajano íena daídíaíoi:

—¡Llófueraíma! ¿O caina ráiruiñedio? ¡Buízaidicaí! —daídíaíoi.

<sup>39</sup> Iemo Jesús náidacaillano jairifo lletade. Lletajano jóraina daide:

—¡Llícaí! ¡Uái ii! —daide. Iemona jairifo llícaide. Nana ñue jáfuericaide. <sup>40</sup> Ie mei ie llófuegamacina daide:

—¿Ñibái mei iere jacíruitíomoi? ¿Ñibai nai Juzíñamuímo íñoñediomoi? —daide.

<sup>41</sup> Iadi jairifo ie llícaitari iere jacínaitiaíoi. Daní conímamo úritiaíoi:

—¿Bie nímie? ¡Jairifo jorai diga, afémie uaina jeire ote! —daídíaíoi.

*Gerasa éniemo fiénidena jóriaredimie Jesús jíllotate*  
(Mt 8.28-34; Lc 8.26-39)

## 5

<sup>1</sup> Jae jorai ruicáfellemo ite Gadara éniemo dúcidiaíoi. <sup>2</sup> Jesús nocáemona jino jáidemo, raíáfuaí illánomo ífirede fiénidena jóriaredimie Jesumo bite. <sup>3</sup> Afémie raíáfuaí illánomo ífirede. Aféruillaído afémie jaca buna llójeodo cuinánide. <sup>4</sup> Diga ícaíño llójeodo idai onoi diga íena cuinádiaíoi, mei íadi afémie afe llójeona titada jaca jéenino titúbite. Jaca buna afémiena anáfenonide. <sup>5</sup> Mona naio diga afémie afénomo macáfírede. Iduaído caillícana jaide naa raíáfuaído. Daje llezica noficiaído ie abi bofécade. <sup>6</sup> Iadi Jesuna jicana cíode; cíoillano, aizícana bite. Billano Jesús anamo afémie ie caiñícido ana dújude. <sup>7</sup> Jesumo ríre lléjecaide:

—¿Ñibái cuemo jíricaidio? O Jesúsio; jamánomo caifoide Juzíñamui Jitódio. Juzíñamui mámedido omo jicádícue duere cue zéfuiñellena, —daide. <sup>8</sup> Daí lléjecaide, mei nano fueñe Jesús íena dáideza:

—¡Fiénide jóriaí, bie ímamona oni jai! —daide. <sup>9</sup> Jesús íemo jicánote:

—¿O mei búdio? —daide. Uai ote:

—Cue mámece Aillo Dáanomo Íraícana, mei áillomacídicaíza, —daide.

<sup>10</sup> Iemo fiénide jóriaí Jesumo izire jicade, afe éniemona jica íaióina oni óreiñeillena. <sup>11</sup> Afe iduai ánomo aillo tóica meróniaí güífírede. <sup>12</sup> Ie jira fiénide jóriaí Jesumo jicade:

—Afe meróniaimo cai oreri, dinomo cai ílleza, —daidíai.

<sup>13</sup> Ie mei Jesús fairíote. Iemo fiénide jóríai ílmamona jino meróniaimo jáidiai. Mena mil tóiníai ite. Nana afe tóiníai jorai ígodado aizida cocídiai. Iemona jóríaimo coróbaitíai.

<sup>14</sup> Ie jira meróniaí úiñoraímaci jacínaillano botádiai. Afe rafue íaii jófue mo llujídiai naa jínoidímaci díga. Ie jira afe finócafuemo comíni eróizaíbitíai. <sup>15</sup> Jesús illánomo dúcillano nauí fiénidena jóríairedimíena ciódíai. Mei íadi ja biruí afémie ñue uái ráide. Ja inícuirona jítaoide. Ja ñue abína onode. Nana comíni jacíruitíai. <sup>16</sup> Ie mei ciódíno nauí fiénidena jóríairedimíemo finócafue na llujídiai. Daje izói meróniaimo finócafue llotíai. <sup>17</sup> Ie mei Jesumo izire jícajídíai íaii éniemona afémie oni jáillena.

<sup>18</sup> Jesús meine nocáe eromo jailla llezica, nauí fiénidena jóríaina ogámie Jesús díga íllena izire jícade. <sup>19</sup> Mei íadi Jesús fairíoñede. Afémíena daide:

—Mai o jofomo jai. O comínimo nana omo cue finócafue o llujíri. O Ocuíraímadícueza. Omo cue dúcaíllafue llujíri, —daide Jesús.

<sup>20</sup> Ie jira afémie jaillano nana Jesús afémíemo finócafue llujíde. Uafue nana Decápolis éniemo llujíde. Nana comíni aféfuéri fáigacaidíai.

*Jairo jiza jíllotafue*  
(Mt 9.18-26; Lc 8.40-56)

<sup>21</sup> Jesús meine jorai ruícafenemo nocaedo jáidemo, aillo comíni Jesús illánomo garízaíbitíai. Afémie díno jorai fuédamo fiévide. <sup>22</sup> Iemo Juzíñamuí uai llófueriraco illáinimona dámie dúvide. Afémie mámecei Jairo. Jesuna cióillano ie ídaímo bíjicaide. <sup>23</sup> Daje llezica izire jícade:

—Cue jiza tíiacade. O onoi cue jízamo bítaíbi, ie jíllóilleza, ie tíñelleza, —daide.

<sup>24</sup> Iemona Jesús afémie díga jaide. Ie llezica aillo comíni afémiedo ríllire jáidiai. <sup>25</sup> Afémaci cígímo daa ríngo iráredíngo ite. Doce díga fimona dícotaite. <sup>26</sup> Aillo manórirainimona duere zéfuide. Afe manórirainímo afengo úcube nana fuite. Iadi jaca íñoñede, mei íadi jamánomo irárede. Ua iere ana jaide. <sup>27</sup> Nauí jíáímaci Jesudo úrillafue na cacáillano, afe ríngo óodana comíni cígído Jesumo ánozide. Iemo afémie inícuíro jetánaide. <sup>28</sup> Afe uícori afengo comeci anado daide; “Ie inícuíro cue jetáadi jíllóitícue,” daide. <sup>29</sup> Ie mei inícuíro jetaa llezica afengo díe tótaja líícaide. Afe llezica ie irárena jílluamona afengo abí ñue cacaide. <sup>30</sup> Ie mei Jesús onóbicaide. Uafue, ie ríinodo da come jíllotaga afémie raíre fidíde. Ie jira comíni cígído jino éroicaillano jícanote:

—¿Mei bu cue inícuíro jetaa? —daide. <sup>31</sup> Iemo ie llófuegamaci afémíena daide:

—¿Aillo comíni ríllire fínuana cióñedio? ¿Níbái mei bu o inícuíro jetaa jícanotí? —daidíai.

<sup>32</sup> Mei íadi Jesús nágafene erórífide afémie inícuíro jetádingona cióillena. <sup>33</sup> Ie mei afengo jágieri cuidírite. Aféngomo finócafue na onóillano, Jesús uíécomo ana bíjicaizaíbite. Afengo rafue nana afémíemo uáfue na jino llote. <sup>34</sup> Jira Jesús daide:

—Eicango, o comécido ñue ínotí, jira jíllodí. Mai jai. Jaillano uái o irí. O irárenamona ja jíllodioza, —daide.

<sup>35</sup> Jesús nai úritemo, dáarie comíni illaíma Jairo jofómona bitíai. Dúngo moomo llujíbitíai:

—O jiza ja tíide. ¿Níbái mei are llófueríma ífoci daidódí? —daidíai. <sup>36</sup> Mei íadi Jesús íaii uai jeire oñeno, llófueriraco illaíma Jáirona daide:

—Jacíruiñoeno irí. Dama o comécido íñori, —daide.

<sup>37</sup> Iemo Jesús nana comíni íedo jáíñellena rairuíde. Dama Pedro, Santiago, ie ama Juan díga uite. <sup>38</sup> Llófueriraco illaíma jofomo dúcillano, Jesús aillo comíni faíllíñainana cacade; nana cáíllícaíllí énaíllana cacade. <sup>39</sup> Jofo jaillano Jesús daide:

—¿Ñibái mei iere faillíñaidiomoi? ¿Ñibái mei iere éediomoi? Afeza tíñedeza; fia inide, —daide.

<sup>40</sup> Iemona afémieri tadáidiaioi. Ie mei Jesús nana íaioi jino orede. Dama jiza moo, afengo ei, íedo bitímaci diga jofo uite. Jiza illácomo jofo jáidiaioi. <sup>41</sup> Jiza onoi llínuano daide:

—Talita, cumi—. Aféuai dobáicana llote: “Jiza, ona daidícue, náidacai.”

<sup>42</sup> Daií dáinamona afengo raire náidacaide. Náidacaillano macade; mei afengo doce diga fimona íteza. Aferi comini iere fágacaidiaioi. <sup>43</sup> Mei íadi Jesús:

—Afefue bumo lloñeno iri, —daide. Daií ocuide. Afe llezica afe ringoza ecállena íaioina ocuide.

## 6

### *Jesús Nazaremo jailla*

*(Mt 13.53-58; Lc 4.16-30)*

<sup>1</sup> Dinómona Jesús ie éniemo jaide. Ie llófuegamaci íedo jáidiaioi. <sup>2</sup> Ocózinaillaruimo dúcillanona Juzíñamui uai llófueriracomo llófuaide. Aillo comini íena cacáreidiaioi. Iemona íena jacíruicana fágacaidiaioi. Daídíaioi:

—¿Ñinómona bímie nana bie ráfuiái onode? ¿Minica bie onónafue íemo ite? ¿Nie izói afémie bie aillo uaido dáinamona comuítaga raa comuítarede? <sup>3</sup> Mei bímie afe aménado táijiraíma, ¿ero ua? Afémie María jitoza onódicai, ¿ero ua? Daje izói afémie ámatiaí Santiago, José, Judas, Simón dígadeza onódicai. Iemo ie miríngotiaí nai cai cígimo íllana onódicai, —daídíaioi.

Iemona afémaci Jesús uaina náfueacañediaioi. <sup>4</sup> Iemo Jesús íaioina daide:

—Nana jíáie comini, Juzíñamui uai jino llóraímana ñue jiéruitiaioi. Mei íadi afe llóraíma énie imaci, íezie imaci diga, figo íena jiéruíñediaioi. Daje izói ie jofo imaci íena jiéruíñediaioi, —daide.

<sup>5</sup> Ie jira afénomo jamánomo aillo fia uaido dáinamona comuítaga ráfuiaina comuítanide. Due iráredinomo ie onoi bítanona jíllotate. <sup>6</sup> Mei íadi nabémaci íñoñenari afémie fágacaide. Ie mei Jesús áinori ite jófuedo llófuecana uite.

### *Jesús ie doce dígamie oni jíáinomo óriano llotátate*

*(Mt 10.5-15; Lc 9.1-6)*

<sup>7</sup> Jesús ie doce dígade llófuegamaci uáidote. Uáiduano ménamierie íaioi orede. Afe llezica Jesús afe íaioimo ie ríino iga, fiénide joríaí jino oréllena. <sup>8</sup> Ie llófuegamacina ocuide:

—Omoi jaille iodo ráíñuai jíáie minícana uíñeno iri. Daa omoi jigüida diga jairi. Tura uíñeno iri. Pan úcube diga uíñeno iri. <sup>9</sup> Omoi ídai ico jíxada jairi. Mena caifófecuiro uíñeno iri, dama o jítaoigacuiro uiri, —daide. <sup>10</sup> Iemo nane íaioina daide:

—Nícomo o jáiadi, dinó o fiébiri; ua afe éniemona jíáinomo o jáiacana llezica dinó o fiébiri. <sup>11</sup> Jáícomo omoi jáiadi, ómoína íaioi llíñoñeniadi, afénomona jairi. Daje izói o uai cacáacañenomona jairi. Jaillano, o ídai ico ite eníchoma jino íaioimo teténori, daí íaioi finócafue o jiéruíñenana jino llóitio. Uáfueña omoi llotícue: Uire duere finóbilliruimo dúcia llezica, ómoína llíñoñedino jamánomo duere finóbitiaioi. Mei íadi Sodoma comini Gomorra comini diga figo duere finóbiñeitiaioi, —daide.

<sup>12</sup> Iemo ie llófuegamaci jino jáidiaioi. Jaillano comini llotíaioi:

—Mai omoi comeci ifue meídori, —daídíaioi. <sup>13</sup> Daje llezica aillo fiénide joríaí jino orédiaioi. Iráredinomo cáredijina due jónetiaioi; íemona jíllodiaioi.

### *Juan Bautista tíillafue*

*(Mt 14.1-12; Lc 9.7-9)*

<sup>14</sup> Illaïma Herodes aféfuiaïna como fidide. Mei nana comini Jesús jalléinana onódiaïoïza. Dáarie daidíaiïoï:

—Juan Bautista tíide íadi meine abido cáadimiena jaide. Iemona bie ríino afémiemo ite, —daidíaiïoï.

<sup>15</sup> Jiáimaci daidíaiïoï:

—Bie Juzíñamui uai llóraïma Elías, —daidíaiïoï.

Nane jiáimaci daidíaiïoï:

—Jaiïaï Juzíñamui uai jino llóraïni izoide bímie jiáïe Juzíñamui uai llóraïma, —daidíaiïoï.

<sup>16</sup> Herodes áfena cacáïllano daïde:

—Bímie ifona cue jaitátagamie Juan. Ja birui tíïllanomona meine abido caade, —daïde.

<sup>17</sup> Herodes ama Felipe; ie ofaiño Herodías, mei íadi Herodes afengo ie aina ote. Afe Herodías ícoïnia Herodes Juan jae llavétate. Afe llezica íena llavéracomo maitátate. <sup>18</sup> Mei nauï Juan Heródemo llógaza:

—O ofaiño o aina ónidïo; áfena rairuírede, —daïde.

<sup>19</sup> Ie jira Herodías Juamo éoïcana eroïde. Iena fáïacade, íadi íena fánide. <sup>20</sup> Herodes afémie comécina jaïcina ñue jóidimienana onode; iere ñüemienana onode. Ñúefuedo íena jacíruite. Ie jira afengo íena fiëni finótañede. Herodes Juan llogafue nai figo onóñede, íadi caïmare íemo cacáreïde. <sup>21</sup> Mei íadi Herodías jiáïfuemo uíbicaïde. Herodes jocóïnamona jiáïe fimona fuilláruïmo dúcïde. Jira aféruido Herodes cumpleaños rafue finode. Nana ie illaïni, jabóïllaiïni, Galilea ocuïraïni diga afénomo gairídïaïoï, mei Herodes uáïdogaiïaïoïza. <sup>22</sup> Dinomo Herodías jiza jofo jaïllano zaïte. Afengo záïllari Herodes íóbide; daje izóï nana ie diga güizáïbitino íóbïdiaïoï. Iemona illaïma Herodes aféngona daïde:

—O jicáacaïga raa cuemo jica. Omo ííticue, —daïde.

<sup>23</sup> Ríïrede uaido nana afengo jicalle raa ie fecállena íaïoï uíécomo llote: “Nana cuemo jainaïde éniemona júbene o jitaïlla dieze omo llóitïcue,” daïde. <sup>24</sup> Afengo jaïllano ie eina daïde:

—¿Minica jícaítïcue? —daïde.

Afengo daïde:

—Mai, Juan Bautista ifoci jica, —daïde.

<sup>25</sup> Afe ringoza jarire illaïma illánomo jofo jaïde; íena daïde:

—Raïre plato eromo Juan Bautista ifoci jóoneta cuemo ine, —daïde.

<sup>26</sup> Iemona illaïma iere zúureficaïde. Mei ja ríïrede uaido llógaza afengo jicácana afémie jáanoïacañede. Daje llezica nana ie uáïdogamacï cacádiaïoï. Ie jira jáanoïacañede. <sup>27</sup> Ie jira afe llezica ie abi úïñoraïma raïre llavériracomo orede, Juan ifoci atíïllena. <sup>28</sup> Afe abi úïñoraïma llavériracomo jaïllano, Juan ifoci jáïtano plátomo jóoneta atide. Afémie aféngomo izáïbite. Iemo ie eïmo afengo izájide.

<sup>29</sup> Juaado jáïdïno, fidíïllano, ie abi uájïdiaïoï, ráïllena.

*Jesús cinco mil dígade íñïaï ecade  
(Mt 14.13-21; Lc 9.10-17; Jn 6.1-14)*

<sup>30</sup> Afe mei Jesús nauï oni jino orécamacï meine Jesumo gairíïllano, nana íaïoï finócafue afémiemo llotíaïoï. Afe íaïoï llogafue llotíaïoï. <sup>31</sup> Iemona Jesús íaïoïna daïde:

—Mai bi, oni báïnino cai ocózinaiïi, —daïde.

Aillo comini dúcïoidiaïoï, jáïoidiaïoï; ie jira Jesús ie imaci diga, güínidiaïoï. <sup>32</sup> Ie mei Jesús ie imaci diga nocaedo oni eneno tïï daïdïnomo jáïdiaïoï. <sup>33</sup> Mei íadi aillo naïraï íaïoï jáïllana cïode. Jesuna onóïllano nana jófueмона batíonomo aizícana jáïdiaïoï. Uafue, Jesús ie imaci diga uícomo dúcïdiaïoï. <sup>34</sup> Jesús dúcïa mei nocáemona jino jaïllano aillo comínina cïode. Cïóïllano afémacïmo dúcecaïde. Iaïoïna izíruite nïbai úïñoraïmanide ovéjaïaï izóï itíaïoï. Ie jira diga ráfuiaïna íaïoïmo llote. <sup>35</sup> Ja nauïdemo ie llófuegamaci afémiena daïzaïbitiaïoï:

—Ja nauízai. Afe benomo comini jofona iñede. <sup>36</sup> Mai comini oni ore áinori itícuaímo jáie jofue diga, dinomo íaiói güille íbajillena. Mei íaiói güillena benomo iñeiza, —daídíaiói.

<sup>37</sup> Jira Jesús uai ote:

—Mai omoi íaiói eca, —daide.

Afémiena daídíaiói:

—¿Cai meita jaillano íbáredicai, doscientos dígabe fidi pan bimaci ecállena? —daídíaiói.

<sup>38</sup> Jira Jesús daide:

—¿Niga pan ómoímo ite? Eroizai, —daide.

Afe fidíillano daídíaiói:

—Jubécuiro diga panes ite, mena chamu diga, —daídíaiói.

<sup>39</sup> Ie jira mócorede raitíremo Jesús comini énenorie dázierie raízitate. <sup>40</sup> Iemona cincuenta íemo jái cien dígamíerie raízidaitiaíói. <sup>41</sup> Iemona Jesús afe jubeba panes mena chamu diga llínote. Llínuno caífo monamo érocaillano:

—Iere figura, —daide. Daí dainano afe pan ditade. Dítajano ie llófuegamacimo fecade. Llófuegamaci ja comínimo oni fecádiaíói. Daje izói mena chamu nana comínido fecádiaíói. <sup>42</sup> Nana comini güitíaiói. Ua ñue jeírediaíói. <sup>43</sup> Güilla mei panes chamu diga fiébidinona doce dígagai círigai oruítatiaíói. <sup>44</sup> Afe Jesús fecaca panes güitímaci cinco mil dígamíai.

### *Jesús jainoi emódodo macade*

*(Mt 14.22-27; Jn 6.16-21)*

<sup>45</sup> Raire méifodo Jesús ie llófuegamaci nocaedo jorai ruícafenemo orede. Afe llezica íaióina ie uícomo Betsáidamo orede. Dinomo íaiói jailla. Daí ñeta llezica mei Jesús nana comini diga rainode. <sup>46</sup> Iaiói ráinua méifodo Jesús idu emódodo Juzíñamuímo úrizai. <sup>47</sup> Ja naiomo nocáe jorai cígímo ite. Jesús dama éniemo fiébicaide. <sup>48</sup> Jesús íaiói taino jáiana ciode. Taino jaitíaiói, mei jairifo meine íaiói fúuoideza. Iemo ja monáizaidemo Jesús íaióimo ánozide. Jainoi emódodo macade. Ánozide, íadi jícado fíiaide izói macade. <sup>49</sup> Ie jainoi emódodo mácajana íaiói cióillano comeci jacíruioicana facádiaíói: “¡Níbai janaba!” daídíaiói. Jira caillíoidiaíói. <sup>50</sup> Nana áfena cióillano iere jacínaitiaíói. Mei íadi Jesús raire íaióimo úrite; daide:

—¡Abi omoi mame! ¡Cueza! ¡Jacíruiño omoi iri! —daide.

<sup>51</sup> Iaióimo itícaemo jofo jaide. Jofo jáidemo jairifo llíicaide. Iemo jacíruioicana áferi iere fáigacaidiaíói. <sup>52</sup> Ua afe daí fáigacaidiaíói, mei afe duera pan fia uáimona jamánomo aillo comútatena comécido onóñediaíoiza; íaiói comeci nai ríirena jira.

### *Genesaret éniemo ite iráredino Jesús jíllotate*

*(Mt 14.34-36)*

<sup>53</sup> Jorai ruicáfellemo jáitanona Genesaret éniemo dúcidiaíói. Zíjillano nocáe ari cuinádiaíói. <sup>54</sup> Nocáemona jino jailla llezica, afénomo ite comini raire Jesuna onódiaíói. <sup>55</sup> Iemona afémaci nana afe éniemo raire aizícana llujídiaíói. Iemona Jesús illánona fidíillano, afe dinomo iráredimaci duera inírabanido atídiaíói. <sup>56</sup> Nágagobiaído ie jáiacana izói afe jofue cígímo ite ocózinairanomo iráredino jóonefirediaíói. Aillue jofue diné ie jáiadi, dúera jofue diné ie jáiadi, fia jofo iñénallegoído ie jáiadi, daje izói iráredino iomo jóonetiaíói. Afe llezica Jesús inícuero fueda íaiói jetánollena daa bie dáarie izire íemo jícadiaíói. Nana áfena jetánotino jíllobicaidiaíói.

## 7

### *¿Minica caina íaire fínode?*

*(Mt 15.1-20)*

<sup>1</sup> Iemo fariséuai Jesumo áinozidiaioi, dáarie ocuícáfue llófueraini diga. Afe llófueraini Jerusalémona bitíaiioi. <sup>2</sup> Nana bimaci Jesús llófuegamacimona dámierie ciódiaioi. Afe llófuegamaci onoi jocóñeno güitíaiioi, fariséuai afémacina daí daide, mei bimaci onoi jócua ocuica níciduafuemo dúcitaiñediaioiza. Afe ícoinia íaiioi jánana úritiaioi. <sup>3</sup> Daí daidíaiioi mei fariséuai nana judíuai diga íaiioi jaiáigima uai nai úcadiáioiza. Aféfuiai daide, comini nai bie izói íaiioi onoi diga icaiño jócoñenia güínidiaioi. <sup>4</sup> Daje izói güille fecáracomona meine billano, onoi jócua ocuica níciduafue nai fuitáñenia güínidiaioi. Nai aillo ite afémaci jíáie uícaigafuiai. Uafue, íaiioi jiróracuai diga icaiño jocófirediaioi. Daje izói íaiioi ícíruai, cadéruai, jamánomo diga ícaiño jocódiaioi íaiioi inírabanillai diga. <sup>5</sup> Iemona fariséuai, ocuícáfue llófueraini diga Jesumo jicánotiaioi:

—¿Nibái mei o llófuegamaci cai jaiáigima daináfuiiai uícaiñediaioi? Daí onoi íáirededo güitíaiioi, —daidíaiioi.

<sup>6</sup> Jesús uai ote:

—Juzíñamui uai lloráima Isaías ñue llote. Nana omoi abina ñúemaci, íadi comécina íáirediomoi. Ie cuia llezica ómoimo llote:

Bie comini fuedo ñúefue cuemo jítadiaioi.

Mei íadi íaiioi comeci cuemo jaináñede.

<sup>7</sup> Cue ñúefuedo úrillena cuemo gairífrediaioi, mei íadi íaiioi úrillafue ráifiñede.

Íaiioi llófuega Juzíñamui daináuai, fia jamai comini ocuícáfuiiai.

Juzíñamui uáñede, daí íaiioi daina íadi, daide.

<sup>8</sup> Mei Juzíñamui ocuícáfue féitaiomoi, fia comini daináfuiiai jeire omoi óllena. Aféfuiai daide: ícíruai jocóllena, jiróracuai jocóllena, aillo jíáie afe izóidifuiiai omoi finóllena.

<sup>9</sup> Iemo afe emódomo bie izói zanoda íaiioina daide:

—Juzíñamui ocuícáuai iere ebire oni eneno omoi fáicanocaiga, dani omoi daináfuiiai uícaillena. <sup>10</sup> Mei Moisés daide: “Ñue jacíruioicana o moo canori, o ei diga. Ie ei ie moo diga fiénina úritimie uáfueña titáredeza,” daide. <sup>11</sup> Mei íadi jíáifodo daidíomoi:

—Dámie ie moo íaillinona bie daírede, “Ona canónidicue, mei nana cuemo ite ráaie jae ‘Corbán’ itíaiioiza”. (Afe uai dobáicana daina Juzíñamui íena mamécaza.) <sup>12</sup> Dámie daí daíadi, ja mei ie ei ie moo diga canónide náfuetiomoi. <sup>13</sup> Afe ícoinia Juzíñamui ocuica uaina jámairuitiomoi. Uafue, comini llocana jaide llogafue ínnota ñúefueña jámairuitiomoi. Aillo afe izóidifuiiai finófrediomoi.

<sup>14</sup> Nane dáanomo Jesús comini jírite; jírillano íaiioina daide:

—Nana omoi cácarei, comeci onoiri. <sup>15</sup> Nana güíllemo comécina íáirenafue iñede. Mei íadi comécimona jino bitífue come comeci íáiretate. <sup>16</sup> Omoimona cacáreiacadino cacai, —daide.

<sup>17</sup> Jesús comini fiáno jofomo jaide. Dinomo ie llófuegamaci afe onóigafuedo íemo jicánotiaioi. <sup>18-19</sup> Iemo íaiioina daide:

—¿Daí jaca ónoñeitíomoi? Nana jinona güiga raa comécimo jáñede. Jébegimo jaide. Ie jira cómena íáiruitañede. Jébegimo jailla mei, abímona oni dotácaza. ¿Aféfuena fidíñediomoi?

Afedo Jesús daíacade nana güille ñuera. <sup>20</sup> Nane daide:

—Íima comécimona jino bitífue dama afémiena íáiruitade. <sup>21</sup> Mei afémie erómona, ua ie comécimona jino fiéni uibíllafue bite; íemo jíruírenafue bite, naa jíáie jíruífuiiai diga; íemo jíáima méiniafue bite, <sup>22</sup> merírillafue diga; íemo jíáima raa bairóacanafue bite, jíáie fiénidifuiiai diga; ie mei jíáima jífuiáfue bite, nana íáiredifuiiai diga. Iemo úradoillafue bite, naa táinona úrillafue diga. Iemo táinona abi ínuaafue bite, naa abina onóñenafue diga.

<sup>23</sup> Nana bie figóñedifuiiai come erómona bite; billano cómena íaire finode.



*Jiázie ingo Jesumo ínote*  
(Mt 15.21-28)

<sup>24</sup> Dinómona Jesús Tiro éniemo jaide, Sidón énie diga. Daa jofomo jaide. Buna ónoñeillena báiino jaide. Mei íadi afémie retáirinide. <sup>25</sup> Iemo fiénidena jóriairedingo ei, ie íllana raire fidide. Billano Jesús anamo dújude. <sup>26</sup> Afengo judío ingóñede; jiázie ingo. Afengo énie mámecei Sirofenicia. Afengo jízamo ite fiénide jóriai óllena Jesumo jicade. <sup>27</sup> Mei íadi Jesús daide:

—Juzíñamui úruiai raire nano fueñe güilleza. Juzíñamui úruiai güille bairoda tóica jico izoide comínimo ígadenia figóñede.

<sup>28</sup> Afengo uai ote:

—Uafue Ocuíraima; mei íadi úruiai güíllamona, ana cocídijiai, güirábani anamo ite jicótiruai güífrediaioi, —daide.

<sup>29</sup> Ie mei Jesús daide:

—Ua llotio. Iemona ja jáiredio, o jízamo ite fiénide jóriai jae oni jáideza, —daide.

<sup>30</sup> Afengo jofomo dúcina llezica, iníramo bíide jízana cide. Fiénide jóriai ja ua aféngomona ñue oni jaide.

*Jefona cacáñede gogódimie Jesús jíllotate*

<sup>31</sup> Nano íanori íllano Jesús ja Tiro éniemona billano, Sidón énie dibénedo jaide. Afe mei Decápolis éniemo ite jófuijai dinedo jaide. Aféniedo jaillano, meine abido Galilea jóraimo dúcide. <sup>32</sup> Afénomo jefona cacáñede uaina jino figo baiñedimie Jesumo atídiaoioi. Iemo izire jicádiaoioi Jesús afémiemo onoi bitállena. <sup>33</sup> Ie jira Jesús náiraímona oni báiino íena uite. Dinomo Jesús dama ie onocai jefona cacáñedimie jefomo dutade. Ie mei Jesús dama ie onócaimo tuánuano afe úriñedimie iife jetánote. <sup>34</sup> Afe mei Jesús monamo érocaillanona comeci zúurenamona zegóricade. Zegóricailano íena daide:

—¡Efata! —daide. Afe uai jino dobáiñuano daína: túijicai.

<sup>35</sup> Afe llezica jefona cacáñedimie jefo túijicaide; ie iife ñue jíllode. Iemona afémie ja ñue úrite. <sup>36</sup> Iemona Jesús íaioina rairuide:

—Jiáimacimo lloñeno iri, —daide. Jesús afe daí dígacaiño íaioina rairuide. Mei íadi Jesús iere rairuide íadi, áfena náfueñeno aféfuena baímo jino llócaidiaoioi. <sup>37</sup> Iemo nana comíni iere jamánomo fáigacaidiaoioi. Daidíaoioi:

—Nana ñue finode. Afémie jefona cacáñedimie cacáitate; uaina jino figo baiñedimiena ñue úritade, —daidíaoioi.

## 8

*Jesús cuatro mil diga comíni ecade*  
(Mt 15.32-39)

<sup>1</sup> Aféruillaido aillo comíni meine dáanomo gairídiaoioi. Iaoioi güille íñede. Ie jira Jesús ie llófuegamaci jírita, íaioina daide:

<sup>2</sup> —Bie náirairi dúcaidicue. Ja daruíamani benó cue diga itíaoioi. Iaoioi güille jae íñede.

<sup>3</sup> Güiñeno íaoioi jofomo orédicuenia, iodo báicana jáitiaoioi. Dáarie jicana bitíaoioiza, —daide Jesús.

<sup>4</sup> Ie llófuegamaci uai otíaoioi:

—Benó bu íñenanoza ¿minícana íaoioi ecáredicai?

<sup>5</sup> Jesús íaioimo jicánote:

—¿Niga panes ómoimo ite? —daide.

Jira afémaci daidíaoioi:

—Siete panes caímo ite, —daidíaoioi.

<sup>6</sup> Ie jira nana comini ana éniemo ráitate. Iemo Jesús afe siete panes llínuano, Juzíñamuina “Figora” daide. Daina mei, afe panes ditade. Daií ñeta, ie llófuegamacimo ite. Afe mei llófuegamaci cominado oni fecádiaioi. <sup>7</sup> Afémacimo due jiza chamu ite. Jesús Juzíñamuina “Figora” dainano afe chamu fecátate. <sup>8</sup> Nana güitíaioi. Iemona ñue jeirediaioi. Ie mei güillamona fiébidino siete diga cirigai iráidiaioi. <sup>9</sup> Afe güitino cuatro milmo ánoziacade. Afe mei Jesús nana íaioi rainode. <sup>10</sup> Ráinua mei afémie raire ie llófuegamaci diga nocaemo jofo jaide. Iemo Dalmanuta éniemo jaide.

*Fariséuai uai dáinamona comuide onótate raa jicádiaioi*  
(Mt 16.1-4; Lc 12.54-56)

<sup>11</sup> Iemona fariséuai Jesumo júfiduaibitiaioi. Ie facátaiacadiaioi. Iemona: “Monámona uaido comuide onótate raa caimo ácatari,” daidíaioi. <sup>12</sup> Iemo Jesús comeci zúurenamona izire zegóricallano daide:

—¿Nibái mei bie nairai uáimona comuide onótate raa jicádiaioi? Uáfuenta ómoimo lloticue, jaca onótate raana bu ómoimo fínoñeite, —daide.

<sup>13</sup> Jira Jesús íaioi fíano meine nocaemo jaide. Iemo jorai enéfenemo jaide.

*Fariséuaimo ite pan aillo fáitate raa izóidifuedo Jesús llote*  
(Mt 16.5-12)

<sup>14</sup> Jesús ie llófuegamaci diga íaioi jailla llezica, íaioi ráiñuai féitatiaioi. Dinó nocaemo fia daa pan íaioimo ite. <sup>15</sup> Iemo Jesús íaioi ocuide:

—Omoí cacai. Fariséuaimo ite pan aillo fáitate raa izóidifuemona abí omoí rairuiri. Daje izóí Heródesmo ite pan fáitate raa izóidifuemona abí omoí rairuiri, —daide.

<sup>16</sup> Iemo llófuegamaci dani conímamo llotíaioi:

—Nibái cai pan iñena jírari, Jesús caina daií riire daide, —daidíaioi.

<sup>17</sup> Jesús dani íaioi úrillana onóillano daide:

—¿Nibái mei, “caimo pan iñede” dani jofo conímamo daiífirediomoi? ¿Nai fidíñediomoi? ¿Nai omoí comécimo déiñede? ¿Omoí comeci nai iere riirede? <sup>18</sup> ¿Omoí uído cióñediomoi? ¿Omoí jefodo cacáñediomoi? ¿Nai cue finócafuenta onóñediomoi? <sup>19</sup> Naui cinco mil íñiaí dígamiedemo afe cinco panes cue fecácamo, ¿niga cirigai fiébidinona iráidiomoi? —daide.

Iemo daidíaioi:

—Doce dígagai cirigai, —daidíaioi.

<sup>20</sup> Jesús nane daide:

—Daje izóí cuatro mil íñiaí dígamiedemo afe siete panes cue fecácamo, ¿niga oruide cirigai iráidiomoi? —daide.

Iemo daidíaioi:

—Siete dígagai cirigai, —daidíaioi.

<sup>21</sup> Iemo íaioina daide:

—¿Nai omoí comécimo jaca déiñede? —daide.

*Betsaida jófuego ite uina cióñedimie Jesús jíllotate*

<sup>22</sup> Ja Betsaida jófuego dúcidiaioi. Iemo uina cióñedimie Jesumo comini atidiaioi. Iena jetánollena izire jicádiaioi. <sup>23</sup> Uina cióñedimie ónoído llínnota, jofue jinomo Jesús ie uite. Iemo fue fáicido ie uimo bitade. Afe llezica afémiemo onoi bitade. Afe mei íemo jicánote:

—¿Ja baca o ui cioide? —daide.

<sup>24</sup> Jira uina cióñedimie érocaillano daide:

—Jii, comini mácana ciódicue, mei íadi uáfodo íaioina cióñedicue. Afémaci améniaí izóí cióidiaioi, —daide.

<sup>25</sup> Ie jira Jesús nane dáanomo ie uimo ie onoi jóonete. Afe mei afémie riire eroide. Iemo ie ui ja jíllode; ja afémie naga raana uáfodo ñue ciode. <sup>26</sup> Ie mei Jesús ie jofomo ie orede. Iena daide:

—Jófuemo jáiñeno iri. Afénomo ite comínimo, buna lloñeno iri, —daide.

*Pedro Jesús Crístona maméinafue jino ñue llote*

*(Mt 16.13-20; Lc 9.18-21)*

<sup>27</sup> Afe mei Jesús ie llófuegamaci diga, Cesarea Filipo éniemo jaide. Afénomo ite jéenide jófuiai dinedo jáidiaioi. Afe iodo íaioi jáillanomo, Jesús ie llófuegamacimo jicánote:

—Comini cuena ¿nie izói daidiaioi? —daide.

<sup>28</sup> Afémaci uai otíaioi:

—Dáamierie Juan Bautístadio daide. Jáimíiai Elíasdio daidiaioi. Ie jáimíiai jáie uai lloráimadio daidiaioi, —daí uai otíaioi.

<sup>29</sup> Iemo íaioina jicánote:

—Omoimona, ¿cuena bu daidíomoi? —daide.

Ie jira Pedro íena daide:

—O Crístodio, —daide.

<sup>30</sup> Iemo Jesús íaioina ocuide, aféfuena bumo llóñeilla.

*Jesús ie tíillifue fíditate*

*(Mt 16.21-28; Lc 9.22-27)*

<sup>31</sup> Iemo Jesús dama ie duere finóllifue como fueñe íaioimo llote. Lluano daide:

—Nanoide Hima Jitódicueza íadi iere duere zefuitallícue. Eicomini cuena ruifruitiaioi. Daje izói lletáriraini illaini, ocuícáfue llófueraini diga cuena ruifruitiaioi. Omoina daidícue, afémaci cuena méineitiaioi. Mei íadi daruíámani íllamona tíillanomonameine abído caifo náidacaitícue. <sup>32</sup> Afefue íaioimo ñue jino llote. Ie jira Pedro eneno oni Jesuna uite. Uillano Pedro Jesús íena lletade. <sup>33</sup> Mei íadi Jesús meine gírecaillano ie llófuegamacimo eroide. Jesús Pedro llétano daide:

—¡Mai cúemona oni jai! Satanás izóidimiedioza. O comeci Juzíñamui mamécana ónoñede. Dama bie éniemo dúidino úrilla izói úritio, —daide.

<sup>34</sup> Dáanomo nane Jesús ie llófuegamaci jírrite, nana jáie comini diga. Iaioina daide:

—Cuedo jáiacadímie mai dama ie comeci jítaina féitari. Féitano cuedo biri. Daí cuedo bíllamona nibai afémie tíadiáfemo comeci fáinide; cuedo bírede. <sup>35</sup> Jaca ninomo íllena, dama ie abí rairuíacadímie dinó jaca raire llícaite. Mei íadi cue ícoina abí rairuíacañedímie meine jíllano llícaíte; daje izói, cue lloga ñúefue ícoina abí rairuíacañedímie zíiñona íite. <sup>36</sup> Mei jáífodo nana éniemo ite raa caí óiadi, mei íadi afe llezica caí zíiñona illifue niné féiadi, ¿nieze canócacai? ¡Canóñegacai! <sup>37</sup> ¿Nieze íbárede da come ie zíiñona illafue abído óllena? Ibánide. <sup>38</sup> Mei jíi, dáamie cuena meáiruiadi, abído afémiena meáiruitícue. Daje izói bie mínícana ínoñede fiénidímaci uiécomo cue lloga uaina meáiruitímie, íena meáiruitícue. Mei Nanoide Hima Jitódicueza. Uire cue Moo aillo ñue máiriedo bíitícue. Nana ie ñuera abí imaci diga bíitícue. Aféruimo bie éniemo ite cuena meáiruitínona, daje izói íaioina meáiruitícue.

## 9

<sup>1</sup> Nane Jesús íaioina daide:

—Uáfuenta ómoimo llotícue. Benomo itímacimona dáarie nai íaioi tíiñenia Juzíñamui aillo ie ríinodo ie illáimana íllana cíoitiaioi, —daide.

*Jesús abí jáífodo méidoficaide*

*(Mt 17.1-13; Lc 9.28-36)*

<sup>2</sup> Seis dígarui íllamona, Jesús Pedro, Santiago, Juan diga uite. Dani dígamie eneno caifónedumo afémie uite. Ja dinomo íaioi eróicana afémie abí jáífodo méidoficaide. <sup>3</sup> Ie ínícuro quénicuirona jaide, ua iere úzerede jaillíci izói. Bie éniemo finódino íníoina afe izói

úzeretanidiaioi. <sup>4</sup> Afe llezica Elías, Moisés diga Jesumo úrillana ciódiaioi. <sup>5</sup> Jira Pedro Jesuna daide:

—Llófueraima, nii cai benomo ñue illa. Daámani jofóchupi ómoiena cai finolli, daa óchupi, jáie Moisés ichupi, jáie Elías ichupi, —daide.

<sup>6</sup> Afe dáanomo ie llófuegamaci iere jacínaificaidiaioi; jacínaillano Pedro nie izói dánana onóñenano daí daide. <sup>7</sup> Afe llezica íaioimo mona uíllie ana bite. Billano afémacina ferínote. Afe mona uílliemona daa uaina cacádiaioi. Llote:

—Bie cue izíruiga Jitó. Afémiemo cácarei, —daide.

<sup>8</sup> Afe llezica, nágafene eróroidiaioi íadi íaioi diga buna cióñena, dama Jesús.

<sup>9</sup> Idumona ana bitíaioimo Jesús afe íaioimo ciónafue jáimacimo llúana rairuide. Íaioina daide:

—Nanoide íima Jitódicue. Uire cue tíllinomona meine abido cáadimiena cue illíruimo afe omoi ciónafuena llóreitíomoi, —daide. <sup>10</sup> Ie jira aféfuemo dani comécidiaioi. Mei íadi afémie tíllinomona abido cáadimiena illífuena jicánofirediaioi:

—¿Minícana íite? —conímana dani daídíaioi.

<sup>11</sup> Ie mei Jesumo jicánotiaioi:

—¿Ñibái mei ocuícáfue llófueraíni daífirediaioi, caína illáimate Mesías dainámie uícodo Elías raire biite? —jicánotiaioi.

<sup>12</sup> Afémie uai ote:

—Iere uafue Elías raire cue uícodo bite. Ua billano nana meine ñue jaícina fínuaibite. Iemo, mei Nanoide íima Jitódicueza, cue billáfuedo ¿nie izói Juzíñamui Cuegáuai daide? Aféuai bie izói daide: “duere zéfuiticue” daide. Daje izói “comini cuena jámairuitiaioi” daide. <sup>13</sup> Mei íadi ómoína daidicue, Elías ja bite. Dani afémaci óiacana izói afémiemo finódiaioi. Mei Cuegáuai uícodo daína izói, afe izói ja afémiemo zuíde, —daide.

*Jesús fiénidena jóriarede dúemie jíllotate  
(Mt 17.14-21; Lc 9.37-43)*

<sup>14</sup> Ie mei ja jáie llófuegamaci illánomo Jesús daámani caifónedumo uigámaci diga meine bitíaioi. Billano aillo comini íaioimo gairíllana ciódiaioi. Ocuica uai llófueraíni dáanomo ite. Afe llezica afémaci Jesús llófuegamacimo júfidotiaioi. <sup>15</sup> Ie mei Jesuna cióillano iere fágacaidiaioi. Afémiemo aizícana uáiduaidiaioi. <sup>16</sup> Ie jira Jesús ie llófuegamacimo jicánote:

—¿Minica afe ocuica uai llófueraínimo júfidotíomoi? —daide.

<sup>17</sup> Afénomo itímacimona daa uai ote:

—Llófueraima, benó omo cue jitó atídicue. Fiénide jóriai afémie uáinino finode.

<sup>18</sup> Náganomo ie jáiadi afe jóriai ie uánona ana dotáfiredo. Ja dínomo fuedo mulléfiredo; afe llezica ízie mutúricaide. Iemona ie abi iere naillíbicaide. O llófuegamacimo fiénide jóriai jino óllena jicádicue, íadi afémaci ónidiaioi, —daide.

<sup>19</sup> Jira Jesús uai ote:

—¡Aíí, Juzíñamuimo íinoñedimaci! ¿Nie díno ómoiri ííticue? ¿Nie díno ómoína mozóitíicue? Bené dúemie ati, —daide.

<sup>20</sup> Jira atídíaioi. Afe jóriai Jesuna cióillano, afe dúemie abi meine cuidítate. Cúdiamona afémie éniemo baide. Dínomo jabíoicaide. Fuedo mulléoido. <sup>21</sup> Jira Jesús ie moomo jicánote:

—¿Ja nie díno daí ite? —daide.

Jira moo daide:

—Jaca ie dúenamona. <sup>22</sup> Diga ícaíño fiénide jóriai afémie iraimo dotáfiredo. Daje izói illemo dotade ie titállena. Minícana cairi o finórenia, mai cairi fino. Cairi dúecairi. Cai cano, —daide.

<sup>23</sup> Jesús íena daide:

—¿Ñibái mei “O finóreniadi cai cano” cuena daidio? Daií daiíñoeno iri, mei Juzíñamuimo ñinotimiemo naga raa finóredeza, —daide.

<sup>24</sup> Ie jira afe úrue moo caillíoicaide:

—¿ñinotícue! Cue cano jamánomo cue ñinolleza, —daide.

<sup>25</sup> Jesús aillo comini ofillana cióillano, fiénide joríaí riire lletade. Daide:

—Uáinitade joríaí, cacáitañede joríaí, o jino jáillena ja ocuídícueza, ¡jai! ¡Bie úrue fáinocai! Meine abido íena oñeno iri, —daide. <sup>26</sup> Iemona joríaí caillide; cáilliano dúemie meine nane riire cuidítate. Cuidítajano oni jaide, íadi afe dúemiena tíide izói finode. Jira aillo comini:

—Ja tíide, —daidíaioí. <sup>27</sup> Mei íadi Jesús ónoído llíinota caifo dúemiena naidánete. Iemona afémie ñue jílloda náidacaide.

<sup>28</sup> Ie mei Jesús daa jofomo jofo jaide. Afe mei ie llófuegamaci eneno íemo jicánotiaioí:

—¿Ñibái mei fiénide joríaína ónidícai? —daidíaioí.

<sup>29</sup> Jira Jesús daide:

—Bie izói joríaí dama Juzíñamuimo úrillado, íemo fímairillado jino orérede, —daide.

### *Jesús ie tíillí fue meine fídítate*

*(Mt 17.22-23; Lc 9.43-45)*

<sup>30</sup> Afénomona íaioí jaillano Galilea éniédo jáidiaioí. Jesús báinino jáiacade bu ónoñeillena. <sup>31</sup> Mei aféruillaído Jesús ie llófuegamacimo llófullofuedeza. Afémiemo zúillí fue íaioímo llote. Lluano íaioína daide:

—Nanoíde íima Jitódícueza íadi uire náiraímo izájillícueza, cue íaioí fállena. Mei íadi daruíamani cue tíillanomona meine abido cáadimiena íítícue, —daide. <sup>32</sup> Mei íadi afémaci ie dainana onóñediaioí. Daje izói íemo jicánuana jacírúitíai.

### *¿Bu íere jamánomo áillomiena?*

*(Mt 18.1-5; Lc 9.46-48)*

<sup>33</sup> Iemo afémaci Capernaumo dúcidiaioí. Jofomo íaioí illa llezica, Jesús íaioímo jicánote: —¿Minícafue íomo júfidotíomoi? —daide.

<sup>34</sup> Mei íadi jaca uaina oñediaioí. Mei jae íodo júfidotiaioí, ¿bu cáimona jamánomo áillomiena illa? <sup>35</sup> Ie jira Jesús ana ráinaillano, ie doce diga llófuegamaci jíirite; daide:

—Dámie raire uíécodo áillomiena jáiacaniadi, nano fueñe íere jamámiena írede; daje izói nana comini canóraimana írede, —daide.

<sup>36</sup> Iemona Jesús daa úrue llíinuano íaioí cígímo jónete. Ie mei ie ónoído íena llirínuano comínina daide:

<sup>37</sup> —Bie úrue cue mámecido llíinotímie dájena cuena llíinote. Daje izói cuena llíinotímie dama cue llíinoñede, mei íadi cue orédimiena cue abido llíinote, —daide.

### *Caina éoñedímie cai dibénemo íte*

*(Mt 10.42; Lc 9.49-50)*

<sup>38</sup> Iemo Juan Jesuna daide:

—Llófueraíma, dámie ciódícai o mámecido fiénide joríaí jino orede. Mei íadi caído jáiñena jira íena rairuídícai.

<sup>39</sup> Mei Jesús daide:

—Rairuíñoeno iri. Mei daií cue mámecido ciórainina raa finódímie ñúemie. Daií finódímie afe finua méifomo raire cuedo fiéni úrinide. <sup>40</sup> Mei caina éoñedímie ua cai dibéfodo ítímie. <sup>41</sup> Jáíe come cue mámecido omoi jírótaadi, mei Crístomo omoi jáinaina jira, afe jírotatímie uáfúena ie jíridolle raa llíinoite, —daide.

### *Fiénidífuemo baíllena íere jacírede*

*(Mt 18.6-9; Lc 17.1-2)*

<sup>42</sup> Jiáie come, bie cuena ínote dúemie fiénidifuemo baiítaiadi, afe come fiénide. Baiítatimiemona figura, cimoimo áillue nofícina cúinano monáillaimo dotárede. <sup>43</sup> Dama o onoi fiénidifuemo o baiítaiadi, afe o jaitari. Júbezi onoi diga ziiño ñue illafue Juzíñamuimona o maiñóadi, iere ñuera. Mei nágafezi onoi íadi “comini duere finolle iraimo” o dotábicaiaidi, iere figóñede. Afénomo ite irai dúitanide. <sup>44</sup> Afénomo ite aigíroiaí tiiñediaioi; afe aigíroi, afeno itímacina ziiñona duere fínoitiaioi. Afe irai jaca dúíñede. <sup>45</sup> Daje izói o idai fiénidifuemo o baiítaiadi, áfena jaita. Júbene ídainide o illa llezica ziiño ñue illafue Juzíñamuimona o maiñóadi, jamánomo ñuera. Mei jiáifodo iraimo o dotábicaiaidi ñue mena ídairedimie o íadi, iere figóñede. Afénomo ite irai dúitanide. <sup>46</sup> Afénomo ite aigíroiaí tiiñediaioi; afe aigíroi, afeno itímacina ziiñona duere fínoitiaioi. Afe irai jaca dúíñeiteza. <sup>47</sup> Daje izói o uiji ona íáidaitaiadi, mai afeji cuerónori. Ua júbene fíidimie Juzíñamui illáimana illánomo o jáiadi, jamánomo ñuera. Mei íadi nágaillinoi újiredimie o illa llezica, iraimo o dotábicaiaidi iere figóñede. <sup>48</sup> Afénomo ite aigíroiaí tiiñeitiaioi; afe aigíroi afeno itímacina ziiñona duere fínoitiaioi. Afe irai jaca dúíñede.

<sup>49</sup> Mei nana fia fecaca Juzíñamui íóbitalle jobaica rílleniammo salna jónefirediaioi, afe fecaca rille ñue íllena. Daje izói nana raamo cai jírinafuiado ñue íredicaí. Aféfuiaí irai come uzilla izírena izói caína izi cácataite, Juzíñamui anamo ñue cai íllena. <sup>50</sup> Sal ñuera; mei íadi afe sal ie cáimana féiadi, ¿minícado afe sal meine abido cáimacaitarede? Mai dani conímaiaína caimátaillafue dibénemo omoi iri. Afe llezica comeci caimare uái illáfuemo dani conímaiaína ífireiri.

## 10

*Jesús, naga come ie aina oni dótana rairuide*  
(Mt 19.1-12; Lc 16.18)

<sup>1</sup> Jesús ja Capernaúmona oni Judea éniemo jaide. Ua Jordán ruicáfellemo ite éniemo jaide. Iemo aillo comini ie illano dinó meine abido garízaiibitiaioi. Iemona Jesús ie ífirena izói íaioina llófuete. <sup>2</sup> Iemo fariséuaimona dáarie Jesuna fiéni facátaibitiaioi. Jesumo jicánotiaioi:

—¿Mei nibai dáamie ie aina oni dótajana rairuírede, nibai ráiruiñega? —daidíaioi.

<sup>3</sup> Iemona Jesús uai ote:

—¿Ñie izói Moisés ómoína ocuide? —daide.

<sup>4</sup> Jira íena daidíaioi:

—Moisés llote, dáamie ie aina oni dotáacanamona, afémie dinena aféngona “jae ai oni dotaina rabe” cúerede. Ie mei daí oni dotárede, —daidíaioi.

<sup>5</sup> Iemo Jesús íaioina daide:

—Moisés afe uaina ómoimo llote, mei omoi comeci ifue iere riíredeza. <sup>6</sup> Mei íadi nano fueñe, Juzíñamui nana ráaniaína comúitaja llezica, “afémie iima ringo diga íaillinoína comúitate.” <sup>7</sup> “Ie jira naga iima, ie ai úamona, ie moo ei diga fiénocailano, oni dáanommo ítiaillinoi. <sup>8</sup> Daí ie ai onónamona afe íaillinoi daa come izóidena jáitiaillinoi.” Ja mena cómeñediaillinoi, dama daa cómedeza. <sup>9</sup> Ie jira Juzíñamui dáanommo jónegaiaillinoi, comini oni dotánide, —dinori Jesús daide.

<sup>10</sup> Ja jofomo Jesús naa ie llófuegamaciri dúcinamo, ie llófuegamaci aféfuena Jesumo meine abido jicánotiaioi. <sup>11</sup> Jesús íaioina daide:

—Afe ai oni dotádimie jiáie ai óllena, dotaca ringo dibénemo afémie jiruifue finode.

<sup>12</sup> Daje izói ini oni dotádingo jiáimie mo iníreillena, afengo jiruifue finode.

*Jesús úruiaí ñue íllena finode*  
(Mt 19.13-15; Lc 18.15-17)

13 Ie mei Jesumo úruiai atídiaoí, íaioímo ie onoi bitállena. Mei íadi llófuegamaci atídina rairuide, íaioí átiñeilla. 14 Jesús áfena cióillano rícaide; jira íaioína daide:

—Rairuíño iri. Fáinocai úruiai cuemo bílleza. Iaioína llótaidoño iri. Juzíñamuimo jaináidino ua afe bie úruiai izóí itíaoíza. 15 Uáfueña ómoína daidícue, Juzíñamui illáimana íllana jíeruiredícai. Uruiai áfena jíeruilla izóí jíeruiredícai. Mei íadi nana afe izóí jíeruinedína Juzíñamui ie caimare illínomo jofo óreñeite.

16 Iemo úruiaína llirínuano, ie onoi íaioímo bitano íaioína ñue finode.

*Ráarede jitócome Jesús diga úrizabite  
(Mt 19.16-30; Lc 18.18-30)*

17 Jesús meine abido jáizaidemo, dáamie aizícana Jesús anamo dújuzaibite. Dújuillano jícanote:

—Ñue Llófueraíma, ¿nie izóí íitícue zíñona cue illino cue óllena? —daide.

18 Jira Jesús daide:

—¿Níbái mei cuena fígomie daidío? Ímamona buna fígomiena ñede. Dama Juzíñamui fígomie. 19 Ocuícafuiaína onódio:

“Jíáima ai diga íño iri;  
come faño iri;  
meríriño iri;  
bumo taino lloño iri;  
jíáima jífueño iri;  
o moo, o ei diga ñue cacáreiri,” —Jesús daide.

20 Afémie uai ote:

—Llófueraíma, nana aféfuiaína cue jitócomenamona jeire ófiredícue.

21 Jesús afémiemo éroicaillano íena izíruite; daide:

—O dafue nai jeire oñédio. Mai nana omo ite raa fécajiri. Fécajano afe iba dúredimacimo ine. Iemona jamánomo jíridolle izoide raa monamo omo iite. Daí o finolle mei, cuedo bii. Mei cuedo o bíllamona o tíadi, áfena náfueño benó biri. Coco jai, —daide.

22 Mei íadi áfena cacáillano, afe íima zúucaide. Ua zuure oni jaide, aillo ie ráaniai illa jira.

23 Ie mei Jesús abido comínimo éroicaillano, ie llófuegamacina daide:

—¡Níí féirena ráaredimie Juzíñamui illáimana illáruimo jofo jáillena! —daide.

24 Jira llófuegamaci aféuairi iere fáigacaidiaoí. Jesús meine nane daide:

—¡Uruiai, níí féirena úcubena ínotino Juzíñamui illáimana illáruimo jofo jáillena!

25 Camello eedo uífodo jailla jamánomo juánide, mei íadi ráaredimie Juzíñamui illáimana illáruimo jailla iere Juárezde, —daide.

26 Afena cacáillano, jacínaifcaidiaoí. Dani conímamo jícanotiaoí:

—¿Mei bu jíllolle? —daídiaoí.

27 Jesús íaioímo eróillano daide:

—Afena comínimo finónide; mei íadi Juzíñamuimo finórede. Juzíñamuimo finónide raana ñede, —daide.

28 Jira Pedro íena daide:

—Ocuíraíma, nana caimo ite raana fiénocaidícai o diga cai jáillena, —daide.

29-30 Jira Jesús uai ote:

—Uáfueña ómoína dáitícue, naga come cue ícoínia íemo cue lloga jíllonafue ícoínia diga, ie jofo, ie ámatíai, ie mirínguai, ie moo, ie ei, ie jítotíai, ie jacáfaiái dieze afémie fiénocaiadi, uáfueña meine líínoite. Ja bie éniemo cien dígcacíño afe baímo jofue, ámatíai, mirínguai, éitíai, jítotíai, jacáfaiái líínoite. Uafue, dieze líínoite duere zefuúllafue diga íadi. Ie mei

monamo ziiñona illino llínoite. <sup>31</sup> Aillo biruúllaido nánoraimaci uire ódaidimacina jáitiaioi. Daje izói aillo biruúllaido ódaidimaci uire nánoraimacina jáitiaioi, —daide.

*Dáanomo Jesús ie tíillifue llote*  
(Mt 20.17-19; Lc 18.31-34)

<sup>32</sup> Ja Jerusalén iodo jáizaidiaioi. Jesús ie llófuegamaci uícodo jaide. Comeci iere facábicaidiaioi. Jiáie íedo jáidino jacíruioicana afémiedo jáidiaioi. Jira Jesús doce diga llófuegamaci eneno uáidote. Ianori íllamona íemo finóllifueña abido íaioimo llote. <sup>33</sup> Daide: —Mai omoi cacai. Nanoide íima Jitódicueza. Jerusalemo jáizaidicai. Mei íadi díonomo lletáriraini illáiniamo izájillicue. Daje llezica ocuica uai llófuerainimo izájillicue. Iemo afémaci cue titállena ócuítiaioi. Onínemacimo cuena izájitiaioi. <sup>34</sup> Cueri jifánodoítiaioi. Cuena tícoítiaioi. Cue túallaitiaioi. Cue títaítiaioi. Mei íadi daruíámani íllamona tíllanomona meine abido cáadimiena ítiticue, —daide.

*Santiago Juan diga uire uícoinafue Jesumo jicádiaillinoi*  
(Mt 20.20-28)

<sup>35</sup> Afe mei Zebedeo jitó íaillinoi Santiago Juan diga, Jesumo jicajidiaillinoi; daidíaillinoi: —Llófueraima, coco jicalle jítaigafueña cócomo lloiri, —daidíaillinoi.

<sup>36</sup> Iemona Jesús íaillinoína daide:

—¿Mínica mei ómicoimo cue finóllena jítáidíomicoi? —daide.

<sup>37</sup> Iemo íena daidíaillinoi:

—Uire o ebírede illáimana illíruido, cócomona dáamie o nabézimo, jiáimie o jarífezimo cócona o ráinatari, —daidíaillinoi.

<sup>38</sup> Iemona Jesús íaillinoína daide:

—Daí jicáidíomicoi íadi abina onóñediomicoi. Cue duere zefuillifue izói, ua erírede jirole júrua izói, ¿zéfuirediomicoi? Daje izói cue izire tízailifue izói, ¿tízairrediomicoi? —daide.

<sup>39</sup> Iemo uai otíaillinoi:

—¡Ie mei! Afena ocuiredicoco, —daidíaillinoi.

Jira Jesús íaillinoína daide:

—Uáfueña dáitícue, cue duere zefuillifue izói, duere zefuitíomicoi. Cue izire tílle izói, tíitíomicoi. <sup>40</sup> Mei íadi cue nabéfenemo, cue jarífenemo ómicoi ráinallena, cúemona llónide. Afe ráinallino dama Juzíñamui maméinamacimo dúide, —daide.

<sup>41</sup> Jiáie diez diga llófuegamaci afefue cacáillano, Santiago Juan dígamo icíritiaioi. <sup>42</sup> Iemo Jesús íaioína jírillano, íaioína daide:

—Onódiomoiza, náiraíaimo illáimaifiredino riire ocuídillaini dani jáidiaioi, comínina náamatallena. Aféllaini cígiri ite ríimaci, íaioi ríinona izire comínimo cácatatiaioi. <sup>43</sup> Mei íadi omoi cígiri afe daí íñeitiomoi. Mei jiáifodo omoi dibénemo illáimana íacadimie, omoi canófredimiena jáirede. <sup>44</sup> Daje izói ómoimona ocuíacadimiena íacadimie, nana jiáimaci anamo íaioi táijitagamiena írede. <sup>45</sup> Mei jii, Juzíñamui oreca Nanoide íima Jitódicueza. Mei íadi jiáimaci cuena canóllena biñédicue. Mei jiáifodo nana comínina cánuabiticue. Uafue áillomaci íaioi fiénidífue mona zuitalle izói, íaioína cue jíllotallena tízaibitícue, —dínoiri Jesús llote.

*Jesús uínidimie Bartimeo jíllotate*  
(Mt 20.29-34; Lc 18.35-43)

<sup>46</sup> Jae Jericomo dúcidiaioi. Afe jófue mona Jesús jino jáidemo ie llófuegamaci diga, naa aillo comíniri, uínidimie io fuemo ráide. Afémie Timeo jitó, Bartimeo. Díno afémie úcube jicáfirede. <sup>47</sup> Nazaret ímie Jesús ánozillano fidíillano, uínidimie jíríoicaide:

—¡Jesús, jaiaí illaima David Jitó, cuemo dúecai! —daide.



48 Aillo comini íena rairuídíaiói ie llícaillena; íadi jaca nai jamánomo jíirioide:

—¿David Jitó, cuemo dúecai! —daide.

49 Ie jira Jesús uái náidaillano daide:

—Afémie uaido, —daide.

Jira uínidímie uáiduano íena daidíaiói:

—Abi mame. Náidacai. O uáidoteza, —daidíaiói.

50 Jira ie emódodíroi duíñuano iere raire náidacaillano Jesumo bite. 51 Jira Jesús íemo jícanote:

—¿Minica omo cue finóllena jitáidíoi? —daide.

Jira uínidímie uai ote:

—Llófueraíma, cue úreacadícue, cue eróillena, —daide.

52 Jesús íena daide:

—Mai o jairi. O ínuamona jae jíllodioza, —daide.

Afe llezica uínidímie cíode. Iemona Jesús jáillado afémie jaide.

## 11

### *Jesús illáimana Jerusalemo jofo jaide*

(Mt 21.1-11; Lc 19.28-40; Jn 12.12-19)

1 Jerusalemo ánozillamona, Jesús mena llófuega íaillinoi uícomo orede. Jae Betfagé jofue, íemo jíái Betania jofue díga áinomo itíaiói. Dáanori Olivo daina ídumo itíaiói. Iaillinoi óriano daide:

2 —Uícomo ite duera jófuemo ómicoi jai. Omicoi dúcille llezica cuinaca duera búrrona cíotíomicoi. Nai áfedo buna ráiñena. Zúitajano cuemo ati. 3 Bu ómicoimo jícanoíadi ¿níbái ómicoi zuitaca? íena dáitío: “Ocuíraíma Jesús jitailla jira. Ie mei raire meine omo atille,” —daide.

4 Afe íaillinoi jaillano jino naze fue iori cuinaca búrrona baizájidiaillinoi. Afe zuitádiaillinoi. 5 Dáamie díno itínomona íaillinoína daide:

—¿Minica ñetíomicoi? ¿Níbái burro zuitádiomicoi? —daide.

6 Jira uai otíaillinoi Jesús íaillinoína daina izói. Ie jira:

—Jii, mai ui, —daidíaiói.

7 Iemona búrrona Jesumo izájidiaillinoi. Izájillano íaiói inícuirona burro emodo jobédiaíoi. Ie mei dínomo Jesús caifo ráinade. 8 Aillo comini íaiói iníroi iomo jobédiaíoi. Jíámaci íbiaírede amena rábaillai otá iomo jóonetiaíoi. 9 Uícoidímaci ódaidímaci díga jíirioicaídiaíoi:

—¿Ebírede! ¡Juzíñamui mámecido bitímie caimáreficairi! 10 ¡Como íacade illáimana illino caimare comuiri! ¡Ua cai jaiáigima comuídímie David illáimana illino ñue móonairi! ¡Juzíñamui ebírede rafue daíri! —daidíaiói.

11 Ja daí Jesús Jerusalemo jofo jaide. Jaillano Juzíñamuimo gairíracomo jaide. Nágafenemo eróirioicaillano jino Betániamo jaide, naa ie doce díga llófuegamaciri, mei ja nauídeza.

### *Jesús llizíñede higuera daina amena faidode*

(Mt 21.18-19)

12 Afe jíáiruido Betániamona jino abido billano, Jesús jufíruite. 13 Macádiaíoi ñue íbiaírede higuera aménana Jesús jícana cíode. Iemona dínomo jaide afenamona níbai ie llizíllajiaína óllena. Mei íadi Jesús dúcillano, hígojiaína baiñede. Afe amena táinona fia íbiaírede, mei aféruimo hígonino nai dúcíñedeza. 14 Iemo Jesús afe aménana fáiduano daide:

—Jaca benómona buna bie amena llizíñenamona ie llizíllajiaína ríeñeíteza, —daide.

Daí ie dánana ie llófuegamaci cacádiaíoi.

### *Juzíñamui gairíraco Jesús duano ñue fínode*

(Mt 21.12-17; Lc 19.45-48; Jn 2.13-22)

<sup>15</sup> Ie mei Jerusalemo meine dúcidiaioi. Juzíñamui gairíracomo Jesús jofo jaillánona, dinomo ráaie fecádino ibároidino diga jino júuaide. Ucube méidoraini ibani Jesús caitade, fíicirillai fecádino ráairaniai diga. <sup>16</sup> Afe gairíracomo buna minícana úiñellena afémie rairuide. <sup>17</sup> Iaioi llófuete:

—Juzíñamui Cuegáuai daide: “Cue jofo ua nana náiraímo Juzíñamuimo úrille illácona mameide,” mei íadi merítino illano jae afénona finódiomoi, —daide.

<sup>18</sup> Lletáriraini illaini, ocuícáfue llófueraini diga afe ie finócafueña fidídiaioi. Iemona afémie fállena jenódiaioi. Iena jacíruitiaioi, afémie llófueinafueri nana nairai iere fáigacaideza. <sup>19</sup> Ja nauízaidemo Jesús afe jófueмона jino jaide, naa ie llófuegamaciri.

*Nauí ciona higuera amena jae zaférede duíraína jaide*

*(Mt 21.20-22)*

<sup>20</sup> Afe jáíruido, jítiramo meine abido Jerusalemo íaioi billano, nauí ciona higúerana abido ciódiaioi, mei íadi birui afe amena nana ie jáinauairi zaférede duíraína ja jaide.

<sup>21</sup> Iemo Pedro comeci uíbicaillano, Jesuna daide:

—¿Llófueraima, erói! O faidoca higúerana ja duíraína zaféreficaide, —daide.

<sup>22</sup> Jesús íaioimo uai ote:

—Juzíñamuimo mai omoi ñnofireiri. <sup>23</sup> Uáfueña ómoína dáitícue, dáamie jizíñeno nana ie comécido ñnuamona, bie caifóneduna ocuícana daíadi, “Benómona oni ii; jóraimo dotábicaíri,” afe ie dáinana ua zúite; afémie jeire ua llezica, afefue daí afémiemo íficaite.

<sup>24</sup> Ie jira ómoína dáitícue, Juzíñamuimo omoi úrillano jicaca raa, ja nibai o llínoga, áfena mai o ñnofireiri. Iemona afe jicaca raa óitiomoi. <sup>25</sup> Nágaruido Juzíñamuimo o úriadi, jáimiena o éoiadi, mai íemo o comécimo ite íaifue féitari. Daí o finori, monamo ite omoi Moo Juzíñamui ómoimo ite íaifuiaí dólleña. <sup>26</sup> Iadi o abi ímie iba omoi óiadi, monamo ite omoi Moo Juzíñamui, ómoimo ite íaifuiaína dóñeite.

*Jesumo ocuille uai ite*

*(Mt 21.23-27; Lc 20.1-8)*

<sup>27</sup> Iemo Jerusalemo abido bitíaioi. Jesús gairíracomo maca llezica, lletáriraini illaini íemo áinozidiaioi. Afe llezica ocuica uai llófuetino afémiemo gairídiaioi, éicomini diga. <sup>28</sup> Nana íemo jicánotiaioi:

—¿Bífuiaí fínuana, bu o ocuilla? ¿Bu ríinodo bie raa finódio? —daí daidíaioi.

<sup>29</sup> Jesús íaioi uai ote:

—Omoimo daa rafue jicánoitícue. Cuemo uafue omoi llóadi, bífuiaí cue finoca ríino ómoimo llóitícue. <sup>30</sup> ¿Bu mei ocuica báutizallena Juan? ¿Juzíñamui nibai ocuica, nibai comini? Mai fáirio, —daide Jesús. <sup>31</sup> Ie mei afémaci dani júfidotiaioi; daidíaioi:

—Juzíñamui ocuica cai daíadi, Jesús caina fairíoite: “Iemona ¿nibái mei íemo ñnoñediomoi?” <sup>32</sup> Mei íadi comini ocuica, daínidicai, —daidíaioi.

Comínina jacíruillano daí úritiaioi. Ja onódiaioiza, nana comini Juamo ñue comécidiaioi: “Ua Juzíñamui uaido Juan úrite,” daidíaioi.

<sup>33</sup> Iemona Jesuna daidíaioi:

—Onóñedicai, —daidíaioi.

Ie mei Jesús íaioína daide:

—Ñie ríinodo bie raa finódícue, daje izói ómoimo llóñeitícue, —daide.

## 12

*Comini fáfírede tájidino jáifuena caina onótate*

*(Mt 21.33-46; Lc 20.9-19)*

<sup>1</sup> Iemona Jesús íaioi onógafuiaido íaioimo úrizaide; íaioína daide:

—Nauí dáamie jíriconai izoide raa rizájide. (Afe jírícue izoide raa rínano viñédona mameina.) Afémie afe rillano ie abi cirínora finode. Ie mei afe jíricono eroide úvaiai zaizíraco finode, afe llizilla iji íaiói óllena. Nane are caifo jacafai cigi úiñoraco afémie nite, afe rigano ñue úiñollena.

Te mei afe énie naama dáarie táijitaganomo ie rigano fecade, áfena íaiói úiñollena. Afémie daií fécano oni jica jíáie éniemo jaide. <sup>2</sup> Jíriconino llezica, ritímie ie ocuícamié afe táijitagamacimo orede, íeiéna mameide llizíllajiai dieze óllena. <sup>3</sup> Mei íadi afe uáibitimiéna llaitádiaíoi; lláitano íaiói faga. Daií ñeta ria íemo fecáñeno oni íena orédiaíoi. <sup>4</sup> Ie jira afe naama nane jíáie ocuícamié orede. Mei íadi afe orécamiéna nófiedo níjdiaíoi. Níjiano ie ifona íaiói bofeca. Iemo fiéni íena úritiaíoi. <sup>5</sup> Daje izói nane jíáimie orede. Afémie íaiói titaca tíide. Afe mei diga icaiño aillo jíáie ocuícamiái dinomo oréoié. Afe orécamacimona dámierie fia faga; jíáimaci tícoizitiaíoi.

<sup>6</sup> Nai dáamie naama dibénemo ite. Daa afe naama jitona fiébite; iere ie izíruiamié. Iraicaiño ie jitó orede. Comeci facade: “Afémaci ñue íemo comécillano íena ñue ínoitiaíoi; ie daina uaina jeire óitiaíoi,” daide. <sup>7</sup> Mei íadi táijitagano dani afémaci úritiaíoi: “Bímie níbai ie moo feci raa máíñoitimie. Mai ie cai faa, ie mei cai náamatallena.” <sup>8</sup> Ie jira íaiói llaitaca; íaiói titaca tíide. Ie mei ie abi raiñeno afénomona oni dotaca.

<sup>9</sup> Ie mei Jesús jicánote:

—¿Nie izói bie énie naama afe fiénidinona fínoite? Billano afe táijitaganona títaite. Ie mei afe jírícure izóidino jíáie úiñoraimacimo fécaite.

<sup>10</sup> ¿Jaiái Cuegáuaina nai facádoñediómoi? Afe uai bie izói daide:

Jofo níraini oni fádoica nófie, ja ñuera jíalliraina jaide.

<sup>11</sup> Bie cai Ocuíraima finoca.

Iere jamánomo ebire caimo cíoié.

Dinori Jesús úrite.

<sup>12</sup> Iemona Jesuna llaitáacadiaíoi, llavéllena. Mei ja onódiaíoiiza, Jesús bie onóigafuedo íaióina uáitate. Mei íadi comínina jacíruillano, Jesús jetáñeno íena fiédiaíoi. Fíiano oni jíáinomo jáidiaíoi.

### *Gobierno ibátaga úcube cai íballena Jesús llote*

*(Mt 22.15-22; Lc 20.20-26)*

<sup>13</sup> Afe mei fariseo illáicomini afémacimona dáarie Jesumo orédiaíoi. Daje izói Heródemo jaináidinomona orédiaíoi, Jesuna úritallena, afe ie uaido taino íeri nitállena. <sup>14</sup> Bimaci billano íena daidíaíoi:

—Llófueraima, onódicaiza jíáimaci ie lloga uai ínoñeno, o jaca uáfueña úrifredio. Comini jínofene ciona izói riire jicánoñedio. Mei jíáfodo Juzíñamui lloga cai ñue illafue jífueñeno jino llófuetio. ¿Mei iere riiredillaíma ocuica úcube íemo fecáredicai, níbai fecánidicai? ¿Afe cai fecállifue figura, níbai figóñede? —daidíaíoi.

<sup>15</sup> Mei íadi Jesús íaiói uáfodo úriñenafueña onode. Ie jira íaióina daide:

—¿Níbái mei cue jánari táinona úritiomoi, cue llaitállena? Daa úcubetuni cuemo ati, cue eróillena, —daide.

<sup>16</sup> Afétuni atidiaíoi. Afe eróillano Jesús íaióimo jicánote:

—Bie uíeco jana, ¿bu ie? Benomo cuega mámecei ¿bu ie? —daide.

Afémaci fairíotiaíoi:

—Riiredillaíma ie, —daidíaíoi.

<sup>17</sup> Iemo Jesús íaióina daide:

—Ríillaíma ie raa íemo abido ine. Daje izói Juzíñamui ie raa íemo abido ine, —daide.

Afémacina ie dáinari iere comecei jíáfoficaidiaíoi.

*Tíidino meine abido cáadena íllena jicánotiaioi*  
(Mt 22.23-33; Lc 20.27-40)

<sup>18</sup> Ie mei saduceo imaci dáarie Jesumo úrizaidiaioi. Bimaci tíidino meine abido cáallena lloñediaioi. Ie jira bie taino lloga rafue Jesumo jicánotiaioi. Nai jicánoñenia fueñe daidíaiioi:

<sup>19</sup> —Llófueraíma, Moisés jaiáimona caimo cuegáuai daide: Daa iima áiredimie ie úrue nai iñena llezica tíiadi, ie ama afe ofaiño óite. Aféngomona daa jitó comuírede ie ama tíidimie íena. Daí daina mei jicánotiaioi:

<sup>20</sup> ‘Mei nau siete dígade ámatiai cai cígimo ite. Nanóidimie áirede. Afémie jitónino tíide. <sup>21</sup> Nanóidimie emodo ímie ie ama fecingo ote. Daje izói jitónino tíide. Daje izói nanóidiaillinoi emodo ímie afe fecingo uano jitónino tíide. <sup>22</sup> Nana afe siete dígamiai nanóidimie fecingo otíaioi. Afémacimona daa jitona comuírede. Afe ícoimo afe fecingo tíide. <sup>23</sup> Ie jira meine abido cáalliruimo ¿bumo afengo dúide? Mei siete dígamie daango otíaioiza, —daidíaiioi.

<sup>24</sup> Mei jira Jesús fairíote:

—Omoi onóñeno fiēni comeci facádotiomoi, mei Juzíñamui Cuegáuaina onóñediomoiza. Daje izói ie ríinona onóñediomoiza. <sup>25</sup> Mei tíidino meine abido cáaille llezica aina óñeitiaioi. Afe izói íaiioi jízaniaina iníretatañeitiaioi, mei monamo ite Juzíñamui abi imáciai izóitiaioiza. <sup>26</sup> Mei íadi tíidino meine abido cáallifue dibénedo llogáfueña ¿nai facádoñediomoi? Afefue Moisés cuegánicomo ite. Aféruimo Juzíñamui Moisémo boode raroci cígido úrite. Bie izói íena daide: “Dáanomo Abraham ínoga Juzíñamuidicue, Isaac, Jacob diga, mei birui afémaci cue illánomo cue diga cáadiaioiza,” daí Juzíñamui daide. <sup>27</sup> Iemo Jesús nai daíoiide: Mei ua iñédino Juzíñamuiñedeza; mei íadi jáífodo cáadimaci ie Juzíñamui. Daí bífueña omoi baitáñenia iere féiraitiomoi, —Jesús ja dinomo daide.

*Iere jamánomo íñnorede caimo ocuica uai*  
(Mt 22.34-40)

<sup>28</sup> Afe dáaruido ocuica uai llófueraimona dáamie Jesumo dúcide. Jesumo gairídino nana Jesús diga úrilla uaina afémie cacade. Daje izói Jesús ñue íaiioi uaina fairíuana afémie cacade. Afe uai fairíuana fidíillano Jesumo jicánote:

—Nana ocuica uáimona, ¿nie iere jamánomo íñnorenna? —daide.

<sup>29</sup> Jesús ie uai ote:

—Nana ocuica uáimona bie iere íñnorede nánora uai: “Israel, mai omoi cácarei. Cai Ocuíraíma Juzíñamui jaca daade. <sup>30</sup> Mei jira nana o comécido o Ocuíraíma Juzíñamuina izíruiri. Daje izói o comécimo ite joreño diga izíruiri. Daje izói nana o ífo úrilla uaido íena izíruiri. Daje izói nana omo ite ríinodo íena izíruiri.” Be ñie nánora ocuica uai. <sup>31</sup> Afe méifoide ocuica uai daje izói jóide. Afe uai daide: “Dama o abi o izíruilla izói, afe izói o aino ímiēna mai izíruiri.” Jáie ocuica uai izoide bie baimo iñede, —daide.

<sup>32</sup> Iemona Ocuica uai llófueraíma daide:

—¡Ie mei! Llófueraíma, ñue daidío. O daina uafue. Uáfueña Juzíñamui daade. Afémie baimo jáímiēna iñede. <sup>33</sup> Daje izói afémiena nana cai comécido izíruillena ñuera. Ie llezica nana cai ífoci úrilla uaido íena izíruillena ñuera. Ie llezica nana cai comécimo itífuiaido íena izíruilla ñuera. Ie llezica nana caimo ite ríinodo íena izíruillena ñuera. Daje izói cai abi ímiēna dani cai abi izíruilla izói, afe izói íena izíruilla jitáirede. Bie izói cai izíruilla, aillo ráífide. Ua, nana fatá Juzíñamuimo fia fecaca rílleniai baimo ráífide, nana Juzíñamui ióbitallena jobaica rílleniai diga, —daide.

<sup>34</sup> Iemona baitádimie izói afémie ie fairíua uaina cacáillano, Jesús íena daide:

—Juzíñamuimo dúillena ímiēna íanori itío, —daide.

Afe mei jacíruillano buna jáíífueña Jesumo jicánoñediaioi.

*¿Bu jító Cristo? Jesús dama jicánote  
(Mt 22.41-46; Lc 20.41-44)*

<sup>35</sup> Jesús gairíracomo llófullofuena llezica, comínimo jicánote:

—Onódiomoiza ocuica uai llófueraini “Cristo David jító” daiífirediaioi. ¿Nie izói daiírede? <sup>36</sup> Mei dama David Juzíñamui Joréñodo úrite; daide:

—Monamo ite cai Moo Juzíñamui cue Ocuíraimana daide: “Cue nabézimo rainai, o éoigamacina cue anáfenolliruimo,” daií David daide. <sup>37</sup> David Crístona “cue Ocuíraima” daiíadi, ¿nie izói afe llezica Cristo ie jítone írede? —daide Jesús. (David emodo imácimona Cristo cómuide.)

Aféruído aillo comini, caimare Jesús úrilla cacáreizaibitiaioi.

*Ocuica uai llófueraini fieni illafue Jesús jino comínimo llote  
(Mt 23.1-36; Lc 11.37-54; 20.45-47)*

<sup>38</sup> Jesús llófullofuena llezica íaioina daide:

—Ocuica uai llófueraimona abí omoi rairuiri. Afémaci árera ñuera inícuero jítano comini uiécomo mácafírenana gáidiaioi. Afe llezica íaioi anamo comini fecáracuaimo ñue jacíruioicana íaioi uáiduana gáidiaioi. (Daje izói comini íaioi daináuai jiéruillena gáidiaioi.) <sup>39</sup> Afémaci Juzíñamui uai llófueraimo ite ñuera ráiranona raire jíaimaci uiécomo jenófirediaioi. Afe izói comini iráziracomo iráziadi, afémaci iere ñuera ráirano uiécomo maiñófirediaioi. <sup>40</sup> Afémaci fecínguai jofue naa íaioi raari bairófirediaioi; mei íadi comínimo jíáfodo afémiai cíoillena, are Juzíñamuimo úrioidiaioi, comini éoilla llezica. Afémaci iere jamánomo duere finócamacina jáitiaioi, —daide Jesús.

*Dúrede fecingo fecaca úcube jamánomo ñuera  
(Lc 21.1-4)*

<sup>41</sup> Iemo Jesús Juzíñamuimo gairíracomo ráicana eroide. Ucube dotárano uícomo ráide. Comini afénomo úcube dótajillamo eroide. Iere ráaredino aillo úcubena dotádiaioi. <sup>42</sup> Bie llezica fecingo dúredingo mena úcubetuni dótaibite. Bituni íaínguai ‘cobre’ ie; iere due ráifide centavo izoide. <sup>43</sup> Ie mei Jesús ie llófuegamaci jíirillano íaioina daide:

—Uáfueña ómoimo lloticue. Bie dúrede fecingo úcube jóoneracojimo dotaca úcube, iere jamánomo jíaimaci afénomo dotaca úcube baimo jaide. <sup>44</sup> Nana jíaimaci úcube fiévide államona dotádiaioi, mei íadi afengo duéredingo íadi, nana aféngomo ite úcube ie iga. Afengo güille óllena úcubena nana afengo ja dotaca, —Jesús daide.

## 13

*Gairíraco uire júdailleña Jesús ie llófuegamacimo llote  
(Mt 24.1-2; Lc 21.5-6)*

<sup>1</sup> Jesús gairíracomona jino billa llezica, ie llófuegamacimona dáamie íena daide:

—Llófueraima, ¡bie iere ñuera nófíemo eroi! ¡Daje izói bie jofo áilluemo eroi! —daide.

<sup>2</sup> Iemo Jesús uai ote:

—Mai bie áillue jófuemo ñue omoi eroi. Benomo daje emódomo nófíena fiébiñeite. Nana oni júdaille, —daide.

*Iraírui uícodo íitífuiái  
(Mt 24.3-28; Lc 21.7-24; 17.22-24)*

<sup>3</sup> Afe mei Olívona mameide ídumo jáidiaioi. Gairíraco uieco dibénemo ite. Afénomo Jesús ráiidemo, Pedro, Jacobo, Juan, íemo Andrés báinino íena daidíaioi:

<sup>4</sup> —Nana bífuiai o daina júdaille zuíllaruina onóiacadicaí. Mai caimo llone. Nana bífuiai fúiacana ¿nie izói caina onótaite? —daidíaioi.

<sup>5</sup> Jesús uai ote:

—Bu omoí jífueñeillena, ñue abí omoí rairuiri. <sup>6</sup> Aillo cue mámeçido imaci abí jítano bíitiaioí. “Cristodicue” ðainano bíitiaioí. Afémaci aillo comínina jífueitiaioí.

<sup>7</sup> ‘Mei íadi aillo ánorí ite fuiríllafuena, íemo jica ite fuiríllafue ðiga omoí fidíiadi, omoí jacínaiñeno iri, mei afe ðaí íredeza. Mei íadi nai íraíruiñedeza. <sup>8</sup> Mei aféruimo ðaa nairai jíai náraimo fuirízate. Afe llezica ðáazie jíáziemo jobáirizate. Aféruillaído ðiga illánomo énie riire dócaite. Dáaruído aillo júbie ðiga éniáido iite. Be aféfuiai comíni ðuere zefuille táinia raa.

<sup>9</sup> ‘Mei jira abí ñue omoí rairuiri, mei riire ocuídímaci gairíllanomo omoí uítiaioíza; Juzíñamui uai llófueriracomo ómoína fázitiaioí. Cue ícoínia ríillaini uícomo ómoína óreitiaoí, jamánomo ríiredillaini ðiga. Afe ðaí cue ðibéneño íaioímo úritiomoi. <sup>10</sup> Mei íraírui nai dúciñena llezica, cai jíllonafue uai nana náraimo jino llóredeza. <sup>11</sup> Ríiredillainimo omoí oreille llezica, omoí úrillifuemo raíre uícomo coméçido facáñeno omoí iri. Daje izóí omoí coméçillifuemo raíre uícomo uibíñoñeno iri. Aféruimo Juzíñamui omoí ífomo úrilla izóí, mai omoí ðaíri, mei ðani omoí úriñeitiomoi; omoí coméçimona Juzíñamui ie Ñuera Joreño úrite. <sup>12</sup> Afe llezica ðáamie nahí ie ámamo fiénidífue nítano jíaimiena ie fatátaite. Daje izóí móotiai nahí ie jítótiaína fiénidífuedo izájitaitiaoí, íaioí titállena. Afe íbana íaioí jítótiai, nahí ie móotiaimo fiénidífue nítano íaioí fáite titállena. <sup>13</sup> Cue ícoínia, nana comíni ómoína éoillano íere íáiruítiaioí. Mei íadi íraíruimo jaícina Juzíñamuimo íere féitañeno ínotímie jíllobicaite.

<sup>14</sup> ‘Jaiái Juzíñamui uai jino llóraíma Daniel ðaa íere íáiruiga raa ðibéneño cuete. Afe íáiruítate raa nabene jofue júðaitate. Afe fiénidífueña oruide raa Juzíñamuimo gairíracomo ite jeruícacomo jóonia llezica, Judea éniemo itino, áreña íduáimo botárediaioí. (Bibe facáðímie mai ñue onoiri.) <sup>15</sup> Aféruimo o jofu jínoífene ídamo omoí íadi, jofu eromo ite ráaniaína omoí uájíñeno iri; raíre botari. <sup>16</sup> Jacáfaimo tájídímie abído jofomo bíñeno iri, ie ínquíruai óllena. <sup>17</sup> Aféruimo ite ringóniai namóçireño íere ðuere zéfuitiaoí, aizínidiaioíza. Daje izóí monoi jirode ðuera úrue llííðingotiai ðuere zéfuitiaoí. <sup>18</sup> Ie jira Juzíñamuimo omoí jíçari, “Nóçí illáruillaído çaina botátañeno iri.” <sup>19</sup> Bie izóí ðuere zefuillíruina jaca jaiái íñide. Ua, Juzíñamui bínie íñuamona benomo afe izóí ðena íñede. Aféruillaí méífomo afe izóí íñeite. <sup>20</sup> Juzíñamui afe zúuredíruí are jóoneadi buna jílloneille. Mei íadi afémie níçéçanona ízíruillano íanori afe zúuredíruína afémie jóoneite. Are íñeite.

<sup>21</sup> ‘Temona aféruimo ðámie ómoína ðaíadi: “¡Eroçai, benomo ite Cristo!” áemo íñoñeno iri. Daje izóí jíaimie ðaíadi: “Eroi, batínomo ite Cristo,” áfena íñoñeno iri. <sup>22</sup> Mei uafue, aféruído aillo jífueritino bíitiaioí. “Cristodicue” ðáitiaioí. Daje izóí “Juzíñamui ðibéneño úritiaí” ðainano comínina jífueitiaioí. Afémaci çíoraínina ráaniaí fínoítiaioí, jíaie jacíredífuiaí ðiga, comíni jífuellena. Uafue, ðaje izóí ðama Juzíñamui níçéçanona jífueacadiaioí, afémaci ðaí jífuetareniadi. <sup>23</sup> Mei íadi mai ñue omoí coméçí facáoiri; mei nana bífuiaína jae uíçodo ómoímo llotíçueza.

*Monámona bite Nanoide Íma Jitó, Cristo meine bíllena Jesús llote*  
(Mt 24.29-35, 42-44; Lc 21.25-36)

<sup>24</sup> ‘Ie mei aféruillaído, zúuredíruillaí méífomo, jítoña ðubicaite. Fíui égaiñoñeite. <sup>25</sup> Monamo ite úçuai cóçitiaioí. Afe llezica mona eromo ite ríino mozíðino, maíríñeno jaillano dóçaitiaoí. <sup>26</sup> Iemo nauí monámona bite Nanoide Íma Jitó Cristo meine abído çíocaitie. Uíllie çígído bíite; aillo ríino ðiga. Jamánomo ebírenafuedo bíite. <sup>27</sup> Afe mei íe abí ímáçina óreite, nana íe níçéçamaci nana mona fuéðamona gairítallena. Ua jamánomo jica ite íçobiai ímáçimona níçéçano nana ðáanomo atille. Daje izóí énie fueða ímáçimona níçéçano nana ðáanomo atílliaoí.

Nai ie llófuegamacimo llófuiano, íaioina daide: <sup>28</sup> ‘Mai bie higuera amena rafue omoi onoiri. Afe higuera íbiai firuilla llezica fimona ánozillana onódiomoiza. <sup>29</sup> Daje izói nana bie zúurediruillai zuíllana omoi cíoiadi, írairui ánozillana onótiomoi. Jae iere íanori ite. <sup>30</sup> Uáfueña ómoína dáitícue, afe illáruído itino comini nai tíñenia, nana bifue zúite. <sup>31</sup> Nana mona énie diga fúite, mei íadi cue daína uai jaca ninomo méidonide. Cue llua izói zúite.

<sup>32</sup> ‘Mei íadi afe illíruina buna onóñena. Daje izói Juzíñamui abí imaci onóñediaioi. Ua afe izói Juzíñamui Jitó aféruina onóñede. Dama cai Moo Juzíñamui onoiga.

<sup>33</sup> ‘Te jira, aferui dúcinana onóñediomoiza, mai ñue figo abina omoi onoiri. Afe llezica mai ñue omoi uíñori. Daje izói Juzíñamuimo úrifireiri. <sup>34</sup> Cue meine billifue dáme jica jailla izoide. Aféme nai jáñenia íemo táijidinona ie jofo úiñotade. Illa dígamie dáarie tájillena igáiaioi. Iemo naze uíñoraíma jóoniano, íena riire ocuide, jofo uíñollena. <sup>35</sup> Afe izói mai omoi abí onóicana uíñori, mei jofo naama billirui ónoñegaza. Nibai nauíoilla llezica biite, nibai dáaferuimo, ónoñega. Nibai atava úrilla llezica, nibai jítiramo aféme biite; ónoñega. <sup>36</sup> Mai abí omoi onoiri, aféme raire bíadi, omoi iníllena ie cíñoíllena.

<sup>37</sup> Omoína cue daína izói nana comínina daidícue:

—Cue bíllemo abí omoi onoiri, —daide Jesús.

## 14

### *Comini Jesús llaitállena maméritiaioi* (Mt 26.1-5; Lc 22.1-2; Jn 11.45-53)

<sup>1</sup> Nai ménarui ite pascua ráfueño. Afe rafue llezica afénomo ite comini íaioi pan fáitara jóoneño gúifrediaioi, mei aféruillai fáitañega pan gúifrenafue. Lletáriraini illaini ocuícáfue llóraini diga Jesús jífuiado llaitállena jenódiaioi, ie titállena. <sup>2</sup> Iadi daidíaioi:

—Íráizie ana íena llaitánide; áfemo comini ficire júfidoñeilleza, —daidíaioi.

### *Ringo zióredijido Jesús ifona jillaide* (Mt 26.6-13; Jn 12.1-8)

<sup>3</sup> Jesús Betániamo ite. Simón jofomo ite. Afe Simón chíñaitimiena mameide. Güirácomo íaioi ráina llezica, daa ringo jamánomo ráifide ziórediji Jesumo jilláizaibite. Afe ziórediji duera alabastro daína nofici finoina icítirumo ite. Afe ziórediji mámece nardo. Afeji jáíena fáñega. Afengo afe icítiru llaillano, Jesús ifomo áfeji totade. <sup>4</sup> Afénomo itínomona dámerie áferi ráicaidiaioi. Dani conímana riire daidíaioi:

—¿Nibái mei bie ziórediji táinomo dotade? <sup>5</sup> Afeji trescientos romano úcubetuni baímo fecárede, duéredimacina canóllena, —daidíaioi. Aféngomo ráicaillano íáiruitiaioi.

<sup>6</sup> Mei íemo Jesús daide:

—Mai aféngona fáicanocai. ¿Nibái mei aféngona áfedodiomoi? Bie cuemo afengo finócafue ñuera. <sup>7</sup> Mei jii, duéredino jaca omoi cígimo íitiaioi. Omoi jítíadi afémacina canórediomoi. Mei íadi cue omoi cígimo are íñeíticue. <sup>8</sup> Afengo ñue cuemo finórede raa cuemo finuaibite. Jáíimaci cue raíájiñenia cue abímo zióredijina afengo cuemo jóoniaibite. <sup>9</sup> Uáfueña ómoína dáitícue, náganomo bie éniemo comini jílloille uai jino llóíadi, bie ringo cuemo finócafue jino llóitiaioiza, áfemona aféngomo úbicaifireillena.

### *Judas Jesús íena éoidimacimo izájide* (Mt 26.14-16; Lc 22.3-6)

<sup>10</sup> Ie mei Judas Iscariote lletáriraini illaini díne úrizaide, Jesús afémacimo izájillena. Afe Judas, doce dígamie Jesús llófuega ímie. <sup>11</sup> Afe illaini Judas dánana cacáillano, íóbidaioi. Afe jira íena daidíaioi: “Jesús caímo o atíadi, úcubena omo íbaiticai.” Iemona Judas nie izói Jesús íaioimo fecállena jenode.

*Jesús tirafuena güillafue**(Mt 26.17-29; Lc 22.7-23; Jn 13.21-30; 1 Co 11.23-26)*

<sup>12</sup> Fáitañega pan rafue nanóidiruimo oveja jiza fáfirediaioi, pascua ráfuego ríllena. Aféruimo jae dúcide. Aféruído Jesús llófuegamaci íemo jicánotiaioi:

—¿Ninomo pascua rafue uícodo cai finuaillena óiacadio, afénomo pascua ráfuego mameide güille cai güillena? —daídíaioi.

<sup>13</sup> Ie jira ie llófuegamacimona ménaillinoi óriano daide:

—Jófuemo jai. Dinomo jainoi icírudo uítimiena báitiomicoi. Iedo jairi. <sup>14</sup> Afémie jofo jáillanomo, afeco náamana daíri: “Llófueraíma daide, ¿Ninomo ite cue güillino cue llófuegamaci diga? Dinomo pascua rafue llezica güíticai daide.” <sup>15</sup> Jira afécona ómicoimo ácatajite, áillico. Caifóidícomo iite. Ja fuífide. Dinomo cáiena finori, —daide.

<sup>16</sup> Jira llófuega íaillinoi oni jaillano jófuemo dúcidiailinoi. Dúciillano uícodo Jesús íaillinoina daína izói baizájidiaillinoi. Pascua rafue ja finódiaillinoi. <sup>17</sup> Nauízaila llezica, Jesús doce diga ie llófuegamaciri dúcidiarioi. <sup>18</sup> Güirábanimo güitíaioimo Jesús íaioina daide:

—Uáfueña ómoína dáitícue, daa ómoimona, cue diga güitínomona cuena fécaite, —daide.

<sup>19</sup> Jira afémaci zúucaidiaioi. Afe llezica dáamierie Jesumo jicánotiaioi:

—¿Níbai cue? —daide.

Jiáimie daje izói daide:

—¿Níbai cue? —daide.

<sup>20</sup> Jira Jesús uai ote:

—Afémie daa ómoimona, bie doce dígamiedemona; ua cue birui diga dáajemona güitímacimona. <sup>21</sup> Nanoide íima Jitódicueza Cuegáuai lloga iodo jáidícue; ua cue tíillinomo jáidícue. Mei íadi cue fecádimie, ¡nii iere dúerena! Afe íima jócoñegana baimo ñue jaide, íadi jae comuide, —daide.

<sup>22</sup> Güitíaioimo, Jesús pan llínota daide:

—Iere figura, —daide. Daína mei ditade. Ditada íaioimo fécajano daide:

—Mai omoi güi. Bie cue abi, —daide.

<sup>23</sup> Iemo Jesús jiróracuri llínote. Afécuri vónona oruítaga. Ie mei:

—Iere figura, —daínano íaioimo ite. Nana afécurimona áfeji jiródiaioi. <sup>24</sup> Iemo daide:

—Bie cue die; áfedo comue dájemo llínoga uai uáfueña daíllena. Aillo nairai jíllollena cue die tóite. <sup>25</sup> Uáfueña ómoína daidícue, ja biruímona afe uva rao llizilla iji jíroñeítícue. Ua nágaruillaído Juzíñamui illáimana illirui nai biñena llezica jíroñeítícue. Aféruimo comóicana áfeji nane meine dáanomo jíroítícue, —daide.

*Pedro Jesuna jáanuana Jesús uícodo llote**(Mt 26.30-35; Lc 22.31-34; Jn 13.36-38)*

<sup>26</sup> Juzíñamui rua íaioi rua mei, jino Olivo daínádumo jáidiaioi. <sup>27</sup> Iemo Jesús daide:

—Bie naio, iomo come éicitaila izói, méicaillamona nana omoi cuena zóofeítíomoi. Cuegáuai daide: “Ovejai úñoraímana fáítícue; fállemona ovejai oni rájicaítiaioi.” <sup>28</sup> Mei íadi cáadimiena meine abido cue ille méífodo, omoi uiécomo Galiléamo jáitícue, —daide.

<sup>29</sup> Jira Pedro daide:

—Nana ona fáicanocaitiaioimo, jaca o fáicanocaiñeítícue, —daide.

<sup>30</sup> Iemo Jesús uai ote:

—Uáfueña dáitícue, bie naio atava ménacaiño nai úriñeniadi dacaiñoámani cuena jáanoitío, —daide.

<sup>31</sup> Mei íadi afémie iere afe íeñede úricana daide:

—O diga cue tíllena jitáíadi, nai ona jáanoñeítícue, —daide.

Nana daje izói daídíaioi.



*Jesús Getsemanimo Juziñamuimo úrizaide*  
(Mt 26.36-46; Lc 22.39-46)

<sup>32</sup> Iemo güiracomona jino billano Getsemaní ibírímo dúcidiaioi. Dinomo Jesús ie llófuegamacina daide:

—Bai bené Juziñamuimo cue úrizaiilla lezica, benó omoi ráiri, —daide.

<sup>33</sup> Iemo Pedro, Santiago, Juan diga uite. Jesús ja zuure cácaide; afémie aillo jaci cácade.

<sup>34</sup> Jira daide:

—Cue joreño iere zúureficaide; afe zuufue tílla izói cue orede. Benó omoi fiebi. Abí omoi onoiri, —daide.

<sup>35</sup> Iemo Jesús jabo baife jaide. Dinomo éniemo bíjicaillano Juziñamuimo jicade:

—Nana bie cuemo jíriacade raa cúemona oni o oréreadi, mai oni oreri, —daide. <sup>36</sup> Nai Juziñamuimo úrioicana daide:

—Cue Moo, ómona nana finórede. Bie iere zuure facállinomona cue zuitari. Mei íadi cue oíacana izói finóñeno iri, mei jíáifodo o oíacana izói finori, —daide.

<sup>37</sup> Iemo daámani llófuegamaci diné jaide. Inídiaioimo dúcide. Pédrona daide:

—Simón, ¿ja o iníidio? ¿Jaca due jiza abí onóoicana uíñonidio? <sup>38</sup> Abí omoi uíñori. Juziñamuimo úriri, fiénidifuemo omoi báññeillena. Uáfueña o joreño iere jíerede, mei íadi o abi náinide, —daide.

<sup>39</sup> Iemona dáanomo nane, Juziñamuimo úrizaide. Daje uáillaina daide. <sup>40</sup> Ie mei nane bítemo, ie llófuegamaci meine dáanomo inídiaioi. Daí afémaci íniamo, Jesús íaioina cíozabite, mei íaioi uíji ínie ibáicaza. Íaioi uai ollino íñede. <sup>41</sup> Ja dacaiñoámani Juziñamuimo úrillano bite. Billano íaioina daide:

—¿Mei nai birui iníidiomoi? ¿Nai ocózinaidiomoi? Jae mai. Nanoide Hima Jitódicueza, mei íadi fiénidimacimo cue itábicaillarumo ja dúcide. <sup>42</sup> Náidacai. Mai cai jai. Cue fecádimie ja bite.

*Jesús llaitádiaioi*  
(Mt 26.47-56; Lc 22.47-53; Jn 18.2-11)

<sup>43</sup> Ie lezica Jesús nai úritemo Judas dúcizaibite. Afémie doce dígadimacimona. Afémieoiri aillo comini bitíaioi. Lloefai bigíniai diga bitíaioi. Lletáriraini illáinimona bitíaioi. Dáarie bie comini ocuífue llófueraimona écomini diga bitíaioi. <sup>44</sup> Fecádimie Judas bimácimo ónoitara nauí lloga. Daide:

—Cue ñitállimie nímieite. Ie llaitari. Ñue maiano, ui, —daide.

<sup>45</sup> Iemo Judas billano, Jesumo ánozillano uáidote:

—¡Llófueraíma! ¡Llófueraíma!

Daí dainano ñitade. <sup>46</sup> Iemo Jesús llaitada, maiano, bitino íena uitíaioi. <sup>47</sup> Afe lezica dinomo itinomona dáamie lloefai otá daa bitímie jefo ñetade. Afe jefona ñetácami lletáriraini illaíma jaiénici. <sup>48</sup> Iemo Jesús comínina daide:

—¿Meita meríriraímadicue izói lloéfaillairi bigíniai diga cuena lláitaibitíomoi maiano cue uíllena? <sup>49</sup> Nágari ómori Juziñamuimo gairíracomo llófuecana iticue; íadi jaca cuena llaitáñediomoi. Mei íadi bifue íficaide Cuegáuaillai fuitállena, —daide. <sup>50</sup> Iemona nana llófuegamaci íena fáicanocaillano botádiaioi.

*Da Jesudo jáicaide jitócome botade*

<sup>51</sup> Mei íadi da jitócome dama áillue iniroi jitada nai Jesús óodana jáicaide. Ie mei bitino íena llaitádiaioi. <sup>52</sup> Mei íadi afémie jarire duíñuano aferoi íaioimo fainóicaide. Daí ñeta emuíroma jarire botade.

*Jesús jicánodoillinomo uiga*  
(Mt 26.57-68; Lc 22.54-55, 63-71; Jn 18.12-14, 19-24)

<sup>53</sup> Iemo judíu*ai* lletáriraini caifóidilla*mamo* Jesús uití*ai*o*i*. Afe llezica nana lletáriraini illaini, íemo éicomini, íemo ocuica uai llófueraini diga, dáanomo gairídi*ai*o*i*. <sup>54</sup> Pedro, afe jamánomoidilla*ma* jofo abi ibírimo, óodana jicado jaide. Dinomo llai*z*íriraini diga ráide; irai fuemo agaide abi uzíreillena. <sup>55</sup> Nana lletáriraini illaini jamánomo ocuíd*im*aci diga Jesumo fi*eni* íai*o*i facátallena uai nabáidino jenódi*ai*o*i*, áfedo íena titállena. Mei íadi áfena baiñéd*ai*o*i*. <sup>56</sup> Aillo íemo taino llotí*ai*o*i*. Iadi íai*o*i táinofui*ai* jaícina jóobiñede. <sup>57</sup> Iemo dáarie caifo náidacaillano, afémiemo taino fiénidifue nitádi*ai*o*i*. Daidí*ai*o*i*:

<sup>58</sup> — Afémi*e* dáinana cacádic*ai*: “Bie comini finoca gairíraco júdaiticue, íemo daruíamani íllemona jíai gairíraco comini finóñegaco abido níiticue,” daide, —daidí*ai*o*i*.

<sup>59</sup> Mei íadi nane íai*o*i lloga uai nabáillafui*ai* jaícina jóobiñede. <sup>60</sup> Iemo lletáriraini illa*ma* íai*o*i cígimona jino náidacaillano Jesumo jicánote:

—¿O uai óñeitio? ¿Minica bie omo nitádi*ai*o*i*? —daide.

<sup>61</sup> Mei íadi daa uai oñede. Iemona lletáriraini illa*ma* nane dáanomo jicánote:

—¿O Crístodio? ¿Afe cai ñúefuena nitaca Juzíñamui Jitódioza? —daide.

<sup>62</sup> Jira Jesús daide:

—Jii, ie mei. Nanoide íima Jitódicue. Uire uáfuena cuena cíoitio*mo*i. Ua ríirede Juzíñamui nabézimo dinomo cue ráinaillana cíoitio*mo*i. Aféruillaído mona ero úilliedo cue bíllana cíoitio*mo*i, —daide.

<sup>63</sup> Lletáriraini illa*ma* jamánomo ríicaillano icírillamona ie iniroi cúatajano daide:

—¿Níbái mei jíai*e* uai nabáira*ma* jítaíticai? <sup>64</sup> Ja Jesús ie uáillaído Juzíñamui dibénemo fi*eni* úrillana cacádi*o*mo*i*. ¿Omo*i*, nie izó*i* íena daidí*o*mo*i*? —daide.

Iemona nana íena titállena daidí*ai*o*i*. <sup>65</sup> Iemo dámierie afémiemo túallaitia*o*i. Afe llezica ie uíeco iníroina íbáillano, íena fatí*ai*o*i*. Fájano daidí*ai*o*i*:

—¡Mai bai! ¿Bu o faja? —daidí*ai*o*i*.

Iemo llaitáidino ie uíeco túcoidia*o*i.

### *Pedro Jesús jáanote*

*(Mt 26.69-75; Lc 22.56-62; Jn 18.15-18, 25-29)*

<sup>66</sup> Pedro ana jofo ibírimo ite. Iemo daa lletáriraini illa*ma* canóraingo afénomo dúcide.

<sup>67</sup> Pedro irai fue agáillana cióillano, afengo afémiemo ríire eroide. Iemona daide:

—O daje izó*i* Nazarena ímie Jesús diga macáfiredio, —daide.

<sup>68</sup> Mei íadi Pedro jáanuano daide:

—Aféfuena fidíñedicue. Miníicado úritio onóñedicue, —daide. Daina mei afémi*e* naze fuemo jino jaide. Iemo íítava úrite.

<sup>69</sup> Iemona canóriraiingo íena nane cíoillano afénomo itínona daide:

—Afe íima Jesudo jáidimacimona, —daide.

<sup>70</sup> Mei íadi Pedro meine jáanote. Ja baido afénomo itino Pédrona nane daidí*ai*o*i*:

—Uáfuena. O Jesús imaci íédio. Galilea ímiedio. O úrilla afémaci úrilla izó*i* jóoide, —daidí*ai*o*i*.

<sup>71</sup> Ie jira Pedro: “Uáfuena cue llóñenia Juzíñamui cue fáidoiteza,” daide. Dáanomo Pedro ie daina uai nabáillena Juzíñamui mámedido ríire mámano daide:

—Afe omo*i* úrillamiena onóñedicue, —daide.

<sup>72</sup> Daí daina llezica atava dáanomo nane úrite. Iemona Jesús íena daináfuemo Pedro uíbicaide. Nano uícomo íena daide Jesús: “Atava ménacaiño nai úriñenia dacaiñoámani cuena jáanoitio.” Afemo comeci fácajano éeiaide.

## 15

### *Jesús onínella*ma* Pilátomo uití*ai*o*i**

*(Mt 27.1-2, 11-14; Lc 23.1-5; Jn 18.28-38)*

1 Afe jítiramo lletáriraini illaini íemo eicomíniri gairízaidiaioi, ocuica uai llófueraini diga; ie emódomo naa jíáie jamánomoidillainiri. Gairíllano Jesumo íaioi finóllifueri dani úritiaioi. Maiga Jesús Pilátomo izájidiaioi. 2 Jira Pilato jicánote:

—¿O meita judío illáimadio? —daide.

Iemo Jesús uai ote:

—¡Ie mei! Daí jaca o daina izói, —daide.

3 Iemo lletáriraini illaini aillo fiénidifuaiaí afémiemo nitade. 4 Jira Pilato dáanomo jicánuano daide:

—¿O uai oñedio? ¡Cacai! Diga fiéniduiuai omo nitádiaioi, —daide.

5 Mei íadi Jesús uaina oñede. Aféme uai oñenamona Pilato fáigacaide.

*Jesús ie tiállena uáfodo maméritiaioi*

*(Mt 27.15-31; Lc 23.13-25; Jn 18.38–19.16)*

6 Afe rafue ana naga fimónado comínimona llogámie llaitácamiena Pilato zuitáfirede.

7 Come fatímie Barrabás jae llavéracomo ite, jíáie come fatímaci diga. Nano jíáiruido illaíma dotátaruimo comíni fatíaioi. 8 Ja birui comíni Pilátomo jícaíbitiaioi. Billano Pilato íaioimo finófirena izói ie finóllena jicádiaioi. 9 Pilato uai ote:

—¿Judíuai Illaíma ómoimo cue zuitállena jítáidiomoi? —daide.

10 Pilato ja lletáriraini illaini Jesús úradoillafuedo fécajana fidide. 11 Mei íadi lletáriraini illaini nana comíni jeire otímaci. Iaioi úamona iere caillídimaci. Iaioina llófuetiaioi:

—Jesús ifomo mai Barrabás caimo zuitállena izire omoi jicari, —daidiaioi.

12 Jira Pilato jicánote:

—¿Nie izói oíacadiomoi omoi mamécamié Judío Illaíma cue finóllena? —daide.

13 Iemo caillíoicana uai otíaioi:

—¡Cruzmo íena coraí! —daidiaioi.

14 Jira Pilato daide:

—¿Nibái mei? ¿Aféme nie fiénidifue finode? —daide.

Nane dáanomo baimo caillíoicana daidiaioi:

—¡Cruzmo íena coraí! —daidiaioi.

15 Iemona Pilato nairai uiécomo ñue íacanamona, Barrabás zuitada orede. Iemo Jesús zechétajano llaíziritinomo izájide íena coráillena.

16 Ie mei afe onínellaíma áilloco jofo ibírímo íena uitíaioi. Afénoimo nana fuiríraini gairítatiaioi. 17 Iemo ñue jáirede inícuíro, illaíma íena, afémiemo jítádiaioi. Aferoi uállaíma jítáfiregaroi. Afe llezica ifo icuífoi eegi nínacuífoina íemo jítádiaioi. 18 Jítajano janónaioicana riire íena uáidotiaioi; daidiaioi:

—¡Figo o iri, Judíuai Illaíma! —daidiaioi.

19 Iemo rázido diga icaiño ie ifo butíaioi. Ie túallaítiaioi. Afémiemo caiñici ana dújullano jifánodoicana íena ebíruitiaioi. 20 Daí ie íaioi áifedua méfodo, afe illaíma jítácaroi íemona duiñódiaioi. Dúíñuano dama íecuirona ie jítádiaioi. Ie mei afénoimo jino íaioi uiga íena coráiaillena.

*Jesús coráina*

*(Mt 27.32-44; Lc 23.26-43; Jn 19.17-27)*

21 Jesuna coráiaidiaioimo Cirene ímie Simón jinona jófuego bite. Aféme Alejandro Rufo íaillinoi moo. Bítemo Jesús coráillibicina rocátatiaioi.

22 Iemo Jesús Gólgota maméidinomo uitíaioi. Afe Gólgota jíáimaci uaido ífócoraí Illánona mameide. 23 Afénoimo vino erírediji diga jóonegana Jesús jirótatiaioi. Mei íadi aféme jiróñede. 24 Afe mei ja Jesuna coráidiaioi. Iemo fuiríraini onótaraji dotádiaioi, Jesús inícuíro íaioi máíñuana onóillena. Iemona dájerize illa dígamie ie inícuíro uite.

25 Jae jitoma caifo illa llezica Jesús coráidiaioi. 26 Jesús coráigabicimo jiáie uai llotíbicina netáidiaioi. Afébicimo nie íaifue ie fínua jira coraica, daí íaioi cuega. Bibícimo cuetíaioi: “Bímie Judíuai Illaíma.” 27 Afémie diga mena meríriraíma íaillinoi coráidiaioi, dámie ie nabénemo, jiáimie ie jarífenemo. 28 Jaíai Cuegáuai daí fúbicaide. Aféuai daide: “Afémie fiénidimacimo jaináitaga.”

29 Afe iodo jáidino Jesumo fiéni úritiaioi. Fuena iere riire íena zanóidiaioi. Daídíaioi:

—Mai, cacai. O Juzíñamui gairíraco ana júdaítimiedioza. Daje izói daruiámani íllado abido afeco níitimiedioza. 30 ¡Mai dama o abi jíllota! ¡Crúzmona ana bi! —daídíaioi.

31 Daí daje izói lletáriraini illaini, ocuica uai llófueraini diga, Jesuna janónaitiaioi. Dani conímana daídíaioi:

—Afémie jiáimaci jíllotate, íadi afémie dama ie abina jíllotanide. 32 Mei birui Cristo, Israel Illaíma ana crúzmona bíadi, áfena cai ciónamona afémie uaina ja uáfueña ínoiticaí, —daídíaioi.

Daje izói afémie diga coráicaiaillinoi fiéni Jesumo úritiaioi.

### *Jesús tílla*

*(Mt 27.45-56; Lc 23.44-49; Jn 19.28-30)*

33 Jaíciri illa llezica nana énie jítfeficaide. Dahoraámani fidi monáíñede. 34 Afe llezica Jesús riire cáilliano daide:

—Eloí, Eloí, ¿lama sabachtani? —afe uai dobáíñuana daide: ¡Cue Moo Juzíñamui, Cue Moo Juzíñamui! ¿Níbái cue zóofetio? —daide.

35 Dámierie afénomo itínomona áfena cacáillano daide:

—Cacarei, afémie Juzíñamui uai jino llóraíma Elías jírite, —daídíaioi.

36 Iemona afémacimona dámie aizida fíllicide raa uájide. Erírede vínona riáitano, áfena ragüizi ícoimo jóonete, áfede Jesús jírotallena. Daí ñeta, íemo ñuitade. Afe llezica jiáimaci íena daide:

—Ína jabe. Mai cai éroi, neca afémie Elías ana ólleza, —daide.

37 Ie mei Jesús riire caillida tíide. 38 Afe llezica Juzíñamui gairíracomo zebica jédaciede iníroi, dáfenedo caifófenemona ana cuáijicaide.

39 Jesús anamo romano jabóidillaíma uíeco dibénemo naidaide. Ie cáilliana cacade. Ie tílla izóidena ciode. Ciuano daide:

—Uafue, bie íima Juzíñamui Jitó, —daide.

40 Dáanomo dáarie ringóniaí jicana eróiediaioi. Íaioi cígimo ite Magdalena jofue ingo María, íemo Salomé, íemo jiáie María. Afengo Santiago José ei. Afe Santiago jofófene ímiena mameide. 41 Bie ringóniaí Jesudo jáicadino. Naui Galiléamo ie illa llezica, afémaci íena canóidiaioi. Mei íadi bimaci baímo aillo jíáingotiaína, Galilea ingóniaí afémiedo Jerusalemo bitíaioi.

### *Jesús abi raíáfomo jóoniaidiaioi*

*(Mt 27.57-61; Lc 23.50-56; Jn 19.38-42)*

42 Ja nauízaide. Mei aferui ocózinallarui uícodirui íllaza, comíni íaioi jitaille raa finófrediaioi. 43 Jira José Pilátomo Jesús abi jícajide. Afe bie José Arimatea jofue ímie. Afémie caifóidillaímaíaimo iere jaináideza, ie mámeceí jica jalleide. Afémie Juzíñamui illáimana illíruina ñue uíñote. Afémie abi mámano jáicaiñeno Pilato illánomo jaide. Dinomo Pilátomona Jesús abi jicade. 44 Pilato ja ie raire tíllari fáigacaide. Jira jabóidillaíma uáidote íemo jícanollena meita uafue daíllena. 45 Jabóidillaíma “J#” dáinamona Pilato fairíote Jesús abi José uíllena. 46 Jira José iere ñuera iníroi íbade. Iemo Jesús abi ana uáno, aféroido junide. Iemona idu ana noficeí ero raigácomo ite raíáfomo íena

jóoniaide. Jóoniano raigaco áillue nofícina ibaide. <sup>47</sup> Magdalena ingo María, José ei María diga, afe raiánona ciódiainguai.

## 16

### *Jesús tíidemona meine abido cáadimiena jaide* (Mt 28.1-10; Lc 24.1-12; Jn 20.1-10)

<sup>1</sup> Ocózinallarui méifomo Magdalena énie ingo María, Santiago ei María, Salomé diga zíoji ibádiaioi, Jesús abi recuállena. <sup>2</sup> Jira semana nanóidirui jítiramo raiáfomo jáidiaioi. Afe llezica jitoma ja ciode. <sup>3</sup> Iemo ringóniai dúciillano conimana daidíaioi:

—¿Bu mei raiáfo uieco ibaina nofici cairi oni ñuitalle? mei afeci iere áillueza, —daidíaioi.

<sup>4</sup> Mei íadi érocaillano raiáfo uieco ibaina áillue nofici oni jóoniana ciódiaioi. <sup>5</sup> Iemo raiáfo ico eromo íaioi jáillanomo jitócome nabézimo ráinana ciódiaioi. Afémie árecuiro úzeroi jítáoide. Ieri iere jacínaitiaioi. <sup>6</sup> Jira ringóniaina daide:

—Omoi jacínaiñeno iri. Omoi Jesús, Nazaret ímie naui coráicamie jenódiomoi. Mei íadi ja tíidemona meine abido cáadimiena jaide. Benomo iñede. Afémie íaioi jóoniano omoi eroi. <sup>7</sup> Ie mei Pédro mo naa jiáie llófuegamaciri lluájiri. Afe bifue daíri: “Omoi uícomo Galiléamo jaide. Dinomo ie daina izói íena cióitiomoi,” —daide.

<sup>8</sup> Jira ringóniai raiáfomona botádiaioi. Fáigacaillano cuidíritiaioi. Iere íaioi jacíruillamona bummo lloñediaioi.

### *Magdalena énie ingo Maríamo Jesús cíocailla* (Jn 20.11-18)

<sup>9</sup> Semana nanóidirui monáiacana llezica, Jesús meine abido cáadimiena jaide. Afe mei fueñe Magdalena énie ingo Maríamo afémie cíocaide. Naui afémie aféngomona siete diga fiénide jóríai oni orede. <sup>10</sup> Iena ciona mei, afengo Jesús diga naui jáicadinomo lluájide; afémaci nai zuure éenaitiaioi. <sup>11</sup> Afe Jesús meine caade íllana María íaioimo llote, mei íadi aféfuena cacáillano, áfena nai íñoñediaioi. Daje izói afengo “Iena ciódicue” daina uaina íñoñediaioi.

### *Jesús llófuegamacimona ménaillinoimo afémie cíocailla* (Lc 24.13-35)

<sup>12</sup> Bie mei, Jesús llófuegamacimona ménaillinoi jofue onimo mácajidiaillinoi. Mácajilla llezica Jesús jiáifodo íaillinomo cíocaide. <sup>13</sup> Afe íaillinoi jiáie llófuegamacimo abido lluájidiaillinoi, mei íadi daje izói íaillinoina íñoñediaioi.

### *Jesús ie uai oni llóllena orécamacimo ie uai jóonenocaide* (Mt 28.16-20; Lc 24.36-49; Jn 20.19-23)

<sup>14</sup> Afe jiáiruido once diga llófuegamaci íaioi güiránomo ráidiaioimo Jesús cíocaide. Íaioi comeci ríirena jira, íaioina lletade. Dáanomo íaioi íñoñena jira, íaioina lletade, mei afe íena ciódino íaioimo llógana íñoñediaioiza. <sup>15</sup> Ie mei íaioina daide:

—Mai nágagobiaido bie jílloille uai nana comínimo jino omoi lluájiri. <sup>16</sup> Afe uaina íñoitímie íemo báutigagamie jíllobicaite. Mei íadi afe uaina íñoñeitímie jílloñeno duere finócamiena jáite. <sup>17</sup> Cuemo íñoitino bie onótarafuiai fínoitiaioi, afe lloga uai uafue daíllena. Cue mámecido fiénide jóríairedímie ite fiénide jóríai oni óreitíai. Uícodo óñoñega jiáie uáillaído úritiaioi. <sup>18</sup> Daje izói titade jaio íaioi llaitada íaioina ainíadi, tíñeitiaioi. Jucúrediji íaioi jiróadi, iránitañeite. Afe emódomo, iráredimacimo íaioi onoi bitáadi, afe iráredino jílloitiaioi.

*Jesús monamo jailla*  
(Lc 24.50-53)

<sup>19</sup> Afémacimo úrilla mei, cai Ocuíraima Jesús fiaicana caifo monamo uiga. Iemo Juzíñamui nabézimo ráinazaide. <sup>20</sup> Ie mei ie llófuegamaci nágagobiaimo comini jílona uai llocana uitíaioi. Afe dáamie, cai Ocuíraima, íaioiina canode. Afe llezica afémie íaioi lloga uaina cíofinina íaioi finócafuiado uáfuenta daiítate; daje izói diga onótatifuiado uáfuenta daiítate. Jae nñe.

## JUZÍÑAMUI ÑUEFUE SAN LUCAS LLOGAFUE El Santo Evangelio Según San Lucas

### *Rafue uiécodo llogáuai*

<sup>1</sup> Cue ama izóidimie Teófilomo cueticue. Diga comini caimo comuide ráfuiái ñue jaícina cúellena facádiaioi. <sup>2</sup> Afe comuídifuiái táiniamona, áfena ciódino caimo llua izói, cuetíaioi. Afeniaina ciódino ñúefuiái jino llóllena canódiaioi. <sup>3</sup> Afe izói nana bífuiaina ñue jicánofiredicue. Uáfueza, bífuiái táiniana iere jicánofiredicue. Ie jira omo cueticue. Iemona bífuiái jaícina omo cue cúellena cuedo ñue jaide, mei ñúefuiairedimie Teófilodioza. <sup>4</sup> Bífuiái omo cúeiacadicue, afémaci omo llogafue uáfueza o onóillena.

### *Juzíñamui abi ímie Juan Bautista jocoille llote*

<sup>5</sup> Herodes Judea éniemo illáimana illa llezica, afénomo Zacaríasna mámeciredimie ite. Afémie Juzíñamuimo comini dibénedo úriraima. Afe Zacarías jaiaí ímie Aarón jitó, Abías iziemo dúidimie. Ie ai mámece Elisabet. Afengo daje izói Aarón iziemona comuídingo. Afe Aarón nánora Juzíñamuimo úriraima. <sup>6</sup> Afe íaillinoi Juzíñamui eróicana ñue jaícina itíaillinoi. Juzíñamui ocuica uai jeire ófirediaillinoi. Ie jira afe íaillinoimo buna fiénidena jitánidiaioi. <sup>7</sup> Mei íadi úruenidiaillinoi, mei Elisabet úrueninide. Iemo jiái jae iere jónaitiaillinoi.

<sup>8</sup> Iemo daarui Abías izie táijinaruillaimo dúcina llezica, Zacarías Juzíñamuimo úriraimana illena afémiemo dúcide. <sup>9</sup> Iemo afémaci finofirena izói, íaioi níziamona, uguci uillítallena Zacaríasmo baite. Ie jira afémie Juzíñamuimo gairíraco rairuíredinomo jofo jaide, afénomo uguci uillítallena. <sup>10</sup> Afémie uillítata llezica, nana comini jinófenemo Juzíñamuimo úritiaioi. <sup>11</sup> Iemo Juzíñamui abi ímie, ángel daínámie Zacaríasmo cíocaide. Afémie uillítarano nabéfenemo cíocaide. <sup>12</sup> Juzíñamui abi ímie cíoillano Zacarías iere jacinaillano ie finóacaigana onóñede. <sup>13</sup> Iemo Juzíñamui abi ímie íena daide:

—Zacarías, jacíruiñeno iri, mei Juzíñamuimo o jícafírenana afémie cacádeza. O ai Elisabet jitóreite. Afémie mámece Juaana o jítalle. <sup>14</sup> O íóbito, daje izói aillo comini o úrue jocólleri íóbitímaciza, <sup>15</sup> mei o jitó Juzíñamui uiécodo iere uai ínotimiena mámeiteza. O jitó comini jifáitaraji vino diga jaca jíroñeite. Afémie nai jócoñenia Juzíñamui Ñuera Joreño úicaite. <sup>16</sup> Afémie Israel náiraimona diga comini comeci ífuiái méidotaite, afémaci ócuifírede Juzíñamui uaimo meine ñue íaioi jíruillena. <sup>17</sup> Bie Juan Ocuíraima Cristo uiécodo biite. Afémie jaiaí Juzíñamui uai lloraima Elías coméciifirena izói coméciite. Daje izói Elías riire ocuilla izói riire ócuite, ie uaido móotiaí íaioi úruiaí diga caimare íaioi itátallena. Daje izói uaina náfueñedino afémie afe uaina jeire otátate. Bie izói afémie comini ñuemacina íaioi fínoite, Ocuíraima Jesús ñue llínollena.

<sup>18</sup> Juzíñamui abi ímie úrilla llícailla mei Zacarías jicánote:

—¿Ñie izói bífuenta uáfuenta onóredicue? mei ja iere jónaiticue, cue ai diga.

<sup>19</sup> Juzíñamui abi ímie uai ote:

—Gabriéldicue. Juzíñamui ócuifíregamiedicue. Ie orécamiedicue omo úrillena, bie ñúefuiái omo llóllena. <sup>20</sup> Mei íadi birui omo cue daínana o ínoñenamona uáinitio. Benómona úriñeítio o jitó jocóllinomo. Bie Juzíñamui mamécaruimo zúite.

<sup>21</sup> Afe llezica comini jino itíaioi; Zacarías úiñotiaioi. Afémie are jino gairíracomona biñena jira jacinaioidiaioi. <sup>22</sup> Iemo Zacarías jino bítemo ja úrinide. Afemona afémie gairíraco eromo rairuícanomo nicáirilla izói nibai ciode daidíaioi. Afémie onoi níraidua izói afémacimo úrite, mei afémie úrinideza.

<sup>23</sup> Juziñamui gairíracomo Zacarías táijinaruillai fúillamona, ie jofomo jaide. <sup>24</sup> Bie mei ie ai Elisabet ja úruereacade. Afengo jofómona cinco diga fiui uáfori jino cióñede. Afengo comécido daide: <sup>25</sup> “Juziñamui ja bie izói cuena úrueretade, íemona comini cuena jámairuíñeitiaioi,” daide.

### *Juziñamui abi ímie Jesús jocoille llote*

<sup>26</sup> Ja seis diga fiui Juan comuíllamona, Juziñamui ie abi ímie Gabriel, Galilea éniemo ite Nazaret mámecirede jófuemo orede, daa ringo méiñollena. <sup>27</sup> Afengo nai inínide jitaingo. Ie mámece María. Afengo ja jicánogango Josemo iníreillena. Afe José illaíma David izíemona comuídimie. <sup>28</sup> Juziñamui abi ímie afengo illánomo jofo jaillano daide:

—¡Ona uáidotícue, Juziñamui ñue finócangodío! Ocuífiredede Juziñamui o diga ite. Nana ringóniaí baímo Juziñamui caímare omo eroide, —daide.

<sup>29</sup> Mei íadi afengo Juziñamui abi ímie cióillano, afe ie uáimona iere fáigacaide. Iemo afengo comeci anado jicánote, “¿Ñibái cuena daíí uáidote?” <sup>30</sup> Ie jira Juziñamui abi ímie íena daide:

—María, jacíruiñeno, mei Juziñamui caímare omo eroide. <sup>31</sup> Benómona úruereitío, íemona o jító jócoitío. Afémie mámece Jesuna jítaitío. <sup>32</sup> Afémie ñúefuena iere jálleite. Afémie caífo monamo ite Juziñamui Jitóite. Naui Juziñamui bínie jaiáidigíma David illáimana ória izói, bie Jesuna Juziñamui illáimana óreite, <sup>33</sup> jaca ninomo Israel náiraimo illáimana íllena. Ie illáimana íllana jaca ninomo fúíñeite, —daide.

<sup>34</sup> Ie jira María Juziñamui abi ímiemo jicánote:

—¿Ñie izói bie mei ite, mei cue íima diga íñédícueza? —daide.

<sup>35</sup> Juziñamui abi ímie uai ote:

—Juziñamui Ñuera Joreño omo itábicaite. Iemo caífo monamo ite Juziñamui ie ríinodo ona ráiruite. Ie jira o jocolle jító jaca Juziñamui mamécamiéna ite. Iemona comini íena Juziñamui Jitó dáítiaioi.

<sup>36</sup> Iemo jíái o onógango Elisabet úruereite, jamánomo ei ringo íadi. Ie jira úruenitíngo íaioi daínango íadi, seis diga fiui íllamona ja úruereacade. <sup>37</sup> Juziñamuijona jaca finónide raana íñede, —daide.

<sup>38</sup> Ie jira María daide:

—Juziñamui ócuífíregangodícue. Mai mei Juziñamui cuena ie daína izói cuemo fínoíteza, —daide.

Afemona Juziñamui abi ímie oni jaide.

### *María ie onógango Elisabet uáiduaide*

<sup>39</sup> Aféruillaído María Judea íduai cígiri ite jófuemo raíre jaide. <sup>40</sup> Dúciillano Zacarías jofomo jaide. Daíí ñeta Elisabet uáidote. <sup>41</sup> Elisabet daíí uáidua cacáillano eromo ite úrue niráírícaide. Afe llezica afengo Juziñamui Ñuera Joréñodo úicaitaga. <sup>42</sup> Ie jira iere ficírede uaido úrite:

—Nana jíáíngotiaí baímo Juziñamui iere caímare omo eroide, ñúefue omo finóllena. Daje izói o jítomo iere caímare eroide. <sup>43</sup> Iere jamáíngodícue, mei íadi cue Ocuíraíma ei cue erózaíbite. <sup>44</sup> Mei ua, o cue uáidua cacáillano cue eromo ite jító iere íóbillano niráírícaide.

<sup>45</sup> Juziñamui ona daína o íñuado iere íóbinangodío, mei Juziñamui ona daína ñue zúíteza.

<sup>46</sup> Ie jira María daide:

—Cue joréñodo caí Ocuíraímamo ñúefue llotícue.

<sup>47</sup> Cue Jíllotaráíma Juziñamuijimo cue comeci íóbicaide.

<sup>48</sup> Mei Juziñamui ie dúeredede ocuícáíngona uibíoicaideza.

Biruímoma nana uire íite comini “Iere Juziñamui íóbitagangodío” cuena dáítiaioi.

<sup>49</sup> Mei jamánomo ríinorede Juziñamui iere ñúefuiaí cuemo finódeza.

Afémie mámece ñúefuiaído jacíruieregaci.



50 Nana íena ñue jacíruitinona afémie jaca dúecaite.

51 Finónide ráfuiái afémie finode.

Fiénidena abi ínotinona afémie jae anáfenode.

52 Ríillainina jamáimacina Juzíñamui finode.

Mei jíáfodo comécina mánaidino illáinina orede.

53 Jufíruitinona afémie ñúefuiáido imaci jeírítade.

Mei jíáfodo ráaredinona fia duere imácina orede.

54 Ie ócuifiregamaci Israel nairai afémie canode.

Iaioina duéruillena féitañede.

55 Naui cai móotiaina daina izói jaca duéruifireite.

Ua, Abrahana ie daina izói, íemo ie náiraina daina izói afémie jaca caina duéruite.

Bie izói María úrilla fuite.

56 María daámani díga fiui Elisabet díga ite. Afe mei meine ie jofomo jaide.

### *Juan Bautista jocóinafue*

57 Afe mei Elisabet úrue jocólliruimo dúcinamo, jító jocode. 58 Juzíñamui ñue aféngomo érocaillano fidíillano, afengo abi imaci naa onógamaciri afengo uáiduidiaioi. 59 Ocho dígarui íllamona, judíuai fínofirena izói, garíracomo jáidiaioi úrue bacano icoi quetállena. Afe llezica ie moo mámecina Zacaríasna jítáacadiaioi. 60 Mei íadi ie ei daide:

—Ieñeite. Afémie mámecei Juaana jítalle, —daide.

61 Aféngona daidíaioi:

—¿Ñibái mei? O comínimo afe bie mámecei íñede, —daidíaioi.

62 Ie jira onoi níraiduado úrue moomo jicánotiaioi, nie izói mámecei jóoneacade. 63 Ie jira afémie daa cuerábici jicade áfemo cúellena. Líinuano cuete: “Ie mámecei Juan.” Aferi nana comini jacínaitiaioi. 64 Afe cuia llezica Zacarías meine nane úrerede. Jira raire Juzíñamuimo ñúefuiái lloté. 65 Bíeri nana abi imaci jacínaoidiaioi. Iemo nana Judea íduai éniemo bifue llócadiaioi. 66 Nana áfena fidídino áfemo iere comécidiaioi. Dani íaioi nabáitíai jicánotiaioi.

—¿Bie úrue minícamiena jáite? Mei uafue, Juzíñamui afémiemo iere caimare eróideza, —daidíaioi.

### *Zacarías ñue llocana dainafue*

67 Iemo ie moo Zacarías Juzíñamui Ñuera Joreño úicaillamona úrite; Juzíñamui íemo lloga uaido afémie daide:

68 Israel nairai cai ócuifirede Juzíñamuimo ñúefue nitárede, mei afémie caimo éroizaibiteza. Ja ie comínidicai, íemo afémie ja cai jíllotaibiteza.

69 Jaiai ie ocuífiregamie David izíemona, daa ríinorede cai jíllotaraima caimo orede.

70 Jaiai ñúefuiáirede ie uai llórainido úcodo ie daina izói afémie cai jíllotaraimana orede.

71 Afémie cai fairíconimona caina jíllotaite. Daje izói cai éoidimacimona cai jíllotaite.

72 Cai nánoramacina duéruite, afe izói ie íaioina ñúefuiáirede daina uai féitañede.

73 Jaiai cai uzuma Abrahana úcodo daina uai Juzíñamui uáfueña daina.

Afe uai bie izói daide:

74 Juzíñamui cai fairíconimona caina báiroite, jacíruiñeno ie ócuifiregamacina cai maméillena,

75 Iemo jíái ñúefuiáido ie jaícinaidimacina cai íllena, íemo daje izói nana cai illáruillaído afémiemo ñue cai jaínáillena.

76 Ie mei cue duera jító, caifo monamo ite Juzíñamui uai llóraimana o mámeitiaioi, mei Ocuíraima úcodo jáitioza, ñuera uai llocana uíllena, comini íemo ínollena.

77 Daje izói afémie bíllado ie comini íaifuiái féitallena fidítaitio.

Afémaci fiénidifuiái féitalledo afémaci jíllóitíaiói.

<sup>78</sup> Mei ua, cai Juzíñamui caina izírúillano caimo dúecaide.

Dúecaillano cáimaci jíáimaci íemo íñollírui caimo ite.

<sup>79</sup> Afedo tíacade jítinodo macádino Juzíñamuina onóitíaiói.

Daje izói comeci uái illáfuiáimo joide io afémie cai ífoite.

Benomo Zacarías úrilla fuite.

<sup>80</sup> Iemo afe úrue móonaicana jaide. Afe llezica joreño dibénedo onóicana jaide. Comini íñénanomo ífirede. Israel náiraímo abí ie onónanomo afémie dinomo fiévide.

## 2

### *Jesús jocóinafue*

*(Mt 1.18-25)*

<sup>1</sup> Aféruillaido énie jamánomoidillaíma Agosto nana comini mámeciaí cuiájillena ocuide. <sup>2</sup> Siria éniemo Cirenio illáimana illa llezica, bie nánora mámeciaí cuiájillena ocuica. <sup>3</sup> Naga come ie móotíai illánomo ie mámeceí cuiájirediaíoi. <sup>4</sup> Ie jira José Galilea éniemo ite Nazaret jófue mona jaide Judea éniemo. Afémie David izíemona comuídeza, David jocóinanomo Belemo jaide. <sup>5</sup> Móotíai illánomo José María diga mámecina cuiájidiaillinoí. Afengo jae jícanogango Josemo iníreillena, íemo ja úruereacade. <sup>6</sup> Iemo Belemo íaillinoí illa llezica afengo úrue jocólliruimo dúcide. <sup>7</sup> Dinomo afengo nánora jíto llíide. Jócua mei iníroido ferínote. Iemo juráreto ecáranomo rallai jóbiano ie bitade, mei afe íaillinoímo comini dúciranomo illino íñédeza.

### *Juzíñamui abí imaci ovejai úíñoraimacimo cíocaide*

<sup>8</sup> Belén jofue onimo dáarie ovéjaíai úíñoraini naíona íaiói ovéjaíai úíñofirediaíoi. <sup>9</sup> Uái daíí itíaióimo raire Juzíñamui abí ímie ángel daínámie íaióimo cíocaide. Afe llezica Juzíñamui quenírie íaiói abíedo egáíñozide. Aferi íere jacínaitiaíoi. <sup>10</sup> Mei íadi Juzíñamui abí ímie íaióina daide:

—Jacíruiñeno iri, mei ñuera rafue ómoímo lluaíbitícueza. Bie ráfuere nana comini íere íóbitíaiói. <sup>11</sup> Birui jaíai illaíma David jófue moí Jíllotaráíma jae jococa. Afémie cai Ocuíraíma Cristo. <sup>12</sup> Afémiena moí onóillena afe úrue iníroido ferínoga, íemo juráreto ecáranomo bitaca báitímoí, —daide.

<sup>13</sup> Afe llezica Juzíñamui abí ímiemo aillo jíáie mona imaci ofíoide. Afémaci Juzíñamuimo aillo ñúefuiái llotíaíoi:

<sup>14</sup> —Caífoide Juzíñamuimo ite ebírenafuiái moí lloiri.

Afe dáaruido afémie caímare eróinamacimo comécina uái illafue íteza, —daídíaíoi.

<sup>15</sup> Iemona, Juzíñamui abí imaci abído monamo jailla mei, ovéjaíai úíñoraini dani conímana daíízitíaiói:

—Mai mei Belemo cai jai; bie Juzíñamui caímo lloga ie jocóinafue mai cai méiñuai, —daídíaíoi.

<sup>16</sup> Jira jarire jáidiaíoi. María José diga cíódiaíoi. Iemo jíai juráreto ecáranomo bitaca úruena cíódiaíoi. <sup>17</sup> Afena cíóillano, Juzíñamui abí imaci afe úrue ífue íaíoiimo llúana jino llotíaíoi. <sup>18</sup> Nana afefue cacádino afe daínari íere caímare fágacaidiaíoi. <sup>19</sup> Mei íadi María nana aféfuíai comécimo jóoniano áfemo uibíoicaide. <sup>20</sup> Iemo ovéjaíai úíñoraini dinena meine abído jaide. Jailla llezica nana íaiói cacana, íemo íaiói cíónado Juzíñamuimo ñúefue llotíaíoi. Iemo daje izói ebírenafue Juzíñamuimo nitádiaíoi. Mei nana íaíoiimo daína izói íteza.

### *Dúemie Jesús Juzíñamui gairíracomo ácataga*

<sup>21</sup> Jócua mona ocho dígarui íllamona, dúemie bacano ícoí quetátatíaiói. Afe llezica Jesuna ie mámeceí jítdiaíillinoí, mei afeci nano María nai úruenina llezica Juzíñamui abí ímie aféngomo llóteza.

<sup>22</sup> Iemo diga irui íllamona, Moisés ocuica uai llua izói, María abí íainina daiíllena níciduafue fúillamo, úruena Jerusalemo uitíaiillinoi. Afénomo ite Juzíñamui gairíracomo úruena Juzíñamui íena íllena acátajidiaillinoi. <sup>23</sup> Daií finódiaillinoi Juzíñamui ocuica uaimo daií cúeina jira. Afe uai daide: “Nana nánora jococa iza Juzíñamui íena mamérede.” <sup>24</sup> Jira jáidiaillinoi Juzíñamui daina fecalle raa fecállena. “Mena úcugi, nibai mena fíiciri fatá Juzíñamuimo omoi fecari,” aféuai daií daide.

<sup>25</sup> Aféruillaído Jerusalemo Simeóna mámeceiredimie illa. Afémie iere ñúemie; Juzíñamuimo ínofirede. Israel nairai fairíconimona bairolle úiñote. Simeón Juzíñamui Ñuera Joreñodo úicaigamie. <sup>26</sup> Afe Ñuera Joreño, Simeón nai tíñenia Juzíñamui orelle Crístona cíoite, daií ie fidítate. <sup>27</sup> Ie jira Jesús móotiai íaillinoi, gairíracomo Jesuna uilla uícodo, Juzíñamui Ñuera Joreño afe Simeón gairíracomo jáillena ífode. Iemona José María diga, jaiiai ocuica fínofirena izói Jesuna íaillinoi fínuaibilla llezica, Simeón Jesús ie ónoimo llínote. <sup>28</sup> Simeón íena llínua llezica Juzíñamuimo ñúefue llocana daide:

<sup>29</sup>—Juzíñamui, mai birui caimare tíredicue, mei o ocuífíregamiedicue, o cuena daina izói nana ñue fuitáido.

<sup>30</sup> Dama cue uído cai Jíllotaraimana cíodícue.

<sup>31</sup> Afémie jae nana comini eróicana o jóonegamie.

<sup>32</sup> Afémie judíuaiñedino ñúefuiaina onótaitimie.

Iemo jíai afémie o comini Israelmo ñúefuiaina nítaite,  
—daií daide Simeón.

<sup>33</sup> Jira José María diga Simeón úruena daií ie dáinari fáigacaidiaillinoi. <sup>34</sup> Ie jira Simeón uáillaído íaioina cáimacaitade. Iemo Mariana, Jesús eina daide:

—Eroi, bie úrue Juzíñamui mamécamié. Diga Israel comini íena ruifíruillamona táinoficaitiaioi. Iemo jíai aillo comini íemo ínuamona ñúemacina jáitiaioi. Afémie onótate raa ízoite, íemo aillo comini íena íairuitiaioi. <sup>35</sup> Afedo illa dígamie ie comeci ífue onuille. Mei íadi ómona bie nana, jáirede lloefai izoide, dango o comeci izire fínoite, —daií Simeón daide.

<sup>36</sup> Afénori daa ringo illa. Afengo Juzíñamuimona ie oga uai llófuefirede. Afengo mámece Ana; Fanuel jiza. Iemo jíai Aser náiraimona comuídingo. Afengo iere éirogi. Afengo jitáingona illa llezica íniredé. Afengo siete diga fimona afémie diga ite. Afe mei afengo fecíngona jaide. <sup>37</sup> Iemo birui aféngomo ochenta y cuatro diga fimona fecíngona ite. Afengo Juzíñamui gairíracomo jaca ífiredé, mei afénomo mona naio diga Juzíñamui ocuífíregangona ite. Afengo iere Juzíñamuimo úrífiredé, íemo jíai iere fímairite Juzíñamui íóbitallena. <sup>38</sup> Simeón Jesudo úrilla llezica afengo afénomo bite. Iemo úrue dibéfodo Juzíñamuina “Figora” daina mei, afengo nana Jerusalemo ite jíllollena uíñotinomo úrite. Dúemie Jesús ñúefuiaina afengo íaioimo llote.

### *Nazaremo meine jáillafue*

<sup>39</sup> Iemona, nana Juzíñamui ocuica ualla íaioi fuita mei meine Galilea éniemo jáidiaioi. Afénomo dani íaioi jofue Nazaremo fiébizaide. <sup>40</sup> Afénomo afe úrue iere íocire móonaite, íemo jíai ráfuenta baitádimiena móonaite. Afe llezica Juzíñamui afézamo caimare eroide.

### *Juzíñamui gairíracomo úrue Jesús finócafue*

<sup>41</sup> Jesús moo íaillinoi naga fimónaiaído Jerusalemo pascua ráfuego jáífiredé. <sup>42</sup> Jesús doce diga fimona fuita mei, íaioi finófirena izói afe ráfuego nana jáidiaioi. <sup>43</sup> Afe rafue záillamona, jofomo meine íaioi jailla llezica, afe úrue Jesús Jerusalemo fiébicaide. Afeza fiébicaillana ie ei, José diga onóñediaillinoi. <sup>44</sup> Nibai cai onógamaci diga bite, daidíaiillinoi. Daa mona daií iodo comécidiaillinoi. Mei íadi íaillinoi onógamaci cígido jenódiaillinoimo <sup>45</sup> afézana cíóñediaillinoi. Jira meine Jerusalemo íemo jénuaidiaillinoi.

<sup>46</sup> Afe mei daruiámani íllamona Juzíñamui gairíraco eromo afézana baitíaiillinoi. Ocuica uai llófueto cígimo ráidena baizájidiailinoi. Afeza afémaci úrillamo cacáreide. Afe llezica afeza afémacimo jicánofirede. <sup>47</sup> Nana afeza íaiói uaillai úana cacáidino fáigacaidiaíoi; daje izói ie ráfuenta baitari. <sup>48</sup> Ie moo íaiillinoi íena cíozaiilla llezica íaiillinoina jacinaitade. Ie ei íena daide:

—Cue jitó ¿nibái cócori bifue finódio? Cue o moo diga iere coco comécina llícitatio, ona iere zuure jenódicocoz, —daide.

<sup>49</sup> Mei jira Jesús íaiillinoi uai ote:

—¿Mei nibái cue jenódiomíoi? Cue Moo llogáfuemo cue járitaiticue; ¿áfena onóñediomíoi? —daide.

<sup>50</sup> Mei íadi afe íaiillinoina afeza dáinana onóñediaillinoi.

<sup>51</sup> Afe mei afeza ie moo íaiillinoi diga abido Nazaremo jaide. Iemo íaiillinoi ocuállana jeire ófirede. Ie ei nana bífuiaí comécimo jóonete. <sup>52</sup> Afe llezica Jesús ñue zairíoicaide, íemo onócana jaca jaide. Afe llezica Juzíñamui naa comíniri afémiemo jiéruitiaíoi.

### 3

#### *Juan Bautista táizicimo rafue jino llote*

*(Mt 3.1-12; Mr 1.1-8; Jn 1.19-28)*

<sup>1</sup> Romano jamánomoidillaíma Tiberio illáimana illa llezica, Poncio Pilato Judea énie illaíma. Iemo Herodes Galilea énie illaíma. Iemo ie ama Felipe mena énie illáimana ite. Be ñie: Iturea, íemo Traconite. Afe llezica Lisánias Abilinia énie illaíma. <sup>2</sup> Afe llezica Jerusalem jamánomoide lletáiriraíma íaiillinoi Anás Caifás diga. Aféruillaído Juzíñamui Zacarías jitó Juaamo táizicimo úrite. <sup>3</sup> Iemona Jordán abi comini illágobiaído Juan llócaide. Afémacina bie izói daícade: Omoi comeci ífuiaí méidori; áfemona omoi fiénidífuiaí dólleza. Iemona omoi báutizatari. <sup>4</sup> Jaiái uai lloraíma Isaías uícodo cuega uai izói bífuiaí íficaide. Be afe uai:

Ficire úritimie uai táizicimo cácaide. Afémie daide:

“Juzíñamui bille io ñue finua izói omoi comeci ñue fino.

Afémiemo io jaícina dénuu izói, omoi comeci íaífuiaí féitari.

<sup>5</sup> Nana ana jica ite ítaicoiaí ñue jaícina oruíziite.

Nana caifóneduai ana dájena jaícina jóbite.

Jullícana joide io, jaícina tuiñolle.

Daje llezica iñede io, daje llezica jóbite.

<sup>6</sup> Iemona nana nairaí Juzíñamui caímo orelle jílloillífuemo comécidiaíoi.”

<sup>7</sup> Comini Juan dine íaiói báutizailla llezica, afémie íaíoína daide:

—¡Titade jaióniaímona comuídino izóidíomoi! Ja ánozide duere zefuillífuemona omoi botállena, ¿bu omoi llua? <sup>8</sup> Omoi comeci ífue méidoiacanana ñuefuedo uáfodo jino ácatari. Dani ómoimona táinona “Abrahámona comuínodicaí” daíñeno iri. Mei bie noficiaímona Juzíñamui jitáiaí, Abraham comínina comútaredeza, daí ómoína daídícue.

<sup>9</sup> Fiénide amena tiéllena jata jicaída jóonia izói fiénidíno duere finoille jae ñue mameca. Nana figo llizíñede amena iraimo zocana uillano jobaica. (Tiéfirega izóidíomoi.)

<sup>10</sup> Jira comini afémiemo jicánotiaíoi:

—¿Mei bie ñie izói íredicaí? —daídíaíoi.

<sup>11</sup> Jira Juan uai ote:

—Mena caifóferoiredimie, caifófenidímiemo daa írede. Iemo gülleredimie güllenidímiemo güllena fecárede, —daide.

<sup>12</sup> Afénomo dáarie gobierno íbátaga úcube llínoraini báutizaillena Juaamo jicaíbitiaíoi. Afémiemo jicánotiaíoi:

—Llófueraíma, ¿mei bie cai ñie izói íiticaí? —daídíaíoi.

<sup>13</sup> Jira Juan íaíoína daide:

—Ocuica uai daina baimo dama raiñoñoeno iri, —daide.

<sup>14</sup> Iemo dáarie “soldado” daina nairai úiñotino Juaamo jicánuaibitiaioi:

—¿Mei bie cai ñie izói íiticaí? —daídíaioi.

Jira Juan íaioi uai ote:

—Jácidota, jiáimamona minícana bairñoñoeno iri. Daje izói jácidoñoeno jiáimamo ie fínoñegafue táinona íaioimo jitáñoeno iri. Nano omoi táijina iba dieze uái omoi iri, —daide.

<sup>15</sup> Nana comini Juaamo coméci idiaioi. “Ñibai bímie Crístona,” comécido daídíaioi.

<sup>16</sup> Mei íadi Juan nana afémacina daide: Mei uáfueza, cue jáinoina omoi báutizadícue.

—Mei jiáimie ja bite. Afémie Juziñamui Ñuera Joréñodo ómoína úicaite. Daje izói iraimo raa ñue zia izói, afémie ómoína íáinino ñue fínoite. Afémie cue baimo ríinorede. Cue bie jamáimiedícueza, afémiena dama jacíruiredícue. <sup>17</sup> Jabe bíitimie arroz bíaidímie izói ja ie llocofe llíicabite. Afémie arroz bíamona ícuai oni eneno ua izói, ñúemacimona fiénidinona oni eneno óite. Ñúemacina ie illánomo ñue éenoite. Mei jiáifodo fiénidícuai izóidino zííñoa dúíñeite iraimo jóbaite, —daide Juan.

<sup>18</sup> Afe bíemona naa aillo jiáie llófuiado Juan ñúefuiai jino comínimo llote. <sup>19</sup> Afe emódomo Juan illaíma Heródesna riire lletade, mei ie ama Felipe ai Herodías ie aina ua jira. Daje llezica ie finoca fiénidífuiairi Juan íena lletade. <sup>20</sup> Mei íadi Juan llétajana íinoñoeno afe baimo jiáie íaifuena nabaide: Herodes Juan llavéracomo íbaide.

### *Jesús báutizaga*

*(Mt 3.13-17; Mr 1.9-11)*

<sup>21</sup> Afe uícodo, Juan nana comini báutizaja llezica, Jesús jiái báutizaga. Afe Jesús báutizaja llezica afémie Juziñamuimo úrite. Urilla llezica mona tújicaide. <sup>22</sup> Afemona Ñuera Joreño fíiciri baizáibilla izói, afémiemo comini cíocana baizáibite. Afe llezica monámona daa úrilla cácaide. Afe úrilla daide:

—Cue izíruiga Jitódio. Ori iere íobioidícue, —daide.

### *Jesucristo uzútiái*

*(Mr 1.1-17)*

<sup>23</sup> Ja Jesús treinta fimona íllamona Jesús comínina canóllena ie táijina como tainede. Comini coméciilla izói Jesús José jító.

Iemo afe José Elí jító.

<sup>24</sup> Iemo daje izói Elí Matat jító.

Iemo afe Matat Leví jító.

Iemo afe Leví Melqui jító.

Iemo afe Melqui Jana jító.

Iemo afe Jana José jító.

<sup>25</sup> Iemo afe José Matatías jító.

Iemo afe Matatías Amos jító.

Iemo afe Amos Nahum jító.

Iemo afe Nahum Esli jító.

Iemo afe Esli Nagai jító.

<sup>26</sup> Iemo afe Nagai Maat jító.

Iemo afe Maat Matatías jító.

Iemo afe Matatías Semei jító.

Iemo afe Semei Josec jító.

Iemo afe Josec Judá jító.

<sup>27</sup> Iemo afe Judá Joanán jító.

Iemo afe Joanán Resa jító.

Iemo afe Resa Zorobabel jító.

Iemo afe Zorobabel Salatiel jító.  
Iemo afe Salatiel Neri jító.  
<sup>28</sup> Iemo afe Neri Melqui jító.  
Iemo afe Melqui Adi jító.  
Iemo afe Adi Cosam jító.  
Iemo afe Cosam Elmadam jító.  
Iemo afe Elmadam Er jító.  
<sup>29</sup> Iemo afe Er Josué jító.  
Iemo afe Josué Eliezer jító.  
Iemo afe Eliezer Jorim jító.  
Iemo afe Jorim Matat jító.  
<sup>30</sup> Iemo afe Matat Leví jító.  
Iemo afe Leví Simeón jító.  
Iemo afe Simeón Judá jító.  
Iemo afe Judá José jító.  
Iemo afe José Jonam jító.  
Iemo afe Jonam Eliaquim jító.  
<sup>31</sup> Iemo afe Eliaquim Melea jító.  
Iemo afe Melea Mena jító.  
Iemo afe Mena Matata jító.  
Iemo afe Matata Natán jító.  
<sup>32</sup> Iemo afe Natán David jító.  
Iemo afe David Isaí jító.  
Iemo afe Isaí Obed jító.  
Iemo afe Obed Booz jító.  
Iemo afe Booz Sala jító.  
Iemo afe Sala Naasón jító.  
<sup>33</sup> Iemo afe Naasón Aminadab jító.  
Iemo afe Aminadab Admin jító.  
Iemo afe Admin Arni jító.  
Iemo afe Arni Esrom jító.  
Iemo afe Esrom Fares jító.  
Iemo afe Fares Judá jító.  
<sup>34</sup> Iemo afe Judá Jacob jító.  
Iemo afe Jacob Isaac jító.  
Iemo afe Isaac Abraham jító.  
Iemo afe Abraham Taré jító.  
Iemo afe Taré Nacor jító.  
<sup>35</sup> Iemo afe Nacor Serug jító.  
Iemo afe Serug Ragau jító.  
Iemo afe Ragau Peleg jító.  
Iemo afe Peleg Heber jító.  
Iemo afe Heber Sala jító.  
<sup>36</sup> Iemo afe Sala Cainán jító.  
Iemo afe Cainán Arfaxad jító.  
Iemo afe Arfaxad Sem jító.  
Iemo afe Sem Noé jító.  
Iemo afe Noé Lamec jító.  
<sup>37</sup> Iemo afe Lamec Matusalén jító.  
Iemo afe Matusalén Enoc jító.

Iemo afe Enoc Jared jító.  
 Iemo afe Jared Mahalaleel jító.  
 Iemo afe Mahalaleel Cainán jító.  
<sup>38</sup> Iemo afe Cainán Enós jító.  
 Iemo afe Enós Set jító.  
 Iemo afe Set Adán jító.  
 Iemo afe Adán Juzíñamui jító;  
 ua, Juzíñamui nano finócamie.

## 4

### *Taife Jesús facátate* (Mt 4.1-11; Mr 1.12-13)

<sup>1</sup> Jesús diga Ñuera Joreño uaido íllamona imani Jordámona oni jaide. Afe llezica Ñuera Joreño táizicimo ie uite. <sup>2</sup> Afénomo afémie cuarenta dígarui ite. Afe dinomo Taife íena fiñi facátate. Aféruillaído Jesús jaca due jiza güñede. Afe mei iere jamánomo jufínaite.

<sup>3</sup> Mei jira Taife íena daide:

—Ua Juzíñamui Jitona o íadi, bie nofíciai güíllena fino, —daide.

<sup>4</sup> Jira Jesús uai ote:

—Juzíñamui Cuegáuai daide: “Fia güíllado come ínide, mei jíáfodo nana Juzíñamui lloga uaido írede,” —daide.

<sup>5</sup> Afe mei Taife caifónedumo ie uite. Dinómona nana éniemo ite náiraiaí dáaruido íena ácatate. <sup>6</sup> Iemo Taife íena daide:

—Nana bie náiraiaí ríino naa ie ebíredinuaíri omo íitícue. Mei nana bie cúeieza. Iemona cue fecáacana dieze jíáimamo íredicueza. <sup>7</sup> Cue anamo o dújuillano cuemo o caimátaia nana bie óieiteza.

<sup>8</sup> Mei jira Jesús uai ote:

—Taife, mai cúemona oni jai, mei Juzíñamui Cuegáuai dáideza: “Dama Ocuide Juzíñamuiimo caimátairena. Dama afémie ocuífíregamiena o iri,” —daide.

<sup>9</sup> Nane afe mei Taife Jerusalén jófuego Jesús uite. Afénomo ite gairíraco emódomo caifo jica uite. Uillano íena daide:

—Ua Juzíñamui Jitona o íadi, mai benómona ana batí ticai, <sup>10</sup> mei Juzíñamui Cuegáuai bie izói dáideza:

Juzíñamui ie abi imácina ona uíñotaite.

<sup>11</sup> Iaiói ónoído ona mozíñoitiaíoi, o eiba nofíciaimo íziñeillena.

<sup>12</sup> Jira Jesús uai ote:

—Juzíñamui Cuegáuai nane daide: “O ocuide Juzíñamui mai facátañeno,” —daide.

<sup>13</sup> Ja Taife Jesuna jíáie facátaja raana baiñenamona nano íanori aféniemona fáicanocaillano oni jaide.

### *Jesús Galilea éniemo fueñe tájizaide* (Mr 4.12-17; Mt 1.14-15)

<sup>14</sup> Jesús Galilea éniemo abido bite. Juzíñamui Ñuera Joreño afémiena ñue úicade. Nana afe énie fuédado afémiedo úritiaíoi. <sup>15</sup> Nágagobiaimo ite Juzíñamui uai llorácuaido Jesús llófuecaide. Iemona nana comini ñúefuiaí aféniemo mamédiaíoi.

### *Jesús Nazaremo mácajide* (Mt 13.53-58; Mr 6.1-6)

<sup>16</sup> Mei íemo Jesús ie móonailla Nazaret jófuego abido mácajide. Iemo ocózinaiillaruimo Juzíñamui uai llorácomo ie fínofirena izói, jofo jaide. Jaillano Juzíñamui Cuegáuai facádollena caifo naidaide. <sup>17</sup> Iemona jaiái uai llóraima Isaías Cuegáuai illabe Jesumo itiaíoi. Afémie afénico túiñuano afe bie uai illano baite. Afe be níuái:

18 “Cai ocuide Juziñamui Ñuera Joreño cue diga jáicade. Mei dúeredinomo ñúefue cue llóllena cuena ñue mamédeza. Comécina dúeredinona cue jíllotallena ocuícacue. Daje izói llavécanona zuitalle uai llóllena orécacue.

Iemo jáí uina cíoiñedino uina cíoitallena orécacue.

Iemo duere finócanona zuitállena orécacue.

19 Daje izói Juziñamui caimo jamánomo caimare érocaillirui llóllena orécacue.”

20 Iemona Jesús afénico ibáillano, Juziñamui uai lloraco ero canófredimie mo abido ite. Afe mei Jesús ana ráinade. Iemo nana afe llorácomo itino Jesumo riire eróiediaioi.

21 Iemona Jesús íaioina daide:

—Ja birui omoi eróicana bie Cuegáuai ñue ícoimo fuite, —daide.

22 Nana Jesudo ñue úritiaioi. Afémie íaioimo lloga ebírede uáillairi caimare fáigacaidiaioi. Mei jira jicánotiaioi:

—¿Mei bie afe José jitóñede? —daidíaioi.

23 Jira Jesús íaioina daide:

—Uáfueza bie omoi daiñfrena uai cuemo mámeitiomo: “¡Iráredinona manóriacadimie, fueñe dama o abina jíllota!” (Comini Jesús Juziñamui oreca ua Crístona íaioi daiññenamona, Jesús bie izói daide. Mei afémie fia José jitó íadi, jáimana jíllotanideza.) Daje izói nibai cuena dáitiomo: “Nauí cai cacana Capernaumo ebire o finócafue mai birui dama bie o jófue mo finori.”

24 Iemo Jesús ie úrillana moziñoño nái jáí uai llote:

—Mei uáfueña ómoína daidicue, naga uai jino llóraima dama ie comini cígiri jaca figo íñoñega. 25 Omoimo jino uáfodo llóiticue, nauí Elías illáruillaido Israel nairai cígimo diga fecíngotiai ite. Aféruillaido daámani fimona átuedo noci bíñede. Afemona afeno nairai jamánomo júbietaidiaioi. 26 Mei íadi Elías Israelmo ite aillo fecíngotiaimona daingo mamedá óreñega. Mei jáífodo jica Sarepta jófue mo ite fecingo mamedá Elías oreca daingo canóllena. Afe Sarepta jofue Sidón jofue áinori ite. 27 Daje izói uai llóraima Eliseo illáruillaido Israel náiraimo aillo chíñaitinuiái ite. Mei íadi afémacimona dáamie jaca jíllotañega. Mei jáífodo jica Siria énie ímie Naamán jíllotaina, —daide.

28 Afe uaina cacáillano nana llorácomo itino afe Jesumo iere ráicaidiaioi. 29 Náidacaillano afe jófue mo jino ie jíúdiaioi. Afe mei afe jofue idu ícoimo íena uitíaioi, aféno mo ana ie dotállena. 30 Mei íadi Jesús afedu ícoimona gírecaillano íaioi cígido abido jaide.

*Fiénide jóriai úicaigamie Jesús jíllotate  
(Mr 1.21-28)*

31 Afe mei Jesús Galilea éniemo ite Capernaum jófue mo jaide. Aféno mo ocózinaillaruimo nane como comini llófuiaide. 32 Riire ocuilla uaido ie íaioi llófuiari caimare fáigacaidiaioi.

33 Afe Juziñamui uai llófueraco eromo fiénide jóriai úicaigamie ite. Afémie Jesuna cíóillanona riire caillide:

34 —Cai fáicanocai. Nazaret ímie Jesús, ¿nibái mei caimo jíricaidio? ¿Caina niné táinocaitaibitio? Ona ónodicue Juziñamui ñúefuaido jacíruiregamiedio, —daide.

35 Jira Jesús fiénide jóriai uai ote:

—¡Uriño! ¡Bímie fáicanocai! —daide.

Mei afemona afe ímana fiénide jóriai comini eróicana ana éniemo dotade. Daií fínuano afe jóriai afe ímana ízitaño oni jáidiaioi. 36 Aferi nana jacínaillano jofo conímaiaína daidíaioi:

—¡Bímie uailai nái mei ríinorena! Afe bímie riirede uaido fiénide jóriaina orede. Iemo afémaci afemona jáidiaioi, —daidíaioi.

37 Afe énie comini náagobiaido Jesudo úritiaioi.



*Jesús Simón Pedro jifaiño jílloate*  
(Mt 8.14-15; Mr 1.29-31)

<sup>38</sup> Afe mei Jesús Juziñamui uai llófuera comona jino billano, Simón jofomo jaide. Afénomo Simón jifaiño ie abi cuarillari iere irárede. Jira afengo jílloallena Jesumo izire jicádiaioi.

<sup>39</sup> Iemo Jesús aféngomo ana ánozillano ie onoi llínote. Afe llezica ie abi cuarilla llícaide. Iemona afengo jíllobicaide. Daí daina llezica afengo náidacaillano afémaci jitaica raa bai atide.

*Jesús diga iráredino jílloate*  
(Mt 8.16-17; Mr 1.32-34)

<sup>40</sup> Ja jitoma jímaicaidemo, diga jíáforiede duico ogánuiaina Jesumo atidiaioi. Afémacimona illa dígamemo Jesús ie onoi bitade. Bítajamona afémaci jíllozitiaioi. <sup>41</sup> Iaiói atica iráredinuiaimona diga fiénide joría jino jaide. Jaillano afémaci riire caillíoidiaioi:

—O Juziñamui Jitódio, —daidiaioi. Mei íadi, como úrizaidiaioimo Jesús íaioina úritañede. Mei afémaci afémie Crístona íllana onódiaioiza.

*Jesús Galilea éniemo uai jino llote*  
(Mr 1.35-39)

<sup>42</sup> Afe jítiramo Jesús jofue baimo buna iñénanomo jaide. Mei íadi comini íena jenódiaioi; ie illánona baizájidiaioi. Afémaci afémiena iere jeruídiaioi oni jíáinomo afémie jáíñeillena.

<sup>43</sup> Jira Jesús íaioina daide:

—Jíáie jófuiaimo Juziñamui illáimana illíruimo ja ánozideza áfena llujíredicue, mei afe jira orécacueza, —daide.

<sup>44</sup> Afemona daí Jesús Galilea éniemo ite Juziñamui uai llorácomo llófuecana uite.

## 5

*Jesús uaido dánamona jamánomo aillo chamuniaí oga*  
(Mt 4.18-22; Mr 1.16-20)

<sup>1</sup> Afe mei jíáiruido Jesús Genesaret jorai fuédamo ite. (Afe jorai jíáifodo mameina Galilea.) Afénomo ie illa llezica diga comíniaí afénomo dúcina. Afémiena jamánomo rillíretadiaioi, mei afémaci Juziñamui uáillaímo iere cacáacadiaioiza. <sup>2</sup> Afe jorai fueda áinori mena nocáe táicaena Jesús ciode. Mei afécaemona facóraini oni jaillano íaioi chamu ora llóiji jocódiaioiza. <sup>3</sup> Iemona Jesús Simón icaemo jaide. Afécaemo jáillano íena daide:

—Bicae fuédamona bai batí due ñuita, —daide. Afe mei Jesús afécaemo ráinaillano nane como bai afénomona comini llófue. <sup>4</sup> Ie llófuia fúillamo, Simona daide:

—Bie nocáe bai batí afóredinomo ui. Afénomo chamu ólleza omoi llóiji dota, —daide.

<sup>5</sup> Jira Simón uai ote:

—Llófueraíma, jae naío náamonana facódicaíza, íadi jaca daa oñédicaí. Mei íadi o daina izói mei o ocuícaza llóiji dótaiticue, —daide.

<sup>6</sup> Daí dotádemo, jamánomo aillo chámuniaí jíideza, llójjina cuatáacade. <sup>7</sup> Afe jira oni jíáicaemo ite íaioi nabáitiaí ónoído jíritiaioi, ie íaioi cánuaíbillena. Jira afémaci cánuaíbitiaioi. Afe íaioi jíitaga chámuniaí íaioi ménacae áillocaemo oruítatiaioi. Jamánomo oruíllamona afe ménacae buíacade. <sup>8</sup> Afena Simón cíoillano Jesús ana dújullano daide:

—Cue Ocuíraíma, cúemona oni ii. Cue bie fiénidífue finódimiedicueza, —daide.

<sup>9</sup> Mei ua, afe aillo chamu jíillari Simón naa ie nabáíñiaíri jacínaitiaioi. <sup>10</sup> Iemo jíái Zebedeo jító íaillinoi Santiago Juan diga, Simón nabai daje izói jacínaitiaioi. Mei íadi Jesús nane Simona daide:

—Jacíruiñeno. Benómona chamu fácuá izói comínina jénoítioza, cuemo íaioi íinollena, —daide.

<sup>11</sup> Iemona afe ménacae oni fuédamo zítajano, dinomo nana fíano Jesudo jáidiaioi.

*Jesús chínaitimie jllotote*  
(Mt 8.1-4; Mr 1.40-45)

<sup>12</sup> Iemo jiáiruido, Jesús jófuemo illa llezica chínaitimie Jesumo dúcide. Jesuna cíoillano ana dújuillano uiéco dinena ana éniemo bíjicaide. Daí ñiano Jesumo izire jicade:

—Cue Ocuíraima o jitáiadi bie duícona cúemona oréredio. Cúemona oreri, —daide.

<sup>13</sup> Iemona Jesús ie ónoído jétano daide:

—Jii, ona jllotaiacadicue. Benómona ja íainitioza, —daide.

Daí daina llezica ie irárena chiie jacáibicaide. <sup>14</sup> Afemona Jesús afémiena “Bie bumo lloñeno iri” daide. Afe emódomo nane daide:

—Mai lletáriraimamo o abi ácatari. Afe llezica Moisés ocuica o abi ja íainide daítate raa, mai fecari. Afemona nana comini o chiie ja jacáillana ónoítiaioi, —daide.

<sup>15</sup> Jesús izire íena rairuide íadi Jesús mámecei jamánomo bai jica jalléicaide. Iemona aillo comini ie uaimo cacáreizaíbitiaioi. Daje izói íaioimo ite duícomona ie jllotallena aillo bitiaioi. <sup>16</sup> Mei íadi Jesús bai comini iñénanomo jaide, afénomo ie Moo Juzíñamuimo úrillena.

*Jesús tízitaitimie jllotote*  
(Mt 9.1-8; Mr 2.1-12)

<sup>17</sup> Nane afe jiáiruido Jesús llófuemaritemo, fariséuaimona dáarie afénomo ráiede. Afe llezica oni jicana bite ocuica uai llófueraíni dáanomo ite. Dáarie Galilea ígobiaimona bitiaioi. Daje izói jiáimaci Judea éniemona, íemo Jerusalén dinena jiái bitiaioi. Aféruimo Juzíñamui riino aillo iráredino jlluamona jino ácataga. <sup>18</sup> Afe dáaruido diga ímie tízitaitimie naa ie bíralludo atidiaioi. Jofo Jesús uícomo ie uíacadiaioi. <sup>19</sup> Mei íadi iere comínina oruídeza jofo íaioi jáillino iñede. Ie jira caifo jofo emódomo uitiaioi. Uillano afeno tuiñódiaioi. Afeno túiñuano afe iráredimie naa ie bírallu diga ana comini cígimo Jesús uícomo agüinetiaioi. <sup>20</sup> Jesús ñue íaioi ínuana cíoillano, iráredimiena daide:

—Mii, nana o fiénidifuaí ja muiñócaza, —daide.

<sup>21</sup> Iemona ocuica uai llófueraíni naa fariséuairi, como comeci anado daidiaioi:

—¿Mei bie bu? baie jiáimie fiénidifuaí dóficailla dáinado Juzíñamuina icíritaja. Jaca bu comini fiénidifue muiñóñena; dama Juzíñamui fiénidifuenta múiñua, —daidiaioi.

<sup>22</sup> Mei íadi Jesús comeci íaioi fácajana onóillano daide:

—¿Ñibái mei bie izói comeci facádiomoi? <sup>23</sup> Mei daí daina ménade uáimona ¿nie uai iere llotáinina? Afe ménade uai be ñie: O fiénidifue muiñócaza. Iemo jiáie uai bie izói joide: Mai náidacaillano maca. Iiraie uai jamánomo llotáirede, mei omoi eróicana íteza.

<sup>24</sup> Mei jira, Nanoide íima Jitódicueza bíniemo cue illa llezica comínimo ite fiénidifue cue muiñolle riino jino ómoimo cíotaiticue, —daide.

Mei jira Jesús tízitaitimiena daide:

—Ona dáiticue náidacai; náidacaillano o bírallu llínota o jofomo jai, —daide.

<sup>25</sup> Daí daina llezica, afe tízitaitimie comini eróicana caifo náidacaide. Náidacaillano, ie bírallu llínota, Juzíñamuimo caimátaicana ie jofomo jaide. <sup>26</sup> Aferi nana comini caimare fáigacaidiaioi, íemo Juzíñamuimo caimátaidiaioi. Afe mei jacíruioicana daide:

—Ñi birui cai iere ebíredifuaína ciona, —daidiaioi.

*Jesús Leví jrite*  
(Mt 9.9-13; Mr 2.13-17)

<sup>27</sup> Nane bie méifomo Jesús jofue cígido mácaja llezica, gobierno íbátaga úcube llínoraimamo riire éroicaide. Afémie mámecei Leví. Afe úcube íbafirenanomo afémie ráide. Jesús íena daide:

—Mai cuedo bi, —daide.

<sup>28</sup> Iemona Leví náidacaillano nana ie táijina fáicanocaillano Jesudo jaide.

<sup>29</sup> Afe mei Leví áillue rafue ie jofomo Jesús íena finode. Afe Leví izoide aillo úcube llínoraini naa jiáimaciri güirábanimo ráizaibitiaioi. <sup>30</sup> Mei íadi fariséuai naa ocuica uai llófuetinori Jesús llófuegamacimo como meine fiene úritiaioi. Iaioina daide:

—¿Nibái mei baie úcube llínofirede fiénidinori güitiómoi? —daidíaioi.

<sup>31</sup> Jira Jesús íaioi uai ote:

—Iociredimie mánuamo dúñede. Iráredino manórena. <sup>32</sup> Dani ñúemacina abi mamédinona uáiduaibiñedicue, mei jiáfodo fiénidifuairedino comeci ifue méiduaibiticue, —daide.

*Iaioi fimairillena Jesumo jicánotiaioi*

*(Mt 9.14-17; Mr 2.18-22)*

<sup>33</sup> Iemona afémaci Jesumo jicánotiaioi:

—¿Nibái mei Juan dibénedo jáidino, íemo jiái fariséodo jáidino, diga ícaíño riire fimafirediaioi? Iaioi fimairilla llezica Juziñamui jamánomo jicáfirediaioi. Mei jiáfodo o llófuegamaci jaca güífirediaioi, jirófirediaioi. ¿Nibái mei daí itíaioi?

<sup>34</sup> Jira Jesús íaioi uai ote:

—Mai cuena omoi daí: ¿Airena rafue llezica áfemo uáidogano meita zúurenari güinidiaioi? Daítañede; ringo otímie íaioi cígimo illa llezica caimare güitíaioi. <sup>35</sup> Mei íadi ringo otímie íaioimona báiruaibilliruimo dúcite. Aféruído comeci zúurenari güíñeitiaioi. Ringo otímie izói birui cuedo jáicaidino cígiri iticueza.

<sup>36</sup> Ie emódomo jiáie onótate rafue llote:

—Jaca nino dáamie comue iníroimona jáitano, jácaroimo nitáñede. Daí nitáadi cómoroina fiene cíoitate. Iemo jiái jácaroimo nitaca cómoroi figo cíoiñede. <sup>37</sup> Iemo nane jiáfue llote. Daje izói comue vino jácara igorai finoína iciru izoide raamo totánide. Dáamie daí totáadi afe comue vino afe jácara iciruna eroide raana cuatade. Afemona afe iciru naa vino diga táinomo fáifite. <sup>38</sup> Iemona comue vino comue igorai finoína iciruna eróidemo jóonerede. Iemona afe naga ñue éenoga. <sup>39</sup> Daje izói jácara vino jiródinomona, buna cómojina jicáñena. Mei afémie “Jácapi jamánomo caimárena,” dáideza. (Afe bie dánado Jesús ie comue llófueinafue íemo íaioi jaiai llófuegafue dáanomo inonide íaioimo llote.)

## 6

*Jesús llófuegamaci ocózinallarui trigo ímoiaí dícoiano otá güitíaioi*

*(Mt 12.1-8; Mr 2.23-28)*

<sup>1</sup> Daa ocózinallaruido Jesús naa ie llófuegamaci jacáfaiái cígido íaioi maca llezica, ie llófuegamaci trigo ímoiaí dícoiano otíaioi. Uano íaioi ónoído lléguano aféjiaina güitíaioi.

<sup>2</sup> Mei jira fariséuaimona dáamierie jicánotiaioi:

—¿Nibái mei ocózinallarui rairuícamo táijidiómoi? —daidíaioi.

<sup>3</sup> Jira Jesús íaioi uai ote:

—¿Omoi jaiai illaima David finócafue cúeinana facadoñediómoi? Afémie naa ie nabáñiairi jufñaitiaioi. <sup>4</sup> Afe llezica Juziñamui jofomo jofo jaillano rairuica pániai ote. Uano güite. Afe mei afémiedo jáidinomo fecade. Mei íadi afe pan dani lletáraini güiga. Abi dine jamai comini güinide.

<sup>5</sup> Nane dáanomo íaioina daide:

—Nanoide fima Jitódicueza, ocózinallarui, cue ocuille ríino ite, —daide.

*Onoína jofo naillídimie rafue*

*(Mt 12.9-14; Mr 3.1-6)*

<sup>6</sup> Nane jiáie ocózinallarui Jesús Juziñamui uai llorácomo jofo jaide. Jaillano llófuete. Afécomo onoi nabézina jofo naillídimie ite. <sup>7</sup> Afe llezica ocuica uai llófuetino naa

fariséuairi Jesumo báinino éroiediaioi, ocózinailaruido afe ónoina jofo naillídimie jállotajana cíoilena. Afémie jállotaia áfedo fiénidifue íemo jítaiticai, comeci anado daidiaioi. <sup>8</sup> Mei íadi Jesús íaioi comeci fácajana onode; jira ónoina jofo naillídimiena daide:

—Náidacaillano bai cai cigimo bi, —daide.

Iemona afémie náidacaillano bai náidazaide. <sup>9</sup> Afe mei Jesús jiáimacina daide:

—Omoimo dafue jicánoiticue. ¿Cócózinailaruimo nñie táijina rairuínina? ¿Cai finoca fiénidifue, mei nibai cai finoca ñúefue? ¿Cómena jállotaiticai, mei nibai méineiticai? —daide.

<sup>10</sup> Iemona Jesús nana ie onífenedo gairide comínimo eroide. Afemaci ie uai oñena jira, ónoina jofo naillídimiena daide:

—O onoi jino zuita, —daide.

Jira afémie zuitade. Zuitádemo ñue jállode. <sup>11</sup> Mei íadi áfemona afe jiáimaci jamánomo ríicaidiaioi. Dani jofo conímamo jicánotiaioi, ¿Mei nñie izói baie Jesús uáitaredicai?

### *Jesús doce diga oni oréllimacina nizede*

*(Mt 10.1-4; Mr 3.13-19)*

<sup>12</sup> Aféruillaído Jesús caifónedumo Moo Juziñamuimo úrizaide. Afénomo afémie Juziñamuimo úritemo monaide. <sup>13</sup> Ja monáidemo nana ie llófuegamaci jírrite. Jírillano afémacimona doce dígamie nizede. “Oni oréllino” íaioina mamede. <sup>14</sup> Afe be nímaci: Simón, afémie jiáie mámecí jítaina Pedro, íemo Simón ama Andrés, íemo Santiago, íemo Juan, íemo Felipe, íemo Bartolomé, <sup>15</sup> íemo Mateo, íemo Tomás, íemo Alfeo jító Santiago, íemo Iere Járidotimacimo jaináidimie Simón, <sup>16</sup> íemo Santiago ama Judas, íemo uire Jesús fécaitimie Judas Iscariote.

### *Jesús aillo nairai llófuete*

*(Mt 4.23-25)*

<sup>17</sup> Jesús caifónedumona naa afémaciri ana bitíaioi. Billano ñúenomo nano íanori naidáiediaioi. Afénomo aillo jicánemaci Judea éniemona bitino gairídiaioi. Daje llezica Jerusalémona, íemo jiái Tiro, Sidón diga jica itíniemona bitíaioi. Bimaci nana Jesús úrillamo cacáreizabitiaioi. Daje izói afémaci íaioimo ite dúicomona Jesús jállotallena bitíaioi. <sup>18</sup> Daje izói fiénide jóríai uícaigano jállotagaiaioi. <sup>19</sup> Afe llezica nana comini Jesuna jetáacadiaioi, mei afémie íemo ite ríinodo nana íaioina jálloteza.

### *Cáimafue zuufue diga*

*(Mt 5.1-12)*

<sup>20</sup> Iemona Jesús ie llófuegamacimo érocaillano íaioina daide:

—“Comeci dinena dúeredicai,” dáifiredino omoi íadi, dúerede íadi íóbidiomoi; mei ómoimo Juziñamui illáimana illano dúideza.

<sup>21</sup> Júbiena méinegamie iere güícana izói, Juziñamui comeci jítaina izói iere íacadino omoi íadi, caimare íóbidiomoi, mei Juziñamui afe omoi íacana izói omoi íllena ómoina cánoíteza.

Birui duere éediomoi íadi caimare itíomoi, mei uire zádaitiomoi.

<sup>22</sup> Nanoide fima Jitódicueza cue ícoinia comini ómoina éoina llezica caimare íitiomoi.

Daje izói cue ícoinia ómoina jino íaioi jiúadi íóbítomoi. Iemo jiái cue ícoinia ómoina íáire íaioi daííadi, daje izói o mámecina íáirede raa izói íaioi jámairuia, íóbítomoi. <sup>23</sup> Aféruído iere omoi íóbiocairi. Jamánomo caimare omoi iri, monamo áillue omoi jírídolle raa íteza. Mei afe izói bimaci nánoidigima Juziñamui uai llórainina iere duere finódiaioi.

<sup>24</sup> Mei jiáifodo omoi ráanaitino nñi dúerena, mei omoi caimátailla raana jae otíomoiiza.

<sup>25</sup> Daje izói omoi jeírede izói itino nñi dúerena, mei uire iere jufíruitomoiiza.

Afe izói birui ómoimona zadáidino nñi dúerena, mei uire dúerenari éeítomoiiza.

<sup>26</sup> Daje izói nana comini ómoído ñue íaioi úrilla llezica, nñi omoi dúerena. Mei afe izói afémaci jaiáigima taino uai llórainimo caimare úritiaioiza.

*Caina éoidinona izíruiredicai*  
(Mt 5.38-48; 7.12)

<sup>27</sup> Mei íadi cue úrillamo cacáreidiomoina dáitícue: Omoí bacáuai imaci izóí dino, nñi omoí diga iciritinona mai omoí izírui. Daje izóí omoí éoidinona mai ñue omoí finori. <sup>28</sup> Omoí faidódinona mai omoí cáimadori. Daje izóí omoína fiéni finócadino, ñue íaíoi ílleza, maí Juzíñamui omoí jicari. <sup>29</sup> Daa come o uieco putáadi, daje llezica enéfenena ie fállena mai o fecari. Daje izóí dáamie táinona omo jítajano, o emódoidiroi bairóadi, daje llezica o caifóferoina mai o uitátari. <sup>30</sup> Ninó dáamie raana omo jicáadi maí afémiemo jeruíñoeno o fecari. Omona bairoca raana abido jicánoñoeno o iri. <sup>31</sup> Jira jíaimacimo uícodo bie izóí finórediomoi. Jíaima omo finóllena o óiacana dieze, áfeze afémiemo maí o finori.

<sup>32</sup> Daa ómoína izíruitinona omoí izírui, ¿Mei nñie ñúefue finódiomoi? Mei fiénidino afe izóí finuaza. <sup>33</sup> Daje izóí daa omoí ñue finódino ñue omoí finóadi, ¿néemei omoí finoca ñúefue? Mei fiénide comini afe izóí finuaza. <sup>34</sup> Afe izóí daa “meine abido cue méidolle cue comécillamiemo” o fecáadi, ¿néemei o finoca ñúefue? Mei afe izóí, fiénidino jíaié fiénidinomo méidollena fecádiaioiza. <sup>35</sup> Mei íadi ómoína éoidinona izíruirediomoi. Abido méidollemo comécíñoeno, fia fecárediomoi, afémacimo ñue finóllena. Afe izóí omoí íllemona áillue ñúefuiai máíñoitiomoi. Afe llezica caifoide Juzíñamui jítoíaiina jíaitiomoi. Mei afémié daje izóí jeruífinidimie. Figora daífinidinomo, daje izóí fiénidinomo afémié jeruíñoeno dájerize fecade. <sup>36</sup> Omoí Moo comínimo dúcaifiredeza, afe dieze jíaimacimo maí omoí dúcaifireiri.

*Jíaima jánana fiéni úriñoeno iri*  
(Mt 7.1-5)

<sup>37</sup> Jíaima jánana maí fiéni úriñoeno omoí iri, áfemona Juzíñamui riire ómoímo jicánoiza. Maí jíaimana duere finótañoeno omoí iri, afe izóí Juzíñamui duere omoí finoiza. Jíaima ómoímo finoca fiénidífue maí omoí féitari, afe izóí Juzíñamui omoí fiénidífue féitaiteza. <sup>38</sup> Jíaimamo maí omoí ífireiri, íemona Juzíñamui ómoímo ífireiteza. Afémié raa omoí ofítara cirígaimo iere ñue fácajano afégaimo jóoneite. Afémié afégaina ñue riire jíllóiciteza. Iemo jíai afégaina caifo jica ebena óruitaita. Afémié afegai jamánomo oruítajamona ana abido cóciite. Jíaimamo cai facáfirena izóí Juzíñamui caimo fácaite.

<sup>39</sup> Jesús bie onótatífue afémacimo llote:

¿Meita uínidimie jíaié uínidimie iodo ifórede? Nibai afe íaillinoi jáidiaillinoína ¿meita dáafomo báitíaiillinoi? <sup>40</sup> Llófuegamacimona dáamie ie llófuetimie baimo onóñede. Mei íadi ie llófueina fuilla mei ie llófuetimie illa izóí iite.

<sup>41</sup> ¿Mei nñie izóí o ama uimo ite jéenide ráaruaina eróiredio, mei íadi dama o uimo ite jéerie rarúnguaina náfueñedio? (Afena daíacade: Aillo fiénidífue omo illa llezica; ¿nñie izóí due jiza oni nibéfodo baíidimie jánana úriredio? Urinidio.) <sup>42</sup> Mei o uimo ite jéerie rarúnguaina o náfueñenia, ¿nñie izóí o ámana “o uimo ite jéenide ráaruaina cue otata,” dáitio? Daíinidio. ¡Comeci dine íairena mei jínofene ñue cóidimiedio! Fueñe o uimo ite áillue rarúnguai maí o oíri; afe mei o ama uimo ite jéenide ráaruai óllena ñue cóitioza.

*Nana amena ie lliziedo ónorede*  
(Mt 7.17-20; 12.34-35)

<sup>43</sup> Ñuera amena fiénide ráajaiina llizínide. Daje izóí fiénide amena ñuera ráajaiina llizínide. <sup>44</sup> Mei naga amena ie llizíllajido onoiga. Jaca jíirede monáigimona jíficollina jofo óñenaza. Daje izóí “zarza” daína íanoride rarócimona jíricue jofo óñega. <sup>45</sup> Ñuera come ñúefuedo úrite, mei ie comécimo ñúefue íllaza. Daje izóí fiénidimie fiéni úrite, mei ie comécimo fiénidífue íllaza. Mei uáfueza o comécimo aillo jebuide raa o fuedo úrillaza.

*Mena jofo nillino rafue*  
(Mt 7.24-27)

<sup>46</sup> Cue dainana inoñediomoi ia znibái mei, “cai Ocuíraima, cai Ocuíraima” daidíomoi?  
<sup>47</sup> Cuemo cacáreizaibitímie, íemo cue daina finófiredímie illa izói ómoimo llóiticue.  
<sup>48</sup> Afémie jofu nállana baitádimie izoide. Afe ñue nífredímie fueñe ana jica jáilliraina raite; ana mairídinomo jónete. Afe mei ille renaila llezica afécomo jainoi riire dúcide. Mei íadi afe jofona jainóñede, mei afeco mozioidillirai mairídinomo jóideza. <sup>49</sup> Mei jáífodo, cuemo cacáreizaibitímie mei íadi cue dainana finóñediómie, bie jáífo jofu nitímie izoide. Bímie riire lllíñede éniemo jofu nite. Afe mei ille renaila llezica afécomo jainoi riire dúcide. Afemona afeco jainode. Iemona afeco due fiébiñeno nine táinocaide.

## 7

### *Romano illaíma ocuífíregamie Jesús jíllotate (Mt 8.5-13)*

<sup>1</sup> Jesús comínimo úrilla fuilla mei Capernaumo jaide. <sup>2</sup> Afénomo daa romano illaíma ite. Afémie ie ocuífíregamiena iere izírute, mei íadi afe ocuífíregamie iere irárede, tíllanomo dúcide. <sup>3</sup> Afe illaíma comini Jesudo úrillana cacáillano, judíuaimona ocuífírede éicomini orede, Jesumo izire jicállena, ie ocuífíregamie jíllotaibillena. <sup>4</sup> Afémaci Jesumo dúcillano iere izire jicádiaioi:

—Baie illaíma iere canórede, <sup>5</sup> mei afémie cai náiraímo caimare coméifírede. Daa afémie cai Juzíñamui uai lloraco nitátate, —daidíaioi.

<sup>6</sup> Iemona Jesús afémaciri jaide. Mei íadi ja afe jofomo áinozilla llezica afe illaíma dáarie ónoigamíai Jesumo orede. Illaíma daina izói Jesuna daidíaioi:

—Ocuíraíma, ona áifedoacañedicue. Cue jofomo o bíllena dúíñede, mei jamáimedicue.

<sup>7</sup> Ie jira dama omo úrizaibíñedicue. Jicana o uaido o daíri, áfemona cue ocuífíregamie jílloteza. <sup>8</sup> Mei cue jáíe illaíma uai anamo iticue. Afe izói cue úíñoga fuíríraíni cue uai anamo ite. Afémacimona dáamiena “Mai jai” cue daíadi, afémie jaide. Iemo jáámiena “Bi” cue daíadi, afémie bite. Cue ocuífíregamiena “Bíemo o táijiri” cue daíadi, afémie áfena finode, —daide.

<sup>9</sup> Jesús áfena cacáillano, afémie dainari caimare fáigacaide. Iemo Jesús afémiedo jáidinomo érocaillano daide:

—Uáfueña ómoína daíiticue: Nana Israel náiraímo bie izói ínnote come jaca baiñedicue, —daide.

<sup>10</sup> Afe orécano meine jofomo jáidiaioimo, afe irárede ocuífíregamie ja jíllodena cíozaidiaioi.

### *Jesús daa fecingo jító tílla abido cáadimiena jaitate*

<sup>11</sup> Bie méifomo Jesús Naína daina jófuego jaide. Ie llófuegamaci naa aillo jáímaciri iedo jáidiaioi. <sup>12</sup> Afe jófuego ja áinozidiaioimo, Jesús tídimie íaioi raíájillana cíode. Afe tídimie ie éimona daade jító. Afe llezica afengo jae fecingo. Aféruido afe jofue comínimona aillo aféngona nabáidiaioi. <sup>13</sup> Ocuíraíma Jesús aféngona cíoillano íemo dúecaide. Dúecaillano daide:

—Mai éeño, —daide.

<sup>14</sup> Afe llezica Jesús “ataúd” daina tídimie illácojimo áinozillano afécoji jetade. Jira afécoji uitino moziñotíaioi. Iemona Jesús tídimiena daide:

—Jítócome, mai náidacai ona daidíe, —daide.

<sup>15</sup> Mei daí daina llezica, afe tídimie raínáicaillano úrite. Afe mei Jesús ie eina daide, “Be, o jító; mai ómicoi jai; uái ómicoi iri,” daide. <sup>16</sup> Nana comini áfena cíoillano jacínaitiaioi. Juzíñamuimo aillo ñúfue jóoniano daidíaioi:

—Birui cai cígiri jamánomoide uai llóraíma cíocailla, —daidíaioi.

Nane jáífodo daidíaioi:

—Juzíñamui ie nairai cánuabilla, —daidíaioi.

<sup>17</sup> Iemona afe bie Jesús finócafue jica jalleide; ua nana Judea éniemo naa afe onífenemo itígobiaido jalleide.

### *Juan Bautista orécano*

*(Mt 11.2-19)*

<sup>18</sup> Juan nana afe Jesús finócano fidide, mei íedo jáidino aféniemo llógaza. <sup>19</sup> Mei íemona afémacimona ménamie uáidota Jesús dine orede. Oriano, bie meita ua bite Cristo dáinana ónoillena jicánotade. Daje izói, meita nibai nai jíáie bíitimie uíñoiticaí, afémie daí jicánotade. <sup>20</sup> Afemona Juan orécano Jesumo dúcillano íena daidíaioi:

—O meita ua bite Cristo dainámiedio áfena ñue onóillena Juan cai jicánotade. Daje izói meita nibai nai jíáie bíitimie uíñoiticaí dáinana ónoillena cai jicánotade, —daidíaiillinoi.

<sup>21</sup> Afe íaillinoi dúcina llezica, Jesús diga comini íaioi íraniamona jíllotate; daje izói dáaruido íaioi ote duícuaímona jíllotate. Daje izói fiénide jóríai úcaigamacina jíllotate. Iemo jíái diga uínidinuaí uina cíoitate. <sup>22</sup> Afe llezica Jesús íaillinoína daide:

—Omicoi cíónafue, naa ómicoi cacánafue diga mai Juaamo llujáiri. Bie izói aféniemo llujáiri: Uínidino ui ja cíoide, íemo macáñedino ja macádeza, íemo chíñaitino ja ñúemacina jaide, íemo jefona cacáñedino ja ñue cacádiaíoi, íemo dáarie tíidino meine abido cáadiaíoi, íemo dúredinomo jíllona uai llógaza. Nana bífuiái mai aféniemo llujáiri. <sup>23</sup> Cuemo íñoñeilliuaina baiñédimie íóbite.

<sup>24</sup> Juan orécano meine abido jailla mei, Jesús Juaado comínimo úrite; daide:

—¿Mei táizicimo minícana cíozaidíomoi? Nibai dáamie ie daina uaina méidofiredimiena cíozaidíomoi. <sup>25</sup> Afe izóidena omoi cíozaiñenia, ¿mei minícana cíozaidíomoi? ¿Meita nibai ñue cíoide ráifide iniroi jítaíidimiena cíozaidíomoi? Onódiomoiza, ñúecuiroi jítaíofiredino illaini jofomo ífirediaíoi; naa dani íaioi comeci jítaina izói itínori. <sup>26</sup> Mei írainomo, ¿minícana cíozaidíomoi? ¿Nibai Juzíñamui uai jino llórainana cíozaidíomoi? Jii, ua, Juzíñamui uai llórainma baimo jamánomoidimiena cíozaidíomoi. <sup>27</sup> Juan baie Cuegáuai dainámie. Jaiái úicodo nai cue biñena llezica, afe uaimo Juzíñamui afémie dibenedo cuena daide:

O bille io ñue finóllena izói, comini íaioi comécido ñue omo jíeruillena cue llujáitimie o uícodo óreitícue.

<sup>28</sup> Nana comínimona ite Juzíñamui uai llórainimona Juan Bautista baimo jamánomoidimiena íñede. Mei jíáfodo, Juzíñamui illáimana illánomona jabóidimie Juan baimo jamánomoide.

<sup>29</sup> Afena cacáillano, Juan báutizaga gobierno íbátaga úcube llíñoraini, naa jíáie báutizaiganori, “Juzíñamui níñfuenidena finódimie,” daidíaioi. <sup>30</sup> Mei jíáfodo Juan báutizañega fariséuai naa báutizañega ocuica uai llófuetínori Juzíñamui íaioiéna mameca ñúefuiái jamairuillano táinomo fáífitatiaíoi. <sup>31</sup> Iemo Ocuírainma Jesús daide:

—Bie monado itínona ¿ñie izói íaioiéna mámeitícue? ¿Mei ñie izói cíoitiaíoi? <sup>32</sup> Jofue cigi íbírímo jífánote úrue izóidiaíoi. Afémaci conímamo ebírede rúado caimátaiacadiaíoi, mei íadi áfena fairíoñediaíoi. Daje izói conímama zúurede rúado fíraacadiaíoi, mei íadi daje izói áfemo cacáreaañediaíoi. Afémaci jaca caimátaitaniaíoi. <sup>33</sup> Afe bie izói ómoimo ite. Mei Juan Bautista billa llezica afémie fimairillano güilleniaí figo güíñede, daje izói vónona jíróñede. Iemona “fiénide jóríai úcaigamiedio” íena daidíomoi. <sup>34</sup> Afe mei cue, afe Nanoide fima Jitó dainámiedícue bitícue. Billano, jíáimaci izói güitícue, íemo jíródícue. Afemona bie izói nane cuena daidíomoi: “Bímie íere güilláredimie; jéerie jírófiredimie. Fiénidífuiaíredino nabáidimie; daje izói gobierno íbátaga úcube llíñoraini

nabáifiredimie,” cuena dáifiredimoi. <sup>35</sup> Comini Juzíñamui orécanona fiéni daidíaioi íadi, Juzíñamui baitaca rafue jieruitinodo jino comínimo ñue cíotaga.

### *Fariseo Simón jofomo Jesús güizájide*

<sup>36</sup> Fariséuaimona dáamie Jesús güizájillena llote. Iemona Jesús afécomo güizájide. Jaillano afecho eromo güirábanimo ráinazaide. <sup>37</sup> Afe llezica, afe jófuego ite fiénide ringo, fariseo Simón Jesús güizábilla fidiillano afécomo bite. Afengo “alabastro” daína nofici finoina duera iciru atide. Aferu ziore cáiredijina oruide. <sup>38</sup> Eebicaillano Jesús idai abimo ráinazaide. Afe llezica ie ui jémedo Jesús idai jocode. Afe mei ie ifótido dote. Duano ñitade; ñítajano ie uiga ziore cáiredijina afémie ídaimo totade. <sup>39</sup> Afe Jesús güillena uáidote fariseo, afengo finócafueña cíoillano, comécido daide: “Bímie ua uai llóramania, bie ringo fiéninana ónoite. Afémie abina nibai aféngona jétatañeite. Mei afengo fiénidingo illaza afémie aféngomona abí ráiruite,” daí comeci facade. <sup>40</sup> Afe jira Jesús fariséona daide: —Simón, cue daa uai omo llóiacadicue, —daide.

Mei jira fariseo uai ote:

—Llófueraima, mei daini, —daide.

<sup>41</sup> Jira Jesús daide:

—Mena come úcomo íaillinoimo iga úcube daje izói meine fecádimiemo írediaillinoi. Dámie quinientos dieze meine írede, íemo jíámie cincuenta dieze meine írede. <sup>42</sup> Mei íadi nágaillinoi afe úcube fecádimiemo íaillinoi méidolle iñena jira, afe fecádimie afe íaillinoi abido írede úcubena féitate. Mei birui cuena daini, mei bíaillinoimona ¿ñímie fecádimiema jamánomo izíruirena? —daide.

<sup>43</sup> Jira Simón uai ote:

—Cúemona, jamánomo aillo illano féitagamie aillo izíruilla, —daide.

Jira Jesús íena daide:

—Ñue onódio, —daide.

<sup>44</sup> Afe mei, Jesús ringomo érocaillano Simona daide:

—¿Bingona cíodio? O jofomo cue billa llezica, cue ídaína jocóñedio, mei jíáfodo bie ringo ie ui jémedo cue ídaína jocode. Jócuano ie ifótido zafénaitade. <sup>45</sup> Iemo o jofomo biticue íadi cuena ñítáñedio, mei íadi afengo jofo cue billa llezica cue idai ñítajana jaca fáicanocañede. <sup>46</sup> Daje izói o jofomo cue dúcina mei cue ifomo cáiredijina totáñedio, mei jíáfodo afengo ziore cáiredijina cue ídaimo totade. <sup>47</sup> Ie jira ona daidicue, bie ringo aillo cuena izíruillamona, afengo finoca aillo fiénidifue dóinana ácatate. Mei jíáfodo jabo cuena izíruitimie íemo ite íaifue jabo dogo.

<sup>48</sup> Mei afe mei Jesús aféngona daide:

—O finoca fiénidifue jae dófideza, —daide.

<sup>49</sup> Afénomo afémie diga ráiide daane güillena uáidogano dani conímana daidíaioi:

—Mei bie ¿ñie come; comínimo ite fiénidifuiaina dóteza? —daidíaioi.

<sup>50</sup> Afe mei Jesús afe ringona daide:

—Mei daingo o ínuado jae jíllodio; mai uái daí o jairi, —daide.

## 8

### *Jesús canófredingoniai*

<sup>1</sup> Bie méifodo, Jesús diga jófuiaido macácaide, naa due illánuiari. Afénuiaido Juzíñamui illáimana illa rafue jino llocana uite. Afe llezica ie nizeca doce dígade oréllino afémiedo jáidiaioi. <sup>2</sup> Afe dáaruído dáarie dúicuaimona ie jíllotaga ringóniai afémiedo jáidiaioi. Iemo jíái dáarie íaioi uícaide fiénide jóriaimona jíllotaga ringóniai iedo jáidiaioi. Afémacimona Magdalena énie ingo Maríana mámeciredingo ite. Aféngomona siete dígade fiénide jóriai



nauí jino oreca. <sup>3</sup> Iemo jiáie canódingo Cuza ai Juana. Afe Cuza illaima Herodes jabóidillaima. Iemo jiáingo Susana. Iemo jiái aillo jiáie ringóniai, íaióimo ite ráaniaina Jesús canódingotiai.

*Ríjifiredimie rafue*

(Mt 13.1-9; Mr 4.1-9)

<sup>4</sup> Afe jófuiaimona aillo comini Jesuna cióillena bitíaiói. Aillo comini dáanomo ofilla llezica, íaiói onóigafuedo Jesús jiáifue íaióimo llófuete. Íaióina daide:

<sup>5</sup> —Ríjifiredimie ie rilliji rizájide. Rizájilla llezica, ie rigájaiimona dáarie iomo baiide. Afe iomo baiídijiai zaizíbide; jiáijiai ófocuzai güiga. <sup>6</sup> Jiáie rigájiai nofíciai emódomo baiide. Aféjiai zícua llezica jainoi iñénari dúizite. <sup>7</sup> Ie mei jiáijiai éegiai cígimo baiide. Afe éegiai jéerie zícua mona aféjiaina írataitano titade. <sup>8</sup> Mei íadi jiáie rigájiai ñuera éniemo baiide. Ñue zícua mei, jamánomo aite. Dáajidemona cien dígaji llizide.

Bie izói úrillano, Jesús ficire daide:

—Cacáacadimie cacai, —daide.

*Cacáacaiñedino jánaillena Jesús comini onóigado úrite*

(Mt 13.10-17; Mr 4.10-12)

<sup>9</sup> Iemona ie llófuegamaci afémiemo jicánotiaiói:

—Afe llogafue ¿ñie izói daiíacade? —daidíaiói.

<sup>10</sup> Jira afémie íaióina daide:

—Juzíñamui ie illáimana illa rafue ónonidifuiái ómoína onótate. Mei íadi jiáimacimo afémaci jánaillena comini onóigado úriticue. Iemona uina cíóñedino izói íitíaiói. Daje izói afe uai afémaci cacana llezica, onóñedino izói íitíaiói.

*Ríjifiredimie rafue Jesús jino uáfodo llote*

(Mt 13.18-23; Mr 4.13-20)

<sup>11</sup> Ríjifiredimiedo lloga rafue bie izói daiíacade: Afe rigájiai daina Juzíñamui lloga ñuera uai. <sup>12</sup> Afe iomo baiídijiai daina ñuera uaina cacádino. Mei íadi cacana mei, Taife billano afe ñuera uaina comini íaiói comécimona féitate. Afémaci jílloneillena, Taife afémaci afe uaina ínotañede. <sup>13</sup> Afe nofíciaimo baiídijiai daina jiáifodo jóide ñuera uaina cacádino. Afe uaina cacáillano caimare otíaiói. Mei íadi afémaci raire zicode raa riire jaináñena izói, Juzíñamuimo afémaci figo jaináñenamona are iñédiaíoi. Nano íanori ínotíaiói. Mei íadi izire íaiói facátalliruimo dúcina llezica ñúefuena fáicanocaitíaiói. <sup>14</sup> Iemo afe éegiai cígimo baiídijiai daina, jiáie ñuera uai cacádino. Mei íadi cacana llezica dani íaiói comeci jítaina diné jáiacadiaíoi. Iemona afémaci comeci oni jiáinomo uilláfuiáido, nocáe builla izói féiraitíaiói. Daje izói iere íaiói ráareiacanado, íemo jiái biniemo ite caimare cai itátafuiáido anáfenogaiáiói izóidiaíoi. Iemona figo llizíñede itíaiói. <sup>15</sup> Mei jiáifodo afe ñuera éniemo baiídijiai daina ñuera uaina cacáreacadino. Afémaci ñuera comécido cacáillano afe uaina ñue náfuetíaiói. Iemona áfena fáicanocaiñeno ñue aite izói jáidiaíoi.

*Boode mechera jánaide izóidifue*

(Mr 4.21-25)

<sup>16</sup> Buna boode mechera retáidoñede. Daje izói buna boode mechera bíira anamo raináñede. Mei íadi jiáifodo boode mechera caifo uáfori cíoidinomo raináfírega, jofó jáidino ñue cíoillena. <sup>17</sup> Mei uáfueza, nana retáidoga ráaniai uáfori jino cíotaibile. Daje izói nana báiñide ráfuiái jino uáfori llócailleza.

<sup>18</sup> Aquíe izóideza ñue omoí cacáreiri: Iere Juzíñamuina onóacadimiemo ie báitaja baímo jamánomo írede, mei íadi Juzíñamui dibéñedo figo onóacañedimie, due ie onóafue féítalle.

*Jesús ei naa ie ámatíari*

(Mt 12.46-50; Mr 3.31-35)

<sup>19</sup> Iemona Jesús ei naa ie ámatiairi ie illánomo dúcidiaioi. Afénomo aillo comini íllaza, afémiemo ánozinidiaioi. <sup>20</sup> Jira dáamie Jesumo lluájide:

—O ei, naa o ámatiairi jino benó itíai. O diga úriacadiaioi, —daide.

<sup>21</sup> Jira Jesús comínina daide:

—Juzíñamui lloga uaina cacáillano afe uai jeire otino cue eina, cue ámatiaina, —daide.

*Jesús jorai bagua naa jairifo diga llícaitate*

*(Mt 8.23-27; Mr 4.35-41)*

<sup>22</sup> Afe mei jiáiruido, Jesús ie llófuegamaciri áillocaemo ana jaillano Jesús daide:

—Mai jorai ruícaferaimo cai jai, —daide.

Iemona jáidiaioi. <sup>23</sup> Ruica íai. Jáitaja llezica, Jesús inide. Afe llezica riírede jairifo jóraimo ónonino raire bite. Riire jáiñuamona afe nocáe buíacade. Afécaena jacire anábaitacade.

<sup>24</sup> Mei jira Jesús cazítatiaioi. Cazítajano íena daidíaioi:

—Llófueraima, Llófueraima, ja buízaidicai! —daidíaioi.

Iemona Jesús náidacaillano jairifo naa jorai bagua diga llícaitate. Afemona nana llícaide; nífuenino jorai uái ite.

<sup>25</sup> Afe mei Jesús ie llófuegamacina daide:

—¿Ico nai Juzíñamuimo ínoñediomo? —daide.

Mei íadi afémaci jacínaitiaioi. Afémiemo caimare fáigacaillano conímamo jicánotiaioi:

—¿Mei bie nie cómeita? Afémie jairifona ocuide, daje izói jáinoina ocuide. Iemo afémie uaina ínotiaioi, —daidíaioi.

*Gerasa éniemo ite fiénide jóriai uícaigamie*

*(Mt 8.28-34; Mr 5.1-20)*

<sup>26</sup> Jailla ícoimo Gerasa éniemo dúcidiaioi. Afénie Galilea énie ruícaferaimo ite. <sup>27</sup> Como ari aféniemo jáidiaioimo, afe jófueмона dáamie Jesús diné bite. Ja diga fimónai. Afémie fiénide jóriai uícaiga. Afémie ínícuro jaca jitáñede. Daje jofomo uái íñede, mei jiáifodo raiáfuaína jofórede. <sup>28</sup> Jesuna cíoillano afémie anamo dújuzaibite. Dújuzaibillano ficire daide:

—Caifoide Juzíñamui Jitó Jesús, ¿nibái mei cuemo jíricaidio? Duere cue o fínoñeillena izire jicádícue, —daide.

<sup>29</sup> Afémie bie izói daide, mei Jesús afémiemo ite fiénide jóriai jino oréllena ocuícaza. Diga ícaíño afémiena fiénide jóriai riire uícade. Afe llezica comini afémie onoi idai diga llojéodo máifirediaioi. Jiáimaci fieni fínoñeillena izire íena rairuídíaioi. Mei íadi afémie afe maia llójejina titáfírede, ie mei afe ie uícaide fiénide jóriai afémiena táizicimo botátafírede. <sup>30</sup> Jira Jesús afémiemo jicánote:

—¿O mámei bu? —daide.

Jira afémie uai ote:

—Legiona mámeiredícue, —daide. Afe “Legiona” daína uai, aillo comini, daíacana.

Afémie bie izói daide mei aillo fiénide jóriai íena uícaideza. <sup>31</sup> Afe bie fiénide jóriai Jesumo izire jicádíaioi duere finótalle íbáirafomo afémaci óreiñellena. <sup>32</sup> Mei afe llezica afénomo ite íconido aillo meróniai güicadiaioiza, fiénide jóriai afe meróniaimo jáillena Jesumo izire jicádíaioi. Iemona Jesús áfena fairíote. <sup>33</sup> Iemona afe fiénide jóriai ímamona jino billano meróniaimo jáidiaioi. Afe mei afe meróniai ápera íconido jabícana jóraimo cocízitiaioi. Dinomo coróbaitiaioi.

<sup>34</sup> Meróniai úiñotino áfena cíoillano jacínaitiaioi. Aferi jacínaillano botádíaioi. Iemona jófueмо lluájidiaioi; daje izói oni fuédamo itícuaimo llotíaioi. <sup>35</sup> Iemona jofue comini afe comuíduemo acárizaidiaioi. Jesús illánomo íai. Dúcina llezica fiénide jóriai jino orécamié Jesús anari uái ráinana cíozaidiaioi. Afe íima ja iniroi jitáide; daje izói ie abina

ñue onode. Afena cíollano iere jacíruitiaioi. <sup>36</sup> Afena cíódino nauí fiénide jóríai uícaigamie jíllotaja oni jíáinomo llúajidiaioi. <sup>37</sup> Mei bíemona nana afe Gerasa énie comíni, afénomona Jesús oni jíáinomo jáillena izire jicádiaioi, mei áfena iere jacíruitiaioiza. Iemona Jesús ana áillocaemo jáizaide, ruica abido jáillena. <sup>38</sup> Afe llezica afe fiénide jóríaina jino orécamie Jesús diga jáillena izire jicade. Mei íadi Jesús áfena fairíoñede; afémiena afénomo fiébitade. Iena daide:

<sup>39</sup> —Mai meine o jofomo jai. Jaillano nana Juzíñamui omo finócafuiaina jino lloiri, —daide.

Iemona afémie jaillano, nana jofue comínimo Juzíñamui íemo finócafuiái jino llúajide.

*Jairo jiza íemo jíáingo Jesús inícuíro jétaibitíngo Jesús jíllotate*  
(Mt 9.18-26; Mr 5.21-43)

<sup>40</sup> Jesús meine jorai ruicáfenemona dúcina llezica, comíni afémiena iere caimare llínotiaioi. Mei nana afémiemo ocuírídiaioiza. <sup>41</sup> Afe llezica Jáirona mámeciredimie dúcide. Afémie Juzíñamui uai lloraco illaíma. Afémie Jesús anamo fueco dine ana bíjicaide. Bíjicaillamo izire daide, <sup>42</sup> “Cue jofomo biri; mei daide cue jiza tíizaideza,” daide. Afengo ja doce fimona ite. Iemona Jesús afémiedo jaide. Jailla llezica diga comíni íedo jaide; iere rillire jáidiaioi.

<sup>43</sup> Afémaci cígimo iráredíngo ite. Afengo doce fimona die dícotailari irárede. Nana aféngomo ite úcube manófiredinomo fuite; mei íadi afémaci aféngona jíllotanidiaioi. <sup>44</sup> Afe ringo jinófene dinena Jesumo billano ie inícuíro fueda jetánote. Ie jetánua llezica afengo die llícaide.

<sup>45</sup> Iemona Jesús jicánote:

—¿Mei bu cue inícuíro jetánoga? —daide.

Iemo nana comíni jáanuano “Ona bu jetáñena,” daidiaioi. Jira Pedro naa ie nabáñiairi daide:

—Llófueraíma, nana comíni rillírenari o ñuitádiaioi. ¿Nibái mei, “Bu cue jeta,” daidio?

<sup>46</sup> Mei íadi Jesús daide:

—Ja onódicueza daa come cuena jetade. Mei cue ríino afe come jíllotajana onódicue, —daide.

<sup>47</sup> Afe jétaibitíngo ja ie báillana onóillano cuidíricana Jesús anamo dújuzaíbite. Iemona afengo jino nana comíni eróicana jáanoñeno ie inícuíro jetáacana rafue llote. Iemo jíái afémie inícuíro jeta llezica ie jíllona llote. <sup>48</sup> Mei jira Jesús aféngona daide:

—Cue jiza, cuemo o ínuamona ja jíllodioza. Jaillano caimare uái o iri, —daide.

<sup>49</sup> Jesús nai úroidemo, daa come Jairo jofómoma Jesús diné bite. Afe Jairo Juzíñamui uai lloraco illaíma. Afe llúábitímie Jáirona daide:

—O jiza ja tíideza. Mai Llófueraímana úridoñeno iri, —daide.

<sup>50</sup> Mei Jesús áfena cacáillano daide:

—O jacíruiñeno iri. Dama Juzíñamuímo ínofireiri. Afemona o jiza jílloteza, —daide.

<sup>51</sup> Afe jofomo íaioi dúcina llezica, nana comíni afe jofo eromo afémie oréñede. Afe jiza moo, ei diga, íemo jíái: Pedro, Santiago, Juan diga jofo uite. <sup>52</sup> Nana comíni afengo tíllari fícirerie éenaitiaioi. Mei íadi Jesús íaioina daide:

—Omoi éeñeno. Afengo tíñedeza, fia iníde, —daide.

<sup>53</sup> Daí afémie dáinari zadáidiaioi, mei afengo tíllana onódiaioiza. <sup>54</sup> Iemona Jesús afengo onoi llínota fíciere daide:

—Jitaíngo, mai náidacai, —daide.

<sup>55</sup> Afemona afengo meine abido caade. Iemo afe daina llezica caifo náidacaide. Afe mei Jesús, “Mai afengo ecari” daide. <sup>56</sup> Afe llezica ie moo íaillinoi iere caimare fáigacaidiaillinoi. Mei íadi Jesús íaillinoina afe ie finócafue bumo llotátañede.

## 9

*Jesús doce dígade ie llófuegamacina oni orede*  
(Mt 10.5-15; Mr 6.7-13)

<sup>1</sup> Jesús doce dígade ie llófuegamacina dáanomo gairítate. Gairítanona afémiemo ite ríino íaioimo fecade, nana jáíforiede fiénide jóriaí jino oréllena. Daje izói nana iráredino jíllotallena ríino afémacimo fecade. <sup>2</sup> Iemo Juzíñamui illáimana illarui rafue íaioina oni llúájitade. Daje izói iráredinona jíllotate. <sup>3</sup> Íaioina daide:

—Omoí jaille llezica minícana uiñeno, fia omoí jairi. Macara jigüida uiñeno iri, daje izói ciríticoí, íemo güíllena, íemo úcube uiñeno iri. Mena caifóferoi uiñeno, daa uiri. <sup>4</sup> Ninó daa jofomo omoí dúcia, afécomo uái iri, afénomona oni omoí jáíñeille dino. <sup>5</sup> Nñe jofue comini ómoína llínoacañenia afénomona oni omoí jairi. Omoí jaille llezica, omoí eiba íaie afémacimo teténocairi. Afedo íaioí comécimo ite íaifue nai íaioimo íllana onótaitiomoi.

<sup>6</sup> Afemona ja oni nana dúgobaiado jáidiaioí. Jaillano ñuera jíllona uai llocana uitíaioí. Daje izói iráredinona jíllotacana uitíaioí.

*Juan Bautista tiilla rafue*  
(Mt 14.1-12; Mr 6.14-29)

<sup>7</sup> Ocuídillaima Herodes nana Jesús finócafuiaina fidide. Iemona Herodes comeci uibílluai iñede, mei dáarie “Juan tiide meine abido cáadimiena jaide,” daidiaioí. <sup>8</sup> Jáímaci, “Juzíñamui uai llóraima Elías meine cíocaizaibilla,” daidiaioí. Iemo jáímaci, “Jaiái ninomo tiide jáie Juzíñamui uai llóraima meine abido cáadimiena jailla,” —daí llotíaioí. <sup>9</sup> Mei jira Herodes daide:

—Nauí cue Juan ifoci jaitátaticue. Iemona ¿mei bie nñmie? Afémiedo diga ráfuiái cacáfiredicue, —daide.

Afe llezica Herodes iere Jesuna cíacade.

*Jesús cinco mil comini ecade*  
(Mt 14.13-21; Mr 6.30-44; Jn 6.1-14)

<sup>10</sup> Ie orécano abido dúcina mei, nana íaioí finócafuiái Jesumo llotíaioí. Afe mei Jesús afémacina oni eneno Betsaida jofue áinomo uite. <sup>11</sup> Mei íadi áfena fidíllano comini afénomo jáidiaioí. Afénomo Jesús caimare afémaci llínote. Juzíñamui illáimana illirui rafue íaioimo llote. Daje izói afénomo iráredinona jíllotate.

<sup>12</sup> Iemo ja nauízaiilla llezica, doce dígamie orécano Jesumo billano daidiaioí:

—Mai, comini íaioí ocózinaillena oni ore, áinori ite jófuiáido güille íaioí jenólleza. Mei benomo cai illánomo güille iñédeza, —daidiaioí.

<sup>13</sup> Mei jáífodo Jesús íaioina daide:

—Afémaci omoí eca, —daide.

Jira ie uai otíaioí:

—Benomo caimo cinco pániai íemo mena chamu ite. Afe baimo iñédeza. ¿Meita nana bie comini ecállena íbajiredicai? —daidiaioí.

<sup>14</sup> Mei afénomo cinco mil comini gairídiaioíza. Mei íadi Jesús llófuegamacina daide:

—Nana bie comini cincuenta dígamierie ana raiziri, —daide.

<sup>15</sup> Daí finua méifodo nana ana raizídaitiaioí. <sup>16</sup> Afe llezica Jesús cinco dígade pániai, íemo mena chamu llínote. Llínvano monamo eróillanona Juzíñamuina afe güílleri “Iere figura,” daide. Daí daina méifodo, afe ditada, ie llófuegamacimo fecade, afémaci comínimo fecállena. <sup>17</sup> Iemona nana áferi ñue jeírediaioí. Afe mei llófuegamaci güígamona fiébidino doce cirigai orúttatiaioí.

*Pedro Jesús Crístona uáfodo jino llote*  
(Mt 16.13-19; Mr 8.27-29)

<sup>18</sup> Afe mei jiáiruido Jesús oni eneno Juzíñamuimo úrizaide. Afénomo ie llófuegamaciri ite. Afémacimo afémie jicánote:

—¿Comini níie izói cuena daidíaiói?

<sup>19</sup> Jira uai otíaiói:

—Dáamierie “Bie Juan Bautista,” daidíaiói, jiáimaci “Bie Elías” daidíaiói, íemo nai jiáimaci “Jaiái Juzíñamui uai lloraima meine abido cáaila” daidíaiói.

<sup>20</sup> Jira Jesús jicánote:

¿Omoi níie izói cuena daidíomói?

Jira Pedro daide:

—Juzíñamui nizeca Cristo dainámiedio, —daide.

*Jesús ie tíille rafue jino llote*  
(Mt 16.20-28; Mr 8.30-9.1)

<sup>21</sup> Iemo afe Pedro llógana afémie jiáie comínimo iere rairuillano ie llófuegamacina áfena bumo llotáañede. <sup>22</sup> Iaióina daide:

—Nanoide íima Jitó Crístodicueza, iere duere finóllicue. Ocuide éinamací cuena ruifíruitiaíói. Daje izói lletáriraini illaini cuena ruifíruitiaíói, íemo jiái ocuica uai llófuefiredino cuena íairuitiaíói. Cuena títaítiaíói, mei íadi daaruíamani íllemona meine abido cáaiticue, —daide.

<sup>23</sup> Afe méifodo nana afémacina daide:

—Ninó dáamie cuedo jáiacania dama ie comeci jitáillana féitaredede. Féitano cuedo jáirede. Afémie cuedo jailla ícoínia tíidena afémie áfena izire ónide. <sup>24</sup> Mei ie caana rairuíacadimie áfena táinomo fáifitaite. Mei jiáifodo cue ícoínia ie caana táinomo fáifitimie afe fáifidena baímo ziiño illínona máíñoite. <sup>25</sup> Mei daa come nana bíníe ráaniaí aillo náamataadi, mei íadi afe llezica dama ie comeci afémie táinocaitaiadi, nana ie maíñoca ráaniaí afémiena jíllotañeite. <sup>26</sup> Ninó daa come cuena meáiruia, daje izói cue uaina meáiruia, afe íbana uire illáimana ana cue billíruimo afémiena meáruiticue. Nanoide íima Jitódicueza, aféruimo Moo Juzíñamui ebírededo bíiticue naa níifuenide Juzíñamui abi imáciri. <sup>27</sup> Uáfuenta ómoína dáititicue: Birui benó itínomona, dáarie nai íaiói tííñena llezica Juzíñamui illáimana illarui cíoitiaíói, —daide.

*Jesús abi jiáifodo méidoficailla*  
(Mt 17.1-8; Mr 9.2-8)

<sup>28</sup> Daíí daína mei ocho dígarui jailla mei, Jesús Juzíñamuimo úrillena caifónedumo jaide. Afémie Pedro, Santiago, Juan dígamie uite. <sup>29</sup> Nai Juzíñamuimo Jesús úrioina llezica, afémie uíeco jiáifodo méidoficaide. Daje llezica ie ínícuiro jamánomo úzere quenire jaide. <sup>30</sup> Afe llezica mena come ie abímo cíocaide. Afe íaillinoí afémie díga úrite. Afe bíaillinoí Moisés Elías díga. <sup>31</sup> Daje llezica ñue ebire quenire cíoide raa afe íaillinoína onífenedo féricaide. Afe íaillinoí Jesús Jerusalemo duere zefuillano tíillífuedo úritiaíói. <sup>32</sup> Afe llezica Pedro naa ie nabáíñiaíiri iere ínie méinegaiaíói ía, ocuíaíói. Afémaci Jesumo ite ebire cíoidena cíodiaíói; daje izói afémie díga itíiaillinoína cíodiaíói. <sup>33</sup> Afe íaillinoí Jesúmona oni jáioicailla llezica, Pedro daide:

—Llófueraíma, ¡nii benomo caímare caí illa! Maí daámani jofóchupina caí nii. Daaco óie, jiáico Moisés ie, íemo jiáico Elías ie, —daide.

Mei íadi Pedro ie daíacana óñoñede. Jira comeci facáñeno ebena daíí daide. <sup>34</sup> Nai ie úrioina llezica, mona ero uíllie íaioína ferínocaide. Mona ero uíllie eromo íaíói íficailla llezica iere jacínaitiaíói. <sup>35</sup> Afe llezica afe uílliemona daa uaina cacádiaíói:

—Bie iere cue izíruiga Jitoza, afémiemo omoi cacáreiri, —daide.

<sup>36</sup> Daií daina méifodo Jesumo érocaidiaioimo, ja dama ite. Afe mei afémaci afe íaioi ciónana bumo lloñediaioi.

*Jesús fiénide jóriaí uícaiga jitócome jílloate*  
(Mt 17.14-21; Mr 9.14-29)

<sup>37</sup> Afe jiáiruido afe ídumona ana íaioi billa llezica, aillo comini io anamo Jesús úiñotiaioi.

<sup>38</sup> Iemona comínimona dáamie ficire lléjecaide:

—Llófueraíma, dúecaillano daade cue jitomo érocai. <sup>39</sup> Fiénide jóriaí riire íena uícade. Afe jóriaí íena caillítacaide, afémiena nano íanori titáfiredede. Afe llezica ie fuémona múllecíai bífiredede. Iena duere finode; afémiena fáicanocaiñede. <sup>40</sup> O llófuegamacimo afe jóriaí jino oréllena izire jicádícue, mei íadi orénidiaioi, —daide.

<sup>41</sup> Jira Jesús uai ote:

—¡Níí jamánomo íinofinidíomoi! Iemo daje izóí ñúefuena iere uáitafiredíomoi. ¿Níie dinó omoi cígimo íredícue omoi cue rídollena? O jitó benomo ati, —daide.

<sup>42</sup> Mei íadi afe jitócome Jesumo ánozilla llezica, fiénide jóriaí afémie ana éniemo dotade. Afe llezica afe jitócome íanori titade. Mei íadi Jesús afe fiénide jóriaína riire dainano oni orede. Afemona Jesús afe jitócome jílloate. Iemona jílloano ie moomo abído ite.

<sup>43</sup> Iemona nana comini Juzíñamuimo ite áillue riínori caimare fáigacaidiaioi.

*Jesús ie tíille rafue meine nane lloate*  
(Mt 17.22-23; Mr 9.30-32)

Nana comini Jesús finócari caimare fáigacaila llezica, afémie ie llófuegamacina daide:

<sup>44</sup> Bíemo ñue omoi cácarei. Afena omoi féitañeno iri. Nanoide íima Jitódícueza, duere cue íaioi finóllena comínimo fécajillicue, —daide.

<sup>45</sup> Mei íadi ie llófuegamaci afe ie dáinana ñue onóñediaioi. Mei afefue afémacimona rairuica. Iemo afe llezica afefue afémiemo jicánuana jacíruitiaioi.

*¿Mei níie come jamánomoina?*  
(Mt 18.1-5; Mr 9.33-37)

<sup>46</sup> Afe méifomo ie llofúegamaci dani jofu eróicana conímana “cáimona níimie iere jamánomoina” daina júfidotiaioi. <sup>47</sup> Mei íadi Jesús íaioi comeci úrillana onode. Iemona daa úrue uáidota ie abímo naidánete. <sup>48</sup> Daií naidániano afémacina daide:

—Bie úrue cue mámecido llínotímie cuena llínote. Iemo cuena llínotímie, ana cue orédímiena llínote. Mei uafue, omoi cígiri jabóidímie Juzíñamui eróicana iere jamánomoidímie, —daide Jesús.

*Caina uáitañedímie cai dibénemo ite*  
(Mr 9.38-40)

<sup>49</sup> Ie jira Juan Jesuna daide:

—Llófueraíma nauí o mámecido fiénide jóriaí orédímiena ciódícai. Afémie cai díga macáñena jira afémiena rairuídícai, —daide.

<sup>50</sup> Mei jira Jesús íena daide:

—Afe izóí finóidímie rairuñeno iri. Mei caina uáitañedímie cai dibénemo íteza, —daide.

*Jesús Sanatíago Juan díga lletade*

<sup>51</sup> Jesús monamo jáiacanarui ánozilla llezica, afémie Jerusalemo jáillena riire mamérite. <sup>52</sup> Daií mamérrillano uícodo raire uai llóitino orede. Afémaci Samaría éniemo ite duera jófue mo jáidiaioi íaioi dúciillíco raire báillena. <sup>53</sup> Mei íadi afeno ítímaci Jesús naa uícodo orécanori Jerusalén diné íaioi jáiacana jira, íaioína llínoacañediaioi. <sup>54</sup> Ie llofúegamacimona Santiago, Juan díga áfena cióillano Jesuna daide:

—Ocuíraima, jaiái uai llóraima Elías fínua izói, bimaci fúilleza monámona iraina cai jíriredicái ¿meita jitáidío? —daide.

<sup>55</sup> Iemona Jesús íaillínomo éroillano llétajano daide:

—Omicoi jainaina joréñona onóñediomicoi. <sup>56</sup> Mei uafue, Nanoide fima Jitódicueza comini niné táinocaitallena biñédicue, mei jiáifodo comínina jíllotaibiticue, —daide.

Iemona oni jiáigobiaimo jáidiaioi.

*Jesudo jáiacadino bie izói írediaioi*  
(Mt 8.19-22)

<sup>57</sup> Iodo íaioi jailla llezica dáamie Jesuna daide:

—Ocuíraima, o jáiacana diné o díga jáiacadicue, —daide.

<sup>58</sup> Jira Jesús afémiena daide:

—Nana jazici ríllenai uái ífireillino ite. Daje izói caifodo féedinuiai uái íaioi ráillino ite. Mei íadi Nanoide fima Jitódicueza dánori uái cue illino iñede, —daide.

<sup>59</sup> Jesús jiáimiena daide:

—Mai cuedo bi, —daide.

Mei íadi afémie daide:

—Fueñe cue moo tílla ráiaiticueza cue ore, —daide.

<sup>60</sup> Jira Jesús ie uai ote:

—Juzíñamuina jíruiñedino tíide izóidino; mai mei afémaci jádie ua tíitimiena ráilleza, mei o cuedo bi, billano Juzíñamui illáimana illirui lluájiri, —daide.

<sup>61</sup> Afe mei jiáimie Jesuna daide:

—Ocuíraima, odo bíacadicue, mei íadi fueñe cue jofo ero comini jáillena facáduaiticueza cue ore, —daide.

<sup>62</sup> Jira Jesús íena daide:

—Daa come ie táijina ja táinia mei, jiáinomo comeci fácaja fiénide. Ie jira bie izóidimie Juzíñamui illáimana illíruimo táijillena ráifiñede, —daide.

## 10

*Jesús setenta dígamie ñúefue lluájillena orede*

<sup>1</sup> Bie méifodo, Ocuíraima Jesús nane setenta dígamie nizede. Níziano ménamierie ie uícodo orede. Nana ie jáiacanagobiaimo íaioina orede. <sup>2</sup> Íaioina daide:

—Uáfueza, jacáfaimo ite raa ailla llezica jofo óitino iñena izói, birui Juzíñamui illáimana illíruimo jofo órede comini aillo ite. Mei íadi afémaci jofo óitino figo iñede. (Afe jofo óitino jiáimacimo ñúefue llóitino.) Ie jira cai Ocuíraimamo, jacafai Naama izóidimie mo jiáie ñúefue llóitimacina omoi jicari, afémacina afémie oréllena. <sup>3</sup> Jira omoi jai. Jaillano bie uaimo omoi coméciri: illáirede jazici jicóniai cígimo ovejai jiza ória izói, ómoina orédicue.

<sup>4</sup> Omoi jailla llezica cirítico uiñeno iri, daje izói úcubena uiñeno iri. O eiba icona uiñeno iri. Io anamo jiáimaci díga are naidáicana úhuriñeno iri. <sup>5</sup> Ninó daa jofomo jofo o jáiadi afeco comínina fueñe bie izói omoi daiíri: “Caimare uái illífue bie jofomo íteza.” <sup>6</sup> Afécomo comécina caimare uái itino ia, afe uai afémaci íaioieite. Mei íadi afe izoide comini afénomo iñenia, omoi daií uáidua uai abído ómoimo bíteza. <sup>7</sup> Oni omoi jáiñeille dinó dáacomo uái iri. Omoi íaioi ecálleze güítimoiza. Omoi jirótalleze jirori. Mei jiáimacina omoi cánua jira, nana áfemo táijiraima ie táijinado íbáredeza. Ie jira naga jófuedo güicaiñeno iri. <sup>8</sup> Ninó jófuego omoi dúcia caimare omoi íaioi llínoia, güíllena omoi íaioi ecaa afe omoi güiri.

<sup>9</sup> Daje izói afénomo iráredinuiaina omoi jíllotari. Afe llezica afémacina daiíri, “Juzíñamui illáimana illarui ómoimo ja ánozideza,” daiíri. <sup>10</sup> Mei íadi jiáie jófuego omoi dúcia afeno comini ómoina llínoiacañeniadi, jino jofue cígimo ite macáraodo jairi. Jaillano daiíri:

<sup>11</sup> “Cai eíbamo aífide omoi jofue íaie ómoimo teténoitícaí. Daií finódicai, fiéni caimo omoi

finuana uáitallena. Mei íadi bíena omoi onoiri: Juzíñamui illáimana illarui ja ómoimo áinozideza.” <sup>12</sup> Omoína dáitícue, íraicaiño izire jicánolliruimo bie jofue comini Sodoma comini duere finóbina baimo duere finólliaioi.

*Náfuefinide jófuiái comini  
(Mt 11.20-24)*

<sup>13</sup> ¡Corazín jofue comini, nii dúerenal! ¡Daje izói Betsaida jofue comini nii dúerenal! Mei íaioi cígiri cue finoca ciórainina raa, áfena Tiro jofue comini naa Sidón jofue comini cígimo nauí finódicuena nibai jaiái uícodo íaioi comeci ífueña méidotiaioi. Uafue íaioi comeci ífueña méiduamona ja diga fimona jailla. Afe llezica zúunaia jítáfirega jítiroi jítáacadiaioi. Daje izói aféruimo íaioi zúunailla jino ácatallena jízefo ífomo jutáacadiaioi. <sup>14</sup> Mei íadi íraicaiño izire jicánolliruimo Tiro Sidón diga duere finóbina baimo Corazín íemo Betsaida comini duere finólliaioi. <sup>15</sup> Daje izói Jesús Capernaum jofue comini lletade; íaioi dibénedo daide: ¿Meita íaioi íinoga jofue monamo úrede? ¿Daí comeci facádiaioi, ero ua? Mei jíáfodo íaioína dáitícue, tíidino illánomo ana dotaca izói niné táinocaitalliaioi.

<sup>16</sup> Iemo ie setenta nizécamacina daide:

—Omoína cacáreidimie cuemo cacáreide. Iemo jíái ómoína ruifíruitimie cuena ruifíruite. Daje izói cuena ruifíruitimie cue ana orédimiena ruifíruite, —daide.

*Oreca setenta dígadino abido dáanomo dúcina*

<sup>17</sup> Nauí oreca setenta dígadino meine abido caimare dúcidiaioi. Jesuna daidíaioi:

—Ocuíraima, nana cai llógamo cacáreidiaioi, ua daje izói fiénide joríaí o mámeçido daína uaimo cacáreidiaioi, —daidíaioi.

<sup>18</sup> Jira Jesús daide:

—Jii, Satanás monamona ameo izói baiíllana ciódicue. <sup>19</sup> Daje izói jaióniaí naa acáiduaí ómoína izi cácatañelle ríino nauí ómoimo cue iga. Daí nana cai bacáuai izóidimie Taife ríinona izi cácañeno anáfenodiomoi. <sup>20</sup> Mei íadi fiénide joríaí jino ória ríino ómoimo íllado figo coméçiño iri. Mei jíáfodo omoi mámeçiaí monamo cúeinari omoi íóbiri, —daide.

*Dama Jesús cáimacailla  
(Mt 11.25-27; 13.16-17)*

<sup>21</sup> Afe llezica, Ñuera Joreño Jesuna íóbitade. Íóbicaillano Jesús daide:

—Cue Moo, mona énie diga Ocuíraimadio, omo ñuefue mámeitícue, mei ráfueña baitádinomona o dibénedo retáidoga onóigafuiaí onótañedio. Mei jíáfodo coméçina níífuenide úrue izoide jamai comínimo aféfuiaína jino cíotatio. Jii, Moo, mei o daí jítaidíozá, —daide.

<sup>22</sup> Jesús nai úrioide: “Cue Moo, nana ráaniaí cuemo fecádio. Moo Juzíñamui, o Jitódicue, mei íadi buna uáfodo cuena ñue ónoñena. O cue Móodioza, dama o ñue cuena onona. Daje izói buna uáfodo ona ñue ónoñena. Cue, o Jitódicueza, dama cue ñue ona onona. Iemo jíái daje izói o Jitó onótaacagano ñue ona ónoitiaioi, —daide.

<sup>23</sup> Iemona ie llófuegamacimo érocaillano, daní íaioína daide:

—Omoi ciona raana ciónamona ¡nii íóbirediomoi! <sup>24</sup> Mei ómoína daidícue, diga Juzíñamui uai llóraini naa illáimaiaíri omoi ciona raana cióacadiaioi mei íadi jaca cióñediaioi. Daje izói omoi cacana uai cacáacadiaioi, mei íadi jaca cacáñediaioi, —daide.

*Samaria ímie rafue*

<sup>25</sup> Afe mei ocuica uai llófuefiredimie Jesumo úrizaide, afémie facátallena. Afémiemo jicánote:

—Llófueraíma; zíiñoña cue íllena ¿nii izói íredícue? —daide.

<sup>26</sup> Jira Jesús uai ote:

—Ocuica uaimo ¿mei nii uai cúeína? Afena ¿nii izói facádotio? —daide.

<sup>27</sup> Jira ocuica uai llófuefiredimie uai ote:



—Afe uai bie izói daide: Nana o comécido o Ocuide Juzíñamuina izíruiri. Daje izói nana o joréñodo, íemo nana o máiriedo, íemo nana o ifoci úrillado íena izíruiri. Afe llezica dama o abina o izíruilla izói afe izói o aino cómena izíruiri, —daide.

<sup>28</sup> Mei jira Jesús daide:

—Ñue fairíotio. Bie izói o finóadi nia are cáaitio, —daide.

<sup>29</sup> Mei íadi Ocuica Uai llófuefiredimie ie facátalle uai baiñenamona, ñue jicánotimie daiíllena jíáie uai Jesumo jicánote:

—¿Ñie come cue abi ímiena jóoneiticue? —daide.

<sup>30</sup> Jira Jesús uai ote:

—Dáamie Jerusalémona oni Jericomo jaide. Ie jailla llezica merírifiredino afémie fatíaiói. Fájano ie ráaniai bairódiaíói naa inícuiruaimo. Afémiena iere ízitataíói; jabo ie títano íena fiénocaidiaíói. <sup>31</sup> Afe méifodo lletáriraima ónonino daje llezica afe iodo jaide. Mei íadi fagámiena cíoillano onido jaide. <sup>32</sup> Afe mei Leví nairai ímie afénomo dúcide. Daje izói afémiemo fia érocaillano onido jaide. <sup>33</sup> Afe méifodo Samaria ímie daje iodo jaide. Fagámiena cíoillano afémiemo zúucaillano iere dúcaide. <sup>34</sup> Mei íemona fagámie billano, cáirediji naa vino diga ie boáfiaí manode. Afe mei afe boáfiaí maite. Maía méifomo dama ie búrromo caifo rainada dúciracomo uite. Uillano afécomo afémiena uíñote. <sup>35</sup> Afe jíáiruido, afe Samaria ímie ja jíazaiilla llezica, mena úcube uano afeco naama íbade. Ibajano daide: “Bie iráredimie ñue o uíñori. Bímiemo omo cue iga úcube baimo o dotáadi, uire meine cue bia omoí cue íbálleza,” daide. <sup>36</sup> Mei íemona birui cuemo llone: Bie daámanidemona ¿ñimie ñue finoca bie merírifiredino fagámie aino come finófírena izói? —daide Jesús.

<sup>37</sup> Jira ocuica uai llófuefiredimie daide:

—Mei afémiemo dúcaidimie fagámie aino cómena, —daide.

Iemona Jesús íena daide:

—Jaillano bímie fínua izói o finori, —daide.

### *Jesús Marta María íainguai jofomo dúcide*

<sup>38</sup> Jesús iodo jaillano duera jófuego dúcide. Afénomo ite Marta daíango ie jofomo Jesuna caímare llínote. <sup>39</sup> Marta ebuño María Jesús anamo ráizaíbite ie daínana ñue cáaillena. <sup>40</sup> Mei íadi Marta diga jetácaganiaimo comeci llícibite. Iemona Jesumo billano daide:

—Ocuíraima, cue ebuño nana táijina cuemo fiénocaide, ¿aferi comécíñedio? Cue dine ore, afengo cue cánuaiábilleza, —daide.

<sup>41</sup> Mei jíáifodo Jesús afengo uai ote:

—Marta, iere o jetácaga raamo o comeci llícitaitio. Afe táijnamo iere duere zefuídio.

<sup>42</sup> Mei íadi daa jitáirede raana nai omo íñede. Ie mei María afe baimo ñuera raa jae nizede. Afengo nizeda oga raa bu báiroñeite, —daide.

## 11

### *Juzíñamuimo cai úrifíreillena Jesús llote*

(Mt 6.9-15; 7.7-11)

<sup>1</sup> Afe mei jíáiruido Jesús bai táinomo Juzíñamuimo úrite. Juzíñamuimo ie úrilla llícaillamona ie llófuegamacimona dáamie daide:

—Nauí Juan ie llófuegamacimo ie llua izói, Juzíñamuimo cai úrillena cai llofue, —daide.

<sup>2</sup> Jira Jesús íaíoina daide:

—Juzíñamuimo omoí úria bie izói daiíri:

Cai Moo Juzíñamui, monamo itio; o mámecido ñúefue nitácaza.

O illáimana illíruí raire bíteza.

Dinomo monamo o comeci jitáillafue íaíoi fínua izói, afe izói bie éniemo finótaíbiteza.

<sup>3</sup> Cai nágarui jitailla gülleniai, birui caimo fecari.

<sup>4</sup> Cai finoca fiénidifue iba caimo oñeno iri, mei afe izói jiáimaci fiéni caimo finódiaioi íadi, afémacimo ibana oñédicai.

Iaifuemo cai báinñellena caina úñori.

Iemo afe llezica nana fiénidifuiaimona caina jíllotari.

<sup>5</sup> Iemo nane Jesús daide:

—Bie fia cue daiille ráfuemo omoi coméciiri. Omoimona dáamie ie onóigamie ite. Afe o onóigamie dáaferui o jofomo jaillano ona daide: “Daámani páaniai fia cuemo feca, <sup>6</sup> mei cue onóigamie ailli cue jofomo dúcidez. Mei íadi afémie cue ecállena iñede,” daide. <sup>7</sup> Ie jira nibai jofona bie izói uai óredio. “Cue úrue diga inídicueza, cuena áfedoñeno iri. Naze ibáicaza, o jicaca raa omo fecállena jino bínidicue.” <sup>8</sup> Mei íadi ómoína dáitícue, afe jícaibitímie o nabaina jira fécaiñeitio, mei íadi afémie are ona áfedoñellena nana ie jitaica ráaniaina jeruñeno fécaítio. <sup>9</sup> Afe jira ómoína dáitícue: Juziñamuimo jicari, afémie fécaiteza. Jenori, báitioza. Nazémoma jíriri, íemona afémie tuizáibiteza. <sup>10</sup> Mei uáfueza, jicádimie jaca llínote; jenódimie jaca baite; nazémoma uáidotimiemo naze tuiñooca.

<sup>11</sup> Omoimona úrueredímie ie jitó güllena jicáadi ¿meita noñcina iga? Jaca íniga. Daje izói chamu jicáadi, ¿meita jaiona iga? Iniga. <sup>12</sup> Iemo jiái jigí jicáadi ¿meita acáidona iga? Iniga. <sup>13</sup> Mei fiénidíomoi íadi, ñuera ráaniaina omoi úruiaimo fécajana onódiomoi. Mei íadi afe baimo monamo ite omoi Moo afémie Ñuera Joréñona jícaitinomo fécaite, —daide.

*Fiénide jóriai ríino Jesumo illa afémiemo jitádiaioi*

*(Mt 12.22-30; Mr 3.20-27)*

<sup>14</sup> Afe mei Jesús uáinidimiemo ite fiénide jóriai jino orede. Afe jáillamona afe uáinidímie ja ñue úrite. Aferi comini caimare fáigacaidiaioi. <sup>15</sup> Mei íadi dáarie daidíaioi:

—Bímie Beelzebú daína fiénide jóriai illaíma ríinodo, afe fiénide joriaina jino orede, —daidíaioi.

<sup>16</sup> Jiáimaci ie facátallena, “Monámona uai dánamona comuide ciórainina raa fino,” daidíaioi. <sup>17</sup> Mei íadi Jesús afémaci comeci úrillana onóillano daide:

—Ñinó daje náiraina ite comini bozíetaillano conima diga fuiríadi, afe nairai niné táinocaite. Daje izói daaco ero comini bozíetaia, afémaci daje izói are iñeno niné táinocaitiaioi. <sup>18</sup> Afe izói, mei Satanás dama íemo jaináidinona, dani abina uáitaiadi, ¿mei ñie izói ie ócuifirena ríino are ite? Bie ómoimo llóitícue, mei cuena “Fiénide joriaina Beelzebú ríinodo jino orédio,” daidíomoi. <sup>19</sup> Mei íadi daítadema, jiáiuaina ómoimo jicánotícue, Omoído jáidinomo ite fiénide jóriai orelle ríino, ¿bu mei fecaca? Ie jira dani afémaci ñue onóñeno taino omoi llua jino ciotatiaioi. <sup>20</sup> Mei jiáfodo uáfueza, Juziñamui ríinodo fiénide joriaina jino oréfiredicue. Iemo bifue bie izói ómoína dáiacade: Juziñamui illáimana illirui ja ómoimo dúcidez.

<sup>21</sup> Mei daa maíride cómemo ie ñue fuirira raa ia, ie jofona ñue úiñofirede. Afedo ie uíñuamona buna ie raana bairónide. <sup>22</sup> Mei afémie baimo ríiredímie bíadi, nibai íena anáfenoite. Anáfenuano ie ínoga abi ríidua raana báiroite. Afe mei afe báiruaibitímie nana íemo ite ráaniaina úite.

<sup>23</sup> Cuena ruifíruitímie cuena uáitate. Daje izói cue diga dájena táijiñedímie, cue ráaie oni jutádimie izoide, mei afémie jiáimaci cuemo ínnotañedeza, —daide Jesús.

*Jino oreca fiénide jóriai meine dáamiemo bite*

*(Mt 12.43-45)*

<sup>24</sup> Jesús nai llíicaiñeno úrite:

—Fiénide jóriai cómemona jino jáiadi, táiziciaido ie uái illino jenócana uite. Ie uái illino baiñenamona bie izói comeci facade. “Meine abido cue billa cómemo jáitícue,” daide.

<sup>25</sup> Afe jóriai meine afe cómemo bítemo, ñue rafoda finócaco izói baizáibite. <sup>26</sup> Iemona

afémie baimo siete diga jamánomo fiénide jóriai uájide. Afémaci nana afe cómemo jofu jaillano itíaioi. Afemona afe come nauí ie fiénina baimo biruí jamánomo fiénide, —daide.

### *Uáfueña ióbidino*

<sup>27</sup> Mei Jesús nai bífuiaido úrioina llezica, comínimona daa ringo ficire Jesudo úrite:

—O jocódingo nii caimare érocaillangona. Daje izói o comútingo nii caimare ióbillangona, —daide.

<sup>28</sup> Mei jira Jesús jiáfodo daide:

—Juzíñamui llógamo cacáfiredino, daje izói áfena ñue ínotino o dainango baimo jamánomo caimare itíaioi, —daide.

### *Fiénide comini ciórainina raa finóllena Jesumo jicádiaioi*

*(Mt 12.38-42; Mr 8.12)*

<sup>29</sup> Comini Jesús onífenedo ofídiaioi. Jesús íaioina daide:

—Biruímo ite comini iere fiénidino. Afémaci ciórainina raana finóllena jicáfirediaioi, mei íadi nauí Juzíñamui uai llóraima Jonás onótagafue baimo jiáfueña llóñeilliaioi. <sup>30</sup> Mei Nínive jófueño ite comínimo Jonás Juzíñamui orécamierna áioi onóllena afémie jónega raa izóidimie. Afémie illa izói, biruíllaido ite comínimo Nanoide íma Jitó Cristo afe bie comini onóllena jónellimienra íte. <sup>31</sup> Írairuimo bigímaiaí izire jicánolle llezica sur dibénemo jica ite nairaí illaingo bigímaiaímo fiénidífuiaí nítaite. Mei afengo jica énie fuédamona Salomón comeci onóigafueño cacáreizaíbiteza. Mei íadi biruí benomo Salomón baimo baitádimie illa. <sup>32</sup> Daje izói bigímaiaímo írairuimo izire jicánolle llezica, Nínivemo ite comini bimácimo fiénidífuiaí nítaite. Mei Nínivemo ite comini Jonás Juzíñamui uai íaioimo llua llezica, íaioi comeci itífueña méidotiaioi. Mei íadi biruí benomo Jonás baimo jamánomoidimie ite.

### *Cai illafue ñue egáñote raa*

*(Mt 5.15; 6.22-23)*

<sup>33</sup> Uneca mechera bu báinino jóoneñede. Daje izói cajón anamo buna mechera retáidoñena. Mei jiáfodo uneda caifo jica rainaca, jofu eromo jáitino ñue cíollena. <sup>34</sup> Ñúfueño o comécilla omo ñue egáñote raa izoide. Jira mechera egáioinamona o uído cíonana o ióbitaja izói, afe izói ñúfuiaí o jítaigana o comeci ífueña caimare itátaite. Iemona ñúfueño o comécillado nana o illafue jaícina ñue joide. Mei íadi ñúfueño o comécíñeniadi, jítifodo mácaja izói itio; nana o comeci ífue zuure íteza. <sup>35</sup> Mei jira omo ite mechera egáioina izoide raa, dúide izói méidoñellena ñue rairuí. <sup>36</sup> Mei nágarui ñúfuiaímo féitaño o comécia, mechera egáñuamo uáfori cíoina izói, nana o illáfueña ñue uáfodo cíoitio, —dinori Jesús úrite.

### *Fariséuai daje izói ocuica uai llófuéñinori imaci fiénidífué Jesús jino llote*

*(Mt 23.1-36; Mr 12.38-40; Lc 20.45-47)*

<sup>37</sup> Jesús ie úrilla llícaillamona daa fariseo ímie ie diga güizájillena Jesumo llote. Jesús jofu jaillano güiránomo ráinazaide. <sup>38</sup> Afémie afémaci finófírena izói finóñede, mei afémie íaífué múiñua joreño onoi jócua, finóñeno güíteza. Aferi afe Jesús uitímie fáigacaide. <sup>39</sup> Mei íadi Ocuíraima Jesús íena daide:

—Omoi fariséuai jiróraco naa plato diga jócua izói jinófene ñue jocódiomoi, mei íadi jofu erófenena jocóñediomoi. Afe izói nana omoi jinófenena ñue rairuídiomoi, mei íadi jofu comeci dinena, merírillado omoi oga raa ite; daje izói fiéni omoi íllado omoi oga raa ite. <sup>40</sup> ¡Comécina úriñedinodiomoi! ¿Onóñediomoi za comini jinófene finódimie, íemo íaioi ero diné comeci finódimie dáamie? <sup>41</sup> Ñúfuiaí comécido omoi onónamona ómoimo ite raana jeruíño dúeredinomo ía fecari. Afemona nana ráaniaí ja ómoimo íáinino íitíaioi.

<sup>42</sup> Fariséuai, ¡nii omoi dúerena! Omoi riga ráamona diez dígademonaa daa Juzíñamuimo dúide raana afémiemo ñue fecáfirediomoí. Omoimo ite “menta” daína rarócimona afémiemo fecáfirediomoí. Daje izói “ruda” daína rarócimona daa fecáfirediomoí. Iemo jái omoi poróto coduaimona due Juzíñamui íena máme-firediomoí. Mei íadi comécina jáicina jóidifuemo naa Juzíñamuina izíruillana náfueñediomoí. Aquíe izói írediomoí. Afe llezica omoi jáie finóacaigafuena féitaño finori.

<sup>43</sup> Fariséuai, ¡nii omoi dúerena! Juzíñamui uai lloraco eromo jamánomo ñue ráiraniaina jicáfirediomoí. Daje izói jofue cigido macáaodo omoi jáia, comini jacírede illaíma uáidua izói omoi íaíoi uáidollena iere gáidiomoí.

<sup>44</sup> Ocuica uai llófue-firedino naa fariséuairi, ¡nii omoi dúerena! Jínofene dine ñue cíoina mei jofona comeci dine ráataitíomoí. Cíñoena énie anamo tíidino ráigano izóidiomoí. Comini afe acónido ónonino macádiaíoi.

<sup>45</sup> Iemona ocuica uai llófue-firedinomona dáamie afe uai ote:

—Llófueraíma, jadíe izói o daína nane caína rícaítade, —daide.

<sup>46</sup> Jira Jesús daide:

—Ocuica uai llófuetino, daje izói ¡nii jamánomo omoi dúerena! Mei ocuínide méerede raa izoide jáímamo jaca llonódacafirediomoíza. Aféfuiaína buna ocuínide. Afe omoi riire ocuícana canófinidiomoí.

<sup>47</sup> ¡Nii omoi dúerena! Mei jáiai omoi nánoragíma faga Juzíñamui uai llóraini raíafu izoide tíidímie jóoniacona ébirerie finódiomoíza. <sup>48</sup> Daí omoi fínuado jáiai afémaci finócafuena jéruitíomoí. Mei afémaci afe uai llóraini titádiaíoi, íemo birui afémaci raíafu izoide jóoniacona meine abido nitátatiomoí.

<sup>49</sup> Ie jira Juzíñamui nana ráfuiaí onóillano, bie izói daide: “Afémacimo cue uai llórainina óreitícue. Daje izói jáie cue nizécano íaíoimo óreitícue. Afémacimona dáarie titaitiaíoi. Jáímacina duere finóllena rácaítiaíoi,” daide. <sup>50</sup> Mei uáfueza, birui itínomo, nana jáiai faga uai llóraini íbana óite. Uafue, énie fínuamona biruimo nana tíidino íbana óite. <sup>51</sup> Faga Abel ígímamona Zacarías tíllaruimo íbana óite. Afe Zacaríasna Juzíñamui gairíraco eromo ite altar áinori fatíaíoi. Jira ómoína dáitícue, biruimo itínomo Juzíñamui afe titácano íbana óite.

<sup>52</sup> Ocuica uai llófuetino, ¡nii omoi dúerena! Mei nauí Juzíñamui ómoimo fecaca ie ñue báitaja uai ie illáimana illánomo jofo omoi jáillena, áfena ñue náfueñediomoíza. Iemo afe llezica onóiacadinomona áfena rairuídíomoíza, —dinori Jesús úrite.

<sup>53</sup> Jesús bie izói íaíoína daína llezica, ocuica uai llófuetino naa fariséuairi afémiemo jamánomo rícaidiaíoi. Iemona díga jicánoiacaga uáillaído afémiena áfedodiaíoi. <sup>54</sup> Irebaí izóidena afémie óllena jifánodoídiaíoi. Daí finódiaíoi, ie daína uáillaído fiénidífuiaí afémiemo nitállena.

## 12

### *Comécina íairena mei jinófenena ñue cíoidino Jesús lletade*

<sup>1</sup> Afe dáaruído díga náiraíai dáanomo iere gairídíai. Gairíllamona conímaíaina zaizídíai. Iemo Jesús ie llófuegamacina nano fueñe daide:

—Fariséuaimona díga comini comécina íairena mei abina ñue cíoidino ite. Afémaci daí íllamona abí omoi rairuiri, mei afe íaíoimo ite íaífue pan fáitara “levadura” izóideza. Due jiza jóonega ía, nana afe erona maíñode. <sup>2</sup> Nana báiino daína uai jino uáfodo cíozite. Daje izói nana báiino retáidoga raa uáfomo báifite. <sup>3</sup> Mei íemona, nana jítfomo omoi báiino úrilla uallaí jino úzefomo cacaille. Daje izói jofo eromo báiino omoi daína uai comini dáanomo uáidota afémaci cacáicana ficire llole.

*¿Ñie cómena jacírui redicai?  
(Mt 10.28-31)*

<sup>4</sup> Omoi cue nabáiñiaidiomoi, jira bie izói ómoína dáitícue. Fia abi íeizi titáfirede comínina jacíruiñeno iri. Afe mei afémaci ómoimo íaioi finolle jiáifuenta iñede. <sup>5</sup> Mei jiáifodo omoi jacíruiñimie llóitícue. Abi íeizi titaja méifomo boode jóraimo comeci dotáfiredimiēna omoi jacíruiñi.

<sup>6</sup> Onódiomoi za, cinco diga ófocuiño mena úcubetunido ibárede. Mei íadi afémacimona Juziñamui dáamiena féitañede. <sup>7</sup> Iemo jiái ómoimo ite ifótirai illa dígatirai facádoga. Daiítadeza jacíruiñeno iri. Mei omoi, aillo ófocuzai baímo ráifidiomoi za.

*Comini eróicana Jesuna jieruitino  
(Mt 10.32-33; 12.32; 10.19-20)*

<sup>8</sup> Omoína dáitícue: Nanoide íima Jitódicueza, comini eróicana nana cuena jieruitinona afe izói Juziñamui abi imaci eróicana jieruiticue. <sup>9</sup> Iemo daje izói comini eróicana cuena jáanoitínona, afe izói Juziñamui abi imaci eróicana jáanoiticue.

<sup>10</sup> Iemo nane jiáifue, ninó daa come Nanoide íima Jitona íaire dáia, afémie daína íaifue dórede. Mei íadi ninó dáamie Ñuera Joreño na íaire dáia, afe jaca dónide.

<sup>11</sup> Iemo ninó jiáiruido Juziñamui uai llorácomo afémaci omoi uíadi afemo comeci llícitaiñeno iri. Daje izói izire jicánofiredinomo, naa ocuidillaini diga, afémacimo omoi íaioi uia, omoi daiíacana uaimo comeci llícitaiñeno iri. <sup>12</sup> Mei omoi úriacanamo dúcille llezica, Juziñamui Ñuera Joreño omoi daiíillifuenta ómoimo llóiteza, —daide.

*Comini ráarena jacírede*

<sup>13</sup> Cominimona dáamie Jesuna daide:

—Llófueraíma, cócomo fiébide feci ráamona, cuemo dúina dieze cue ama cuemo ílleza, o lloiri, —daide.

<sup>14</sup> Jira Jesús afémiena daide:

—Ebe, omoi cígimo izire jicánofireitimiena, daje izói fécafireitimiena ¿bu cue jóonia? Jóoneñegacue, —daide.

<sup>15</sup> Jesús nane dáanommo daide:

—Nana úradoillafuiaimona caade come izói, abí omoi rairuiri. Mei come ñue illafue, aillo ráarenamona óñega.

<sup>16</sup> Afe mei bie jino onótate raafue llote:

—Nauí iere ráaredimie ite. Afémie jacáfaiai iere áillamona jofo olle llízie iere ite.

<sup>17</sup> Afemona iere ráaredimie comeci facade: “¿Mei ñie izói íitícue? Afe áillue llízie éenollino iñede.”

<sup>18</sup> Nane dáanommo comeci facade: “Cue finóllemo ja uíbicaidícue. Cuemo ite éenoracuai júdaiano jamánomo áillocuaina nitátaitícue. Afécuaímo nana jofo cue olle llíziena éenoitícue. Daje izói nana cuemo ite raana afécuaímo jóneitícue. <sup>19</sup> Afe mei dama cue abina dáitícue, ‘Ja aillo raa jofo ofítaticue; áfedo diga fimona cáaitícue. Nágarui táijíñeno fia güítícue. Iemona fia uái íitícue. Aillo vino júruano, áferi caimare ífireitícue,’ ” daide.

<sup>20</sup> Mei íadi Juziñamui íena daide: “Comécina onóñedimiedio. Fui naio tíitio. Afe mei o ofítaga ráaniai ¿bu náamatalle?” daide. <sup>21</sup> Mei dama ie abi íena aillo raana ofítaitimie daií íteza, mei daií afémie ofítaja llezica, Juziñamui jítainamo comeciñede. Comeciñeno, afémie Juziñamui eróicana iere dúeredimiena jaide, —Jesús daide.

*Juziñamui ie úruiaína ñue rairuide  
(Mt 6.25-34)*

<sup>22</sup> Afe méifomo Jesús ie llófuegamacina daide:

—Jira ómoína dáitícue, omoi güiáacaga güillemo comeci omoi llícitaiñeno iri. Daje izói omoi jítáacaga inícuromo comeci llícitaiñeno iri. <sup>23</sup> Cai ñue illafue cai güille baimo ráifide. Iemo jiái cai abi cai inícuuro baimo ráifide. <sup>24</sup> Mai “cuervo” daína cháafona eróidemo comeciiri. Afémaci jaca riñediaioi; daje izói llizíllanai jofo oñediaioi. Daje izói afémaci güille éenoraco iñede, naa íaioi ofítaranori. Mei íadi Juzíñamui afémacina ecade. Ie mei omoi afe ófocuizai baimo jamánomo ráifidiomoi. <sup>25</sup> Omoimona, comeci iere llíciamona, ¿mei bu ie zairilla dinori baimo medio metro zairirena? <sup>26</sup> Mei duera raana finónidiomoi ía, ¿nibái mei jiáie raa finuamo iere comeciidiomoi?

<sup>27</sup> Raroci záfia zeríllamo omoi comeciiri. Afémaci tájiñediaioi; daje izói raana niñediaioi. Mei íadi jiáifodo ómoína dáitícue, jaiai illaíma Salomón ñue cíoide raana jamánomo ráarede íadi, bie záfia ebírena izói, ebírediroina jítáñede. <sup>28</sup> Mei Juzíñamui daí raroci ebire cíotaiadi, afémie jeruíñeno ómoína iníroina jítate, jabo ínotinodiomoi íadi. <sup>29</sup> Afe jira benómona o güiáacaga raa, o jirole diga zuure jenóñeno iri; daa áfemo comeci llícitaiñeno iri. <sup>30</sup> Mei bínie comini daa afe izóidemo jaritaidiaioi. Mei íadi omoi Móorediomoi. Afe omoi Moo Juzíñamui nana afe ráaniaina omoi jítáillana onódeza. <sup>31</sup> Iemona Juzíñamui illáimana illáruimo dúide raamo raire áfemo omoi comeciiori. Iemo afémie nana bie raana ómoimo fécaiteza.

*Monamo cai jirídollena ofítaredicai*  
(Mt 6.19-21)

<sup>32</sup> Cue izíruiga ovejai izóidiomoiza, jacíruiñeno iri. Dúemacidiomoi íadi, o Moo ie illáimana illano ómoiena mamécade. <sup>33</sup> Omoimo ite raa fecari. Fécajano raana jítáidinomo ine. Daí omoi finóadi, Moo Juzíñamui comeci jítainana finoitomoi. Iemona monamo ie illánomo ñúefuiai ofítaitiomoi. Daje izói jaca ninomo fúíñeite ñúefuiai ómoiena monamo ómoimo íite. Afénomo merírifiredimie jaca jáinide. Daje izói afénomo ícuai güíñeite. <sup>34</sup> Mei uáfueza, omoi ofítaga raa illánomo, afénomo jiái o comeci íite.

*Nágarui ñue finóbiredicai*

<sup>35</sup> Benómona jaca nágarui ñue omoi finóbifireiri. Nauíllamona comini mechera unéfirena izói, abí omoi rairuiri. <sup>36</sup> Jofo naama ocuífiregano, áirena ráfueмона meine ie dúciacana uícomo íaioi afémiemo ocuírina izói, afe izói cue billíruimo omoi ocuíriri. Afémaci ñue ocuíridiaioi, afe jofo naama nazémoma uáidoia raire íemo túíñuabiliena. <sup>37</sup> Afe izoide ocuífiregano jaca iníñeno íaioi naama bíllemo ñue ocuíridiaioi. Daí íaioi illa afémie cíozaiBILLA llezica, afémaci ja ñue íaioi finóbillari íóbicaidiaioi. Uáfueña ómoína dáitícue: Afe íaioi naama afémacina güiránomo ráinaite. Raina mei dama afémie íaioi güíllena bai ráiziite. <sup>38</sup> Mei nibai dáaferui llezica afémie dúciadi, nibai monáiacademo afémie dúcia, afémaci uícomo iníñeno ocuíridiaioi. Iemona afémaci íóbicaitiaioi. <sup>39</sup> Iemo jiáifue dibénedo bie izói omoi onoiri: jofo naama merírizaibitímie bille monana onóia, afémie iníñeno ocuírite. Iemona jofo naama merírizaibitínona ie jofona túíñotañeite, ie raa íaioi mériñeillena. <sup>40</sup> Afe izói ñue omoi mamériri, mei Nanoide fima Jitó comini comeciñeilliruimo ónonino déizaibite, —daide Jesús.

*Raire ínofirede ocuífregamie, íemo jiái ínofinide ocuífregamie*  
(Mt 24.45-51)

<sup>41</sup> Mei jira Pedro Jesumo jicánote:

—Ocuíraíma, bífueña, ¿ñie comínimo llotio? ¿Dani caimo, nibai nana comini íena llotio? —daide.

<sup>42</sup> Jira Ocuíraíma daide:

—Mei daa jofo naama ie ocuífrega jabóidillaíma eneno mamede. Jofo naama jica jáiacana uícomo, ie jofo ero raana afe jabóidillaímamo llonódacaide. Afe llezica nana jofo

ero táijidino ecállena afémiemo jóonenocai. Daií jóonega jabóidillaíma jaca nágarui ñue ínofiregamiena írede. Daje izóí afémie ñue onódimiena írede. <sup>43</sup> Afe izóidimie nana íemo llonódacaiga raa nágarui ñue finófirede. Ie jira jofo naama meine bille llezica, daií ie íllana cíozaibite. Iemona afe jabóidillaíma iere cáimacai, mei nana ie ocuica raana ñue ícoimo fuitádeza. <sup>44</sup> Uáfueña ómoína daidícue, jofo naama afe ínofirega ocuífiregamíemo nana íemo ite raa, llonódacai. <sup>45</sup> Mei jíáfodo, afe jabóidillaíma jofo naama are bíñeite daínano, jíáie jofo eromo táijidínona duere finóadi, afe jabóidillaíma iere cacáfinidimiena jaide. Mei afe llezica afémie jofo ero táijitatingo fiéni finódeza. Iemo aillo güíteza, aillo jiródeza. Jírúa mei jífáitateza. <sup>46</sup> Daií ie illa llezica, afémie due jiza comécíñeitemo jofo naama dénuaibite. Onóñeilliruimo dúciite. Dúciillano afe jabóidillaímana jofo naama jamánomo duere fínoite. Nana jíáie ínofinidino duere zefuilla izóí, afémie íena duere finótaite.

<sup>47</sup> Ninó daa ocuífiregamie ie naama comeci jitailla táijinana onode íadi, áfemo jaca ñue finóbiñede, daje izóí áfemo cacáreacañede, afe ocuífiregamie duere finoda iere izi cácatalle.

<sup>48</sup> Mei jíáie ocuífiregamie ie naama jítaillana onóñede íadi, dama fiéni ia, afémie jabo izi cácatalle. Bie jíáie uaimo omoí cácarei. Aillo igámíemona aillo jícaitiaíoi. Daje izóí ñue ínogamíemo díga ñúefue jónefirediaíoi. Ie jira afe aillo jónefiregamíemona aillo ócutiaíoi.

*Comíni énenorie ráinuaibíticue  
(Mt 10.34-36)*

<sup>49</sup> Cue bie éniemo irai izóí bónuaiibíticue. Aferai raire bóollena iere oíacadícue. <sup>50</sup> Ja bautismo izoide, izi cácanafuedo facátallícue. Afénomo nai dúciñedemo raire uícomo aferui dúciñenari duere zéfufiredícue. <sup>51</sup> ¿Ñibai bíniemo caimare dájena uái illí fue atídío, cuena daidíomoi? Omoína daíitícue, afe izóí biñédícueza; comíni énenorie ráinuaibíticue. <sup>52</sup> Mei benómona dácomo ite cinco dígadimie cue ícoína eneno ráidoizitiaíoi. Afémacimona daámami cuemo ínoitiaíoi; íemo jadíe enéfenemo ménade ínoñedímaci ráidoizillanona conima díga fúiritiaíoi. <sup>53</sup> Cuemo ínuamona da jító ie moo dínená ruifíruille. Daje izóí jító ie moo cuemo ínuá jira dájena uái íñeno íena ruifíruillano éoite. Iemo jíái, ei jiza cuemo ínuamona ei dínená ruifíruille. Dájena uái íñeitiaínguai. Daje izóí jífaiño cuemo ínuá jira mio dínená ruifíruille. Afe íbana mio ie jífaiño díga dájena uái íñeitiaínguai, —daide Jesús.

*Iraíruillaí dúciacana onótaité raa  
(Mt 16.1-4; Mr 8.11-13)*

<sup>54</sup> Afe mei nane comínina Jesús daide:

—Fuirína nairíadi “noci bíite” daidíomoi. Afe mei ua bíide. <sup>55</sup> Daje izóí ñue mona monáillado “fímona baizájilla” daidíomoi. Iemona jaca fímonána jaide. <sup>56</sup> ¡Omoí comécina íáirena mei abina ñue cíodinodíomoi! Noci bííllana onódíomoi, íemo fímona baizájillana onódíomoi, mei íadi birui omoí cígímo cue finoca onótaitífuiaína onóñedíomoi.

*O díga ícírítimie raire manánaitari  
(Mt 5.25-26)*

<sup>57</sup> ¿Ñibai mei comeci jáicina jóina izóí, daní conímamo jícanoñedíomoi? <sup>58</sup> Daa come o llógídoiacania, ríimacímamo ómícoí úrizaiilla llezica, nai ómícoí dúciñena llezica io anamo afefue ñue o záitari, riire jícanoraímamo o ie izájíñeillena. Izire jícanoraímamo o ie izájíadi, afe izire jícanoraíma fiénidino llaitáfiredínomo o izájíte. Iemo afémaci ona llavéracomo íbaitiaíoi. <sup>59</sup> Uafue ona daíitícue o llavétatímie jícala úcube ie jícaja díeze o íbaíñenia afécomona jaca jino bíñeítío, —Jesús dínorí daide.

## 13

*Cai comeci ifue iere raire méidoredicai*

<sup>1</sup> Aféruillaido comínimona dáarie Jesumo Pilato jiáimaci fiēni faaja lluáibitiaioi. Naui Galilea imácimona dáarie Juzíñamui ióbillena faga rille fécajilla llezica, Pilato afémacina fate. Fáajano íaioi die íaioi fecaca rille die diga Pilato tamede. Daíi ie fínuana jñi íaire cíoina! <sup>2</sup> Jira Jesús daide:

—Omoi bie Galilea comínimo ¿ñie izói coméidiomoi? ¿Meita afémaci jiáie Galilea comini baímo fiénidino, jira afémaci raamo jíridiaioi? <sup>3</sup> Afe izóíñede, ómoína dáitícue. Mei jira omoi comeci ifue omoi méidoñenia, nana daje izói niné táinocaitiomoi. <sup>4</sup> Iemo jiáifuemo omoi coméiiri. Naui Jerusalemo iere caifo jica caifóidico ite. Afe iere caifóidico, Siloéna mámeçirede. Afeco díillamona dieciocho diga comini jíitafidiaioi. ¿Meita afémaci Jerusalemo ite jiáimaci baímo fiénidino? ¿Meita jira daíi zefuídiaioi? <sup>5</sup> Omoína daidícueza, afe izóíñede. Mei jira omoi comeci ifue omoi méidoñenia nana omoi niné táinocaitiomoi, —daide.

*Higuera daína llizíñede amena rafue*

<sup>6</sup> Afe mei Jesús bie jiáie íaioi onóigafue afémacimo llote:

—Da come higuera daína amena ie jacáfaimo rite. Afe mei afena llizíadi daíi eróizaide. Eróizaidemo jaca llizíñede. <sup>7</sup> Ie jira afémie jacafai uíñotimiena daide: “Ero, daámani fimona bie amena llizíadi daíi eróizabifiredicuemo jaca llizíñede. Llizíñedeza, mai o tieri. Fia cue jacafai llótaidoteza.” <sup>8</sup> Jira afe jacafai uíñotimie uai ote: “Naama, bie fimónamo mai nai cai tieñeilli. Afe amena moi ñue fínuano júnaitícue. <sup>9</sup> Nibai áfemona llíziteza. Mei íadi áfemona llízíñenia tielle,” —daide.

*Jesús ocózinaillaruimo abina ana jíicaidíngona jíllotate*

<sup>10</sup> Jiáie ocózinaillaruimo Jesús Juzíñamui uai llorácomo llófuete. <sup>11</sup> Afe llezica afénomo dieciocho fimónamo abina ana jíicaillari iráredíngo illa. Naui fiénide jóríai aféngona daíi finoca. Afengo caifo jaícina jaca náidacainide. <sup>12</sup> Jesús aféngona cíoillano ie jíirite. Daide:

—Ríngo, o irárenamona ja jíllotio, —daide.

<sup>13</sup> Daíi daínano Jesús ie onoi aféngomo bitade. Bitá llezica afengo ñue jaícina náidacaide. Afe dáaruido afengo ñúefue Juzíñamuimo llote. <sup>14</sup> Mei íadi áferi Juzíñamui uai lloraco illaíma rícaide, ocózinaillaruimo Jesús afengo jíllotaja jira. Afémie comínina daide:

—Seis diga mona tájiredicai, aféruillaido omoi jílloilena bírediomoi. Mei íadi ocózinaillaruimo omoi abina jíllotaibiñeno iri, —daide.

<sup>15</sup> Jira Jesús ie uai ote:

—Comécina íáirena mei abina ñue cíoidinodiomoi. Omoi cuinaca burro, íemo juráreto ocózinaillaruido ¿meita jainoi ie jíruaillena zuitáñediomoi? ¿Zuitáfirediomoi! <sup>16</sup> Afe izói bie Abrahámona comuídíngo ie irárenamona ¿meita ocózinaillaruimo zuitánidícue? Mei aféngona Taife dieciocho diga fimona ja cuinaca izói duere finódeza, —daide.

<sup>17</sup> Jesús daíi daína cacáillano, ie éoidino méaicaidiaioi. Mei íadi nana comini afe Jesús finoca áillue ñúefuiairi ióbidiaioi.

*Mostaza daína raroci jéenide íj rafue*

(Mt 13.31-32; Mr 4.30-32)

<sup>18</sup> Iemona Jesús daide:

—Juzíñamui illáimana illáruina omoi ónoillena ¿mei ñie izói jino cíotaitícue? ¿Ñie izói afénona mámeitícue? <sup>19</sup> Afe illarui mostaza daína raroci jéenide íjiaí izoide. Daa come aféjiaína ie jacáfaimo rite. Afe jéenide íjiaí ríllamona afe jéejínide zícua caifo amena dínorí aillo zairide. Afe ícairuaimo feede ófocuzai jíllaina nitíaioi.



*Levadura rafue*  
(Mt 13.33)

<sup>20</sup> Nane Jesús daide:

—¿Ñiie izói Juzíñamui illáimana illáruina mámeiticue? <sup>21</sup> Afe illáruina “levadura” daina pan aillo fáitate raa izoide. Daa ringo daámani julleco harínana oruítajano áfemo due jiza fáitarana tamede. Iemona nana afe iféllana mulleda oni aillo móonaitade, —daide.

*Rillírede naze izoide rafue*  
(Mt 7.13-14, 21-23)

<sup>22</sup> Jesús Jerusalemo jailla llezica, áfemo ite jofue comínina llófuete, naa jéenidigobiaimo. <sup>23</sup> Afénomo dáamie Jesumo jicánote:

—Ocuíraima, ¿meita jilloitino dúemaci, ero ua? —daide.

Jira Jesús afémie uai ote:

<sup>24</sup> —Juzíñamui illáimana illánomo jofo jáirao rillírede naze izoide. Afe rillírede naze izóidedo jofo omoi jáillena riire omoi mamériri. Mei ómoína dáiticeuza, aillo comini afénomo jofo jáiacaitiaioi, mei íadi jáinitiaioiza. <sup>25</sup> Mei jofo naama náidacaillano naze ibaille mei, omoi ja jinófenemo fiébitiomo. Afe llezica nazémona jíjiritiomo: “Ocuíraima, naze caimo tuiño” dáitiomo. Afe llezica afémie jofona uai óite: “Omoi ninó comínidiomoiza, ómoína onóñedicue,” dáite. <sup>26</sup> Iemona omoi bie izói dáitiomo: “Cai, o diga güiticaí, daje izói o diga jiródicaí. Cai jofue cigi iomo caina llófuefiredio,” dáitiomo. <sup>27</sup> Mei íadi nane afémie uai óite: “Jae ómoína daidicue, ninó comínidiomoiza ómoína onóñedicue. Omoi nana fiénidifue finófirediomoiza cúemona oni jai,” dáite. <sup>28</sup> Iemona afénomo jino éenaitiomo. Daje izói zúurenayona murímuritiomo. Mei Juzíñamui illáimana illánomo Abraham, íemo Isaac, íemo Jacob jofo jáillana cíoitimoiza, naa Juzíñamui uai jino llórainiri. Mei íadi afe llezica omoi ja jino dotállimoiza. <sup>29</sup> Mei uáfueza, nágafeniamona billano, diga ínotino Juzíñamui illáimana illánomo jofo jáillano güizáibitiaioi. <sup>30</sup> Mei afe llezica dámerie óodaficaidino uícofcaitiaioi. Daje izói dáarie uícofcaidino óodafcaitiaioi, —daide Jesús

*Jesús Jerusalén comíniri eede*  
(Mt 23.37-39)

<sup>31</sup> Aféruido fariséuaimona dámerie dúciillano Jesuna daidíaioi:

—Herodes o fáiacadeza, benómona oni jairi, —daidíaioi.

<sup>32</sup> Jira Jesús uai ote:

—Mai afe iere abi ráiruide egaí izoide Herodes omoi llujáiri: “Cacai. Bímonado íemo daje izói uire jiti, fiénide joríaiaína jino óreiticue. Daje izói iráredina jillotaiticue. Iemo bai ie uire áfemo cue táijina fúitaiticueza,” daí omoi llujáiri. <sup>33</sup> Mei íadi birui bie cue bíllaodo nai jáiredicue. Daje izói uire jiti nai jáiredicue, íemo bai ie uire nai jáiredicue. Mei Juzíñamui uai llóramadiceuza, Jerusalén jinomo oni jica tíinidiceuza, —daide.

<sup>34</sup> Iemo Jesús éecana daide: “¡Jerusalén comini! ¡Ñií íaioi dúerena! Juzíñamui uai llórainina fáfirediaioi. Daje izói Juzíñamui íaioimo oreca uai llujáitino nófiéna níjifirediaioi. ¡Diga icaiño íaioína átava ie átavachingo íaico anamo bícua izói, íaioína cue anamo bícóacadice! Mei íadi áfena jíeruiñediaioi. <sup>35</sup> Ie jira omoi cacai, uire jáíruido omoi jofue zóofegacona mámeite. Omoína daidicue, afénomona are cuena cíóñeitiomo. Mei cuena “Juzíñamui mámeido bitímie caimare íóbidimie” omoi dáíñelle dinó cuena cíóñeitiomo, —dinori Jesús daide.

## 14

*Abi fáillari duere zefuídimie Jesús jillotata*

<sup>1</sup> Ie mei jiáie ocózinaillarui mo Jesús fariséuai illaíma dine güizájide. Afe llezica jiáie fariséuai Jesumo janónaioicana eróidiaioi. <sup>2</sup> Afénomo Jesús uiecori daa abina fáillari duere zefuídime illa. <sup>3</sup> Mei jira Jesús ocuica uai llófuefiredinomo jicánote naa fariséuairi.

—Ocózinaillaruido ¿meita iráredime jíllotarede? ¿Níbai jíllotanide? —daide.

<sup>4</sup> Mei íadi afémaci uai oñeno tí daií itíaioi. Iemona afe iráredime bai uáidota jíllotate. Jíllotajano, “Mai o jairi,” daide. <sup>5</sup> Afe mei Jesús fariséuaina daide:

—Omoimona bu ocózinaillarui mo íemo ite burro, níbai juráreto, ifomo baiía ¿meita raire naado óñega? ¿Ocózinaillarui íadi jaca raire caifo ófirediomo! —daide.

<sup>6</sup> Afemona afe uaina jaca ónidiaioi.

### *Airena ráfuego uáidoga comini*

<sup>7</sup> Afe güilláfuego bite lloga comini illáicomini ráira izóidino ráillena izire jenódiaioi. Nana uícofiacadiaioi. Jesús áfena cíoillano bie izói íaioina llófuete:

<sup>8</sup> —Ninó dáamie árenafuego omoí uáidoia, illaíma ráiranomo ráiñeno iri. Mei o baimo jamánomoidime níbai dúciiteza. <sup>9</sup> Iemona omoí uáidote rafue naama omo lluáibite. “O ráirano mai bímiemo feca,” ona dáite. Afemona íraie ráiranomo meáire ráizaitio. <sup>10</sup> Mei jiáifodo ninó dáamie iráizillena o jírria, bai ícoimo ite ráiranomo o ráiri. Afe mei o uáidote rafue naama billa llezica, afémie ona dáite: “Cue onógamie, bai benó ñuera ráiranomo bi,” dáite. Afe daií nana güiránomo o diga ráiedino eróicana afe rafue naama ñúefue omo jóoneiteza. <sup>11</sup> Mei jira naga come dama ie abina jamánomoidena fínoitimie, jamáimiena óreite. Daje izói “Jiba cómedicue” daidímie, jamánomoidimiena jáitaite, —daide.

<sup>12</sup> Afe dáaruido, Jesús ie uáidotimiena daide:

—Güilla rafue o finoa o onógamaci uáidoñeno iri, naa o ámatiairi. Daje izói o comini uáidoñeno iri, naa o áinori ite ráanaitimaciri. Mei afe íbana ona uáidoitiaioi. Afe daií íbaja izói máiñoitio. <sup>13</sup> Mei jiáifodo güilla rafue o finoa dúeredino uáidori naa aidáimaciri. Daje izói júbene ídainidino uáidori naa uina cíoñedinori. <sup>14</sup> Afemona iere caimare íitioza. Mei afémaci afe íbana omo finónidiaioi. Mei íadi tíide comécina jaícina jóidino nífuenidino meine abido cáairuimo o íbaja ízoide raa máiñoitioza.

### *Aillue güilla ráfuego jiáifuena ñue cai onótaita*

<sup>15</sup> Afe güilla ráfuego Jesús diga ráiedinomona bífuena cacáillano dáamie Jesuna daide:

—Juzíñamui illáimana illíruimo nabáiritimie caimare ite, —daide.

<sup>16</sup> Mei jira Jesús íena daide:

—Daa come áillue güilla rafue finode. Afe ráfuego gairíllena aillo comini jírritade. <sup>17</sup> Ja rafue mámiarui mo táijina ñue fuilla llezica, ie ocuífregamie ie uáidoganomo lluájitate, bie izói daiíllena: “Ja nana raa ñue finócaza, mai omoí biri.” <sup>18</sup> Mei íadi afe llezica illa dígamie: “Iere cue jétalle íllaza, bínidicue,” daide. Nanóidime daide: “Como cue íbaca cue jacafai méiñuacadicueza; bínidicueza. Cuena ícíñeno iri,” daide. <sup>19</sup> Iemo jiáimie daide: “Ja cinco diga juráreto naa íaioi nabai diga íbádicueza. Aféretuai fueñe fácajiacadicueza. Bínidicueza, cuena ícíñeno iri,” daide. <sup>20</sup> Iemo nane jiáimie daide: “Como fueñe ringo otícueza, bínidicue. Eróíñeno iri.” <sup>21</sup> Iemona afe ocuífregamie meine jofomo jaillano ie orédimie mo bie izói íaioi daiízia lluájide. Aferi rafue naama iere ríicaide. Afe jira ie ocuífregamiena daide: “Jofue cígimo ite áillue macáraodo naa duera iodo mai raire jai. Aféuaimona dúeredino naa aidáimaci diga bené atiri. Daje llezica júbene ídainidino naa uínidinori benomo atiri,” daide. <sup>22</sup> Afe méifodo íanori íllamona afe ocuífregamie billano daide: “Cue naama, o ocuilla izói ja finódicueza. Mei íadi nai ñue oruíñede. Nai ráiillinona ite,” daide. <sup>23</sup> Iemona afe naama ocuífregamiena daide: “Mai jofue jinómona joide íuaido, áillue iodo naa dúeodo o jairi. Aféuaimona cue jofu íaioi oruítabilleza ríire oreri.

<sup>24</sup> Mei uáfueña ómoína dáitícue: Cue diga güizáibillena fueñe cue uáidogamona buna cue finoca güillena güñeitiaioi,” daide.

*Crístodo cai jaille juárede*

<sup>25</sup> Aféruillaido diga comini Jesudo jáidiaioi. Afe llezica afémie meine gírecaillano íedo jáidinona daide:

<sup>26</sup> —Dáamie cuedo jáiacana llezica, ie móotiana cue baimo izíruiadi cue llófuegamiena ínide. Daje izói dáamie ie aina, ie úruiana, ie ámatiana, daje izói dama ie abina cue baimo izíruiá, afémie cuedo bínide. <sup>27</sup> Daje izói dáamie cuedo jaille ícoína ie tílla izire oía afémie cue llófuegamiena ínide. <sup>28</sup> Bífueño comeci facari: ómoimona dáamie jofo níacana uícodo, fueñe comeci facade. Daií comeci facárede ie ofítaga raa ñue nílana fuite dainana onóillena. <sup>29</sup> Dáamie daií comeci fácañenia, jofo jáillirai ie naidánia mei, figo ofíñena jira ñue fuitáñeno zoofeite. Iemona afe mei áfena cíoitino afémiena zánoitiaioi. <sup>30</sup> “Bímie jofo níacade íadi fuitánide,” dáitiaioi. <sup>31</sup> Daje izói daa illaíma jóbairiacana uícodo fueñe comeci ñue facárede. “¿Meita cuemo ite diez mil fuíríraini, baie cai diga fuírízabite veinte mil fuírírainina, ñibai anáfenoredicai? ¿Ñibai nai anáfenonidicai?” daií comeci raire uícodo facárede. <sup>32</sup> Afémie ñue comeci fácano: “Baie bitino anáfenonidicai” daiíadi, afémie afe fuírízabitino nai dúciñena llezica, manánaillena llujáitina óreite, icíriñeno dájena illifue jicánollena. <sup>33</sup> Afe izói ómoimona ninó dáamie nana íemo ite raana zóofeacañenia, cue llófuegamiena jáinide.

*Sal ie ríino íñenia jaca ráifiñede  
(Mt 5.13; Mr 9.50)*

<sup>34</sup> Sal jaca ñuera, mei íadi ie ríino íñenia jaca jáíie raamo jóonenide. <sup>35</sup> Jacafai éniemo jóonegana canóñede. Daje izói riga raa junáillena fiénide. Jaca éenoñeno oni dotárede. Aquíe izóideza cacácadino mai omoi cacai, —daide.

## 15

*Oveja oni féiraila rafue  
(Mt 18.10-14)*

<sup>1</sup> Afe mei nana gobierno íbátaga úcube llínoraímaci naa fiénidifuiáiredinori Jesús úrillamo cacárezaíbitiaioi. <sup>2</sup> Iemona fariséuai naa ocuica uai llófuefiredino Jesús zanódiaioi; daidíaioi:

—Bímie fiénidifuiáiredinona caimare uáidota afémaciri güite, —daidíaioi.

<sup>3</sup> Afemona Jesús bie onótatifue llote:

<sup>4</sup> —Ómoimona dáamie cien diga ovéjaiaí ia, afe ovéjaiaímona daa féiraia, áfena riire jénoite. Mei uáfueza, afémie mo fiébide noventa y nueve ovéjaiaí fiiano afe daa féiraitena afémie baille dínó riire jénoite. <sup>5</sup> Afe mei afe féiraitimie baillano caimare ie fecábemo bítano jofomo uite. <sup>6</sup> Jofomo dúciillano ie onóigamacina naa ie aino comíniri daánomo gairítajano íaioína dáite: “Ja féiraite oveja cue báigaza. Mai cue diga caimare omoi iri.” <sup>7</sup> Mei jira ómoína daidícue: “Afe daje izói daa fiénidifuiáiredimie ie comeci ifue méiduari monamo itino jamánomo íóbidiaioi. Mei íadi noventa y nueve diga comeci ifue méidonide Juzíñamuimona oni ñibéfedo jáiñedinori jofófemo íóbidiaioi.

*Ucubetuni niné bailla rafue*

<sup>8</sup> Bie jáíie ñúfueño omoi cacarei. Daa ringomo diez diga úcubetuni ite. Afemona dáatuni baide. Afe jenóllena mechera unede. Afe llezica jofo ero rafode. Afe bie izóidedo afe úcubetuni jenócana uite ie baille dínó. <sup>9</sup> Afétuni ie báillamona ie onóigangotiaí naa ie aino imáciri daánomo íaioi gairítano íaioína daide: “Jae niné baide úcubetuni ja cue báigaza, mai cue diga caimare omoi iri.” <sup>10</sup> Nane ómoína dáitícue: “Afe izói fiénidifuiáiredimie ie comeci ifue méiduari Juzíñamui abi imaci iere íóbidiaioi,” —daidícue.

### *Moo anámona oni botade jitó rafue*

<sup>11</sup> Jesús nane jiáifue llote:

—Daa come mena jitórede. <sup>12</sup> Afe íaillinoimona íraimie ie moona daide: “O fecalle ráamona cuemo duide dibene cuemo ine,” daide. Iemona afe íaillinoi moo íemo ite ráaniai íaillinoimo fecade. <sup>13</sup> Afe méifodo íanori íllamona íraimie íemo duide ráaniai jiáimamo fecade. Fécajano afe iba úcube llínnota jica jiáie éniemo jaide. Afénomo afémie iere fienu illáfuemo jaillano, nana ie llínoga úcube táinomo dótajide. <sup>14</sup> Iemo ie uiga úcube fuite. Afe llezica afe éniemo aillo júbietaidimaci. Aféruillaído afémie iere jufíruite. <sup>15</sup> Iemona afeno itímiemo táijina jénuaide. Iemona afe énie ímie ie tóica meróniai uíñollena orede. <sup>16</sup> Afémie iere júbie méiniamona meróniai ecáinamona güíacade, íadi ninó buna ie ecáñena. <sup>17</sup> Afemona afénomo dama comeci facade: “Cue moo jofomo ñue ecaca táijitagano ¡nií aillo illa! Iaiói jeírillamona fiébifirede. ¡Cue nibai benomo júbieri tíiticue! <sup>18</sup> Meine cue moo illánomo jáiticue. Dúciillano íena dáiticue: Moo, omo fiénidífue finódicue. Daje izói Juzíñamuimo fiénidífue finódicue. <sup>19</sup> Cuena cue jitó dáíñeitioza. Fia o táijitagamienu mai cue mameri, dáiticue,” afémie comeci facade. <sup>20</sup> Daí ie comeci faca mei, iodo ie moo diné jaide.

Afémie nai jica ítemo ie moo íena ciode. Cíoillano afémieri iere dúecaide. Iemona moo ie jitó dine aizícana jaide. Dúciillano ie jitona iere caimare llínnote. Llínuano íena ñitade. <sup>21</sup> Afe mei jitó ie moona daide: “Moo, Juzíñamuimo fiénidífue finódicue, daje izói omo finódicue. Cuena nibai cue jitó dáíñeitioza,” daide. <sup>22</sup> Mei jiáifodo afémie moo ie ocuífíregamacina daide: “Mai raire jamánomo ñúecuero jenoda atiri, afémie jitálleza. Daje izói ebírede onocai icuífoi jítari. Daje llezica ie eiba ico jítari. <sup>23</sup> Afe dáaruído farede juráreto jiza fatá atiri. Afe ritá cai irázizilleza. <sup>24</sup> Mei bie cue jitó tíilla izóidinomona meine cáadeza. Daje izói ja niné féiraite baitícaiza,” daide. Afemona caimare irázitiaíoi.

<sup>25</sup> Bie féiraítimie dúcina llezica, ie ama nánoramie jino jacáfaimo ite. Afénomona bítemo, jofó áinomo dúcidemo íaiói irázizilla naa íaiói rúaniai cacaina. <sup>26</sup> Ie jira jofómona daa táijitafíregamie jitócome uáidota jicánote: ¿Mínica rafue finódiaíoi? <sup>27</sup> Afe jitócome íena daide: “O ama dúcina. Afe jira o moo farede juráreto jiza fatátate, mei ie jitó ñue iránino meine dúcina jira,” daide. <sup>28</sup> Mei áfena fidíillano ie ama nánoramie iere ríicaide. Ríicaillano jofó afénomo jáiacañede. Afe jira ie moo afémie diné lluájide. Jofó bíllena caimare íena bífuiaide. <sup>29</sup> Afe llezica ie moona daide: “Onódioza diga fimona o diga ñue táijifiredicue. Jaca o uaina oni caitáfinidicue. Mei íadi jaca ninó daa duera cabrito cuemo fecáñedio, cue nabáñiairi cue irázizillena. <sup>30</sup> Mei íadi birui bie o úcube jiruiredingotiaímo dotádimie bíllamo afémie íena farede juráreto fatátatio,” daide. <sup>31</sup> Jira ie moo afémiená daide: “Cue jitó, o jaca cue diga ífiredio. Cuemo ite raana nana omo dúideza. <sup>32</sup> Mei íadi bie ráfuena cai fínuana ñue jaícina joide, caimare cai íllena, mei o ama tíilla izóidinomona meine bíteza. Daje izói ja niné féiraite baitícaiza,” daide.

## 16

### *Aillue jofó jabóidillaíma izoide rafue*

<sup>1</sup> Jesús nane ie llófuegamacina daide:

—Daa aillo ráaredimie ite. Afémie mo ie táijirainina ócuifirede jabóidillaíma ite. Jiáimaci afe ráaredimiená lluáibitiaíoi: “O jabóidillaíma omo ite ñuera ráaniaína táinomo dotádeza. Afémie figo ocuíñede,” daidíaíoi. <sup>2</sup> Ie jira ráaredimie jabóidillaíma uáiduano daide: “O finócafueña cue cacana ¿ñue izói joide? Omo cue iga cue jofó rafue rábiai cuemo izáíbiri, mei cue jabóidillaímana íñeitioza. Nana omo cue jóonegafue o záitalleza. <sup>3</sup> Iemona afe jabóidillaíma comeci facade: “Cue ocuídimie ja oni cue dotádeza ¿ñue izói fínoiticue? Mairíñedicueza, jacafai tiédimiená ínidicue. Comínimo úcube fia jícana meáiruiticue.

<sup>4</sup> Cue táijina fuille mei jiáie comini cue íaiói llínollena, cue finóllifue ja onódicue.” <sup>5</sup> Ie jira nana ie ocuídimiemo ibáredena itímiaí dámierie dáanomo jírillano daide: “O ibáredena cue ocuídimiemo ¿nieze ite?” fueñeidimiemo jicánote. <sup>6</sup> Afémie uai ote: “Cien diga látaniaí cáirediji afémiemo cue iballe ite,” daide. Iemo jabóidillaíma daide: “Benó o ibállibe ite. Mai benó raire ráillano, cincuéntana llotíbena cúeiri,” daide. <sup>7</sup> Afe mei jiáima uáiduano jicánote: “O ibállena ¿nieze ite?” daide. Jira afémie íena daide: “Cien diga costales trigo afémiemo cue ibáredena ite,” daide. Jira jabóidillaíma íena daide: “Benó o ibállibe ite. Cómobemo ochenta diga costales cúeiri,” daide. <sup>8</sup> Ocuídímie áfena fidíllano, afe ibállibe táinona méidotimiemo iere báitafue nitade. Iemona ja onógaza, bínie comini dani íaiói nícidogafuiaina Juzíñamuimo ínotino baímo iere baitádiaíoi.

<sup>9</sup> Bie izói omoi íllena llóiticue. Bie fiénide énie ráaniaído, mai omoi nabáiñiaína maiñori, ráaniaí fuilla méifodo ómoína jofo íaiói llínolleza. Mei ómoímo ite ráaniaí ñue omoi uíñuado omoi ñue ínofirenana jino comínimo ácatatiomoíza. Afe izói Juzíñamuimo omoi ñue ínofirenamona Juzíñamui ie zíñona illánomo ómoína llínoíteza.

<sup>10</sup> Due jiza ite raana ñue úiñotímie daje izói aillo raa íemo íadi áfena afémie ñue úiñoíte. Mei jiáífodo due jiza ite raana figo úiñoñedímie daje izói aillo raa íemo íadi afémie áfeniaí figo úiñoñeíte. <sup>11</sup> Ie jira bie fiénide éniemo ite ráaniaí figo omoi úiñoñenia, ¿bu mei zíñona ráífide ráaniaí ómoímo fecalle? <sup>12</sup> Daje izói jiáímacímo jainaide raana figo omoi úiñoñenia, ¿bu mei ómoímo dúide raa ómoímo fecalle?

<sup>13</sup> Dáaruido buna mena ocuídimiemo jaináinide. Iaillinoímo o jaináiaí dáamiena éoitio, jiáímana izírúitio. Daje izói dáamie ñue ínoítio, jiáímana jámairúitio. Mei jira onógaza: Juzíñamui o náamataja llezica úcubemo abímo náamatanidío, —dínó Jesús úrite. Daí Jesús úrilla llezica fariséuai ímiaí cacáreidiaíoi.

<sup>14</sup> Afe fariséuai úcubena gáidino Jesús úrillana cacáillano uáitano íeri zadáidiaíoi. <sup>15</sup> Mei jira Jesús daide:

—Comini eróicana ñúemacina abi maméíomoi, mei íadi omoi comeci ífueña Juzíñamui ñue onode. Mei jii, comini mameca jamánomoidímiaína Juzíñamui éoide.

### *Juzíñamui illáimana illarui llua uai naa jaiái Moisés ocuica uai diga*

<sup>16</sup> Jaiáimona Juan Bautista illágímamo, comini Moisés ocuica uaimo dúidiaíoi. Daje izói Juzíñamui uai jino llóraini llógamo dúidiaíoi. Iemo aféruimona bené Juzíñamui illáimana illarui ñuera uai llócaiga. Iemo afénomo jofo íaiói jáillena izire nícidotiaíoi.

<sup>17</sup> Mei bínie naa mona diga niné tánocaiadi, illa diga ocuica uailaí táinomo faiñeno ñue ícoímo fuitárede.

### *Jesús iima ie ai dótajado úrite (Mt 19.1-12; Mr 10.1-12)*

<sup>18</sup> Daa come ie ai dotáadi, íemo dótano jiáie ringo óiaí, afémie ja jiruífue finode. Daje izói afe dotácango aina otímie ja jiruífue mo baíide.

### *Aillo ráaredímie íemo Lázaroná mámecíredímie diga*

<sup>19</sup> Daa iere ráaredímie ite. Afémie iere ñúecuiruai jirófirede; illaíma jítáogaroillai jítáfirede. Afémie nágarui ñue finóbilla rafue finófirede. <sup>20</sup> Daje llezica afénomo dúeredímie Lázaroná mámecíredímie ite. Afémie abi mallízaina oruide. Ráaredímie naze fuemo ráizaífirede. <sup>21</sup> Bie dúeredímie ráaredímie güirábanimona dótafirega güille alla güífirede. Ie ráina llezica, jicóniaí ie mállie miáíbifirede.

<sup>22</sup> Afe mei diga irui íllamona dúeredímie tíide. Afémie Juzíñamui abi imaci monamo ite paraiso daína ñúenomo uiga. Afeno afémie Abraham abímo ite. Afe mei jiái, ráaredímie tílla raitíaíoi. <sup>23</sup> Ráaredímie comini duere finólliraimo duere zefuilla llezica, caífo érocaide. Erocaide íadi Lázaro Abraham diga ráinana jicana ciode. <sup>24</sup> Iemona

afe ráaredimie caillide: “Cai jaii Moo Abraham, cuemo dúecai. Lázaro bené ore, iere due jiza jáinoia cue jirótaibilleza, cue iife manánaitallena. Mei bie iraimo iere duere zefuídicueza,” daide. <sup>25</sup> Mei íadi Abraham íena daide: “Nauí o illáfuemo comeci faca. Aféruillaído iere ñue itio. Mei íadi aféruído bie Lázaro iere duere ite. Mei jáifodo birui afémie benó iere caimare ite. Afe llezica o duere zefuídio. <sup>26</sup> Bie baímo, coco cígiri jáie iere afóredino ite, jira benó itino jáiacade ia, jáinide. Daje izói o illánomo itino caífo benó bíacadaíoi ia, bínidíaioi.”

<sup>27</sup> Mei jira ráaredimie íena daide: “Cai jaii Moo Abraham, Lázaro batí cue moo jofomo o oréllena izire jicádicue. <sup>28</sup> Cue cinco dígade ama benomo bie duere zefuíllanomo íaioi bíñeillena llotátari,” daide. <sup>29</sup> Mei íadi Abraham íena daide: “Afémacimo Moisés naa Juzíñamui uai llóraini díga cúegana ite. Afe uáillaimo náfueitiaíoi,” daide. <sup>30</sup> Jira afe ráaredimie uai ote: “Cai jaii Moo Abraham, jii, mei íadi tíidinomona dáamie íaioi mo llujadi, íaioi comeci ífuea méidoitiaíoi,” daide. <sup>31</sup> Mei íadi Abraham íena daide, “Afémaci Moisés naa Juzíñamui uai llóraini uaina náfueñenia, daje izói tíidinomona jáidino uaina íinoñeitiaíoi,” daide.

## 17

### *Fiénidifuemo come bailla iere jacírede*

(Mt 18.6-7, 21-22; Mr 9.42)

<sup>1</sup> Jesús ie llófuegamacina daide:

—Jaca nágarui comini fiénidifuemo baítafue íteza. Jiáimana fiénidifuemo baítatimie jnií dúerena! <sup>2</sup> Trigo llaiéra áillue nofícina afémie cimoimo ícoínota monáillaimo dotácana baímo ñuera; úrue izói como ínotinomona dáamie fiénidifuemo baítañelleza. <sup>3</sup> Afe izóidemoni abí omoi rairuri.

O ama omo fiénidífue finóadi, afémiena lletari. Afemona afémie illafue ie méidoia, caimare íena uáidori. <sup>4</sup> Mei dáaruído afémie siete dígacaiño o fiéni finóadi, íemo siete dígacaiño ona “Ja daíí omo íñeíticue” afémie daíízaibiadi, jaca ninomo íena caimare uáidoitio, —daide.

### *Juzíñamui mo cai ínuua ríinorede*

<sup>5</sup> Jesús orécana íaioi Ocuíraimana daide:

—Jamánomo cai ínotari, —daide.

<sup>6</sup> Mei jira afe Ocuíraima íaioi na daide:

—Due uáfuea o ínoiadi rírede raana finóredio. O ínogafue díojina eroide mostaza íjai jéena izoide íadi, bie sicómoro daína aménana bie izói daíredio: “Caífo áijicaillano monáillajimo zójozai,” daidíonia afe amena o uaina ínoite.

### *Tájitafiregamiemo dúidífue*

<sup>7</sup> Omoimona daa cómemo ie tájitagamie íadi, afe tájitagamie jacáfaimona tájiano meine bíadi ¿Meita “Mai ráizaibi, o écaíticue” daítio? <sup>8</sup> Daínide. Mei jáifodo afémiena ñue daítio: “Mai cue güille finori. Güillano cue jirole llezica nana cue jitailla raa díga bai atíllena, mamériri. Afe méifomo güillano jíroítioza.” <sup>9</sup> ¿Meita nana afémiemo ocuíllana fínuaana ocuídímie íena “Figora” daírede? Daíñede. <sup>10</sup> Afe daje izói, nana Juzíñamui ómoimo ocuica omoi fínua fuilla mei, bie izói daírediomoi: “Ñue tájiraímaciñedícaí. ‘Iere figomaci’ caina daínide. Mei dani caimo duide raa finódicaíza. Baímo jáie finóñedícaí.”

### *Jesús diez díga chíñaitino jíllotate*

<sup>11</sup> Jesús Jerusalemo jailla llezica, Galilea énie fuédamo ite duera jófuemo dúcide. Afe jofue daje izói Samaria énie fuédamo ite. <sup>12</sup> Afe jófuemo dúciacana llezica, diez díga

chínaitino jino bai Jesús diné bitíaiói. Mei íadi afémaci Jesúmona bai jica fiébidiaíói.

<sup>13</sup> Afénomona riire íena daidíaiói:

—Llófueraíma Jesús, caímo dúecai, —daidíaiói.

<sup>14</sup> Jesús afémacina cíóillano daide:

—Batí lletárirainímo omoi abi ácataji, —daide.

Aféno mo íaiói jailla llezica íaióimo ite duícuai jacáibicaide. <sup>15</sup> Iemo afémacimona dáamie ie abímo ite duico jacáillana cíóillano, Jesús diné abído bite. Billa llezica Juzíñamuimo riire cáimadote. <sup>16</sup> Jesumo dúcillano afémie ana éniemo fueco diné bíjicaide, Jesuna figura daiíllena. Afe bie izói daidímie Samaria ímie. <sup>17</sup> Jira Jesús daide:

—¿Afe duícomona jíllotaga diez dígamieñede? ¿Néemei jíáie nueve dígamie? <sup>18</sup> ¿Meita dama bie jícanemiéna Juzíñamuina abído cáimaduabilla? —daide.

<sup>19</sup> Iemona Jesús afe ímana daide:

—Náidacaillano mai jai. O ínuamona o duícomona ja jíllodioza, —daide.

*Juzíñamui illáimana illirui bíllana nie izói ónoíticai*

*(Mt 24.23-28, 36-41)*

<sup>20</sup> Fariséuai Jesumo jícanotiaíói, “¿Níirui Juzíñamui illáimana illirui bíite?” Afémie uai ote:

—Juzíñamui illáimana bíllirui jaca cíóñena. <sup>21</sup> Afena “Ba nie” daínide. Daje izói “Bai batí ite” daínide. Mei Juzíñamui illáimana illino omoi cígimo ite, —daide.

<sup>22</sup> Afe mei ie llófuegamacina daide:

—Uire jíáiruido daa birui cue illa izóidíruina cíóacaitíomoi, mei íadi cíóñeitiomoi.

<sup>23</sup> Jáímaci ómoína dáítiaíói, “Be nie,” íemo níbai “Batí ite” dáítiaíói. Mei íadi afénomo jáíñeno iri. Daje izói afémacido jáíñeno iri. <sup>24</sup> Mei ameo llairilla mona enéfemona jica jáínomo cíoina izói, Nanoide íma Jitó bíllirui afe izói cíocaizaíbite. <sup>25</sup> Mei íadi aferui nai dúcíñeille llezica, afémie fueñe jamánomo duere zéfuite. Daje izói bigímaíai íena ruifíruitiaíói. <sup>26</sup> Noé illágimamo comíni iere fiéni illa izói, afe izói cue bílliruimo comíni fiéni íitiaíói. <sup>27</sup> Noé ie finoca áillue nocaemo jáíñena llezica, nana comíni ie lloga uaina náfueñeno ía güíoidiaíói. Güillano jírófirediaíói. Afe llezica íaiói fiéni illafue méidoñeno áireoidiaíói; íemo íaiói jízaníai íníreitaoidiaíói. Jaca daí ítiaíói abína Noé jofo áillue nocaemo jaide. Iemo aillo noci bíide. Jamánomo bíllamona nana afémaci coróbaitiaíói.

<sup>28</sup> Iemo Lot illágimamo afe izói ite. Juzíñamuimo coméciñeno güíoidiaíói. Güillano jírófirediaíói; íbajano fécafirediaíói. Jacáfaiaina ritiaíói, íemo jofóniaina níocaidiaíói.

<sup>29</sup> Mei íadi afe Lot Sodoma jófue mona jino bítemo, monámona récíai noci bílla izói cocide. Afe llezica iere uzire boode ‘azufre’ daína raa cócia. Afemona nana tímádimaci. <sup>30</sup> Cue Nanoide íma Jitódícueza, cue cíocaizaíbíllirui afe izoite.

<sup>31</sup> Aféruimo daa come ie jofo caifófecomo íadi, ie jofo eromo ite ráaniaina jofo jaillano báiruainide, afénomona botádeza. Daje izói dáamie jino jacáfaimo íadi, abído ie jofomo bínde. <sup>32</sup> Lot aímo omoi úbicai. <sup>33</sup> Ie caana rairuácadímie áfena afémiemona féite. Mei íadi ie cáanana lloñédímiemona afe féiraiñeno, áfena baímo ziiño illínona máíñoite.

<sup>34</sup> Iemo nane ómoína dáíticue, cue dúcílle naí, mena come dájena ínia llezica, íaillínoimona dáamie oni uille. Jáímie fiébicaite. <sup>35</sup> Daje izói mena ríngo daane trigo lláia llezica, íaínguaimona dango oni uille, jíáíngo fiébicaite. <sup>36</sup> Daje izói mena íma jino jacáfaimo táijina llezica, íaillínoimona dáamie oni uille jíámie fiébicaite, —daide.

<sup>37</sup> Daí ie dánana cacáillano, ie llófuegamaci íemo jícanotiaíói:

—Cai Ocuíraíma, ¿mei nínomo?

Jira afémie uai ote:

—Inóníai dáanomó gairízaífirenamona, rille rífaíllanona ñue onódiomoi. Afe izói fiéni finódino oni íaiói úillemona daní íaiói duere finóllinona uáfueña onóigaza.

## 18

### *Daa fecingo comínimo riire jicánoraimamo jícajifirede*

<sup>1</sup> Afe mei Jesús ie llófuegamacimo daa rafue mamede, nágaruillai fáicanocaiño Juziñamuimo íaioi jicafireillena. <sup>2</sup> Iaioina daide:

—Jófuemo daa Juziñamuina náfuefinide comínimo riire jicánoraima ite. Daje izói jiáimacina lloñede. <sup>3</sup> Afe daje jófuemo daa fecingo ite. Afengo afe jicánoraimamo úrizabite. “Cue diga icíriacadimiena mai ñue jaícina jicánori,” daide. <sup>4</sup> Diga ícaiño afengo afémiemo jáidemo, afémie afengo uai jeire oñede. Mei íadi méifomo afémie comeci facade: “Juziñamuina jacíruiñedicuenia, daje izói comini uaina náfueñedicuenia, <sup>5</sup> mei íadi bie fecingo diga ícaiño cuemo zefuire bíbideza, aféngona ríidoiticue. Afemona afengo cue dine bíñeilleza. Daí afengo are cue zéfuinaitañeilleza,” daí comeci facade.

<sup>6</sup> Jira Ocuíraima daide:

—Daí bie fiénide comínimo riire jicánoraima daide. <sup>7</sup> ¿Meita Juziñamui ie nizécanona, afe ie mona naio diga íemo izire jicádinona ríidoñeite? ¡Raire íaioina ríidoiteza! ¿Meita “Fui ómoimo llóiticue” íaioina dáite? Dáiñeite. <sup>8</sup> Omoína daidicue, afémie juare dibáiño raire íaioina ríidoite. Mei íadi Nanoide Hima Jitódicueza meine cue bíadi, ¿meita cuemo ínotino íte? ¿Meita íñeite?

### *Fariseo, íemo gobierno ibátaga úcube llínoraima izoide rafue*

<sup>9</sup> Jesús nane jiáifue llote, abi ínuana jiáimaci jámairuitinona ñue llófuellena. Daide:

<sup>10</sup> —Mena íma íaillinoi Juziñamui jofomo Juziñamuimo úrizaide. Dáamie fariseo ímie; jiáima gobierno ibátaga úcube llínoraima. <sup>11</sup> Fariseo ímie naidáicana bie izói Juziñamuimo úrite. “Moo Juziñamui, ona figura daidicue, mei cue bie jiáie fiénidino izóiñedicueza. Jaca merírifinidicue, jiáimaci jífuefinidicue, daje izói jiruínidicue. Afe baimo bie gobierno ibátaga úcube llínoraima izóiñedicue. <sup>12</sup> Naga semánamo ménacaiño güiño ífiredicue Juziñamui íóbitallena. Nágarui cue oga úcubemona, Juziñamuimo dúide raamo afémiemo fecáfiredicue,” daide.

<sup>13</sup> ‘Mei íadi afe gobierno ibátaga úcube llínoraima monamo érocáiño oni jica fiébite. Dinó ie illa llezica, iere dúeredicue, daínano ie abi iere zuure finode. Fínuano daide: “Aí, Juziñamui mai cuemo dúecai. ¡tere fiénidifuiaredimiedicueza!” daide. <sup>14</sup> Omoína dáititicue, afe úcube llínoraima Juziñamui anamo ñue illano jofomo jaide, mei íadi afe fariseo ímie ñue fínoñega jailla. Mei uáfueza, abi ínota jamánomoiacadimie anáfeficaide. Mei íadi abí ínoño comécina mánaidimie daidímie jamánomoidimiena jailla, —daide.

### *Jesús úruiai ñue íllena finode (Mt 19.13-15; Mr 10.13-16)*

<sup>15</sup> Afe llezica comini íaioi jézaínidino Jesumo atídiaoí, afémacimo onoi bitállena. Mei íadi áfena ie llófuegamaci cíoillano afe atídina rairuídiaoí. <sup>16</sup> Mei jiáifodo Jesús ie llófuegamaci uáiduano daide:

—Afe úruiai dama cue diné bitíaoiza. Afémacina rairuíño iri. Mei Juziñamui illáimana illíruimo jáitino bie úruiai izóidiaoí. <sup>17</sup> Uáfueña ómoína dáititicue, fia comécina mánaide úrue izóiñedimie Juziñamui illáimana illíruimo jaca jofó jáiñeite, —daide.

### *Ráarede jitócome Jesús diga úrilla (Mt 19.16-30; Mr 10.17-31)*

<sup>18</sup> Illáicomínimona dáamie Jesumo jicánote:

—Ñuera Llófueraima, zíñoña cue íllena ¿nie izói íredicue? —daide.

<sup>19</sup> Jesús íena daide:



—¿Ñibái mei cuena “Figomiedio” daidio? Abi dine jiáie ñúemiena iñede. Dama Juzíñamui ñuena. <sup>20</sup> Cai ocuúina uáillaina cacádioza: “Jiruífueña finóñeno iri, jiáimana fañeno iri, meríriñeno iri, jiámamo taino lloñeno iri, o moo o ei diga ñue jacíruiri,” —daide.

<sup>21</sup> Jira afémie Jesuna daide:

—Bíuailaina cue dúemieniadi jaca nai biruido jeire ófiredicue, —daide.

<sup>22</sup> Afena cacáillano Jesús daide:

—Mei íadi omo nai daafue fiébide. Nana omo ite ráaniai fécano, afe iba dúeredinomo ine. Afemona monamo ite ziiñona ráifide raa óiena íteza. Afe o ráaniai fecalle mei, mai cuedo bi, —daide.

<sup>23</sup> Mei íadi afena cacáillano iere zúucaide, mei afémie iere ráaredeza.

<sup>24</sup> Jesús ie zúucaillana cioillano daide:

—Iere ráaredimie mei íadi ie ráaniaina cue baimo afémie izíruiadi, Juzíñamui illáimana illíruimo jofo jáillena ñii juárena! <sup>25</sup> Camello mámeçirede áillue rille eedo uífodo enéfenemo jailla juánide, mei jiáifodo iere ráaredimie Juzíñamui illáimana illíruimo jaille iere juárede, —daide.

<sup>26</sup> Aféfuena cacádino íena daidíaioi:

—Iemona ¿ñimie jílluille? —daidíaioi.

<sup>27</sup> Jira Jesús íaioina daide:

—Comínimona finónide raa Juzíñamui finórede, —daide.

<sup>28</sup> Afe mei Pedro íena daide:

—Ocuíraima, odo bíllena caimo ite raana fiénocaidicai, —daide.

<sup>29</sup> Jira afémie uai ote:

—Uáfueña ómoína dáitícue, Juzíñamui illáimana illano ícoína jofo fiénocaitimie, daje izói ie móotiai naa ie ámatiairi fiénocaitimie, daje izói ie ai naa úruiairi fiénocaitimie <sup>30</sup> nai bíniemo ie illa llezica aillo baimo llínoite. Afe mei monamo ziiñona illino máíñoite, —daide.

### *Jesús nane dáanomo ie tíllifue llote*

*(Mt 20.17-19; Mr 10.32-34)*

<sup>31</sup> Jesús oni eneno doce dígade ie llófuegamaci uillano daide:

—Ja birui Jerusalemo jáiticaiza. Afénomo nana jaijai Juzíñamui uai llóraini Nanoide fima Jitó cuela uai jino zúilleza. Nanoide fima Jitódicueza. <sup>32</sup> Afeno jicánemacimo cue fécaitiaioi, íemo cuena jífánodoitiaioi, íemo cuena báíñoitiaioi, íemo cuena túallaitiaioi. <sup>33</sup> Iemo cuena rázido fáitiaioi. Afe mei cuena títaitiaioi. Mei íadi daaruiámani illemona tídinomona meine abido cáadimiena íitícue.

<sup>34</sup> Afe bífuiaina afémaci jaca onóñediaioi. Daje izói nímiendo úriteza onóñediaioi, mei aféfuiai afémaci baitánide.

### *Jesús Jericó ímie uínidimie jíllotate*

*(Mt 20.29-34; Mr 10.46-52)*

<sup>35</sup> Jesús Jericó jófueño ánozilla llezica daa uínidimie io fueño ráide. Afémie fia úcube jícafirede. <sup>36</sup> Aillo comíniai jáillana cacáillano afémie, “¿Ñífue comuilla?” daide. <sup>37</sup> Jira afémiemo llotíaioi, “Nazaret ímie bíedo jailla,” daidíaioi. <sup>38</sup> Jira afémie jíriocaide:

—Davidmona comúdimie Jesús, Mesía daínámie mai cuemo dúecai, —daide.

<sup>39</sup> Uícodo jáidino afémiena “Uriñeno llíicai,” daidíaioi. Mei íadi afémie nai riire caillide:

—Davidmona comúdimie, Mesía ímie mai cuemo dúecai, —daide.

<sup>40</sup> Iemona Jesús náidade. “Afémie cue diné omoi uaji,” daide. Afémie dúcizaibilla llezica Jesús jícanote:

<sup>41</sup> ¿Minícana jítaidio, omo cue finólleza?

Jira uínidimie uai ote:

—Ocuíraima, meine uído cióacadicue, —daide.

<sup>42</sup> Jira Jesús íena daide:

—Mai érocai. O íinua ícoinia ja jállodio, —daide.

<sup>43</sup> Daií daina llezica, uínidimie ñue ciode. Afe mei afémie Juzíñamuimo caimátaicana Jesudo jaide. Daje izóí nana afe uínidimie jállonana ciódino Juzíñamuimo caimátaoidiaioi.

## 19

### *Jesús Zaqueo uáiduaide*

<sup>1</sup> Afe mei Jesús Jericó jófuemo dúciillano, afe jofue cígido jaide. <sup>2</sup> Afénomo daa ráaredimie ite. Afémie mámece Zaqueo. Afémie gobierno ibátaga úcube llínoramaci illaíma. <sup>3</sup> Bie Zaqueo Jesuna cióiacade ie ónoillena. Ua Jesuna cióacade mei íadi íena ciónide, aillo comini íllaza, íemo jiái afémie iere íámieza. <sup>4</sup> Ie jira Jesús uícomo aizícaillano, sicómoro daina aménamo caífo lííode Jesuna cíoillena. Afe amena Jesús jáillino áinori ite. <sup>5</sup> Jesús áfede jailla llezica, caífo íemo érocaide. Iena daide:

—Zaqueo, raire ana bi. Birui o jofomo fiébiticueza, —daide.

<sup>6</sup> Ie mei Zaqueo raire ana billano Jesuna caimare llínote. Ua Zaqueo jofomo jáidiaillinoi. <sup>7</sup> Comini áfena cíoillano, nana áferi úrizidiaioi. Daidíaioi:

—Jesús fiénidimie jofomo fiébizaide.

<sup>8</sup> Iemo Zaqueo náidacaillano Jesuna daide:

—¡Ocuíraima, ero! Cuemo ite ráaniaimona dúeredimacimo átuedo fécaiticue. Daa come jífuiano nau merídiciena áfena afémiemo meine abido izájiticue. Nane afe emódomo dacaiñoámani afémiemo íiticue, —daide.

<sup>9</sup> Jira Jesús íena daide:

—Daií o íinuamona Juzíñamui lloga jállonafue birui jeire o úana ja onódicai. Naui féiraitio, mei íadi birui ja jállotagao. Ja Abraham comútagamiedio. <sup>10</sup> Mei jii, o izoide ja oni baízaidino jenoda jállotaibiticue. Nanoide íma Jitódicueza, —daide.

### *Diez dígade úcubetunimo mameca rafue*

<sup>11</sup> Jesús bífuiaido úrillana comini cacana llezica, afémie daa rafue íaioimo llote. Mei Jerusalemo afémie áinozioicaidemo, afémaci comécido “Juzíñamui illáimana illírui ja raire dúciacade,” daidíaioiza. <sup>12</sup> Jira Jesús íaioina daide:

—Daa íima ñúemacimona comúdimie. Afémie oni jica jiáiníemo jaide, afémaci illáimana afémie íaioi jóoneacadiaioiza. Afe mei afémie nane abido biite. <sup>13</sup> Nai ie jáíñena llezica, ie tájítaganomona diez dígamie uáidote. Uáiduano illa dígamíemo daa iere ráífide úcubetuni fecade. Feca llezica íaioina daide: “Bie úcubetunido nai cue bíñeille dinó ráaniai oíri. Ua mei, afe fécamo aillo úcubena oni jóoneri,” daide. <sup>14</sup> Mei íadi dama ie illano comini afémiena éoidiaioi. Eoillano afémie óodana llóitino orédiaioi. Llotíaioi: “Cai illáimana o íllena jítaiñedicai,” daidíaioi. <sup>15</sup> Mei íadi afémie illáimana jóonega. Jóonia mei dama ie éniemo jaide. Dúciillano úcubetunillaína ígámiaí bai uáidote. Uáiduano illa dígamíemo jicánote: “¿Ja nieze úcubena ofítatio?” daide. <sup>16</sup> Nano jírígamié íena daide: “Ocuíraima, o úcubemona diez diga baímo óiena nabáidicue,” daide. <sup>17</sup> Ie jira aféllaíma uai ote: “Iere figura. Ñuera ocuífirégamiedio. Omo due cue ígari ñue ínotioza, diez dígade comini jofue illáimana o jóoneiticue,” daide. <sup>18</sup> Afe mei nane jiáimie jíríte. Afémie billano daide: “Ocuíraima, o úcubemona cinco diga baímo óiena nabáidicue,” daide. <sup>19</sup> Nane daje izóí bímiemo uai ote: “O cinco dígade comini jofue lláimana o jóoneiticue,” daide. <sup>20</sup> Afe mei nane jiáimie jíríte. Afémie daide: “Ocuíraima, be o úcubetuni. Ñue jacíruiocana cue éenogaza. <sup>21</sup> Mei iere ríimiedioza, ona jacírúiticue. O jóoneñegamona jaca ófiredio. Daje izóí o ríñeganomona jaca ófiredio,” daide. <sup>22</sup> Afe jira aféllaíma íena daide: “Fiénide

cue ocuífíregamiedio. Dama o daina uaido riire omo jicánoiticue. Cue riirenana onódio íadi, ¿nibái mei cue úcube baimo nabáñedio? Daje izói cue jóoneñegamona cue ófírenana onódio íadi, íemo jiái cue ríñeganomona jaca cue ófírenana onódio íadi, <sup>23</sup> ¿nibái mei cue úcube jiáie úcube iránomo jóoneñedio, abido cue jofomo cue billa llezica afe úcube íemo afe baimo jiáie úcube diga cue llínollena?” <sup>24</sup> Iemona afénomo itínona daide: “Bímiemo ite dáatuni uano, diez dígatuni otímiemo feca,” daide. <sup>25</sup> Mei íadi afémaci aféllaimana daide: “Illaíma ero, bímiemo ja diez dígatuni ite. ¿Nibái mei jiáie úcubena iga?” daide. <sup>26</sup> Jira afe illaíma uai ote: “Mei uáfueza ómoína dáititícue, igámiemo baimo aillo írede. Mei íadi íñegamiemo due ite bairórede. <sup>27</sup> Iemo afe baie cue illaíma illana óiacañedino, mai bai bené ati. Atiano cue eróicana afémaci tita,” daide.

*Jesús Jerusalén jófuego jofo jaide*  
(Mt 21.1-11; Mr 11.1-11; Jn 12.12-19)

<sup>28</sup> Bie izói daina méifodo Jesús nai Jerusalén diné jaide. <sup>29</sup> Ja Betfagé jófuego, íemo Betania jofue diga, afénomo Jesús dúciacade. Afe jofue Olivo idu áinori ite. Afénomo illa llezica ie llófuegamacimona ménamie orede. Iaillinoína daide:

<sup>30</sup> —Batí áinori ite duera jófuego ómicoi jai. Dúciillano afénomo cuinaca búrrona cíoitíomicoi. Afe búrrono nai buna ráiñena. Zúitano cuemo atiri. <sup>31</sup> Daa come ómicoimo jicánoia “Níbái mei uiga” daííadi, “Cai Ocuíraíma jitáillano jicaca” ómicoi daíiri, —daide.

<sup>32</sup> Afe llófuegamaci íaillinoi jaillano nana Jesús íaillinoína daina izói cíozaidiaillinoi.

<sup>33</sup> Afe burro íaillinoi zúitaja llezica burro naama jicánote:

—¿Níbái mei búrrona zuitádiomicoi? —daide.

<sup>34</sup> Jira afe íaillinoi uai ote:

—Cai Ocuíraíma jitailla, —daide.

<sup>35</sup> Afe mei ja Jesumo uitíiaillinoi. Dúciillano afe burro emodo íaioi iníroína jobédiaioi. Jóbiano afe emódomo Jesús rainádiaioi. <sup>36</sup> Afe búrrodo Jesús jailla llezica, ie jáillao comini íaioi iníroillaina jobédiaioi. <sup>37</sup> Olivo daina ídumona ana íaioi jailla llezica, nana afémiedo jaide Juzíñamuimo ínotino íóbillano caillíoidiaioi. Daje llezica Juzíñamuimo iere caimátaidiaioi, mei diga Jesús uaido daina comúidena nauí uícodo cíódiaioiza. <sup>38</sup> Daidíaioi: —Ocuíraíma mámeçido bite illaíma caimare iri. Caimare uái illafue monamo íteza. Daje izói Juzíñamuimo ebire ñúefuiaina nitáfíreiri, —daidíaioi.

<sup>39</sup> Iemo afénomo ite comini cígimo fariseo ímiiaína ite. Afémaci Jesuna daidíaioi:

—Llófueraíma, odo jáidinona “Uriño” o daíiri, —daidíaioi.

<sup>40</sup> Mei íadi Jesús uai ote:

—Ómoína dáititícue, bimaci úriñenia noficiai riire úrille, —daide.

<sup>41</sup> Afe mei afe Jerusalemo ánozilla llezica, afe jófueña cíoillano Jesús eede. <sup>42</sup> Eiano cómemo úrilla izói afe jófueña daide:

—Nífuenino uái o illífuena iere o onótaacadícue. Birui ñue o illarui. Mei birui afefue ómoímona báinino íteza, aféfuena onónidiomoi. <sup>43</sup> Mei uáfueza fiénidíruillaí ómoímo biite. Aféruimo omoi éoidimaci omoi illa onido nágafeniai nofíbanillaina izói ómoína cirínoitiaioi. Afe mei ómoiri riire fúiritiaioi. <sup>44</sup> Iemo ana éniemo ona dótaitiaioi. Dótano afe jófuego ite comínina fáitiaioi. Afe llezica nana afe jofue finoína noficiai ana dócoitiaioi; mei Juzíñamui ómoína caimare uáiduaíbillarui onóñediomoiza, —daide.

*Jesús Juzíñamuimo gairíraco ráfua izói ñue finode*  
(Mt 21.12-17; Mr 11.15-19; Jn 2.13-22)

<sup>45</sup> Jerusalemo ie jofo jailla méifomo, Jesús Juzíñamuimo gairíracomo jofo jáillano afeco eromo ite ráaniai fecádino naa íbárioidinori jino jiude. <sup>46</sup> Iaióna daide:

—Jaiái Cugáuaimo daide: “Cue jofo cuemo úrifíreillíco.” Mei íadi afécona merírifíredino jofo izói finódiomoi, —daide.

<sup>47</sup> Nágaruillai Jesús afécomo llófuefirede. Mei íadi afe llezica lletáriraini illaini, daje izói ocuica uai llófuetino, naa jofue illáiniri ie íaioi fallino jenódiaioi. <sup>48</sup> Mei íadi afémie fállena baiñédiaioi, mei nana comini afémie uai iere cacáreidiaioiza.

## 20

### *Illáicomini Jesús ócuifirena ríino jicánotiaioi*

*(Mt 21.23-27; Mr 11.27-33)*

<sup>1</sup> Afe mei jiáiruido Jesús Juzíñamuimo gairíracomo comini llófuete. Afe llezica ñuera jílona uai afémacimo llote. Daií llua llezica lletáriraini illaini, íemo ocuica uai llófuetino, naa ocuide eicomíniri, afénomo dúcidiaioi. <sup>2</sup> Dúciillano Jesuna daidíaioi:

—Ñie ríinodo bie ráaniaina finódio áfena cai lloiri. Afe omo ite ríino ¿bu mei omo fecaca? —daidíaioi.

<sup>3</sup> Jira Jesús íaioina daide:

—Cuemo omoi jicánua izói ómoimo daafue jicánoitícue. Nee mei cue uai omoi ólleza.

<sup>4</sup> Mei Juan ¿bu comini báutizallena ocuica? ¿Meita Juzíñamui ocuica? ¿Mei nibai comini ocuica? —daide.

<sup>5</sup> Mei íadi uai oñeno, áfena daní conímamo júfidotiaioi; daidíaioi:

—¿Ñie izói mei dáiticaí? “Juzíñamui ocuica” cai daiíadi, Jesús cai uai óite, “¿Ñibái mei afémiemo ñnoñediomoi?” <sup>6</sup> Mei jiáifodo “Comínimona ocuica” cai daiíadi, nana comini nófena cai níjítiaioi. Mei afémaci “Juan Juzíñamui dibénedo úrifirede” jaca daiífrediaioi.

<sup>7</sup> Iemona afe illáicomini Jesuna daidíaioi:

—Juan báutizaibillena ocuidimiena onóñedicaí, —daidíaioi. <sup>8</sup> Afe jira Jesús íaioina daide:

—Daje izói bie ráaniaí cue finofirena ríino ómoimo llóñeitícue, —daide.

### *Fiénide táijidino rafue*

*(Mt 21.33-44; Mr 12.1-11)*

<sup>9</sup> Afe mei Jesús comínimo úrilla llezica bifue íaioimo llote:

—Daa come jíricuena eroide úvaiaí rillino finode. Afe mei afemo táijitínomo nano íanori iba llíinollena fecade. Fécano oni jiáinomo are íllena jaide. <sup>10</sup> Afe úvaiaí llizilla llezica, ie ocuífiregamie orede, náamamo dúide dibene afénomo táijidinomona jicállena. Mei íadi afémiemo ññeno fájano ie orédiaioi. <sup>11</sup> Ie jira jacafai naama nane jiáie ocuífiregamie orede. Mei íadi nane afémiena icida fatíaioi. Fájano ññeno fia meine orédiaioi. <sup>12</sup> Nane afe mei jacafai naama jiáimie orede, mei íadi afe táijidino afémiena bófiano jino orédiaioi.

<sup>13</sup> Iirainomo jacafai naama daide: “¿Ñie izói fínoitícue? Cue izíruiga jító óreitícue. Afémaci afémiena cíoillano, nibai afémiena caimare jacírúitícaí,” daide. <sup>14</sup> Mei íadi táijidino afémiena cíoillano, jofu conímaiaina daidíaioi: “Bímie uire bie énie máíñoitímie. Mai cai falli. Afe mei bímie cáiena jáiteza,” daidíaioi. <sup>15</sup> Afe mei jacafai jinomo uillano íena titádiaioi.

Jira Jesús jicánote:

—Afe jacafai naama bimácina ¿ñie izói fínoite? <sup>16</sup> Afémie billano afémacimo dúecaiñeno títaite. Afe mei afénie jiáimacimo fécaite, —daide.

Afena cacáillano daidíaioi:

—¿Afe izói cai ílleza Juzíñamui rairuiri! —daidíaioi.

<sup>17</sup> Mei íadi Jesús íaioimo érocaillano daide:

—Iemona, afe Juzíñamui Cúegáuaina ¿ñie izói llóiacade? Afe uai bie izói daide:

Jofu níraini jámairuillano oni fádoica jáillirai ja nahí jáilliraina jaide. Bie daína daiíacade, comini jámairuillano ruifíruigamie ja ñuera jica jalleide illáimana jaide.

<sup>18</sup> Afe jámairuiga nofici maméidimíemo éicitaitímie niné tibérotaité. Iemo jiái afe nofici anamo jíitafitíno jízefo izói jáitiaioi, —daií Jesús daide.

*Gobierno ibátaga úcube rafue**(Mt 21.45-46; 22.15-22; Mr 12.12-17)*

<sup>19</sup> Afe llezica lletáriraini illaini naa ocuica uai llófuerainiri Jesuna llaitáacadaiaoi, mei afémacido bie rafue afémie llúana onódiaioiza. Mei íadi afémaci comínina jacíruitiaioi.

<sup>20</sup> Ie jira ñúemaci izói macáдино Jesumo báinino orédiaioi. Jesuna comeci féillamona fieni úritallena orécaiaioi. Afe fieni ie úrillana cacáillano afémie romano caifóidillaímamo fécaite.

<sup>21</sup> Jira afémaci Jesumo bie izói jicánotiaioi:

—Llófueraíma, onódicaiza jaca ñue illifue llófuefiredio. Daje izói jaícina ñue úrifiredio. Iemo jino cíoidifuiado izire jicánoñedio. Mei jiáifodo Juzíñamuimo cai jáillido uáfueña úrifiredio. <sup>22</sup> Caimo llone: ¿Romano jamánomoidillaíma ibátaga úcube ibádicainia ñuera? ¿Ñibai fiénide? —daidíaioi.

<sup>23</sup> Mei íadi íaioi ie facátaacanana Jesús onode. Jira íaioina daide:

—¿Ñibái mei jíitaja izói cue finódiomoi? <sup>24</sup> Daa úcubetuni cuemo ácataibi. Afétunimo ite uiéco jana ¿bu ie? Iemo afétunimo ¿nie come mámecei cúeina? —daide.

Jira ie uai otíaioi:

—Romano jamánomoidillaíma uiéco illa, naa ie mámecei díga, —daidíaioi.

<sup>25</sup> Jira Jesús íaioina daide:

—Mei íemona romano jamánomoidillaímamo dúide afémiemo fecari. Iemo daje izói Juzíñamuimo dúide Juzíñamuimo fecari, —daide.

<sup>26</sup> Nana afémaci comíni cacáicana daina uáillaído ja Jesuna jaca jíitanidiaioi. Mei jiáifodo ie uai úana cacáillano fáigacaidiaioi. Afe mei íaioi uai ollifue íñédeza úriñediaioi.

*Tíide comíni meine abído cáaille jicánotiaioi**(Mt 22.23-33; Mr 12.18-27)*

<sup>27</sup> Afe mei saduceo ímíai Jesús diné jaide. Afe saduceuai tíidino meine abído cáañeite daífirediaioi. Jira bimaci Jesuna bie izói daidíaioi:

<sup>28</sup> —Llófueraíma, Moisés caimo cuetá fiécabemo daide: Daa come ie ai nai úruenide abina tíia, afémie ama ie fecíngona órede, afémie úruiai ie tíide ama méifomo comuállena. <sup>29</sup> Mei nauí cai cígímo siete díga ámaredimíaina ite. Nanóidimie áireillano nai úruenino tíide.

<sup>30</sup> Afe méifoidimie afe fecíngo ote. Ie mei afémie daje izói úruenino tíide. <sup>31</sup> Afe mei nane jíáimie daango ote. Uano nai úruenino tíide. Daje izói nana afémie ámatiai daango uano úruenino tíidiaioi. <sup>32</sup> Iirainomo ja afengo tíilla. <sup>33</sup> Iemona comíni tíillano meine abído cáailliruimo, mei siete dígamie afengo óteza, afengo ¿nie íima aina mámeite? —daidíaioi.

<sup>34</sup> Ie jira Jesús uai ote:

—Bie éniemo íñíai áirediaioi. Daje izói ringóniai ínirediaioi. <sup>35</sup> Mei íadi uire monamo jáitena mamécano, daje izói tíidinomona meine abído cáaitena mamécano jaca áinitiaioi. Daje izói afénomo íaioi jízatiaína jíáímamo ínreitañeitiaioi. <sup>36</sup> Mei afénomo buna tíinideza. Iemona afémaci Juzíñamui abi imáciai izóidiaioi. Tíillanomona meine abído cáailledo Juzíñamui jíotíaina ja mamécaiaioi. <sup>37</sup> Jaiái Moisés illafue cugánicomo Juzíñamui tíidino meine abído cáaillana caína onótate. Moisés boode rarócina ciona llezica afe bóodemona Juzíñamui daide: “Dáaruido Abraham Juzíñamuidicue naa Isaac Jacob díga,” mei afémaci Juzíñamui illánomo cáadiaioiza. <sup>38</sup> Mei uáfueza, Juzíñamui tíidino íeñede, mei jiáifodo cáadino ie. Mei uáfueza, Juzíñamui eróicana nana cáadiaioiza, —daide.

<sup>39</sup> Iemona ocuica uai llófuerainimona dáarie daidíaioi:

—Llófueraíma, ¡ñue daidíoi! —daidíaioi.

<sup>40</sup> Afe baímo Jesús facátalle uaina baíñediaioi.

*Cristo ie nano comuídímie ¿bu?**(Mt 22.41-46; Mr 12.35-37)*

<sup>41</sup> Afe mei Jesús íaioina daide:

—¿Ñibái mei Crístona David jító dáii firena? <sup>42</sup> Mei afe David Salmos rabénicomodaideza:

Monamo ite cai Moo Juzíñamui cue Ocuíraimana daide:

“Bené cue nabézimo ráii;

<sup>43</sup> ona éoidino cue anáfenolle dino.”

<sup>44</sup> ¿Mei nie izói Cristo David jító? Mei afe David afémiena ie Ocuí firedimiena mamédeza,—daide.

*Jesús ocuica uai llófue firedinomo fiénidifue nitade*

*(Mt 23.1-36; Mr 12.38-40; Lc 11.37-54)*

<sup>45</sup> Nana comini cacáicana Jesús ie llófue gamacina daide:

<sup>46</sup> —Ocuica uai llófue firedinomona abí omoi rairuiri. Afémaci “já cimacídicaí” daiíllena árerói jítá firediaí. Afémaci gairíranomo jáiadi, iere caimare uáiduana gáidíai. Afe izói Juzíñamuimo llófueriracomo ñuera ráiiranuai jénofirediaí. Daje izói iráizillafue finua llezica jénofirediaí. <sup>47</sup> Daje llezica fecingotíai jofona báiro firediaí. Afémaci comini cíoicana ñúemacina daiíllena, are Juzíñamuimo úri firediaí. Afémaci jáimaci duere finolle baimo duere finóllíai,—daide.

## 21

*Dúerede fecingo Juzíñamuimo úcube fecade*

*(Mr 12.41-44)*

<sup>1</sup> Jesús Juzíñamuimo gairíracomo illa llezica, aillo ráaredino Juzíñamuimo dúide úcube jóneranomo úcube dótana cide. <sup>2</sup> Afe llezica dúerede fecingo cobre finoína mena úcubetuni dótajana Jesús cide. <sup>3</sup> Cíoillano daide:

—Uáfúena ómoína dáití cue, bie dúerede fecingo nana jáimaci baimo dotade. <sup>4</sup> Mei nana afémaci íaióimo fiébide úcubemona dotádiaí. Mei íadi bie fecingo dúerede íadi nana aféngomo ite güille íballe úcube dotade,—daide.

*Jesús Juzíñamuimo gairíraco niné táinocaite, daide*

*(Mt 24.1-2; Mr 13.1-2)*

<sup>5</sup> Cominimona dáarie Juzíñamuimo gairíraco ero ebire cíoína llotíai. Daje izói afécomo ite nofíciái finoína ebire cíoína llotíai. Afe izói afécomo fia fecaca ebírede ráaniaí llotíai. Afe jira Jesús daide:

<sup>6</sup> —Nana bie omoi ciona ebire eróidínuaí uire dáaruido niné táinoficaite. Bico ero ñuera nofítotíai illa dígatofíai oni eneno júdaizite,—daide.

*Enie fúiacana cai onóllena lloga uai*

*(Mt 24.3-28; Mr 13.3-23)*

<sup>7</sup> Jira Jesumo jicánotíai:

—Llófueraíma, o lloga bífuíai ¿ñiruído íite? Bífue zúille uícodo cai onóille raa, ¿nie izói íite? —daídaíai.

<sup>8</sup> Jira Jesús daide:

—Omoi jífuefiza abí omoi rairuiri. Mei afe llezica díga “Cue bie Crístodí cue” dáitino bíítíaióiza. Afe izói “Ja birui aferui” dáitíai. Mei íadi afémaci llógamo ínoñeno iri. <sup>9</sup> Comini jóbairillana omoi cacáiaí áferi jacínaiñeno iri. Daje izói jáíie comini íaióí illaíma uáitano jáímiena méidoiacanari jacínaiñeno iri. Mei uícodo daí íredeza, mei íadi íirairui nai dúcíñedeza.

<sup>10</sup> Iemo Jesús nai úrioicaide:

—Daa nairai jáíie nairai díga fúiritíai. Daje izói daa zie jáízíe díga jóbairítíai. <sup>11</sup> Afe llezica díga ígobíaido énie iere ríire docáirite. Daje izói aillo nairai júbietítíai, íemo

jiái aillo comini dáagoberiedo duícotaitiaioi. Aféruído monamo aillo cai jacínaitaite raa cíocaite, naa énie fuille joréñuairi.

<sup>12</sup> Mei íadi nana bífuiái jino déiacana uícodo, fieni finóllena ómoína llátaitiaioi. Daje izói ómoína rácaitiaioi. Iemo Juzíñamui uai llorácomo ómoína uillano riire jicánodoitiaioi. Iemo ómoína llavéracomó íbaitiaioi. Afe llezica cuemo omoi jainaina jira, jamánomoidillaini naa jabóidillaini uícodo ómoína úitiaioi. <sup>13</sup> Daií omoi íaioi uilla llezica cuedo afémacimo ñue úritiomoi. <sup>14</sup> Abí omoi ríidolle uaimo uícodo omoi comécillena riire mamériñeno iri; <sup>15</sup> mei aféruimo afémaci uaillai omoi olle uaina ómoímo llóitícueza. Afe llezica ómoína ráfuena ñue baitátaitícue. Afemona omoi éoidino ómoína jaca uáitanidiaioi.

<sup>16</sup> Mei íadi aféruimo omoi onóigamací Crístomo omoi íinua jira ómoína duere finóllena jiáimacimo izájitiaioi. Daje izói omoi ámatiaí Crístomo omoi íinua jira ómoína fécaitiaioi, íemo omoi móotiaí dáafuedo ómoína fécaitiaioi, daje izói jiái omoi nabáiñiaí dáafuedo ómoína fécaitiaioi. Omoimona dáarie títaitiaioi. <sup>17</sup> Aféruído nana nairaí cue ícoiniadi ómoína éoitiaioi. <sup>18</sup> Mei íadi omoi ífótiraíaimona, daa táinomo báíñeite. <sup>19</sup> Iemo fáicanocaiñeno omoi íinoiadi, zíñona cáallinona máíñoitiomoi.

<sup>20</sup> Jerusalén jofue fuíriraíni nágafene afeno cirínoia, áfena cíoillano, áfedo raíre táinocaillena ónoitiomoi. <sup>21</sup> Afe jira afe llezica Judea éniemo itínuaí caifóneduaimo botárediaioi. Daje llezica Jerusalemo itínuaí afénomona oni jica jáirediaioi. Iemo jacáfaimo itino meine abído afe jófuego jáinidiaioi. <sup>22</sup> Mei afe comini duere finólliruimo ja dúcidez. Aféruillaido nana jiaí Juzíñamui Cuegáuái ícoimo ñue fuitárede. <sup>23</sup> Afe llezica namóci redingotiaína ¡Níi dúerena! Daje izói monoi jirode úruena llíidingotiaína ¡Níi dúerena! Mei aféruillaido afénomo aillo izi cácaitiaioi. Afe énie comini jamánomo duere finólliaioi. <sup>24</sup> Afémacimona jiáimaci jóbairillanomo tíitiaioi. Iemo jiáimaci nana nairaí illánomo íaioína llavétaitiaioi. Juzíñamui mamécaruillai dieze, jicánemaci Jerusalén anáfenuano júdaítiaioi. Afe mamécaruillai fuille dino afe jófuena fieni fínoitiaioi.

*Nanoide Hima Jitó Cristo billirui ñie izoite  
(Mt 24.29-35, 42-44; Mr 13.24-37)*

<sup>25</sup> Afe mei jitómamo, fiuimo, naa úcuairi jacírede raa jánaniaí cíocaite. Afe llezica náiraíai comeci faca mamérilla uaillai niné féite. Iemo monáillaji ficire báguari jacínaitiaioi. <sup>26</sup> Biniemo comuízaide raamo comécillano iere jacínaitiaioi. Ie jacinaillamona tíidino izói íficaitiaioi. Mei afe llezica nana monamo itínuaí riire mozíoide ráaniaí niráiricaiteza. <sup>27</sup> Afe mei Nanoide Hima Jitó Crístona cíoitiaioi. Afémie íemo ite ríino naa dama íemo ite ebíredifuiáiri uílliedo ana bite. <sup>28</sup> Bífuiái jino zuílle llezica, ñue omoi mamériri; íocire omoi érocari. Mei íanori íllamona omoi jíllotalliomoi, —daíde.

<sup>29</sup> Daje izói nane bie aménamo mamécafue Jesús íaioímo llote:

—Higuera daína aménamo comeci omoi facari. Daje izói nana jiáie aménamo omoi comécíiri. <sup>30</sup> Iaiói íbiaí firuíllana omoi cíónia, “Ja fimona ánozide” daíífredíomoi. <sup>31</sup> Afe izói bífuiái zuíllana omoi cíónamona, “Juzíñamui illáimana billirui ja ánozide,” daííredíomoi.

<sup>32</sup> Uáfuena ómoína dáitícue, bigímaíai nai tíñeille llezica nana bie raa jino zúite. <sup>33</sup> Mona énie díga fúite, mei íadi cue uaillai jaca fúíñeite. Cue lloga raa nana zúite.

<sup>34</sup> Omoi comeci riírelleza abí omoi rairuiri. Mei iere aillo güíacanamona come comeci riire jáite, daje izói jífáifírenamona. Daje izói dani omoi abi ífue níciduamona come comeci riire jáite. Jira cue billíruimo omoi jacínaiñelleza áfena abí omoi rairuiri. <sup>35</sup> Mei rille jíitafirena raa ónonino jíitaja izói, afe izói aferui nana énie comínina jíitaitaiteza. <sup>36</sup> Jica ía maí ñue omoi finóbiri. Jaca fáicanocaiñeno Juzíñamuimo omoi úrifíreiri, afe nana

bie zúitifuiaimona omoi jíllloillena. Daje izói Nanoide ñima Jitó uícomo meáiruiñeno omoi náidaillena, jaca Juzíñamuimo úrifireillano, jaca ia ñue omoi finóbiri, —daide.

<sup>37</sup> Jesús monari Juzíñamuimo gairíracomo llófuefirede. Afe mei naio, Olivos daína ídumo íniaifirede. <sup>38</sup> Nana comíni afémie llófuiana cacáreillena nágarui raire jítiramo bífrediaioi.

## 22

*Jesús llaitállena maméritiaioi*

*(Mt 26.1-5, 14-16; Mr 14.1-2, 10-11; Jn 11.45-53)*

<sup>1</sup> Fáitañeno pan güífirera rafue ja ánozide. Afe rafue jíáfodo mameina pascua rafue.

<sup>2</sup> Iemo lletáriraini illaini naa ocuica uai llófuetinori Jesús fállena jenódiaioi, mei afe llezica comínina jacíruitiaioiza.

<sup>3</sup> Iemo aféruído Taife Judas Iscariótemo jofo jaide. Afe Judas doce dígade Jesús orécamacimona dáamie. <sup>4</sup> Afe bímie lletáriraini illáinimo naa gairíraco ocuídinomo Jesús íaioimo fecállena llujáide. <sup>5</sup> Afena cacáillano íobidiaioi. Iemona, “Ucubena o íbaiticai” daidíai. <sup>6</sup> Iemona ie íaioi íbaja úcube llínote. Iemo Judas aféruimona comíni figo íñena llezica Jesús íaioimo izájillena jenode.

*Cai Ocuíraima íraicaiño güillafue*

*(Mt 26.17-29; Mr 14.12-25; Jn 13.21-30; 1 Co 11.23-26)*

<sup>7</sup> Ja fáitañega pan güilláruimo dúcide. Afe llezica aféruimo pascua íena ovejai fáfirega.

<sup>8</sup> Jira Jesús Pedro, Juan íaillinoína ocuicide; daide:

—Mai pascuamo güífirera izói uícomo ómicoi finori, —daide.

<sup>9</sup> Jira afémiemo jícanotiailinoi:

—Afena ¿ninomo finuaitcoco? ¿Ninomo áfena güíacadio? —daide.

<sup>10</sup> Jesús íaillinoína daide:

—Batí jófuemo ómicoi jaille llezica, ícírudo jainoi uitímie cíoitíomicoi. Afémiedo jairi. Afe mei afémie jofo jáillicomo jofo ómicoi jai. <sup>11</sup> Afénomo afe jofo náamana ómicoi daíri, “Cai Ocuíraima ona daide: Cue güillico ¿ninomo ite? Afécomo cue llófuegamaciri páscuamo güífirera izói güíticue.” <sup>12</sup> Afe mei afémie caifóidibanimó ite áillocona ácatate. Afeco ero ja ñue finóbide, afécomo cai güille finori, —daide.

<sup>13</sup> Iemona afe íaillinoi jaillano, nana Jesús íaillinoína daína cíozaidiaillinoi. Iemona afénomo pascua rafue ana güífirera izói, güille finódiaillinoi.

<sup>14</sup> Ja nauízaidemo güizájilla llezica Jesús naa ie oréllinori dáanomo ráizítiaioi. <sup>15</sup> Afe llezica Jesús íaioína daide:

—Nai cue tíñena llezica bie pascua ana güífirera izói omoi diga iere güíacadicue. <sup>16</sup> Mei ómoína dáitícue, bie ie rafue dáanomo meine güíñeitícue. Bie rafue Juzíñamui illáimana illíruimo bíñeille dino güíñeitícue, —daide.

<sup>17</sup> Daí daína mei jíróraco llínnota Juzíñamuina “Íere figora” daide. Afe mei íaioína daide:

—Bie llínnota, conímamo omoi fecari, <sup>18</sup> mei ómoína dáitícue, Juzíñamui illáimana illíruui nai dúciñena dino, nane dáanomo uva íjina jaca jíroñeitícue, —daide.

<sup>19</sup> Afe mei pan llínnota, Juzíñamuina “Íere figora” daide. Daí daínano afe pan dítede. Pan díitano afémacido fecade. Afe llezica daide:

—Bie cue abiza. Tíillinomo fecállícue omoi ñue íllena. Cuemo omoi úbicaifireillena bie izói omoi finófireiri.

<sup>20</sup> Daje izói güilla fuilla mei jíróraco llínnota, íaioimo fécajano daide:

—Bie jíróraco eromo ite íji Juzíñamui ómoína mameca cómue uai ómoína onótate. Afe ie mameca cómue uai, uafue daíllena cue die totálleza, mei cue die omoi ñue íllena totálleza.



<sup>21</sup> Mei íadi cue fécaitimie birui benó cue diga güite. <sup>22</sup> Mei jii, Nanoide hima Jitó Crístodícueza, jaiái uícodo cuemo mameca iodo jáiticue. Mei íadi cue fécaitimie, jiii dúerena! —daide.

<sup>23</sup> Afe jira conimana daidíaiói:

—¿Cáimona bu mei ie fecalle? —daidíaiói.

*Conímamo jamánomoidímie júfidotiaíoi*

<sup>24</sup> Afe mei dani afémaci cígimona níimie jamánomoidímiena daína júfidotiaíoi. <sup>25</sup> Mei íadi Jesús íaióina daide:

—Nairai illaini íaiói anamo itínona riire ocuífrediaíoi. Daje izói íaiói ocuídinona, jiáimaci “Omoi ñue finódino” daiífrediaíoi. <sup>26</sup> Mei íadi omoi afe izói iñeno iri. Mei jiáifodo omoi cígimo ite jamánomoidímie, afémie jiáimaci baimo jamáimiena írede. Daje izói ómoimona ocuífredímie jiáimacina canófredímiena írede. <sup>27</sup> Bífuego omoi coméciri. Dáamie güirábanimo güíllena ráina llezica, jiáimie güille bai atífirede. Afe íaillinoimona ¿bu mei iere jamánomoina? Mei uáfueza, güirábanimo ráiidímie jamánomoina. Mei íadi cue omoi cígiri ocuífrega táijifredímie izói iticue.

<sup>28</sup> Comini fieni cue facátafirena llezica jaca cue diga ífiredíomoi. <sup>29</sup> Ie jira cue Moo illáimana illánona cuemo illa izói, afe izói ómoimo íiticue. <sup>30</sup> Afena ómoimo íiticue, cue illáimana illánomo cue diga omoi güíllena. Daje izói afe llezica afénomo illaíma ráiranomo ómoína ráinaiticue, doce dígade Israel náiraímo izire omoi jicánollena, —daide.

*Jesús Pedro ie jáanollena uícodo llote*  
(Mt 26.31-35; Mr 14.27-31; Jn 13.36-38)

<sup>31</sup> Ocuíraíma Jesús nane daide:

—Simón cácarei. Taife ona facátaiacade. Comini magai izilla izói ona iziacade. <sup>32</sup> Mei íadi Juziñamuimo ja jicádícue Juziñamuimo o ínnua féitañeíllena. Iemo afe facátainamona abido o bille méifodo, o ámatiaí canori, íaiói íinogafuena íaiói fáicanocaiñeíllena, —daide.

<sup>33</sup> Iemona Simón Jesuna daide:

—Cue Ocuíraíma, llavéracomo o diga cue jáillena ja finóbídicue. Daje izói afénomo o diga cue túillena ja mamériticue, —daide.

<sup>34</sup> Jira Jesús íena daide:

—Pedro, birui ona dáíiticue, átava nai úriñena llezica daacaiñoámani, cuena jáanoitío, —daide.

*Jesús facátalle hora ja áinozide*

<sup>35</sup> Afe mei Jesús ie llófuegamacimo jicánote:

—Nauí ómoína cue ória llezica, ipécona uiñeno, daje izói úcubena uiñeno, íemo jiái eiba icona uiñeno, fia omoi jairi, daidícue. Aféruimo ¿mínica ómoimo nai iñena? —daide.

Jira afémaci daidíaiói:

—Aféruimo ja nana ñue ite, —daidíaiói.

<sup>36</sup> Iemona Jesús íaióina daide:

—Mei birui jiáifodo daidícue. Ipécoredímie mai afena ui. Daje izói úcuberedímie úcubena ui. Iemo jiái lloéfainidímie íemo ite iniroi fécajano afe íbado lloefai oíri. <sup>37</sup> Mei Juziñamui Cuegáuaimo lloga cuemo ñue ícoimo fuitáredeza. Be níuui: “Fiénidímaci cígimo cuena mamédaíoi.” Mei uáfueza, nana cue dibénedo cúegana ñue ícoimo fuitárede, —daide.

<sup>38</sup> Iemona afémaci daidíaiói:

—Cai Ocuíraíma, caímo mena lloefai ite, —daidíaiói.

Afémie uai ote:

—Jadie ja figo baite, —daide.

*Jesús Getsemanímo Juziñamuimo úrite*

*(Mt 26.36-46; Mr 14.32-42)*

<sup>39</sup> Afe mei Jesús oni jaide. Ie jáifirena izói Olivos ídumo jaide. Afe llezica ie llófuegamaci afémie diga jáidiaioi. <sup>40</sup> Ie jáillanomo dúciillano daide:

—Fiénidifueмо omoi báiiñeilleza Juziñamuimo úrifireiri, —daide.

<sup>41</sup> Afe mei Jesús comini nofici bai nitáfirena dino afémacimona oni jaide. Afénomo Juziñamuimo jicállena ana dújude. <sup>42</sup> Daide:

—Moo, o comeci jitáidi, bie duere cue zefuúllifuemona cue jíllotari. Mei íadi cue comeci jítaina izói finóñeno iri, mei jááfodo o comeci daina izói finori, —daide.

<sup>43</sup> Afe llezica Juziñamui abi ímie monámona Jesumo cíocai; afémie Jesuna maírtaibite. <sup>44</sup> Iemo Jesús ie comeci jamánomo zúurena llezica, afémie Juziñamuimo iere riire jicade. Afemona iere uzínailla izói ie abi úllie iere jino bite. Afe jino bite úllie ie die izoide. Afeji ana éniemo llocode.

<sup>45</sup> Juziñamuimo ie jícaja fuilla mei, afémie ie llófuegamaci diné jaide. Inídiaioina cíoizaibite, mei zuufue inítagaiaioi. <sup>46</sup> Jira íaioina daide:

—¿Nibái mei inídiomoi? Fiénidifueмо omoi báiiñelleza cazíllano Juziñamuimo úrifireiri, —daide.

*Jesús llaitada uitíaioi*

*(Mt 26.47-56; Mr 14.43-50; Jn 18.2-11)*

<sup>47</sup> Jesús nai úrioidemo aillo comini dúcidiaioi. Afe doce dígadimona Júdasna mámeciredimie bitino ifode. Ainozillano afémie Jesús ñitade. <sup>48</sup> Jira Jesús afémiena daide:

—Judas, ¿Nanoide íima Jitó o ñítafuedo fécaibitio? —daide.

<sup>49</sup> Jesús abimo itino áfena cíóillano jicánotiaioi:

—Cai Ocuíraima, ¿bimaci diga lloéfaido fúiriticai? —daide.

<sup>50</sup> Afe llezica afémacimona dáamie lletáriraini caifóidillaíma ocuífiregamie bofede. Ie jefo nabefo ñetade. <sup>51</sup> Jira Jesús daide:

—Dama íteza. Mai fáicanocai, —daide.

Iemona Jesús afe jefona ñetácamié jefo jetánote. Afena afémie jacáitate. <sup>52</sup> Afe mei Jesús lletáriraini illaini naa gairíraco ocuídino, naa ie lláitaibite éinamacina daide:

—¿Mei nibái merírifiredimiedicue izói lloéfaillairi, naa bigíniari cuena lláitaibitioi?

<sup>53</sup> Naui nágaruillaído Juziñamuimo gairíracomo omoi cue llófuefirena llezica, jaca cuena jetáñediomoi. Mei íadi birui omoi jitaica raa finóllirui. Naio comini íbailla izói, ja birui Taife bínie náamatade, —daide.

*Pedro Jesuna jáanote*

*(Mt 26.57-58, 69-75; Mr 14.53-54, 66-72; Jn 18.12-18, 25-27)*

<sup>54</sup> Iemona Jesús llaitada, lletáriraini caifóidillaíma jofomo uitíaioi. Afe llezica Pedro bai jicado jaide. <sup>55</sup> Afénomo afeco cigi íbírímo irai bonódiaioi. Aféramo agáidiaioi. Iemo Pedro afémaci cígímo agáizaide. <sup>56</sup> Iemo afénomo ite ócuífiregango irai fueмо Pedro ráinana ciode. Afe mei afengo daide:

—Bímie jaca Jesús diga ífirede, —daide.

<sup>57</sup> Mei íadi Pedro jáanuano daide:

—Afémiena onóñedicue, —daide.

<sup>58</sup> Afe mei íanori íllamona jáímie íena cíóillano daide:

—O bie afémaci íedio, —daide.

Mei íadi Pedro daide:

—Ieñede; cue bie afémaci ímieñedicue, —daide.

<sup>59</sup> Afe mei jabo are íllamona da hora fidi jáímie riire daide:

—Uáfueza. Bímie afémie diga ífirede mei afémie daje izói Galilea ímieza, —daide.

<sup>60</sup> Jira Pedro daide:

—O úrillana onóñedicue. ¿Minica llotio? —daide.

Ja Pedro úrioidemo átava úrite. <sup>61</sup> Iemona Jesús Pédro mo érocaide. Afe llezica Pedro afémiena daináfuemo uíbicaide. Be níuui: “Atava nai úriñena llezica dacaiñoámani cuena jáanoitiO.” <sup>62</sup> Afemona Pedro jino jaillano zuure eede.

*Jesús jifánodoidiaioi*

(Mt 26.67-68; Mr 14.65)

<sup>63</sup> Jesús llaítada úiñotino afémiena jifánodoiano razido íena fatíaioi. <sup>64</sup> Daje llezica ie ui íbáillano, ie uieco fátano daidíaioi:

—¿Bu o faaja? ¡Onóillano jino llone! —daidíaioi.

<sup>65</sup> Afe llezica diga jiáifuiuido íena báíñotiaioi.

*Dáanomo gairide illáicomini uícomo Jesús uitíaioi*

(Mt 26.59-66; Mr 14.55-64; Jn 18.19-24)

<sup>66</sup> Ja mona monáidemo judíuai éicomini, naa lletáriraini illaini, naa ocuica uai llófuetinori dáanomo gairídiaioi. Afe gairítaga illáicomini “Junta Suprema” dainámaci. Afénomo Jesús uillano, jicánotiaioi:

<sup>67</sup> —Caimo llone, ¿o meita Crístodio? —daidíaioi.

Jira afémie uai ote:

—Afena jii daidícuenia, cuemo ínoñeitiomoi. <sup>68</sup> Daje izói jiáifue ómoimo cue jicánoia, íbana uai óñeitiomoi. Afe izói cuena zúitañeitiomoi. <sup>69</sup> Mei íadi benómona Nanoide íima Jitó Cristo jamánomo riñorede Juzíñamui nabézimo ráinaite, —daide.

<sup>70</sup> Afe mei nane afémiemo jicánotiaioi:

—¿Meita o Juzíñamui Jitódio? —daidíaioi.

Jira Jesús íaioi uai ote:

—Jii, dani omoi daina izói níimiedicue, —daide.

<sup>71</sup> Iemona afémaci daidíaioi:

—Ja jiáie uai nábitinona jitáíñedicaí. Cai bie dama ie fuémoma ie fiéni úrillana cacádicaí, —daidíaioi.

## 23

*Pilato uícomo Jesús uitíaioi*

(Mt 27.1-2, 11-14; Mr 15.1-5; Jn 18.28-38)

<sup>1</sup> Iemona nana náidacaillano Jesús Pilátomo uitíaioi. <sup>2</sup> Afénomo diga fiénidifuiái íemo jóonetiaioi. Daidíaioi:

—Bímie cai comínimo icírafue comúitajana ciódicaí. Iemona comini áferi faillíñaicaidiaioi. Afémie “Romano jamánomoidillaíma íbátaga úcube íbánidicaí,” daide. Afe llezica afémie “Íllaima Crístodicue” daíífiredé, —daidíaioi.

<sup>3</sup> Jira Pilato afémiemo jicánote:

—¿Meita o judíuai Ílláimana? —daide.

Jira Jesús uai ote:

—O daina izói, jii níimiedicue, —daide.

<sup>4</sup> Iemona Pilato lletáriraini illáinina, naa comíniri daide:

—Bie cómemo fiénidifueña baiñedicue, —daide.

<sup>5</sup> Mei íadi dáanomo riire daidíaioi:

—Nana Judea comínimo ie llófueinafuiuido icírafue íaioimo comúitate. Fueñe Galilea éniemo daíí finode, íemo birui cai éniemo nágagobiaido daje izói finode, —daidíaioi.

*Herodes uícomo Jesús uitíaioi*

<sup>6</sup> Jesús nauí Galiléamo llófueoinafueña Pilato cacáillano, jicánote:

—¿Bie íima Galilea ímie? —daide.

<sup>7</sup> Comini daií daidíaiõimo, Heródesmo íena orede, mei afémie Galilea illáimana. Aféruillaído Herodes Jerusalemo ite. <sup>8</sup> Herodes Jesuna cióillano iere ióbicaide. Jaiái ninomo íena cióiacade. Comini Jesudo dáiñana Herodes cacáfiredede. Iemona Jesús daa ciórainina raa ínuana Herodes cióacade. <sup>9</sup> Iemo Herodes diga icaiño diga ráfuiái íemo jicájicanode. Mei íadi Jesús jaca uaina õñede. <sup>10</sup> Dáanomo lletáriraini illaini ocúicafue llófueraíniri itíaiõi. Bimaci Jesumo fiénidifuiái riire jóonetiaõi. <sup>11</sup> Iemona Herodes ie fuíríraini diga Jesuna ja jámairuitiaõi; iere íena áifedotiaõi. Afe mei ebírede illaíma ínóroina íemo jítadíaiõi; jítamona daií afémie jifánodoídiáiõi. Afe meífomo Herodes dáanomo Jesuna Pilátomo orede. <sup>12</sup> Aféruído Pilato Herodes diga daje nabaina mameide. Jaiái uícodo are conímana éoidiaillinoi.

*Jesús titállena maméidiaõi*

*(Mt 27.15-26; Mr 15.6-15; Jn 18.39-19.16)*

<sup>13</sup> Afe jira Pilato lletáriraini illaini, íemo ríimaci naa comini dáanomo gairítano daide:

<sup>14</sup> —Bie omoi lloga comínimo icírafue comuítatímie. Mei íadi omoi cacáicana izire íena jicánoticue. Jicánuamona ie fiéni finócafueña baiñédicue. Afena cacádiomoi. Daje izói afémie omoi nitaca fiénidifuiái cióñedicue. <sup>15</sup> Daje izói Herodes nífuena cióñenano afémie abido cuemo orede. Ja ciódiomoiza, bímie titállena íñede. <sup>16</sup> Afémiena zechétaiticue. Afe mei afémiena zuitada jino óreiticue, —daide.

<sup>17</sup> Afe rafue ana comini cáimacaitallena, Pilato daa llavécamiéna zuitáfiredede. <sup>18</sup> Mei íadi nana comini dájena riire daidíaiõi:

—Bie Cristo oni jica titálleza. Barrabás caimo zuitari, —daidíaiõi.

<sup>19</sup> Naui afe Barrabás llavéracomo llavéidiaõi, mei afémie jofue comini uáitajano jíáie illaíma jóoneacade. Afe llezica afémie jíáimana ie tita ícoínia llavéidiaõi. <sup>20</sup> Pilato Jesuna zuitáacade. Iemona dane dáanomo íaiõimo úrite. <sup>21</sup> Mei íadi afémaci riire daidíaiõi:

—¿Cruzmo ie corái! ¿Cruzmo ie corái! —daidíaiõi.

<sup>22</sup> Ja dacaiñoámani Pilato íaiõina daide:

—¿Ñibái mei ie títaiticue? ¿Afémie níé fiénidifue finode? Ie cue titalle fiénidifueña íemo baiñédicue. Afémiena zechétaiticue. Afe mei afémiena zuitada jino óreiticue, —daide.

<sup>23</sup> Mei íadi afémaci Jesús coráillena ríirerie jicádiaõi. Jamánomo ríirerie íaiõi jícajamona, íaiõi jitaica otíaiõi. <sup>24</sup> Iaiõi jícajana are illa ícoínia Pilato fairíote. <sup>25</sup> Afe jira nana llavécanuíaímona afe nízeza Barrabás Pilato zuitade. Afe Barrabás illaíma uáitano jíáillaíma jóoneacana ícoínia íena llavéidiaõi. Afe izói jíáima ie tita ícoínia, llavéidiaõi. Mei íadi Pilato afe comini jitailla izói Jesuna fecade.

*Jesús cruzmo coráidiaõi*

*(Mt 27.32-44; Mr 15.21-32; Jn 19.17-27)*

<sup>26</sup> Jesús íaiõi coráiailla llezica Cirene énie ímie Simona llaitádiaõi; Jesús uiga cruz íena uitátatiaõi. Afémie jino jacáfaímona jófue mo bite. Jira Jesús rocaca cruz Jesús ódana uitátatiaõi.

<sup>27</sup> Afe llezica diga comini afémie ódana jáidiaõi. Daje izói diga ringóniai afémieri zúucaillano éecana jáidiaõi. <sup>28</sup> Mei íadi Jesús aféngotaiõimo érocaillano daide:

—Jerusalén ringóniai, mai cueri éeñeno iri. Mei jíáifodo dani omoi abiri eeri. Daje izói dani omoi úruiaimo eeri. <sup>29</sup> Mei jamánomo zúuredíruillaímo dúcítiaíõiza. Aféruimo bie izói dáitíaiõi: “Uruena comuítañedingotiai, ¡níi caimare illa! Daje izói úruenidingotiai, ¡níi caimare illa! Afe izói úrue mónoína jirótañedingotiai, níi caimare itíaiõi.” <sup>30</sup> Aféruimo comini caifóneduaina dáitíaiõi: “Cai emódomo jáíri,” dáitíaiõi. Afe izói duera íduaina dáitíaiõi: “Cai retáidori” dáitíaiõi. <sup>31</sup> Mei birui nífuenidímiedicue ia bie izói duere cuena finódiaõi. Iemona jíáíruído fiénidino cue duere zefuilla baímo duere finólliaõi, —daide.

<sup>32</sup> Afe llezica mena come, comini fáfireдино Jesús diga daane coráillena uitíai. <sup>33</sup> Calavera maméidinomo dúciillano Jesús coráidiai. Daje llezica afe mena fiénidimie íaillinoi, dáamie Jesús nabézimo, jáimie ie jarífezimo coráidiai. <sup>34</sup> Ie íai coraina llezica Jesús daide:

—Moo, íai fieni finócafue iba oñeno iri; abina onóñediai dai ñíaza, —daide.

Afe mei fuiríraini onótaraji dotádiai Jesús iniroi áfedo dani íai maiñóllena. <sup>35</sup> Afénomo ite comini acáritiaí. Afémaci naa nairai imaci illáicomini afémie áfeduano daidiai:

—Jáimana jíllotafiredoza, ua o Cristo o íadi, daje izói Juzíñamui nizécamiena o íadi, daje izói Juzíñamui mai o abi jíllota, —daidiai.

<sup>36</sup> Daje izói fuiríraini íena áfedodiai. Ainozillano rochíredijina, figóñede vino íena jirótatai. <sup>37</sup> Jirótano daidiai:

—Judíuai Illaíma o íadi o abi jíllota, —daidiai.

<sup>38</sup> Ie ifo acónimo cuezábici jae jónega. Afébici dazieámani uai cúeina: griego, íemo latín, íemo hebreo diga. Afébicimo daide:

“Bímie Judíuai Illaíma.”

<sup>39</sup> Coraica fiénide íaillinoimona dáamie Jesús uáitano daide:

—Crístona o íadi, mai o abi jíllota coco diga, —daide.

<sup>40</sup> Mei íadi jáimie ie nabáimie llétajano daide:

—¿Ñibái mei Juzíñamuina o jacíruiñedio? Daje duere finóinafue anamo itíoza. <sup>41</sup> Coco aillo finócafue ite. Jira dúere finóbidioco. Coco finoca fiénidifue iba ua otíai. Mei íadi bie íima fiénidifuena finóñede. <sup>42</sup> Jira uáitañedimie Jesuna daide:

—Jesús, o illáimana illíruimo o dúciadi cuemo uíbicaíri, —daide.

<sup>43</sup> Jira Jesús uai ote:

—Uáfueña ona dáitícue, ja birui cue diga ñue ebíredinomo íitio, —daide.

### *Jesús tílla*

*(Mt 27.45-56; Mr 15.33-41; Jn 19.28-30)*

<sup>44</sup> Ja jitoma jaíciri illa llezica nániena nauíbicaide. Afe nauilla are ite. Ua jitoma arífemona ana ítemo llícaide. <sup>45</sup> Afe llezica jitoma ui duide. Jítireficaide. Daje llezica gairíracomo fetácaroi caifona ana eróicana dáafenedo daingo cúajicaide. <sup>46</sup> Afe mei Jesús ficire caillide:

—Moo, cue joreño omo cue ígaza, —daide.

Dai daínano tíide.

<sup>47</sup> Romano illaíma afe íficaidifue cióillanona Juzíñamuimo caimátaide. Daide:

—Uáfueza. Bímie jaca níifuenidimie, —daide.

<sup>48</sup> Daje izói nana afénomo ite comini bie íficaidifuena cióillano afénomona íai jófuemo jamánomo zuure jáidiai. <sup>49</sup> Mei íadi nana Jesús onógamaci aféfuiaimo jícana acáritiaí. Daje izói Galiléamona Jesudo jaide ringóniaí jícana acáritiaí.

### *Jesús raitíai*

*(Mt 27.57-61; Mr 15.42-47; Jn 19.38-42)*

<sup>50</sup> Judea éniemo ite Arimatea jofue ímie José afénomo ite. Afémie ñue comeci jaícina jóidimie. Afe José judíuai ocuide illáicomínimo jainaide. <sup>51</sup> Afe bie José Juzíñamui illáimana illíruimo ocuirifirede. Afe jira afémie jáie judíuai ocuide illáicomini finócana jíruiñede. <sup>52</sup> Ie jira afémie Jesús abi Pilátomo jicajide. <sup>53</sup> Afémie Jesús abi crúzmona ana uano áillue iníroina junide. Junilla mei, idu anamo nofícimo finócaojimo afémie Jesús raite. Aféfomo nai buna ráiñena. <sup>54</sup> Nana bífuiaí viernes nauife dibénedo zuide. Jaca uícodo viérnemo ocózinaiaruimo jitaica raana finófirediai.

<sup>55</sup> Afe Galiléamona Jesudo bite ringóniai Jesús ráinano érozaidiaioi. Afe llezica ie abi tíide bíinana cíodiaioi. <sup>56</sup> Aféngotiai meine jofomo jaillano, ziórediji, naa abi bíraniairi finódiaioi. Afe mei ocózinairuimo ocuica uai daína izói ocózinaidiaioi.

## 24

### *Jesús tíillanona meine cáadimiena jaide*

*(Mt 28.1-10; Mr 16.1-8; Jn 20.1-10)*

<sup>1</sup> Semana nanódiruido afe ringóniai raire jítiramo Jesús raiafo érozaidiaioi. Iaiói finoca zióredijillai uitíaiói. Iemo jiáie ringóniai íaioina nabáidiaioi. <sup>2</sup> Afe ringóniai afénomo dúcidiaioimo, raiafo íbailla nofici nano illa izói íñede. Oni eneno jónega. <sup>3</sup> Aféfomo jofó jáidiaioi, mei íadi jofó jáidiaioimo cai Ocuíraima Jesús abi cíóñediaioi. <sup>4</sup> Afemona iere jacínaitiaioi. “¿Ñie izói íticai?” daidíaiói. Daíí íaioi daína llezica mena íima aféngotiai áinori naidánana cíodiaioi. Afe íaillinoi quenírede iniroi jítádiaillinoi. <sup>5</sup> Afe íaillinoina cíoillano, iere jacínaitiaioi. Jacínaillamona ana éniemo bíjicaidiaioi. Iaiói bíjicailla llezica afe íaillinoi aféngotiaína daide:

—¿Ñibái mei cáadimie tíidino cígido jenódiomoi? <sup>6</sup> Afémie ja benó íñede. Ja meine cáadimiena jáideza. Nauí Galiléamo ie illa llezica, ómoína ie daína uaimo uíbicairi. <sup>7</sup> Afénomo afémie bie izói ómoína daide: “Nanoide íima Jitó Cristo fiénide comínimo fecalle. Afémiena cruzmo córaítiaioi. Iemo daruíamani íllemona meine abido cáadimiena jáite,” —daidíiaillinoi.

<sup>8</sup> Afemona aféngotiai Jesús íaioina daíífírena uaimo uíbicaidiaioi. <sup>9</sup> Afe mei raíáfomona meine bitíaiói. Billano nana bífuiái once dígade llófuegamacimo llotíaiói. Daje izói jáíimacimo llotíaiói. <sup>10</sup> Bífuiái llocana uitíngotiai mámeciaí be ñie: Magdalena énie ingo María, íemo Juana, íemo Santiago ei María, naa jiáie ringóniairi. <sup>11</sup> Mei íadi aféngotiai íaioina daínana uáiritaidino úrilla izói cacaide. Jira aféngotiai llógana íñoñediaioi.

<sup>12</sup> Iemo Pedro íñoñede íadi, Jesús raíáfomo aizícana jaide. Jofó eromo érocaidemo dama ie juníllaroi dinomo jóidena cíoizaide. Afe mei Pedro afénomo íficaidemo fáigacaillano meine jofomo jaide.

### *Emaús jofue iomo Jesús cíocaide*

*(Mr 16.12-13)*

<sup>13</sup> Aféruído afémacimona ménamie Emaús jofue iodo jaide. Afe jofue Jerusalémona once kilómetros dinó jino ite. <sup>14</sup> Afeodo jailla llezica, nana aféruillaído itífuiaí júfidocana jáidiaillinoi. <sup>15</sup> Iaillinoi úrilla llezica Jesús íaillinoimo áinozide. Dúciillano afe íaillinoi díga jaide. <sup>16</sup> Afémiena cíodiaillinoi mei íadi afémiena onóñediaillinoi. <sup>17</sup> Jira Jesús afe íaillinoimo jicánote:

—Íodo ómicoi jailla llezica, ¿ñifue júfidotiomoicoi? ¿Ñibái mei iere zuure itíomicoi? —daide.

<sup>18</sup> Afe íaillinoimona, Cleofas mámeciredimie uai ote:

—Nana comini biruillaído Jerusalem finócafuaína fidídiaioi.

Afeno ímiedio íadi ¿meita aféfuiaína jaca nai fidiñedio? —daide.

<sup>19</sup> Iemona afémie íaillinoína daide:

—¿Ñifue finódiaioi?

Jira íena daidíiaillinoi:

—Nazaret ímie, Jesús ñue riire uai llóraima aillo ebírede raana uaido finode. Afena Juzíñamui eróicana finode, daje izói nana comini ui cíoicana finode. <sup>20</sup> Mei íadi lletáriraini illaini naa cai ocuídillaini díga afémiena coráiano titállena fecádiaioi. <sup>21</sup> Afe llezica íemo ocuídicaí, ua Israel Nairai anáfenodinomona cai jíllotallena. Ja afefue záillamona ja daruíamani íteza. <sup>22</sup> Ie emódomo cáimona ringóniai ja caina jacínaitade. Aféngotiai

raiafomo nai jítiredemo jaillano íaiói ciónana meine caimo lluaíbitiaíói. <sup>23</sup> Ie abina ciónediaíói. Mei íadi Juziñamui abi imaci ángeles dainámacina jae ciodiaíói, daidiaíói. Afe ángeles ringóniaina daide: “Jesús caade.” <sup>24</sup> Iemona cáimona raiáfomo jáidiaíói. Dinomo ringónaiái llua izói baitiaíói. Mei íadi Jesuna ciónediaíói.

<sup>25</sup> Jira Jesús daide:

—¡Iere féitafirediomoí! Nana uai llóraini daináuaina iere rairuíoicana ínotiomoí. <sup>26</sup> ¿Uáfueñede Cristo ie ebíredinomo nai jáiñena llezica, afémiemo bie duere finóbillafue jítáirede?

<sup>27</sup> Ie mei nana Cuegáuaimo afémiedo dáinana ñue jino llote. Moisés cuegánicuaimo ite afémiedo úrilla uai ñue jino llote. Daje izói nana jáíie uai jino llóraini llogánicomo itino jino ñue llote.

<sup>28</sup> Jófuemo dúcidiaíoiimo, Jesús iodo nai jáiacadena éroide. <sup>29</sup> Mei íadi afémiena jeruídiaillinoí. Daidiaillinoí:

—Jae nauízaideza, mai benó coco diga fiebi, mei ua jítireoicaideza, —daide.

Jira Jesús jofo jaide íaillinoí diga íllena. <sup>30</sup> Jae íaióiri jofo güirábanimo ráiillano pan líinote. Líinuano Juziñamuina:

—Iere figura, —daide.

Daí dainano dítajano íaillinoíimo ite. <sup>31</sup> Afe llezica íaillinoí ui tújicaillamona íena onódiaillinoí. Afe mei afémie cióbicaíñena. <sup>32</sup> Conímana daidiaillinoí:

—¿Uáfueñede iodo cai úricana jailla llezica, afémie caimo Cuegáuai jino llua llezica coco comeci náicaitade? ¡Afe uáfueza!

<sup>33</sup> Iemo afénomo are íñeno meine Jerusalemo abido jáizaidiaillinoí. Dinomo once orécamací naa íaiói nabáiñiáiri dáanomo gairide baizájidiaillinoí. <sup>34</sup> Afénomo itino íaillinoína daide:

—Uáfueza cai Ocuíraíma ja meine abido caade, Simón Pedro ja íena ciode. <sup>35</sup> Iemo afe íaillinoí afémacimo nana iomo íaiói úrillafuena llotíaillinoí. Afemona Jesús pan díxada íllamona afémiena íaillinoí onónana gairídinomo llotíaillinoí.

*Jesús ie llófuegamacimo cíozite  
(Mt 28.16-20; Mr 16.14-18; Jn 20.19-23)*

<sup>36</sup> Afe íaillinoí dáinamo úritiaíoiimo, Jesús íaiói cígimo náidazaide. Náidacaillano íaiói uáidote; daide:

—Jacíruiñeno, uái omoi iri, —daide.

<sup>37</sup> Afémiena cíoillano, “¡Come joreño caimo billa!” dainano iere jacínaitiaíói; cuidíridiaíói. <sup>38</sup> Mei íadi Jesús íaióina daide:

—¿Ñibái mei jacínaitiomoí? ¿Ñibái jizíreoicana cue ínotiomoí? <sup>39</sup> Bené cue ónoímo érocái. Daje izói cue ídaímo eroí. Nímiédicue. Cue abi jeta. Cómedicueza ónoi. Ja cue abina ciodiomoíza. ¡Mínica joreño ícurunideza; íeizinide! —daide.

<sup>40</sup> Daí daina llezica ie onói ie idai diga afémacimo ácatate. <sup>41</sup> Mei íadi afémaci íóbidiaíói ia, iere uáinificaidiaíói. Ie jira afémie uáfueña íllana nai figo ínoñediaíói. Jira Jesús íaióina daide:

—¿Benó ómoímo due güíllena ite? —daide.

<sup>42</sup> Ie jira ruica chamu íemo itíaíói, naa due cíifo iji diga. <sup>43</sup> Afe líinota íaiói eróicana güite. <sup>44</sup> Afe mei íaióina daide:

—Nana nauí cuemo íficaidífuiaí, nauí omoi cígimo cue illa llezica, ómoína cue daina be ñie. Nana cue dibénedo uícodo cuegáuai daina ñue ícoímo fuitárede: Moisés cuegánicomo cue dibénedo úrite; daje izói jaiaí uai jino llóraini cue dibénedo úrite; íemo jáí Salmos cuetímie cue dibénedo úrite. Nana afémaci cue dibénedo úrilla uai ñue ícoímo fuitárede, —daide.

<sup>45</sup> Iemona Juzíñamui Cuegáuaimo dáinana Jesús afémacina ñue onótate. <sup>46</sup> Iaiõina daide: —Cuegáuaimo daína izói Cristo jaca tírede. Daje izói daruiámani íllamona afémie tíllanomona meine cáadimiena jáirede. <sup>47</sup> Daje izói Jerusalémona oni nana jáie náraiaimo comini comeci ífuiái íaiõi méidollena cue mámecido llórede. Daje izói comeci íaiõi méiduamona íaiõimo ite fiénidifue múiñua cue mámecido llórede. <sup>48</sup> Nana bie cuemo comuídifuiái uai nabáirainidiõmoi. <sup>49</sup> Ie jira cácarei, cue Moo uícodo lloga fecáacaga Ñuera Joreño ómoimo óreiticue. Afe caifona bille ríino omõi nai llínoñeille dino, benó Jerusalén jófuego omõi iri, —daide.

*Jesús ja caifo monamo jaide*

*(Mr 16.19-20)*

<sup>50</sup> Afe mei Jesús afémacina jofue jinomo uite. Betania áinomo jáidiaõõi. Afénomo Jesús onõi caifo ñúitajano íaiõi ñue íllena llote. <sup>51</sup> Daií ie daína llezica afémacimona oni jirecaillano afémie ja caifo monamo uiga. <sup>52</sup> Afémiemo íaiõi caimátailla mei, abido Jerusalemõ iere íóbicana jáidiaõõi. <sup>53</sup> Afemona afémaci Juzíñamuimo gairíracomo ífirediaõõi. Afe llezica aillo ñúefuiái Juzíñamuimo nitáfrediaõõi. Daiítadeza. Jae ñie.



## JUZÍÑAMUI ÑUEFUE SAN JUAN LLOGAFUE El Santo Evangelio Según San Juan

### *Juzíñamui Uaina maméidimie ífícaide*

<sup>1</sup> Naga raa táinia uícomo afe Uai dainámie Cristo jaca ite. Afe Uai jaca Juzíñamuimo ite. Afémie Juzíñamui. <sup>2</sup> Ua nanóidiruimo afémie Juzíñamuimo ite. <sup>3</sup> Afémiedo Juzíñamui bínie naa ráaniairi finode. Minícana iñede afémie finóñegana. <sup>4</sup> Afémiemo cáallino ite. Afe cáallino nana comini egáñote. <sup>5</sup> Afe egáñotino jaca jítiredinomo egáñote; íadi afe jítiredino afe egáñotinona jaca dúitanide.

<sup>6</sup> Daa Juzíñamui orécamie biniemo bite. Afémie mámece Juan. <sup>7</sup> Afémie uai nabáiraímana bite egáñotinodo ñue úrillena. Daíí úrizaibite, afémie daináfuedo nana comini íinollena. <sup>8</sup> Juan dama egáñotimieñede. Fia afémie orécamie egáñotimie uai nabáiraímana úrizaibite. <sup>9</sup> Afe egáñotimie uáfueña ñue egáñotimie. Bie egáñotimie nana caimo egáñote. Afe egáñotimie biniemo dúcizaibite.

<sup>10</sup> Afe Uai dainámie biniemo ite; Juzíñamui afe Uai dainámiedo bínie finode, íadi biniemo itino afémiena onóñediaioi. <sup>11</sup> Afémie ie éniemo bite, íadi ie comini afémiena llínoñediaioi. <sup>12</sup> Mei íadi dáarie mei afémiena llínotiaioi; afémiena íinotiaioi. Afe íinotino ríinorediuaina igáiaioi, Juzíñamui úruiaína íaioi jáillena. <sup>13</sup> Afe úruiaí come móotiaí úruiaí izóí cómuítañega. Come móotiaí bie énie comuilla izóí, comuítatiaioi. Afémaci íaioi comeci jítainafuedo comuítatiaioi, íadi Juzíñamui úruiaí dama Juzíñamuimona comuide.

<sup>14</sup> Afe Uaina maméidimie cai come abi izóí dama ífícaide. Ie mei cai cígiri nano nié dino ite. Afémie comécimo ñuefuaí illa, ua nana izíruillafue uafue díga. Ie jira afémiemo ite ñue ebírenafue caimo cíocaide; afe ebíredifue dama Moo Juzíñamui daade Jitó ie. <sup>15</sup> Juan afémieri jéerie ñuefuedo úrite. Daide:

—Baie cue úrillamie, ómoimo cue llogámie, cue óodana bitímie. Afémie jae cue uíeco dibénemo jaide, cue íñeniadi íteza, —daide Juan.

<sup>16</sup> Afémie aillo ñuera ráfuaímona caimo ñue ézicigafuaína llínoticai. Ua nana fáicanocaiñeno llínoticai. <sup>17</sup> Juzíñamui caimo ocuícáfue Moisedo oreca, íadi izíruinafue uáfuaí díga Jesucristodo bite. <sup>18</sup> Buna jaca Juzíñamuina cióñena; mei íadi dama daade ie Jitó, ua Moo comeci áinomo itímie, baie Juzíñamui ífueña cai onótatímie.

### *Báutizaraima Juan Jesucristodo ñue úrite (Mt 3.11-12; Mr 1.7-8; Lc 3.15-17)*

<sup>19</sup> Jerusalemo ite judíuai, dárie lletáraini Levítaniaí díga Juaamo orédiaioi. Daíí íaioína orede báimiemo jicánollena, “Búdio” daíllena. <sup>20</sup> Afémie jáanoñeno llote. Daide:

—Cue Crístoñedicue, —daide.

<sup>21</sup> Nane dánomo íemo jicánotiaioi:

—¿Búdio mei? ¿O Juzíñamui uai llóraima, Elíadio? —daidíaioi.

Juan: —Íéñedicue, —daide.

Iemo nane jicánotiaioi:

—¿Ñí Juzíñamui uai llóraima bille dainámiedo? —daidíaioi.

Jira uai ote: —Íéñedicue, —daide.

<sup>22</sup> Ie jira íena daidíaioi:

—¿Mei búdio? cai orédinomo fairíogafueña cai uíllena. ¿Mei nie izóí caina o abi ífueña daítio? —daidíaioi.

<sup>23</sup> Juan íaioi uai ote:

—Cue dama jofue iñénanomo caillide uáidimedicue. Bai Juzíñamui io jaícina zitari, jaiái Juzíñamui uai llóraíma Isaías daina izói, —daide. <sup>24</sup> Juan diga úrizabitino jae Fariséuaimona orécaiaíoi.

<sup>25</sup> Ie mei Juaamo jicánote:

—Mei Cristoñedio, Elíañedio, Juzíñamui uai jino llóraímañedio, ¿nibái mei báutizaibifiredio? —daídíaíoi.

<sup>26</sup> Juan íaíoína daide:

—Fia jáinoido báutizadicue. Mei íadi omoi cígimo daa omoi onóñegamie ite. <sup>27</sup> Cue óodana afémie bite, íadi cue jinomo baitade. Afémie eiba ico igai zuitánidicue, mei jamáimedicueza, —daide.

<sup>28</sup> Nana afe Juaamo jicánollena Betábaramo úritiaíoi. Betábara énie Jordán imani ruicáfellemo ite. Ja dinomo nauí Juan comini báutizafirede.

### *Jesús, Juzíñamui Cordero*

<sup>29</sup> Afe meifo iruido Juan ja Jesúna ciode. Jesús Juaamo ánozide. Ánozidemo Juan daide:

—¡Eroi! Juzíñamui Cordero daina ie Ovéjana mamécamie. Ua, afémie nana comini fiénidífue oni dóraíma. <sup>30</sup> Nauí afémie cue llogámie “Cue óodana daa íima bite. Ua óodana bitímie cue baímo baitade, mei afémie cue jinófenemo íteza; daje izói cue iñenia afémie jae nano itímieza.” Daí nauí afémiedo úriticue. <sup>31</sup> Dama afémiena onóñedicueza, búdimieza. Iadi jáinoido comini báutizaibiticue, Israel nairai afémiena ñue onóillena, —daide.

<sup>32</sup> Ie emódomo daide Juan:

—Ja Juzíñamui Ñuera Joreño, Espíritu Santo, bímiemo monámona ana bíllana ciódicue. Fíicirina eroide. Iemo afémiemo fiébide. <sup>33</sup> Jaca nanómona onóñedicue nibai bu. Mei íadi jáinoido comini báutizallena daí cuena ocuídímie cuena daide: “Ñuera Joreño daa ímamo ana bíllana íemo afémiemo fiébillana o cióadi, afémiena ónoítio. Afémie Ñuera Joreño itátatímie.” Daí cuena daide. <sup>34</sup> Ja íena ciódicue. Ie jira ñue llóraímadicue. Uáfueña lloticue. Afémie Juzíñamui Jitó, —daide Juan.

### *Jesús nano fueñe ie llófuegamaci*

<sup>35</sup> Afe meifo iruido Juan mena ie llófuegamie íaillinoi diga, meine batí dáanomo ite. <sup>36</sup> Jesús mácajana cióillano, Juan daide:

—Eroi bímie Juzíñamui Cordero daina ie Ovéjana mamécamie, —daide.

<sup>37</sup> Iemo Juan llófuegamie íaillinoi ie daináfueña cacáillanona oni Jesumo jáizaidiaillinoi.

<sup>38</sup> Ie mei Jesús jino érocaidemo, afémiemo íaillinoi jáizaillana ciode. Iaillinoína daide:

—¿Bu mei jenódiomícoi? —daide. Afe íaillinoi afémiena daide:

—Llófueraíma, ¿ninomo itio? —daide.

<sup>39</sup> Jira Jesús fairíote:

—Eróizaibi, —daide.

Iemona iedo jáidiaillinoi. Afémie illánona cíozaidiaillinoi. Ie mei, nibai jitoma ana ítemo, afémieoiri iruido fiébidiaillinoi. <sup>40</sup> Daa afe íaillinoimona ua Juan llogáfueña cacádinomona, Jesús diné jáidímie Andrés. <sup>41</sup> Afémie Simón Pedro ama. Afe Andrés, nano fueñe abido ie ama Simón baizaide. Baizájillano íena daide:

—Mesána, Juzíñamui mámecigamiena jae baiticai. Cristo jáífodo mamécamie, —daide.

<sup>42</sup> Ie mei Andrés Jesús illánomo Simona uite. Dúcidemo Jesús íena cióillano daide:

—O Simona, Jonás jitódio. Iadi biruímona Céfana mámeítio. Pedro jáífodo mameína.

### *Jesús Felipe uáidote Natanael diga*

<sup>43</sup> Afe meifo iruido Jesús Galilea éniemo jáiacade. Jaillano Felipe baizájide. Afémiena daide:

—Cuedo bi, —daide Jesús.

<sup>44</sup> Afe Felipe Betsaida jofue ímie. Andrés Pedro diga daano imaci. <sup>45</sup> Ie mei Felipe dinena Natanael baizájide. Baizájillano daide:

—Moisés ocuica uai ciegánicomo llogámie ja ciódicai. Ua Juzíñamui uai jino llóraini llua izói, afe íaioi llogámiena ciódicai. Afémie Jesús, José jitó, Nazaret jofue ímie, —daide Felipe.

<sup>46</sup> Natanael dinena daide:

—¿Níga ñúefue jadí Nazarémona fíditiio? —daide.

Felipe uai ote:

—Eróizaibi, —daide.

<sup>47</sup> Jesús Natanael ánozillana cióillano daide:

—Benomo bite nahí israelita ímie; jífuiáfue afémieemo iñede, —daide.

<sup>48</sup> Ie jira Natanael Jesumo jicánote:

—¿Nie izói cuena onódio? —daide.

Iemo Jesús íena daide:

—Felipe nai ona uáidoñenia, ona ciódicue. Ua higuera anamo o íllana ciódicue, —daí Jesús daide.

<sup>49</sup> Iemo Natanael daide:

—Llófueraíma, O Juzíñamui Jitódio. Israel Illáimadio, —daide. <sup>50</sup> Jesús ie uai ote:

—¿Dama cue dáinana higuera anamo ona ciódicue iedo daí cuena ínotio? —jicánote Jesús. Afe emódomo Jesús íena daide:

—Bie rafue jinomo jíáie áillue ráfuena cíotio, —daide. <sup>51</sup> Iemo afe emódomo Jesús afémacina daide:

—Uáfueña ómoimo llóiticue. Mona túíñuana cíotiomoi. Iemona Juzíñamui abi imaci, ángeles daínamací, cuemo ana bítiaioi, caífo cúemona jáitiaioi. Mei Nanoide íma Jitódicueza. Afena cíotiomoi, —daide.

## 2

### *Galilea éniemo Caná jófuemo áirenafue*

<sup>1</sup> Daruíamani íllamona, jadí Caná jófuemo, Galilea éniemo, áirenamona iráizillafue finódino. Jesús ei afénomo ite. <sup>2</sup> Jesús naa ie llófuegamaciri ja afe áireina ráfuemo uáidogamací. <sup>3</sup> Afe iráizillafuemo jirórai, vinoi fuilla. Ie ei Jesuna daide:

—Ja vino iñede.

<sup>4</sup> Jesús uai ote:

—Ei, ¿níbái cuena daí daídio? Cue jíeruillaruímo nai dúcíñede, —daide.

<sup>5</sup> Mei íadi afengo afénomo ite jirole atírainina daide:

—Mai, nana afémie daína diga fino, —daide.

<sup>6</sup> Dinomo seis diga ícíruai, nofíruai ráide. Judíuai afe ícíruai oruítajano jíáimaci ñue oréllena nícidofirediaioi, íaioi abi fíenidífue dóllena. Naga ícírumo ochenta o cien litros oruízite. <sup>7</sup> Iemo Jesús atírainina daide:

—Jadí ícíruai jáinoina oruítari, —daide.

Iemona fuemo jibíezidiaioi. <sup>8</sup> Iemo Jesús íaioina daide:

—Due uano rafue náamamo uiri, —daide. Daí finódiaioi.

<sup>9</sup> Iemo afe rafue naama jáinoi facádemo, jáinoiñede. Jae vino. Rafue naama onóñedemo ícíruai jáinoina oruízite. Dani atídino áfena onona. Afe vino nimánuanona, rafue naama ringo óiacadímie uáidote. <sup>10</sup> Iena daide:

—Nágamíai ñúeji nano fueñe atífrediaioi. Ie mei nana uáidogamací aillo jirole mei, jamai vino atífrediaioi. Mei íadi nai biruido ñúeji ja o éenoga, —daide.

11 Afe vino méiduafue ua Jesús nanoide uaido daingo comuítaga raa; afefue Galilea éniemo, Caná jófue mo finoca. Bie uaido comuítaga raado afémie ie ebírede ríno jino cíotate. Iemona ie llófuegamaci ñue íena ínotiaíoi.

12 Ie meímodo Capernaúmo, Jesús jaide ie ei diga, ie ámatiaí diga, ie llófuegamaciri. Dinomo ja bai niga mona itíaíoi.

*Jesús Juzíñamui gairíraco ñue duafue  
(Mt 21.12-13; Mr 11.15-18; Lc 19.45-46)*

13 Aféruillaido Judíuai pascua rafue ánozide. Iemona Jesús Jerusalemo jaide. 14 Afe dinomo gairíraco eromo juráriaí, ovejaí, íemo fíicirillaí dieze fecáriraimacina Jesús cíode. Dáanommo úcube méidoraini ráiidiaíoi. 15 Afena cíoillano Jesús ñécigaí móillano jiura finode. Afedo gairíraco eromona nana fecáriraini íaíoi juráriaí ovejaí diga jino jiude. Daje llezica úcube méidoraini úcubetunillaí Jesús ana jutade. Íaíoi úcube facádorabani Jesús oni caitade.

16 Fíiciri fecárainina daide:

—Bie raa benómoma oni ui. ¡Cue Moo jofo fecáriracona mamériñoeno iri! —daide.

17 Ie mei afémie llófuegamaci jaiaí cuezáuaí úbicaidiaíoi. Afe uai llote: “O jofo cue ríiduamona cue abi íñeite izoide,” daide.

18 Iemona Judíuai aféniemo jicánote:

—¿Minícado o rínona cai ácatatío? ¿Bie raa o fínuana bu o ocuilla? —daídíaíoi.

19 Jesús íaíoi uai ote:

—Cue ríno ómoímo bie izói ácatatícue. Bie gairíraco omoí júdaí, ie mei daruíamani íllemona meine nane caífo cue raiñolle, —daide.

20 Jae judíuai Jesuna daídíaíoi:

—Cuarenta y seis fimona niga gairíracoca; ¿íeca daruíamani íllamona meine abido caífo o ráiñoiti? —daídíaíoi.

21 Iadi afémie daína uai gairíraco, dama ie abi llote. 22 Iemona Jesús tíidinomona meine abido cáaillano ie llófuegamaci bie daína uaimo uibíoidiaíoi. Daje llezica Cuezáuaína ínotiaíoi nana Jesús íaíoina daína uai diga.

*Jesús nana comini comécina onode*

23 Jesús Jerusalemo illano, pascua rafue llezica, aillo comini afémiena ñue ínotiaíoi. Ua íaíoi cíofinina afémie uaido fínuana cíodiaíoi. Afena cíoillano afémiena ínotiaíoi. 24 Mei íadi Jesús afe cominimo ie abina nai rairuide. Mei nana imaci comécina onódeza. 25 Jíái come aféniemo comini ífuena llónide. Dama afémie dinena íaíoi comeci ífuena onode.

### 3

*Nicodemo Jesumo úrillafue*

1 Daa Judíuai illaíma mámece Nicodemo. Afémie fariseo. 2 Afe bie Nicodemo naio Jesumo úrizabite. Jesuna daide:

—Llófueraíma, Juzíñamui orécao cai llófuellena onódicaí. Juzíñamui cómemo íñeniadi bu bie ríirede cíofinina fínuana ácatanide. Ua o fínua izói buna finónide, —daide. 3 Ie jira Jesús íena daide:

—Uáfuenta dáitícue: meine nane jécíñegamie jaca Juzíñamui illáimana illánona cíoñeite, —daide. 4 Jira Nicodemo jicánote:

—¡Jae éicomedicaí! ¿Nie izói meine jocóllicaí? ¿Meine nane ei eromo come jáirede, dáanommo abido jécíllena? —daide. 5 Ie jira Jesús uai ote:

—Uáfuenta dáitícue: meine nane jáinoina jécíñegamie, Moo Joréñomona jécíñegamie diga, ua Juzíñamui illáimana illánomo jofo jáinide. 6 Come móomona jécígamie jaca come. Iadi Juzíñamui Joréñomona jécígamie jaca joreño. 7 Cue ona daínáfuere jácinaíñoeno iri. Uáfuenta nágamie comue jécíafue, ua caífona jécíafue jaca jítáirede. 8 Jairifo náganomo

ebena jaiñófirede. Ie jáiñuana cacádio, mei íadi ninena bite, niné jaide, onóñedio. Daje izói nana Juzíñamui Joréñomona jéicigano, afe jairifo izói itíaiói, —daide.

<sup>9</sup> Jira meine nane Nicodemo jicánote:

—¿Nie izói bie iite? —daide.

<sup>10</sup> Jesús uai ote:

—¿Nibái mei jicánote? O iere aillo Israel llófueraimana o íadi ¿bie ráfuenta onóñedio?

<sup>11</sup> Uáfuenta dáititue: cai onóigafuedo úriticai. Cai ciónafuenta féinino lloticai. Mei íadi cai ómoimo llogáfuenta íñoñediomoí. <sup>12</sup> Bie énie raado ómoimo cue úriadi nai íñoñeniadi, ¿nie izói cuena ínoitio mona ero ráfuedo cue úriadi? <sup>13</sup> Buna mona eromo jáiñede. Dama monámona ana bitímie, Nanoide Ima Jitó, monamo jáirena; mei nauí monamo itímieza. Dámiedicue. <sup>14</sup> Nauí jaiái Moisés jofue íñenazicimo jaio caifo ráiñua izói ua afe izói caifo ráiñobicaíticue. Nanoide Ima Jitódicueza. <sup>15</sup> Ua afe cue ráiñua jitáirede nana cuemo ínotino fiénidifue mo báíñeillena. Mei íadi ínotino zíñona ítiaíoi.

### *Juzíñamui nana comínina izíruillafue*

<sup>16</sup> Jesús nai úrillano daide: Juzíñamui nana comínina iere izíruite. Afe iere izíruillamona Juzíñamui ie daade Jitó caimo ite. Ua, afémie ie caimo ite, nana afémiemo ínotino jaca ninomo féiraiñeillena; mei jáífodo ñue zíñona íaiói illena. <sup>17</sup> Comini fiénidifue iba otátaraimana Juzíñamui ie Jitona oréñede, mei íadi ie Jitona orede afémiedo comini jíllobicaillena.

<sup>18</sup> Juzíñamui Jitomo ñue ínotimie duere finóbiñede. Íñoñedimie jae duere finóbide, Juzíñamui daade Jitomo íñoñena jira. <sup>19</sup> Íñoñedino jae duere finóbidiaíoi. Mei ua ñue egáínotimie ana bie éniemo bítemo, jítinona jamánomo gáidiaíoi, fiénidifue finódinona íaiói illa jira. <sup>20</sup> Nana fiénidifue finóraini úzefona éoidiaíoi. Jaca úzefomo áinoziñede. Ua íemo áinoziñediaíoi íaiói fiéni finócafuenta óñoñellena. <sup>21</sup> Uáfue mo comeci facáidino úzefomo áinozifirediaíoi. Iaiói finócafue jaca Juzíñamuimo cacáidinona íaiói illa izói finódiaíoi. Uzefo íaiói finócafue jaca daí ñue cíoitae, —daide Jesús.

### *Báutizaraima Juan Jesudo meine úrizaíbite*

<sup>22</sup> Ie meífomo Jesús Judea éniemo jaide, ie llófuegamaci diga. Dinó diga irui itíaiói. Dinomo comini báutizadiaíoi. <sup>23</sup> Daje llezica Juan, Enón éniemo báutizade. Enón Salim áinomo ite. Dinomo báutizade, aillo jainoi illa jira. Iemona comini báutizaíbitiaíoi. <sup>24</sup> Bifue finódiaíoi Juan nai llavéracomo úiñenia.

<sup>25</sup> Juan llófuegamacimona dáarie judíuaimo úrizaide. Comini íaí fue oni dollínodo úritiaíoi.

<sup>26</sup> Juaana daízaíbitiaíoi:

—Llófueraíma, nauí o diga itímie, Jordán ruicáfellemo itímie, caimo o llogámie, ja comini báutizade. Nana comini afémie diné jáidiaíoi, —daídiaíoi.

<sup>27</sup> Iemo Juan afémacina daide:

—Juzíñamui cómemo í fue fécañenia, bumo ráfuenta íñeite. <sup>28</sup> Cue nauí uáfuedo daínafue dani cacádiomoí. “Crístoñedicue” daídicue. Afémie uícodo orécamedicue. <sup>29</sup> Airenafue mo ringo otímie ua ringo óite. Otímie nabai afe dinó itímie ie úrillana cacade. Cacáillanona íeri iere íóbite. Daje izói biruido cue íóbidicue. <sup>30</sup> Nágarui afémie jamánomo illáimana jáizaide. Ie llezica cue jabómieíticue. Daí jitáirede, —daide.

### *Caifona ana bitímie*

<sup>31</sup> Juan nai úrite; daide:

—Caifona bitímie nana cai jaináinamie. Bie énie ímie ja bíniemo jainaide. Enie ífuenta úrite. Mei íadi monámona bitímie nana cai baímo jamánomoidimie. <sup>32</sup> Afémie cacánafuedo úrite ie ciónafue diga. Iadi afémie daínana buna íñoñena. <sup>33</sup> Da come ie daínana ínoiadi daí Juzíñamuimo fairíote. Ua daí Juzíñamui uáfuenta daínafue uáfuetate. <sup>34</sup> Juzíñamui

orécamié Juzíñamui uáillaido úrite, mei Juzíñamui ie Joreño afe orécamiemo facáñeno nana íteza. <sup>35</sup> Moo ie Jitona izíruite. Naga itínuiaina afémiemo fecade. <sup>36</sup> Iemo ie Jitona ínotimiemo fúíñeite illánona íemo ite. Mei íadi Jitona ínoiacañedimiemo afe fuiñédinona íñeite. Juzíñamui afémiena iere duere fínoite.

## 4

### *Jesús Samaria ingomo úrite*

<sup>1</sup> Fariséuai Jesús Juan baímo aillo comíni jáillana fidídiaioi. Daje izói Jesús Juan baímo báutizafírenana fidídiaioi. <sup>2</sup> Mei íadi Jesús báutizañede; dama ie llófuegamaci báutizaja. <sup>3</sup> Afena Jesús fidíllanona Judéamona meine abido Galilea éniemo jaide.

<sup>4</sup> Jesús jailla llezica Samaria énie cígido jáirede. <sup>5</sup> Ie mei Samaria jófueмо dúcide. Afe jofue mámeци Sicar. Sicar áinori Jacob feci énie ite. Afe éniena ie jito Josemo maiñótate.

<sup>6</sup> Dáanori Jacob jainoi orano ite. Jesús iodo mácajamona zegónaite. Ie jira jainoi orano abímo ráinade ocózinaillena. Jae jaíciri íacademo. <sup>7-8</sup> Ie llófuegamaci jófueмо güille jae íbajidiaioi. Iemo Samaria ringo dúcide. Jainoi uáibite. Iena Jesús daide:

—Jáinoina cue jírota, —daide. <sup>9</sup> Ie jira Samaria ringo Jesuna daide:

—¿Níbaí mei jainoi cuemo jícadío? Odi judíodio. Cue Samaria ingódicue, —daide. (Ua jaiái dínomona judíuai samarítánuaímo nabáirirainide.)

<sup>10</sup> Ie jira Jesús uai ote:

—Juzíñamui fia fecalli raa o onóadi, ua áfena raíre cuemo jícaítio. Daje izói omo jainoi jícadímiena, o onóadi ua raíre cuemo jícaítio; íemona ua cáadijina o ííticue, —daide.

<sup>11</sup> Afengo afémiena daide:

—Íima, o jainoi olle raa íñede. Jainoi orano afórede. ¿Nínómona cáadijina cue íítio? <sup>12</sup> Cai jaiáigimie Jacob bie jainoi orano caímo iga. Benómona afémie jíruaide ie úruiaí diga. Ua dájemona afémie tóiníai jíruaide. ¿O iere afémie báimoidio? —daide.

<sup>13</sup> Jesús uai ote:

—Nana bie jáinoimona jíródimaci nane meine abido jíróacaitiaioi. <sup>14</sup> Mei íadi cue jírótagano jaca meine abido jíróacañeítiaioi. Omo cue ille jainoi ua zíñona íítiji. Nágarui caímare o ítátaite. Illánona fúíñeítinona omo íficaitaite, —daide.

<sup>15</sup> Ie mei ringo afémiena daide:

—Íima, jadé jáinoina cue ine; ja cue jíroacañeílleza, ua nane meine bie jainoi oránomo cue bíñeílleza, —daide.

<sup>16</sup> Jesús aféngona daide:

—O íni jírizairi ie mei bené bi, —daide.

<sup>17</sup> Ringo uai ote:

—Ínínidicue, —daide.

Ie jira Jesús aféngona daide:

—Uáfueña daídío. Ínínidío. <sup>18</sup> Jae cinco dígacaiño íniréidío; birui o illámie o íníñede, —daide.

<sup>19</sup> Afena cacáillano ringo afémiena daide:

—Íima, Juzíñamui uai llóraímiedio ja onódicueza. <sup>20</sup> Cai jáiaimaci Samarítánuaí bie ídumo Juzíñamuina íóbitadiaioi; ñúfuedo íemo úrizabítiaioi. Mei íadi o íemo naa judíuairi jíáfodo daídíomoi. Jerusalemo cai gairíllano Juzíñamuina cai íóbitallena daídíomoi, —daí afengo daide.

<sup>21</sup> Jesús uai ote:

—Ringo, cuena íno. Jáíruimo ja dúcizaide. Aféruimo bídumo bíñeno, Juzíñamuina íóbitaitíomoi. Daje izói Jerusalemo jáíñeno, Juzíñamuina íóbitaitíomoi. <sup>22</sup> Omoí íóbitagamiena onóñedíomoi. Iadi cai íóbitagamiena onódicai, níbai jíllonafue judíuaimona

bíteza. <sup>23</sup> Jae como cue llogáruimo dúcide. Jae birui aferui. Naga Moo Juziñamuina uáfueña ióbitaacadimie afe o joreñodo uáfueña afémiena ióbitaite. Daií Moo Juziñamui cai íena ióbitallena jítaide; ua nana afémiena ióbitaacadino daií billana Moo jitaide. <sup>24</sup> Juziñamui ua Joreño. Afémiena ióbitadino íaioi joreñodo uáfueña ióbitaitaioi, —daide.

<sup>25</sup> Iemona afengo íena daide:

—Cue onódicueza Mesías biite. Afe Mesías daína Cristo. Afémie bia nana ñue rafue caimo jino llóite, —daide.

<sup>26</sup> Jesús daide:

—Ñimiedicue, ori úrilla, —daide.

<sup>27</sup> Iemo ie llófuegamaci dúcide. Dúciillano Jesús ringomo úrillari fáigacaidiaioi. Mei íadi buna jicánoñena áfena. Ua afémiemo afengo jitáillana jicánoñediaioi; “¿Minícafuedo úritiomicoi?” íena daiíñediaioi.

<sup>28</sup> Ie mei afengo iciru fiénocaillano, jófueño jaide. Dinomo comínimo llujáide:

<sup>29</sup> —Nana cue finócafue jino llotímiemo omoi éroizaibi. ¿Bie afe Crístoñede? —daide.

<sup>30</sup> Ie jira jófueño Jesús illánomo jáidiaioi.

<sup>31</sup> Afémaci bitíaiomio ie llófuegamaci afémiena jicade:

—Llófueraima, due güi, —daidiaioi.

<sup>32</sup> Ie jira afémie daide:

—Cuemo ite güillena omoi onóñediomoi, —daide.

<sup>33</sup> Ie jira ie llófuegamaci como fueñe conímamo jicánotiaioi:

—¿Jíáie come afémie écaibite? —daidiaioi.

<sup>34</sup> Ie jira Jesús afémacina daide:

—Cue orédimie comeci jítaina izói cue finóadi bie cue güillena. Daje izói ie táijina cue fuitáadi, güíticue izoide. <sup>35</sup> Omoi llua: “Nai riga raa ollíruimo cuatro diga fiui ite” daidíomoi. Mei íadi dáititue: Erocai. Ja rigánuemo eroi. Ja jéiaruimo ánozide. <sup>36</sup> Ollemono táijidimie iba llíinote. Afe oga llízieniai jaca ninomo fiébite; ua fúíñeite illánomo fiébite. Ua ríjiraíma óraíma diga dáanomo camátaillena daií ite. <sup>37</sup> Omoi jaiai daína uáfueña llote: “Ríjiraímie dáamie íadi otímie jíáimie.” <sup>38</sup> Jae omoi ríñeganomo ómoína orédicue. Jíáimaci táijidiaioi íemo íaioi táijina caimare ínotiomoi, —daide.

<sup>39</sup> Aillo Samaria jofue imaci Jesumo ínotiaioi. Ua uafue ringo llogáuaido Jesuna ínotiaioi. Afengo daínauai, be ñie: “Nana cue finócafueña cuemo llote.” <sup>40</sup> Ie jira Samaritánuai Jesumo billano jicádiaioi:

—Cai diga iri, —daidiaioi. Ie jira Jesús ménarui íaioi diga ite. <sup>41</sup> Afémie daínana cacáillano aillo jíáimaci ínotiaioi. <sup>42</sup> Ie jira aféngona daidiaioi:

—Nauí dama o daínado jabo ínoticaí, mei íadi birui ja cai dani afémiena cacáillano áfedo como ñue ínoticaí. Ja onódicaí bie ua Cristo, nana nairai jíllotaraimaza, —daidiaioi.

### *Jesús gobiernomo táijiraíma jító jíllotate*

<sup>43</sup> Ménarui íllamona Jesús Samáriamona jáizaide Galilea énie iodo jáillena. <sup>44</sup> Jae dama Jesús llote:

—Juziñamui uai jino lloráima dama ie éniemo jaca jámairuiga, —daide. <sup>45</sup> Galiléamo dúcidemo afénomo itino íena ñue llínotiaioi. Ua caimare íena llínotiaioi, ñibai pascua ráfueño Jerusalem nauí Jesús illa llezica jáidiaioi. Iemo aféfuemo nana ie finócafuaína ciódiaioiza.

<sup>46</sup> Ie mei Jesús meine Caná jófueño, Galilea éniemo jaide. Ua jainoi vónona meíduanomo jaide. Afe llezica Capernaum jófueño gobierno illaíma táijiraíma jító iere irárede. <sup>47</sup> Afe táijiraíma Jesús Judéamona Galiléamo dúciana fídiano, afémiemo éroizaide. Ua ie jító jíllotaíbillena jícajide; mei ja ie jító tízaide. <sup>48</sup> Iemo Jesús íena daide:

—Onótate ráaniai íemo cíofinina finócafuiái diga omoi cíóñeniadi íinoñediomoi, —daide.

<sup>49</sup> Iadi gobierno táijiraima Jesuna daide:

—Ocuíraima, raire bi cue jitó nai tíñena llezica, —daide.

<sup>50</sup> Ie mei Jesús íena daide:

—Meine o jofomo jai. O jitó jílloiteza, —daide. Afémie Jesús íena daina uaina ínote, jira jaide. <sup>51</sup> Ie jofomo dúcizaidemo ie jaénizai jino íemo bitiaíoi. Dúciillano daidíaíoi:

—O jitó jae jíllode, —daidíaíoi.

<sup>52</sup> Iemo, —¿Nie hóramo jíllode? —íaióimo jicánote. Jira daidíaíoi:

—Nauiri jaíciri illa mei ie abi bóua llícaide, —daidíaíoi.

<sup>53</sup> Iedo moo bie daje hora Jesús íena daina hora uícaide. Ua “O jitó jílloite” daina hóramo afeza jíllode. Iemona afémie Jesumo ínote, naa ie comini diga.

<sup>54</sup> Daií Jesús Judéamona Galiléamo billano mena onótate raa finode. Bie jíllo tafue ua ie meífodo finoca cíofininafue.

## 5

### *Jesús Betzátamo ite tízitaitimie jílloate*

<sup>1</sup> Ie meífomo judíuai rafue ite; jira Jesús meine Jerusalemo jaide. <sup>2</sup> Afe jófuego, ovejai naze áinori jainoi ofillano ite. Afeno hebreo ímaci uaido mameca Betzata. Nane dinomo cinco diga gairíranos ite. <sup>3</sup> Bie gairira macáranuíaímo aillo iráredimaci bíede: uínidimíai, aidáimíai, tízitaitimíai diga. Bimaci jainoi bagua úiñotiaíoi. <sup>4</sup> Daií úiñotiaíoi mei dáruinarie Juziñamui abi ímie ana billano jainoi bagotáfiredeza. Bagota mei nanoide come jáinoimo ana jáidimie, ie irárenamona ja jíllobicaifrede. <sup>5</sup> Dinomo iráredimie ite. Ua treinta y ocho diga fimona irárede. <sup>6</sup> Jesús billano ie bíinana cíode. Afémie are jaiaí ninómona daií dinomo íllana onóillano, Jesús íena daide:

—¿Jíllobicaiacadio? —daide.

<sup>7</sup> Iráredimie uai ote:

—Ocuíraima, cue cánoitimie íñede, jainoi bagua meífomo jáinoimo cuena ñuitállena. Nágarui cue jáiacana llezica jáímie nano fueñe jáinoimo dúcide, —daide.

<sup>8</sup> Jesús íena daide:

—Caífo náidacai. O bírallu llíno. Mai maca, —daide. <sup>9</sup> Afe llezica afémie jíllobicaide. Iemo ie bírallu llínuano macáicaide. Aferui ocózinallarui.

<sup>10</sup> Jira judíuai jíllo tagamiena daide:

—Birui jae ocózinallarui. O bírallu rocánollena omo rairuírede, —daidíaíoi.

<sup>11</sup> Afémie uai ote:

—Cue jílloatimie cuena daide: “O bírallu llíno; mai maca,” —daide.

<sup>12</sup> Iemo íena jicánotiaíoi:

—¿Bu ona “o bírallu llíno, mai maca” daina? —daidíaíoi.

<sup>13</sup> Mei íadi afémie ie jílloatimiena onóñede, aillo comini dinomo íllaza. Ua Jesús jae jáideza.

<sup>14</sup> Afe mei Jesús gairíraco eromo íena baizájillano daide:

—Mai eroi. Birui jae jíllo dío. Meine fiénidífueña finóñeno iri, jamánomo figóñede raa omo jíriñeillena, —daide.

<sup>15</sup> Iemo afémie judíuáimo Jesús íena jílloatimie lluájide. <sup>16</sup> Ie jira judíuai Jesuna duere finóllena racadiaíoi; íena fáiacadiaíoi, ocózinallarui aféfuíai finua jírari.

<sup>17</sup> Mei Jesús íaioina daide:

—Cue Moo Juziñamui jaca nanómona biruimo táijide, jira cue nane tájidicue, —daide.



18 Iemona judíuai jamánomo íena fáiacadiaioi; nibai ocózinaiilarui ocuícáfue afémie jáanote. Ie emódomo afémie Juzíñamui izóidimiena dama finótate, “Juzíñamui cue Moo” ie daína jira.

### *Juzíñamui Jitó ríino*

19 Ie mei Jesús íaioina daide:

—Uáfuenta ómoína dáitícue, mei Juzíñamui Jitódícueza, dama cue jítaina izóí minícana finónidícue. Dama cue Moo Juzíñamui finócafue cue ciona izóí birui finódícue. Nana cue Moo finócafue afe izóí nana finofiredícue; ie Jitódícueza. 20 Ua Moo Juzíñamui nana ie finuafue ie Jitomo ácatate, Moo ie Jitó izíruilla jira. Ie emódomo jamánomo áillue finóllífue íemo ácataite, omoi fáigacaillena. 21 Mei Moo Juzíñamui tíidino cáadinona itátateza, ua cáallinona íaioimo ite; daje izóí ie Jitó nana afémie oíacaiganomo cáallinona ite. 22 Moo Juzíñamui buna jicánoñede íena duere finótallena, mei íadi nana afe jicánolle ríino ie Jitomo iga. 23 Daíí nana comíni Moo ñue jacíruilla izóí, afe izóí ie Jitona ñue jacíruitiaioi.

24 Uáfuenta ómoína dáitícue: cue uaina cacádimiemo, dáanomo cuena orédimiena ínotimie mo ja ziiño cáatatinona ite. Afémie duere finóbiñeite, tíllanomona ja bai finona jira; jae cáananomo dúcide. 25 Uáfuenta ómoína dáitícue: tíidino meine cáallirui áinozioicaide. Aferui birui. Ua tíidino Juzíñamui Jitó úrillana cácaitiaioi; íemona nana áfena náfuefiredino cáaitiaioi. 26 Mei Moo Juzíñamuimo cáatalle ríino íteza, daje izóí afe cáatalle ríino ie Jitomo afémie itátate. 27 Dáanomo comíni duere finóllena jicánua ríino íemo iga, afémie Nanoide íima Jitona jira. Afe Jitódícue. 28 Afemo fáigacaiñeno iri. Nana tíidino cue úrillana cacáilliruimo dúciiteza. 29 Aféruído raiáfuaímona jino bíitiaioi. Ñúfue finódimaci meine cáadinona íitiaioi ziiñona íaioi íllena; mei íadi fiénidífue finódimaci meine cáadinona íitiaioi, duere íaioi finóbillena.

### *Jesús ríino uáfuenta daítatífuiaí*

30 Dama cue comeci izóí minícana finónidícue. Moo cue ocuilla izóí comíni finuafuaíai riire jicánotícue. Cue jicánuafue jaícina ñue joide; cue jítaina izóí jicánoñedícueza, mei íadi cue orédimie, cue Moo jítaina izóí jicánotícue, afe izóí finóllena. 31 Dama cueri uai cue nabáíadi, cue daínana figo uáfuenta daíñede. 32 Mei íadi jíáimie cueri uai nabáiraíma ite. Afémie cueri daínafue ñue uáfuenta facátate. Afena onódícue. 33 Juaamo jicánuaídiomoi. Afémie ie uai úana jaca uafue. 34 Mei íadi ímamonu cueri uai nabáíllana jicáñedícue. Daa bíena dáitícue omoi jíllobicaillena.

35 Juan egáíñora izóidimie. Afe egáíñora bóocabillamona egáíñofirede. Ie egáíñuanomo nano íanori íllamona íóbicaídiomoi. 36 Mei íadi jíáie cueri uáfuenta facátafue ite. Afefue Juan cueri daínafue baímo ite. Afe uáfuenta facátafue cue finócafuaíai. Aféfuiaí cue Moo cue finóllena ocuícáfuaíai daje izóí jóoideza. Afe jira afe cue finócafuaíai Moo orécacue uáfuenta facátate. 37 Ie dáanomo Moo, cue orédimie cueri uai nabaide, mei íadi omoi ie uaina jaca cacáñediomoi; ie abi cíocaillana jaca cíóñediomoi. 38 Ie uailaí omoi ífócimo déíñede, afe Moo orécamienu omoi ínoñena jira. 39 Juzíñamui Cuegáuailaí izire jenoda facádotíomoi; dínomo “Ziiñona íllino báitícaí” comécimo facáoidíomoi. Uafue, Cuegáuailaí cueri ñue úritiaioi, 40 mei íadi cuemo bíacañediomoi afe ómoímo ziiñona íllena.

41 Comíni cuemo nitáacaga jalléinafuiaí náfueñedícue. 42 Mei íadi ómoína onódícue. Juzíñamuina izíruíñediomoi onódícueza. 43 Cue Moo cue ória jira bitícue, íadi cuena lílinoñediomoi. Jíáimie dama ie ória izóí bíadi afe ímana ñue lílinoítíomoi. 44 ¿Omoi nie izóí ínotíomoi? Dani ómoímona cáímadua uailaí lílinoíredíomoi; mei íadi daade Juzíñamuimona bitíuai, ie cáímadua uai jenóñediomoi. Jira ínonídiomoi. 45 Cue Moo uíecori ómoímo fiénidífue cue nitalle comécido facáoíñeno iri. Uáfuenta Moisés ómoímo fiénidífue nítaite, níi omoi úíñogamie. 46 Moisés daínauai omoi ínoiadi daje izóí cuemo

¿inoitíomoi, mei Moisés cueri ñue cúeteza. <sup>47</sup> Mei íadi afémie cuezáuai omoi ¿inoñeniadi ¿nie izói ómoína cue daínáfueña ¿inoitíomoi? ¿inoñeitíomoi! —daide.

## 6

### *Jesús cinco mil iññiai ecade*

(Mt 14.13-21; Mr 6.30-44; Lc 9.10-17)

<sup>1</sup> Afe meífodo Galilea jorai ruícaferaimo jaide. Afe jorai jiaífodo mameina: Tiberias. <sup>2</sup> Aillo comini íedo jáidiaioi, cíofinina ráaniai ie fínuana íaioi cíonamona. Ua iráredino jíllotana cíodiaioi. <sup>3</sup> Ie mei Jesús ídumo ráizaide ie llófuegamaci diga. <sup>4</sup> Ja judíuiai rafue páscuafue ánozide. <sup>5</sup> Jesús érocaillano aillo afémie óodana bitínona cide. Jira Felípena daide:

—¿Ninómona nana bimaci ecállena íbaiticai? —daide.

<sup>6</sup> Afe daí jicánote, Felipe uai úana onóillena. Jesús dama ie finóllifue ñue onode. <sup>7</sup> Iemo Felipe uai ote:

—Doscientos dígabe fidi pan dúciñeite naga come jéenino óllena, —daide.

<sup>8</sup> Ie jira jáie llófuegamie Andrés, Simón Pedro ama, Jesuna daide:

<sup>9</sup> —Benó daa dúemiemo cinco diga panes ite mena chamu diga. (Bie pan cebada finoína.) Mei íadi iere duera; aillo comini íllaza, —daide.

<sup>10</sup> Ie mei Jesús daide:

—Nana íaioi ráilleza afémacina omoi daíri, —daide.

Afénomo aillo raitire ite. Iemo cinco mil iññiai raízidaitiaioi.

<sup>11</sup> Ie mei Jesús pan llínota Juzíñamuina “Iere figora” daide.

Dáinamona llófuegamacimo fecade. Afemona llófuegamaci nana ráiedinodo fecade. Jesús daje izói finode mena chámuna, ua nana ríiacadinodo fecade. <sup>12</sup> Jae íaioi jeírilla mei ie llófuegamacina daide:

—Fiébidinuiai nana iráiri, daa báíñelleza, —daide.

<sup>13</sup> Fiébidinuiai doce diga cirigai iráica. Ua cinco diga panes fiébidinomona diga cirigai oruítaga. <sup>14</sup> Ie mei comini bie cíofinina raa Jesús fínua cíonamona daidíaioi:

—Uafue bímie afe jaiai nanómona lloga ana éniemo bícade uai lloraima, —daidíaioi.

<sup>15</sup> Mei íadi comini íena riire lláitano illáimana jóoneacana Jesús fidíbicaide. Fidíillanona Jesús dama meine idu caifónedumo jaide.

### *Jesús jainoi emódodo macade*

(Mt 14.22-27; Mr 6.45-52)

<sup>16</sup> Ja nauídemo Jesús llófuegamaci ana jóraimo jáidiaioi. <sup>17</sup> Dúciillano nocaemo jaillano, jorai ruícaferaimo Capernaúmo jaitádiaioi. Jae jítiredemo, mei íadi nai Jesús meine abido biñede. <sup>18</sup> Iemo aillo jairifo daingo náidacaide. Iemona bagua mónaioicaide. <sup>19</sup> Due bai jáidiaioimo Jesús nocaemo ánozillana cíodiaioi. Jainoi emódodo macade. Iemo jacíruitiaioi. <sup>20</sup> Mei jira íaioína daide:

—Cueza, omoi jacíruiño, —daide.

<sup>21</sup> Iemona caimare nocaemo íena llínotiaioi. Iemona íaioi jáillinomo nitaca izói jarire dúcidiaioi.

### *Comini Jesús jénua*

<sup>22</sup> Jáírui meífodo jorai enéferaimo fiébidimaci, llófuegamaci daa ite nocaedo jáillana fidídiaioi. Iadi Jesús afémaciri jáíñede. <sup>23</sup> Mei íadi biruícana jáie nocáiai Tiberias jófueмона dúcizaide. Ua pan güilla áinori Ocuíraima Jesús “Iere figora” dáinamona, ua afénomo dúcizaidiaioi. <sup>24</sup> Daí Jesús dinomo iñénana cíóillano ie llófuegamaci diga, afécaiamo jofu jáidiaioi. Iemona Capernaúmo íena jénuaidiaioi.

*Jesús, ziiñona cáaille paana maméidimie*

<sup>25</sup> Jorai ruícaferaimo dúcillano, Jesús baitíai. Baillano íena jicánotíai:

—Llófueraima ¿niruido benomo dúcidi? —daidíai.

<sup>26</sup> Jira Jesús daide:

—Uáfueña ómoína dáitícue, güllena omoi jeírillamona cuena jénuaibitíomoi. Cue finoca cíofinina raa omoi onónamona cuena jenóñediomoi. <sup>27</sup> Fúifirede güllemo táijíñeno iri. Mei íadi fúíñeite güllemo táijíri. Afe güille ómoína ziiñona itátaite. Afe bie güille ómoimo ítícue mei Nanoide Hima Jitódícueza. Mei ua, omoi uáfueña ínogamíena jae Moo Juzíñamui jóonegacueza.

<sup>28</sup> Jira jicánotíai:

—¿Minícana fínoitícaí Juzíñamui jítaille raa caí fuitállena? —daidíai.

<sup>29</sup> Jesús uai ote:

—Juzíñamui orécamiéna omoi ínnollena jítáirede, —daide.

<sup>30</sup> Iemo jicánotíai:

—¿Miníca onótáite raa caímo ácataredí, afe cíóillano ona caí ínnollena? ¿Minícafue fínoití? <sup>31</sup> Caí jaiáidígíma zaféredízicímo maná güitíai; Juzíñamui Cuegáuai daína izói: “Juzíñamui monámóna ana baíttaga gülleniái áfena íaiói güitátate,” —daide.

<sup>32</sup> Jesús uai ote:

—Uáfueña dáitícue: monámóna baíde gülleniái fecáramo Moiséñede. Mei íadi uáfueña monámóna baíde gülleniái fecáramo cue Moo. <sup>33</sup> Juzíñamui fecaca gülleniái, monámóna ana bitímíe. Afémíe cáaille paana maméidimie. Afémíe énie ítímacímo ziiñona cáallínona itátaite, —daide.

<sup>34</sup> Iemo íena daidíai:

—Ocuíramo, bie gülleniái nágarui caí íne, —daidíai.

<sup>35</sup> Jira Jesús daide:

—Cue cáatate güllédícue. Cuemo bitímíe jaca júfiruíñeite. Cuemo ínotímíe jaca nínomo jíroacañeite.

<sup>36</sup> Mei íadi ómoína cue daína izói, cuemo íñoñediomoi naí cuena cíódiomoi íadi. <sup>37</sup> Nana Juzíñamui cuemo fecácamací cuemo bífireitíai. Cuemo bífireitínona jino dótañeítícue. <sup>38</sup> Uafue, cue comecí jítaina izói finóllena, monámóna ana bíñédícue, mei íadi cue orédímíe comecí jítaina izói ana fínuaibitícue.

<sup>39</sup> Cue Moo, ua cue orédímíe, nana cuemo ígánomona buna oni níno báíñeíllena jítaide. Ua nana afémací íraíruido cáadinona itátaitícue. <sup>40</sup> Cue orédímíe nana Juzíñamui Jítóna cíódimací íena ínnollena jítaide. Daí íaiói ínuamona ziiñona cáallínona íaióimo íllana cue orédímíe daje izói jítaide; íe mei íraíruido cáadinona íaióina itátaitícue, —daide.

<sup>41</sup> Iemona judíuai Jesurí gugúritíai. Ua íe daínáfuerí: “Monámóna ana baíde gülleniáina maméidímíedícue” íerí gugúritíai. <sup>42</sup> Daidíai:

—¿Bímíe José jító Jesúñede? Íe moóna onódícaí íe eí díga. ¿Níe izói “Monámóna ana bitímíedícue” daírede? —daidíai.

<sup>43</sup> Jira Jesús íaióina daide:

—Gugúríñeno. <sup>44</sup> Buna cuemo bínide, cue Moo, cue orédímíe naí átíñenia. Íe mei íraíruido afémíena cáadímíena itátaitícue. <sup>45</sup> Uai llorainí cuegánícuai llote: “Nana afémací Juzíñamui llófuegamacíza ítíai.” Daí nana Moomo cacádíno, afémíemona fíbítagamací cuemo bitíai.

<sup>46</sup> Bie izói cue daína dáarie Moo Juzíñamuina cíona daíacañede. Dama Juzíñamuimona bitímíe Moóna cíona. <sup>47</sup> Uáfueña ómoína dáitícue: cuemo ínotímíemo ziiñona cáallínona íte. <sup>48</sup> Cue cáatate güllédícue. <sup>49</sup> Omoi jáíairagíma zaféredízicímo manana güitíai, mei íadi nana jae tíidímací. <sup>50</sup> Íadi cue daína monámóna ana bite güllédícue güitínó tííñeítíai.

<sup>51</sup> Cue dama afe bie monámona ana bite cáatate güilledicue. Bie güille güitímie zíñona iite. Bie cue ille güille dama cue íeizi. Afena íiticue nana énie imaci cáallena, —daide.

<sup>52</sup> Iemona judíuai dani íaioiri júfidotiaioi. Daidíaioi:

—¿Nie izói bímie dama ie íeizina caina écaite? —daidíaioi.

<sup>53</sup> Jesús íaioina daide:

—Uáfueña ómoína dáitícue: Nanoide íima Jitódicueza; cue íeizi omoi ríñeniadi, daje izói cue die omoi jiroñeniadi nai omoi cáaillinona iñede, dájena cuemo jaináñena jira.

<sup>54</sup> Cue íeizi ritímie, daje izói cue die jiródímie comece zíñona cáaillinona ite; ie mei íirairuido afémiena cáadímiena itátaiticue. <sup>55</sup> Cue abi uafue güille. Cue die uafue jirólli.

<sup>56</sup> Cue íeizi ritímie, jái cue die jiródímie ja cuemo dájena ite. Daje izói afémie dájena iticue. <sup>57</sup> Cue caade Moo orécacue, jira afémiedo cáadícue; daje izói cue ríitímie cuedo cáate.

<sup>58</sup> Monámona ana bite gülleri úriticue. Bie güille omoi jaiáidígima güiga maná izóiñede. Nana afémaci tíidímaci; mei íadi bie güille güitímie zíñona iite, —daide.

<sup>59</sup> Jesús Capernaúmo ite Juzíñamui uai llófueriracomo nana bífuiai íaioimo llófuete.

### *Zíñona cáatate uailai*

<sup>60</sup> Bie llófuiana cacáillamona, aillo Jesudo jáidímaci daidíaioi:

—Bie afémie daína afe jeire ollíuai iere féirede. ¿Bu afena jeire órena? —daidíaioi.

<sup>61</sup> Iemona Jesús íaioi gugúrilla onóbicaide. Onóillano jicánote:

—¿Aféfuiai ómoína íairuificaitade? <sup>62</sup> Ie mei Nanoide íima Jitó nano ie illánomo caifo ie jáillana omoi cióadi, ¿ñie izói íitíomoi? <sup>63</sup> Cai joreño cai cáatate. Íeizi cáatañede. Omoína cue daínauailai joreño izoide uafue uailai. Cáataitai. <sup>64</sup> Mei íadi ómoimona dámierie nai íñoñediaioi, —daide.

Jesús afe íñoñedímaci nanómona onode. Afe llezica íena éoidímacimo fécaitimiena onode. <sup>65</sup> Ie mei daide:

—Iemona ómoína dáitícue, Moo átiñenia buna cuedo bínide, —daide.

<sup>66</sup> Aféruimona aillo Jesudo jáidíno íena fiénocaidiaioi. Ja íedo macáñediaioi. <sup>67</sup> Ie jira ie doce diga llófuegamacimo jicánote:

—¿Omoi daje izói jáiacadiomoi? —daide.

<sup>68</sup> Mei íadi Simón Pedro uai ote:

—Ocuíraima, ¿bumo jáiredicai? Zíñona cáatate uailai omo ite. <sup>69</sup> Ja cai ínoticaiza. Onódicai caade Juzíñamui Jitódioza. Crístodio, —daide.

<sup>70</sup> Jesús íaioina daide:

—Jae doce dígamie nizédicue; mei íadi omoi cígimona dámie Taife izoide, —daide.

<sup>71</sup> Afe dánado Jesús Júdari úrite. Judas Iscariote Simón jító. Afémie Jesuna éoidímacimo fécaitimie, mei íadi afémie doce dígademona.

## 7

### *Jesús ámatiai íena íñoñediaioi*

<sup>1</sup> Afe méifodo, Jesús Galilea éniado macade. Judéamo íacañede, díno mo judíuai ie íaioi fáiacana jira. <sup>2</sup> Ja bizáinillaimo íráizillafue ánozide. Afefue judíuai rafue. <sup>3</sup> Ainozillamona ie ámatiai íena daide:

—Benó fiébiñeno. Judéamo o jairi, díno mo ite odo jáidíno o finócafueña cíoillena.

<sup>4</sup> Dámie nana comíni íena íaioi onóillena jítaiadi, ie raana báinino finóñede. Afe áillofuiai o finóadi nana comíni uícomo finori, —daidíaioi.

<sup>5</sup> Bie izói daidíaioi, mei nai ie ámatiai íena íñoñediaioiza. <sup>6</sup> Jira Jesús daide:

—Cue ñue illíruimo nai dúciñede. Mei íadi ómoimona nano nígarui ñuera. <sup>7</sup> Enie imaci ómoína éoinide, mei íadi cuena éoidiaioi, níbai íaioi fiene finócafuiuai uai nabáiraimadicueza.

<sup>8</sup> Mai ráfue mo omoi jai. Nai jáiñeitícue, cue ñue illíruimo nai dúciñede.

<sup>9</sup> Daií daina mei Galiléamo fiébide.

*Jesús bizáinillai irázillafuemo jaide*

<sup>10</sup> Ie ámatiaí jailla mei, Jesús daje izóí ráfuemo jaide, mei íadi uáfodo jáiñede. Jabo báinino jaide. <sup>11</sup> Judíuai afe rafue ana íena jenódiaíoi. Daidíaíoi:

—¿Ninomo mei afe íima ite? —daidíaíoi.

<sup>12</sup> Comini cigiedo aillo afémieri úritiaíoi. Dáarie, “Ñúemie,” daidíaíoi. Jáimaci, “Fiénidimie; mei comínina jífujeteza,” daidíaíoi.

<sup>13</sup> Mei íadi judíuaina jacíruillano buna afémieri uáfodo úriñede.

<sup>14</sup> Ja rafue cigi iruido Jesús Juzíñamui gairíracomo jofo jaide. Jaillano dinomo llófuellena tainede. <sup>15</sup> Iemona judíuai fáigacaillano daidíaíoi:

—¿Nie izóí bie íima diga ráfuaina onode, afémie nai llófueñegamo? —daidíaíoi.

<sup>16</sup> Jira Jesús uai ote:

—Cue llófuegauai cúeieñede; mei íadi cue orédimie ie. <sup>17</sup> Dáamie Juzíñamui jitailla izóí finócania, afémie cue llófuegauai Juzíñamuimona bitúuaina ónoite. Afe llezica dama cue jitailla izóí llófueñedicuena ónoite. <sup>18</sup> Dama ie comeci jitailla izóí úritimie, comini íemo ñúefuena nitállena úrite. Mei íadi íena orédimie ñuera ráfuenta nitáacadimie uáfuenta dáite. Afémie jífuiafuena iñede.

<sup>19</sup> ¿Omoimo ocuica uailai Moisedo ómoimo iga? ¿Ero ua? Mei íadi buna ómoimona aféuai jeire oñena. Aféuai jeire oñédimiedicue izóí, ¿ñibái mei cue fáiacadiomoi? —daide.

<sup>20</sup> Jira comini uai ote:

—Omo fiénide jóríai illa. ¿Bu o fáiacana? —daidíaíoi.

<sup>21</sup> Jira Jesús daide:

—Daa raa ocózinaillaruiamo cue fínuari nana fáigacadiomoi. <sup>22</sup> Mei íadi úrue bacano icoi quétajana facátafue Moisés ómoimo iga. Jira íiza bacano icoi quetáadiomoi ocózinaillaruido íadi. (Moisés afefue táineñegaza; jáiiragimaci taineca.) <sup>23</sup> Mei jira Moisés ocuica uailai nana ñue fuizáillena, íiza bacano icoi omoi quetáadi ocózinaillarui íadi, ¿ñibái ríicadiomoi íima abi námiena cue jílotaia ocózinaillaruiamo? <sup>24</sup> Mai jinófene éroillano comini ifue nitáañeno. Omoi nitáadi jaícina uáfuenta nitari.

*Jesús ie comuillanodo úrite*

<sup>25</sup> Ie mei Jerusalemo dáarie itínomona jicánuaidiaíoi:

—¿Bímie íaíoi fáiacagamieñede? <sup>26</sup> Mei íadi batínomo comini cigimo úrite íadi buna nie izóí daiñena. ¿Uáfuenta caifóidimaci bímie Crístoza ínotiaíoi? <sup>27</sup> Mei íadi cai, afémie ninómona ie bíllana onódicaí. Iadi ibana Cristo bíadi, buna ninómona ie bíllana ónoñeite, —daidíaíoi.

<sup>28</sup> Afena cacáillano Jesús nai gairíracomo llófuia llezica riire daide:

—¿Cuena onódiomoi? ¿Ninómona bitícueza onódiomoi? Mei íadi dama cue comeci izóí biñédicue, íadi caade cue orédimie onódiomona bitícue. Afémie jaca itímie. Afémiena onóñediomoi. <sup>29</sup> Afémiena onódicue, afémie onódiomona bitícueza, ie orécacueza, —daide.

<sup>30</sup> Iemona íena lláviano úiacadiaíoi. Mei íadi nai buna íena llaitáñede, nai ie llaitáilliruiamo dúciñedeza. <sup>31</sup> Mei íadi aillo comini íemo ínotiaíoi; daidíaíoi:

—Cristo bíadi ¿bímie finoca cíofinina onótafuiaí baimo fínoite? —daidíaíoi.

*Fariséuai llaizíraini orede, Jesús lláviano úillena*

<sup>32</sup> Fariséuai comini Jesuna dáinana cacádiaíoi. Jira lletáiraini illaini, gairíraco jabóidillaímaíai orede Jesús llaitada úillena. <sup>33</sup> Jira Jesús uai ote:

—Omoi cigiri dama íanori nié dino íitícue. Ie méifodo cue orédimie diné jáitícue.

<sup>34</sup> Cuena jénoitiomoi mei íadi cuena báíñeitiomoi, cue illínomo jáinidiomoi, —daide.

<sup>35</sup> Ie mei judíuai daní íaíoi jicánuaidiaíoi:

—¿Bímie ninomo jáite, íena cai báíñeilla? ¿Judúuai júdaicamací griego éniemo afémie jáite, griego imaci llófuellena? <sup>36</sup> Ie dáinana, “Cuena jénoitiomoi mei íadi cuena báíñeitiomoi, cue illínomo jáinidiomoi,” ¿nie izói daide? —daidíai.

*Jesús, jaínoi izói cómena cáatate*

<sup>37</sup> Rafue írairuimo jamánomoidirui. Aféruido Jesús naidáillanona como aillo uaido úrite: —Nana jiróacadímie cuemo bi; júruabi. <sup>38</sup> Cuegáuai daína izói, cuena ínotímie ie comécimona áillue imani tua izói aillo ñue cáataifúiai biite, —daide.

<sup>39</sup> Aféfuedo nana afémiena ínotino Ñuera Joreño llínoitiai daide. Ua mei, Ñuera Joreño nai biñede, Jesús ie cámafue ebíredífue diga nai llínoñena jira.

*Comini Jesuna daínáfúiai jíáfodorie jóide*

<sup>40</sup> Dáarie comini cígimona aféfuena cacáillano daide:

—Uáfuea bímie uai llóraima, jaii ninomo bíacadímie, —daide.

<sup>41</sup> Jáíimaci daidíai:

—Bie ua Cristo.

Mei íadi jíáimaci daidíai:

—¿Nie izói Cristo dino Galilea ímieite? <sup>42</sup> Cuegáuai llotte: “Jáiaidillaíma David, ie izíe ímiena Cristo iite. Ua Belén ímiena iite, afe jófueo nauí David íteza,” —daidíai.

<sup>43</sup> Daí nana comini Jesús ícoínia dázierie bózietaidiai. <sup>44</sup> Dámierie Jesús maiáno úiacadiai, mei íadi buna daí ñeñena.

*Caifoide ríiredino Jesuna ínoñediai*

<sup>45</sup> Gairíraco jabóllaini abido fariséuai illánomo, daje izói lletáriraini illaini illánomo bitíai. Afémaci íaiimo jícanote:

—¿Níbái mei íena atíñediomoi? —daide.

<sup>46</sup> Jira jabóllaini (jíáfodo mameina llavériraini) uai otíai:

—Jaca ninomo buna afémie úrilla izói úriñede, —daidíai.

<sup>47</sup> Jira fariséuai daidíai:

—¿Omoi daje izói ja jífuegamacidiomoi? <sup>48</sup> ¿Cai illáicomini dáarie íena ja ínotiaí fariséuai diga? ¡Jaca ínoñediai! <sup>49</sup> Mei íadi bie comini ocuífúiai onóñediai, ja faidócaiaíza, —daidíai.

<sup>50</sup> Nicodemo, naio Jesumo eróizabitímie daa fariseo imácimona. Iaióna daide:

<sup>51</sup> —Cai ocuífue daína izói buna duere finónidicai, nano fueñe íena cai cácañeniadi, ie finócafuea cai ónoillena, —daide.

<sup>52</sup> Mei jira uai otíai:

—¿O jíai daje izói Galilea ímedioza? Cuegáuai fácado. Dinomo cíoitio buna uai llóraima Galiléamona biñede, —daidíai.

*Jiruíredingo Jesumo atidiai*

<sup>53</sup> Mei íemona naga come íaii jofomo jaide.

## 8

<sup>1</sup> Mei íadi Jesús Olivo daína ídumo jaide. <sup>2</sup> Ie jítiramo monáillamona, abido gairíracomo bite. Nana comini íemo áinozidiai. Afémie ránaillano íaióna llófúiaide. <sup>3</sup> Ie mei ocuífue llófueraíni fariséuai diga jiruíredingo Jesumo atidiai. Daí ñécade afengo baitíai. Afe gairíracomo itímaci cígimo aféngona jóonetiaí.

<sup>4</sup> Jóoniano Jesuna daidíai:

—Llófueraíma, bie ringo afe jiruírenafue finócade baiticai. <sup>5</sup> Afe izoide ringona Moisés ocuífue cai ocuide noficiaído fállena. ¿O nie izói daidio? —daidíai.

<sup>6</sup> Daií daidíaiói Jesús facátallena. Bie facátamona fiénidifue íemo nitáacadiaíói. Iemona Jesús jíjicaillano éniemo onócaido cuete.

<sup>7</sup> Mei íadi diga icaiño jicánotiaíói mo Jesús meine jaícina rainade. Ráinaillanona daide: —Omoimona dáamie fiénidifue na inédimie, mai nanoide nofici aféngomo nitari, —daide.

<sup>8</sup> Dáanomo nane jíjicaillano éniemo cuete. <sup>9</sup> Mei íadi aféfuena cacáillano, nana íaiói comeci úrilla uaido méaicaidiaíói. Méaicaillano oni nana dáarie jáioidiaíói. Ua iere éicomedimie uícodo oni jailla. Nana ja íaiói jailla mei, Jesús dama dinó fiévide afe atícango diga. <sup>10</sup> Iemo Jesús jaícina meine rainade. Afe ringo baimo buna cióñenano aféngona daide:

—Ringo, ¿ninomo omo fiénidifue jitádino ite? ¿Buna omo nofícina nitáñena? —daide.

<sup>11</sup> Jira afengo daide:

—Ocuíraima, ua buna nitáñede, —daide.

Mei jira Jesús daide:

—Cue ona daií nitáñeiticue. Mai o jairi. Fieni meine abido daií ñeñoeno iri, —daide.

### *Jesús, bie énie comini egáñoraíma*

<sup>12</sup> Jesús dáanomo nane comínimo úrite; daide:

—Cue bínie comini egáñoraímadicue; cuedo jáitimie mo cáataite egáñua iite. Jaca nino jítifodo mácañeite, —daide.

<sup>13</sup> Ie jira fariséuai éna daidíaiói:

—Dama o uai nabáidío. Afe uai ráifiñede, —daide.

<sup>14</sup> Jira Jesús uai ote:

—Cue daina uáfuena ráifide, afe dama cuemo uai nabáidicue íadi. Cue ninómona biticue, daje izói cue jáillinona onódicueza. Mei íadi ninómona biticueza onóñediomoi, cue jáillinona diga. <sup>15</sup> Bie énie facárado jenócana facádiomoi; cue buna jenócana facáñedicue. <sup>16</sup> Mei íadi cue facáadi, cue facállifue jaícina ñue jóide. Dama facáñedicueza. Moo, cue orédimie diga dáanomo jenoda facádicoco. <sup>17</sup> Omoi ocuica ciegáuai daide: “Mena uai nabáiraíma dáanomo daiíadi, aféfuena ínoitiomoi.” <sup>18</sup> Cue dama cueri uai nabáiraímadicue. Cue Moo, cue orédimie jáie cueri uai nabáiraíma, —daide.

<sup>19</sup> Jira jicánotiaíói:

—¿Ninomo mei o Moo ite? —daidíaiói.

Jira Jesús uai ote:

—Omoi cuena onóñediomoi. Daje izói cue Moona onóñediomoi. Cuena onódiomoi nia, daje izói cue Moona onódiomoi za, —daide.

<sup>20</sup> Gairíracomo llófuia llezica, afe bíuai daide; ua fia fecaca úcube jóoneraco illánomo dinomo llófue. Mei íadi buna éna lláviano uiñede, ie llaitáilliruimo nai dúciñena jira.

### *Cue jáillinomo jáinidiomoi*

<sup>21</sup> Jesús nane dáanomo íaióina daide:

—Cue jáitícue. Cuena jénoitiomoi, íadi omoi fiénidifue nai doñégamo títiomoi. Mei jii cue jáillinomo omoi jáinidiomoi za, —daide.

<sup>22</sup> Jira judúuai daní conímana daidíaiói:

—¿Mei níbaí afémie dama abí títate, mei “Cue jáillinomo jáinidiomoi” afémie caina dáideza? —daidíaiói.

<sup>23</sup> Jira Jesús íaióina daide:

—Omoi ana bebeco iédiomoi, mei íadi cue caifófeco ímiedicue. Omoi bie énie iédiomoi, mei íadi cue bie énie ímieñedicue. <sup>24</sup> Ie jira omoi fiénidifue nai doñégamo títiomoi daidicue. Cue daina izói ítmiedicuena omoi ínoñeniadi, omoi fiénidifue nai doñégamo títiomoi, —daide.

<sup>25</sup> Jira jicánotiaioi:

—Mei ¿o búdio? —daidíai.

Jira Jesús uai ote:

—Jaiia nanómona ómoimo lloticue. <sup>26</sup> Cuemo aillo ómoina cue daiíllifuiiai ite. Daje izói aillo ómoina cue jenoda facállifuiiai ite. Cue orédimie uáfueña daide. Afémiemona cue cacana izói bie énie comínina áfedo daidicue, —daide.

<sup>27</sup> Mei íadi Moodo íaioimo Jesús úrillana figo cacáñediaioi. <sup>28</sup> Jira Jesús íaioina daide:

—Enie acónimo cuena caifo omoi raiñóadi cue daína izói itímiena ónoitiomoi, mei Nanoide ima Jitódicueza. Afe llezica dama cue comeci izói finófinidicueza ónoitiomoi. Dama cue Moo cuemo llogáfuiiai daidicue. <sup>29</sup> Cue orédimie jaca cue diga ite. Cue Moo dama cuena fiéñede, afémie íobitadifuiaina finófiredicueza, —daide.

<sup>30</sup> Jesús daií dáinamona, aillo íena ínotiaioi.

*Juziñamui jitóniaí fiénidifuedo jeruícamací baímo ñue itíai*

<sup>31</sup> Afemona judíuaimona íena ínotinona Jesús daide:

—Cue ómoina dáinana omoi jaícina jeire oíadi, cue llófuegamacina uáfueña jáitiomoi.

<sup>32</sup> Ie mei uáfueña ónoitiomoi. Afe uáfuedo jéruiñegamacina íitiomoi, —daide.

<sup>33</sup> Afémaci ie uai otíai:

—Abraham izíedicaí. Jaca ninomo buna jéruiñegamacidicaí. ¿Nie izói, jéruiñegamacina íiticaí, daidio? —daidíai.

<sup>34</sup> Jira Jesús daide:

—Uáfueña ómoina dáitícue, nana fiénidifue finódimaci fiénidifuedo jeruícamací.

<sup>35</sup> Jeruícami ie naama izíe diga jaca ínide. Mei íadi naama jitó aféziemo jaca jainaide.

<sup>36</sup> Daií mei Juziñamui Jitó jeruíñenafue ómoimo fecáadi, uáfueña jéruiñelliomoi. <sup>37</sup> Abraham izíe iédiomoi za ja onódicue; mei íadi cuena fáiacadiomoi, ómoina cue daínafueña omoi llínoñena jira. <sup>38</sup> Cue Moo cuemo ácataga raado úritícue. Omoi moo daína izói finófirediomoi, —daide.

<sup>39</sup> Jira uai otíai:

—Cai moo Abraham, —daidíai.

Mei íadi Jesús daide:

—Uáfueña Abraham jitóniaína omoi íadi, afémie finua izói finóitiomoi. <sup>40</sup> Mei íadi Moo Juziñamui cuemo lloga uáfueña ómoina cue daína íadi, nai cuena fáiacadiomoi. Abraham jaca daií finóñede. <sup>41</sup> Omoi moo finua izói finódiomoi, —daide.

Jira afémaci daidíai:

—Jaca jiruírenamona jócoñegacaí. Caimo daade moo illa, Juziñamui, —daidíai.

<sup>42</sup> Jira mei Jesús daide:

—Juziñamui uáfueña omoi móodenia, cuena izíruitomoi, mei Juziñamui cuemo billa jira. Ua ie jira benó iticue. Dama cue comeci izói biñédicue, mei íadi Juziñamui orécacue. <sup>43</sup> ¿Nibái mei cue dáinana cacánidiomoi? Cue úrilla uaina cacáacañediomoi, jira onóñediomoi. <sup>44</sup> Omoi moo Taife. Ie jira afémie iédiomoi. Afémie jitaina izói finóacadiomoi. Taife jaca nanómona fáfiredimie. Jaca uáfueño jaináñede. Jaca uafue daiíñede. Táinofuiiai afémie lloíadi, ie illa izói úrite. Afémie táinofuiiarede, ua táinofuiiai moo. <sup>45</sup> Mei íadi uafue daidícue cuemo cuena ínoñediomoi. <sup>46</sup> ¿Omoimona bu cue fiénidifue jino due cíotarede? Uáfueña cue daiíadi ¿nibái mei cuena ínoñediomoi? <sup>47</sup> Juziñamui iédimie Juziñamui uáillaina cácafirede. Mei íadi Juziñamui íeñediomoi, ie jira íena cacáacañediomoi, —daide.

*Cristo Abraham nano jae itímie*

<sup>48</sup> Jira judíuai íena daidíai:



—Omo fiénide joreño íllana onódicaiza; íemo Samaria ímiena o íllana, onódicaiza, —daidíaioi.

<sup>49</sup> Jesús uai ote:

—Cuemo fiénide joreño jaca íñede. Cue finócafue cue Moomo ñúefuena nitade. Omoi cuemo ñúefuena nitáñediomoi. <sup>50</sup> Cuemo ñúefuena nitállena jenóñedicue, íadi jíáimie ite cuemo ñúefuena nitállena. Afémie jenoda facade. <sup>51</sup> Uáfueña ómoína dáitícue, cue daináfueña jeire otímie jaca ninomo tííñeite, —daide.

<sup>52</sup> Jira judíuai uai otíaioi:

—Fiénide jóríai omo íllana ja uáfueña onódicai. Abraham jaiái tíide naa uai llóraini diga, niadi jíáifodo daidio: “Cue dainana jeire otímie jaca ninomo tííñeite.” <sup>53</sup> ¿Uáfueña cai moo Abraham baímo jáidio? Afémie tíide. Ua uai llóraini daje izói tíidiaioi. ¿O comécimo bu o íllana facáidio? —daidíaioi.

<sup>54</sup> Jesús dinena íaioimo uai ote:

—Dama cuemo ñúefuena cue nitáadi, cue ñúefuena minícana ráifiñede. Mei íadi ñúefuena cuemo nitádimie cue Moo. Dámiena omoi Juzíñamui daidíomoi. <sup>55</sup> Mei íadi íena onóñediomoi. Cue íena ua onódicue. Afémiena onóñedicue cue daiíadi, omoi izói tánofuiairedimiena íitícue. Mei íadi íena uáfueña onódicue. Ie dainana jeire oticue. <sup>56</sup> O jaiáidigima Abraham cue illíruina cióacade áfemona ióbillena; áfena cióillano afémie iere ióbicaide, —daide.

<sup>57</sup> Jira judíuai Jesuna daidíaioi:

—Nai cincuenta fimona íñedio, ¿Nie izói “Abraham cuena ciode” daidio? —daidíaioi.

<sup>58</sup> Jesús uai ote:

—Uáfueña ómoína dáitícue: Abraham nai íñeniadi cue iticue, —daide.

<sup>59</sup> Iemona noficiai llínota Jesumo nitáacadiaioi. Mei íadi afémie retáirillano gairíracomona jino jaide. Afémaci cigido jaillano finocaide.

## 9

### *Jesús uina cíoiñede jocócamie jíllotate*

<sup>1</sup> Afénodo jaillano, Jesús uina cíoiñede jocócamiena ciode. <sup>2</sup> Ie llófuegamaci íemo jícanote:

—Llófueraíma, ¿níbái mei bie íima uina cíoiñede jococa? Níbái ie moo fiénidífuiái ícoínia daíí jococa. Níbái dama ie fiénidífue finua ícoínia daíí jococa. ¿Bífuiáimona ní fue uáfueña? —daidíaioi.

<sup>3</sup> Jira Jesús daide:

—Dama ie ícoíniañedeza, jíái ie moo ícoíniañedeza. Mei íadi afémiemo Juzíñamui finóllifue ñue jino ácatallena, daíí íficaide. <sup>4</sup> Nai monana llezica cue orédimie tájínafue cue finua jitáiredeza. Ja nauilla llezica buna tájínide. <sup>5</sup> Nai bie éniemo cue illa llezica, énie comini egáiñotimiedicueza, —daide.

<sup>6</sup> Afe daina méifodo, Jesús éniemo tuánote. Tuánogamona ja énie ídiaide. Afe tuánua ídiaidemono ota, uina cíoiñedimie uimo bitade. <sup>7</sup> Ie mei íena daide:

—Siloé jainoi ofillanomo jócuai, —daide. Afe Siloé mámecei jino dobáíñua dibénedo “Orécanona” mameide.

Iemona uina cíoiñedimie ui jócuaide. Meine bítemo ja cíoide. <sup>8</sup> Iemo ie abi comini, daje izói nauí uina ie cíoiñenana ciódino diga daidíaioi:

—¿Bímieñede, níí ráicana úcube jícafiredimieñede?

<sup>9</sup> Dáarię daidíaioi:

—Jíí, níimie.

Jíáimaci dinena daide:

—Íeñede, mei íadi afémiena eroide, —daidíaioi.

Mei íadi afémie dinena dama daií daide:

—Jii, níimiedicue, —daide.

<sup>10</sup> Jira íemo jicánotiaiOí:

—¿Nie izóí ja ciódio? —daidíaiOí.

<sup>11</sup> Jira afémie uai ote:

—Afe iima, Jesuna mámeciredimie, ídiaidino fínuano cue uimo bitade. Bítanona daide: “Siloé jainoi ofíllanomo o ui jócuai.” Jócuaidicue. Iemona cue jócuailamona ciódicue, —daide.

<sup>12</sup> Jira íemo jicánotiaiOí:

—¿Nínomo afe iima ite? —daidíaiOí.

IaiOina daide:

—Ico mei, —daide.

*Fariséuai jílloga uina cíoiñedimie jicánodoidiaiOí*

<sup>13</sup> Iemo fariséuaimo nauí uina cíoiñedimiena uitíaiOí. <sup>14</sup> Jesús ídiaidino fínuarui, afe ocózinaillarui. Aféruimo Jesús uina cíoiñedimie jíllogate. <sup>15</sup> Fariséuai afe ímana nie izóí afémie ui cíoinafue meine abido jicánotiaiOí. Iemo afémie íaiOina daide:

—Cue ui ídiaidinona bitade. Jira jócuaidicue. Iemona ja ciódicue, —daide.

<sup>16</sup> Jira fariséuaimona dáarie íena daidíaiOí:

—Afefue finódimie, Juzíñamui ímieñede, ocózinaillaruina íñoñena jira.

Mei íadi jíaimíai daide:

—Afémie fiénidifue finóraíma íadi, ¿nie izóí bie cíofinina finócafue fínoite? —daidíaiOí.

Comini bózietaillamona <sup>17</sup> meine nauí uina cíoiñedimie jicánuaidiaiOí:

—¿O afémiena nie izóí daidio, o ui cíoitatimiena? —daidíaiOí.

Jira afémie daide:

—Afémiena uai llóraíma daidicue, —daide.

<sup>18</sup> Mei íadi judíuai afe uina cíoiñedimie finócafue íñoiacañediaiOí. Ie ja cíonafue íñoiacañediaiOí. Ie jira jíllogamie móotiaína uáidotiaíOí. <sup>19</sup> Iemo jicánotiaiOí:

—¿Afe níi be o jító uina cíoiñede jocócamie ómicoí daína? ¿Nie izóí mei biruí ciode? —daidíaiOí.

<sup>20</sup> Ie móotiai uai ote:

—Onódicaíza bie cai jító; uina cíoiñede jococa. <sup>21</sup> Mei íadi nie izóí afémie como cíonana onóñedicaí. Daje izóí bu ie ui jíllogata onóñedicaí. Afémiemo jícano. Jae eicómeza. Aféfuena onódeza. Afemona uai óite, —daidíaiOí.

<sup>22</sup> Ie móotiai daií úritiaillinoí judíuai jacínaillamona. Judíuai jae nana comini onótatiaiOí. DaidíaiOí:

—Nágamíai Jesús ua Cristo daínámiena mámeitimie Juzíñamui uai llófueriracomona jino jíuiticaí, —daidíaiOí. <sup>23</sup> Iemona móotiai daidíaiOí, “Afémiemo jícano. Jae eicómeza.”

<sup>24</sup> Ie mei judíuai meine nauí uina cíoiñedimiena uáiduano daidíaiOí:

—Juzíñamui uíécomo uáfuena caína daiíri. Onódicaíza, bímie fiénidifuiaredimie, —daidíaiOí.

<sup>25</sup> Afémie uai ote:

—Afémie níbai figora, níbai fiénidifuiaredimie onóñedicueza. Daa cue onóigafue. Nano fueñe uina cíoiñedimiedicue, mei íadi biruí ciódicue, —daide.

<sup>26</sup> Nane dáanomo íemo jicánuaidiaiOí:

—¿Nie izóí ona ñete? ¿Nie izóí o finode o ui cíoillena? —daidíaiOí.

<sup>27</sup> Jira uai ote:

—Jae omoi lloticue, íadi cuena íñoñediomoí. ¿Níbaí mei dáanomo omoi llóiticue? ¿Omoi jíai daje izóí iedo jáiacadiomoí? —daide.

<sup>28</sup> Báiñuano íena daide:

—O bímiendo jáidío, mei íadi Moisedo jáidicai. <sup>29</sup> Juzíñamui Moiseño úrillana onódicai, mei íadi bie Jesús ninómona bite onóñedicai, —daidíaiói.

<sup>30</sup> Jira afe íma uai ote:

—¡Bífue nii cácafinina raa! Ie billánona onóñediómoi, íadi cuena ñue cíoitae.

<sup>31</sup> Fiénidífue finofiredimacimo Juzíñamui cacáñede ñue onódicaiza. Iemo afémiemo íóbicaítadinomo cacáfirede, ie jítáinafue finódimaci diga. <sup>32</sup> Jaca nanómona uina cíoiñede jocócamie jíllotatímie dáinana cacáñena. <sup>33</sup> Bímie Juzíñamuimona biñédeniadi, minícana ñénide, —daide.

<sup>34</sup> Jira daidíaiói:

—O fiénidífuaímona jocócamiedo. ¿O caina llófueacadio? —daidíaiói. Ie jira íena jino jíúnotiaíói.

### *Joreño dibéfuaína onóñedimaci*

<sup>35</sup> Jesús uina cíoiñedímie jino íaiói jíúnuana fidide. Ie baillano íena daide:

—¿Juzíñamui Jítomo ínotío?

<sup>36</sup> Jira afémie daide:

—Ocuíraíma, cuemo llone bu afémiena íemo cue ínolleza, —daide.

<sup>37</sup> Jira Jesús uai ote:

—Ja cíódioza. Nímiedicue, o diga úrilla, —daide.

<sup>38</sup> Iemona afémie Jesús anari ana dújuillanona daide:

—Ocuíraíma, ínoticue, —daide.

<sup>39</sup> Ie méifomo Jesús daide:

—Bie éniemo biticue, jaícina jenoda facállena. Ua biticue uina cíoiñedímie eróillena. Dáanomo biticue eróidino uina cíoiñellena.

<sup>40</sup> Ie mei fariséuaimona, Jesús diga itínomona, dáamerie afefue cacáillano íena jícanotiaíói:

—¿Meita cai uina cíoiñedinodicai? —daidíaiói.

<sup>41</sup> Jira Jesús uai ote:

—Omoi uina cíoiñeniadi, omoi fiénidífuaí icoi ííñeite. Mei íadi “Cíódicai” daidíómoi jira omoi fiénidífuaí icoi ite, mei joreño dibéfuaína onóñediómoiza, —daide.

## 10

### *Ovejai cirínoraco cai onótate*

<sup>1</sup> Uáfueña ómoína dáitícue, ovejai cirínoraco nazedo jáiñedímie ua meríriraíma. Enéfenemo táifodo tícaillano jofo jáidímie ua merírífiredímie. <sup>2</sup> Mei íadi nazedo jofo jáidímie ua úíñoraíma. Níimie ie ovéjaína ñue uíñote. <sup>3</sup> Naze tuiñóraíma naze tuiñode afémie jofo jáillena. Ie uaina ovejai onódiaíói. Ie ovéjaíai íaiói mámeceido jírite. Daí cirínoracomona jino ófíregaiái. <sup>4</sup> Nana ie ovejai jino óinana méifodo, íaiói uícodo ífóicaide. Ovéjaíai ie óodana jáioicaíaiói mei ie uaina onódiaíoiza. <sup>5</sup> Mei íadi onóñegamiemo jáioicaíñediaíói. Mei jíáifodo afémiemona niné botádiaíói, ónoñegamaci uaina onóñena jira.

<sup>6</sup> Bie daje izoide ráfuedo Jesús íaióimo llófue. Mei íadi daí daíacana uaina onóñediaíói.

### *Jesús ñue ovéjaíai úíñoraíma*

<sup>7</sup> Iemona Jesús meine dáanomo daízaide:

—Uáfueña ómoína dáitícue: Cue bie ovéjaíai jofo jaira nazédicue. <sup>8</sup> Nana cue uícómo bitímaci meríriraíni daje izói baíóriraíni. Mei íadi ovéjaíai afémacina náfueñediaíói. <sup>9</sup> Cue

nazénaza. Cuedo jofo jáidimie jíllobicaite. Afémie cirínoracomo jofo jaide, meine jino bite. Afe jofo jáitimie oveja izóidimiena iite. Ie güille raana báifirede.

<sup>10</sup> Meríriraíma fia merírizaíbite; fájaíbite, táinocaitajaíbite. Mei íadi cue biticue íaioi cáatallena, ua jamánomo íocire íaioi íllena biticue. <sup>11</sup> Ñue ovéjaíai úiñoraímadicue. Afe ñue ovéjaíai úiñoraíma ovéjaíaimo ie cáallinona itátaite. <sup>12</sup> Mei íadi fia íbaca úiñoraíma dama úcube llínollena táijide. Jico izoide bíllana afémie cióillano, ovéjaíai fíianona botade. Afémie botade uáfuena úiñoraímañena jira; daje izói ovéjaíai íeieñena jira. Iemona jico izoide ovéjaíaina llaitade. Iemona nana jáíie ovéjaíai júdaízitiaioi. <sup>13</sup> Bie íma botáfiredede, daa fia íbállena táijideza. Ovéjaíaina nai lloñede. Iaióina duéruíñede.

<sup>14-15</sup> Cue bie ñue úiñoraímadicue. Cue Moo cuena onona izói daje izói cue Moona onódicue. Afe izói cue ovéjaíaina onódicue, ie izói afémaci cuena onódiaioi. Cue cáallino ovéjaíaimo íiticue. <sup>16</sup> Jáíie ovéjaíai cuemo ite. Bie cirínoraco íeñede. Cue uaina cacáillanona jeire óitiaioi. Iemona daa cirínoraco íite, daje izói daa úiñoraíma íite.

<sup>17</sup> Cue Moo cuena izíruite, cue abí fécaillano meine cue llínua jira. <sup>18</sup> Buna cue abí báiroñeite, mei íadi dama cue comeci izói fécaíticue. Cue áfena fecáredicue, ie mei meine áfena llínoredicue. Afe bie cue Moo cue ocuilla dieze, —daide.

<sup>19</sup> Judíuai afe uaina cacáillano bócoízitiaioi. <sup>20</sup> Afémacimona aillo daidíaioi:  
—¿Ñibái mei uai jeire otíomoi? Afémiemo fiénide joríaí íllaza, íemo uáíritaide, —daidíaioi.

<sup>21</sup> Mei íadi jáíimaci daidíaioi:  
—Fiénidena joríaíredimie jaca afe izói úrinide, —daidíaioi. Fiénide joreño uina cóiñedimie uina cóitanide.

### *Judíuai Jesús llínoacañeno íena ruiífruitiaioi*

<sup>22</sup> Jae rozíruillaruillai. Afe llezica Jerusalemo irázillafue finódiaioi, gairíraco Juzíñamuimo oni íficaillarui uibíñoicaillena. <sup>23</sup> Jesús Salomón macáranodo gairíracomo macade. <sup>24</sup> Judíuai Jesumo ífoina gairíllano daidíaioi:

—¿Ñie dinó caina figo onótañeítio? O Crístodio raire uáfodo caímo llone, —daidíaioi.

<sup>25</sup> Jira Jesús uai ote:  
—Jae lloticue íadi cuena íinoñediomoi. Cue finócafuaí cue Moo ríinodo finódicue. Afedo ñue jino ácatagacue. <sup>26</sup> Mei íadi cuena íinoñediomoi, cue ovéjaíaiñediomoi. Afena nauí ómoína daidicue. <sup>27</sup> Cue ovéjaíai cue uaina onode. Iaióina onódicue, jira cuedo bitíaioi. <sup>28</sup> Zííñona cáallino íaioímo fecádicue. Jaca afémacimona dáamie niné báizaiñeite. Buna cúemona íaioímona daa báiroñeite. <sup>29</sup> Afémaci cue Moo cuemo iga. Afémie jamánomoidimie. Nana baímo jáidimie. Buna cue Moo Juzíñamuimona afémacina baíronide. <sup>30</sup> Cue, cue Moo diga dáamiedicoco, —daide.

<sup>31</sup> Iemona judíuai meine íena nofíciaina nitáacadiaioi. <sup>32</sup> Jira Jesús daide:  
—Omoi eróicana diga ñúfuiaína cue Moo ríinodo finódicue. ¿Ñifue ícoínia nofíciáido cue níjitiomoi? —daide.

<sup>33</sup> Jira judíuai uai otíaioi:  
—Ñúfuiaí o fínuamona ona níjiiñeíticai; mei íadi o uáillaído Juzíñamuina báíñotío. Fia íímadío, mei íadi Juzíñamuina o abí maméacadio, —daidíaioi.

<sup>34</sup> Jira Jesús daide:  
—Omoi ocuínafuaíimo Juzíñamui daína jae cueda. Be níuai: “Omoi juzíñamuillaídiomoi.” <sup>35</sup> Cuedaíuai dáinana jaca jáanonide, onódicaíza. Juzíñamui, ie uallaí llínotímiaína juzíñamuillaína mameide. <sup>36</sup> Juzíñamui jae cuena oni ífcaítajano bie éniemo cuena orede. Ua ie orécamedicue. Jira ¿ñie izói dáítio “Juzíñamuina báíñotío” cue daííadi “Juzíñamui Jitódicue”? <sup>37</sup> Cue Moo finoca izói cue finóñenia, mai cuena omoi

íinoñeno. <sup>38</sup> Mei íadi ie finócafue izói cue finóadi, mai aféfuiaina íino, omoi nai cuena íinoñenia. Afemona cue Moo cuemo íllana, jabe ónoitiomoi. Daje izói cue, cue Moomo itícueza, ónoitiomoi, —daide.

<sup>39</sup> Meine maiáno íena uíacadiaioi, mei íadi Jesús oni finocaide.

<sup>40</sup> Ie mei Jesús Jordán ruicáfellemo meine jaide. Dinomo fiébide. Ua nauí Juan báutizanomo ite. <sup>41</sup> Aillo comini íena eróizaidiaioi. Daidíaioi:

—Uáfuenta, Juan cíofinina onótalle raa finóñede, mei íadi nana Juan bímieri daináfuiái uáfuiái, —daidíaioi.

<sup>42</sup> Dinomo aillo comini Jesuna ínotiaioi.

## 11

### *Lázaro tíide meine cáadimiena jaide*

<sup>1</sup> Daa íima Lázaro iere irárena. Betania ímie. María ie ebuño Marta diga daje jófuego itíaioi. <sup>2</sup> Afe María iráredimie Lázaro miringo. Afe María nauí Jesús ídaimo ziórede cáiredíji totade. Tótanona ie ifótiido zafénaitade. <sup>3</sup> Ja birui afe miringo íainguai uai Jesumo orede, Lázaro iere tíiacana jira: lloste:

—Ocuíraíma, o nabai Lázaro irárede, —daide.

<sup>4</sup> Jesús cacáillano daide:

—Afe duico títañeite, mei íadi jamánomo ñue Juzíñamui ebírenafue ácataite. Ie llezica afe duico Juzíñamui Jitó ebírenafue ácataite.

<sup>5</sup> Marta ie ebuño ie íio Lázaro diga Jesús íaioina iere izíruite; <sup>6</sup> mei íadi Lázaro irárenafuenta fidíillanona, Jesús raire jáiñede; nai ménarui ie illánomo ite. <sup>7</sup> Ie mei ie llófuegamacina daide:

—Meine Judéamo cai jai, —daide.

<sup>8</sup> Jira llófuegamaci daidíaioi:

—Llófueráima, nano cómoicana Judíuai dino nofíciado o fáiacadiaioi. ¿Nane meine afe diné jáiacadio? —daidíaioi.

<sup>9</sup> Jira Jesús ie tíllirui nai áinoziñenana onóillano, íaioina onótatiuaido daide:

—¿Uáfueñede, naga mona doce horas ite? Come monari macáadi éicitaiñede. Bie éniemo ite egáiñuana ciode. <sup>10</sup> Iadi come naio macáadi éicitaide; afémiemo egáiñotinona íñédeza.

<sup>11</sup> Ie mei Jesús nai úrite; íaioina daide:

—Cai nabai Lázaro inídeza, mei íadi cazítaiticue, —daide.

<sup>12</sup> Jira llófuegamaci daidíaioi:

—Ocuíraíma, afémie iníadi ja jíllocaite, —daidíaioi.

<sup>13</sup> Mei íadi Jesús jíáifodo daiíacade, Lázaro tíide. Llófuegamaci comeci facade Jesús dainana fia ínia lloste. <sup>14</sup> Jira Jesús jino uáfodo íaioina daide:

—Lázaro ja tíide. <sup>15</sup> Ióbídícue afémie tíllanomo íñédícueza. Daií ómoimona ñuera, omoi ínollena. Mei íadi cai éroizailli, —daide.

<sup>16</sup> Iemo Tomás, Guarámie maméidimie, jíáie llófuegamacina daide:

—Mai cai jai, afémie diga dánomo cai tílleza, —daide.

<sup>17</sup> Jesús dúcillano como fidide Lázaro ja cuatro dígarui énie anamo ite. <sup>18</sup> Betania iere Jerusalén áinori ite, mena kilómetro átuedo izói. <sup>19</sup> Aillo judíuai jáidimaci Marta María diga uáiduidiaioi, íainguai íio tíllari. Iainguaimo fíraíbitiaioi. <sup>20</sup> Marta Jesús dúciana fidíillano afémiena jino cíoizaide. Mei íadi María jofomo fiébide. <sup>21</sup> Marta Jesúsna daide:

—Ocuíraíma, o nibai benó itíoniadi cue íio tíñede. <sup>22</sup> Mei íadi onódicue naga raa Juzíñamuimona o jícáadi afémie omo iite, —daide.

<sup>23</sup> Jira Jesús daide:

—O íio meine cáate.

<sup>24</sup> Iemo Marta daide:

—Jii, cue onódicueza tíidino cáadinona illíruimo, énie íirairuimo afémie meine cáate, —daide.

<sup>25</sup> Jira Jesús daide:

—Cue tíidino meine abido náidataraimadicue; cáadinona abido itátaraimadicue. Cuená íinotímie ie tíiadi meine cáate. <sup>26</sup> Nana nai cáadino cuena íinoiadi jaca ninomo tííñeitiaioi. ¿O afefue íinotio? —daide.

<sup>27</sup> Jira afengo daide:

—Jii, Ocuíraima, o Crístodio íinoticue. Juzíñamui Jitó ana éniemo bitímiedioza. Afena íinoticue, —daide.

<sup>28</sup> Daií dáina méifodo, Marta ie ebuño María uáiduaide. Báinino aféngona daide:

—Llófueraima benó ite. O jíritade, —daide.

<sup>29</sup> Afena cacáillano María raire náidacaillano Jesumo eróizaide. <sup>30</sup> Nai Jesús afe jófuemo jofo jáíñede. Marta ie baizájillanomo nai ite. <sup>31</sup> Jofo ite judíuai afengo fíraidiaioi. Afengo náidacaillano, raire jino jáillana judíuai cíoillano, aféngodo jáidiaioi. Afémaci comeci facádiaioi, afengo raiafo dinomo éeiaide. <sup>32</sup> Ie mei María Jesús illánomo dúcide. Dúciano afémie eiba abimo caiñícido dújuillano daide:

—Ocuíraima, o nibai benó itíonia cue íio tííñede, —daide.

<sup>33</sup> Jesús María éeiana, naa aféngodo bitino judíuairi éeiana cide. Cíuano afémie iere zúureficaide. Ie comeci docaide. <sup>34</sup> Jira jicánote:

—¿Ninomo omoi raiga?

Jira daidíaioi:

—Ocuíraima, eróizaibi, —daidíaioi.

<sup>35</sup> Jesús eede. <sup>36</sup> Jira mei judíuai daidíaioi:

—¡Ero, nii afémiena izíruilla! —daidíaioi.

<sup>37</sup> Iadi afémacimona dámie daide:

—Bímie uina cíoiñedimiena meine cíoitaraima. ¿Nai afémiemo íñede ríino Lázaro tíitañeillena? —daide.

*Lázaro tíillamona meine abido cáadimiena jaide*

<sup>38</sup> Jesús comeci meine iere docaide. Raiáfomo áinozide. Raiáfo idu ana ifo. Ie jofo jáirano daa nofícina ibaica. <sup>39</sup> Jira Jesús daide:

—Nofici oni ono, —daide.

Tíidímie miringo, Marta daide:

—Ocuíraima, jae íaire jallede. Ráiamona cuatro dígarui íteza, —daide.

<sup>40</sup> Jira Jesús daide:

—¿Nai ona daiíñedicue, o íinoiadi Juzíñamui ebírenafuena cíoitio? —daide.

<sup>41</sup> Iemona nofici oni otíaioi. Ie mei Jesús monamo érocaillano daide:

—Moo Juzíñamui, iere figura cuemo cacáreifredio. <sup>42</sup> Onódicueza cuemo jaca cacáreidio. Mei íadi daií daidicue benó ite comini ñúeillena, daje izói bimaci o cue óriana íinollena, —daide. <sup>43</sup> Daií dáina méifodo jírite:

—¡Lázaro, dinómona jino bi! —daide.

<sup>44</sup> Tíidímie jino bite; ua onoi idai diga ferínoraroido maiano jino bite. Uíeco iníroina ibaica diga bite. Jira Jesús íaioina daide:

—Zuita, zúitanona ie ore, —daide.

*Jesús llaitállena jáicina maméritiaioi*  
(Mt 26.1-5; Mr 14.1-2; Lc 22.1-2)

<sup>45</sup> Afedo aillo judíuaimona Jesuna ñnotiaioi. Afémaci, María ícoinia bitino, Jesús finócafueña ciódimaci. <sup>46</sup> Mei íadi afémacimona dáamierie fariséuaimo úrizaide. Ua Jesús finócafuiái íaioimo lluájide. <sup>47</sup> Iemona fariséuai, lletáriraini illaini diga gairídiaoí naa caifóidillainiri. Daidíaoí:

—¿Nie izói ñéiticai? Bie iima aillo cíofinina onótalle raana finode. <sup>48</sup> Fia daí íena cai fáicanocaiadi nana íena ñnoitiaioi. Iemona romano ríimaci cai gairíraco táinocaitaitiaioi naa cai náirairi, —daidíaoí.

<sup>49</sup> Dáamie íaioimona Caifás mámeciredimie. Afémie afe fimónamo lletáriraini illaima. Afémie íaioina daide:

—Omoi minícana onóñediomoi. <sup>50</sup> Daa iima comíniri tíia baimo jamánomo ñuera, nana nairai tíñeillena. Afefue nai figo fidíñediomoi, —daide.

<sup>51</sup> Mei íadi Caifás afefue dama ie comécido lloñede; mei jáifodo afe fimónamo afémie lletáriraini illáimana íllamona, Juzíñamui Joreño daínáfuedo afemie daide: “Jesús judío náirairi tíizaite.” <sup>52</sup> Ua dani afe náirairi tíñeite, mei íadi nana júdaizite Juzíñamui jitóniai dáanomo meine gairíllena tíizaite. <sup>53</sup> Daí aféruimona judíuai ríimaci Jesús fállena maméritiaioi.

<sup>54</sup> Jira Jesús ja judíuai cígido uáfodo macáñede. Judea éniemona oni jaillano, táizici áinori ite jófuego jáizaide. Afe jofue mámece Efraín. Dinomo ie llófuegamaci diga fiévide.

<sup>55</sup> Judíuai pascua rafue ánozidemo aillo jofue comini Jerusalemo jáidiaioi, pascua uícomo comeci duáfuiái finóllena. <sup>56</sup> Jaillano Jesús jénuaidiaioi. Gairíracomo íaioi illano conímamo jicánoidiaioi:

—¿O nie izói daidio? ¿Afémie ráfuego biite? ¿Ñibai bíñeite? —daidíaoí.

<sup>57</sup> Fariséuai lletáriraini illaini diga jae ocuídiaioi: “Daa come Jesús illánona onóiaidi lloíri,” ie cai llaitálleza, —daidíaoí.

## 12

*Ringo Jesús jillaide*  
(Mt 26.6-13; Mr 14.3-9)

<sup>1</sup> Pascua uícomo seis dígarui ítemo, Jesús Betániamo jaide, Lázaro illánomo. Lázaro ua tíidimacimona Jesús abido cáatagamie.

<sup>2</sup> Dinomo nauife güillafue finódiaoí Jesumo ñúefuiaina nitállena. Marta güille raizífiredede. Güirábanimo ráicana Jesús diga güitino, Lázaro afémacimona dáamie. <sup>3</sup> Iemo María litro átuedo zíoji cáiredena fáíñegaji atide. Afeji jamánomo ráifide. (Afeji mámece nardo.) Atiano Jesús eiba emodo jillaide. Daí ñiano ifóitido zafénaitade. Nana afeco ero zíuena oruíbicaide. <sup>4</sup> Dinomo Judas Iscariote ráiide. (Judas Simón jitó Jesús llófuegamacimona. Afémie Jesús éoidimacimo fécaitimie.) Afémie daide:

<sup>5</sup> —¿Ñibái mei trescientos dígabe fidi bie cáirediji fécañega, duéredino cai canoi daí? —daide.

<sup>6</sup> Mei íadi duéredimaci izíruillamona daí daíñede. Mei íadi afémie meríriraíma. Nane íaioi úcubellu uícaifiredede. Aféllumo jóonega raana merífiredede. <sup>7</sup> Ie jira Jesús íena daide:

—Aféngona fáicanocai. Raiáfomo cue raillíruimo aféjina afengo éenote. <sup>8</sup> Duéredimaci jaca omoi diga ífiredede, mei íadi cue jaca omoi diga are íñeiticue, —daide.

*Lázaro fállena maméritiaioi*

<sup>9</sup> Aillo judíuai Jesús Betániamo íllana fidídiaioi. Jira dinomo jáidiaioi dama Jesumo éroiñellena, mei íadi dajé izói Lázarona cíoilena, tíidimacimona Jesús abido cáatagamiena

jira. <sup>10</sup> Iemona lletáriraini illaini Lázaro fállena mamédiaioi. <sup>11</sup> Ua Lázaro ícoiniadi aillo judíuai illáicomini mona jirecaillano Jesuna ínotiaioi.

*Jesús Jerusalemo ebire jofo jáillafue*  
(Mt 21.1-11; Mr 11.1-11; Lc 19.28-40)

<sup>12</sup> Pascua ráfue mo aillo comini Jerusalemo jáidiaioi. Ie méidiruido Jesús jófue mo dúcizaillana fididiaioi. <sup>13</sup> Amena rafóruai jaitada jino Jesús uáiduidiaioi. Caillícana daidiaioi:

—Juzíñamuina ebífuena daíri! Juzíñamui mámedo bitímie caimare comuiri! ¡Israel Illaíma caimare comuiri! —daidiaioi.

<sup>14</sup> Iemo Jesús burro baillano afe emódomo ráinade, jai ai Cuegáu ai daína izói; be níu ai:

<sup>15</sup> “Sión comini omoi jacíruiño.

Erocai, o Illaíma búrrodo ráicabite.”

<sup>16</sup> Nanómona ie llófuegamaci aféfuina cacáñediaioi. Ie méifodo ebírenafue Moo íemo nitaca mei, ie tíllanomoná meina abido cáatalliruimo, nana afémieri Cuegáuaimo uíbicaidiaioi. Daje izói íemo daí finócafue mo uíbicaidiaioi.

<sup>17</sup> Lázaro jino raíáfomona uáiduaruido aillo comini Jesús íri ite. Ua Lázaro tídimacimona abido cáanana ciódino afe íaioi cionafuena llujidiaioi. <sup>18</sup> Ie jira comini Jesuna caimare baizájidiaioi, afe cíofinina ie finócafue íaioi fidina jira. <sup>19</sup> Jira fariséuai dani daidiaioi:

—Ja ciódiomoi, jaca nie izói ñénide. Erocai, nana comini íedo jáidiaioi, —daidiaioi.

*Dáarie griego imaci Jesús jenódiaioi*

<sup>20</sup> Rafue illa dino acádoillena Jerusalemo bitímaci cígimo dáarie griego ímiai ite. <sup>21</sup> Afémaci Felípemo áinozidiaioi. (Felipe Galilea ímie; Betsaida jofue ímie.) Áinozillano íemo izire jicánotiaioi:

—O onógamie Jesuna cíoiacadicaí, —daide.

<sup>22</sup> Jira Felipe Andrena daízaide. Iemo afe íaillinoi Jesumo llujide. <sup>23</sup> Ie jira Jesús ie abina úrillano daide:

—Nanoide Iima Jitomo ebírenafuena nitálliruimo ja dúcide. <sup>24</sup> Uáfue mo ómoína dáitícue, daa güiga raa ido éniemo ríñenia, tíñenia, jaca nai dáajina jóoide; mei íadi afeji ríllamona tídena eroide zícua mona aillo aite. <sup>25</sup> Daje izói dáamie ie cáaillinona dama íeiena rairuíadi, áfena féitaite, mei íadi dáamie ie cáaillinona bie éniemo jámairuíadi, áfena zíñona cáaillinomo énoite. <sup>26</sup> Dáamie cuemo jaináiacadímie cuemo jáirede. Cue illínomo dáanomó cuena jaináidímie iite. Dáamie cuemo jaináia, cue Moo afémie mo ñúfue mo nítaite, —daide.

*Jesús ie tíllifuena jino llote*

<sup>27</sup> Jesús nai úrillano daide: Birui cue comeci iere llícitáide. ¿Nie izói cue daíri? ¿Níbai bie izói dáitícue: “Moo birui cuemo zúidífue mona cue jíllota”? Mei íadi cue afe jira bitícue.

<sup>28</sup> Moo, o mámedo ebírenafuena jóneri, —daide.

Iemona monámona daa uai cácaide. Daide:

—Afena jae ebire íficaitáitícue. Iemo meina dáanomó ebire íficaitáitícue, —daide.

<sup>29</sup> Aféno mo íte comini afena cacáillano daidiaioi:

—Mona gíría, —daidiaioi.

Iemo jíaimaci:

—Juzíñamui abi ímie íemo úrite, —daidiaioi.

<sup>30</sup> Mei jira Jesús daide:

—Afe uai cuemo cácañede. Omoimo cácaide. <sup>31</sup> Ja biruimo bie énie comini jenoda facátalliaioi. Jabe bie énie ocuídímie jino dotácana iite. <sup>32</sup> Enie acónimo tíllena cue íaioi raiñolle llezica, nana dama cuemo cue atille, —daide.

<sup>33</sup> Afe dáinamoná, ie tílla izói onótate. <sup>34</sup> Jira comini uai otíaioi:



—Cai ocuilla uai ciegánicodo caimo llófuega: “Cristo zíñona iite.” ¿Nie izói daidio: Nanoide ñima Jitó titállena caifo raiñóbicaite? ¿Bu mei bie Nanoide ñima Jitona? —daidiaioi.

<sup>35</sup> Jira Jesús daide:

—Nai omoi cigiri egáiñotimiena izói nano íanori iticue. Bie cue egáiñuana ómoimo illa ñino, mai cue llua izói omoi macari, jítiredino raire omoi éidafiñeillena. Jítinodo macádimie ie jáillana onóñede. <sup>36</sup> Uzefomo ñino, nai ómoimo illa ñino, egáiñogamacina daí omoi jáillena, —daide.

Afefue ñaina méifodo, Jesús afémacimona retáirizaide.

### *Judíuai Jesuna ñinoñediaioi*

<sup>37</sup> Jesús íaioimo eróicana ñiga cíofininafuiaina finode. Mei íadi íena ñinoñediaioi. <sup>38</sup> Ua ñinoñediaioi, jaiaí uai llóraima Isaías Cuegáuai fuitállena. Isaías daide:

Ocuíraima, ¿bu cai úrillafue ñnua?

¿Bumo Ocuíraima ie ríinona ácatate? daide.

<sup>39</sup> Daítana jira ñnonidiaioi. Ie emódomo jíáifodo Isaías cuete:

<sup>40</sup> Juzíñamui uina cíoiñedimacina íaioina finode.

Iaioi ifoci jáiaitate.

Daí finode uído cíoiñeillena,  
daje izói ifócido ónoñeillena.

Jira cuemo bínidimaci, íaioi cue jíllotallena.

<sup>41</sup> Isaías aféfuiaí llote, mei afémie Jesús ebírenafuena cíodeza. Jira afémiedo úrite.

<sup>42</sup> Mei íadi aillo judíuaimona Jesuna ñnotiaioi, illáicomínimona jíai dáarie. Mei íadi uáfodo lloñediaioi, fariséuaina jacíruillano gairíracomona jino íaioi óreñeillena. <sup>43</sup> Comini ñúefuena íaioimo nítajana jamánomo gáidiaioi. Mei íadi Juzíñamui ñúefuena íaioimo nítajana jámairuitiaioi.

### *Jesús uailai comínimo riire jicánoite*

<sup>44</sup> Jesús aillo uaido daide:

—Cuena ñnotimie, dama cuena ñnoñede, mei íadi daje izói cue orédimiena ñnote. Ua cue Moona ñnote. <sup>45</sup> Cuena cíodimie daje izói cue orédimiena cíode. <sup>46</sup> Cue egáiñotimiedicue. Ana bie éniemo biticue, cuena ñnotino jítiredifomo fiébiñeillena.

<sup>47</sup> Dámierie cue uaina cacáadi íadi jeire ie óñeniadi, ie jicánoraimana íñeiticue. Cue bie énie comínina duere fínuaibiñedicue, mei íadi afémacina jíllotaibiticue. <sup>48</sup> Cuena jámairuitimie, cue uaina jeire óñédimie ja ie duere fínoitimie ite. Cue ñaina uailai írairuillaído duere íena finótaite. <sup>49</sup> Dama cue comeci izói úriñedicue. Moo Juzíñamui, cue orédimie cue dáinana llófuellena jae ocuide. <sup>50</sup> Moo cuemo ocuícáfue zíñona itátate. Afena onódicue. Jira mei, cue ñaina, jaca cue Moo cue ocuilla izói.

## 13

### *Jesús ie llófuegamaci ídai jocode*

<sup>1</sup> Jae pascua rafue uícodirui. Jesús bie éniena ie fiénocaillana, ie Moo ñine jáillirui áinozillana fidide. Ieiena éniemo itínona izíruite. Ua jaca fáicanocaiñeno íaioina izíruite.

<sup>2-4</sup> Taife jae Judas Iscariote comécimo Jesús fecállena llote. Judas Simón jító. Afe llezica Jesús Juzíñamuimona bitímiena fidide. Daje izói Juzíñamuimo meine jáillana fidide. Juzíñamui nana ríinona íemo fécajana Jesús onode. Ie mei güillano, güirábanimona náidacaillano jinóidicuiro ñuñode. Dúíñuano daa abi doraroi ciráigimo maítade. <sup>5</sup> Ie mei jainoi icáifemo tótajano, ie llófuegamaci ídai jócuaide. Daí ñiano, afe ciraiji maítaca abi dorároido íaioi ídai zafénaitade.

<sup>6</sup> Simón Pedro idai ie jócualla llezica afémie Jesuna daide:

—Ocuíraima, ¿cúe idaina jócoitio?

<sup>7</sup> Jira Jesús uai ote:

—Birui cúe finócafueña onóñedio, mei íadi fui ónoitio, —daide.

<sup>8</sup> Mei ie jira Pedro daide:

—Jaca ninomo cúe idaina jócoñeitio, —daide.

Jira Jesús íena daide:

—Ona cúe jocóñeniadi, cuemo jáinaiñeitio, —daide.

<sup>9</sup> Jira Simón Pedro íena daide:

—Mai mei, Ocuíraima, daa cúe idai jocóñeno, mei cúe onoi, cúe ifo diga jocori, —daide.

<sup>10</sup> Jira Jesús daide:

—Como nóidimie daa ie idai jócuana dúide, abi nana dóina jira. Ja dogáomoi, mei íadi nánañede, —daide.

<sup>11</sup> Iena fécaitimiena onona jira, Jesús jae daide “Nana dóñegaomoi.”

<sup>12</sup> Iaiói idai jócua méifodo, Jesús ie jinóidicuiro meine jítade. Güirábani abimo ráinaillanona daide:

—¿Omoimo cúe finócafueña onódiomoi? <sup>13</sup> Omoi jae Llófueraimana, Ocuíraimana cúe mamédiomoi. Daií ñue daidíomoi, níimiedicueza. <sup>14</sup> Jae omoi Llófueraimadicue; jae omoi Ocuíraimadicue mei íadi omoi idai jocódicue. Afe izói dani conima idai omoi jocolle jítáirede. <sup>15</sup> Jae ómoína finócafueña onótaticue, cúe finua izói omoi finóllena. <sup>16</sup> Uáfueña dáitícue: Táijitatimie baimo jaide jaiénicina iñede. Daje izói orédimie baimo jaide orécamierna iñede. <sup>17</sup> Aféfuiai omoi onóadi, íemona afe izói ñiano, ióbificaitiomoi.

<sup>18</sup> Omoiri nana úriñedicue. Cúe nizécamacina onódicue. Mei íadi Cuegáuai daina ñue fuitállena jítáirede. Cuegáuai daide: “Cúe diga güitímie jae cúe ícidote.” <sup>19</sup> Afefue uícomo ómoimo llotícue afe íficailliruimo Crístodicue cuemo omoi íinollena. <sup>20</sup> Uáfueña ómoína dáitícue, cúe orécamierna lliinotimie afe izói cuena lliinote. Cuena lliinotimie afe izói cúe orédimierna lliinote, —daide.

### *Jesús Judas ie fecállifue jino llote*

(Mt 26.20-25; Mr 14.17-21; Lc 22.21-23)

<sup>21</sup> Daií daina méifodo, Jesús jamánomo comeci zúucaide. Uáfodo jino llote:

—Uáfueña ómoína dáitícue, ómoimona dáamie cúe fécaite, —daide.

<sup>22</sup> Ie jira llófuegamaci jiáimamo eróricaidiaíoi, onóñegaza budo úrite. <sup>23</sup> Llófuegamacimona dáamie Jesús iere izíruigamie. Afe güilláruído Jesús abimo ráide. <sup>24</sup> Simón Pedro íemo onócaido llote:

—Mai Jesumo jícano, ¿budo úrite? —daide.

<sup>25</sup> Jira jofo áinozillano Jesumo jícanote:

—Ocuíraima, ¿bu llotio? —daide.

<sup>26</sup> Jira Jesús uai ote:

—Daa pánllicina cúe riáitano afémiemo íitícue. Afe níimie, —daide.

Iemona pánllicina riáitano Judas Iscariote, Simón jítomo fecade. <sup>27</sup> Afe pan Judas lliinuamona, Taife ie comécimo jofo jaide. Mei jira Jesús daide:

—O finóllifueña raire fino, —daide.

<sup>28</sup> Júdasna daií daináfueña güirábanimo güitínomona buna aféfuena onóñena. <sup>29</sup> Ucubellu Judas uícaiga jira dáamierie comeci facádiaíoi: Jesús daiíacade ráfueño jitailla raana íbajitade. Jiáimaci comeci facádiaíoi, níbai duéredino úcube afémie íllena. <sup>30</sup> Afe pan güilla méifomo Judas jino jaide. Ja naíona.

### *Comue ocuállafue*

<sup>31</sup> Judas jino jailla méifomo, Jesús daide:

—Jabe Nanoide Iima Jitó ebírenafue ácatalle. Afe dainámiedicue. Iemo jiái jabe Juziñamui ebírenafue iedo ácatalle. <sup>32</sup> Nanoide Iima Jitó Juziñamui ebírenafue ácataiadi, ibana ie Jitó ebírenafue Juziñamui ácataite. Afena raire finoite.

<sup>33</sup> Cue izíruigamací, omoi diga ja are íñeiticue. Cuená jénoitíomoi. Mei íadi nauí judíuaina cue daina izói biruí ómoína dáitíicue: cue jáillinomo jáinidíomoi. <sup>34</sup> Bie comue ocuícafue ómoimo llotíicue: conímana omoi izírui. Cue omoi izíruilla izói afe izói conímana omoi izíruillana jítáirede. <sup>35</sup> Nana conímana omoi izírui, nana comíni cue llófuegamacídíomoi fídítiaíoi, —daide.

*Pedro Jesuna jáanollífue Jesús uícomo llote*  
(Mt 26.31-35; Mr 14.27-31; Lc 22.31-34)

<sup>36</sup> Ie mei Simón Pedro Jesuna jicánote:

—Ocuíraíma, ¿niné jáidíoi? —daide.

Jira Jesús uai ote:

—Cue jáillinomo biruí bínidíoi; mei íadi méifoidíruido cuedo bítíoi, —daide.

<sup>37</sup> Mei ie jira Pedro daide:

—Ocuíraíma, ¿nibái mei biruí odo bínidíicue? Ja finóbídíicue o diga cue tíillena, —daide.

<sup>38</sup> Jira Jesús uai ote:

—¿Uáfúena meita finóbídíoi cue diga o tíillena? Uáfúena ona dáitíicue: nai átava úriñeniadí, dacaiñoámáni cuena jáanoitíoi, —daide.

## 14

*Jesús, Moo Juziñamuimo jaira íoi*

<sup>1</sup> Omoi comeci zúucaíñeno. Juziñamuimo ñno; daje izói cuemo ñno. <sup>2</sup> Cue Moo jofomo aillo illánuiái ite. Bífue táínofue íadi, raire ómoimo llóitíicue; íadi jaca uafue. Mei jira omoi illíno finuaidíicue. <sup>3</sup> Omoi illíno cue finuaila mei, abído ómoína uáibítíicue, cue illíno dáanomo omoi íllena. <sup>4</sup> Cue jáillinona onódíomoi afe íoi diga, —daide.

<sup>5</sup> Jira Tomás daide:

—Ocuíraíma, o jáillinona onóñedícaí. ¿Nie izói afe íona ónoítícaí? —daide.

<sup>6</sup> Jira Jesús uai ote:

—Cue íódíicue. Cue uáfuedíicue. Daje izói cue cáatatinodíicue. Ie jira daa cuedo Moo illánomo dúcíredíomoi. <sup>7</sup> Cuená omoi onóíadi, daje izói cue Moona ónoitíomoi. Ja biruímo íena onódíomoi. Ja íena cíodíomoi za, —daide.

<sup>8</sup> Jira Felipe daide:

—Ocuíraíma, Moo Juziñamui caímo cíota. Afedo figo baite, —daide.

<sup>9</sup> Jira Jesús uai ote:

—Felipe, ja are omoi diga íticue, ¿nai cuena onóñedíoi? Cuená cíodímíe daje izói cue Moona ja cíode. ¿Níbái mei Moona cíotalle cuemo jicádíoi? <sup>10</sup> ¿Moomo cue íllana nai ñnoñedíoi? ¿Daje izói cue Moo cuemo íllana ñnoñedíoi? Nana cue daináfuiái dama cue comeci izói daiñedíicue. Cuemo ite Moo dama íe táijina finode. <sup>11</sup> Cue Moomo cue íllana ñno; afe izói Moo cuemo íllana ñno. Ménaillínoi dáanomo itícocozá. Daií omoi ñnoiacañenia cue finócafúena ñno. <sup>12</sup> Uáfúena dáitíicue: cuena ñnotímíe cue finócafue izói finoite. Nane afe baímo aillo jiáífue finoite, cue Moo illánomo cue jailla jira. <sup>13</sup> Nana omoi cue mámedído jícaca raa finoítíicue, Moo ebírenafue íe Jitó ácatallena. <sup>14</sup> Naga cue mámedído jícalle raana finoítíicue, —daide.

*Jesús Ñuera Joreño oréllena uafue llote*

<sup>15</sup> Cuená omoi izírui, maí cue ocuícafuiái cacáfíreírí. <sup>16</sup> Iemo omoi canóraíma, omoi fírraraíma jícáitíicue. Moo ómoimo íena oréllena íemo izíre jícáitíicue. Bítímíe uafue Joreño.

Afe Ñuera Joréñona jícaíticue omoi diga ninomo íllena. <sup>17</sup> Enie imaci íena llínonidiaioi, afémiena ciónidimaci jira; daje izói afémiemona ónoñedimaci jira. Mei íadi íena ja onódiomoi, omoi diga illa jira. Ua uire jaca ómoiri dájena íte. <sup>18</sup> Omoína zóofeñeíticue. Abido bíitícue omoi diga íllena. <sup>19</sup> Nano nígarui íanori íllamona comini ja cuena cíofeñeítiaioi, mei íadi cuena cíoitomoi. Afe jira omoi cáaitiomoi, cue caana jira. <sup>20</sup> Aféruido cue Moomo cue íllana ónoítomoi. Daje izói cuemo omoi íllana ónoítomoi; daje izói ómoimo cue íllana ónoítomoi. <sup>21</sup> Cue uaina onódimie, íemo jíai afe uaina jeire otímie uáfueña cuena izíruillana cíotate. Jira cuena izíruitímie cue Moo daje izói izíruite. Cue daje izói íena izíruiticue; ie mei afémiemo cuena cíotaiticue, —daide.

<sup>22</sup> Iemo Judas (íadi Iscarióteñedimie) íena daide:

—Ocuíraíma, ¿nibái énie comínimo ácatañeno, dani caimo o abina ácataitio? —daide.

<sup>23</sup> Jira Jesús uai ote:

—Cuena izíruitímie cue daínafue jeire ote, ie jira cue Moo íena izíruite. Afe llezica cue Moo cue diga bíitícoco afémie diga íllena. <sup>24</sup> Cuena izíruiñedimie cue daínafue jeire oñede. Omoi cacana úrillafue dama cúeieñede. Afefue Moo Juzíñamui, cue orédimie ifue. <sup>25</sup> Omoiri cue illa dino aféfuiaina ómoimo lloticue. <sup>26</sup> Mei íadi Moo cue mámeçido Ñuera Joreño óreite, ómoína canóllena, ómoína firallena. Nágafuiaina omoi llófueite. Nana ómoína cue daínana úbicaitaite.

<sup>27</sup> Começi caimare uái illifue ómoimo fiédicue cue jailla jira. Cue começi caimare uái illifue ómoimo iticue, mei íadi énie comini começi illifue izóiñede. Omoi começi zúucaíñeno. Jacíruiñeno. <sup>28</sup> Jáitícue, cue daínana cacádiomoi. Daje izói meine bíitícue ómoiri cue íllena. Uáfueña omoi cuena izíruia, cue Moomo cue jáillifue omoi fidínamona cáimacaitiomoi, mei afémie cue baímo illa jira. <sup>29</sup> Jira áfena uícodo ómoimo lloticue, afefue fínuaruimo omoi ínollena.

<sup>30</sup> Omoiri ja aillo úríñeíticue, bie éniemo ocuídímie ja billa jira. <sup>31</sup> Mei íadi afémie cuena ocuínide. Daí írede, énie comini Moona cue izíruillana íaioi onóillena. Daje izói Moo cue ocuilla raana cue fínuana ónoítiaioi. Mai náidacai. Benómona cai jáilleza, —daide.

## 15

### *‘Vid’ daína jíricona izoide rao ícairuai rafue*

<sup>1</sup> Afe mei nane Jesús úrite; daide:

—Uafue ‘vid’ daína jíricue llizítate rao izóidícue. Cue Moo afe rao úíñotímie. <sup>2</sup> Lliziacañede rao ícairo jaitade. Nana lliziacade ícairo ie icoi jáicoide, áfemona jamánomo llizíllena. <sup>3</sup> Omoi cue llófuiáfuedo jae ñue dóficaidiomoi. <sup>4</sup> Mai cuemo dáanomo omoi jainairi ómoimo cue jainaina izói. Daa ícairo fia daíngo llizínide. Daje izói cuemo dáanomo omoi jaináñenia, ñúefuiái omoi comécimona comuítanidiomoi. <sup>5</sup> ‘Vid’ daína jíricue llizítate rao izóidícue; afe rao zitaca ícairuai izóidíomoi. Cuemo dáanomo jaináidímie, íemo dáanomo cue jainaila llezica, ua jamánomo aite. Mei íadi cue íñédicuenia minícana finónidíomoi. <sup>6</sup> Cuemo jaináñedimie jino faille. Fáiamona zafénaite, rao rábiai izói. Afémacina iraida iraimo jobaica.

<sup>7</sup> Cuemo ñue omoi jaináiadi, daje izói cue llogáfueña omoi féitañenia, o jitaiga raana jicari. Iemona áfena ómoimo íticueza. <sup>8</sup> Aillo llizilla izoide ñúefue omoi finóadi, cue Moomo ñúefueña nítaitio. Afedo cue uáfueña llófuegamacina omoi íllana ácataitiomoi. <sup>9</sup> Cue Moo cuena izíruilla izói, afe izói ómoína izíruiticue. Omoína cue izíruiticueza; áfedo dínomo omoi jairi. <sup>10</sup> Cue ocuífaiaina jeire omoi óiadi, daí cuedo izíruilliomoi. Daje izói cue Moo ocuífaiaina jeire oticue. Iemona afémiedo izíruigacue.

<sup>11</sup> Cue daí úritícue cue dibéñedo caimare omoi íllena. Daí íobillafueña oruíbicitomoi. <sup>12</sup> Bie cue ocuífafue: Omoína cue izíruilla izói naga come ie conímána izírui. <sup>13</sup> Dámie

jamánomo izíruillafuedo ie abi ie nabáiñiaimo fecárede. Afe baimo iere izíruillafue iñede. <sup>14</sup> Cue ocuícáfue omoi finóadi cue nabáiñiaidiomoi. <sup>15</sup> Ja jaiénicina ómoína mámeñeiticue, jaiénici ie ocuídímie finuafuena ónoñena jira. Cue nabáiñiaína ómoína mamédicue, nana cue Moo cuena daináfuiái omoi cue onota jira. <sup>16</sup> Omoi cuena nizéñediomoi, mei íadi cue nizécamacidiomoi. Iemona ómoína ocuídícue, aillo llízie izoide ñúefuiaina omoi finóllena. Afe llízie are íllana ocuídícue. Ie jira daí nana cue mámeçido omoi jicaca raana cue Moo ómoimo fécaite. <sup>17</sup> Jira bifue ómoína cue ocuúllafue: Naga come ie conímana izírui, —daide.

### *Enie comini Jesuna éoide ie comini diga*

Jesús nai úrillano daide:

<sup>18</sup> —Enie comini ómoína éoiadi, nano fueñe cuena íaioi éoillamo omoi uíbicairi. <sup>19</sup> Enie comínina omoi íadi, afémaci íaioi comínina izíruilla izói ómoína izíruiíai. Mei íadi énie imácimona ómoína nizédicue. Ie jira énie imaci ómoína éoidiaioi, éniemo íaioi jainaina jira. <sup>20</sup> Ómoína cue daináfue mo uíbicairi: “Nie jaiénici ocuídímie baimo iñede.” Cue duere finóllena íaioi racáoiaí, daje izói ómoína rácaitiaioi. Cue llófueinafuena jeire íaioi óiaí, ómoína jeire óitiaioi. <sup>21</sup> Nana aféfuiaí cue ícoína ómoimo finoitiaioi, cue orédímiena onóñena jira.

<sup>22</sup> Iaiomoi úrizabiñedicuena íaioi ícoína iñede. Mei íadi birui íaioi fiénidífue ícoína jae ite. <sup>23</sup> Cuena éoidímie daje izói cue Moona éoide. <sup>24</sup> Jaca bu jíáimie íaioi cígiri cue finua izói finóñede; mei íadi afe jíáimie finófinide raana ja íaioi cígiri finódicue. Ie jira íaioi ícoína íteza. Mei uáfue na aféfuiaína ja ciódiaioi. Mei íadi afe emódomo cuena éoidiaioi. Afe izói cue Moona éoidiaioi. <sup>25</sup> Afefue daí jaide, íaioi cuega ocuícáfuiái uai fuitállena. Afe Cúegáuai daide: “Nífueninanomona cuena éoidiaioi.”

<sup>26</sup> Mei íadi Móomona cue oréllímie, afe Ñuera Joreño bíadi, cueri úrite. Afe llezica ómoína cánuano náirecaitaite. <sup>27</sup> Omoi daje izói cueri úritiomoi, nanómona cue diga omoi illa jira.

## 16

<sup>1</sup> Aféfuiaí ómoimo lloticue, fiénidífue mo omoi báiiñellena. <sup>2</sup> Juzíñamui uai llófueriracomona ómoína jino dótaitiaioi. Ua uire jamánomo fiéni illíruimo dúciite. Aféruillaido ómoína fáitimaci, “Ómoína fallífuedo Juzíñamui tájinana finoiticaí” daí daina ínoitiaioi. <sup>3</sup> Aféfuiaína finoitiaioi Moona jaca ninomo onóñena jira, daje izói cuena onóñena jira. <sup>4</sup> Afena ómoína dáitícue, aféruillai dúcillemo, cue daináfue mo omoi uíbicaillena, —daide Jesús.

### *Ñuera Joreño finóllifuiái*

Jesús nai úrillano daide:

—Aféfuena nanómona ómoimo lloñédicue, omoi diga cue illa jira. <sup>5</sup> Mei íadi biruímona cue orédímie dinomo jáitícue. Omoimona buna cue jáillinona jicánoñediomoi. <sup>6</sup> Mei íadi bie cue ómoína daináfueri iere zúucaidiomoi. <sup>7</sup> Iadi uáfue na dáitícue: cue jaille ómoimona iere ñuera. Cue jáiñenia, ómoína canoda firaraima bíñeite omoi diga íllena. Mei íadi cue jaía íena óreitícue. <sup>8</sup> Ie billíruido éniemo itino íaioi fiénidífuiaina uáfue na onótaite. Daje izói dama daa jáicina ñúefuedo cai jáillona onótaite. Daje izói Juzíñamui íaioína duere finóllena onótaite. <sup>9</sup> Afémaci fiénidífuiairedimaci, cuena ínoñena jira. <sup>10</sup> Afe jáicina jáillona ónoitiaioi, Moo illánomo cue jailla jira. Afe cue jailla mei cuena cíoñeitiomoi. <sup>11</sup> Juzíñamui facátallifuena ónoitiaioi, bie éniemo ocuídímie jae duere finóbilla jira.

<sup>12</sup> Cue ómoimo lollífuiái nai aillo ite; mei íadi nai onónidiomoi, náinidiomoi. <sup>13</sup> Uafue Joreño bille llezica ómoimo nana uáfuiaina afémie llóite. Dama ie comeci jítaina izói úriñeite, mei íadi ie cacana izói dáite. Uire íitifuiaína ómoína onótaite. <sup>14</sup> Cúeimona

llínuano ómoína onótaite; onótamona ñúefuena cuemo nítaité. <sup>15</sup> Nana Moomo ite raa daje izói cueie. Ie jira dáitícue: Ñuera Joreño cúeiemona llínoite, áfedo aféfuena ómoína onótaite.

*Zúurenafue cáimafuena méidolle*

<sup>16</sup> Nano íanori íllemona cuena cíõñeitiomoi. Mei íadi jabo bai diga iruillai íllamona, nane meine cuena cíõitiomoi, mei cue Moo illa ðine cue jáillaza, —daide.

<sup>17</sup> Iemona ie llófuegamacimona dáarie jofo conímamo jicánote:

—¿Afe nie izói ðaináuai? Caina daide nano nie ðino íllamona íena cíõñeíticai. Ie mei nane caina daide, báifenemo diga iruí íllemona meine íena cíõíticai, mei ie Moo illánomo ie jáillaza. <sup>18</sup> ¿Nie izói aféuai daide: “Nie ðino íllamona?” Afémie nífuedo úriteza onóñeíticai, —ðaiðíaioi.

<sup>19</sup> Jesús íaioi íemo jicánoiacagafuena onóillano daide:

—Cue ðaiðícue nie ðinó íllemona cuena cíõñeitiomoi. Nane ie baímo diga iruí íllemona meine cuena cíõitiomoi. ¿Afefue conímamo jicánotiomoi? <sup>20</sup> Uáfuena dáitícue: omoi éeitiomoi. Zuure íitiomoi; mei afe llezica énie comini caímare íítiaioi. Mei íadi omoi zúunaillafue cáimafuena méiðoficaite. <sup>21</sup> Ringo úrue jocóacania izínaillari zúucaite, afengo izínaillaruimo dúcidez. Mei íadi úrue jócu méiðodo afe izírenamo uíbicaíñede, úrue éniemo jocóinari ie íóbilla jira. <sup>22</sup> Ðaí birui omoi izire zúucaitiomoi. Mei íadi ómoímo cíõizaíbitícue. Iemona omoi coméciai cáimafuena óruite. Afe cáimafuiai bu ómoímona báiroñeite.

<sup>23</sup> Aféruido minícana cuemo jícanoñeitiomoi. Uáfuena ómoína dáitícue, nana cue mámeçido omoi jicaca raa, cue Moo ómoímo fécaite. <sup>24</sup> Biruimo cue mámeçido minícana nai jicáñeitiomoi. Mai jica omoi llínollena, áferi comeci cáimafuena oruíbicaillena.

*Jesucristo, Juzíñamuina éoiðinona anáfenodimie*

<sup>25</sup> Bífuiiai aillo daje izóiðifuiaido ómoímo llotícue, mei íadi ðaruina daje izóiðifuiaido ómoímo úriñeítícue. Aféruido ja ánozide. Aféruido uáfodo Moodo ómoímo úritícue.

<sup>26</sup> Aféruillaido omoi cue mámeçido jicaitiomoi. Moomo ómoiri izire cue jicállena ðaiñeítícue, <sup>27</sup> mei dama Moo ómoína izíruilla jira. Iemo jíai cuena omoi izíruilla jira, ómoína izíruite. Moo ðinena cue bíllana omoi ínuua jira, afémie ómoína izíruite. <sup>28</sup> Moo illánomona billano bie éniemo bitícue. Birui énie fiénocaillano meine Moo ðiné abido jáitícue, —daide.

<sup>29</sup> Jira ie llófuegamaci daide:

—Ja birui daje izóiðiuaido ðaiñeno, jino uáfodo úritio. <sup>30</sup> Birui naga rafue o onóigana onóðicai. Ja jíaimie omo llúana jítaiñede. Mei jira Juzíñamuimona o bíllana ínoticai, —ðaiðíaioi.

<sup>31</sup> Jira Jesús uai ote:

—¿Birui cuemo ja ðaí ínotiomoi? <sup>32</sup> Omoi enénorie júðazilliruimo ánozide. Ja birui aferuí. Omoímona nágamie oni eneno júðazite. Dama cuena fiénocaitiomoi. Mei íadi ðamáñeítícue, cue Moo cue diga illa jira. <sup>33</sup> Nana bífuiiai ómoímo llóitícue, cuemo ínuuano omoi comeci uái íllena. Afe bie éniemo ðuere zéfuitiomoi. Mei íadi, jabí omoi mameri! Ja Juzíñamuina éoiðinona anáfenodimieðicueza, —daide.

## 17

*Jesús ie llófuegamaciri Juzíñamuimo jicade*

<sup>1</sup> Aféfuiai ðaina méiðomo, Jesús caífo monamo érocaillano daide:

—Moo, cue íraíruimo ja dúcide. O Jitomo ñúefuena nitari, afe izói o Jitó omo ñúefuena nítaitéza. <sup>2</sup> Aillo ríino o Jitomo jae o iga, nana comini náamatallena; daje izói nana cuemo ígámacimo zíñona cáaillinona íaiomoi cue íllena. <sup>3</sup> Zíñona cáaillino comini ona íaioi

onónamona llínotiaioi. O dama uafue Juzíñamuidio. Daje izói zíñona cáailino, o orécamie Jesucristo íena onónamona llínotiaioi.

<sup>4</sup> Bie éniemo cue illa llezica ebírenafue jae omo nitádicue. Cuemo o ocuícáfue jae fuitádicue. <sup>5</sup> Moo, nauí o díga cue illáruimo cue ebírenafue dájena biruí o uícori meine cuemo ine. Afe ebírenafue nai énie íñena llezica nauí cuemo ite.

<sup>6</sup> Enie imácimona doce dígamie otio cuemo íllena. Afémacina búdioza jae onótaticue. Afémaci óie. Cuemo o igano. O úrilla uaina ínotiaioi. <sup>7</sup> O nana cuemo igáfuiái ómona bitífuiaina onódiaioi. <sup>8</sup> Jira o cuemo iga úrilla uai bimácimo lloticue. Aféfuena jeire otíaioi. Uáfueña ómona cue bíllana onódiaioi. Daje izói o cue óriana ínotiaioi.

<sup>9</sup> Afe cuemo o igámaciri izire jicádicue. Enie imáciri izire jicáñedicue. Dama cuemo o igámaciri izire jicádicue, ómacina jira. <sup>10</sup> Nana cueie óie díga. Afe íbana nana óie cueie. Afémacimona cue ebírenano ácataficaide.

<sup>11</sup> Cue ja éniemo fiébiñeiticue; mei íadi afémaci afe éniemo fiébitiaioi. Cue o díga íllena jáiticue. Jamánomo ñuera Moo, cuemo o igano o ríinodo uíñori, nana dájena cuemo ñue jaináillena, omo cue jainaina izói. <sup>12</sup> Bie éniemo afémaciri cue illa llezica, o ríinodo íaioina úiñoidicue. Íaioi abi ríidoticue. Íaioimona buna féiraiñede. Mei íadi dáamie jaca féiraitimie, Cuegáuai fuitállena. Afémie nanómona féiraitimie.

<sup>13</sup> Jabe o illánomo jáiticue. Mei íadi nai éniemo cue illa díno aféfuiaína llóllodicue, cuemo ite íóbillafue afe izói afémaci ñue íóbicaillena. <sup>14</sup> O úrilla uai íaioimo iticue, mei íadi énie imaci íaioina éoidiaioi, énie imaciñena jira. Daje izói cue jíai énie ímieñedicue. <sup>15</sup> Eniemona íaioi o óllena jicáñedicue, mei íadi Taifémona íaioi ríidollena jicádicue. <sup>16</sup> Enie ímieñedicue; afe izói énie ímaciñediaioi. <sup>17</sup> Íaioina uáfuedo dama óiena rairuirí. O úrilla uai uafue. <sup>18</sup> Enie imaci cígimo cue o ória izói, daje izói énie imaci cígimo íaioina orédicue. <sup>19</sup> Afémaci ícoínia cue dama abi rairuídicue. Daí finódicue, uafue uaido afémaci daje izói íaioi rairuíllena.

<sup>20</sup> Daa afémacimo omo izire jicáñedicueza, mei íadi bimaci úrilla uaina cacáillano cuemo ínotinomo izire jicádicue. <sup>21</sup> Nana afémaci dájena jaináillena omo jicádicue. Ua Moo, afémaci dájena cócomo jaináillena jicádicue. Uáfueña o cuemo itio, nane uáfueña cue omo iticue. Afe izói íaioi cócomo íllena jicádicue. Afémaci dájena jainaille jítáirede, énie comíni cue o óriana ínollena. <sup>22</sup> Cuemo o iga ebíredifue izói, afémacimo jae cue iga, dájena íaioi íllena, o díga dájena cue illa izói. <sup>23</sup> Afémacimo cue íllena jicádicue, nane o cuemo íllena jicádicue, nana afémaci dájena íficaillena. Daí íaioi íllena jítáirede, énie comíni cue o óriana fídíillena. Nane áfedo énie comíni cuena o izíruilla izói, bimácina o izíruillana ónoitiaioi.

<sup>24</sup> Moo, bimaci cuemo itio. Cue illínomo cúeoíri íaioi íllena jítáidicue, cuemo o iga ebíredifueña íaioi cíoillena. Nai énie fínoñenia uícomo cuena izíruitio. <sup>25</sup> Moo, jáicina ñue jóonetimedio. Enie comíni ona onóñediaioi, mei íadi cue ona onódicue. Bimaci cue o óriana onódiaioi. <sup>26</sup> Búdio, jae íaioina onótaticue; íemo nai onótaoicaiticue, o cuena izíruilla íaioi comécimo fiébillena; daje izói cue dama afémacimo fiébillena, —daide.

## 18

### *Jesús maíano úinafue*

*(Mt 26.47-56; Mr 14.43-50; Lc 22.47-53)*

<sup>1</sup> Aféfuiai daína méifodo, Jesús ie llófuegamaci díga jino jaillano Cedrón illétue ruica jáidiaioi. Dinomo ite ocózinairabirimo jofo jáidiaioi. <sup>2</sup> Judas afébirina onode, Jesús ie llófuegamaciri, díga ícaíño afénomo gáirifirena jira. <sup>3</sup> Jira dinomo Judas fuíríraini díga dúcide. Afe llezica dáarie gairíraco llazíraini Judas jicácamací bitíaioi. Afémaci fariséuaimona lletáiraini illáinimona oreca. Lloéfaillai díga jacire abi mamédiaioi. Unéruairi bitíaioi, daje izói lámparaairi. <sup>4</sup> Mei íadi Jesús afémiemo fínuailífueña onóillano, jino billano íaioimo jicánote:

—¿Bu jenódiomoi? —daide.

<sup>5</sup> Jira afémaci uai ote:

—Jesús, Nazaret ímie jenódicai, —daidíaioi.

Jesús uai ote:

—Níimiedicue, —daide.

Afe llezica éoidimacimo fecádimie, Judas dinomo afémaciri ite. <sup>6</sup> Jesús “Níimiedicue” daína llezica, jinófecañona éniemo baídíaioi. <sup>7</sup> Ie mei Jesús dáanomo nane jicánote:

—¿Bu jenódiomoi? —daide.

Jira afémaci:

—Nazaret ímie, Jesús, —daidíaioi.

<sup>8</sup> Mei jira Jesús daide:

—Jae níimiedicue daidicue. Cue omoi jenóadi, bie jíaimaci fáicanocai íaioi jáilleza, —daide.

<sup>9</sup> Afe daí daide Jesús dama ie daínafue fuitállena. Afe daínafue llote: “Cue Moo cuemo igámacimona buna dáamie féiraiñede.” <sup>10</sup> Iemo Simón Pédro daa lloefai ite. Otá Malco daínámie jefo nabefo ñetade. Malco lletáriraini illaíma jaiénici. <sup>11</sup> Jira Jesús Pédróna daide:

—O lloefai ie icomo abido meine joone. ¿Cue Moo cue duere zefuítajana llínoñeiticueza, daí o comeci facáido? —daide.

*Lletáriraini illaíma uícomo Jesús uitíaioi*

*(Mt 26.57-58; Mr 14.53-54; Lc 22.54)*

<sup>12</sup> Ie mei fuiríraini íaioi ocuíraíma díga Jesuna llaítadíaioi. Nana bimaci judíuai llaízíraini díga Jesús maíano oni uitíaioi. <sup>13</sup> Ie meífomo Anás jofomo íena uitíaioi. Anás Caifás jifai. Afe fimona llezica Caifás lletáriraini caifóidillaíma. <sup>14</sup> Bie Caifás nauí judíuaina bie izói daidímie: “Daa come nana cai nairai ícoínia tíllena cai baímo ñue jaide.”

*Pedro Jesuna jáanote*

*(Mt 26.69-70; Mr 14.66-68; Lc 22.55-57)*

<sup>15</sup> Simón Pedro jíáie llófuegamie díga nai Jesudo jaide. Jíáie llófuegamie lletáriraini caifóidillaíma onóigamie. Jira caifóidillaíma jofo ibírímo afémie jofo jaide Jesús díga.

<sup>16</sup> Mei íadi Pedro jino naze fuemo fiébicaide. Ie jira lletáriraini caifóidillaíma onóiga llófuegamie jino jaillano, naze úíñoraímamo jicánuaide Pedro jofo oréllena. <sup>17</sup> Iemo naze úíñoraíma Pédro mo jicánote:

—¿O báimie llófuegamieñedio? —daide.

Pedro uai ote:

—Jí, cúeñede, —daide.

<sup>18</sup> Aféruido rozírena jira, jaiénizai llaízíraini díga irai bonódíaioi. Dinomo naidáillano irai fuemo agáidiaioi.

*Lletáriraini caifóidillaíma Jesumo izire jicánote*

*(Mt 26.59-66; Mr 14.55-64; Lc 22.66-71)*

<sup>19</sup> Lletáriraini caifóidillaíma Jesumo jicánuaillano daide:

—¿Nímaci o llófuegamacina? ¿Nífuiaina llófuetio?

<sup>20</sup> Jira Jesús daide:

—Cue nana comini uícomo uáfodo úriticue. Juzíñamui uai llófueriracuaimo jaca llófuefiredicue. Daje izói Juzíñamuimo gairíracomo llófuefiredicue. Jaca afénomo judíuai gáirifirediaioi. Daí báiñino nífuena lloñédicue. <sup>21</sup> ¿Níbái mei cuemo jicánotiomoi? Cue uaimo cacádinomo jícano. Afémacimo cue daínana jícano. Cue íaioina daínana onódiaioiza, —daide.

<sup>22</sup> Jesús daí daína llezica, daa díno ite gairíracomo llaízíraíma Jesús uíeco pútanona daide:

—¿Níbái daí lletáriraini caifóidillaíma uai otio? —daide.



<sup>23</sup> Jira Jesús uai ote:

—Fiénidífue cue lloía, áfena cuemo llone; mei íadi cue daina uai ñuera íadi, ¿ñibái mei cuena putáño? —daide.

<sup>24</sup> Iemona Anás Caifamo íena maitá orede. Caifás lletáriraini caifóidillaíma.

*Pedro nane dáanomo Jesús jáanote*

*(Mt 26.71-75; Mr 14.69-72; Lc 22.58-62)*

<sup>25</sup> Due jiza bai jáidemo, Pedro nai náidaillano irai fuemo agaide. Afénomo itino íena daidíaíoi:

—¿O báimie llófuegamaci iéñedio? —daide.

Pedro jáanuano daide:

—Jii, iéñedicue, —daide.

<sup>26</sup> Dinomo Pedro jefona jaitácamie come ite. Afémie jáie lletáriraini illaíma jáiénici. Afe íma Pédro mo jicánote:

—¿Báimie diga dinomo ocózinairabirimo ona cióñedicue? —daide.

<sup>27</sup> Pedro dáanomo nane jáanote. Afe llezica átava úrite.

*Jesús Pilato uícomo uiga*

*(Mt 27.1-2, 11-14; Mr 15.1-5; Lc 23.1-5)*

<sup>28</sup> Iemona Caifás jofómona oni romano jabóidillaíma áillocomo Jesuna uitíaíoi. Ja monáiacademo. Judíuai jofo afécomo jáíñediaíoi, íaíoi íaicaiñellena. Mei íaicagamací páscuamo güilláfueña güínidiaíoi. <sup>29</sup> Ie jira Pilato jino íaíoi mo úrizailano daide:

—¿Minica ícoínia bímiemo nitáñiomoi? —daide.

<sup>30</sup> Jira afémaci uai otíaíoi:

—Afémie fiénidimieñedena omo izájiñedicaí, —daidíaíoi.

<sup>31</sup> Jira Pilato daide:

—Íena omoi úi. Omoi ocuícáfue izóí afémie omoi riire jicánori, —daide.

Judíuai ie uai otíaíoi:

—Cai judíuaidicaí, dani buna titánidicaí, —daidíaíoi.

<sup>32</sup> Daí Jesús ie tízaillinona daina izóidíuái fuitade. <sup>33</sup> Pilato áillocomo jofo meine jaide. Jaillano Jesús jíirillano jicánote:

—¿O ñii judíuai illáimana? —daide.

<sup>34</sup> Jira Jesús daide:

—¿Afefue dama o comeci jítaina izóí jicánoti? ¿Ñibai jáímaci cueri ona daina jicánoti? —daide.

<sup>35</sup> Jira Pilato úrite:

—¿Cuena judío daidío? O náiraímona lletáriraini illaini cuemo ona fecádiaíoi. ¿Minica ñetío? —daide.

<sup>36</sup> Jira Jesús uai ote:

—Cue illáimana illano bie énie íeñede. Daí ítenia cuedo jáicadino nia fuirídiaíoi, cuena judíuaimo fécañellena. Mei íadi cue illáimana illano benó íeñede, —daide.

<sup>37</sup> Jira Pilato daide:

—¿Jii, o daí illáimadío? —daide.

Jira Jesús uai ote:

—Illáimadicue, o daina izóí. Cue, bie éniemo jéiciaibigacue uafue uai llóllena. Nana uáfue mo cacáfiredino, cue dánana cacádiaíoi, —daide.

<sup>38</sup> Jira Pilato jicánote:

—¿Minica uafue uaina? —daide.

*Jesús tíillinomo maméritiaíoi*

*(Mt 27.15-31; Mr 15.6-20; Lc 23.13-25)*

Afe jicánua meífodo, Pilato meine jino judíuaimo jaillano úrizaide. Iaióina daide:

—Jaca nífuena bie ímamo baiñédicue. <sup>39</sup> Mei íadi ómoimo cue fínofiregafue ite. Naga pascua ráfuemo ómoiri daa maigámie zuitáfiredicue; mei jira ¿judíuai illáimana ómoiri cue zuitállena jitáidiomoí? —daide.

<sup>40</sup> Iemona nana meine caillíoidiaíoi:

—¡Afémiena zuitáñeno iri! ¡Barrabás zuitari! —daidíaíoi. Afe Barrabás meríriraíma.

## 19

<sup>1</sup> Ie mei Pilato Jesús llínuano zechétatade. <sup>2</sup> Iemo fuíriraíni ifo icuífoi eegi nínacuífoi Jesumo jitádiaíoi. Afe llezica ráfide illaíma iníroina íemo jitádiaíoi. <sup>3</sup> Daií ñiano íemo áinozillano, báíñuano daidíaíoi:

—¡Judíuai illaíma, are ii! —daidíaíoi.

Iemona ie uíeco fácoídiaíoi.

<sup>4</sup> Pilato meine jino billano daide:

—¡Bímiemo eroi! Afémiemo nífuena baiñédicue. Ie jira jino bené cue ógaza, aféfuena omoí onóillena, —daide.

<sup>5</sup> Jesús eegi icuífoi ifomo jíinari jino bite. Ráfide illaíma iníroina jitaca naari jino bite. Jira Pilato daide:

—¡Benó afe iima ite! —daide.

<sup>6</sup> Afémie cióillano, lletáriraíni illaíni, llaizíraíni diga caillíoidiaíoi:

—¡Ie coraí! ¡Ie coraí! —daidíaíoi.

Iemo Pilato daide:

—Mai íena uillánona omoí coraí, mei íadi afémiemo fiénidífueña baiñédicueza, —daide.

<sup>7</sup> Mei ie jira judíuai uai otíaíoi:

—Caimo ite daa ocuica uai. Afedo afémie tállena jitáirede, dama “Juzíñamui Jitódicue” ie daína jira, —daidíaíoi.

<sup>8</sup> Afena cacáillano Pilato jamánomo jacínaificaide. <sup>9</sup> Aillocomo nane jofo jaillano Jesumo jicánote:

—¿O ninó ímiedio? —daide.

Mei íadi Jesús jaca uaina oñede.

<sup>10</sup> Jira Pilato daide:

—¿Cue uaina fairíoñedio? ¿Cuemo ite o tülle ríino onóñedio? ¿Cuemo ite o zuitalle ríino onóñedio? —daide.

<sup>11</sup> Jira Jesús uai ote:

—Juzíñamui omo iñénia, o cue ocuille ríino iñede. Ie jira omo cue fecádino o jinomo afémaci íaifueredino, —daide.

<sup>12</sup> Afe llezícama Pilato, “Nie izói Jesús cue zuitalle” daínano, áfena jenode; mei íadi judíuai caillíoidiaíoi:

—Afémie o zuitáadi, romano jamánomoidillaímamo nábaíriñeitio. Naga illáimana íacadímie caifóidillaíma dibénedo éoidimíena jáite, —daidíaíoi.

<sup>13</sup> Mei jira áfena cacáillano, Pilato Jesuna otátate. Ie mei comíni riire jicánoranomo Pilato ráinazaide. Afeno hebreo imaci uaido Gabátana mameide. Jiáimaci daína Empedrado, mei nófiaí ie finoina macáranona íllaza. <sup>14</sup> Jae pascua uícodirui jaíciri ítemo. Jira Pilato judíuaina daide:

—¡Benomo o illaíma ite! —daide.

<sup>15</sup> Mei íadi afémaci caillíoidiaíoi:

—¡Dama tíideza, oni ui! ¡Iena coraí! —daidíaíoi.

Jira Pilato íaíoina daide:

—¿Omoí illáimana córaiticue? —daide.

Jira lletáriraíni illáicomíni uai otíaíoi:

—Jiáie illáimana caimo iñede; dama romano jamánomoidillaíma, —daidíaíoi.

16 Afemona Pilato íena íaioimo ite, afémiena coráillena. Mei jira íena uitíaiói.

### *Coráinafue*

(Mt 27.32-44; Mr 15.21-32; Lc 23.26-43)

17 Iemo Jesús jino jaide. Ie coráillibici rocáoicaide Calavéramo; afe daiíacade come ifócorai. Hebreo imaci uaido daina Gólgota. 18 Afénomo íena coráidiaioi. Afe llezica nágafene jiáimie íaillinoi coráidiaioi; Jesuna cígiide. 19 Pilato afémie mámece ibícimo cuetá ie coráinabícimo jóonetade. Afébicimo cuega daide: “Jesús Nazaret Imie, Judíuai Illaíma.” 20 Aillo judíuai afe cuegábici facádotiaioi, Jesús coráinano jofue áinori illa jira. Afébicí daámani comini uáillaído cuega, hebreo, griego, latín diga. 21 Ie jira judíuai lletáiraini illaini Pilátona daide:

—Judíuai illaíma daíí cueño. Mei íadi “Judíuai illáimadicue daídímie” daíí cúeiri, — daídíaioi.

22 Jira Pilato uai ote:

—Jae cue cuegáuai, dama daíí ite, —daide.

23 Fuiríraini Jesús coraía mei, ie inícuero llínuano cuatro fidi tizáruano fecádiaioi. Afe izói ie caifóferoi llínuano “Iere ñúeraroí,” daídíaioi. Ua aferoi dájena tifoca, zotáinanona íñede. Caifona aná fuizájide. 24 Jira fuiríraini conímana daídíaioi:

—Dama ite, cúatañeíticai. Bai ñue onótaraji cai dotalle bumo jíiteza, —daídíaioi.

Daíí Cuegáuai daina fuitátatiaioi. Aféuai daide: “Cue inícuero dani fecádiaioi. Afemo onótaraji dotádiaioi.” Jira mei fuiríraini daíí finódiaioi.

25 Jesús coráinabíci áinomo ie ei ite afengo ebuño diga. Dáanomo Cleofas ai, María ite, María Magdalena ingo diga. 26 Jesús ie eina cióillano, iere izíruiga llófuegamie diga, ie eina daide:

—Ei, batí o jitona como maméidímie ite.

27 Iemo afe llófuegamiena ibana daide:

—Afénomo o eina como maméidíngo ite, —daide.

Mei aféruillaído afe llófuegamie afengo ie jofomo ñue llínote.

### *Jesús tíllafue*

(Mt 27.45-56; Mr 15.33-41; Lc 23.44-49)

28 Afe mei Jesús naga rafue fuitáinana fidide. Fídiano Cuegáuai fuitállena daide:

—Jiróacadícue.

29 Afe dinomo íciru rochírede vínona oruítaga rainaca. Ie jira jainoi fíillicide raa afe rochíredijina riátatiaioi. Iemo razi ícoimo jóoniano ie fuemo dutádiaioi. 30 Jesús afe rochíredíi jirode. Jíruano daide:

—Nana ja fuite, —daide.

Daina mei, ífo ana jíjicailla llezica tíide.

### *Fuiríraímie ie ducírirado Jesús ciraigi faitade*

31 Ja pascua uícodírui. Judíuai ocózinaillarui coráicano íaioi abi coráinabícimo fiébillana jítaiñediaioi. Bie ocózinaillarui iere áillue. Ie jira Pilátomo jicádiaioi coráicano idai ditátallena. Iemona íaioi abi dinómona oni óllena jicádiaioi. 32 Jira fuiríraini jaillano nánoramie idai ditádiaioi. Jiáimie, Jesús diga coráicamie daje izói íena finódiaioi. 33 Ie mei Jesumo áinozillano jae tídena ciódiaioi. Ie jira ie ídaina ditáñediaioi. 34 Mei íadi fuirírainimona dáamie ducírirado ie ciraigi faitade. Iemona jainoi die diga tóide. 35 Bifue llotímie áfena ciódimie. Uáfueña daide. Afe uáfueño uai nabaide, omoi daje izói ínollena. 36 Aféfuíai daíí íficaide Cuegáuai daina ñue fuitállena. Afe uai daide: “Bu ie ícuruna dítañeítiaioi.” 37 Jiáinomo Cuegáuai daide: “Íaioi bofécamiemo éroítiaioi.”

*Jesús raiáfomo jóonetiaioi**(Mt 27.57-61; Mr 15.42-47; Lc 23.50-56)*

<sup>38</sup> Afe meífodo José, Arimatea jofue ímie, Jesús abi uíllena Pilátomo jicade. Afe José Jesudo jáicadimacimona, mei íadi judíuaina jacíruillano báinino jaide. Iemo Pilato fairíote; íemona José jaillano Jesús abi uite. <sup>39</sup> Daje llezica nauí Jesumo naióna úrizabitimie, Nicodemo dúcide. Afémie treinta kilos dieze mérede zíochoa atide. Aféchoa mena zióredena imuica. <sup>40</sup> Daí José Nicodemo diga Jesús abi uillano, ároeroi iníroido ie abi junide. Aferoi ziórena, mei diga zióredena fáigaza. Daí tíidino judíuai ráifrediaioi. <sup>41</sup> Jesús coraia áinori ocózinairabiri ite. Dinomo daa comue raiáfo, come nai ráiñenafo ite. <sup>42</sup> Aféfomo Jesuna jóoneaidiaillinoi, áinori illa jira. Ua dinomo íena jóonetiaillinoi, judíuai ocózinallarui tainéacana jira.

**20***Jesús meine abido cáadimiena jaide**(Mt 28.1-10; Mr 16.1-8; Lc 24.1-12)*

<sup>1</sup> Semana nanóidiruido Magdalena ingo María jítiramoicana raiáfomo jaide, ua nai jítireoidemo. Dúciillano raiáfo íbaina nofici íñénana ciode. <sup>2</sup> Ie jira aizícana jaide Simón Pedro illánomo. Dinomo jáie llófuegamie Juan ite. Afémie iere Jesús izíruigamie. Iaillinoina daide:

—Jae raiáfomona cai Ocuíraima comini bairódiaioi. Ie íaioi jóoniano onóñedicaí.

<sup>3</sup> Iemona Pedro jáie llófuegamie diga jino jaillano raiáfo dine jáidiaillinoi. <sup>4</sup> Dájena aizídiaillinoi, íadi jáimie Pedro baimo iere rairedé; jira uícomo raiáfomo dúcide. <sup>5</sup> Ie abi ana jíjillano raiáfo eromo eroide. Eróillano juníllaroina ciode, mei íadi jofo jáíñede. <sup>6</sup> Iemo Simón Pedro afémie óodana dúcide. Dúciillano raiáfomo jofo jaide. Abi juníllaroi dino jóoinana nane ciode. <sup>7</sup> Iadi Jesús ifo íbáinaroi ie juníllaroi dáanomo jóoiñede. Afe ifo íbáinaroi jabínota oni eneno jóonega. <sup>8</sup> Iemo jáie llófuegamie, raiáfomo uícodo dúcidimie, jofo jaide. Afe finócafuena ciode. Cióillanona áfemona ínote. <sup>9</sup> Mei Cuegáuai dainana nai figo onóñediaioi. Aféuai daide: “Jesús tíllanomona meine abido cáadimiena jáite.” <sup>10</sup> Iemona afe llófuega íaillinoi jofomo jaide.

*Jesús Magdalena ingo Maríamo cíocaide**(Mr 16.9-11)*

<sup>11</sup> Mei íadi María jino raiáfo áinomo éecana ráide. Eeia llezica abi jíjide raiáfo eromo éroillena. <sup>12</sup> Dinomo mena Juzíñamui abi ímie íaillinoi ángeles dainámaci úzeroi jítádena ciode. Ua nauí Jesús abi illánori ráidiaillinoi; dáamie ifo illánori, jáimie idai illánori. <sup>13</sup> Iemo Juzíñamui abi ímie íaillinoi jicánote:

—Ringo, ¿nibái éedio? —daide.

Jira afengo daide:

—Cue Ocuíraima oni ninomo íaioi uilla jira. Iaioi jóonianona onóñedicueza, —daide.

<sup>14</sup> Afe daina llezica afengo gírecaillano Jesuna ciode; íadi íena onóñede. <sup>15</sup> Jira Jesús jicánote:

—Ringo, ¿nibái éacadio? ¿Bu jenodio? —daide.

Afengo comeci facade, afémie afébirí úñoraíma; jira íena daide:

—Íima, afémie oni jáínomo jae o úiadi cuemo llone, meine cue uájilleza, —daide.

<sup>16</sup> Jira Jesús aféngona daide:

—¡María! —daide.

Afengo ñue gírecaillano hebreo uaido daide:

—¡Raboni! —daide. Afe uai dobáicana daide, Llófueraíma.

<sup>17</sup> Iemo Jesús daide:

—Cue abi jetáñeno iri. Cue Moo illánomo nai caifo jáiñedicueza. Mei íadi cue ámatiaimo lluájiri: “Cue Moo illánomo, daje izói omoi Moo illánomo caifo jáitícue. Ua cue Juziñamui, omoi Juziñamui dine jáitícue.” Daí íaioimo lloiri, —daide.

<sup>18</sup> Ie jira Magdalena ingo María llófuegamacimo lluájide. Afengo Ocuíraimana cíoillana llote, nana bie afémie aféngona daináuai diga.

*Jesús ie llófuegamacimo cíocaide*

(Mt 28.16-20; Mr 16.14-18; Lc 24.36-49)

<sup>19</sup> Aféruído, semana nanóidíruido afe naio llófuegamaci gairídiaioi. Naze ibáillano judíuaina jacíruillamona itíaiioi. Iemo Jesús jofo eromo cíocaide. Iaiioi cígimo náidazaide. Iaiioi uáiduano daide:

—Omoimo comeci caimare uái iri, —daide.

<sup>20</sup> Daí dainano, ie onoi, ie ciraigi diga íaioimo ácatate. Llófuegamaci íaioi Ocuíraimana cíoillano ióbicaidiaioi. <sup>21</sup> Iemo Jesús dáanomo íaioina daide:

—Omoimo comeci caimare uái iri. Moo cue ória izói daje izói ómoina óreitícue, —daide.

<sup>22</sup> Afe mei íaioimo jágilli fúunuano daide:

—Ñuera Joréñona mai omoi ono. <sup>23</sup> Naga come ie fiénidino omoi fáicanocaiadi fáicanocaite; mei íadi omoi fáicanocaiñeniadi dóñega izói fiébite, —daide.

*Tomás meine abido caade Ocuíraimana cíode*

<sup>24</sup> Iadi Tomás, guarámiena maméidimie, doce dígamiedemona, Jesús cíocallaruido iñede. <sup>25</sup> Ie mei jiáie llófuegamaci íena daide:

—Ocuíraimana ja cíódicai, —daidiaioi.

Mei íadi Tomás íaioina daide:

—Ie ónoimo ite boafe, puntilla meifo, cue cíóñenia, cue onocai aféfodo ñuitáñenia, cue onoi ie ciraigi méifodo ñuitáñenia, ñnoñeitícue, —daide.

<sup>26</sup> Ocho dígamona íllamona llófuegamaci meine gairídiaioi. Afe llezica Tomás afémaciri ite. Iemo jaca naze ibaica íadi, Jesús jofo eromo cíocaide. Iaiioi cígimo náidajano uáiduano íaioina daide:

—Omoimo comeci caimare uái iri, —daide.

<sup>27</sup> Iemo Tomásna daide:

—Benomo o onocai ñúitaibi. Cue ónoimo éroi. O onoi cue ciráigimo ñúitaibi. Jáanocaiñeno iri. ñnori, —daide.

<sup>28</sup> Jira Tomás uai ote:

—¡Cue Ocuíraima! ¡Cue Juziñamui! —daide.

<sup>29</sup> Jira Jesús daide:

—Tomás, ja cuena cíonamona ñnotio. Jamánomo ióbidino cuena cíóñedino íadi ñnotiaioi, —daide.

*Bibénico nibái mei cuega*

<sup>30</sup> Bífuiái baímo Jesús aillo jiáie cíofinina raa ie llófuegamaci uícori finode. Aféfuiaí bibénicomó cúeñega. <sup>31</sup> Mei íadi ja bie llogáuai cuega, Jesús Crístonana omoi ñnollena; daje izói afémie Juziñamui Jitona omoi ñnollena. Ua jae cuega, omoi ñnuamona cáailino ómoimo ie mámecido íllena.

## 21

*Jesús siete diga ie llófuegamacimo cíocaide*

<sup>1</sup> Afe mei Tiberias jorai fuédamo Jesús ie llófuegamacimo meine cíobicaide. Bie izói cíocaide. <sup>2</sup> Ie llófuegamaci dáanomo itíaiioi. Dinó ite Simón Pedro, Tomás nímie jiáifodo mameina Guarámie, Galilea jofue Caná ímie Natanael, Zebedeo jító íaillinoi, jiái mena llófuegamie diga. <sup>3</sup> Simón Pedro íaioina daide:

—Fácuaidicue, —daide.

Jira daidíai:

—Mai nana cai fácuaili, —daidíai.

Iemo nocáe eromo caifo jáidiai. Afe naio chámuniaina oñediai. <sup>4</sup> Jítiramo monáiacademo, Jesús ja jorai fuédamo náidaide. Mei íadi “Jesús” daifñediai, llófuegamaci íena íai onóñena jira. <sup>5</sup> Iemo Jesús daide:

—Omoi, ¿chamuna oñédiomoi? —daide.

Uai otíai:

—Jii, oñédicai, —daidíai.

<sup>6</sup> Jira Jesús afémacina daide:

—Nocáe nabézimo llóiji omoi dota, afe llóijimo jíiteza, —daide.

Jira daif finódia. Ie finuamona llóijina jáinoimona caifo zonónidiai, iere aillo chámuniái illaza. <sup>7</sup> Iemo Jesús izíruiga llófuegamie Pédrona daide:

—¡Baie cai Ocuíraima! —daide.

Simón Pedro, Jesús ite dáinana cacáillano, ie jínofecuiro jítade, nauí duiñoa jira. Jítanona jóraimo tícacaide Jesumo jaillena. <sup>8</sup> Jái llófuegamaci chámuna oruítaga llóijina oni zocana nocaedo uitíai. Afe mei afémaci jorai fuédamo dúcidia, nai are íai iñena jira. Afémaci cien metros dinó bai itíai. <sup>9</sup> Eniemo dúcillano, chamu pan diga iraimo ruícana ciódia. <sup>10</sup> Jesús íaioina daide:

—Jae omoi oga chámuniaimona atiri, —daide.

<sup>11</sup> Simón Pedro nocaemo jaillano, afe llóijina ari guamáemo zote. Ja ciento cincuenta y tres jéerie chámuniaina oruítaga, mei íadi afe llóiji cuáifñede, nñ aillo chámuniái illa íadi.

<sup>12</sup> Iemo Jesús íaioina daide:

—Mai omoi güizáibiri, —daide.

Llófuegamacimona buna ¿Búdio? daifñide. Afémie Ocuíraimana onódiaiza. <sup>13</sup> Ie mei Jesús ánozillano afe pan llínota íaioimo fecade. Daje izói chámuna fecade.

<sup>14</sup> Daif Jesús tíllanomona meine abido cáadimiena jáillamona dacaiñoámani ie llófuegamacimo cíocaide.

### *Jesús Simón Pédro mo úrite*

<sup>15</sup> Güilla méifodo, Jesús Pédro mo jicánote:

—Jonás jító, Simón, ¿baimaci baimo cuena izíruitio? —daide.

Pedro uai ote:

—Jii, Ocuíraima, ona cue gáinana onódio, —daide.

Jesús íena daide:

—Mei jira cue ovéjatiruai o ecari, —daide.

<sup>16</sup> Jesús meine dáanomo íemo jicánote:

—Jonás jító Simón, ¿cuena izíruitio? —daide.

Pedro uai ote:

—Jii, Ocuíraima, ona cue gáinana onódio, —daide.

Jesús daide:

—Mei jira cue ovéjaiai uíñori, —daide.

<sup>17</sup> Ja dacaiñoámani Jesús meine abido íemo jicánote:

—Jonás jító Simón, ¿cuena gáidio? —daide.

Pedro jae zúucaide, Jesús bie íraicaiño íena gáinana jicánua jira. Jira íena daide:

—Ocuíraima, o nana onódioza. Ona cue gáinana onódio, —daide.

Jesús íena daide:

—Mei jira cue ovéjaiai o ecari. <sup>18</sup> Uáfueña ona dáitícue, iere o jítócomena llezica, jaca o comeci jítaina izói iníroina jítafiredio. Daje izói nana o jáiacananomo jáifiredio. Mei íadi o

eímaille llezica o onoi oni zítaitio, jiáimie o inícuiro jitátallena, daje izói jiáimie o uíllena o jáiacañenanomo, —daide.

<sup>19</sup> Afe dáinado Pedro nie izói tíitena Jesús daí onótate. Afe ie tílledo Juzíñamuimo ñue ebírenafue nítaite. Ie méifodo íena daide:

—Cuedo biri, —daide.

*Izíruiga llófuegamie*

<sup>20</sup> Pedro gírecaillano Jesús iere izíruiga llófuegamie Juaana ciode. Afémie óodana bíllana ciode. Afémie nauí íraicaiño güilláruido Jesús abímo ráiidimie. Afémie, “Ocuíraima, ¿bu o fecalle?” daidímie. <sup>21</sup> Pedro Juaana ciona llezica Jesumo jicánote:

—Ocuíraima, ¿báimie nie izói iite? —daide.

<sup>22</sup> Jira Jesús uai ote:

—Afémie cue billíruimo caadi cue óiacaia ¿ómona mei nibai? O cuedo bi, —daide.

<sup>23</sup> Jira Jesús jaináidinori taino daináfuena fidíbicaidiaioi. Afefue daide, “Bie llófuegamie tííñeite.” Mei íadi Jesús afémie tííñeiteza daíñede. Fia dáideza, “Afémie cue billíruimo caadi cue óiacaia ¿ómona mei nibai?”

<sup>24</sup> Bímie llófuegamacimona aféfuiai uáfuena llotímie. Aféfuiai cuetímie. Afémie daina uai uáfuena onódicaiza.

<sup>25</sup> Jesús jiáie finócafuiái nai aillo ite. Nana aféfuiai dámierie cúeiai jamánomo aillo rabénicuaína zúite. Ua nibai afe rabénicuai jónellino nániena báíñeite. Jae nie.

## JESÚS ORÉCAMACI FINÓCAFUIAI Los Hechos de los Apóstoles

### *Ñuera Joreño billifue uícodo llogáuai*

<sup>1</sup> Cue izíruiga Teófilomo nane omo cueticue. Cue nánoidibemo nana Jesús bie éniemo illa llezica nanómona ie llogáfui ai ie finócafui ai diga omo cueticue. <sup>2</sup> Ua ie monamo jáillarui mo finócafui ai cueticue. Nai monamo ie jáiñena llezica ie orécamacina nizede. Níziano Ñuera Joreño do íai oina llote nie izói finóllena. <sup>3</sup> Ie tílla meífodo, Jesús dáamie cómena íai oimo cíocaide. Cuarenta dígarui uáfori cíocai firede. Afe cíonauedo ie cáanano ñue uáfue na daiítate. Afe llezica Juziñamui illáimana illíruido íai oimo úrite. <sup>4</sup> Orécamaciri illa llezica, Jesús íai oina rairuide Jerusalem na oni jáiñe illena. Iai oina daide:

—Cue Moo uafue uai llote: “Ie Ñuera Joreño ómoimo fecáacade.” Afe fecállirui omoí úiñori, nauí ómoimo cue llua izói. <sup>5</sup> Uáfue na Juan fia jáinoido báutizade. Mei íadi íanori íllamona Ñuera Joreño óti omoí, —daide.

### *Jesús caifo monamo jáillafue*

<sup>6</sup> Jesumo gairíllano jicánotiai oí:

—Ocuíraima, ¿ua birui Israel nairai illáima illena meine caimo itátaitio?

<sup>7</sup> Jira Jesús uai ote:

—Moo afefue finóllirui ómoimo ónonide. Dama afémiemo ríino afefue finóllena ite. <sup>8</sup> Mei íadi Ñuera Joreño ómoimo bíadi, ríino óti omoí. Iemona cuedo úrizaitio moí, ua Jerusalem, nana Judea éniemo Samaria énie diga. Ua jamánomo jica ite itínuiamo llujitio moí, —daide.

<sup>9</sup> Daií daína meífodo, nana íai oí éroillamo, afémi caifo ráiñuano monamo uiga. Iemona ero úillie íena ferínote. Iemona jaca íena cíóñedia oí.

<sup>10</sup> Jesús caifo jáidemo monamo eróioidia oí. Afe llezica mena come úzecuiro jítada íai oí abimo cíocaide. Juziñamui abi íaillinoí.

<sup>11</sup> Daídíaillinoí:

—Galilea ífñiai, ¿nibái mei monamo eróioidia omoí? Dámie Jesús, afe ómoimona caifo úilliedo jáidimie, afémi ie jáillana omoí ciona izói daje izói meine ana biite, —daide.

### *Judas meifo méidollena Matías nizédia oí*

<sup>12</sup> Ie mei Olivo ídumona oni jáillano abido Jerusalem bitíai oí. Jerusalem áinori afe idu ite. Ua ocózinairuido macácana jailla daa kilómetro dieze izói ite. <sup>13</sup> Afe jófue mo dúcillano caifófe como íai oí ífirenenomo jáidia oí. Bie íai oí máme ciai: Pedro, Santiago, Juan, Andrés, Felipe, Tomás, Bartolomé, Mateo, Alfeo jító Santiago, Iere Járidotimacimo dúidimie Simón, Santiago ama Judas. <sup>14</sup> Nana afémaci dáanomo gairífredia oí Juziñamuimo úrillena. Afénomo Jesús ámatiai gairífredia oí, ie ei María diga naa jáie ringóni airi.

<sup>15</sup> Aféruillaido Pedro afe ámatiai daínamací cígiri caifo náidaillano úrite. Afe ámatiai ciento veinte dígamiede. Afémacina daide:

<sup>16</sup> —Amatiai, Ñuera Joreño Cuegáuaimo Davido llote: “Judas meifo cai cígiri méidolle jítáirede,” daide. David cuegáu ai uícodo llote: “Judas Jesús lláitaitimací ífoite.” <sup>17-18</sup> Mei jii, afe Judas dani cáimona. Bie cai táijina afémi dibénemo ite. Mei íadi afe meífodo cimoí cúinano ágüicaillano caifona ífo dinena éniemo baíde. Baiíllamona ie jebe bójicaide. Afemona nana ie eromo itínui ai jino cocide. Afe mei ie fiénidifue iba úcubedo ja ie



raillíbiri ibádiaioi. <sup>19</sup> Jerusalén itímaci áfena íaioi fídiano, afébirina “Acéldama” jitádiaioi. Afe mámece íaioi uaido dibénedo “Die illábiri” dáiacade.

<sup>20</sup> Mei jírari Salmos ibénicomo daí daide:

Daí o jofo zóofefiteza

Buna afécomo íñeilleza.

Jiáífuedo daide:

Afémie táijina jiáima ólleza,

—daide.

<sup>21</sup> Cai Ocuíraima Jesús nana cai diga illáruillaído cairi macádino birui cai cígimo itíaioi.

<sup>22</sup> Jesús báutizaruimona, ie monamo jáillaruimo cairi jáicadiaioi. Mei jira afémacimona dáamie cai dájellena jitáirede, Jesús meine abído cáaillafuemo uai nabáillena.

<sup>23</sup> Jira daínamacimona mena come oni naidánetaioi. Dáamie daámami mámeceirede: José Barsabás Justo. Jiáimie Matías. <sup>24</sup> Ie mei Juzíñamuimo úritiaioi; daidíaioi:

—Cai Ocuíraima Juzíñamui, nana comini comeci onódimedioza. Bíaillinoimona o nizécamie caimo onótari orécamie táijina finóllena. <sup>25</sup> Afe táijnamona Judas ie fiénidifue ícoinia oni baíide. Baiíllano dama ie zefuinaillinomo jaide.

<sup>26</sup> Iemo onótaraji dotádiaioi. Jae Matíasmo níjide. Afe llezícamona afémie once orécamiimo dájena jaináicaide.

## 2

### *Ñuera Joreño billafue*

<sup>1</sup> Pentecostés irui ráfuemo jae dúcide. (Afefue güille jofo óinarui rafue.) Afe rafue dúcidemo jae nana dáanomo gairídiaioi. <sup>2</sup> Ie mei rairéficana minica izói ficire monámona cácaicaide. Jairifo riire jáiñua izói cácaicaide. Nana íaioi ráinaco eromo cácaizaibite. <sup>3</sup> Iemona ífiaí izói iráiciaí íaioimo cíocaide. Nana illa dígamierie íaioimo níjizaibitiaioi. <sup>4</sup> Afe llezica nana Ñuera Joreño úcaigaiaioi. Iemona jiáie náiraiaí uáillaído como úritiaioi; mei afe Ñuera Joreño íaioi úritade.

<sup>5</sup> Aféruillaído Jerusalemo aillo judúuai náganuaimona bitíaioi. Ua íaioi Juzíñamuimo jitáirede finóllifuaí finuaibitiaioi. <sup>6</sup> Afe riire ficirenana cacáillano comini dáanomo ofídiaioi. Nñe izói comeci fácana onóñediaioi nágazie dani íaioi uáillaído íaioi cacana jira. <sup>7</sup> Abi fáigacaidiaioi; daidíaioi:

—¿Nana bie úriraini Galiléamona bitímaci; uáfueñede? <sup>8</sup> Nágamierie dani cai uaido íaioi úrillana ¿ñie izói cacáfiredicai? <sup>9</sup> Benomo nágaziai ite: Partía imaci, Media imaci, Elam imaci, Mesopotamia imaci, Judea imaci, Capadocia imaci, Ponto imaci, Asia énie imaci, <sup>10</sup> Frigia imaci, Pamflia imaci, Egipto imaci, Africa illánie Cirene batífenemona bitímaci diga. Afe dáanomo áinori ite romano imaci gairídiaioi. Bie románomana dáarie judíona jococa. Jiái romano imaci judúuai Juzíñamuimo ínuaifuena jeire otíaioi. <sup>11</sup> Afe llezica Creta imaci bitíaioi Arabia imaci diga. “Mei íadi Juzíñamui caimare llogáfuaí ñue finócafuaí diga, nágamierie dani cai uáillaído cacádicaí,” daidíaioi.

<sup>12</sup> Nana fáigacaidiaioi. Iaioi comeci fácana onóñediaioi; jira jicánotiaioi:

—Nana bie caimo comuídifue, ¿ñie izói caina daíacade? —daidíaioi.

<sup>13</sup> Mei íadi jiámaci íaioi uai áfeduano daidíaioi:

—Bimaci jifáidiaioi, —daidíaioi.

### *Comínina Pedro daínafue*

<sup>14</sup> Ie mei Pedro once diga orécamaciri nádaillano comínimo riire úrite; daide:

—Judea comini naa Jerusalemo itínuaíri cácarei. Bie ráfuena omoí onoiri. Dáitícueza ñue omoí cacáreiri. <sup>15</sup> Bie íñiaí jifáíñedimaci omoí comeci faca ízoí. Jitoma nai fuiri

dáidemo. Jítiramo dibénemo comini jaca jifáifinidiaioi. <sup>16</sup> Bifue jáiáfodo ite. Afe bifue uai lloraíma Joel jaiái uícodo llogáuai. Afémie daide:

<sup>17</sup> Juzíñamui ómoína daide:

“Íraíruiillaído cue Joreño nana náiraíaina, jainoi tua izói fáicanocaiñeno íaíoína úicaitaicue.

Omoi jítótiai jízatiai diga cuedo úritiaioi.

Jitócomini nicaído ciónafuiai izói cíotiaioi.

Einamací ñuera nicaído nicáiritiaioi.

<sup>18</sup> Aféruillaído cue Joreño cue táijitagamiaina naa cue táijitaga ringóniári ñue úicaitaicue.

Iemona cuedo úritiaioi.

<sup>19</sup> Caifo monamo jacínaitadinona cíotaiticue;

Aféruimo ana éniemo onótajafuena fínoiticue.

Afe onótajafue díena cíotaite; iraina cíotaite, jamánomo irai úilliena cíotaite.

<sup>20</sup> Afe monado jitoma jítireficaite, fíui die izói jáite.

Daí iite cai Ocuíraíma Jesucristo billíruimo nai dúciñenia.

Afémie billírui iere ebíreitirui.

<sup>21</sup> Nana Juzíñamui íaioi canóllena íemo jicádino jíllobicaitiaioi.”

Aquíe izói Juzíñamui Joeldo daide.

Iemo Pedro nai úrillano daide:

<sup>22</sup> ‘Mei jii, Israel nairai cue daiíllifuemo cácarei. Nazaret ímie Jesús omoi uícori Juzíñamui ñue facácamié. Uafue aillo fáigatate ráaniaído ñue facátaga. Daí Juzíñamui omoi cígiri afémiedo finode. Aféfuiaína ñue fidídiomoíza. <sup>23</sup> Mei íadi afémie omoi fecálliruimo maiáno uitá fatíomoi, Juzíñamui jaiái uícodo comécitífuiái onótafuiai diga daina izói. Uafue fiénidimacido íena coráitatomoi. <sup>24</sup> Mei íadi Juzíñamui afe tílla cuinaca raa zuita izói, zúitano íena meine cáatate. Mei tíllafue jaca íena anáfenonide. <sup>25</sup> Mei illaíma David Jesudo úrillano daide:

Ocuíraímana cue uíécori cíófiredicue.

Afémie cue nabézimo izói ite, minícana cue jáicaiticue.

<sup>26</sup> Ie jira cue comeci cáimafuena iere ite, afe llezica cue fuemo ite cáimafuiaído úriticue.

Afe jira daje izói cue íeizi ñue ocózinaitaiticue, mei tíllamona meine cue abina cáataitio.

<sup>27</sup> Mei jii cue joréñona tídinomo fiénocaiñeitio.

Afe izói o izíruiga táijitagamié abi rifáillana ráiruitio.

<sup>28</sup> Cáatatinomo jóoide io cue llófuetio.

Cue diga o íllado, cáimafuena cue oruítaitio, —daí daide David.

<sup>29</sup> ‘Amatiai, cácarei. Cai jáiairagíma David tíide raiga uáfodo onórede. Afe raíafó nai cai diga íteza. <sup>30</sup> Mei afe David uai llóraíma. Jaiái Juzíñamui uícodo uafue llóllena ráifuedo íena daide:

—O emódoidiziemona dáamié Cristoite. Afémie o illáimana illánomo ráinaite, —daide.

<sup>31</sup> Jira daí David, uícomo ciona izói Cristo meine abido cáailafuedo úrite. Afe izói daide:

—Cristo joreño tídinomo fiébiñeite. Ie íeizi rifáillana rairuícaza, —daide. <sup>32</sup> Mei jii Juzíñamui afe Jesuna meine abido cáatate. Aféfuemo nana cai uai nabáiraímacidícaí.

<sup>33</sup> Daí Juzíñamui nabézimo Jesús naidánega; naidánia meífodo Móomona uícodo lloga Ñuera Joreño fecállifue llínote. Llínuana nana bie omoi ciona, omoi cacana raa finode. Nana aféfuiai afémiemona bite. <sup>34-35</sup> Mei David monamo jáíñedimie, mei íadi dama David daí daina:

“Caifoide Ocuíraíma cue Ocuíraímana daide:

—Cue nabézimo rainai, o éoidino cue anáfenolliruimo, —daide.”

<sup>36</sup> ‘Nana Israel nairai, mai comeci jizíñeno omoi onoiri: bie omoi coraíca Jesús Juzíñamui Ocuíraímana itátate: Crístona itátate, —ací dinó Pedro daide.

<sup>37</sup> Aféfuena cacáillano, iere comeci llícitagaiaioi. Afemona Pédro mo jicánotiaioi jiáie orécamaci diga:

—Amatiai, ¿ñie izói ñéiticaí?

—daídíaioi.

<sup>38</sup> Ie jira Pedro uai ote:

—Omoí illafue Juzíñamui uiécomo meídori. Omoí nágamierie Jesucristo mámeçido báutizatari. Omoí íaifuaí oni dófilleza. Daí Juzíñamui ie Ñuera Joreño ómoína úcaíteza.

<sup>39</sup> Afe bie úcodo llogáuai ómoie. Daje izói o jítotíai ie. Daje izói nana jícarié itino ie; ua aféuai nana cai Ocuíraíma Juzíñamui uáidogamací íena, —daíde.

<sup>40</sup> Aféuailaído dáanomó jiáie uáillaído Pedro íaíoi lluanó daíde:

—Bie duere finóbitimacimona omoí jíllóiri, —daíde.

<sup>41</sup> Mei daí afémie úrilla uaina jeire otino diga báutizagaiaioi. Aféruído Jesumo ínotimacimo tres mil dígamíai dáaziéna jáinacaidiaioi. <sup>42</sup> Nana bimaci orécamaci llófuaífuemo jáícina jáidiaioi. Afe daí conímamo ñue coméçidiaioi. Afe llezica Juzíñamuimo úrifrediaioi, ie mei gairíllano Jesús jae íraícaíño güilla izói finódiaioi.

### *Nano fueñe ínotino illafue*

<sup>43</sup> Aféruillaído nana jáicaidiaioi; mei aillo cíóraininafuiaí naa onótate raa diga orécamaci finódiaioiza. <sup>44</sup> Jae nana ínotino ñue dájena itíai, íemona íaíoi ráaniaí conímamo jeruíñeno ífirediaioi. <sup>45</sup> Mei jí íaíoi illábiri jiáie ráífide raa diga fecádiaioi. Fécanona afe úcube nágamíai imaci jitailla izói jofo conímamo fecáfirediaioi. <sup>46</sup> Nágaruillaído gairíracomo gairídiaioi. Íaíoi jófuemo pan fécano dáanomó cáimafuedo, comeci mánainafuedo güitíai. <sup>47</sup> Juzíñamui íóbitaoidiaioi. Afe llezica nana comíni afémacimo ñue coméçidiaioi. Afe daí cai Ocuíraíma nágaruío afe ínotimacimo jiáie jíllóizaíbitimaci dáamacina itátate.

## 3

### *Aídaima jíllotate*

<sup>1</sup> Jáíruido jítoma ana ítemo Pedro Juan diga gairíracomo jáidiaillinoi. Afe Juzíñamuimo coméçido úrioina llezica. <sup>2</sup> Nágaruillaído jocóinamona aídaima dínomó ífiredé. Ie comíni gairíracomo íena úifrediaioi. Uillano afémiena nazemo ie ráinaífirediaioi, jofo jáíoidinomona dúecaillano fecaca úcube jícalléna. Afe naze mámeçí Ebíredize. <sup>3</sup> Aídaima Pedro Juan diga gairíracomo jofo jáillana cíóillano dúecaillano fecaca úcube íaillinoimona jícade. <sup>4</sup> Mei jira Pedro Juan diga íemo érocaidiaillinoi. Pedro íena daíde:

—¡Caimó éroçai!

<sup>5</sup> Íemona afémie náicaide. Comeci anado daíde: “Ñíbaí mínícana cue íite.” <sup>6</sup> Íemo Pedro íena daíde:

—Cue úcubenídícue; óronídícue; mei íadi cuemo ítena o íítícue. Nazaret ímie Jesucristo mámeçido náídacai. Maca, —daíde.

<sup>7</sup> Íemo Pedro onoí nabézido íena naídánete. Afe daí finua llezica ie ídaí maíríbicaide, ie ídáçoiñuaí diga. <sup>8</sup> Íemona aídaima caífo tícacai. Caífo náídaillano macade. Afémie íaillinoído ja jofo gairíracomo jaide. Tícaticacana jaide. Juzíñamuimo íóbitaíde. <sup>9</sup> Nana comíni ie mácana cíódiaioi. <sup>10</sup> Aferi iere jáçinaífícaídiaioi naa abí fáigacaíllafue diga, afémie daí náídacaíllari. Afémiena onódiaioiza. Afémie Ebíredize mámeçiredízemo ráíífredímie, gairíracomo úcube jíçáfiredímie.

### *Pedro comínimo Salomón jinófenemo macáranomo llófuete*

<sup>11</sup> Jíllotaga aídaima Pedro Juan diga íaillinoído níjiníçicaide. Aféfuéri fáigacaíllano nana comíni gairíracó díbenemo jáidiaioi. Salomón jinófenemo macáranomo Pedro, Juan,

aídaima diga illánomo afe comini aizícana jáidiaioi. <sup>12</sup> Pedro áfena cíoillano comínina daide:

—Israel nairai, cácarei. ¿Omoi minícari fáigacaidiomoí? ¿Nibái mei cócomo eróizabitioí? Bie iima dama coco ríinodo jíllotano macátaticoco, nibai daí comécido daidíomoí. Daje izóí coco Juzíñamuimo ñue comécinafuedo afefue finódicoco, daí nibai cócona comécido daidíomoí. Iadi aféfuiaido finóñedicoco. <sup>13</sup> Mei íadi jíáifodo joide. Cai jáiiragima Abraham, Isaac, Jacob diga, íaioí Moo Juzíñamui ie Jitó Jesumo baimo ñuefuena nitade. Afe Jesús ríimacimo omoi fecácamié. Pilato ie zuitáacana llezica áfena ráiruitioíza. <sup>14</sup> Aféruído jáícina nífuenidimie zuitátajana jícañediomoí, mei íadi jíáifodo jícadíomoí. Come fatímie zuitátatiomoí. <sup>15</sup> Afe daí cáatatiño fecádimie titádiomoí. Mei íadi Juzíñamui afémiena tíllanomona meine abido cáatate. Aféuemo uai nabáiraimadicoco. <sup>16</sup> Bie dáamié Jesús mámecido, ie mámecimo ínuafuedo omoi ciona, omoi onoíga aídaima jae maíribicaide. Afe Jesumo ínuafue íena ñue jáícina jíllotate, omoi uiécomo cíocaidimie illa izóí.

<sup>17</sup> ‘Amatiai, onódicueza, mei omoi naa omoi illáiniri Jesuna fáiacana llezica omoi finócafueña onóñeno íena fatíomoí. Uáfueña omoi finócafueña onóñenano finódiomoí. <sup>18</sup> Mei íadi Juzíñamui ie uai lloráimado uícodo daina uai bie izóí fuitade. Aféuai daide: “Ie Cristo duere zefuillifue jítaírede.” <sup>19</sup> Mei ie jira omoi mácafuiai méidori. Omoi illafue Juzíñamuimo ñue jáícina jóoneri. Omoi íaifuiái oni muiñólleza. Iemona cai Ocuíraima Jesús caina cánuafuiái mánainaruillai izóí caimo orérede. <sup>20</sup> Aféruimo nano uíecodo ómoíena mamécamié Jesucristo Juzíñamui óreite. <sup>21</sup> Mei íadi birui Jesucristo monamo fiébirede, Juzíñamui naga rafue jáícina nai jóoneiñeilleza. Afe daí jáiáidiruillaimo ite ñuera uai lloraini daidiaioi. <sup>22</sup> Mei daí Moisés cai jáiiragimana daide: “Cai Ocuíraima Juzíñamui omoi ámatiaimona nahí uai lloráimana ómoímo óreite, Juzíñamui cue ória izóí. Afémie ómoína nana daínáfuiai jeire omoi oíri. <sup>23</sup> Mei afe uai lloraima daínana jeire oñédino Israel náiraimona oni táinocaite. Uáfueña íficaite.” Daí daide Moisés.

<sup>24</sup> ‘Mei daí nana uai lloraini, Samuélmona batine ite lloraini diga bie íirairuillaido úrite. <sup>25</sup> Juzíñamui ie uai lloráinido uícodo daínauillai ja birui ómoíri jino llotátaga. Juzíñamui cai jáiáiragimacimo íbana ñuera raa finóllifue llote ñue omoi íllena. Afefue Abrahamo llote. Daide, “Nana énie nairai o emódomo comuídinodo ñue caimare íficaitiaioí,” daide. <sup>26</sup> Mei Juzíñamui ie Jitó caata meífodo nano fueñe ie Jitó ómoímo orede caimare omoi íllena, ómoímona nágamíai ie íaifue fáicanocaillena, —daide.

## 4

### *Pedro Juan diga ríiredino uiécomo uíga*

<sup>1</sup> Pedro Juan diga nai comínimo úrioidemo, lletáiraini gairíraco úíñotino illaíma diga bitíaioí. Daje llezica saduceo comini bitíaioí. <sup>2</sup> Pedro Juan diga comini llófuetaíllinoí. Iaióina daide: “Comini tíllanomona cáatafue Jesudo ácataga.” Daí llófuiari como bitímaci ríicaidiaioí. <sup>3</sup> Iemona íaíllinoína llaitádiaioí. Llátano íaíllinoína llavéracomo jítiramoidiruimo íbáidiaioí, ja nauízaiílla jira. <sup>4</sup> Mei íadi aillo afe úrillauai cacáidino ínotiaioí. Afena ínotimaci dani ííñiai facádua cinco mil áinomo dúcide.

<sup>5</sup> Afe jíáiruimo Jerusalemo judíuai íllaini, éinamaci, naa ocuífue llófueraíniri gairídiaioí. <sup>6</sup> Afe llezica afénomo lletáiraini illaíma Anás ite. Afe dánomo ite Caifás, Juan, Alejandro naa lletáiraini íllaini comíniri. <sup>7</sup> Iemo Pedro Juan diga atítatiaioí. Atiano íaioí cígimo naídáneta jícanotiaioí:

—¿Nie ríinodo bífuiai finódiomícoí? ¿Bu mámecido bífuiai finódiomícoí?

<sup>8</sup> Mei jira Pedro, Ñuera Joreño úicaigamienaza daide:

—Nairai illaini, Israel éicomini, omoi cácarei. <sup>9</sup> Mei afe baie iráredimie como finoca ñúefuena jicánotiomo. Mei ñie izói afémie jíllotaga daií daidíomo. <sup>10</sup> Mei jira omoi uiécomo jino uáfodo llóiticoco, nana Israel nairai fidíillena. Afémie omoi uiécori Nazaret ímie Jesucristo mámeceido, omoi coráicamie mámeceido íocire ite. Afe coráicamie (Jesucristo) tíllanomona Juzíñamui meine abido cáatate. <sup>11</sup> Bie Jesús omoi jofo níraini oni dotaca jofocai izóidimie. Mei íadi afecai uálliraina jázaide. <sup>12</sup> Nie jíáimie jíllonafue íñede. Jesucristo jíáie daiítade jíllotaraimana caimo íñede, afémiedo cai jíllloillena. Ua nana éniemo daiítade jíllotaraimana íñede, —jaca dinori Pedro daide.

<sup>13</sup> Iemona ríimaci Pedro Juan diga méaicaiñeno úrillafue cacáillano, íaillinoi llófueñegaiaillinoi íllana fídia lezica, iere fáigacaidiaioi, jamáimieillinoi illa jira. Iemona ríimaci bíaillinoi Jesudo macádino daií íaillinoimo úbicaidiaioi. <sup>14</sup> Afe emódomo jíllotaga aidaima dinomo íaillinoi abiri naidaide. Ie jira aféfuena jáanoicana daiínide. <sup>15</sup> Mei jira gairídinomona íaillinoina oni orédiaioi, daní jofo conímamo íaioi úriacana jira. <sup>16</sup> Daidíaoi:

—¿Bie íima íaillinoina nie izói ñéiticaí? Mei jí, nana Jerusalemo bitino bie cíorainina onótate raa íaillinoi fínua fuena onódiaioi; mei aféfuena jáanonidicaí. <sup>17</sup> Mei íadi mai íaillinoi cai jácidolle, afefue comínido jamánomo jalléíñellena. Afedo íaillinoina ráiruiticaí, Jesús mámeceido ja benómona batine úriñeillena, —daidíaoi.

<sup>18</sup> Mei jira íaillinoina jíiritiaioi. Iaillinoi dúcidemo ocuídiaioi:

—Jesús mámeceido jí mai due jiza úriñeno iri. Afe daií llófueñeno iri, —daidíaoi. <sup>19</sup> Mei íadi Pedro Juan diga uai ote:

—Juzíñamui uiécomo ní fue baímo ñuena comecei omoi faca: omoi na ñue cai cacárellena, níbai jíáifo Juzíñamuina ñue cai cacárellena. <sup>20</sup> Mei jí cai cíonafue cai cacánafue diga aféfuemo úrillana fáicanidicaí, —daide.

<sup>21</sup> Mei jira ríimaci íaillinoina jácidotiaioi. Ie mei íaillinoina zuitádiaioi. Iaillinoi duere finóllifue baiñédiaioi; nana comíni afe fínua jira Juzíñamuimo íobioidiaioiza. <sup>22</sup> Afe cíoraininafuedo jíllotaga aidaima, afémiemo cuarenta fimona baímo ite.

### *Ínotino méaicaiñenafue comecei ríino diga jicádiaioi*

<sup>23</sup> Pedro Juan diga íaillinoi zuitaina mei íaillinoi nabáíñiaí illánomo jáidiaillinoi. Dinomo afémacimo nana lletáriraini illaini éinamaci diga íaillinoina dánana llotíaillinoi. <sup>24</sup> Aféfuena cacáillano nana dánomo Juzíñamuimo úritiaioi. Daidíaoi:

—Cai Ocuíraíma, O Juzíñamuina; mona, énie, monaillai naga ráaniaíri finódimiedio. <sup>25</sup> O Ñuera Joreñodo, o tájítagamie Davido daidío:

¿Níbaí mei náiraiaí caillioidiaioi?

¿Níbaí mei comíni tánofuiaímo comecei facádiaioi?

<sup>26</sup> Enie illaini Juzíñamuina íe Cristo diga anáfenuaíbitiaioi.

Daje izói jofue illaini Juzíñamuimo ofídiaioi íe Cristo diga áfedo afémiemo fuiríllena, —daide.

<sup>27</sup> Uafue bie jófuemo Herodes, Ponico Pilato diga o ní fuenide Jitomo fieni gairídiaioi. Aféno mo jicánemaci Israel comíniri fieni gairídiaioi, mei íadi omo jaináidimie Jitó illáimana ja jáitatio. <sup>28</sup> Afe fieni íaioi gairíllafuedo nana o uícomo uaido finócafuaímo dánana finódiaioi. Afe daií íficaillena jíáiretadio. <sup>29</sup> Cai Ocuíraíma Juzíñamui, mai birui cai íaioi jáciduamo eroi. Jae o tájítagamacidicaí. Afemona ñue méaicaiñenafue caimo fecari, o úrillauai jino jácicaíñeno cai llóllena. <sup>30</sup> Afe llezica omo ite rínodo comíni íaioi dúicomona ñue jíllotari. Afe izói o ní fuenide Jitó mámeceido cíorainina onótate raa finori, —dinori daidíaoi.

<sup>31</sup> Juzíñamuimo íaioi úrilla fúillamona afe íaioi gairíllano docáiricaide. Afe llezica nana Ñuera Joreño úcaigaiaioi. Iemona Juzíñamui úrillauai méaicaiñeno jino llotíaioi.

*Inotimaci íaiói ráaniaina jeruñeno “Nana caie” daidíaiói*

<sup>32</sup> Afe aillo iráica inotimaci dáaziena nana ñue jaináidiaiói. Ua daje izói dájemo comeci facáoidiaíoi; daje comeci jitailla uai íaiói mo ite. Buna afémie ráaniaina “Dama cueie” daíñede, mei íadi nana comini íaiói ráaniaina “Nana caie” daidíaiói. <sup>33</sup> Orécamaci Ocuíraima Jesús cáanafuemo aillo rínodo uai nabáoidiaíoi. Juziñamui nana cominina iere caimátaitade. <sup>34</sup> Iaiói cígiri jitairedena ráanidimie iñede. Nana íbácana énieredino jofóredino diga áfeniaí fécano afe oga úcube atídiaiói. <sup>35</sup> Atiano orécamacimo izájidiaiói. Iemona orécamaci nágamierimo íaiói jítaina dieze fecádiaiói. <sup>36</sup> Afe izói íaiói cígiri Leví izíe ímie finode. Afémie mámece José. Monáillai zafedu Chípreno jocócamie. Orécamaci íena jíáie mámece jitádiaiói. Afe mámece Bernabé daína Fíradimie. <sup>37</sup> Afémie ie illánie fecade, fécano afe íba úcube orécamacimo izáíbite.

## 5

*Ananías Safira diga finoca íaifue*

<sup>1</sup> Mei jíáimie Ananías, ie aí Safira diga, daa illánie fecádiaillinoí. <sup>2</sup> Bímie nano baa nieze úcubena jeruide. Jíáie dájeze úcubena nana ñue ite ízoi orécamacimo izájide. Aféfuena ie aí nana ñue onode. <sup>3</sup> Jira Pedro íena daide:

—Ananías, ¿níbái mei Taife o coméceina féitate, Ñuera Joreño taino o llóllena? ¿Níbái mei o illánie nano nieze feca íba úcubena abímo maíñódio, daí jífueridio? <sup>4</sup> ¿Nano fueñe afe énie óieñede? Jii, óie. ¿Afe o fécaja mei afe úcube óieñede? Jii, óie. ¿Níbái mei daí afe finóllena comeci facádio? Comínimo taino lloñédio, mei íadi Juziñamuimo taino llotio, — daide.

<sup>5</sup> Ie jira áfena cacáillano, Ananías éniemo baíllano tíbicaide. Nana afefue fídiaíbitino iere jacínaitiaíoi. <sup>6</sup> Mei jira nano ba niga jitócomini bite. Ie abí jabínota ie raíájidiaiói.

<sup>7</sup> Afe mei tres horas íllamona Ananías aí jofo bite. Nai ie ini tíllana fidíñede. <sup>8</sup> Jira Pedro jícanote:

—Cuemo llone, ¿afe ómicoí daína dieze afe énie fecádiomico?

Jira afengo daide:

—Jii, áfeze.

<sup>9</sup> Jira Pedro daide:

—¿Níbái mei dáafueritiomico, Juziñamui Ñuera Joreño o íco facátallena? Jino batí o ini raíájidino bitíaíoi. Jabe daje izói ona úitiaíoi.

<sup>10</sup> Afe llezica afengo Pedro anamo baíllano tíbicaide. Jitócomini jofo billano afengo tíllana cíozabítiaíoi. Mei jira jino uillano ie ini abímo íena raíájidiaíoi. <sup>11</sup> Nana Juziñamuimo inotino nana aféfuiaína fidídimaciri iere jacínaitiaíoi.

*Aillo cíorainina raaniaí onótate raa diga*

<sup>12</sup> Aféruillaído comini cígiri orécamaci aillo onótate raa, cíorainina ráaniaí diga finódiaíoi. Nana Salomón jinófenemo macáranomo gairídiaíoi. <sup>13</sup> Buna jíáimacimona íaiói diga daane gairíllana jacírúitiaíoi; mei íadi comini íaiói mo ñue izire comécidiaíoi. <sup>14</sup> Aillo comini ííñiaí ríngóniaí dájeze Ocuíraima Jesucrístomo inuaíbitiaíoi. <sup>15</sup> Uafue jamánomo inotiaíoi. Mei jira íráredino jofo abí íuemo, naa íaiói bíiralluaíri jino bíródiaíoi. Afénomo Pedro áfedo jaille llezica afémacimona nano dámerie, Pedro jana anamo itábicaítiaíoi. Afedo jíllozítiaíoi. <sup>16</sup> Afe llezica aillo áinomo ite jofue comini Jerusalemo bitíaíoi. Iaiói íráredinuiaí atídiaíoi fíénide jóriaído áfedogamací diga. Nana jíllotagaíaiói.

*Ríimaci illaíni Pedro Juan diga duere finóllena llaitátatiaíoi*

<sup>17</sup> Iemona lletáriraini illaíma, afémieoiri ite saduceo imaci iere úradoizaidiaioi. <sup>18</sup> Ie jira orécamacina llaítada afe jófue mo ite llavéracomo ibáizaidiaioi. <sup>19</sup> Mei íadi Juziñamui abi ímie naio llavéraco naze tuizáibite. Jino íaioi uánona daide:

<sup>20</sup> —Gairíracomo omoi jai. Dinomo naidáillano comínimo nana bie comeci cáataite uáillaido úrizairi, —daide.

<sup>21</sup> Aféfuena cacáillano, afe jiáirui monáidacademo jofu gairíracomo jáidiaioi. Jáillano llófuiaide.

Afe llezica lletáriraini illaíma afémie mo itínori, Nahíllaini gairíranomo gairídiaioi. Afe Nahíllaini Israel nairai éicomini. Gairíllano llaveca orécamaci atítatiaioi. <sup>22</sup> Mei íadi llavérraini llavéracomo dúcillano orécamacina baiñédiaioi. Daa fia afefue abido lluaíbitiaioi. Daidíaioi:

<sup>23</sup> —Llavéraco ñue riire ibaide naa naze jinófene úiñotínori eróiediaioi baizájidicai. Mei íadi cai zuitádicaimo afeco eromo buna íñena, —daidíaioi.

<sup>24</sup> Aféfuena cacáillano lletáriraini illaíma, gairíraco úiñoraini illaíma, íemo nanoide lletárirainiri ifo júdaizite; jicánotiaioi:

—¿Bífuiaí ninomo jica jálleite?

<sup>25</sup> Afe llezica daa íima daízaibite; íaioina daide:

—Llavéracomo omoi íbaicogamiaí jae gairíracomo comini llófuetiaioi, —daide.

<sup>26</sup> Iemona úiñoraini illaíma naa llavérrainiri íaillinoi uájidiaioi. Mei íadi duere finóñeno íaillinoina atídiaioi, “Comínina nóñena cai níjite” dainano jacíruitiaioi. <sup>27</sup> Íaillinoi átianona, Nahíllaini uícomo íaillinoina naidánetaioi. Iemo lletáriraini illaíma íaillinona daide:

<sup>28</sup> —Afe mámecido ómicoi llófueñellena jamánomo riire rairuídicaí. ¿Ja minica finódiomicoi? Nana Jerusalén comínimo ómicoi llófuiafuiaí jica jálleide. Afe llezica afe íima tílla ícoínia caimo nitáacadiomicoi, —daide.

<sup>29</sup> Mei jira Pedro jiáie orécamaci diga uai ote:

—Juziñamui uai jeire cai olle comini llogáuai baimo ñuera. <sup>30</sup> Cai jáiairagima Juziñamui Jesuna tíllamona cáatate. Bie Jesús coráirabicimo agüíneta omoi fagámie. <sup>31</sup> Juziñamui caifo monamo uano nabézimo íena rainade. Afe llezica afénomo Illáimana jóonete. Dáanomo Jíllotaraimana jóonete. Daí Juziñamui Israel náiraímo íaioi illafue méidollirui jóonete, íaioi íaífuiaí dóllena. <sup>32</sup> Aféfuemo uai nabáiraímadicaí. Daje izói Ñuera Joreño aféfuemo uai nabaide. Nana ñue cacáredimacimo afe Ñuera Joreño Juziñamui iga, —daide.

<sup>33</sup> Aféfuena cacana llezica, ríicadiaioi. Íaillinoina fáiacadiaioi. <sup>34</sup> Mei íadi ríimaci cígiri fariseo ímie ite. Afémie mámeceí Gamaliel. Afémie ocuífue llófueraima. Nana comini íemo ñue comeciídiaioi. Afémie náidáillano ocuide:

—Nano dáallegoi bimaci oni jiáinomo ui, —daide. <sup>35</sup> Afe ifodo ríimacina daide:

—Israel comini, cacai. Baimácimo omoi finóllifue abí omoi rairuiri. <sup>36</sup> Jiáífuemo omoi úibicairi. Naui nígarui íllamona Teudas dúcizaibite. Dúcillano daide: “Jamánomoidimiedicue. Illáimaiticue,” daide. Iemona cuatrocientos dígamie afémiedo jáidiaioi. Mei íadi íena fatíaioi. Nana afémiedo jáidino ráidozinaidiaioi. Iemona afefue niné táinocaide. <sup>37</sup> Afe mei comini mámeceí cuiájillarui mo, Galilea ímie Judas dúcizaibite. Aillo comini íedo jáidiaioi. Daje izói íena fatíaioi. Afe izói nana íedo jáidino ráidozinaidiaioi. <sup>38</sup> Ie jira bimácina omoi fáicanocai; afémacina áifedoñeno. Mei bifue íñiaí íeza, fuizájite. <sup>39</sup> Mei íadi Juziñamui ífue, táinocaitanidíomoi. Abi omoi rairuiri, Juziñamui diga omoi fuirízaiñelleza, —daide.

<sup>40</sup> Nana jae jiéruificaidiaioi. Mei jira orécamaci jíiritiaioi. Íaioi dúcinamona íaioina zechénotiaioi. Afe meífodo Jesús mámecido úrillana íaioina rairuídicaioi. Afe mei íaioina fáicanocaidiaioi. <sup>41</sup> Orécamaci ríimaci uícomona jino jáidiaioi. Íóbioicaidiaioi, mei Juziñamui íaioimo ñue comeci facáoilaza. Jesudo jainánamona méaífuedo duere zefuídicaioi. <sup>42</sup> Ie

mei nágaruido Jesudo úritiaioi. Afe izói llófueoidiaioi. Gairíracomo, comini jófuedo daje izói llófuiaidiaioi.

## 6

### *Juziñamui uai llotino canórainina siete dígamie mámeciga*

<sup>1</sup> Aféruillaído ínotino aillo jebuíoiaioi. Griego imaci judío imácina zúucaillafuedo jitádiaioi:

—Nágarui güille fécanomo cai fecínguai figo iñégaiaioi, —daídíaioi.

<sup>2</sup> Mei íemo doce diga orécamací nana ínotinori dáanomo iráidiaioi. Iaioina daide:

—Juziñamui úrilla uai jino llófueredícaí. Afena cai fáicanocaillena dani omoi güille cai fecállena figóñede. <sup>3</sup> Mei jira, ámatiai, omoi cígimona siete dígamie nize. Nana comínimona ñue comécidímie izóidena jitaide. Ñue onódimiena jitaide. Ñuera Joreño úicaigamiena daje izói jitaide. Ie mei daítadímiaí güille fecárainina mai jóoneri. <sup>4</sup> Mei cai dani Juziñamuimo comeci facáoiticaí. Afe llezica Juziñamui úrilla uaido llófueiticaí.

<sup>5</sup> Nana aféfuemo ñue comécidiaioi. Iemona Ñuera Joreño úicaigamie Esteban nizédiaioi. Afémie Juziñamui uaina iere ínofiredímie. Daje llezica jíaimiaí nizédiaioi: Felipe, Prócoro, Nicanor, Timón, Parmenas, Antioquía ímie Nicolás, nauí nano afémie judíuai íaioi ínoga uaimo dáafueriacadímie. <sup>6</sup> Ie mei orécamací illánomo afémacina atídiaioi. Atia mei orécamací íaioimo onoi bíitano Juziñamuimo úritiaioi. Afedo güille fecárainina mamécaiaioi.

<sup>7</sup> Iemo Ocuíraima Jesucristo úrilla uai comínido oni móonaioicaide. Jerusalem ínotino aillo jebuíoiaioi. Afe llezica aillo judíuai lletáriraini aféfuemo ínotiaioi.

### *Esteban llaitádiaioi*

<sup>8</sup> Esteban Juziñamui izói ríinoredímie Juziñamui ézicigamie. Ie jira comini cígimo aillo cíorainina raa onótate raa diga finode. <sup>9</sup> Ie jira Rairuíñegamací llófueriraco ímiaimona dáarie Estébamo como fueñe ie finócafue júfiduaidiaioi. Afe llezica Cirénemona dáamierie, daje izói Alejandríamona, daje izói Asia éniemo ite Cilíciamona: nana afémaci Estébamo afefue júfiduaidiaioi. <sup>10</sup> Mei íadi íena anáfenonidiaioi. Ñuera Joreño íemo iga úrillana fibíllafuedo úriteza. <sup>11</sup> Ie jira taino lloraini íbajidiaioi. Afémacina llotíaioi:

—Mai omoi daíri: “Esteban Moisená Juziñamui diga fiénidíuaina dáinana cacádicaí,” —daí daítatiaioi. <sup>12</sup> Aféfuemo comínina énamaci diga fáillifailliñeitadiaioi, daje izói ocuífue llófueraini. Iemona cirínuano íena llaitádiaioi. Lláitano Caifóidíllaini uíécomo íena uitíaioi. <sup>13</sup> Afe izói taino uailai nabáiraini jenódiaioi. Afémaci daide:

—Bímie cai ñue rairuírede gairíracomo báíñuano fáicanocaitañede. Jaca báíñofirede, daje izói ocuífue. <sup>14</sup> Afémie dáinana cacádicaí. Afe daina daide: “Baie Nazaret ímie Jesús afe gairíracó júdaítaite. Moisés caimo iga finóllífuiaí meídotaite,” —daí daídíaioi.

<sup>15</sup> Iemona ríimaci naa dinó ráiedínori, Estébamo eróillano, ie uíeco Juziñamui abi ímie uíécona eróidena cióidiaioi.

## 7

### *Esteban abi ie ríidufue llote*

<sup>1</sup> Mei jira lletáriraini illaíma Estébamo jicánote:

—¿Meita nana bífuiaí uáfuaí?

<sup>2</sup> Jira afémie uai ote:

—Ñue comécide ámatiai, móotiai diga, cue úrillamo cácarei. Cai ebíredinoredímie Juziñamui cai jaiái nanóidímie Abrahamo cíocaide. Ua Abraham Mesopotamia éniemo illa llezica, afémie nai Haramo jaiániñena llezica, <sup>3</sup> Juziñamui íena daide: “O illánie fiénocai naa o comíniri. Afemona omo cue llole éniemo o jairi.” <sup>4</sup> Mei jira Abraham Caldea



éniemona oni jaide; jáillano, Harán jófuego nano nie dino ite. Dinomo ie moo tilla. Iemona Juzíñamui Abraham afe bie omoi illíniemo atide. Ja birui aféniemo itíomoi. <sup>5</sup> Mei íadi nie feci raana nai afémie Juzíñamui íena íñede. Afe izói due jiza ie macálliniena íemo fecáñede. Mei íadi Juzíñamui uícomo uáfueña daide: “Bie énie óieite. O tilla meífomo o jítótiai íeite.” Mei íadi aféruillaido Abraham nai jítónide. <sup>6</sup> Nane dáanomo Juzíñamui íena daide: “O uícoidigima jáímaci éniemo onínemaci izói íítiaioi. Dinomo afémaci rairuícamací izói íítiaioi. Dinomo cuatrocientos fimona duere finólliaioi,” daide. <sup>7</sup> Mei íadi nane dáanomo Juzíñamui daide: “Omoi rairuícamacina finódizie íaioi fiénidífuaí cue jicánolle mei, afémacina duere zefuítaiticue. Ie meífomo o comini afénomona oni jáítiaioi. Oni jaillano, bíniemo cuemo ñue caimare táijizaíbitiaioi,” daide. <sup>8</sup> Juzíñamui Abrahamo daínauai íbana finóllifue llote. Afe llezica ie jítótiai bacano ícoi quetállena ocuíllado afe finóllifue uáfueña onótate. Ie jira ie jító Isaac jócua mei ocho dígarui íllamona, Abraham ie jító bacano ícoi quetade. Daje izói Isaac ie jító Jacobona finode. Afe izói Jacob nana ie jítótiaína finode. Afe jítótiai Israel doce diga nairai moona jáidiaioi.

<sup>9</sup> ‘Bie Jacob jítótiai cai nánoragimaciaí. Afémaci ie ama Josemo úradoidiaioi. Afemona afémiena fecádiaioi, Egipto éniemo úillena. Mei íadi Juzíñamui Joseri ite ie canóllena. <sup>10</sup> Nana ie zefuínailamona zuitade. Ñue úrillana fibíllafue íemo ite. Faraón uícomo ñue comécidimiena Juzíñamui Josena itátate. Afe Faraón Egipto nahíllaima. Afe Faraón Josena Egipto jabóllaimana mamede. Afe llezica daje izói dama Faraón jofo illáimana mameca.

<sup>11</sup> ‘Iemona júbietailafue nana Egipto éniemo baite aillo zefuínailafue diga. Daje izói Canaán éniemo ite. Ie jira cai móotiai güíllenidiaioi. <sup>12</sup> Mei íadi Jacob Egíptomoo trigo íllana fídiano afénomoo ie jítótiai orede. Afémaci cai jáíairagíma. Bifue íaioi fueñe güille uájillafue. <sup>13</sup> Ie mei dáanomo nane jáidiaioímo, José ie ámatiai ie abina onótate. Afe llezica José ie ámatiai Faraómo cíotate afémie íaioína onóillena. <sup>14</sup> Iemona José ie moo Jacob naa ie comíniri atítate. Afémaci setenta y cinco dígamiede. <sup>15</sup> Afe daí íaioímo íficaide Jacob Egíptomoo jaiánillena. Dinomo afémie tíide; daje izói afénomoo cai jáíairagíamamona dárie tíide. <sup>16</sup> Afe meífodo íaioi ícuruai Siquém illánomo uitá raiájidiaioi. Afe dinomo Hamor jítótiaímona Abraham ie comini ícuruai raíllínuaí íbade. Jira afénomoo raiájidiaioi.

<sup>17</sup> ‘Jaiái nínomoo Juzíñamui Abrahamo uire ñue íaioi íllena rírede uaido uáfueña llote. Afe uícodo daínauai fuizáillirui ánoziacademo, Israel nairai Egíptomoo ñue jebuídíaioi; ua íere áillue náiraina jáidiaioi. <sup>18</sup> Afe llezica Egíptomoo jáíie Faraón illáimaizaide. Afémie Josena onóñede. <sup>19</sup> Aféllaíma cai náiraina jífuete; cai jáíairagímacina duere finode. Cai como jococa úruiaína zóofetade íaioi tíllena. <sup>20</sup> Aféruillaido Moisés jococa. Afémie ie dúeza illáruimona Juzíñamuína íóbitade. Afe izói ie moona ie ei diga íóbitade. Afe íaíllinoi daámani fíui jofomo íena móonaitadiaíllinoi. <sup>21</sup> Mei íena zóofetarui dúcinamona Egipto illaíma nahí jiza íena abímo ote. Afengo jító izói afézana comúitate. <sup>22</sup> Ie jira afe Moisés Egipto comini nana onóigafueña llófuegamie. Iemona ie daínauaíllai rírede. Afe izói afémie finócafuaí jamánomoide. <sup>23</sup> Ja afe mei cuarenta fimona illa llezica, Moisés ie nairai israelita comini méíñuaíacade. <sup>24</sup> Afénomoo Egipto ímie Israel náiraimona dámie duere finóinana Moisés cíoizaide. Ie jira Moisés ie nairai ímie ríduaíbillano Egipto ímie fate afe íba óllena. <sup>25</sup> Moisés comécido daide: “Cue ámatiai israelita comini Egíptomona fáicanocailífue onódiaioi. Ua Juzíñamui íaioi cuedo fáicanocaitafueña fídídíaioi,” daide. Mei íadi áfena fídíñediaioi. <sup>26</sup> Afe jítiramoidiruido Moisés Israel ímíiaíllinoi fúrienaíllana cíode. Íaíllinoi fuíríllafueña llícaítaacanano íaíllinoína daide: “Omícoi daje ámadíomícoi. ¿Níbaí conímana duere finódíomícoi?” daide. <sup>27</sup> Ie jira nabai duere finódímie Moisés oni ñuitade. Oni ñuita mei íaíllinoímona dámie Moíseno daide: “¿Bu o cai cígímo illáimana jóonegao? ¿Bu cai fiénidífue jicánoraímana jóonegao? <sup>28</sup> ¿Nauri Egipto ímie o faaja izói birui

cuena fáiacadio?” daide. <sup>29</sup> Daií dáinana cacáillano, Moisés botade. Bótano Madián éniemo jaide. Dinomo jicánemie izói ite. Afénomo mena jitórede.

<sup>30</sup> ‘Cuarenta fimona méifomo, Moisés amena figo iñénazicimo mácajide. Sinaí idu áinomo ite. Afénomo Juzíñamui abi ímie boode iázaifedínamo cíocaide. Afe irai bóoidinomo cíocaide. <sup>31</sup> Afena ciónamona Moisés jabo fáigacaide. Afena ñue cíoillena áfemo jofo ánozide. Ainozillano Ocuíraima Juzíñamui úrillana cacade. Afe uai daide: <sup>32</sup> “O nánoidimaci Juzíñamuidicue. Ua Abraham, Isaac, Jacob dieze Juzíñamuidicue,” daide. Jira Moisés jágieri cuidíricaide. Iemona dáanomo áfemo eróillana jacíruite. <sup>33</sup> Iemona Ocuíraima Juzíñamui íena daide: “O eiba ico duiño, benó o naidáillano cue íllaza jamánomo ñúenoza. <sup>34</sup> Cue comini Egíptomomo duere zefuíllana cíodicue. Íaioi eehe cáilliana cacádícue. Jira ana íaioina zúitaibitícue. Jira cue dáinana cacai. Egíptomomo ona óreitícueza,” daide.

<sup>35</sup> ‘Ja nano fueñe nana comini Moisená jámairuitaioi. Iena jaiái daiúzaidiaioi: “¿Bu illáimana mamécao, caimo jicánoraimana o íllena?” Mei íadi bóodinamo cíode Juzíñamui abi ímiedo Juzíñamui Moisená zúitaitimiena orede, íaioi illáimana. <sup>36</sup> Jira Moisés cai jáiairagimaci Egíptomona jino bairódimie. Afémie bie éniemo cíorainina raa onótate raa díga finódimie. Afe izói Jáírede Monáillaimo cíorainina dáinamona comuide raa finode. Afe izói cuarenta fimona íllamona zaféredizicimo íaioi illa llezica cíorainina raa finófirede. <sup>37</sup> Afe dáamie Moisés Israel cominina daidímie: “Juzíñamui dani omoi ámatiaimona uai llóraimana ómoimo óreite, cue ie ória izói. Afémie mo jeire omoi oíri.” <sup>38</sup> Afe Moisés zaféredizicimo cominiri ítimie. Afe Moisés Sinaí ídumo ítimie. Dinomo Juzíñamui abi ímie íemo úrizaibite. Afemona Moisés cai jáiairagimamo aféuai jino llotímie. Afe Moisés cáatatuailai llínnote, afe uáillaina caimo fiénocaillena.

<sup>39</sup> ‘Mei cai jáiairagimaci íemo cacáreacañediaioi. Iena ruifíruillano, meine Egíptomomo jáiacadiaioi. <sup>40</sup> Jira Aarona daidíaioi: “Cai uícodo ífoite juzíñamuillaina caimo finóllena jitáidicai. Baie Moisés Egípto éniemona cai otímie, íemo ítífueña onóñedicai,” daidíaioi. <sup>41</sup> Ie jira juráreto jiza jana finódiaioi; jáíe rílleniai fatíaioi afe jízato jánaraina finócamo fia fecállena íena íóbitallena. Mei íaioi ónoído finoca raamo caimátaioidiaioi. <sup>42</sup> Ie jira Juzíñamui íaioimona oni jaide. Afemona Juzíñamui íaioina fiénocaiide mona úcuaimo íaioi comeci facáoillena. Mei daií uai llóraini rabénicomo cuedáuai daide:  
¡Israel comini, omoi cacai!

¿Cuarenta díga fimona íllamona zaféredizicimo rílleniai fatíomoi cuemo fia fecállena?

<sup>43</sup> Ieñede. Jáífodo finódiomoi.

Taino juzíñamui Moloc ráicacillacoji abímo máíñuano úioicaidíomoi.

Afe llezica jáíe taino juzíñamui Renfán ucúduna eroide jánaraimo jeire otíomoi.

Afe jánarai dani omoi finoca íóbitalle jánarai.

Ie jira omoi éniemona omoi otá Babilonia batífenemo ómoína óreitícue, daide.

<sup>44</sup> ‘Cai jáiairagimamo Juzíñamui gairíraco ite. Afénomo nofícomo cuega ocuica uailai éenotiaioi. Afe gairíraco Juzíñamui Moísemo ocuilla izói niga. Nano fueñe Juzíñamui íena daide: “O ciónaco omo cue ácata izói o nitátari,” daide. <sup>45</sup> Cai jáiairagimaci afe gairíraco feci raa izói llínnotiaioi. Ie mei Josué díga bitino jáíe nairai énie báirua llezica afeco atídiaioi. Afe éniemo ítínuiaí Juzíñamui oni jiude, íaioi meífomo ie comini íllino finóllena. Afeco daií dinomo ite David ílláruillaído. <sup>46</sup> Illaíma David Juzíñamuina íóbitade. Iemona Juzíñamui afe Davidna canófirede. Aféruillaído ie jáiairagima Jacob íinoga Juzíñamui íllíco nitátaiacade. <sup>47</sup> Mei íadi ie jitó Salomón Juzíñamui jofo ua nitátatímie. <sup>48</sup> Mei íadi jamánomo caífoide Juzíñamui, comini ónoído niga gairíracuaimo ífinide. Afe izói uai lloraíma daide: <sup>49</sup> Caífo bie mona ua cue ílláimana ráírano izoide.

Ie mei bie énie cue ídai bitáoinanie izoide.

¿Ñie izóidíco cúeiena nitátaitio?

¿Nee cue ocózinairano?

<sup>50</sup> ¿Ua meita nana bie ráaniaina cue ónoído finódicue?

Jii finódicue, —daí Ocuíraima Juzíñamui daide.

<sup>51</sup> Nai Esteban afémacimo úrioicaide. Daide:

—Mei íadi omoi comeci jaca Juzíñamuina rairuífirede. Juzíñamuina onóñedimaci izói jefónidiomoi. Juzíñamuimo comécíñedimacidiomoi. Ñuera Joreño llétafue jaca jeire oñédiomoi. Omoi jáiairagima izóidimacidiomoi. <sup>52</sup> ¿Ua meita omoi jáiairagima nii uai llórainina duere finódiaioi? Nana íaioina duere finódiaioi. Nii fígomie bíllana uícodo llotínona titádiaioi. Afe fígomie jae dúcide. Iena fécano fatíomoi. <sup>53</sup> Omoi Juzíñamui abi ímíaido llogámacidiomoi, mei íadi ñue cacáreñediomoi, —daí dinori Esteban daide.

### *Esteban tíllafue*

<sup>54</sup> Aféfuina cacáillamona, ríicaidiaioi. Estébamo fueo gugúricaidiaioi. <sup>55</sup> Mei íadi Esteban Ñuera Joreño úicaigamie. Afe llezica monamo érocaide. Dinomo Juzíñamui ebírenafuena ciode. Afe llezica Jesús Juzíñamui nabézimo naidáinana ciode. <sup>56</sup> Ie jira daide:

—¡Ero! Mona túinana ciódicue. Nanoide íima Jitó Jesús Juzíñamui nabézimo naidaide, —daide.

<sup>57</sup> Mei íadi afémaci jefo íbáidiaioi. Ríirerie caillíoicana illíñana íemo caízaidiaioi.

<sup>58</sup> Jófueмона oní uitá nófiena íe níjidiaioi. Níjídino íaioi emódodiroillai jítócome Sáulona maméidimíena úíñotadiaioi. <sup>59</sup> Nai íe íaioi níjia llezica, Esteban Juzíñamuimo úrillano daide:

—Ocuíraima Jesús, cue joreño oní llíno, —daide.

<sup>60</sup> Ie mei ana dújullano, ríire caillide. Daide:

—¡Ocuíraima! Bie fiénidífue ícoínia bimácimo jítáñeno iri, —daide.

Daí daína meífodo tíbicaide.

## 8

### *Saulo Jesudo gairíraní racade*

<sup>1</sup> Fatímaci izói Saulo afémacimo comécioide.

Aféruimona Jerusalemo íte Jesudo gairíraní duere finóllena como fueñe judíuai jénuaidiaioi. Ie jira nana ínotimaci Judea énie fuédado ráidoízitiaioi; daje izói Samaria éniédo. Dani doce dígamie orécamací Jerusalemo fiébitiaioi. <sup>2</sup> Iemona Juzíñamui raana duéruitimaci Esteban raíájidiaioi. Ieri aillo éediaioi. <sup>3</sup> Afe llezica, Saulo gairíramacína nai racáoide. Nágacuaído jenode. Afécuaimona íñiaí ringóniaí díga jino zónuano íaioina llavétate.

### *Jesucristo ñuera uai Samárimo llujíjidiaioi*

<sup>4</sup> Ja birui Jerusalémoma oní jáiredino, Cristo jíllonafue íaioi jáillanuaimo llujíjidiaioi.

<sup>5</sup> Afémacimona dámie Felipe Samaria jófueмо jaide. Dinomo Cristo ráfuedo íaioimo úrizaide. <sup>6</sup> Afe comini gairíllano Felipe dánamo ñue cacáreidiaioi. Felipe finoca ciórainina onótate ráaniaí ciódiaioi. <sup>7</sup> Mei jira aillo fiénide jóriaimona jíllotagaiaioi. Afémacimona fiénide jóriaí caillícana oní jaide. Afe llezica aillo tízitaitimíiaí aidáimaiaí díga jíllotagaiaioi.

<sup>8</sup> Aferi afe jofue comini iere caimátaioidiaioi.

<sup>9</sup> Mei íadi dáamie Simona mámeciredimie afénomo íte. Afémie uícoidiruillaido aimana jaide. Afe jofue comini jífue. “Jamánomoidimíedicue” daííredimie. <sup>10</sup> Nana comini jabóidinomona ua nahíllaimamo díeze íemo iere cacáreidiaioi. Daídaioi:

—Bímie caifoide Juzíñamui ríinona igámie, —daídaioi.

<sup>11</sup> Iere are íe aimánafuedo afémacína jífue; íe jira íemo jeire otíaioi. <sup>12</sup> Mei íadi Felipe Juzíñamui illáimana illírui uai Jesucristo mámece díga, íaioimo llote. Aféuailaina cacáillano áfemo ñue ínotiaioi. Íñiaí ringóniaíri dájerize ínotiaioi. Ínuano báutizagaiaioi.

<sup>13</sup> Afe dama Simón ínuano báutizaga. Iemona afémie Felipe nabaina jaide. Afémie Felipe finoca áillue ciórainina raa onótate raa diga, áferi fáigacaide.

<sup>14</sup> Jae Samaria comini Juziñamui úrillauai jeire otíaiói. Afe íaiói jeire uáfueña Jerusalemo ite orécamaci fidídiaíói. Fídiano afénomo Pedro Juan diga orédiaíói. <sup>15</sup> Dúciillano Samáriamo ite ínotinori Juziñamuimo jicádiaíói, Ñuera Joreño íaiói llínollena. <sup>16</sup> Mei afémacimona nímiemo Ñuera Joreño nai biñede. Dama Ocuíraima Jesús mámeçido báutizaga. <sup>17</sup> Afemona Pedro Juan diga íaióimo onói bitade. Iemona daií Ñuera Joreño úicaigaiaíói.

<sup>18</sup> Orécamaci bimácimo onói bítamona Ñuera Joreño bíllana Simón ciode. Cíonamona úcube orécamie íaillinoímo íoicana

<sup>19</sup> daide:

—Jadí ríino cuemo ine. Afe izói nie cómemo cue onói cue jóneadi Ñuera Joreño íemo bílleza, —daide.

<sup>20</sup> Jira Pedro íena daide:

—¡Naa o úcube diga o táinocairi! Juziñamui fecaca raa úcubedo íbárede daídío; daií comeci facádío. <sup>21</sup> Bífueño o dúñedío. Bie coco táijnafueño jaináñedío, o comeci jaícina Juziñamuimo jóoiñena jira. <sup>22</sup> Bie o fiénidífue o fáicanocai. Juziñamuimo izire o jicari o fiéni comécido dainafue íba omo óñeilleza. <sup>23</sup> Ja onódicueza o comeci filliru izói eríredeza. Afe íaífuaíido cuinácamie izói itíoza.

<sup>24</sup> Jira Simón uai ote:

—Ocuíraimamo cuedo jicari, nana o cuena daináfuaíimona dafue cuemo níjiñeillena, —daide.

<sup>25</sup> Afénomo Crístoño ñúefue nitádiaíói. Daje izói Juziñamui uáillaíido úritiaíói. Ie meífodo, orécamie íaillinoí Juziñamui jíllollíuái aillo Samaria duera jófuaíimo llófuaíidaillinoí. Ie mei Jerusalemo meine bitíaillinoí.

### *Felipe Etiopía ímiemo úrite*

<sup>26</sup> Afefue meífodo Juziñamui abi ímie Felípena daiízaíbite:

—Náidacaillano, fuiri batí Jerusalémona Gaza jófueño jóidíodo o jairi, —daide.

Afeo zaféredizicido jóidío. <sup>27</sup> Iemona Felipe náidacaillano áfeodo jaide. Dinomo uíécodo jaide Etiopía ímie éidajide. Afémie illaíngo abi ríimie. Afémie Etiopía illaíngo Candace úcube úíñoraíma. Afe llezica afémie óinima. Naui uícodo afémie Jerusalemo Juziñamuimo cáimaduaidé. <sup>28</sup> Afémie abido ie éniemo jáizaide. Ie caballo zonóicaiga ráirralloicimo ráicana Juziñamui uai lloraíma Isaías cuezáuai facádote. <sup>29</sup> Afe llezica Ñuera Joreño Felípena daide:

—Jadíllóicimo áinozillano afénomo nabairi, —daide.

<sup>30</sup> Ainozillano, Felipe afémie Isaías cuezáuaillai facáduana cacade. Iemona íemo jicánote:

—¿O facádoga uaina meita onódío? —daide.

<sup>31</sup> Jira afémie uai ote:

—Cuemo jino llóitimie íñedeza, ¿nie izói ónoíticue? —daide.

Iemona Felípemo caífo ie diga dáanomo ráillena jicade.

<sup>32</sup> Juziñamui Cuezáuaímona afémie facádoga uai áfena daide:

Oveja izói tíizaillínoño uiga.

Oveja jiza abi cuidódíno uíécómo úriñedímie izói táíide,

afe izói afémie jaca níífuedo úriñede.

<sup>33</sup> Afémie iere jámairuigamie; jaícinaídífueña íemo rairuíaíaiói.

¿Ie ñue illáfuedo mei bu úrille?

Mei ie cáajano bie éniemona níne táinocaidé, —daide.

<sup>34</sup> Jira illaíngo abi ríimie Felípemo jicánote:

—Cuemo llone, ¿bumo úrite uai lloraima? ¿Ñibai dama íemo úrite? ¿Ñibai jiáimiemo úrite? —daide.

<sup>35</sup> Jira Felipe afémie facádoga Cuegáuaimona Jesús úrillauai íemo jino llote. <sup>36</sup> Jainoi illánodo jailla llezica ríimie daide:

—Benomo ite jainoi. ¿Birui áfejido cue báutizanidicue? —daide.

<sup>37</sup> Jira Felipe daide:

—Nana o comécido o íinoiadi báutizarellio, —daide.

Jira afémie uai ote:

—Jesucristo Juzíñamui Jitoza áfemo ínoticue, —daide.

<sup>38</sup> Iemona jáiralloici moziñota ille diné jáidiaillinoi. Dinomo Felipe ie báutizade.

<sup>39</sup> Illémona ari abido jáidiaillinoimo, Juzíñamui Ñuera Joreño Felípena oni uite. Iemona ríimie íena jaca nane cíõñede. Mei dama ie éniemo caimare jaide. <sup>40</sup> Felipe nane Azoto jófuego cíocaizaide. Dinómona naga jófuedo jíllonauai llócade. Ua ba Cesarea jófuego fuizájide.

## 9

### *Saulo comeci jiáifodo méiduafue (Hch 22.6-16; 26.12-18)*

<sup>1</sup> Afe llezica Saulo Jesumo ínotinona fáiacanafuedo úrioido. Ie jira lletáriraini illáimamo jícanuaide. <sup>2</sup> Daide:

—Llavétallibiaina cue ine, Damasco jofue gairíracomo cue jáilleza, Jesús uaimo ínotino cue jénuailleza. Afemona íñiai naa ringóniari maitá Jerusalem cue atílleza, —daide.

<sup>3</sup> Mei nai iodo jailla llezica, Damasco jófuego ánozidemo, monámona bite úzefo nágafene ie abimo úzere egáiñoaide. <sup>4</sup> Iemona Saulo éniemo baíide; baíilla llezica Jesús íena dáinana cacade:

—Saulo, Saulo, ¿ñibái mei cue racáido? —daide.

<sup>5</sup> Mei jira Saulo uai otá jícanote:

—Ocuíraima, mei o ¿búido? —daide.

Jira aféuai ote:

—Cue Jesúsicue. Dama o racácamiedicue. Aillue juráreto zaitáacademo jáiredizimo jiide. Afe izói ízitagamiedo. <sup>6</sup> Mei íemona Saulo jágeri cuidide; daide:

—Ocuíraima, ¿ona nie izói finóredicue? —daide.

Jira Ocuíraima uai ote:

—Náidacaillano baie jófuego mai jofu jai. Dinomo o finóllifueno omo llóitiaioiza, —daide.

<sup>7</sup> Sálodo jaide comini aféuaina cacádiaioi íadi mei buna cíõñediaioi. Aferi iere jacínaitiaioi. <sup>8</sup> Ie meífodo Saulo éniemona caifo ráinacaillano, érocaide. Mei ui botáicaide íadi éroinide. Mei jira daií ónoido jainátacana Damasco jófuego íena uitiaioi. <sup>9</sup> Dinomo daruíamani uina cíõñede. Afénomo minícana güiñede, jiróñede.

<sup>10</sup> Afe Damasco jófuego ínotimie Ananías illa, nímiemo Ocuíraima nicáirilla izóidedo cíocaide. Iena daide:

—¡Ananías! —daide.

Afémie uai ote:

—Ocuíraima, benó iticue, —daide.

<sup>11</sup> Jira Ocuíraima íena daide:

—Náidacaillano, Deréchana mámecirede iodo jairi. Dinomo Judas jofomo jícanori: “¿Ñinomo ite Sálona mámeciredimie, Tarso jofue ímie?” O dúcina llezica afémie Juzíñamuimo úrite <sup>12</sup> Ie úrioina llezica nicáirilla izóidedo ie uimo onoi bítaibitimie, Ananías mámeciredimienaa cíode; áfemona nane ie ui ñue cíoite, —daide.

<sup>13</sup> Afe uaina cacáillano Ananías daide:

—Aillo comini baie ímana cuemo llotíai. Afe llezica omo ñnotinuiamo nana Jerusalem ie fiñi finócafiái cuemo llotíai. <sup>14</sup> Ja birui afémie benomo bite. Lletáriraini illaini llavétallibiai diga bite nana o mámeçido jicáfiredino maitá úillena, —daide.

<sup>15</sup> Jira Ocuíraima daide:

—¿Mai jai! Afe ímana jae cue nizeca jíaie náiraímo cuedo úrillena naa íai. illáiniri.

<sup>16</sup> Afémie aillo cue náiraímo llóite. Afémie aillo cue ícoñia duere zefuállana íemo ácataitícue, —daide.

<sup>17</sup> Iemona Ananías Saulo illácomo jaide. Jofo jáillano íemo onoi bítajano daide:

—Ama Saulo, Ocuíraima Jesús o billa iomo omo cíocaidimie cue o ui meine abido cíoilena ocuide. Afe dáanomo afémie Ñuera Joreño ona cue úicaitallena cuena daide, —daide.

<sup>18</sup> Afe daií dáinamona, chamu icogí izoide ie uímona cúcoizite. Iemona nane ie ui meine cíoide. Afemona Saulo náidacaillano báutizatate. <sup>19</sup> Afe meífodo güillano, ie ríino meine comuítate. Afe mei nano nígarui Damáscomo ite ñnotinori fiébide.

### *Saulo Damasco jófuego jino llófuerite*

<sup>20</sup> Ie meífodo Saulo garíracomo jino llófuerizaide. Afénomo daide: “Jesús Juzíñamui Jitó.”

<sup>21</sup> Nana aféñiemo cacáidino fáigacaillano daidíai:

—¿Ua meita bie níñiede, nauí Jerusalem Jesús mámeçido jicáfiredino racádimie? ¿Ñíie nauí benomo bitímie lletáriraini illáinimo cai maitá úillena? —daidíai.

<sup>22</sup> Mei íadi Saulo jamánomo riire jino llófuerite. Jesús Crístonana jino uafodo ciótate. Mei jira Damáscomo ite judíuai Saulo ifona íritagaiaí.

### *Saulo judíuamona jillode*

<sup>23</sup> Diga iruillaí jailla meífomo, judíuai dáanomo comeci fácana Saulo fállena maméritiaí.

<sup>24</sup> Mei íadi aféfuena afémie fidide. Naa mona naio diga jofue jino jáirazemo úiñoidiaí ie fállena. <sup>25</sup> Mei íadi ñnotimaci áillue cirígaimo íena jónetiaí. Jóoniano afe jofue jinófene cirínualla jinomo naio íena agúñetiaí. Afe daií afémie botade.

### *Saulo Jerusalemo illafue*

<sup>26</sup> Saulo Jerusalemo dúcillano, Juzíñamuimo ñnotinori gairíacade, mei íadi nana afémiena jacíruitiaí. Afémie ñnogafuena nai jeire oñédiaí. <sup>27</sup> Mei íadi Bernabé íena uáidote. Iemona orécamiíamo íena ácatajide. Afemona Saulo iomo Ocuíraimana cíonafue íai. íamo llote. Ie mei Saulo Damasco comínimo méaicaiñeno Jesús mámeçido úrillafue íai. íamo llote. <sup>28</sup> Jira Saulo Jerusalemo diga irui ite. Dinomo ñnotimaci diga macácaide. <sup>29</sup> Ocuíraima mámeçido méaicaiñeno úrite. Griego uaido úritino judíuaimo úrite. Conímamo jicánua uai ua daií úrite. Iemona ie fállena mamédiaí. <sup>30</sup> Jíaie ámatiaí afefue fídiano, Saulo Cesaréamo uitiaí. Dinómona Társomo íena orédiaí.

<sup>31</sup> Ie meífomo nana Judea éñiemo ite Jesús mámeçido gairídino fírazitiaí. Ja íai. ñnogafuemo caimare náireoicadiaí. Afe izói Galilea éñiemo Samaria éñie diga ite ñnotino fírazillamona riire náireoicadiaí. Ocuíraima Jesús ñúefueri jácicaidiaí. Ñuera Joreño íai. íaí. cánuamona jebuíoicadiaí.

### *Eneas jae jíllotaga*

<sup>32</sup> Pedro jíaie ámatiaí uáidualla llezica, daje izói Lida jófuego ite ñnotino éroizaide.

<sup>33</sup> Dinomo Enéasna maméidimiena cíoizaide. Afémie ocho diga fimona bíramo bíide ie tízitailla jira. <sup>34</sup> Iena Pedro daiízaide:

—Eneas, Jesucristo ona jíllotaiteza. Náidacaillano o bíira ñue fino, —daide.

Afemona Eneas raire jíllobicaide. <sup>35</sup> Lida jofue nairai aféfuena nana ciódiaioi naa Sarón náirairi. Iemona jaiai nano íaioi íinogafuiaí fáicanocaillano Ocuíraíma llogáfue mo íinotiaioi.

*Dorcas tíide meine abido cáanafue*

<sup>36</sup> Aféruillaído Jope jófue mo ite íinotingo. Afengo mámecei Tabita. Afe mámecei griego uaido Dorcas. Afe ringo ñúefuedo jáicade. Jitáidinona canófirede. <sup>37</sup> Aféruillaído afe Dorcas írareizaide. Iemona tíide. Ie abi jócua meífodo oni caifóidícomo jóonetiaioi. <sup>38</sup> Lida áinori ite Jope. Aféruimo Pedro afénomo nai ite. Íinotino afénomo íllana fídiamona, ménamie orédiaioi íena daiíllena:

—Jópemo jizíñeno raire biri, —daide.

<sup>39</sup> Iemona Pedro afémie íaillinoído jaide. Pedro dúcinamona, Tabita abi jóoinanomo íena uitiaioi. Nana fecíngotíai abido ífoina naidározillano éediaioi. Afe llezica nana Dorcas nauí ie caana llezica tífócaquiruai íemo ácatatiaioi. Emodo íroillai naa jíáie iníroillairi íemo ácatatiaioi. <sup>40</sup> Afécomona Pedro nana jino íaioi orede. Ie mei caíñici ífodo dújuillano Juzíñamuimo úrite. Tíidíngomo eróillano daide:

—Tabita, mai caífo náidacai, —daide.

Iemona afengo ui botáicaide. Pédromo érocaillanona caífo ráinade. <sup>41</sup> Onoído llíinota ie caífo naidánete. Afe mei ailli jino oreca fecíngotíai íemo ámatiaí daínámacei díga abido jírite. Iemona afengo caade íaioimo izájide. <sup>42</sup> Afefue nana Jope jófue mo jállecaide. Iemona aillo comíni Ocuíraímamo íinotiaioi. <sup>43</sup> Afe mei Pedro díga iruí afe jófue mo fiévide. Igoraí ídiaí jinítaraíma Simón jofomo ífirede.

## 10

*Pedro Cornelio uáiduaíue*

<sup>1</sup> Afe Cesarea jófue mo Cornéliona maméidímie ite. Afémie fuíríraíni áillogüelli illaíma. Afe áillogüelli mámecei Italiano. <sup>2</sup> Afémie naa dama ie comíniri Juzíñamuimo comecei fácajano caímare úrite. Afe llezica Juzíñamuimo ñue jacíruioidé. Daje izói aillo úcubena judíuaimo fecáfirede íaioi canóllena. Iemo Juzíñamuimo nágaruí úrifirede. <sup>3</sup> Ie mei daaruí jítoma ana ítemo nicáírilla izói cíode. Afe nicaí anado Juzíñamuí abi ímie uáfodo cíode. Afe abi ímie jofu Cornelio illánomo jaide; jáillano íena daide:

—¡Cornelio! —daide.

<sup>4</sup> Cornelio afe Juzíñamuí abi ímiemo jacíruiocana érocaillano jícanote:

—Ocuíraíma, ¿bie mínica?

Iemona abi ímie íena daide:

—O jícanua Juzíñamuí jae jeire ote. Daje izói jítaídino o cánuafuiaína jeire ote. <sup>5</sup> Mei jira Jope jófue mo íñiaí ore, Simón jírizaiíllena. Afémie jíáífodo mameína Pedro. <sup>6</sup> Afe Pedro jíái Simón igoraí ídiaí jinítaraíma. Afémie jofu monáillai fuédamo ite. Afe Simón Pedro o finóllífue omo llóite, —daí daide.

<sup>7</sup> Afe íemo úrite Juzíñamuí abi ímie jáidemo, Cornelio mena táijítagamie jírite. Ie mei ie abi ímiaímona daa ñúefue mo ínofirede fuíríraíma jírite. <sup>8</sup> Nana Juzíñamuí abi ímie íemo llogafue llua meífomo Jópemo íaioína orede.

<sup>9</sup> Afe jítiramoidíruimo, nai afémacei iodo jailla llezica, Jópemo áinozidiaioimo, Pedro jáiciri illa llezica jofu emodo íbánimo Juzíñamuimo úrizaide. <sup>10</sup> Aillo júfinaíllamona güíacade. Mei íadi nai güille íaioi finua llezica, nicáírilla izoide cíode. <sup>11</sup> Afe nicaí anado mona túijicaíllana cíode. Afénomona áillue iníroi izóidena nágafene zicaí ícoínoga ana éniemo agüínana cíode. <sup>12</sup> Afe agüínega iníroimo naga táide rílleníai ite, jáióníai féedínuaí díga. <sup>13</sup> Iemona daa uai daínana cacade:

—Pedro, náidacaillano fatá rii, —daide.

<sup>14</sup> Jira Pedro uai ote:

—Jii, Ocuíraima, ríñeiticue. Bácaca ríllena jaca riñédicue. Daje izói íáirede ríllena riñédicue naa rairuica rille diga, —daide.

<sup>15</sup> Afe uai nane dánomo íena daide:

—Naga Juzíñamui dogá izói finoca rílleza íáire maméñeno iri, —daide.

<sup>16</sup> Afefue dacaiñoámani íemo íficaide. Ie meífomo afe iniroi meine abido monamo jaide.

<sup>17</sup> Nai Pedro afe nicáirillafuemo comeci facáaide. “Afe cue ciónafue nie izói daiíacade,” dáidemo, Cornéliomona orécamiiai nazemo náidazaibitiaioi. Simón jofó jicánotiaioi.

<sup>18</sup> Dúciillano aillo uaido jicánotiaioi:

—¿Simóndimie bicomio ite? Afémie jíáfodo mameina Pedro, —daiíaioi. <sup>19</sup> Nai Pedro nicáirillamo comeci facáidemo, Ñuera Joreño íena daide:

—Cacai, damieámani o jenódiaioi. <sup>20</sup> Náidacaillano ana billano jizire úriñeno íaioido jai, mei cue omo orécamiiaiza, —daide.

<sup>21</sup> Mei jira Pedro jofó emódobanimona ana billano Cornelio orécamací, nazemo náidaidinona daide:

—Cue omoi jenócamiedicue. ¿Nibái mei bitíomoi? —daide.

<sup>22</sup> Jira afémaci uai otíaioi:

—Hlaima Cornelio cai ória jira biticai. Afémie ñúefuena nitácamie. Afémie Juzíñamuimo ñue jacíruioides. Nana judíuai íena ñue llínnotiaioi. Iena iere izíruitiaioi. Juzíñamui abi ímie íena daide: “Jópemo comini oreri Pedro uáidollena, afe mei o jofomo Pedro bílleza.” Jira o uáibiticai. Dinomo Cornelio íena o daiíacallifuena cácaite, —daiíaioi.

<sup>23</sup> Ie jira Pedro jofó íaioina ote. Afe naio ie diga fiébidiaioi. Afe jíáiruido Pedro afémaci diga jaide. Afe llezica Jópemo ite ámatiaimona íena nabáioicaidiaioi.

<sup>24</sup> Afe jíáiruido Cesaréamo dúcidiaioi. Dinomo Cornelio íaioina úiñote. Afénomo bíllena ie llogámaci ie comínimona, ie gaiga nabáíñiaimona dáanomo gairídiaioi. <sup>25</sup> Afécomo Pedro dúcia llezica, Cornelio jino íena llínuaibite. Jino billano Pedro anamo dújude, ie cáimadollena. <sup>26</sup> Mei íadi Pedro íena náidacaitano íena daide:

—Náidacai. Cue o izói énie ímiedicue, —daide.

<sup>27</sup> Nai afémie diga úrioina llezica, jofó jaide. Jáillano aillo gairídinona cíozaide. <sup>28</sup> Jira Pedro daide:

—Jae onódiomoi, judío ímie ie ínuafuiaido jíázie ímie diga nabáirinide. Daje izói ie jofomo jaille rairuírede. Mei íadi Juzíñamui jae cuena llófuete. Buna jíáimana comécina íáiredimie daínide. Daje izói rofóciredimie jíáimana daínide. <sup>29</sup> Ie jira orécamiiai cue jíirilla llezica nie izói daiíñeno jarire bitícueza. Mei jira nibái mei cue uáidotioza onócadicue, —daide.

<sup>30</sup> Ie jira Cornelio uai ote:

—Jae nagaámarui jáidemo, afe bie daje hóramo, benó cue jofomo güiñeno iticue. Aféruimo jitoma ja ana ítemo Juzíñamuimo comeci faiticue. Comeci faiano quenírede inícuiro jitáoidimie cuemo cíocaide. <sup>31</sup> Afémie cuena daide: “Cornelio, o jicánogafuiaina Juzíñamui cacade. Afe llezica jitáiredinomo o cánuaifuiaimo Juzíñamui comécide. <sup>32</sup> Jope jófuemo ore Simón uájillena. Afémie jíáfodo mameina Pedro. Afémie jíáie Simón jofomo biruido ite. Jíáie Simón igorai ídiai jinítaraima. Ie jofó monaillai fuédamo ite. Pedro dúcia o diga úrizaita,” daide. <sup>33</sup> Daií raire ona jenótaticue. Jira o bille ñuera. Birui nana benomo Juzíñamui uíécomo iticai. Nana Juzíñamui omo llotátgauai caimo o daiíllena cacáacadicai, —daide.

*Pedro Cornelio jofomo llófujeteza*

<sup>34</sup> Jira Pedro ja úrillano daide:



—Ja birui Juziñamui jiaimana daa úradotatañedeza onódicue. <sup>35</sup> Mei íadi nizíemo itino íeri jácicaillano ñúefuedo úritinona Juziñamui íaioina llínofirede. <sup>36</sup> Israel cómogimacimo Juziñamui úrite. Jesucristodo comeci caimare uái illafue íaioimo llote. Afémie nana nairai Ocuíraima. <sup>37</sup> Nana judío éniemo comuídifuena ñue onódiomoi. Juan Bautista jino llujilla mei, comini báutizailla meífodo afefue Galiléamo como fueñe taineca. <sup>38</sup> Nazaret ímie Jesumo Ñuera Joreño ríino Juziñamui ígaza onódiomoi. Afe Jesús ñúefue finócana jáillana onódiomoi. Afe izói nana Taife ríino anamo duere zefuídinona ie jíllotafuiaina onódiomoi. Aféfuiaina daí finode Juziñamui ie diga jáicana jira. <sup>39</sup> Nana Jesús judío éniemo finócafuiái uai nabáiraímacidicái. Daje izói Jerusalén jófue mo ie finócafuiái uai nabáiraímacidicái. Ie méifomo cruzmo íena coráiano íena titádiaioi. <sup>40</sup> Mei íadi Juziñamui daruiámani íllamona abido íena cáatate. Ie mei afémiena caimo cíocaitade. <sup>41</sup> Nana comínido cíocaitañede mei íadi dani caimo cíocaide, Juziñamui uícomo nizeca uai nabáiraímacidicaiza. Afe mei afémie tíllanomonona meine abido cáanamona ie meífomo, afémie diga güiticaí; ie diga jiródicaí. <sup>42</sup> Afémie Jesucristo rafue jino comínimo caina llotátate. Afe izói jáífue caina ua nabáiritade. Afefue daide: “Juziñamui afe Jesús tíidino cáadino diga íaioi fiénidifuiái jicánoitímiena ocuide. Cai aféfuemo uaina nabáitagamacidicái.” <sup>43</sup> Daje izói jaiái ninómona nana uai lloraini Jesudo úritiaioi. Daidíaioi: “Nana afémiemo ínotino íaioi íáiredifuemona ie mámecido ñue dóficaitiaioi,” daidíaioi, —daide.

### *Judíuaiñedino Ñuera Joreño como fueñe úicaigaiaioi*

<sup>44</sup> Nai Pedro úrioina llezica, ie úrillauaimo cacáreidímacimo Ñuera Joreño nana íaioimo ana bite. <sup>45</sup> Jira Pédrodo bite ínote judíuai fáigacaidiaioi. Ñuera Joreño judíuaiñedínomo daje izói úicaigafueri fáigacaidiaioi. <sup>46</sup> Jae jáízie uáillaído íaioi úrillana cacádiaioi. Afe llezica Juziñamuimo íaioi íobioinana cacádiaioi. <sup>47</sup> Mei jira Pedro daide:

—¿Birui bu mei ráruille bimaci báutizallena; mei daa cai izói Ñuera Joreño úicaigaiaioi? —daide.

<sup>48</sup> Iemona Jesucristo mámecido íaioi báutizazigaiaioi. Ie meífodo Pédro mo izire jicádiaioi: “Nano nígarui cai diga iri,” daidíaioi. Daí íena jeruúdiaioi, nano nígarui íaioi diga íllena.

## 11

### *Pedro Jerusalemo ite ínotínomo llogafue*

<sup>1</sup> Judéamo ite orécamaci ámatiaí diga, cómoicana jáífueña fidídiaioi. Afefue daide: Judíoñedímaci Juziñamui úrillauaina jae jeire otíaioi. <sup>2</sup> Pedro meine Jerusalemo jáidemo, judíuaimona dámerie ínotíno Pédróna zanódiaioi. <sup>3</sup> Zánvano daidíaioi:

—¿Níbái judíoñedíno uáiduaído? ¿Níbái íaioi diga güitio? —daide.

<sup>4</sup> Ie jira Pedro afefue nanómona nana ie finócafuiái llote; daide:

<sup>5</sup> —Jope jófue mo cue íadi, Juziñamuimo úrifiredicue. Afe llezica nicai anado ciódicue. Afe nicai anado áillue iniroi izóidena monámona ana bíllana ciódicue. Aferoi nágafene zícaino ícoínoga. Daí cue illánomo dúcide. <sup>6</sup> Afemo ñue eróidicue ie eromo itínuiaina onóillena. Iemona afe eromo ite táicaide rílleniaina ciódicue. Afe dáanomo jacírede rílleniaina ciódicue. Daje izói aféno mo jáizai, íemo féedínuiaí diga íllana ciódicue. Nana afe ciona rílleniái bácaziga. <sup>7</sup> Iemo daa uai cuena dánana cacádicue. Daide: “Pedro, náidacaillano afe ríllemona fatá ríi.” <sup>8</sup> Mei jira daidicue, “Ocuíraima, dama ite. Jaca nanómona cue fúedo íáiredena ríñédicue bácaie diga.” <sup>9</sup> Ie mei afe monámona cacaide uai dáanomo cuena daide: “Juziñamui dogá rílleza íáirede daíñeno o iri.” <sup>10</sup> Afefue dacaiñoámani meine íficaide. Afe meífomo dáanomo nana monamo meine jaide. <sup>11</sup> Afe llezica daamieámani cue illánomo dúcide. Afémaci Cesaréamona cue jenóllena orécamaci. <sup>12</sup> Ñuera Joreño afémacido

cuenta orede: “Due jiza jiziñoeno afémacido jairi,” cuenta daide. Daje izói baie seis ámatiai cuedo jáidiaioi. Nana cai daaco jofomo jáidicai. <sup>13</sup> Afémie Juziñamui abi ímiena ie jofomero ie ciónafue caimo llote. Afe Juziñamui abi ímie náidaillano íena daide: “Jope jófuemo nano nígamie ore, Simón jírizaillena. Dámie jáífodo mameina Pedro. <sup>14</sup> Afémie ona dáiteza, nie izói o nana o comini diga jilloitioza,” daide. <sup>15</sup> Cue fueñe íaioimo úrizaila llezica, Ñuera Joreño imaci acónimo bite, nano fueñe cai acónimo billa izói. <sup>16</sup> Mei íemona Ocuíraima daínafuemo úbicaidicue. Afefue daide: “Uáfueña Juan fia jáinoido báutizade, mei íadi Ñuera Joreño úicaigamacina íitioimo.” <sup>17</sup> Mei jii Ocuíraima Jesucristomo cai ínuano Juziñamui caimo iga Joreño, bimácimo Juziñamui íacade. Afena fidíillano Juziñamuido jarifeicana úriacañedicue. Jamai cómedicueza, —Pedro daí daide.

<sup>18</sup> Mei ie jira Jerusalemo ite ámatiai aféfuiaina fídia llezica, llícaillano Juziñamuimo caimátaidiaioi. Daídaíaoi:

—Ua afe izói judíoñedimacimo íaioimo fieni itífue méidollena jae Juziñamui íaioimo fecade. Afemona daí jaca ziiñoña cáaillinona íaioimo ite.

### *Antioquíamo ite Juziñamuimo ínote gairídino*

<sup>19</sup> Esteban íaioi faa llezica, jáie ínotimacimo duere finótatiaioi. Dáarie Fenicia éniemo botádiaioi; jáimaci Chípreno Antioquía diga botádiaioi. Dinomo afe ñúefue dani judíuai namácimo llotíaioi. Jáimacimo llónega. <sup>20</sup> Mei íadi dáarie Chipre imaci, Cirene imaci diga ínotino Antioquía jófuemo dúcidiaioi. Dúciillano judíoñedinomo úritiaioi. Afemona Ocuíraima Jesús úrillauai íaioimo llote íaioi jilloillena. <sup>21</sup> Afe llezica Ocuíraima ríno íaioimo ite. Mei daí aillo comini nano íaioi jaiai ínogafuiai fáicanocaillano Ocuíraima Jesumo ínotiaioi.

<sup>22</sup> Afefue Jerusalemo ite ínotinomo jállecaide. Iemona afémaci Bernabé Antioquíamo orédiaioi. <sup>23</sup> Bernabé dúciillano, Juziñamui cáimadogamací izói ciode. Aferi afémie iere íóbicaide. Nana íaioi llófuete; daide:

—Nana cai Ocuíraimana fáicanocaiñoeno ie llogáfuemo jaícina omoi coméciiri, —daide.

<sup>24</sup> Afe Bernabé comécina fígomie, Ñuera Joreño úicaigamie. Afémie Jesucristomo izire ínofiredimie. Daí aillo comini Ocuíraima Jesucristo íena náamatade.

<sup>25</sup> Afe meífodo Bernabé Társomo Saulo jénuaide. Baillano Antioquíamo íena úite. <sup>26</sup> Dinomo daa fimona namónaze ínotino cígimo ñue fuitádiaillinoi. Afénomo aillo comini llófuete. Afe Antioquíamo ínotino como fueñe Crísto jaináidinona ja mamécaiaioi.

<sup>27</sup> Aféruillaído dámierie Juziñamuimona llínoga uailai lloráimaci Jerusalémona Antioquíamo jáizaide. <sup>28</sup> Afémacimona dámie Agábona mámeciredimie. Nana ínotino cígiri náidaillano daide:

—Nana bie éniemo aillo jamánomo júbie biite, —daide.

Ñuera Joreño ie comécimo llúamona afefue jino llote. Afe júbie daí bite Claudio illáimana illáruillaído. <sup>29</sup> Ie jira Antioquíamo ite ínotino comeci facádiaioi Judéamo ite ámatiai canóllena. Naga come íaioimo ite úcube díerize bai jóonetiaioi. <sup>30</sup> Afe daí ñeta, Bernabé Saulo íaillinoido afe íraica úcube Judéamo ite ínotino illáicomínimo orédiaioi.

## 12

### *Santiago tíllafue Pedro llavéinafue diga*

<sup>1</sup> Aféruillaído Juziñamuimo jaináidino duere finóllena illaíma Herodes nane jénuaide. <sup>2</sup> Iemo Herodes Juan ama Santiago lloéfaído titátate. <sup>3</sup> Afémie titátari judíuai iere íóbidaioi. Aféfuena Herodes fidínamona nane Pedro lláitajide. Ja birui irázillarullai. Afe irázillarullaído fáitañega pan güitíaioi. <sup>4</sup> Pedro llaitada mei Herodes llavéracomo

éna íbaicuaide. Dinomo cuatro dígagüelli éna úiñotiaioi. Naga afe güéllimona cuatro dígamiríe llazíriraini ite. Herodes comeci facade pascua rafue meífodo Pédróna jino comínimo cíotallena. <sup>5</sup> Ie jira Pedro llavéracomo llaveda ñue úiñoga. Mei íadi Juzíñamui gairídino íemo izire Juzíñamui jicáoidiaioi.

### *Juzíñamui Pédróna llavéracomona jino oreca*

<sup>6</sup> Herodes Pedro jino comini uiécomo óiacanarui uícodo, afe naio Pedro llavéracomo inide ñue úiñoga. Nágafene onoi llóejina maiga úiñoraíma íaillinoi jaináoigari inide. Afe llezica jíáie úiñoraíma íaillinoi jino llavéraco naze úiñoide. <sup>7</sup> Iemo Juzíñamui abi ímie raíre cíocaizaíbite. Afe llezica llavéraco ero úzerecaide. Juzíñamui abi ímie Pedro círaigi teténote éna cazítate. Cazítano éna daide:

—Mai raíre náidacai, —daide.

Iemona llóejillai Pedro ónoimona ana cocide. <sup>8</sup> Afe Juzíñamui abi ímie éna daide:

—Mai o círaigi tirínorafe jofo riire tirino.

O éiba ico jita, —daide.

Pedro daíi abi fínua llezica Juzíñamui abi ímie éna daide:

—O emodo jítaca áreoi jítada, cuedo bi, —daide.

<sup>9</sup> Iemona Juzíñamui abi ímie óodana Pedro jaide. Afe abi ímie finócafue Pedro onóñedeza; nibai uafue nibai tánofue. Comeci facáoid: “Nícaí anado ciona izóidífueña cíodicue.” <sup>10</sup> Mei íadi fuéñeide jónetimíemona bai jújicaillano báifeicana jónetimíemo dúcidiailinoi. Ie mei afémiemona jújicaillano bai nazemo dúcizaidiaillinoi. Afe naze íbaira lloébani. Dúcidiailinoimo afe naze íbaira daingo tújicaide. Jino jáillano bai iodo daallu macádiaillinoi. Ie mei Juzíñamui abi ímie ie fiénocaid. <sup>11</sup> Iemona Pedro ñue onócaillano daide:

—Íco iere uáfueza. Juzíñamui abi ímie cuemo orede Herodes cue llavéinamona cue zuitállena. Afe izói nana judíuai cue duere finóacanafuemona cuena zúitaíbite, —daide.

<sup>12</sup> Aféfuemo comécillano Juan ei María jofomo jaide. Afe Juan jíáfodo mameide Marcos. Afécomo aillo comini Juzíñamui iere úrillena gairídíaioi. <sup>13</sup> Pedro afeco abi ibiri llaveca nazemo náidazaide. Náidaillano jofo ero imaci júrite. Iemona Ródena mámeçirede ringoza bu billa daíillena eróizaide. <sup>14</sup> Mei íadi Pédróna uáimona onóillano, nazena tuiñóño, íóbicaillano meine jofo aizida llujáide:

—Pedro nazemo dúcina, —daízaiide.

<sup>15</sup> Jira éna daidíaioi:

—¡Uáiritaidio!

Mei íadi afengo daide:

—Uáfueña ñue lloticue; uáfueña Pedro dinomo ite, —afengo daíioide. Mei íadi afémaci ínoño daidíaioi:

—Pédroñedeza; fia ie joreño, —daidíaioi.

<sup>16</sup> Mei íaioi úrioina llezica, Pedro nazemo nai júrioid. Afe meífomo naze tuiñoda íemo érocaidiaioi. Erocaillano jacínaitiaioi:

—Ua meita Pédrodio, —daidíaioi. <sup>17</sup> Mei íadi ónoído:

—Mai omoi úriño, llícaí, —daide. Iemona Juzíñamui llavéracomona ie zúitafue llote.

Iemo íaioina daide:

—Bífue Santiágomo llujáiri nana jíáie ámatiairi, —daide.

Ie meífodo jino jaillano oni jíáinomo jaide.

<sup>18</sup> Jae monáizaidemo, llavécano úiñoraínimo aillo riire júfidotiaioi, mei onóñediaioiza; daidíaioi:

—Benó cai úiñoga Pedro ¿niné jaide? —daidíaioi.

19 Herodes Pédróna íaioina jenótate. Iena íaioi baiñenamona, nana úiñorainimo jicájicanode. Ie mei Herodes afeúñoraini fatátate, Pedro íaioi botata jira. Afe mei Herodes Judéamona jae oni Cesaréamo jaiánite.

### *Herodes tíllafue*

20 Jae Herodes Tiro comini Sidón comini diga íaioiri icirioide. Mei íadi afémaci daní comeci facádiaioi ie uiécomo cíozabillena. Illaíma Herodes jabóidillaíma Blasto. Afémiena fairíotarediaioi íaioiri ñue nabáirillena. Afémiedo ñue caimare illifue Heródemo jicádiaioi. Ua izire jicádiaioi, íaioi güilleniai, illaíma Herodes éniemona íaioi ófirena jira.

21 Ie jira Herodes íaioimo úrizailirui íaioimo llote. Aféruimo ebírede illaíma iniroi jítano illaíma ráiranomo ránade. Daí ñiano are íaioimo úrite. 22 Mei íemona comini caillíoicana íena daidíaioi:

—Bie úritimie fia cómeñedeza, afémie juzíñamui, —daidíaioi.

23 Afe llezica Juzíñamui abi ímie Heródena iráretade Juzíñamuimo ñúfuenta nitátañena jírari. Iemona afe Herodes aíáide tílla.

24 Iadi Juzíñamui lloga uai oni jalléicaide. Afe jalléinamona náganerie fidídiaioi.

25 Bernabé Saulo diga íaillinoi afe úcube fíiaillano meine abido Jerusalémona bitíaillinoi. Aféillinoi do bite dáamie, Juan daínámie. Dáamie mámecei Márcona.

## 13

### *Bernabé Saulo diga como fueñe nága gobiaí llócaidiaillinoi*

1 Antioquíamo ite gairíracomo nano niga uai jino llóraini ite naa llófueraniri. Afémaci mámeceiaí: Bernabé, Simón, Cirene ímie Lucio, Manaén, Saulo dígamiediaioi. Simón jíáifo mameina Negro. Galilea illaíma Herodes Manaén diga, dáanomo comúidiaillinoi.

2 Aféruillaído afémaci güiñeno Juzíñamuimo caimátaidiaioi. Iemo Juzíñamui Ñuera Joreño íaioina daide:

—Bernabé Saulo diga oni eneno nizeri, cue ocuica raa íaillinoi jetállena.

3 Güiñeno Juzíñamuimo úrilla meífodo éinamací íaillinoína ónoído ézicita, daidíaioi:

—Mai, ómicoi jairi, —daidíaioi.

### *Orécamaci Chipre éniemo llófuiaidiaioi*

4 Ie mei daí Ñuera Joreño íaillinoimo llujállamona oni Antioquíamona Selúciamo jáidiaillinoi. Dinómona áillocaedo monaillai cigi záfedu Chipremo jáidiaillinoi. 5 Salamina ígobemo dúczaidiaillinoimo judío llófueriracomo Juzíñamui uailalai jino llotíaillinoi. Afe llezica Juan íaillinoi canócana nabáizaide. 6 Nana Chipre éniemo llócadiaioi. Irainomo Pafó jófuego dúcidiaioi. Dinomo judío aima Barjesuna mámeceiredimie baizájidiaioi. Afe aima táinona llófuefiredimie. Afémie daífiredi:

—Juzíñamui dibénedo úriticue, —daide.

7 Afe aima ocuidíllaíma Sergio Paulo dígamie dáanomo itíaillinoi. Afe Sergio ráfuenta ñue onódimie. Aféllaíma Bernabé Saulo diga jírítade Juzíñamui uailalai cacáillena. 8 Mei íadi afe aima Bernabé Saulo diga llogáuai uáitano zanode. Ocuídillaíma ínuana aima rairuíacade. Afe aima jíáfodo mameina, Elimas. 9 Saulo jíáfodo mameina Pablo. Afe Pablo Ñuera Joreño úicaigamie. Aima daínana cacáillano íemo riire érocaillano 10 daide:

—¡Jíáíma jífuetimedio! Íáiba Taife jítodio. Nana ñúfuiaina uáitaraimadio. ¿Ñibái mei ñuera Juzíñamui lloga uai oni cáitano féitaacadio? ¿Ñibái mei o táinofuiaina fáicanocaiñeno jino llóllodio? 11 Mei jabe Ocuíraíma Jesucristo riire ona duere fínoite. O ui nírite. Nano nígarui jítoma egáiñuana cíóñeitio, —daide.

Daí daínamona ie ui niríbicaide. Jae jitídine taino mellécade. Dáamie íena ónoído jainátacana úite, ie ui cióñena jira. <sup>12</sup> Ocuídillaíma Sergio Paulo áfena cióillano, llogáuaina ñue ínote, mei Juzíñamui llófueinamo jacíruioicana aféuaimo ñue eroide.

*Pablo Bernabé diga Pisidia éniemo ite Antioquía jófuego jáidiaillinoi*

<sup>13</sup> Pablo ie nabáiñiai diga nocaedo Pafo jófueмона jáidiaioi. Dinómona Panfilia éniemo ite Perge jófuego jáidiaioi. Afénomo Juan íaioina fiénocaillano abido Jerusalemo jaide. <sup>14</sup> Pablo ie nabáiñiai diga afe Pérgemo dúcillano, Pisidia éniemo ite Antioquía jófuego arido jáicina jáidiaioi. Dinomo ocózinaillaruiamo llófueriraco eromo ráinazaidiaioi. <sup>15</sup> Ocuícafuiai illánicomona fueñe facádotiaioi. Ie mei Juzíñamui uai jino lloránicuaimona facádotiaioi. Afe facádua fúillamona llófueriraco illaini íaillinoina daidiaioi:

—Amatiai, ómicoi cacai. Omicoi llóicaigafuiai íadi comini cacáilleza jino ómicoi llóoiri, —daide.

<sup>16</sup> Mei íemona Pablo náidacaillano, ónoído comínina llícaitate. Afe mei íaioina daide:

—Israel nairai, omoi cácarei. Daje izói Juzíñamuina jacíruioidino, omoi cácarei.

<sup>17</sup> Israel nairai Juzíñamui cai jáiairagima nana íaioina nizede. Iemona Egipto éniemo ónoñegamacina íaioi illa llezica, aillo náiraina afémie jebuítate. Afe mei aféniemona dama íemo ite ie ríinodo íaioina oni ote. <sup>18</sup> Ua mei Juzíñamui comeci jitáinafue nai figo fuitáñediaioi, mei íadi afe tázicimo cuarenta diga fimona Juzíñamui íaioina zófeño úiñote. <sup>19</sup> Afe mei Canaán éniemo ite siete nairai Juzíñamui niné táinocaitaga, afe énie cai jáiairagima maiñóllena. <sup>20</sup> Afe meífodo diga riire jicánoraini cuatrocientos cincuenta fimona ocuicaiaioi. Ua ocuicaiaioi uai llóraíma Samuel illáruimo. <sup>21</sup> Ie mei íaioina ócuite ríillaíma jicádiaioi. Jira Juzíñamui Saúl cuarenta fimona afémaci illáimana jóonete. Afe Saúl Cis jitó, Benjamín nairai ímie. <sup>22</sup> Afe mei Juzíñamui Saúlna oni orede. Oni óriano David illáimana ie meífomo jóonete. David ífuedo Juzíñamui úrite; daide: “Cuen a íobitadímie David baiticue. Afémie Isaí jitó. Nana cue jitaiga raana jetáfirede,” daide. <sup>23</sup> Afe David cómogimamona Jesús jococa. Afe Jesús Juzíñamui uícomo daínáuai izói Israel nairai jíllotaitimiena íaioi cígiconi Juzíñamui comuítate. <sup>24</sup> Jesús comínimo nai abi báifitañenia Juan nana Israel náiraimo jino llote; daide: “Nana omoi báutizaredi omoi. Omoi comeci ífuiai mai ñúefuena méidoziri.” <sup>25</sup> Juan uícodo llófuiaillafue fúiacademo, daide: “Omoi comeci fácamieñedicue. Jamáimedicue. Mei íadi cue meífodo bitímie cue baímo baitadímie. Afémie idai ico igaina zuitánidicue, (jiba jamáimedicueza),” daí Juan daide.

<sup>26</sup> ‘Cáimaci, omoi cácarei. Abraham nairai urúcidíomoi; mai cácarei. Omoi mona Juzíñamuina jacíruioidino, omoi cácarei. Bie ñue jíllotaitíuui ómoie. <sup>27</sup> Mei Jerusalemo itino íaioi illáiniri Jesús nahí ífueña fidíñediaioi. Daje izói naga ocózinaillaruiamo facádoga uai llóraini llogáuallaina cacádiaioi, mei íadi aféuui daínáfuena onóñediaioi. Aféuallaina íaioi onóñenado Jesús duere finótatiaioi. Daí jaiái ninomo mamécafuiai aféniemo fuitádiaioi. <sup>28</sup> Afe Jesús fatátallífuena due jiza jaca baiñediaioi; mei íadi Pilátomo ie fatátallena jicádiaioi. <sup>29</sup> Afe mei nana afémiedo Cuegáuallaimo jaiái ninomo lloga uallai fuitádiaioimo, crúzmona íena ana otá íena raíajidiaioi. <sup>30</sup> Mei íadi Juzíñamui tíllanomona íena meine cáatate. <sup>31</sup> Afe mei diga irui íllamona Galiléamona Jerusalemo ie diga jáicadinomo Jesús íaioimo cíocaiide. Afe iedo jáicadino ja birui comínimo afémie llócaigafue llotíaioi.

<sup>32</sup> ‘Juzíñamui cai jáiairagimamo uícomo llogáuaido úrite. Ñúefuedo úrite. Ja birui afe ñúefue ómoimo lloticai. <sup>33</sup> Ja cai bie afémaci cómogimadicaí. Ie jira afémie uícodo llogáuui ja caímo fuilla. Afe uai daide: “Jesucristo tíidena meine abido cáataitícué.” Daí rúanicomo cuega; segundo ruamo cuega; llote: “Cue jítoí. Birui ona cáataticue.” <sup>34</sup> Diga ícaíño Juzíñamui ie cáallífuena llote. Ua tíllanomona íena cáataite, ie íeizi jaca ninomo rífaíñeillena. Juzíñamui aféfuena jaiái ninomo Cuegáuallaido daide. Afe uai ie jítoí Jesuna

daide: “Davidmo uícodo cue uafue lloga ñue cáimafuiai nahí omo jainaide.” <sup>35</sup> Ie jira rúanicomo jiáiruado daide: “O izíruiga ñue canódimie íeizi ráiruitio ie rífaíñeillena,” daide. <sup>36</sup> Afe David ie llezica igímana ñue canode, Juzíñamui ie ocuilla izói. Afe meífomo David tíllano ie uzútiai cígimo íena raiájidiaioi. Iemo ie íeizi rifaide. <sup>37</sup> Mei íadi Juzíñamui cáatagamie íeizi rífaíñede. <sup>38</sup> Cáimaci, omoi cacai. Afe bie rífaítañeno cáatagamie Jesudo omoi fiénidifuiiai iba óñeillifue ja ómoimo jino lloga. <sup>39</sup> Afémiedo nana íena ínotino nana íaioi fiénidifuiaimona dóficaitiaioi. Mei íadi Moisés ocuífafuiai cai fiénidifuiaimona caina zuitañede, mei cuinaca izói jaináidicai. <sup>40</sup> Ñue abi omoi rairuiri uai jino llóraini cuela mamécafuiiai ómoimo báíñeillena. Afe mamécafue daide:

<sup>41</sup> Ínoñeno uáitaoidino, omoi cácarei; cacáillano áferi omoi jacínaificairi.

Iemona niné táinocaitiomoiza, aféruillaído jamánomo ñue jácifue cue fínua jírari.

Aféfueña dámie ómoimo lloía, íadi áfena ínoñeitiomoiza, —daide.

<sup>42</sup> Pablo ie nabáñiairi judío garíracomona jino jáidiaioi. Jáidiaioimo judíoñedino jocócaiaioi íaioimo aféfuena meine abido íaioimo llúaíbillena jicádiaioi. Afe úireite ocózinaillarumo meine llúaíbillena jicádiaioi. <sup>43</sup> Afe llófueriracomo íaioi gairilla záillamona aillo judíuai Pablo llogafue jéruitiaioi. Iemona Pablo Bernabé diga íaillinoído jáidiaioi. Daje izói aillo judío onóigafueña jeire otino íaillinoído jáidiaioi. Pablo, Bernabé diga íaioimo llote:

—Mai Juzíñamui caina izíruillafuemo nágarui aféfuemo ñue omoi coméciri, —daide.

<sup>44</sup> Siete dígarui íllamona ocózinaillarumo, nana jofue comini dánomo gairídiaioi, Juzíñamui uallai cacáreillena. <sup>45</sup> Mei afénomo aillo comini gairíllana judíuai cióillano, úrioina izói itíaioi. Afénomo Pablo uallai uáitano íena báíñotiaioi. <sup>46</sup> Ie mei Pablo Bernabé diga abi mámano íaioina daide:

—Judíuai, bie Juzíñamui uai fueñe ómoimo lolle iere jítárede; mei íadi ja aféfuena óiacañediomo; afe ícoina zíñona cáallinona llínoñeitiomoi. Ie jira ja birui judíoñedinomo jáiticaí. <sup>47</sup> Mei jira Juzíñamui daí caina llotátate; Juzíñamui daide:

Cuedo nárainna fidítaraimana o mamédicue.

Nana énie íraino imaci ñuera jíllonafue llórainana íitio.

<sup>48</sup> Aféfuena cacáillano judíoñedino íóbicaidiaioi. Íaioi úrilla fueñe táinia llezica:

—Juzíñamui uáillaina jamánomo ñuera, —daidiaioi.

Afémacimona aféfuena ínotino aillo ite. Zíñona cáatatinona llínoitina mamécaiaioi. <sup>49</sup> Iemona Juzíñamui uallai nana afe énie náraído jae ñue jalleide. <sup>50</sup> Afe jófuemo Moo Juzíñamui izire jaináiacade ringóniaimona dáingorie ite. Afe ringóniai illaingo izóidingotiai. Judíuai afe ringóniaimo úrite, Pablo afe jófuemona oni oréllena. Daje llezica judíuai afe jofue illáinimo daje izói úrizaidiaioi. Íaioi comeci fiéni fínua jira, jíaie Páblona duere finóacanafue comuízailla, Bernabé diga. Afe jófuemona oni íaillinoi orédiaioi. <sup>51</sup> Afe ória meífodo afe íaillinoi eiba ico íaie íaioimo teténote; afe teténufue baimaci comeci íaifuiaimo íteza, daíacade.

Daí ñiano Iconio jófuemo jáidiaillinoi. <sup>52</sup> Mei íadi Jesús llogáfueño ínotino iere íobioidiaioi. Afe llezica Ñuera Joreño úicaigaiaioi.

## 14

### *Pablo Bernabé diga Iconiomo itíailinoi*

<sup>1</sup> Iconiomo dúciillano judío llófueriracomo daane jofo jáidiaillinoi. Dinomo jamánomo ñue úritiaillinoi. Afemona aillo judíuai Jesumo ínotiaioi; judíoñedinomona daje izói aillo afefue ínotiaioi. <sup>2</sup> Mei íadi ínoacañede judíuai jíaie judíoñedino comeci íaire finódiaioi. Daí Páblona Bernabé diga éoicana eróidiaioi. <sup>3</sup> Ie jira dinomo diga irui ñue jaícina jacíruiñeno Ocuíraima Jesús mámecido llófuetiaillinoi. Afe llezica Juzíñamui dama ie ñue ríino íaillinoimo fecade. Afemona onótate ráaniai cíorainina ráaniai diga finódiaillinoi.

Aféniado íaillinoi lloga Juzíñamui caina izíruillafue Juzíñamui ñue comínimo fidítate. <sup>4</sup> Mei íadi jofue comini bózietaidiaioi. Dáarie judíuai dibénemo jaináiacadiaioi. Jáimaci Pablo Bernabé diga dibénemo jaináiacadiaioi. <sup>5</sup> Afe meífodo ñnoacañede judíuai jáie judíoñedino diga naa íaioi illáiniri noficiaina íaillinoi níjiacadiaioi. Daí íaillinoina duere finóacadiaioi. <sup>6</sup> Mei íadi aféfuena orécamaci uícodo fidídiaioi. Fídiano Pablo Bernabé diga Licaónia éniemo botádiaillinoi. Dinomo ménagobemo macáoidiaillinoi, Listra Derbe diga naa afe áinori itíniado. <sup>7</sup> Dinomo ñue jílloñafue llotíaillinoi.

### *Lístramo Pablo noficiaina níjidiaioi*

<sup>8</sup> Iemo Lístramo macáñede aidaima ite. Ie jocóinanomona tízitaite izóí macáñede. Jaca ie macánina jira dinomo ráide. <sup>9</sup> Afémie Pablo daínáfuemo ñue cacáreide. Iemona Pablo íemo érocaillamona, tízitaitimie ñue ñnuana Pablo comécido fidíde. Ie ñnuamona afémie jíllorede. <sup>10</sup> Iemona Pablo íena riire daide:

—O ídado caifo jáicina naidai, —daide.

Afénomona afémie tícacaillano náidacaide; náidacaillano como fueñe mácajide. <sup>11</sup> Daí Pablo finócafueña cíoillano, nana comini Licaónia uáillaído caillíoicana daidíaioi:

—¡Juzíñamuillai jamai comini izóí ana cai cígimo billa! —daidíaioi.

<sup>12</sup> Bernabena Júpter juzíñamui daidíaioi; Páblona Mercurio juzíñamui daidíaioi, jamánomo ráfuiai llotímiena jira. <sup>13</sup> Júpter gairíraco naze fueri ite. Afeco úiñotimie juráretuai atide naa amena záfiiai diga. Afémie naa comini íaillinoimo cáimadoacadiaioi. Juráreto fáillemona íaillinoina íóbitaacadiaioi. <sup>14</sup> Mei íadi orécamaci Pablo Bernabé diga fidídiaillinoi. Aféfuena fidínamona, ínucuro cúatacaillano, comini cígimo jáidiaillinoi. (Afe iniroi cuata daíacade íaillinoi comeci jamánomo ríicaide.) Jaillano caillíoicana daidíaillinoi:

<sup>15</sup> —¡Nana omoi, cácarei! ¿Ñibái bie izóí finódiomoi? Coco omoi izóí jiba cómedicoco. Ñúefue ómoimo atídicoco. Afe bie tánofuiai omoi fáicanocaillena lluaíbiticoco. Fáicanocaillano, ua caade Juzíñamui dine omoi jáillena daí lluaíbiticoco. Afémie mona, bie énie, monáillai dieze finode naa íaioimo itínuiari. <sup>16</sup> Jáiairagima illa llezica nana nairai íaioi comeci jítáillafodo macáoidiaioi. Aféruillaído Juzíñamui íaioina lletáñede. <sup>17</sup> Mei íadi Juzíñamui ñúemie ífuena ñue ómoimo finócafuiado ómoina fidítafirede. Ua ñue nocina ómoimo bítafirede. Nana aménaiái llizíllajiaína ómoiri llizítate. Afedo omoi güille ñue ite, omoi comeci íóbillena, —daí úrite Pablo.

<sup>18</sup> Mei nana afe daínáuallai daína íadi, nana comini íaillinoiri juráretuai nai fáiacadiaioi. Iadi ícoimo afétuai íaioi faana féitataidiaillinoi.

<sup>19</sup> Afe mei Antioquíamona Icóniomona dáarie judíuai dúcizaide. Listra comínimo júfiduano Pablo fállena mamédiaioi. Iemona Páblona noficiaina níjidiaioi. Níjiano jofue jinófenemo íena zonóicaidiaioi. Comécido daidíaioi: “Ñibái tíide,” daide. <sup>20</sup> Mei íadi ñnotino íemo gairídiaioimo Pablo náidacaillano meine jófuemo jaide. Afe jítiramoidiruido afémie Bernabé diga Dérbemo jáidiaillinoi.

<sup>21</sup> Dinomo jílloña uallai jino llotíaillinoi. Afe jófuemo aillo comini Jesumo ñnotiaioi. Afe mei meine abído Lístramo, Icóniomo íemo Antioquíamo dieze jáidiaillinoi. <sup>22</sup> Nana afénuiái jofue ñnotinuiái ñue caimare íociretadiaillinoi. Ñue jáicina ñnuafuedo íaioi jáillena llófuetiaillinoi. Iemo íaioina daidíaillinoi:

—Juzíñamui illáimana illíruimo cai jáillena, aillo afe facátafuiai iere caimo jítáirede, —daide.

<sup>23</sup> Afe llezica naga gairíracuaimo ócuite illáinina mamédiaillinoi. Afe mei güiñeno Juzíñamuimo iere úrilla meífomo nana como ocuídillainina mamécamiái Juzíñamui úiñuamo jóonetiaillinoi, Juzíñamuimo ñue íaioi ñnuua jira.

*Pablo Bernabé diga íaillinoi nano billánomo abido jáidiaillinoi*

<sup>24</sup> Afe meífodo Pisidia éniemona jaillano Panflia éniemo dúcidiailinoi. <sup>25</sup> Perge jófuemo jllonafue llotíailinoi. Afe llua méifomo Atalia jófuemo jáidiaillinoi. <sup>26</sup> Dinómona Siria éniemo ite Antioquía jófuemo nocaedo ruica jáidiaillinoi. Naui afe jófuemo ite ínotino íaillinoina Juzíñamuimo jónetiaioi. Daií finódiaioi jáie nairai ñúefuena llófuiaillena. Ja birui afe táijina fuilla. <sup>27</sup> Antioquíamo dúcidiailinoimo, nana ínotino Juzíñamui garíracomo gairídiaioi. Gairídiaioimo Pablo nana Juzíñamui íaillinoido finócafuiái jino íaioimo llote. Afe llezica judíoñedinomo Juzíñamui ñue jílloille io como túíñua llotíailinoi. Afe izói áfemo afémaci ínorediaioi. <sup>28</sup> Afe meífomo Pablo Bernabé diga ínotino cígimo are diga irui itíailinoi.

## 15

*Ínotino illaini Jerusalemo gairídiaioi orécamaci diga*

<sup>1</sup> Aféruillaido dáarie íñiaí Judea éniemona Antioquíamo ite ínotino llófuiabite. Iaioina daidíaiói:

—Moisés ocuica íiza bacano icoi quétafuena omoi finóñenia, jílloñeitiomoi, —daidíaiói.

<sup>2</sup> Ie jira Pablo Bernabé diga íaioimo riirede uáillaido úritiaillinoi aillo júfiduafuiái diga. Iemona Antioquíamo ite ínotino Pablo, Bernabé, jáímaci diga nizédiaioi, Jerusalemo ite orécamacimo aféfuena jicánuaillena; daje izói Jerusalemo ite Juzíñamuimo gairídino illáinimo jicánuaítiaioi.

<sup>3</sup> Mei daií nízia mei Antioquía ínotino afe nizécanona orédiaioi. Afe oréinamona, Fenicia éniemo Samaria énie diga jáidiaioi. Jaillano judíoñedinó íaioi jaiai llóinauailalai féitano Juzíñamui dibénedo jáillafue llotíaiói. Nana ámatiaí aféfuena cacáillano iere íobidiaioi.

<sup>4</sup> Pablo Bernabé diga Jerusalemo dúcidiailinoimo, Juzíñamuimo gairídino caimare uáidogaiaillinoi. Daje izói orécamaci naa gairídino illáiniri íaillinoina caimare uáidotiaioi. Dinomo Juzíñamui íaioiri finócafuiái íaioimo jino llotíailinoi. <sup>5</sup> Mei íadi fariséuaimona dáarie ínotino caifo naidáillano íaioina daide:

—Ínote judíoñedinomo afe cai izói quetáinafue jitáirede. Afe emódomo Moisés ocuífue ñue ínollena jitáirede, —daidíaiói.

<sup>6</sup> Iemona orécamaci naa ínotino illáiniri aféfuena ñue onóillena gairídiaioi. <sup>7</sup> Aféfuái are íaioi júfida meífomo, Pedro caifo náidaillano daide:

—Amatiai, omoi cácarei. Naui Juzíñamui cuemo finócafue onódiomoi. Juzíñamui omoi cígimona cue nizeda judíoñedinó cígimo orede. Ua cuena nizede afémacimo ñue jllonafue uailalai cue llujáillena; áfemona afémaci aféfuaiina ínotiaioi. <sup>8</sup> Cai comécina onode Juzíñamui cuemo llote: “Afe judíoñedinona ñue llínoiticue,” daide. Afemona Ñuera Joreño íaioimo fecade caimo ie feca ízoi. <sup>9</sup> Juzíñamui cáimona afémacimo jáífodo finóñede. Iaiói ínuado íaioi comeci íaifue Juzíñamui oni dote caie ie dua ízoi. <sup>10</sup> Mei birui ¿ñibái mei Juzíñamui finócafue jeire oñédiomoi? ¿Ñibái mei baie ínotino jamánomo riire ocuíacadio? Afe ocuínafuena cai, cai jáiairagima diga finónidicai. <sup>11</sup> Mei íadi jáífodo ínoticai, cai jílloillena. Ocuíraima Jesús caimo dúecaide. Afemo cai ínuamona íbáñeno jíllobicaidicai. Afe izói judíoñedinó Jesumo ínuamona íbáñeno jíllobicaidiaioi, —daide.

<sup>12</sup> Mei jira afémaci llícaidiaioi, Bernabé Pablo diga llogáfuemo cacáreillena. Nana judíoñedinó cígimo Juzíñamui finócafuiái llotíailinoi. Dinomo íaillinoido uaido finoca onótate raa ciórainina raa diga Juzíñamui finode. Aféfuái jino llotíailinoi. <sup>13</sup> Iaillinoi llogafue fúillamona, Santiago daide:

—Amatiai, cue dáinamo cácarei. <sup>14</sup> Simón Pedro jae Juzíñamui judíoñedinona como fueñe íaioina izire canóinafue caimo jino llote. Juzíñamui jae judíoñedinomacimona dáazie



como níziaibite dama ie náiraina. <sup>15</sup> Afefue ua Juziñamui jaiiai uai llóraini cuegáfuiaimo jaícina dájena jóbide. Afe Cuegáuai daide:

<sup>16</sup> Bifue mei, meine bíiticue.

Ua David jaiiai nairai, júdaizitaga íadi, meine dáaziena jofo gairítaiticue.

Aféziemona due fiébidino jaiiai íaioi ízaina izói meine jebuitaiticue.

Ríinidimaci jofo dáanomo otátaiticue, ñue riírediziena íaioi íllena.

<sup>17</sup> Afe daíí finuaibiticue nana jáimaciai Juziñamuimo comeci fácajano íaioi íinollena.

Daíí fínoiticue nana cuena náamarede judíoñede náiraiiai cuemo comeci facada íinollena.

<sup>18</sup> Ua jaiiai ninómona aféfuiai onótate Juziñamui daíí daide.

<sup>19</sup> ‘Te jira bifue lloticue. Afe como Juziñamuido jáiacade judíoñedino mai, cai íaioina áifedoñeiticai. Jae íaioi jaiiai íinoga táinofuiai fáicanocaidiaioi Juziñamui llogáuaina íaioi íinollena. <sup>20</sup> Due llétafue íaiommo cai cúellena ja dieze figo baite. Afe bífuiai íaiommo llóiticaí. Mai jánaraimo fia fecaca güíllena omoi jetáñeno iri. Mai jiruífueмона abi omoi rairuiri. Dama áiredimie ie ai diga illa ñuena. Mai cimoina cigínoga rílleniaí riñeno iri. Afe izói coróbaitaga rílleniaí riñeno iri. Daje izói díena omoi jiroñeno iri. <sup>21</sup> Daíí judíoñede como íinotimacimo lletádicaiza, nibai nanómona nana jófueмо Moisés ocuífue llófueraini ite. Naga ocózinallaruido llófueriracomo afe Cuegáuai jino facádotiaioi. Ací dino Santiago lloite.

<sup>22</sup> Iemo orécamaci gairídímaci, nana íaioi illaini diga, “Jii,” daídíaioi. Iemona íaioi cigímona dámierie nizéllena maméritiaioi, Antioquíamo oréllena Pablo Bernabé diga íaillinoi nabáillena. Judas dainámie nizédiaioi; afémie jáífodo mameina Barsabás. Daje llezica Sílasna nizédiaioi. Afe íaillinoi ámatiai cigiri illaíma izóidiaillinoi. <sup>23</sup> Iaillinoído cuegabe orédiaioi. Afébemo daide:

“Cai Antioquíamo ite judíoñede ámatiaímo uai orédicaí. Afe izói Siria éniemo ite ámatiaímo, Cilicia éniemo ite ámatiai dieze nana ómoímo uai orédicaí. Nana orécamaci, Juziñamuimo gairídino illaini, benó ite ámatiai diga, ómoímo uai orédicaí. <sup>24</sup> Cáimona ómoímo nauí bitino finócafue jae fidídicaí. Caimo lloñeno oni jáidiaioi. Cai óreñegaiaioi. Dani imaci uáillaido jae omoi ífoci írinuaidiaioi. Daíí ómoína áifeduaídiaioi. Omoi bacano ícoi quetállifuiái lluaíjidiaioi; jáíe Moisés llogáuailai ómoímo ocuízaidiaioi. <sup>25</sup> Ie jira cai comécido ñue jaide cai cigímona mena come mamedá ómoímo oréllena. Aféfuena nana jieruiticaí. Bie nizécaillinoi Pablo Bernabé diga omoi éroizaíbitiaioi. Pablo Bernabé diga cai iere izíruiga ámaillinoi. <sup>26</sup> Cai Ocuíraíma Jesucristo ñúefue íaillinoi llua ícoína, jaci cácatagaillinoi. <sup>27</sup> Daíí Judas Silas diga ómoímo orédicaí. Aféillinoi ómoímo jofo úritiaillinoi nana bífuiai jino ñue llóllena. <sup>28</sup> Mei cáimona ñue cioide; afe izói Ñuera Joréñomona ñue cíoide riírede rafue ómoímo cai mámeñeíllena. Dama jitáiredífue mámeíticaí. <sup>29</sup> Jánaraimo fia fecaca rílleniaína omoi riñeno iri. Daje izói díena jiroñeno iri; cimoina cigínoga ríllena omoi riñeno iri. Nana jiruífueмона abi omoi rairuiri. Dama áiredimie ie ai diga illa ñuena. Bífuiaímona abi omoi rairuíaí, ñue ítiomoi. Jae ñie.”

<sup>30</sup> Daíí Jerusalemo ite ínotino íaíoina Antioquíamo orédiaioi. Antioquíamo dúcíaíommo, dinomo ite ínotino dánomo gairítatiaioi afe rabe fecállena. <sup>31</sup> Afebe ámatiai facáduamona iere íóbidiaioi. Ua afe caímare llétafueri íóbidiaioi. <sup>32</sup> Judas Silas diga Juziñamuimona oga rafue jino llórediaillinoi. Ie jira íaillinoi uáillaido afe ámatiai ñue náirecaítadiaillinoi. Afe llezica íaíoina ñue comeci fírazitadiaillinoi íaioi caímare íllena. <sup>33</sup> Dinomo diga iruí íllamona, Antioquíamo ite ámatiai comeci jacínaiñenafuedo íaíoina jáitatiaioi. Daíí íaíoina uáidonocaidiaioi meine íaioi orécamaci diné jáillena. <sup>34</sup> Mei íadi Silas Antioquíamo fiébicaíllena mamérite. <sup>35</sup> Afe izói Pablo Bernabé diga Antioquíamo fiébidiaillinoi. Afe meífodo, aillo jáíe llóraini diga, llófueritiaioi. Cai Ocuíraíma Jesucristo uailai jino llotíaioi.

*Pablo dánomo nane jáizaide ñúefue llujáillena*

<sup>36</sup> Diga irui illa meífomo Pablo Bernabena daide:

—Mai dánomo meine coco jai, nauti coco llófuegano coco uáidualli. Nana íaiói jófuedo Jesucristo uallai llófueticoco, ie jira afémaci nie izói itíaióiza coco eróizai, —daide.

<sup>37</sup> Bernabé Marcos úiacade íaillinoi jaille dine. (Marcos jáífodo mameina Juan.) <sup>38</sup> Mei íadi Pablo íena úiacañede, nauti Panfilia éniemo íaióina fiénocaila jira. Iemo íaillinoi táijicanado jáíñede. <sup>39</sup> Afefue jamánomo íaillinoi riire júfidua meífodo, dáríe enénorie oni jáidiaillinoi. Ie mei Bernabé Marcos uite. Daí ñiano, nocaedo Chípreno jáidiaillinoi. <sup>40</sup> Afe llezica Pablo dama íeiena Silas nizada ote. Nízia mei, afénomo ite ámatiai Juzíñamui íaillinoi izíruillena caimare jicádiaíoi, daje izói Juzíñamui íaillinoina nabáirillena. Daí jica meífomo, oni jáínomo jáidiaillinoi. <sup>41</sup> Siria énie, Cilicia éniedo jáidiaillinoi. Afénomo Juzíñamuimo gairide ámatiai nácaitaídiaillinoi.

## 16

*Timoteo Pablo Silas diga nabáizaide*

<sup>1</sup> Derbe, Lystra jofue diga dinomo Pablo, Silas diga dúcidiaillinoi. Afénomo daa Juzíñamuimo ínotímie baizájidiaillinoi. Ie ei judíuaimona Juzíñamuimo ínotingo. Mei íadi ie moo griego ímie. <sup>2</sup> Lystramo ite ámatiai afémiedo ñue úritiaíoi naa Icóniomo ite ámatiaíri. <sup>3</sup> Pablo Timotéona ie nabaina úiacade. Ie jira ie bacano ícoi quetátate, íaiói jáillinomo ite judíuai afémiedo comeci fiene fácañeillena. Mei afémaci ie moo griego ímienana ñue onódiaíóiza. <sup>4</sup> Nana íaiói jáillado ite jófuedo lletáinafue llotíaíoi. Afe lletáinafue Jerusalemo ite orécamací ocuide éinamací diga llotátatiaíoi. <sup>5</sup> Daí Juzíñamuimo garídímaci íaiói ínuafue ñue oni mónaícaide. Afemona nágarui aillo jebuíoicaídiaíoi.

*Pablo Macedonia ímiena nicai anado ciona izói ciode*

<sup>6</sup> Asia éniemo Ñuera Joreño ñúefue íaiói llujáillana ráiruide. Ie jira Frigia énie, Galacia énie diga afe éniemo oni llujáidiaíoi. <sup>7</sup> Ie mei Misia énie fuédamo dúcidiaíoi. Dinómona Bitinia éniemo jáillana comeci facádiaíoi, mei íadi Jesús Joreño dinomo íaiói jáillana rairuide. <sup>8</sup> Ie jira jica Misia énie fuédado jáidiaíoi. Dinómona Troas ígobemo jáidiaíoi. <sup>9</sup> Dinomo afe naí Pablo nicáirilla izói ciode. Afe nicáirilla izói Macedonia énie ímiena ciode. Afémie náidaicana Páblona izire jicade; daide: “Bené Macedóniamo cai cánuaíbi,” —daide. <sup>10</sup> Daí Pablo nicai anado izói cónamona Macedóniamo cai jáillena mamériticai. Jae Juzíñamui cai járillaza ua onódicai dinomo ñúefue cai llujáillena.

*Pablo Silas diga Filipos jófuego illafue*

<sup>11</sup> Iemona Tróasmona nocaedo monaillai cigi idu Samotráciamo jáicina jáidicai. Ie jítiramo Neápolismo dúcidicai. <sup>12</sup> Dinómona Filipos jófuego jáidicai. Afe Macedonia fueda Filipos jamánomo jalléidigobe. Romano comíni afe jofue nauti nitátatino. Dinomo nano nígarui iticai. <sup>13</sup> Afe ocózinaiaruimo afe jofue jinomo jáidicai. Ua imani fuemo íaiói Juzíñamuimo iere úrizafirenanomo jáidicai. Dinomo ráinaillano ñúefuedo gairídingotiaímo úriticai. <sup>14</sup> Aféngotiaímona daango Lidia mámeciredingo. Afengo Tiatira jofue ingo. Afengo jáíire jítirede ñuera íniroi fecáraingo. Afe ringo Juzíñamuimo áinozioidingo Juzíñamuimo caimare úrillena. Iemona afengo afe ñúefuena cacáreacade. Jae Juzíñamui afengo comécina tuiñode, Pablo llogáuallai jeire óllena. <sup>15</sup> Afengo naa ie comíniri báutizagaíaiói. Báutiza mei izire jicada caína daide:

—Comeci anado omoi daííadi, Juzíñamuimo ua ínotingodicue, mai cue jofomo omoi bi, —daide.

Iemona aféngodo jáidicai.

<sup>16</sup> Afe Juzíñamuimo úrizairanomo cai jailla llezica, fiénidena jóriarede ringoza baizájidicai. Afe fiénide jóriado come ónoñega écina raíre onófirede. Afengo izire

jeruícango. Afe eici báillado aillo úcubena ie náamatiai íena ófirediaioi. <sup>17</sup> Afe ringoza Pablo diga caído jáizaide. Caillícana jaide; daide:

—Bimaci caifoide Juziñamuimo dúidiaioi. Omoi jilloille io ómoimo llotíaiioi, —daide.

<sup>18</sup> Diga iruillai daí afengo caillide. Are ie caillícana ícoimo, Pablo zefuínaite. Meine gírecaillano aféngomo ite fiénide jóriaina daide:

—Jesucristo mámeçido aféngomona ona oni orédicue, —daide.

Daí daina llezícamona afe fiénide jóriai aféngona fáicanocaillano jaide.

<sup>19</sup> Afe ringoza náamatiai daí ie finóinana ciódiaioi. Iemona:

—Jae aféngodo úcubena óñeiticai, —daidíaiioi.

Daí dainano Pablo Silas diga llaitada ríimaci uícomo aillo gairírabirimo uitíaiioi. <sup>20</sup> Riire jicánorainimo íaillinoína izájidiaioi. Daidíaiioi:

—Bíaillinoi, judío ímíai cai jófuego comínina ríicaitaíbite. <sup>21</sup> Caimo lluaíbigafuíaína jeire ónidicai. Afe izói cai ínidicai, cai bie románodicaiza, —daidíaiioi.

<sup>22</sup> Iemona afeno comíni íaillinoimo ríicaidiaioi. Riire jicánoraini íaillinoi inícuirona duiñoda rázido íaillinoína fatátate. <sup>23</sup> Iaillinoi aillo fáina meífomo, llavéracomo íaillinoína llávaiidiaioi. Afe llavéraco úñoraima riire ocuídiaioi íaillinoína ñue rairuílleña. <sup>24</sup> Afe riire ocuínafuena cacánamona llavéraco úñotímie llavéraco jamánomo jofóidicomo íaillinoína orede. Dinomo come idai jíitara íredamo íaillinoína jíitate.

<sup>25</sup> Afe naio dáaferuimo Pablo Silas diga Juziñamuimo úrillano Juziñamui ruai rotíiaillinoi. Afécomo jíáie llavécamiiai afe rúana cacádiaioi. <sup>26</sup> Iaillinoi rua llezica afe énie raire iere riire docáiricaide. Nana afe llavéraco jíaillirai izói riire mozide nofíciiai jaidínocaiga izói íficaide. Afe llezícamona llavéraco náziai túicoizite. Afemona nana llavécamiiai llójeuai tícoizite. <sup>27</sup> Iemona llavéraco úñoraima cazide. Cazídemo jae nana náziai túienana ciode. Começi anado daide: “Nana llavécamací jae ñibai botádiaioi.” Ie jira lloefai ota ie abi faitáacade. <sup>28</sup> Mei íadi Pablo íemo caillide:

—¡Dama o abina fiéni finóñeno iri; nana benó itícaiza! —daide.

<sup>29</sup> Mei jira llavéraco úñoraima bobaie jicade. Iemona Pablo diné aizícana bite. Dinomo afe jágieri abi cuidíríoicana, Pablo Silas diga íaillinoi anamo dújude. <sup>30</sup> Ie meífomo íaillinoína jino jíáinomo uillano, jicánote:

—Pablo, ¿cuemo ite fiénidífueмона cue jíilloillena ñie izói íitícue? —daide.

<sup>31</sup> Jira aféillinoi uai ote:

—O jíilloillena cai Ocuíraima Jesucrístomo íino. Iemona o dama jíllobicaitio. Daje izói o ai nana o úruiai diga ínuamona jíllobicaitiaioi, —daide.

<sup>32</sup> Iemona Juziñamui uailai íemo llotíiaillinoi naa ie jofo ero itínuáiri. <sup>33</sup> Mei íadi daje naio llavériraima íaillinoi fáina boáfiai jocode. Afemona afémie naa íaillinoi úruiairi báutizaigaiaioi. <sup>34</sup> Afe mei aféillinoína ie jofomo uillano ecade. Afémie naa ie comíni diga Juziñamuimo ínuari caimare íóbidiaioi.

<sup>35</sup> Afe jíitiramo riire jicánoraini jíáie llavériraini llavéracomo orede, Pablo íaillinoi zuitállena. <sup>36</sup> Iemona llavéraco úñoraima Páblona daide:

—Riire jicánoraini ómicoína cuena zuitátate. Mei ja birui ómicoi nífuenino uái íllena jino jáirediomicoi, —daide.

<sup>37</sup> Mei íadi Pablo llavérirainina daide:

—Romano ímiedicoco, mei íadi cócomo jicánoñeno razido cócona fatíomoi. Faano cócona llavétatiomoi. ¿Mei íadi ja birui báinino cócona zuitátatiomoi? Mei íeñedeza. Coco llavétatino mai coco zúitaíbiri, —daidíiaillinoi.

<sup>38</sup> Afefue llavériraini jicánorainimo llujáide. Lluájillamona jicánoraini jacínaitiaioi, aféillinoi romano ímienari. <sup>39</sup> Ie jira Pablo Silas diga íaillinoimo jícajidiaioi:

—Caimo ómicoi dúceai, —daízaidiaioi.

Iemona íaillinoi jino uano, íaioi jófuemona oni jáillana izire jicádiaioi. <sup>40</sup> Afe llavéracomo jino billano, Lidia jofomo jáidiaillinoi. Amatiaina cíoillano íaioina ñue náicaitadiaillinoi. Daí ñiano jáinomo oni jáidiaillinoi.

## 17

### *Tesalónicamo comuide aillo úrioinafue*

<sup>1</sup> Pablo Silas diga íaillinoi jaillano Anfípolis jófuedo jáidiaillinoi. Ie mei Apolonia jófuedo jáidiaillinoi. Afe mei Tesalónica jófueмо dúcidiaillinoi. Afénomo ite judíuai llófueriraco. <sup>2</sup> Pablo ie fibilla izói, afe llófueriracomo jofo llófuerizaide. Daámani ocózinaillaruido íaioimo úrite. <sup>3</sup> Juzíñamui jaiái Cuegáuái jino íaioimo llóollode. Aféuaimona Cristo duere finóinafue jitáirede, daí íaioimo jino llote. Daje izói Cristo tíida meine cáallena jitáirede daí jino íaioimo llote. Íaioina daide:

—Be ómoimo cue llogámie Jesús dámie Crístona, —daide.

<sup>4</sup> Mei íemona judíuaimona dámerie aféfuemo ínotiaioi. Afemona Pablo Silas íaillinoi dibénemo itábicaidiaioi. Afe izói aillo Juzíñamuimo jáináiacade griego ímiai iere ñue ínotiaioi. Afe izói aillo illaingo izóidingotíai aféuaina ínotiaioi. <sup>5</sup> Mei íadi ínoñede judíuai aféfuere úradoilla izói itíaioi. Iemona cállemo ite fiénide ráiraiedinomo gairídiaioi. Ie mei judíuai cállemo ite itínori aillo úrioinafue finódiaioi. Daí jofue comini comeci fiéni icíritadiaioi. Jasón jofomo ite Pablo Silas diga llaitállena, afeco cirínotiaioi, aféillinoi llaitada afeno comínimo izájillena. <sup>6</sup> Mei íadi íaillinoina baiñédiaioi. Ie jira Jasón zocana uitíaioi, jáie ámatiai diga. Jofue illaini uiécomo íaioina uitíaioi. Daí caillídiaioi:

—Bíaillinoi nágagobiaido fiéni faillíñeinafuiaí finódino ja benomo dúcia. <sup>7</sup> Ie mei Jasón ie jofomo íaioina llínote. Nana afe bie bitino cai caifoide romano illaíma ocuícafuiaí uáitaocana daide: “Jíáie ua cai illaíma ite, Jesús,” —daidiaioi.

<sup>8</sup> Aféfuena cacáillano ríimaci naa comíniri faillíñeidiaioi. <sup>9</sup> Jasonmo daidiaioi:

—Cai o jífueñellena uícomo o úcube caimo ine. Uire aféillinoi o oréadi o úcube meine omo íiticaí, —daidiaioi. Ie jira afe úcube íaioimo fécamona ja Jasón jáí ámatiai diga zuitádiaioi.

### *Pablo Silas diga Berea jófueмо dúcide*

<sup>10</sup> Afemona afe naio ámatiai Pablo Silas diga Beréamo raire orédiaioi. Dinomo dúcillano judíuai llófueriracomo jáidiaillinoi. <sup>11</sup> Bie judíuai Tesalónicamo ite judíuai baímo figomaci. Caímare afe úrillauaina jeire otíaioi. Nágarui Juzíñamui Cuegáuailaímo jénofirediaioi, íaioimo llogáuailaína uafue daíllena. <sup>12</sup> Afemona aillo afémacimona ínotiaioi. Daje izói griéguaímona ínotiaioi. Dájerize íñiaí íemo jáí ñue caímare jacíruigangotíai ínotiaioi. <sup>13</sup> Mei íadi Tesalónicamo ite judíuai Pablo Beréamo Juzíñamui llogáuái llófueillana fidíillano, dinomo nane comini fiéni faillíñaitaitíaioi. <sup>14</sup> Mei íadi ámatiai dama Páblona raire aféruído monáillai fuédamo orédiaioi. Ie mei Silas Timoteo diga Beréamo fiébicaide. <sup>15</sup> Pablo nabaina jáidino Atenas jófueмо íena izáijdiaioi. Íaioi meine jáidinodo Silas Timoteo diga Pablo íaillinoimo uai orede. Daide: “Cue diné iere raire ómicoi biri, dánomo cai gairílleza,” daide.

### *Pablo Aténasmo illafue*

<sup>16</sup> Nai Pablo Aténasmo Silas, Timoteo diga úíñua llezica, afe jófuedo macade. Macádemo aillo íaioi jánaraíai cíoizaide. Aferui Pablo comeci iere zúucaide. <sup>17</sup> Mei jira llófueriracomo judíuari úrite; daje izói jáie Juzíñamuimo jáináiacadinori. Nágarui jofue gairírabirimo itínuaímo llote. <sup>18</sup> Dárie “epicuro” daina llófueinafue facádotino como Pablo diga úrizaidiaioi. Daje izói, dárie “estoicos” daina llogáfuaí facádotino Pablo diga úrizaidiaioi. Dámierie daidiaioi:

—Bie aillo úrifiredimie, ¿nífue caimo llóite? —daidiaioi.

Mei íadi jíáimaci daidíaiói:

—Níbai jíáie juzíñamuillai llotímie, —daidíaiói.

Daí úritiaíói, Pablo Jesús úrillauai, ie meine cáanafue diga íaióimo llóiacana jira. <sup>19</sup> Ie mei Areópago daina illánomo íena uitíaiói. Dinomo gairífrediaíói llófueinafuena cacáillena. Dinomo íena jicánotiaíói:

—O atica cómue llófueinafuena cai onóacadicaí. <sup>20</sup> Mei ónoñegafuiaí caimo llotio. Afe bífuiaí daínana onóacadicaí, —daidíaiói.

<sup>21</sup> Nana Atenas imaci naa afénomo ite onínemaciri, cómue ráfuiaína cacáillena járitaitiaíói. Afe izóí cómofuiaí llóllena járitaitiaíói. Jíáie táijinamo járitañediaíói.

<sup>22</sup> Ie jira Pablo Areópago comini cígimo náidaillano daide:

—Atenas imaci, omoi cácarei. Aillo juzíñamuillaido iere jaináidinodíomoi. Daí omoi íllana ciódicue. <sup>23</sup> Omoi juzíñamuillai áinozillena finócafuaí illánuaíaido éroicaidicue. Dinomo daa omoi juzíñamuillaimo comeci facáranó ciódicue. Afénomo cuega uailai daide: “Bie cai ónoñega juzíñamui ie.” Bie omoi onóñoeno jaináiacana Juzíñamui, ua birui ómoímo cue lluáibigamie.

<sup>24</sup> ‘Afe énie finode Juzíñamui naa éniemo itínuaíri, afémie bie énie Naama, mona diga. Afémie comini nigácomo íñede. <sup>25</sup> Afémiemo cai nífuena finónidicaí. Nífuena llónidicaí. Mei jira dama afémie nana comínimo cáatatinona fecáfirede; daje izóí afémie jáfaicina cai ite. Ie emódomo nana ite ráaniaína afémie caimo iga.

<sup>26</sup> ‘Naga náiraíai fueñe dáziemona Juzíñamui comuítaga, naga illa dígano íaiói éniemo íllena. Iemona dájena diédicaí. Nana íaiói illínuaíai mamede. Daje izóí nano nié dino íaiói illíruillai mamede. <sup>27</sup> Daí afémie finoca afe Juzíñamui íaiói jenóllena, níbai are illa ícoínia ie íaiói báillena. Mei íadi uáfueña Juzíñamui cai illa dígamíemona jica íñede. <sup>28</sup> Mei Juzíñamuido cáadicaí. Afémiedo cai jetáacaga raana jetádicaí. Afe izóí afémiedo iticaí. Afe daje izóí ómoímona dáríe rua finua izoide llote: “Juzíñamui comuítagamacidicaí; ie izíedicaí.” <sup>29</sup> Iemona afe Juzíñamuina fia oro finoína jánarai daí comeci omoi facáñoeno iri, mei Juzíñamui comuítagamacidicaíza. Afe izóí afémiena plata finoína jánarai, ebírede nofíci finoína jánarai, daí comécido omoi daíñoeno iri. Nana bie jánaraiína daní comini comeci faca izóí finódiaíói. <sup>30</sup> Naui jaiáidíruillaido comini abina onóñediaíói; daí íllaza Juzíñamui íaióimo nai íbana oñede. Mei íadi birui náganomo itímiaína Juzíñamui ocuícana daide: “Omoímo fienu itífuaína méidori,” —daide.

<sup>31</sup> ‘Nana comínimo itífuaíai izire jicánollíruí Juzíñamui jae mamede. Aféruillaido afémie nízcamiendo jaícina caimo izire jicánoite. Juzíñamui afe nízcamiéna nana comínimo ñue jino uáfueña onótate; tíllanomona íena meine abido cáatanado nana comínina uáfodo jino fidítate, —daí Pablo llote.

<sup>32</sup> Afe tídimaci meine cáanafueña cacáillano, dáríe itínomona Pablo jífánodoídiaíói. Jíáimaci íena daidíaiói:

—Íco jíáíruido aféfuena meine nane dánomo ómona cácaíticaí, —daidíaiói.

<sup>33</sup> Iemo Pablo íaiói cígimona oni jaide. <sup>34</sup> Mei íadi dáarie iedo jáidiaíói. Jaillano ínotiaíói. Afe ínotimacimona dámie Dionísio. Afémie Areópago nímaíranimo jaináidímie. Afe ínotimacimona Dámaris mámeciredíngo ite, nai bai jíáimaciri.

## 18

### *Pablo Coríntomo illafue*

<sup>1</sup> Afe meífodo Pablo Aténasmona oni Corinto jófuemo jáizaide. <sup>2</sup> Dinomo dúcia meífomo Aquila mámecirede judío ímie baizájide. Afémie Ponto énie ímie. Afe Aquila ai Priscila. Afe íaillinoí cómoicana Itáliamona botádiaillinoí; romano caifóidíllaíma Claudio nana

judíuai Roma jófue mona oni íaiói oréina jira. Dinomo Pablo Aquila uáiduaide. <sup>3</sup> Aquila ie ai diga jédaciede iniroi tífuano bizáinicaife nitíaiói. Afe íaiói nílado úcube otíaiói. Pablo afe táijinana fibídime. Ie jira Pablo afe íaillinoiri fiébicaide, dájena íaiói táijillena. <sup>4</sup> Naga ocózinailaruimo llófueriracom Pablo llófuiáifirede. Afemona judíuaimona dáarie ínotiaíói. Afe dájerize judíoñedimacimona ja ínotiaíói.

<sup>5</sup> Jae Macedonia éniemona Silas Timoteo diga dúcidiailinoimo, Pablo ie bizáinillai nilla fáicanocaillano, dama Juzíñamui ñúefue jino llóllena iere izire llocana uite. Judíuaina uáfodo daide:

—Jesús omoi úiñogamie Cristo, —daide.

<sup>6</sup> Mei íadi judíuai íena uáitaoidiaíói. Iemo fiénide uallai nitádiaíói. Ie jira Pablo ie inícuero íaióimo faiánote. Afe faiánua daide: Iaiói íaire finócafue ícoinia afémie ícoiniañedeza, dani íaiói ícoinia.

Pablo íaióina daide:

—Dani omoi ícoinia timáritiomo. Jae ómoiri nífuenidimedicue. Biruímona judíoñedimacimo llujitice, —daide.

<sup>7</sup> Llófueriracomona jino jaillano, Justo maméidime jofomo jaide. Justo Juzíñamuimo ánozillano caimare úritime. Afémie jofo llófueriraco abimo ite. <sup>8</sup> Afe llófueriraco illaíma Crispo. Afémie naa ie comíniri Ocuíraíma Jesucristomo ínotiaíói. Afe llezica aillo Corinto jófue mo itino, Pablo lloga ñúefuiaina cacáillano áfemo ínotiaíói. Inuamona bautizagaiaíói. <sup>9</sup> Afe mei Juzíñamui Páblona nicai anado daide:

—Jacíruiñeno iri. Mai ñúefue llícaíñeno lloíri, mei o diga itícueza. <sup>10</sup> Fiénidifue na bu omo jírítanide. Nai bie jófue mo aillo cuemo ínoitínona ite, —daide.

<sup>11</sup> Iemona Pablo Coríntomo nai daa fimona átuedo Juzíñamui uallai comínimo llófullofuede.

<sup>12</sup> Mei íadi Galióna mámeciredime, Acaya éniemo illáimana illáruido nana judíuai Páblona uáitaicana gairídiaíói. Iemona íena llátano, ríimaci uiécomo uitíaiói. <sup>13</sup> Illáimana daidíaiói:

—Bímie comini cígido llófuericaide. Jáífodo Juzíñamuimo ánozilli uallai llófuecaide. Iemona afe uáillaimo cacáreidiaíói. Mei íadi afefue caimo ocuica uallai uáitaicaide, —daidíaiói.

<sup>14</sup> Pablo como úrizaidemo, illaíma Galión judíuaina daide:

—¡Judíuai, cue omoi áfedeñoeno iri! Bímie mo aillo fiénidifue ícoinia íadi, cómena fájafue izói, come merírinafue izói, ua afémie daí íadi ómoimo cacáreitice. <sup>15</sup> Mei íadi fia omoi uáillaido, omoi mámecaido júfidotíomo, ómoimo judíuai ocuícáfuiái diga. ¡Mai dani jaícina omoi finori! Aféfuiaimo izire jicánoraímana íacañedicue, —daide.

<sup>16</sup> Ie mei afémie nana íaióina jino jicánoracomona orede. <sup>17</sup> Iemona nana griéguaí Sóstenes maméidime llaitádiaíói. Sóstenes llófueriraco illaíma. Iena llátano, ríillaíma Galión uiécomo íena fáfadiaíói. Mei íadi Galión afe finócafuiaina raa daíñede.

### *Pablo Antioquíamo meine jaide dinómona ja dacaiñoámani nane llujide*

<sup>18</sup> Dino Coríntomo Pablo diga iruillai ite. Ie jáiacanaruimo, ámatiaí íraicaiño íena facádonocaidiaíói. Afe mei Pablo nocaedo Siria éniemo ruica jáizaide. Aquila ie ai Priscila diga Pábloiri jáizaidiaíói. Nai Cencrea ígobemona nai jáiñediaíóimo, Pablo ie ifo cuidode. Daí finode, jae ie naui Juzíñamuimo llogáuai fuilla jira. <sup>19</sup> Ruica jáillano jae Efeso jófue mo dúcidiáíói. Dinomo Pablo, Aquila Priscila diga fiénocaillano, llófueriracomona jaide. Aféno mo gairide judíuaimo Pablo úrizaide. <sup>20</sup> Afémaci ie íaiói diga are íllena izire jicádiaíói, mei íadi Pablo fairíoñede. <sup>21</sup> Iiraicaiño íaióina uáidonocaillano íaióina daide:

—Ja Jerusalem o íacade iráizillafue mo raire jáiacadicue, mei íadi Juzíñamui óiacania dáanommo abido ómoína érozaibitice, —daide.

Iemona nocaedo Efésomona oni monáillaido jaide. <sup>22</sup> Cesarea jófuemo dúcillano, Pablo arido Jerusalem jaide, dinomo ite Juzíñamuimo gairídino uáidollena. Afe mei oni Antioquíamo jaide. <sup>23</sup> Diga iruillai dinomo illa meífomo, meine nane nana Galacia jófuemo Pablo oni jáizaide, Frigia jofue diga. Naga jófuemo dágoberie llófuecade. Daií Pablo nana Juzíñamuimo ínotimaci comécina ñue náirecaitate.

### *Apolos Efésomo ñúefue jino llote*

<sup>24</sup> Aféruillaido judío ímie, Apólona maméidímie Efésomo dúcizaide. Afémie Alejandría jofue ímie. Afe iima uai jino llúana ñue fibídímie. Afémie Juzíñamui Cuegáuaina ñue onode. <sup>25</sup> Ocuíraima Jesucristo llogáuailaina afémie llófuegamie. Aféfuiai jino llúana iere méaicaiñeno caimare llote. Jino uáfodo Jesús ífuiaido llófuerite. Mei íadi dama Juan íaioi báutizafuena onode. Afe izói Juan Jesudo llogáfuena Apolos onode. <sup>26</sup> Apolos llófueriracomo comeci jáicaiñenado úrizaide. Mei jira Priscila Aquila diga Apolos llófueillana cacáillano, ie eneno uitíailinoi, Juzíñamui uallai baímo ñue jino jáicina llóllena. <sup>27</sup> Afe mei Apolos Acaya éniemo jáiacade. Iemona ámatiai ie abina jafue oñeno, ñue íena náicaitadiaioi. Daje llezica uícomo rabe afénomo ite ínotinomo cuetíaioi, íaioi afémiena ñue llínollena. Afémie Acáyamo dúcillano, afénomo ite ínotinona ñue canode. Juzíñamui jae íaioimo dúcaillano íaioina ínotade. <sup>28</sup> Nana comini eróicana judíuai lloga taino uai Apolos íaioimo cíotate. Afémaci Apolos jamánomo ñue jáicina jódiuaina jáanonidiaioi. Afémie Juzíñamui Cuegáuailaido nii íaioi úiñoa Cristo dámie Jesuna jino íaioimo uáfodo llóteza.

## 19

### *Pablo Efésomo meine dúcinafue*

<sup>1</sup> Apolos nai Coríntomo illa llezica, Pablo Galacia éniemo jaillano, íduai íllado jaide. Jáillano Efeso jófuemo dúcide. Dinomo ite Juzíñamuimo ínotimacina cíozaide. <sup>2</sup> Íaioimo jícanote:

—¿Meita omoi ínuamona Ñuera Joreño úicaigaomoi? —daide.

Jira afémaci uai otíaioi:

—Afe Ñuera Joreño íllana, jaca due cacáñedícaí, —daidíaioi.

<sup>3</sup> Mei jira Pablo nane jícanote:

—¿Mei bu mámecido báutizagaomoi? —daide.

Jira afémaci uai otíaioi:

—Juan mámecido báutizagacai, —daidíaioi.

<sup>4</sup> Jira Pablo íaioina daide:

—Juan lloga báutizainafue comini comécimo ite fiénidífuiai méiduana jino náiraímo cíotate. Mei íadi Juan meífodo bitímiemo ínoredíomoi ómoína daidícue. Afe bitímie Jesús; afe Jesús Juzíñamui Nízecamie Cristo, —daide.

<sup>5</sup> Aféfuena cacáillano cai Ocuídímie Jesús mámecido báutizagaiaioi. <sup>6</sup> Pablo íaioimo onoi bitamona, Ñuera Joreño íaioimo bite. Iemona afémaci jíaimaci uáillaido úritiaioi. Juzíñamuimona oga úrilla uallai jino llotíaioi. <sup>7</sup> Afémaci nibai doce dígamiediaioi.

<sup>8</sup> Pablo afe llófueriracomo daámani fíui jáicade. Dinomo comeci jáicaiñeno jino íaioimo llófuerite. Juzíñamui illáimana illáfuedo izire íaioimo jino llote íaioi ínollena. <sup>9</sup> Mei íadi dámierie comeci rairuillano aféfuena ínoacañede. Comini eróicana Juzíñamui ñúefuiaiido fiéni úritiaioi. Iemona Pablo íaioi cígimona oni jíacomo jaide. Jaillano Pablo afe Juzíñamuimo ínotinona jíáie comini llófueracomo uite. Afe llófueraco naama Tiranno. Dinomo Pablo nágaruillaido llófuiaide. <sup>10</sup> Daií dinomo mena fimona llófuerite. Iemona nana Asia énie nairai Ocuíraima Jesús llogáfuiaimo cacáreidiaioi. Judíuaimona nano diga ímiiai ínotiaioi. Afe dájerize judíoñedinomona ínotiaioi. <sup>11</sup> Juzíñamui diga áillue

ciórainina ráaniai Páblodo finode. <sup>12</sup>Uiéco dóraroillai Páblomo atídiaioi jinófene jitáaroillai diga. Aféroillai Pablo jétanona iráredimacimo uitíaioi. Afe jetácaroi íaioi llinuamona jillobicaidiaioi. Daje izói jíaimacimo ite fiénide jóriai oni jáizitiaioi.

<sup>13</sup>Afe mei macáraini judíuai dárie dúcidiaioi. Afémaci:

—Fiénide jóriaiaí comínimona oréredicai, —daidíaioi. Ja Ocuíraima Jesús mámeccido afe fiénide jóriaiaí jino oréacadiaioi. Jíaimacimo ite jóriaiaína daidíaioi:

—Pablo lloga Jesús mámeccido ja birui ómoína jino orédicai, —daidíaioi. <sup>14</sup>Afe izói judío ímie Esceva siete diga jitótiaí daidíaioi. Afe Esceva lletáriraini illaima. <sup>15</sup>Afémie jitótiaí daí dainamona afe fiénide jóriaí íaioi uai ote:

—Cue Jesuna onódicue. Daje izói Páblona onódicue; mei íadi omoi mei ¿búdiomoi? —daide.

<sup>16</sup>Daí daina mei, fiénidena jóriairedimie riire íaioína llaitade. Nana íaioína anáfenuano iere duere íaioína finode. Ja iere jamánomo duere íaioi finóinamona, afécomona émuromaiaí naa boáfiairi jino botádiaioi. <sup>17</sup>Nana Efésomo ite comini, judíuai naa judíoñedinori aféfuena fidíillano iere jacíruitiaioi. Iemona Ocuíraima Jesús mámeccina jamánomoideza daidíaioi. Afemona aillo ñúefue Jesumo nitádiaioi.

<sup>18</sup>Aillo áfemo ínotimacimona jiaí íaioi finoca fiénidifuaí uáfodo jino llotíaioi. <sup>19</sup>Daje llezica aillo nauí aiñíniaí uaimo fibídino, íaioimo ite fiénino úrilla rabénicuaí átiano nairaí eróicana jobáidiaioi. Afe jobáicanicuaí comécido facádiaioimo, jamánomo ráifide izoide, daidíaioi. “Cincuenta mil úcubetunillai dieze ráifide,” daidíaioi. <sup>20</sup>Daí Juzíñamui lloga uailai jamánomo oni móonaioicaide. Afedo Juzíñamui ríino jino cíotaioicaide.

<sup>21</sup>Afe meífodo Macedonia éniemo Acaya énie diga dino comini uáiduaillena Pablo mamérite. Afeno comini uáidua meífomo, abido Jerusalemó jáizaillena Pablo comécido daide. Afe emódomo daide:

—Jerusalemó cue jaille mei, dinómona Rómamo jáiacadicue, —daide. <sup>22</sup>Mei jira Macedóniamó mena ie canóraima Timoteo Erasto diga uícodo orede. Mei íadi Pablo nai Asiamó nano nígarui fiébide.

### *Efésomo fiénidifuedo faillíñeidiaioi*

<sup>23</sup>Aferuillaido Jesús lloga ñúefuaíri aillo fiéni faillíñeidiaioi. <sup>24</sup>Afe faillíñeinafue Demetrio como fueñe taineca. Afémie aillo ebírede ráaniaí plátamona finóraima. Juzíñamuina íaioi mamécango Artemisa, nofici finoina jánaraí. Aféngomo gairíracó izói, plátamona ráiracojina finoda, Demetrio fecáfirede. Afedo afémie ie diga táijiraimaci íena aillo úcube otíaioi. <sup>25</sup>Iemo Demetrio naa jáie daje izói táijinana fibídinori dánomo gairírdiaioi. Dinomo íaioína daide:

—Cáimaci, omoi cácarei. Bie caí táijinado ñue ráaredicai, onódiomoi. <sup>26</sup>Mei íadi baie Pablo llócaigafuena cacádiomoiiza. Afémie daide: “Comini finoca juzíñamuillaina íeñede,” daide. Ie llogáfuemo Pablo aillo comínina ínotade. Daa benó Efésomóñede daí ínotade, mei íadi nana Asia éniédo ínotaacade. <sup>27</sup>Afefue iere jacire cacaide. Afedo caí fecácaiganiaina táinocaitaíbite. Daje izói caí áillue juzíñamui caí dainango Artemisa gairíracó jalléinafuenta féitaite. Afe izói bie juzíñamui dainango jamánomo ebírenafuena jámairuitaíbite. Nana Asia énie naa jáie éniiaíri aféngomo áinozifirediaioi, —daí Demetrio daide.

<sup>28</sup>Aféfuena cacáillano, iere comécido ríicaidiaioi. Iemona caillíoicana daidíaioi:

—¡Caí Efeso imaci juzíñamui caí dainango Diana, jaca ninomo záíñeno iri! —daidíaioi.

<sup>29</sup>Iemona nana afeno jófuedo aféfuiaí iere riire júfidotiaioi. Aillo afeno comini ífo írínote. Afe llezica mena Pablo nabaide íaillinoí llaitádiaioi. Afe íaillinoí mámeccí Gayo Aristarco diga; Macedonia ímie íaillinoí. Íaioí llaita mei afémaci nairaí uícomo íaioí gairíracó íaillinoína zocana uitíaioi. <sup>30</sup>Pablo afeco jofomo comínimo úrizaiacade, mei íadi ñúefuena



ínotino afe jofo jáillena rairuídíai. <sup>31</sup> Afe llezica Asia ríimaci Pablo diga caimare úriraini, Pablo afeco jofo jáíñeillena uai íemo orédíai. <sup>32</sup> Íai. gairilla llezica, dárie jáífodo llotíai; jáímíai jáífodo jíríoicana llotíai. Mei aféfuiaíri jamánomo fiéni faillíñeíai. Ja nabénairai aféfuena onóñeíai, nífuerei gairídíai. <sup>33</sup> Mei íadi gairídino cígimona dámerie jino Alejándromo aféfuiaí llotíai. Afe Alejándrona judíuai, afeno comini uícomo judíuai abi ríiduafuedo úrillena, bai íena naidánetaí. Bai náidaillano ie ónoído íai. “Mai omoi llícai,” daíde. <sup>34</sup> Mei íadi afémie judío ímienana íai. comécido onónamona, mena hora nana caillíoicana daídíai:

—¡Cai Efeso nairai naango Artemisa, jaca ninomo záíñeno iri! —daídíai.

<sup>35</sup> Iemona afeno jofue jabóllaima ícoínia comini llícaítade. Llícaítano íai. daíde:

—Efeso nairai, omoi cácarei. Naga énie náiraíai cai iere jalleide juzíñamui daínango Artemísamo gairíracona úíñotagamacídíai, afe cai úíñuafuena onódíai. Afe daje izóí aféngona mameca monámona ana baíde jánaraina úíñotagamacídíai onódíai. <sup>36</sup> Mei bifue buna jaca jáanonideza, mai omoi llícai. Comeci facáñeno nífuena lloñeno iri. <sup>37</sup> Mei bie omoi atíca íaillíno, omoi juzíñamui daínango Artemísari fiénidífuena úríñeíai. Aféngona rícaítañeíai. <sup>38</sup> Demetrio zúucaillafue nímiemo íadi, mai jicánoraímamo llúájiri. Daje izóí afémieri tájíraini zúucaillafue íadi llúájiri. Jaca ríimaci uícomo meine abído óllena afémaci llóredíai. <sup>39</sup> Mei jáífodo omoi jicánoiacaniadi, mai ríimaci daína izóí omoi gairiri. <sup>40</sup> Ja birui jácifue mo baízaidíca. Birui omoi finócafue ícoínia, illaima anáfenuafuena caímo nítaítai. Bie omoi faillíñeíafue caímo íai. jicánoíadi, íai. uai cai ollífué jaca due íñede, —daíde.

<sup>41</sup> Daí daína meífodo, aféno mo gairídino oni raínode.

## 20

### *Pablo Macedóniamu Grecia diga díne jáillafue*

<sup>1</sup> Afe íai. faillíñeíafue llícaílla meífomo, Pablo Juzíñamuímo ínotino ñue llófuellena jírítade. Daí íai. llófuia meífomo íai. llínuano íraícaíño uáidonocaíde. Uáidonocaíllano Macedóniamu jáizaíde. <sup>2</sup> Nana aféno mo itígobíai comini uáíduaíde. Ie uáíllaído aféno mo ite ámatíai náícaítade. Afe mei Pablo ja Grecia éniemo dúcíde. <sup>3</sup> Díno mo daámani fíui llófuete. Díno mo nocaído Síriamu jáízaidemo, judíuai íena llaitáacanafuena fídíde. Ie jira arí éniédo Macedóniamu abído jáillena comece facade. <sup>4</sup> Díno mo íe nabáídino: Berea ímie Sópater; Tesalónica ímie íaillíno; Aristarco Segundo diga; Derbe ímie íaillíno; Gayo Timoteo diga; jáíe Asia énie íaillíno; Tíquico Trófimo diga. <sup>5</sup> Afe bie ámatíai uícomo Troas jófuemo caína uíñuaidíai. <sup>6</sup> Fáítara jóneñega pan güílla íráízílla meífomo, Filípomona nocaído ruica jáídíai. Ja cinco dígarui íllamona Tróasmo dúcídíai. Díno mo daa semana itícaí.

### *Pablo Troas comini uáíduafue*

<sup>7</sup> Semana nanóídíruido gairídícaí pan díxada fecállena. (Afe pan díxada güíllamona Jesucristo íraícaíño güíllamo úbicadícaí.) Güílla mei Pablo Jesumo ínotino llófuete. Afe jítíramo afémie ja jáíacade. Ie jira úríoidemo ja dáiferui ite. <sup>8</sup> Caífo jica ite caífóneco ero ícomo gairídícaí. Afe díno mo aillo unérachecoí bóotatíai. <sup>9</sup> Díno mo ite daa jítócome, Eutícóna maméídímie. Afémie jino eróírafomo ráíide. Pablo iere are úríllamona, afe jítócome jamánomo ínietaíde. Ícoínia ízire íníamona, caífona ana baíde. Afécomo dabaniámani ite. Díno mo ana éniemo baíde. Tííde caífo llínotíai. <sup>10</sup> Mei jira Pablo ana aféniemo jáíllano, íe acónímo dújuíllano íena meníñote. Afe mei ámatíaina daíde:

—Cáadeza, omoi jacínaiñeno, —daíde.

<sup>11</sup> Daií daina mei Pablo meine caifo jaide. Caifo meine dúcillano, pan ditada güillano nai íaioimo nane úrite. Da úritemo monaide. Monáillamo oni jaide. <sup>12</sup> Afe baíidimiena ñue caade uitíaoi. Iemona nana comini ñue caimare íficaidiaoi.

*Pablo Tróasmona Milétomo jáillafue*

<sup>13</sup> Ie meífomo Pablo Asonmo iodo jáiacade. Ie jira cai jáíimaci nocaedo uícomo Asonmo jáidicai dinomo Pablo otá cai úillena. <sup>14</sup> Afémiena Asonmo cai báillamona, dinómona cai nocaedo nana Mitilénemo jáidicai. <sup>15</sup> Dinómona jáillano jítiramoidiruido Quío jofue áinodo jáidicai. Afe jáíruido Samos ígobemo zíjidicai. Dinómona Trogiliomo ocózinaidicai. Afe jáíruido Milétomo dúcidicai. <sup>16</sup> Pablo Asia éniemo are íacañede. Ie jira Efésomo meine jáiacañede. Mei íadi Pablo raire Jerusalemo dúciacade, afénomo íacade Pentecostés ráfuena cíoillena, íadi nibai cíoiñeite.

*Pablo Efeso éinamacimo úrillafue*

<sup>17</sup> Nai Mileto jófuego cai illa llezica, Efésomo Juziñamuimo gairíraini éinamací jírítate. <sup>18</sup> Iaiói dúcinamona Pablo íaioina daide:

—Nano fueñe Asiamo cue dúcinamona cue ífirenana ñue onódiomoi. <sup>19</sup> Nágaruillaído comeci mánainafuedo éeiafuedo omoi cígiri iticue. Daií cai Ocuíraima Jesumo táijifiredicue. Afe llezica judíuai iere aillo duere cuena finóacadiaoi. Afedo aillo facátafuiai cuemo nitádiaoi. <sup>20</sup> Mei íadi fáicanocaiñeno nana ómoimo ñue illífuena llófuefiredicue. Daií uáfodo omoi gairíracomo ómoimo llófueriticue. Daje izói naga omoi jofomo llófuefiredicue. <sup>21</sup> Judíuaimo lloticue; daje izói judíoñedinomo lloticue. Nana íaioina daidicue: “Omoi fiénidifuiái ñúefuiaiña Juziñamui comeci jitailla izói omoi meídori. Iemona cai Ocuíraima Jesucristomo omoi ínori,” daií íaioina daidicue. <sup>22</sup> Mei birui benómona Jerusalemo jáiticue; afénomo cue jaille Juziñamui Ñuera Joreño cue ocuilla izói. Dinomo cuemo cómuitifuena óñoñedicue. <sup>23</sup> Dama dafue cue comécido onóigafue: nana cue jailla jófuedo Ñuera Joreño cue llavébillifue aillo duere cue finóbillifue diga cuena fidítate. <sup>24</sup> Mei íadi aféfuena due lloñedicue. Ocuíraima Jesús cuemo jónega táijinafuena ñue ícoimo cue fuitáadi cue cáanano cúemona ráifiñede. Afe táijinafue Juziñamui ñue caina izíruillafue comínimo llócadicue. Ua comini áizia izóidinomona cue táijina ícoimo caimare ñue dúctaiacadicue.

<sup>25</sup> ‘Omoi cígido Juziñamui illáimana illafue llócaidicue; mei birui ua onódicueza, ómoimacimona buna cuena meine cíoñeite. <sup>26</sup> Ie jira biruido daiíacadicue, ja ómoimona nífuenidimiedicue. <sup>27</sup> Mei jira nana Juziñamui caimo llófuegafuiai ómoimo uáfodo lloticue. Nífuena báinino lloñedicue. <sup>28</sup> Ie jira afe izói dani abi omo rairuiri. (Jae einamácidiomoi.) Daje izói nana Juziñamuimo gairídinona úíñori, mei jira Ñuera Joreño íaioina úíñotade. Ua Ocuíraima Jesumo gairídiño úíñotagaomoi. Afe gairídinona Jesús dama ie tíllado, ie die tóillamona dama ie comínina meine maiñode. <sup>29</sup> Cue jailla mei jáíimaci Juziñamuimo gairídinona jífueridino bíitiaoi. Ua rírede jicóniai ovéjaina fázia izói Juziñamuimo omoi ínogafuena féitatabitiaoi. <sup>30</sup> Daje izói omoi cígiri táinofuiai llóitinona iite. Afémaci uáfua féitajano táinofuiai ómoimo llóitiaoi, íñotino afe uai jeire otátallena. <sup>31</sup> Mei jira abi omoi rairuiri. Naui omoi diga cue illáfuego omoi uibíoiri. Dafimonaámani, mona naio diga ébicaillano izire ómoimona nágamíaimo fáicanocaiñeno ómoimo jino lloticue.

<sup>32</sup> ‘Mei cue ámatiai, ja birui Juziñamuimo ómoína jóoneiticue, omoi úíñollena. Daje izói Juziñamui caina izíruilla uaimo omoi comeci uibíoillena jítáidicue. Afe uai ómoína náirecaitaite. Afe daje llezica, aféuaido Juziñamui dibénemo ñue rairuícamacina ja itíomoi naa jáie ie rairuícamaciri. Mei afe rairuícamací Juziñamuido ñue finócamacidiomoi. <sup>33</sup> Jáímiemo ite úcubiaií íaioimo ite íníroillaií dama cúeiena jaca úradoíñedicue. <sup>34</sup> Mei

íadi jíáifodo, dama cue jitailla raa óllena dama cue ónoído táijidicue. Daje izói cue diga itino íena oticue. <sup>35</sup> Daíí omoi táijillena lloticue. Afe izói raana jítáidino omoi canóllena ómoína llófueticue, Ocuíraima Jesús daina uaimo comeci omoi facáoicaillena. Afémie daina uai daíí daide: “Fia iga raa llínotimie baimo, fecáfiredimie jamánomo ióbide,” —daide.

<sup>36</sup> Daíí íaioina daina meífodo, Pablo cañici ana dújuillano Moo Juzíñamuimo nana afémaciri úritiaioi. <sup>37</sup> Iemona nana éenaitiaioi. Afe llezica Páblona meníñuano ñitada cáimadotiaioi. <sup>38</sup> Afe llezica Pablo “Ja meine abido cuena cioñeitiomoi?” dáinari iere zúucaidiaioi. Afe mei fei nocaemo íraicaiño íena nabáidiaioi.

## 21

### *Pablo Jerusalemo jáillafue*

<sup>1</sup> Amatiai fuénocaillano, Cos jófuego nocaedo jaícina jáidicai. Afe jítiramo Rodas jófuego jáidicai. Dinómona Pátara jófuego jáidicai. <sup>2</sup> Afe Pátaramo Feníciameo jáiacade nocáe baiticai. Dinómona afécaedo jáidicai. <sup>3</sup> Jaillano, monaillai cigi idu Chíprena jicana ciódicai. Afe éniena jarífezi dibénemo fíanona Siria éniemo jáidicai. Afe cai jáillacaemo Tíromo fielle ráaniai illa jira afégobemo zíjidicai. <sup>4</sup> Afégobemo ite Juzíñamuimo ínotinona cióizaidicai. Dinomo siete dígarui íaioi diga iticai. Dinomo Ñuera Joreño llogáiaioi. Ie jira Páblona daidiaioi:

—Benómona Jerusalemo jáiñeno iri, —daidiaioi.

<sup>5</sup> Mei íadi afe siete dígarui illa meífodo jáidicai. Cai jáizailla llezica nana Juzíñamuimo ínotino, íaioi ringóniai naa úruiairi jofue féimo caina nabáidiaioi. Dinomo ite guamácimo ana dújuillano Juzíñamuimo iere úriticai. <sup>6</sup> Ie mei meníñota íraicaiño íaioi facádonocaidicai. Daíí ñiano nocaemo caifo jáidicai. Afémaci íaioi jófuego meine jáidiaioi.

<sup>7</sup> Tíromona biticai Tolemáidamo dúcina. Dinomo ite amatiai uáidollena darui nabáidicai. <sup>8</sup> Afe jítiramo Pablo naa íedo jáidinori dinómona Cesarea jófuego dúcidicai. Dinomo ite ñúefue llóraima Felipe jofomo jáidicai. Afémie siete dígamiede güille fecárainimona Juzíñamuimo gairíraco táijiraime. Dinomo afémie jofomo iticai. <sup>9</sup> Afe Felipe jiza nagaámazade. Nai ínindiaioi. Aféngotiai Juzíñamuimona cacana uaillai jino llotíaioi. <sup>10</sup> Afénomo diga irui iticaime, uai jino llóraima Agabo Judéamona cai uáiduaibite. <sup>11</sup> Afémie Pablo ciraigi ífe zuitáicaillano dama ie idai onoi diga maiano daide:

—Ñuera Joreño daide: “Jerusalemo judíuai bie ciraigi ífe náamana bie izói máite. Maiano íena jicánemacimo fécaitiaioi,” daide, —daíí Agabo lluaíbite.

<sup>12</sup> Aféfuena cacáillano, Cesarea imaci naa cairi, Pablo Jerusalemo jáiñeillena íemo izire jicáidicai. <sup>13</sup> Mei jira Pablo uai ote:

—¿Ñibái cuena zúucaitaiomoi? ¿Minícarí éediomoi? Cue íaioi maille baimo comécido mamériticue. Juzíñamui jítáiadi Jerusalemo cai Ocuíraima ícoinia tíiticeza, —daide.

<sup>14</sup> Afémie mámiafuena jáanonidicai. Ie jira afefue fáicanocaillano daidicai:

—Juzíñamui comeci jitailla izói omo íficaiteza, —daidicai.

<sup>15</sup> Afe meífodo, Jerusalemo jáillana finóbicai. <sup>16</sup> Cesaréamona dárie Juzíñamuimo ínotino caina nabaide. Afémaci cigimona daa Chipre ímie Mnasón ite. Afémie jae diga fimona Juzíñamuimo ínote. Afémiemo ite Jerusalemo dúciracomo jáidicai.

### *Pablo Sanatiago uáiduafue*

<sup>17</sup> Jerusalemo dúcidicaime dinomo ite amatiai caimare caina llínotiaioi. <sup>18</sup> Afe jítiramo Pablo naa cairi Santiago uáiduaidicai. Daje izói nana illáicomini afénomo itíaioi. <sup>19</sup> Pablo íaioi uáidote. Uáiduano Pablo nana íedo judíoñedinomo Juzíñamui finócafuaí jino illa dígafuaí íaioimo llote. <sup>20</sup> Iemona aféfuiaina cacáillano Juzíñamuimo caimátaioidiaioi. Jira Páblona daidiaioi:

—Mii, o llogáfuiái iere ñuera, mei íadi judíuaimona diga mil comini afe ñúefuemo ñnotiaioi ciódioza. Nana afémaci Moisés ocuica uai izói cai íllena iere jitáirede daidíai. <sup>21</sup> Mei íadi dáarie o nana jica jiáinomo ite judíuaimo llogáfueña lluaíbitiaioi. Afe íaiói cacánafue daide: “Moisés ocuica uaina jeire omoi oñeno iri.” Afe izói íaiói jitótiaí bacano ícoi quetátañedio, daidíai. Ie emódomo cai fibíllafuiaina finótañedio, daidíai. <sup>22</sup> Iemo bífuiaína cai dibénedo ¿nie izói llóitio? ¿nie izói ñéiticaí? O billáfueña comini fidíillano ua dáanomomo gáiritiaioi, —daide. Iemo Santiago nai úrillano íena daide:

<sup>23</sup> —Cai daináuai jeire o úamona aféuai izói o finolle jitáirede. Cairi benomo ite nagaámamie. Afémiaí uícomo Juzíñamuimo nauí íaiói llogáuai fuitáacadiaioi. <sup>24</sup> Bimaci o uíri. Uillano nana omoi comécimo íaífue múiñuafue mai omoi fínuairi. O úcubemona omoi ífue cuidótalle ibari. Iemona dani cuidótaitaioiza. Afe daí o finuamona, benó ite ñnote judíuái, o ñue ífirena izói ónoitiaioi. Moisés ocuífue jeire o úana fidítiaioi. Daje izói ja ónoitiaioi nana o rafue benó comínimo jiáimaci lluaíbiga táinofuiái. <sup>25</sup> Mei íadi ñnote judíoñedinomo jiáifodo jae cueticaí. Aillo judíuái finócafuiaimo íaiói jieruñeíllena lloticaí. Daa bifue íaioimo lloticaí: “Jánarai izóidemo fecaca líciaina omoi riñeno iri. Díena jiróñeno iri, daje izói cimoina cigínoga rílleniaina riñeno iri. Mai nana jiruífuiaimona abí omoi rairuiri; dama áiredimie ie ai diga illa ñuena,” —dinóride Santiago llogafue fuilla.

### *Pablo gairíracomo llaitáinafue*

<sup>26</sup> Ie mei Pablo afe nagaámamie uite; uillano afe jítiramo, íaiói comécimo ite íaífuiái múiñuafue finódiaioi. Afe meífodo jofo Juzíñamuimo gairíracomo jáidiaioi. Dinomo íaiói comécimo ite íaífuiái muiñóilliruillaí fuillíruí lluaíjidiaioi. Afe daí íaiói llúamona illa dígamierie íaiói raa fia íaiói fecállirui llotíaioi.

<sup>27</sup> Afe siete dígarui ja fúiacademo Asia éniemona bite judíuái Páblona Juzíñamuimo gairíracomo cíozai bitiaioi. Iena cíozai billano nana afeno comínina fieni faillíñaitadiaioi. Iemona Pablo llaitádiaioi. <sup>28</sup> Lláitano caillíoidiaioi:

—¡Israel nairai, cai cano! Bímie nágagobiaido nana comíniamo cai nairai uáitaoicana llófuecaide. Daje izói Moisés ocuífueña uáitaoide. Bie cai Juzíñamuimo gairíracona uáitaoide. Ie emódomo jae mena griego ímie íaillinoi jofo uite. Daí bie Juzíñamuido ñue finócaco ero bácajaibite, —daidíai.

<sup>29</sup> Nauí Pablo afe jófuedo judíoñedimie Trófimo diga nabáirillana íaiói ciónamona daí daidíai. Afe Trófimo Efeso ímie. Afémaci comeci facádiaioi, nibai Pablo Trófimona gairíraco eromo jofo uite, daidíai.

<sup>30</sup> Iemona nana afeno comini aféfuai júfidotiaioi; aféfuerei fieni faillíñaidiaioi. Afe llezica nana comini áiziaizi bitiaioi. Billano Pablo llaitádiaioi. Lláitano gairíraco jinomo zocana íena uitíaioi. Daí ñiano afe llezica gairíraco náziai íbáidiaioi. <sup>31</sup> Ja íena titáacadiaioimo, soldados igüelli illaíma ja afe aillo comini fieni faillíñainana fidide. Daje izói Pablo ja íaiói titáacanafueña fidide. <sup>32</sup> Mei jira afe illaíma ie jabóidillaímaí naa ie llaízirainiri jírrite. Jírillano afe comini illánomo aizícana jáidiaioi. Iemona nana comini llaíziraini illaíma naa ie llaízirainiri bíllana cióillano, Pablo fáajana fáicanocaidiaioi. <sup>33</sup> Afe mei afe illaíma Páblomo áinozide. Ainozillano Pablo llaitádiaioi. Lláitano mena llóejina íena maitátate. Afe mei illaíma íena daide:

—O mei ¿búdio? ¿Níífue finódio? —daide. <sup>34</sup> Mei íadi comini jamánomo jiáifodo caillíoidiaioi. Jiáimíai jiáifodo daidíai. Illaíma ífona jamánomo írinote. Jaca jefomo uibíñede, jamánomo íaiói úrioinaza. Jira illaíma llaíziraini gairíracomo íena uitátate. <sup>35</sup> Afeco caífo jáirabicimo íaiói dúcina llezica, llaíziraini Páblona caífodo rocádiaioi, comini íena llaitada íaiói fáiacana jira. <sup>36</sup> Afémie uilla óodana caillícana daidíai:

—¡Pablo dama tíideza! —daidíai.

*Pablo ie abi ríidollifue comini uiécomo llote*

<sup>37</sup> Afécomo íena uizájidiaioimo, Pablo afe llaiziraini illáimamo griego uáillaído jicánote:

—¿Meita comínimo úriredicue? —daide.

Jira aféllaíma uai ote:

—¿O griego uai úrillana ónodio? <sup>38</sup> ¿Mei o egipcio ímieñedio? Afémie nauí jíaie illáimana benó jóoneacade. Táizicimo cuatro mil come fáraini uite, —daide.

<sup>39</sup> Jira Pablo íena daide:

—Tarso jófue mo jococa judíodicue. Cilicia éniemo ite ñue onórede jofue ímiedicue. Comínimo cue úrilleza cuemo izire cácarei, —daide.

<sup>40</sup> Iemona afe illaíma Páblona fairíote. Iemo Pablo afe caífo jáirabicimo náidaillano comínina ónoído llícaítade. Iaiói úrioína llícaillamona Pablo afémaci uáillaído íaioimo úrite. (Afémaci úrilla uai ‘hebreo’ daína.) Iaióina daide:

## 22

<sup>1</sup> —Cai comini naa illáicomini diga, omoi cácarei. Cue abi ríiduafue jino llóiticueza, —daide.

<sup>2</sup> Hebreo uaido íaioína daínana cacáillano, iere tii daidíaiói. Iemona Pablo íaioína daide:

<sup>3</sup> —Cue judíodicue. Cilicia éniemo ite Tarso jófue mo jocócacue. Mei íadi benó Jerusalemo comútagacue. Afe mei Gamaliel llófuegacue. Cai jaiáidigíma ocuífaiuíai llúana iere áfemo jíeruiticue. Jaca Juzíñamui mo táijinafue mo comeci cue facai izói naa cue ríinodo iere járitafiredicue. Ua ja birui Juzíñamui ocuífafue mo omoi járitailla izói jaiái daí járitafiredicue. <sup>4</sup> Jaiái Jesumo ínotinona daje izói fállena racádicue. Afe dáruido íñíai ringóniairi llavéracomo lláviaidicue. <sup>5</sup> Lletáriraini illaini nauí comini cue lláviafue mo uai nabáiraini itíaiói. Daje izói nana illáicomini rábiai cue fécamo uai nabáiraini. Afe rábiaído Damáscómo ite cai ámatiai judíuai jénuaidicue. Dinomo ite Jesumo ínotino jénuaidicue, atída Jerusalemo íaioína duere cue finótallena.

*Pablo íemo ite fiénidifue méidua jino llote*  
(Hch 9.1-19; 26.12-18)

<sup>6</sup> ‘Mei íadi Damasco iodo jáidicue mo, ja jáiciri ítemo afe jófue mo dúciacadicue. Afe llezica monámona jamánomo riire cuemo egáíñoaíde. <sup>7</sup> Iemona éniemo baídicue. Afe llezica monámona cuena daína uai cacádicue; aféuai cuena daide: “Saulo, Saulo ¿ñibái mei cue racádio?” <sup>8</sup> Mei jira jicánoticue: “¿O mei búdio?” Jira afémie cuena daide: “Nazaret ímie Jesúsicue. Daa o racácamiedicue,” daide. <sup>9</sup> Cuedo jáidino afe egáíñuana cíóillano jacínaitiaíoi; mei íadi cuemo úrite uaina cacáñediaíoi. <sup>10</sup> Jira íena daidicue: “Ocuíraíma, ¿mei ñie izói íiticue?” Jira afémie cuena daide: “Náidacaillano o jailla Damasco jófue mo jai. Dinomo o finóllifuiaina omo llóitiaíoi,” daide. <sup>11</sup> Afe riire egáíñua cue ui dúitaga. Ie jira cue nabáíñiaí Damáscómo ónoído jainátaoicaigacue.

<sup>12</sup> ‘Aféno mo ite Ananíasna mámeçiredimie. Afémie iere Moisés ocuífafue mo ínofirede. Nana Damáscómo ite judíuai ñúefuena íemo nitáfirediaíoi. <sup>13</sup> Iemo afe Ananías cue uáiduaíbite. Billano cuena daide: “Cue ama Saulo, o ui meine nane cíoíteza,” daide. Daí daína llezica meine cue ui ñue cíoide. Afémiena cíodicue. <sup>14</sup> Mei jira afémie cuena daide: “Cai jáiairagíma Moo Juzíñamui nizécamiedio. Afémie jaiái ninómona ona nizede íemo o táijillifuiái jino omo llóllena. Ua dama Jesús fuémoma ie úrilla uáillaína cácaítio. Afe llezica jáicina ñue finófiredimiena Jesuna cíoitio. <sup>15</sup> Mei o cacánaíuiái o cíónaíuiái diga nana comini uícomo jino llóitio. <sup>16</sup> Mei birui ¿minícarí jízidío? Náidacaillano o báutizatari. Ocuíraíma Jesús mámeçimo ñue íñori. Afedo o fiénidifue jae muiñócaza,” dinori Ananías daide.

*Pablo Judíoñedinomo ie orécafue jino llote*

<sup>17</sup> Pablo nai úrite. Iaiõina daide:

—Jerusalemo meine cue billa llezica, Juziñamuimo gairíracomo úrizaidicue. Dinomonicai anado ciódicue. <sup>18</sup> Cai Ocuíraima Jesuna ciódicue. Afémie cuena daide:

—Jerusalémona mai raire oni jai. Afémaci cuedo o úrillana jieruñeitiaioi, —daide.

<sup>19</sup> Jira Ocuíraimana daidicue:

—Nana afémaci omo íinotínona llófuerracomo cue lláitainafuena onódiaioi. Llavéracomo íaiõina fácana cue uilláfuemo uibíoidiaioi. <sup>20</sup> Esteban o mámeçido úrite táijitagamie. Afémie tíide die tota llezica afénomo iticue. Aféfuemo “Jii” daidímiedicue. Ie emódomo Esteban fatímie inícuirona oni llíidicue, —daidicue. <sup>21</sup> Mei íadi Ocuíraima cuena daide:

—Mai jai. Judíoñedino cigimo jica ona óreiticue, —daide.

### *Pablo llaizíraini illaïma anamo illafue*

<sup>22</sup> Afe dinó afeno comini íanori tii daidíaioi. Mei íadi dánomo nane caillíoicana daidíaioi: —¡Bie iima dama tíideza! ¡Afémie cáaillinona íñeite! —daidíaioi.

<sup>23</sup> Nai are caillíoidiaioi. Iere icírillano dani íaiõi inícuiruai cúacoidiaioi. Afe llezica eníchomaiaí caifo táinomo júcoidiaioi. <sup>24</sup> Ie jira llaizíraini illaïma Páblona íaiõi gairíracomo orede. Oriano dinomo zechénotade ie finócafue jino llóllena, comini riire íemo fiene caillíoinafuena onóillena. <sup>25</sup> Ja maitá fállena naidánega, íemo Pablo dinomo ite jabóllaimana daide:

—¿Jicánoñeno romano ímiena fárediomoí? —daide.

<sup>26</sup> Afena cacáillano jabóllaima llaizíraini illáimamo lluájide; lluájillano daide:

—Bímiemo o duere finóacanafue o jírcaiñeno iri; afémie romano ímieza, —daide.

<sup>27</sup> Jira afe llaizíraini illaïma Páblomo jicánuaibite; daide:

—¿Ua romano ímiedio?

Jira Pablo:

—Ie mei, —daide.

<sup>28</sup> Jira afe illaïma daide:

—Aillo cue úcube baílla baïmo romano ímiena jáidicue, —daide.

Iemo Pablo daide:

—Cue jaca romano ímiena jocócacue, —daide.

<sup>29</sup> Afe daií ie dáinamona, ie zechénotino afémiemona oni raíidiaioi. Nana afémaci naa aféllaïmaoiri jacínaitiaioi ie íaiõi llaítari; afémie romano ímienana íaiõi fidínamona.

### *Pablo judúuai Nahí Ríillaini uícomo naidánetaioi*

<sup>30</sup> Afe jáíruido afe llaizíraini illaïma Páblomo íaiõi jitácafuiaina ñue jaícina onóiacade. Ie jira lletáriraini illaïni naa íaiõi ríillainiri dánomo gairítate. Afe mei Pablo llaveina llóeji zúitano íaiõi uícomo bai naidánete.

## 23

<sup>1</sup> Dinomo Pablo Nahí Ríillainimo éroicaillano daide:

—Cue ámatiai, cácarei. Jaca birui comeci mánainafuedo Juziñamui uícori caimare iticue, —daide.

<sup>2</sup> Ie jira lletáriraini illaïma Ananías Pablo abimo itino fúena putátate. <sup>3</sup> Jira Pablo íena daide:

—¡Afe izói Juziñamui ona fátaite! Jae jinóidiuaido ñue úritio, o comeci fiénide íadi. ¿Jadí ráiidio ocuica uai daína izói cuemo jicánollena? Iemona ¿ñibái mei ocuícafue uáitano cue fúena putátatio? —daide.

<sup>4</sup> Iemona afénori itino íena daidíaioi:

—¿Ñibái daií Juziñamui caifoide lletáriraimana báíñotio? —daidíaioi.

<sup>5</sup> Jira Pablo daide:

—Amatiai, afémie caifoide lletáriraima ie íllana onóñedicue. Onódicueza Cuegáuailai daide: “O jofue ríimacina báíñoñoeno iri,” —daide.

<sup>6</sup> Iemona Pablo Nahí Ríillaini cígimo itínona fidide. Afémacimona dárie fariséuaimo jaináidiaioi. Jáimaci saducéuaimo jaináidiaioi. Ie jira íaioina riire daide:

—Amatiai, cue fariséodicue. Afe emódomo fariseo ímie jitódicue. Ja birui cuemo jicánotiaioi, mei tíidimaci meine abido cáailiruimo cue úiñua jira, —daide.

<sup>7</sup> Daií daina meífomo, fariséuai saducéuai diga conímamo jofu afefue riire júfidotiaioi. Iemona afénomo gairídino dázierie bozíetaidiaioi. <sup>8</sup> Afe saducéuai tíidinona meine cáañeite daidiaioi. Afe emódomo Juzíñamui abi imácina íñede, daje izói joriaiaina íñede daidiaioi. Mei íadi fariséuai nana aféfuaimo ínotiaioi, <sup>9</sup> Nana caillídiaioi. Ie mei dárie ocuícawai llófueraini naidáidiaioi. Afémaci fariséuai dibénemo jaináidiaioi. Caifo naidáillano daide:

—Bímie fiénidifuiaina caido llócaíñede. Nibai joreño íemo úrilla; nibai Juzíñamui dibénedo úaitañeiticai, —daidiaioi.

<sup>10</sup> Afe júfiduafue riire anado jaide. Iemo llazíraini illaíma Pablo íaioi tibéruari jacínaite. Ie jira aféllaíma íaioi cígimona Páblona llazírainina oni uitátate. Uillano meine íaioi gairíracomo íena orétate.

<sup>11</sup> Afe jíáie naio Ocuíraíma Jesús Páblomo cíocaillano daide:

—Pablo, jacíruiñoeno, abi mame. Benó Jerusalem o cuedo o úrilla izói, daje izói Rómamo úrizaitio, —daide.

### *Pablo fállena mámiafue*

<sup>12</sup> Afe jíáiruido judúuaimona dáarie Pablo fállena maméritiaioi. Dani íaioi abi faidódiaioi. Jira fiénide uáillaído daidiaioi:

—Páblona nai cai fáñeille dino güíñeiticai, jíroñeiticai, —daidiaioi.

<sup>13</sup> Afe daií úritimíai cuarenta baimo jaide. <sup>14</sup> Iemona afémaci lletáriraini illáinimo naa judúuai éinamaciri jáidiaioi. Dinomo daiízaidiaioi:

—Dani cai abi fiéni daináfuedo faidódicai. Pablo cai fáñeille dino güíñeiticai, jíroñeiticai.

<sup>15</sup> Mai omoi naa jíáie Nahí Ríillainiri llazíraini illáimamo Pablo uire jiti atíllifue jica. Fia daií íemo lloíri, meine nane íemo itifue izire omoi jicánollena. Afémie nai dúciñeite, afe atica llaítada íena títaíticai, —daidiaioi.

<sup>16</sup> Mei íadi Pablo comoma afe Páblona íaioi fáiacanafuena fidízaibite. Iemona afémie llazíraini gairíracomo Páblona llujáide. <sup>17</sup> Mei jira Pablo jabóllaíma jírrillano daide:

—Bie jitócome llazíraini illáimamo úi. Afémiemo llollífuena íteza, —daide.

<sup>18</sup> Afe jabóllaíma íena uillano, llazíraini illáimana daide:

—Afe llaveca Pablo cue jírrillano bie jitócome benó cue atíllena jicade, afémiemo da llollífuena íteza, —daide.

<sup>19</sup> Afe llazíraini illaíma afémie ónoido oni eneno jicánollena uite; daide:

—¿Níifue cuemo llóiacadio? —daide.

<sup>20</sup> Jira afémie daide:

—Judúuai jae nana dáfuerrillano meine comeci facádiaioi. Uire jiti Pablo Nahí Ríillaini uícomo meine o atítallifue jicaitiaioi, meine íemo izire íaioi jicánollena. <sup>21</sup> Mei íadi íaioi jicállifue mo ínoñoeno iri. Afémacimona cuarenta baimo dígamie báinino Pablo fállena jóonetiaioi. Afe fáiacadino dani íaioi abi faidódiaioi. “Pablo nai cai fáñeille dino, güíñeiticai; daje izói jíroñeiticai,” daidiaioi. Ja birui afémie fállena ñue finóbidiaioi. Mei íadi o uai ollífuemo nai úiñoidiaioi, —daide.

<sup>22</sup> Iemona afe llazíraini illaíma afe jitócomena:

—Mai o jairi, —daide. Afe íemo ie lluáibigafuena jíáimacimo “Lloñoeno iri,” daide.

### *Caifóidillaïma Félixmo Páblona orédiaïoi*

<sup>23</sup> Mei jira afe llaizíraini illaïma mena jabóidillaïma uáidote. Uáiduano íaillinoïna daïde: —Mai doscientos díga llaizíraini mácaïtinona finóbitari. Afe llezica setenta dígamie cabállodo jáitïnona finóbitari. Afe emódomo doscientos dígamie zídaiari jáitïnona finóbitari. Nana afémaci nauilla baido Cesaréamo jáitïaïoi, —daïde.

<sup>24</sup> Afe llezica Pablo jaille cabállona finóbitade. Daje llezica Pablo ñue fañeno cáanori caifóidillaïma Félixmo uitátate. <sup>25</sup> Afémacido cuegabe orede. Afe cuegabe daïde:

<sup>26</sup> “Cue Claudio Lisias mamécacue. Jamánomo cámafuerede caifóidillaïma Félix, o uáidotïcue. <sup>27</sup> Judíuai bímie lláitano duere finótaacadiaïoi. Iena fáiacadiaïoi. Mei ie romano ímie íllana cue fidínamona cue llaizírainido íena ríiduaidïcue. <sup>28</sup> Iemo íaïoi jítácafuea onócadïcue. Ie jira judío Ríillaini uícomo íena uitátaticue. <sup>29</sup> Ie mei aillo íemo júfidogafue záilla meífomo íemo nífuena baiñédïcue. Dani íaïoïmo ocuica uai ie jeire ie oñena íemo nitádiaïoi. Mei íadi ie cue fallífuena íñede. Daje izóï ie cue llavéllifuena íñede. <sup>30</sup> Dani afémie íaïoi nane fáiacanafuea cue fidínamona, íena omo orédïcue. Afe llezica nana íemo fiénidïfuiaï nitádinona daïdicue: Mai Páblomo ní fue o nitáadi caifóidillaïma Félix uícomo o daiízairi. Mai, jae níie.”

<sup>31</sup> Mei jira nana llaizíraini íaïoi illaïma ocuilla izóï Pablo uitíaïoi. Afe naïo Antípatris jófuemo íena uitíaïoi. <sup>32</sup> Afe jítïramo eíbado jaide llaizíraini meine íaïoi íniracomo bitíaïoi. Ie mei cabállodo jáidino Pábloïri nai Cesaréamo jáidiaïoi. <sup>33</sup> Dinomo afe Cesaréamo dúcïllano, afémaci uiga cuegabe caifóidillaïmamo izájidiaïoi. Daje izóï Pablo íemo fecádiaïoi. <sup>34</sup> Afebe facádua meífodo, caifóidillaïma jicánote:

—¿O nino ímiedo?

Pablo uai ote:

—Cilicia énie ímiedïcue, —daïde.

<sup>35</sup> Ie jira íena daïde:

—Omo fiénidïfuena nitáдино bíadi ona cácaïticue, —daïde.

Afe mei Félix Páblona Herodes illaïma illaco áillocomo rairuítatïnona uitátate, afécomo íena íaïoi ñue rairuïllena.

## 24

### *Félix uícomo Pablo abi ríiduafue*

<sup>1</sup> Jubécuiro dígarui illa meífodo lletáriraini illaïma Ananías Cesaréamo bite. Afémiedo dárie énamaci bitíaïoi. Dáruido, caifóidillaïma uícomo raire úritïmie bite. Afémie mámeçi Tértulo. Nana afémaci caifóidillaïma Félix uícomo Páblomo jítácafuaï nítaïbitiaïoi. <sup>2</sup> Pablo íaïoi átïa llezica, Tértulo íemo jíidïfue riire nítade. Félixna daïde:

—Cai izíruiga caifóidillaïma, ori íóbiacadicaï. Ñue záillafue caïmo ite; íemo caïmare llícaïllafuemo iticaï. O fibíllafuedo nana ñue ocuícacaï. <sup>3</sup> Nana bífuiaïri nágagobiaïdo íóbioidicaï. Félix o iere jamánomo fígomïedio. <sup>4</sup> Mei íadi are o cue áfedoñeilleza cai úrillamo o cacáreïllena omo izire jicádicue. <sup>5</sup> Bímie fiénide duico billa izóï bíllana ciódicaï. Naga éniïaïdo llócaide judíuai oni énenorie bozíetaïllena. Afémie Nazaret ímie Jesumo ínotïno ífódmïe. <sup>6</sup> Icoïmo cai Juzíñamuïmo gairíraco ero bácajide. Ie llaitádicai ñue afémïemo cai ocuina uai daïna izóï jicánollena. <sup>7</sup> Mei íadi llaizíraini illaïma Lisias aféfuemona caïna rairuide. Iemona cai anámona íena ríifuedo oni bairode. <sup>8</sup> Afe emódomo caïna daïde: “Bie cómemo bifue jítáдино odo bírediaïoi.” Dama o afémïemo jicánorena, nana íemo cai jítácafue uáfueiteza. Daïí áfena uáfuea onóitïo, —daïde.

<sup>9</sup> Afénono jaide judíuai nana aféfuiaïna uáfuaï daïdiaïoi. <sup>10</sup> Jira Pablo úrillena caifóidillaïma ónoïdo llote. Jira Pablo daïde:



—O uícori cue abi ríidua fue jino caimare llóiticue. Jai ai diga fimona bie nairai o jicánora imana o íllana onódicueza. <sup>11</sup> Ja doce dígarui íllamona Jerusalemo Juzíñamuimo áinozillano íemo caimare úrillena dúcidicue. Aféfuena dama o jicánorena, ñue o ónoillena. <sup>12</sup> Bumo riire cue úrillana cacáñediaioi. Daje izói Juzíñamui gairíracomo comínina fi eni faillíñaitañedicue. Iemo jíái Juzíñamui llófueriracomo daje izói júfidogafuiai finótañedicue. Daje izói nairai jófuedo nífuena lloñédicue. <sup>13</sup> Nana bimaci cuena nitácafuiaina bu áfena uafue daínina. <sup>14</sup> Mei íadi dafue jino llóiticue. Judúuai fi eni mameca fiénidido jáidicue. Afe como Jesús lloga iodo cue jáillamona cai uzútiai Moo Juzíñamuimo táijidicue. Mei nana cuega ocuica uáillaina ínoticueza. Afe daje izói nana uai jino lloraini Cuegánicua imo ite uáillaina ínoticue. <sup>15</sup> Iai oi Juzíñamuimo úiñoina fue daide: “Tíidino ñuemaci fiénidimaci diga meine abido cáaitiaioi.” <sup>16</sup> Ie jira Juzíñamui uíecomo nífuenidimiena cue íllena jaca nágarui cue comeci ñue finófredicue. Afe izói comini uícomo nífuenidimiena íacadicue.

<sup>17</sup> ‘Ja diga fimona jíainuia imo cue maca meífomo, meine cue éniemo Juzíñamuimo fia fecaca úcube izáibitícue. Afe izói dúeredimacimo dúecaillano úcubena fécaibitícue. <sup>18</sup> Afe daí cue feca llezica, cue comécimo ite íaifuiai cue múiñuafuemo nícidotícue. Daí cue comeci nícidua meífodo afe úcube cue fecalle llezica, dárie Asia énie judúuai Juzíñamuimo gairíracomo cuena baitiaioi. Afénomo nai comínina figo íñena llezica iticue. Afénomo ite comínina jaca buna faillíñaitañedicue. <sup>19</sup> Afénomo cuena ciódino benomo cuemo jítaibirediaioi, cuemo ní fue íaioi nitáadi. <sup>20</sup> Mei jíáfodo nauí judúuai Nahí Ríillaini uíecomo cue illa llezica fiénidifue cuemo nauí íaioi báia di, benomo ite aféfuena cacáidino mai jino lloiri. <sup>21</sup> Aféruillaído íaioi cígiri cue illa llezica dafue riire íaio imo llotícue. Daídícue: “Ja birui cuemo jicánoti omoi tíidimaci meine abido cáailifuemo cue ínua jira.” Dño Pablo úrite.

<sup>22</sup> Félix Pablo daí daínana cacáillano, aféfuena dinó fiénocaide. Afe Jesucrístomo dibénemo itino finócafuiaina Félix ñue fibídimie. Ie jira aféfuena dinó fiénocaide. Fiénocaillano daide:

—Fui llaziraini illa ima Lisias dúciadi bie ómo imo itifue afémie cuemo ñue jino llóite, —daide.

<sup>23</sup> Iemona Félix, jabóidilla imana ocuúde Páblona nai zuitatáñellena. Mei íadi ie comini ie uáiduaibillena rairuñede. Afe izói ie íaioi cánuabillena jeruñede. Afe daí Félix Pablo figo riire llavétañede.

<sup>24</sup> Afemona afe mei dígarui íllamona, Félix meine dúcide ie ai Drusila diga. Afengo judío ingo. Félix Pablo jíiritade Jesucrístomo ínuafuedo úrillena. <sup>25</sup> Afe ínuafuedo úrilla llezica Pablo ñue jaícina jáillifuedo úrite. Afe daje izói ñue comini íllena abi rairuínafuiai llote. Ie émodomo írairuimo comini jicánollifue jino llote. Aféfuia ina cacáillano, Félix jacínaite. Jacínaillano daide:

—Mai birui jai, uire cue jítailliruido nane ona jíiriticueza, —daide.

<sup>26</sup> Afe jíáfue Félix, Pablo ie zuitalle úcube fecalle úiñote. Ie jira diga ícaño Félix íena jííiride ie diga úrillena. <sup>27</sup> Mena fimona daí íhidiaioi. Afe mei Félix ie illá imana illano fáicanocaide. Ie meífomo Porcio Festo illá imana jóonetiaioi. Félix judúuai uícori ñue íacanamona llavécamie Páblona zuitáñeno oni jaide.

## 25

### *Pablo Festo uícori abi ríidua fue*

<sup>1</sup> Ie meífomo Festo ja illá imana bite. Afe mei daruíamani íllamona Cesaréamona Jerusalemo jaide. <sup>2</sup> Dñomo lletáriraini illaini naa judúuai ríimaciri Páblomo íaioi nitácafuiiai nane Féstomo llotíaioi. <sup>3</sup> Jerusalemo abido Pablo oréllena izire jicádiaioi. Pablo io anamo

íai*oi* fallífuena maméritia*oi*. <sup>4</sup> Mei íadi Festo íai*oi* uaimo daide: Pablo nai Cesaréamo llaveca. Nano íanori íllamona afénomo nane jáitícue.” <sup>5</sup> Jira íai*oi*na daide:

—Ie jira omoi cígiri ite ríimaci mai cuedo Cesaréamo jairi. Afémiemo ní fue íadi dínomo íemo ní tajiredi*oi*, —daide.

<sup>6</sup> Festo afe Jerusalemo nano ocho ní bai diez dígarui illa meí fodo meine Cesaréamo bite. Afe jíáiruido ie ní re jícánoranomo ráinazaide. Páblona atítate. <sup>7</sup> Pablo afénomo jofo jáidemo, Jerusalémona como dúcide judíuai íemo ánozidia*oi*. Ánozillano aillo fiénide ráfuiaí íemo ní adia*oi*. Mei íadi aféfuiaímo íinollífuena íñede. <sup>8</sup> Mei jira Pablo ie abí ríiduaífuena daide:

—Cue níe fiénidífuena finóñedicue. Judíuai ocuícáfuaí uáitaoíñedicue. Iai*oi* gairíraco ero bácañedicue. Daje izói romano caifóidíllaima uáillaina uáitaoíñedicue, —daide.

<sup>9</sup> Mei íadi Festo judíuai cígiri ñue íacade. Jira Páblomo jícanote:

—¿Jerusalemo abido jáiacadio omoi ní tácafuaí dínomo cue jícanolleza? —daide.

<sup>10</sup> Jira Pablo uai ote:

—Ja birui romano illaima uí como nádadícue. Ja benomo cuemo ní tácafuaí jícanorede. Mei judíuaimo ní fuenidímedícueza ñue onódio. <sup>11</sup> Cue títaite fiénidí fue cuemo íadi, áfemona abí jáanoñeítícue, mei íadi nana cuemo íai*oi* ní tácafuaí táinofue íadi, buna íai*oi*mo cuena ríifuedo izájinide. Dama romano jamánomo ocuídíllaima cuemo jícano daidícue, —daide.

<sup>12</sup> Iemo ie fidítatímíaimo úrilla meí fomo, Festo daide:

—Mei “Jamánomo ocuídíllaima cuemo jícano” daidízoa, ie jira afe jamánomo ocuídíllaimamo ona óreitícue, —daide.

### *Pablo illaima Agripa uí como illafue*

<sup>13</sup> Díga irui illa meí fomo illaima Agripa ie ai Berenice díga Cesaréamo Festo uáiduaide.

<sup>14</sup> Afénomo díga irui itíailinoímona, Festo Pablo rafue Agrípamo llote. Iena daide:

—Félix fiénocaiga llavécamié nai benomo ite. <sup>15</sup> Naui Jerusalemo cue jailla llezica, lletáriraini illaini, naa judíuai éicomíniri íemo íai*oi* ní tácafuaí cuemo llotía*oi*. Ie duere cue finótallena cuemo jícadía*oi*. <sup>16</sup> Jira íai*oi* uai otícue. Iai*oi*na daidícue: Romano ríimaci íai*oi* fibilla izói, afefue ní adímíe íemo ní tácamíe uí como conímamo jofo eróicana nai úríñenia, ní tácamíena fañédia*oi*. Afe daí táinofue ní tácamíe ie abí ríiduaífuena finórede. <sup>17</sup> Ie jira afémaci benomo billa llezica, raíre afe jíáiruido cue jícánoranomo ráinazaidícue. Ráinazaillano afe cómena atítatícue. <sup>18</sup> Mei íadi afémiemo ní adino cue comeci daína izói ní táñedia*oi*. <sup>19</sup> Daa íemo íai*oi* ní tácafue fia íai*oi* ínogafuaímo jáináidí fue. Daje izói da Jesudo úritia*oi*. Afémíena tíide daidía*oi*; mei íadi Pablo “Caade” daide. <sup>20</sup> Mei aféfuena onóñedicueza. Níe izói aféfuena ní baitícue, daidícue. Jira Páblomo jícanotícue: ¿Jerusalemo meine jáiacadio dínomo omo ní tácafuaí ñue jícanollena? <sup>21</sup> Mei íadi afémíe jamánomo ocuídíllaima Augusto íemo jícanollena jícade. Ie jira nai íena zuitáñedicue. Iena rairuídícue jíáiruido afe caifóidíllaimamo ie cue oréllena, —daide.

<sup>22</sup> Jira Agripa Féstona daide:

—Cue jíai daje izói afe íima uaimo cacáreacadícue, —daide.

Jira Festo uai ote:

—Uire jíti cácaítio, —daide.

<sup>23</sup> Afe jítiramo, Agripa Berenice díga dúcillano, áillue gairíraco nana jofo jáidia*oi*, naa llaízíraini illáiniri, naa jofue ríimaciri. Ua aillo ebire finóbillano jofo jáidia*oi*. Dínomo Festo Pablo jíiritade. <sup>24</sup> Afe mei Festo illaima Agrípana daide:

—Íllaima Agripa, nana cairi benó gairídínori, omoi cácareí. Bímiemo omoi eroí. Aillo judíuai afémíedo cuemo úritia*oi*. Benó Cesaréamo cuemo úritia*oi*; daje izói Jerusalemo izire cuemo jícadía*oi*. Jaca fáinocaiñeno ie títaacanafuena cuemo llotía*oi*. <sup>25</sup> Mei íadi

afémiemo comeci facádícue, íadi ie cue titállifuena iñede. Mei caifóidillaíma Augusto íemo jicánollena dama jicade. Jira afémiemo íena oréllena mamédícue. <sup>26</sup> Mei caifóidillaímamo afémíe rafue cue cuellífuena iñede, ¿nífue mei cúeítícue? Ie jira, Agripa, bímie o uíécomo atídícue íemo omoi jicánollena. Afedo caifóidillaímamo cue cuellífuena ónoítícue. <sup>27</sup> Mei cue comeci daíde: Da llavécamié cue oréadi, íemo íaíoi nitácafueña óñoñenia, nibái afefue táínofue, —daíde.

## 26

### *Illáíma Agripa uícori Pablo abí ríiduaífué llote*

<sup>1</sup> Jira afe Agripa Páblona daíde:

—O dama o abí ríiduaífuena llórena, —daíde.

Iemona Pablo como fueñe íaíoiímo úrite; daíde:

<sup>2</sup> —Ílláíma Agripa, cue abí ríidollífué o uícomo cue llólleri íóbídícue. Nana judíuái cuemo nitaca táínofuíai jino jaícina llóítícue. <sup>3</sup> Nana judíuái fibíllafuíaiña ñue onódízoa. Daje izóí conímamo caí úrillafueña onódío. Aferi íere íóbídícue. Ie jira fíaicana cue úrillamo o cacáreíllena jicádícue.

### *Pablo íemo itífué méíduafue uícomo fínócafuíai*

<sup>4</sup> ‘Nái cue úruenamona dama cue éniemo, daje izóí Jerusalem íaíoi cígiri nana judíuái cue illáfuena onódíaiíoi. <sup>5</sup> Daje izóí cue jítócomenanomona fariseo ímíena cue íllana onódíaiíoi. Afémaci jítaia aféfuena jino llóredícue. Cai ínogafuíaiímo afe fariséuái jamánomo riire jaináídino. <sup>6</sup> Íaíoi ínogafue izóí Juzíñamuí tíídino meine abído cáatallífuemo ínotícue. Juzíñamuí daje afe cáallífué caí jáíairagímamo llote. Afefue ícoínia biruí bie jicánollífuemo cuena atídíaiíoi. <sup>7</sup> Cai Israel doce nairái afe uícomo llogáuái fuizájillínomo úíñoidíaiíoi. Ie jira mona naío díga Juzíñamuímo áínozillano caímare úritíaiíoi. Afe izóí íemo táíjídíaiíoi. Ílláíma Agripa, afe bie daje úíñogafue ícoínia, judíuái fíénídífuíai biruí cuemo nitádíaiíoi. <sup>8</sup> ¿Níbái mei daí comeci facádíomoi? ¿Níbái mei afe Juzíñamuí tíídino meine abído cáatallífuemo buna ínoníde, daídíomoi?

### *Pablo nauí Jesucrístomo ínotíno rácafue*

<sup>9</sup> ‘Nazaret ímie Jesús mámecímo jaináídino duere cue finótallena, nauí aféfuemo comeci facáoídícue. <sup>10</sup> Iemona Jerusalén imácina duere finótatícue. Lletárirainí illainí ríibíaido aillo Jesumo ínotínona llavéracomo íbaícotadícue. Comíní afe llavécamací titáacana llezica aféfuena fairíotícue. <sup>11</sup> Díga ícaíño íaíoiña duere finódícue, íaíoi ínogafue féítallena. Afe duere finótafue naga llófueriracuaido daí finódícue. Afe ínotínona jamánomo fíéniruidícue. Ie jira afémacina onínemaci jófuemo racádícue.

### *Pablo íemo itífué méídoínafue nane llote (Hch 9.1-19; 22.6-16)*

<sup>12</sup> ‘Bie daí comeci maméíllafuedo Damasco jófuemo jáídícue. Lletárirainí illainí ríibíaido comíní llaitállena orécacue. <sup>13</sup> Mei íadi jaíciri ía íodo jáídícuemo, jamánomo monámoma riire cuemo egáíñoacáide. Afe egáíñua jítoma egáíñua baímo meáírede. Cue abímo egáíñoacáide naa cuedo jáídínori. <sup>14</sup> Iemona nana éniemo baídícaí. Hebreo uáílláido monámoma cuena daínana cacádícue; cuena daíde: “Saulo, Saulo, ¿níbái mei cue racádío? O dama o abí fíeni finódío. Aíllue juráreto jíúrainímo íte jáírede razi. Afe rázimo juráreto záítacaílla jilla izóí, afe izóí dama abí daí finódío” daíde. <sup>15</sup> Jira uai otícue: “Ocuíraíma, ¿meí o búdí?” Jira afémíe cuena daíde: “O racácamíe Jesúsícue. <sup>16</sup> Maí náídacaíllano macácana jaí. Jae cuedo o táíjillena omo cíocaidícue. Afemona biruí o cíónafuemo uai nabáíraímana ítío. Ie meífomo jíáíruido jíáífuíai omo ácatatícue. Aféfuíaiímo nane uai nabáíraímana ítío. <sup>17</sup> Ja

judíuaimona jiáie jicáneziemo ona orédicue. Dinomo ona lláitaitiaioi íadi ona jílloítaticue. <sup>18</sup> Dinó afeno imácimo ona orédicue, íaioi comeci o zuitállena. Afemona, jítifodo íaioi macáñeno úzefodo íaioi macállena o orédicue. Daje izóí nana íaioimo ona orédicue Taife íaioi náamatañellena, mei íadi Juzíñamui dibéfomo íaioi jaináillena. Afe izóí íaioimo ona orédicue cuemo íaioi íinollena. Iemona íaioimo ite fiénidifuiái dóficaite. Afe fiénidifuiái na dóficaidino íaioi feci raa máíñoitiaioi naa jiáie Juzíñamui ñue finócamaciri,” daíí Jesús cue ocuide.

### *Nícaí anado Jesús íemo ocuícáuai Pablo jeire ote*

<sup>19</sup> ‘Mei jira, illaíma Agripa, monámona cue cacánaufuena jámairuiñedicue; mei íadi áfena jeire uano fueñe Damascó imácimo afe úrilla uai jino lloticue. <sup>20</sup> Afe meífomo Jerusalén comínimo daje izóí nana judea éniédo llócaidicue. Afe izóí jiái judíoñedinomo llócaidicue. Nana íaioimo itífuiaí íaioi meídollena riire lloticue. Iemona Juzíñamui dibénemo íaioi íficaillena íaioi llófueticue. Ñúefuiaído íaioi macállena lloticue íaioimo ite meídogafue jino ácatallena. <sup>21</sup> Afe bífuiaí cue llua ícoínia, judíuái Juzíñamuimo gairíracomo cuena llaitada fáiacadiaioi. <sup>22</sup> Mei íadi Juzíñamui cue cánuado nai biruimo ñue jáicadicue. Naga cómemo, illáicomíni naa jamai comíniri Juzíñamuido úricaidicue. Moisés llua izóí lloticue. Jaiái uai jino llóraini llua izóí llófueticue. Nana íaioi lloga caímo ífcaítífuiaí jino lloticue. <sup>23</sup> Jaiái ninomo uícomo llotíaioi: “Cristo duere finólleza,” daídíaioi. “Afe meífomo tíite; tíillano meine abido cáate. Afe daíí fueñe tíidimiemona meine abido cáaitimiena maméllimieite.” Daíí aféfuena daídíaioi. Afe emódomo jiáífue daide: “Cristo cáaillemona, comíni jílloíllifue jino llóite. Ua caí náiraímo llóite. Daje izóí jiáie náiraíaina fidítaite,” —dínó Pablo úrite.

### *Pablo Agripa Jesucristo dibénemo jaináillena llote*

<sup>24</sup> Daíí Pablo afe abi ríiduafue llua llezica, Festo caillíoicana daide:

—¡Pablo, o uáiritaidio! Aillo rábiaí o facáduamona o ífoci uáiritaide, —daide.

<sup>25</sup> Jira Pablo uai ote:

—Fígome Festo, cue uáiricoíñedicue. Mei jiáífodo cue daínáuai ñue comécido facádorede. Aféfuiaí uafue. <sup>26</sup> Benori illaíma Agripa ite, bífuiaína ñue onódimie. Ie jira comeci mánaínafuedo afémie uíécori úriticue. Afémie nana bífuiaína ie onónana ñue onódicue. Afémie nana bífuiaí báinino izúgumo lloñégaza onode. <sup>27</sup> Illaíma Agripa, ¿uai jino llóraini llogáuaimo ínotio? O ínuana onódicue, —daide Pablo.

<sup>28</sup> Jira Agripa daide:

—¿Jesucristomo afe dibénemo cue jaináillena raíre cuena ífcaítaacadio? —daide.

<sup>29</sup> Jira Pablo íena daide:

—Raíre Crístomo jaináidimiena o ífcaíadi, o are íllamona Crístomo jaináidimiena o ífcaíadi, nai birui Juzíñamui uailaí ñue jeire o ollifue jicádicue. Afe izóí dama óieñedeza mei íadi cue Jesucristomo ínuua izóí nana cue úrillamo cacáreidino Crístomo ñue ínotinona jítáidicue. Mei íadi llójeina cue máina izóí ómoína maitátaacáñedicue, —daide.

<sup>30</sup> Pablo aféfuiaí llua meífomo, illaíma Agripa caífo náidacaide, afe caífoídillaíma Festo díga. Afe llezica ie ai Berenice nana dínó ráíiedino díga caífo náidacaidiaioi.

<sup>31</sup> Náidacaillano bai eneno jáidiaioi aféfuiaído úrillena. Dinomo jofó conímana daídíaioi:

—Baie cómemo ie títállifuena íñede. Daje izóí llavéracomo ie llavéillinona íñede, —daídíaioi.

<sup>32</sup> Jira Agripa Féstona daide:

—Bímie nauí jamánomo ocuídillaíma íemo jicánollena jicáñeniadi ja birui zuitárede, mei íadi báillaímamo jicádeza zuitánide, —daide.

## 27

*Pablo Rómamo oréinafue*

<sup>1</sup> Pablo Itáliamo oréillifuemo maméritiaioi. Iemona Pablo naa jiáie llavécamiari jabóidillaíma Júliomo izájidiaioi. Afémie Augusto llazíraini igüéllimo jainaide. <sup>2</sup> Iemona Adramitio ígobemona áillue nocaedo jáizaidicai. Afecae nana Asia énie ígobiaido zíjicana ja jáizaide. Daje llezica Tesalónica ímie Aristarco caido jaide. Tesalónica Macedonia énie jofue. <sup>3</sup> Afe jítiramoidiruido Sidón ígobemo dúcidicai. Afégobemo Julio iere caimare Páblomo úrite. Iemona Páblona rairuíñeno ie onóigamiaina uáiduajitade. Afe daíí ie onóigamiaina Pablo jitaica raana fecárediaioi. <sup>4</sup> Sidón ígobemona jáidicai. Jaillano monáillai cigi idu Chipre jarífezimo fiéicaidicai, mei jairifo jiáifodo cai ñuitáocaillamona. <sup>5</sup> Dinómona Cilicia énie áinodo Panfilia énie diga baido monáillai cigido jaitádicai. Afe mei Licia éniemo ite Mira ígobemo zíjidicai.

<sup>6</sup> Dinomo llazíraini illaíma Alejandríamona bite, Itáliamo jáizaide áillue nocaena cíozaiide. Afécaemo afémie caina nana jofo orede, afénomona afécaedo cai jáillena. <sup>7</sup> Dinómona diga irui fiaicana juare jáidicai. Icoímo Gnido jofue féifenemo dúcidicai. Mei jairifo nai jiáifodo oni cai ñuitáocaillamona monáillai cigi idu Salmón féifenedo jáidicai. Ie jira monáillai cigi idu Creta onido nefícana jáidicai. <sup>8</sup> Afe monáillai fue áinodo fiaicana juare jáidicai. Icoímo Buenos Puertos mámeciredinomo dúcidicai. Afégobe Lases jofue áinori ite.

<sup>9</sup> Jae diga iruillai fia fiaicana jáidicai. Iemo ja uáicimo áinozidicai. Iemona monáillai cigido cai jaitalle jamánomo jacírede. Ie jira Pablo íaioina izire llote; <sup>10</sup> daide:

—Cuemo úrillamo omoi cácarei. Bie cai ruica cai jaille onódicueza iere jacíreite. Cai uiga ráaniai niné táinocaite. Cai jaille nocáe daje izói táinocaite. Daje izói cai nibai coróbaizaiticai, —daide.

<sup>11</sup> Mei íadi llazíraini illaíma nocáe naama jáiacanafue Pablo daínanafue baimo jeire ote. Daje izói afecae illaíma daína uai llazíraini illaíma jeire ote. <sup>12</sup> Afégobe uáiciai úiñollena figo jínoinede. Ie jira nana comécido daidíaioi: “Níbai Fenice ígobemo jáidicaina figora izoide,” daidíaioi. Afégobe Creta énie mona ícoi dibénemo ite. “Afe dinomo uáici záillena úiñoiticaí,” daidíaioi.

*Monáillaimo jamánomo riírede jairifo noci diga jáiñuafue*

<sup>13</sup> Afe jiáiruido mona átue dinena jairifo fiaicana fúuoide. Jira áfemo ínotiaioi ruica íaioi jáitallena. Afemona jáizaidicai. Afe Creta énie áinodo jáidicai. <sup>14</sup> Mei íadi due afe meífodo riírede jairifo cai jailla nocáe riire ñuitaíbite. Ua afecae riire aiñóicaide. <sup>15</sup> Mei cai jáiacananomo jáinina jira, “Dama jairifo niné uigacai,” daidíaioi. <sup>16</sup> Iemona duera monáillai cigi idu Claudia jinófenado jáidicai. Dinomo jairifo caina riire fúuoíñede. Ie jira cai abido uiga dúecae, fiaicana juare caifo bitádicai. <sup>17</sup> Dúecae bita meífomo, áillocae jéerie ñécigaído riire jofo mozidicai. Afe mei guamáeaimo íaioi bíjizai daíi jacíruitiaioi. Afe guamáeai mámecei Sirte. Afe jágiedo íaioi ñuite vela daína áillue iniroi ana zúicoidiaioi, cai nocáe fia jairifo fiaicana úillena. <sup>18</sup> Afe jiáiruido afe jairifo riire jaiñode. Ie jira íaioi uiga ráaie como fueñe afécaemona monáillaimo dócoidiaioi. <sup>19</sup> Ja daruíamani íllamo nocáe ero táijina ráaniai dani cai ónoído monáillaimo fádoídicaí. <sup>20</sup> Aféruillaído diga irui jitoma naa úcuai diga cíóñena. Dinomo afe riírede jairifo llavécamiái izói duere cai finode. Iemona nana jíllloillena cai comécinafuaíai niné táinocaide.

<sup>21</sup> Ja diga iruillai güiñeno iticai. Ie jira Pablo íaioi cigimo naidáillano daide:

—Nana omoi cácarei. Nauí Crétamona jáiñeiticaí cue daína uaina jeire oñédiomoi. Afe cue daína uaina ñue ínotiomoinia bie izói duere zefuñedicaí. Daje izói nana cai

atica ráaniai niné táinocaiñede. <sup>22</sup> Mei íadi, birui omoi jacíruiñeno iri. Bie nocaena niné táinocaite mei íadi ómoimona buna tíiñeite. <sup>23</sup> Mei ja naio Juziñamui oreca ie abi ímie cuemo daiízaibite. Afe Juziñamuimo jaináidimiedicue. Afe izói íemo tájidimiedicue. <sup>24</sup> Afe oreca abi ímie cuena daide: “Pablo, jacínaiñeno iri. Romano jamánomo ocuídillaíma uícomo náidazaitioza. Ie jira o illa ícoinia nana nocaedo odo jáidinona Juziñamui tíillinomona jíllotaite.” Dinó Juziñamui oreca ie abi ímie cuena daide. <sup>25</sup> Ie jira abí omoi mameri. Juziñamui uaimo ínoticueza. Ie oreca ie abi ímie cuena daína izói bie cai duere zefuúllafuemoná ñue jino jáiticaíza. Afe bífuena ñue onódicue. <sup>26</sup> Mei íadi benómona daa monaillai cigí ídumo jairifo caina nétaite, —daide Pablo.

<sup>27</sup> Mena semana cai jailla meífoto daa naio Adria monaillai cai illa llezica, riírede jairifo meine abido caina úioicaide. Iemo dáaferui illa llezica, marinéruai éniemo cai ánozillana comécido onódiaioi. <sup>28</sup> Jira níe dinó afórede daínano facádiaioi. Facádiaioimo treinta y seis metros afórede. Nane afe baimo dáanomo facádiaioi. Ja veintisiete metros afórede. <sup>29</sup> Noíciaimo íaioi ñáijizaillana jacíruiñeno moi díbeaemona cuatro díga nocáe cuinara lloélloici monaillai anamo dotádiaioi. Afe mei comeci jacíruiñeno mona monailla úínotiaioi. <sup>30</sup> Afe llezica afecae marinéruai “Bie áillocaemona mai cai botallí” daní conímana daídíaioi. Afe daí íaioi botácanamona emódomo bitaca dúecae ana jáinoimo agüinetiaioi. Afe llezica jáímacina jífueacana daídíaioi: “Bie dúecaedo áillocae ífo díbeaemo jáíe cuinara lloélloici dotaiticai,” daídíaioi. Daí afe nocáe ana agüíniado jífuercadiaioi. <sup>31</sup> Mei jira Pablo llaíziraini illáimamo naa ie llaízirainiri lluno daide:

—Baimaci bie nocaemo fiébiñeno botáadi ómoimona buna jílloneilleza, —daide.

<sup>32</sup> Ie jira llaíziraini dúecae agüina ñécigai jaitádiaioi, afecae illemo baíllena.

<sup>33</sup> Afe monáidemo Pablo íaioina daide:

—Mai omoi güiri. Ja mena semana güíñediomoíza; iníñediomoí. <sup>34</sup> Izire ómoína güitátaticue. Afe omoi güille jítaírede ñue omoi jílloneilleza. Uafue ómoimona buna córobaiñeite. Daje izói omoi abímona minícana due jiza báíñeite.

<sup>35</sup> Daí daínano, Pablo daa pan llínuano nana comíni eróicana Juziñamuina “Iere figura” daide. Daí ñiano afe pan dítaide güite. <sup>36</sup> Afemona nana náreficaidiaioi. Afe daje llezica jáíno güitáioi. <sup>37</sup> Afe áillocaemo doscientos setenta y seis dígamiedicai. <sup>38</sup> Ja íaioi güíacaga güille güilla meífoto, fiébide trigo illemo dotádiaioi, afecae féecocaillena.

### *Afecae buíllafue*

<sup>39</sup> Jae monáidemo, afe éniema onóñediaioi, mei íadi guamai díga ñue itízuguaina cíodiaioi. Onóñegaza afénomo íaioi zíjizaillena maméritiaioi. <sup>40</sup> Iemona afecae cuinaina lloélloici ígai jaitádiaioi. Afe lloélloici monáillai anamo fiébicaide. Afecae datara jairábiai zuitádiaioi. Afe mei afecae uite iníroí ífófeceamo caífo jairífoto jónetiaioi. Iemona afecae oni guamáemo áinozioicaide. <sup>41</sup> Mei íadi mena meine ábiedo totínuaimo dúcidiaioi. Iemona afecae afénori ite guamáemo bíjide. Ífófece afe guamáemo jamánomo riire bíjide. Mei íadi móífece naí ñue faíridemo, monaillai bagua niné llaízéraga. <sup>42</sup> Jira afécaemo ite llaíziraini llavécamiíai fáiacadiaioi, “Íhíí bótaítiaioi” daínano. <sup>43</sup> Mei íadi afe llaíziraini illaíma Julio Páblona jíllotaacade. Mei jira íaioina fatátañede. Jáífoto ocuide nana íiana onódino illedo ícana raire uícomo dúcillena. <sup>44</sup> Jáímaci íiana onóñedíno afe nocáe lláicoízillabici emódodo jáitate. Daí nana oni fuédamo dúcidiaioi. Afe daí ñue jíllodiaioi.

1 Nana ari éniemo ñue jíllobicaidicaimo, afe monaillai cigi idu, comini cai llúamona Máltana mámeçirenana onódicaí. 2 Afedu nairai ñue caina llínotiaioi. Aillue irai bonódiaioi noci jáiñua rozírena jira. Aferai bónuana nana caina: “Mai omoi agáizaibi” daide. 3 Afe llezica Pablo záfegai llínota aférimo jóoniaide. Aferai uzire cácanamona titade jaio jino billano Pablo onoi ainide. 4 Afedu nairai afe jaio ie ónoimo agúinana cióillano, conímamo llotíaioi:

—Ñibai baie ima come fáfiredimie. Meiti monáillaimona ñue jillode íadi, Juzíñamui jaícina jóidífue nana comínimo onótaiacanamona íena raamo jíritate ie jíllóiñeillena, —daíí daidíaioi.

5 Mei íadi Pablo afe jaio iraimo jaidínota dotade; íena ñie izói ñibáiñede. 6 Nirui íena fáitaite daínano áfemo nana ocuírídiaioi. Jáífodo nino llezica íena ana dotada títaite daidíaioi. Mei íadi íena ja are úiñodiaioimo ñie izói íena ñibáiñede. Ie jira nano comécido íaioi daínauai jáífodo meídotaioi. Iemona bie Pablo Juzíñamui izóidimie daidíaioi.

7 Afe áinori afedu illaíma Publio illánuiái ite. Dinomo daruiámani afe Publio caina ñue llínote. Cai jitaica raana ñue caimo fecade. 8 Aféruillaído afe Publio moo irárede. Bírallumo diga irui bíífiredé, ie abi cuaríllari. Iemo jamánomo lluide. Afénomo Pablo íena uáiduaide. Dinomo Juzíñamuimo íena jicade. Daíí ie jica mei Pablo onoi íemo bitade. Iemona afémie jíllobicaide. 9 Afena íaioi fidínamona nana afédumo ite iráredínuiái Páblomo atídíaioi. Iemona nana jíllozítiaioi. 10 Aferi íóbillano aillo ñúefuíái caimo nitádiaioi. Afe mei nane dánomo cai jáiacanaruimo, nana cai jitaica ráaniai caimo atídíaioi.

### *Pablo Rómamo dúcinafue*

11 Afe monaillai cigi ídumo dauíámani iticaí. Afe meífodo, jáíe nocaena cióizaidicaí. Afecae nauí bie ídumo uáici zaille dino úiñote. Dinómona afecae jáillado ruica jáidicaí. Afecae Alejandría jófueмона bite. Afecae ífomo mena taino juzíñamui uíecona cuega. Afe íaillinoi mámeçí Castór Pólux. Afecae aféillinoína náamaredena mameide. 12 Dinómona Siracusa ígobemo dúcidicaí. Afégobemo daruiámani iticaí. 13 Dinómona fueda áinodo Regio ígobemo jáidicaí. Afe jáíruido jairifo mona átue dinena bíllamona Régiomona jáidicaí. Ja ménarui íllamona Puteoli ígobemo dúcidicaí. 14 Afénomo ite ámatiaí cióizaidicaí. Íaioi diga da semana cai íllena jicádiaioi. Afe mei ja Rómamo jáidicaí. 15 Jae Rómamo ite ámatiaí cai billáfueña uícodo fidídiaioi. Ie jira io anamo conímamo caimo dúcillena uícomo bitíaioi. Conímamo íaioi dúcinano “Foro de Apiona” mameide. Jáífodo daína, Apio iomo ite fecáriraco. Jáíino mámeçí “Tres Tabernas.” (Afe mámeçí dobáiñuano daína Daámani Dúcirachupi.) Afénuiáimo Pablo éroicaillano Juzíñamuimo “Iere figora” daide. Iemona Pablo comeci caimare íficaide.

16 Ie mei Rómamo dúcidicaimo llaizíraini illaíma Julio ie uiga llavécano rairuídino illáimamo izájide. Mei íadi Pablo oni eneno dama íecomo uiga. Afénomo daa llaizíraíma íena rairuide.

### *Pablo Rómamo Juzíñamui uai jino llote*

17 Rómamo íaioi dúcinamona daruiámani íllamona Pablo Roma judíuai illaini jíiritade. Íaioi gairilla llezica Pablo íaioína daide:

—Amatiaí, judíuáimo fiénidífue lloñédicue. Afe izói cai jaiáidigima fibíllafueña uáitaoíñédicue. Mei íadi Jerusalem romano comínimo lláitano izájigacue. 18 Dinomo cuemo íaioi jicánua mei, cuena zuitáacadiaioi cue íaioi titállífue íñena jira. 19 Mei íadi judíuai jáífodo cuena zuitáañediaioi. Ie jira romano jamánomo ocuídillaíma cuemo jicánorena daidicue. Mei íadi afe llezica cue náiraímo cue jítállífueña íñede. 20 Mei jira omoi diga cue úrillena jíriticue. Mei cai bie daje Israel náiraídicaí. Daje cai Mesías billífuemo comécidicaí; daje izói meine abido cai cáaillífuemo úiñoidicaí. Afe cai úiñoigafue ícoiniadí birui benó llavécamie cue llavéinana ja ciódiomoíza.

<sup>21</sup> Jira íena daidíai*oi*:

—Jaca daabe o finócafui*ai* lluabe caimo dúciñede. Daje izói afénomona bite ámatia*i* judíu*ai* o mámeçido fiénidifui*ai*na nítaibiñedia*oi*. <sup>22</sup> O comeci fácafui*ai*mo cacáreacadi*ai*. Mei náganii*ai*mo afe bie comue Jesumo jaináidinona onódicaiza uáitaoidia*oi*, —daí íena daidíai*oi*.

<sup>23</sup> Ie jira meine íai*oi* cacáillirui mamédia*oi*. Afe maméinaruimo aillo naira*i* Pablo illácomo nane gairízaibitia*oi*. Jítiramon*ai* ua nauízaidemo Pablo Juzíñamui illámana illafue íai*oi*mo llote. Moisés ocuica uáillaído Pablo Jesús dibénemo íai*oi*na ínotaacade. Afe llezica Juzíñamui uai jino llóraini cuela uáillaído Jesumo íai*oi*na ínotade. <sup>24</sup> Dárie Pablo llogáfue*mo* ínuaidia*oi*, ie mei jáimaci ínoiacañedia*oi*. <sup>25</sup> Mei íadi nana dáafue*mo* coméçiiñenamona raiízitia*oi*. Como raiíacadia*oi*mo Pablo íai*oi*na daide:

—Ñuera Joreño cai jáiáidigimacimo uai jino lloraima Isaíado ñue úrite. Afémie daide:

<sup>26</sup> Baimácimo bifue llujiri, daide:

Omo*i* uafue aféfuena cácaiti*oi*mo*i* íadi áfena ónoñeiti*oi*mo*i*.

Omo*i* uáfuena cíoi*oi*mo*i* íadi ñue fidiñeiti*oi*mo*i*.

<sup>27</sup> Mei bie comini comeci meine fi*eni* rírenamona bie ñúefuena óiacañedia*oi*. Iai*oi* ifoci jáiainamona fi*eni* cacádia*oi*.

Iai*oi* uíjia*i* nitáoidia*oi* dani íai*oi* uído áfena íai*oi* cíoi dá*i*.

Daje izói íai*oi* jefodo cácañeillena jefo íbáidia*oi*.

Afe izói coméçido cacáacañedia*oi*.

Daje izói meine cuemo bíacañedia*oi*, íai*oi* cue jíllotallena, —daí Isaías daide.

<sup>28</sup> Bifue omo*i* onoiri: biruímona bie Juzíñamui lloga jíllloillifue judíoñedimacimo llujiga. Aféfuemo afémaci ñue cacáreitia*oi*, —daide.

<sup>29</sup> Pablo daí dáinamona, judíu*ai* aillo conímamo úricana jáidia*oi*.

<sup>30</sup> Afénom*o* Pablo ie íbaca jofomo mena fimona fuitade. Nana íemo ráfui*ai* jícanuaibifiredinona ñue caimare llínofirede. <sup>31</sup> Aféruillaído Pablo Juzíñamui illámana illafue jino uáfodo comínimo llote. Afefue ie jino llole rairuide cómena íñede. Daje izói Ocuíraima Jesucrístodo diga irui llófuerite. Aféruillaído ie llófuerilla buna llótaidoñede. Mai. Jae ñie.



## ROMA COMINIMO SAN PABLO ORECABE La Carta del Apóstol San Pablo a los Romanos

### *Pablo Rómamo ite Jesumo ñnotinomo cuete*

<sup>1</sup> Cue Páblodicue; Jesucristo ocuífirégamiedicue. Juzíñamui cuena uáiduano eneno cuena nizede ie jílloa uai jino llóllena. Ua afémie orécacue; Juzíñamui mamécamedicue.

<sup>2</sup> Afe bie jílloa fue Juzíñamui jaiái nínomo uícodo ñuera Cuegáuaimo, ie uai llórainido jino llotátate. <sup>3</sup> Afe jílloa fue cai Ocuíraima Jesucristodo úrite. Afémie Juzíñamui Jitó. Iemo jáí afémie cai come izóidimie. Afe Jesucristo jaiái illaíma David méifoidigimamona jocócamie. <sup>4</sup> Mei íadi Ñuera Joreño dibénemo afe Cristo uáfodo ríinorede Juzíñamui Jitona cíotaga, mei dama tíllanomona afémie meine cáatateza. <sup>5</sup> Juzíñamui Jesucristodo, ñúefuena cuemo itátate. Aferi iere ióbodicue. Afefue cuemo illano, iere cuena canode, ie mámeçido oni jáínomo ie orécamiéna cue íllena. Bie cue ióbillafue ie mámeçido oni jáínomo cue oréllena. Afe cue oréinamona naga náiraíaido aillo Jesumo ñnotinona iite. Daje izói ie uaina jíruitinona iite. <sup>6</sup> Afémacimona Crístomo ñnotinona itíomoiça. Ie jira Jesucristo íeíena omoi íllena, Juzíñamui eneno omoi nizede.

<sup>7</sup> Mei jira nana ómoímo cueticue Roma jófuego itínodiomoi. Juzíñamui izíruigamacidiomoi. Afémiemo omoi ñue jáináíllena eneno uáidogamacidiomoi. Iemo ite caimátaillafue, naa comeci caimare uái illafue diga ómoímo fécaíteza. Nana bífuíai cai Moo Juzíñamui cai Ocuíraima Jesucristo diga, ómoímo mámeíteza.

### *Pablo Rómamo macáacade*

<sup>8</sup> Nana ómoíri fueñe Jesucristodo “íere figora,” cai Juzíñamuína daíífredicue. Ua daíí daídícue mei nágagobiaído ómoímo ite ñuera ñnogafuedo úritiaíoi. <sup>9</sup> Jaca nana cue comécido Juzíñamuímo táijidícue, ie Jitó ñuera uai jino comínimo llóllena. Nane daje izói Juzíñamuímo comécido cue úriadi, ómoímo uibíoífredicue. Aferi Juzíñamui cue uai nabáidimie. <sup>10</sup> Bie ícoi iruimo ómoímo cue jáíllena Juzíñamuímo jícaífredicue. Ua Juzíñamui comeci jitaía, nibai nibéfodo ñue cuena óreíte, ómoímo cue mácajillena. <sup>11</sup> Mei ómoína cíóacadicue, Crístomo omoi ñnogafuíaí cue cánuamona, ñue riire jáícina omoi íllena. <sup>12</sup> Ua bie ñnogafue cuemo íteza ja ómoímo ite. Afe Juzíñamuímo cai ñnogafuedo conímamo cai úrillamona, conímaíaina comécina caimare náiretaítaí.

<sup>13</sup> Juzíñamuímo ñnote ámatiaí, diga ícaíño omoi díne cue jáiacanafue ómoína cue cíóíllena, ómoímo fidítaacadícue; mei íadi nai jaca jáinidícue. Omoi díne jáiacadicue ómoímona jáíimacina Jesumo jáináíallena. Ua jeede ria llízie jofo ua izói, afe izói Jesús uaimo ñnotinona itátaacadícue. Oni jáíagobiaímona dáarie cue itata izói, daje izói, ómoímona itátacadícue. <sup>14</sup> Mei cue naga cómemo ñúefuena cue llóllena iere jítaírede. Ua iere baítáínomo llóredícue; daje izói abína onóñedinomo daa fiéñeno llóredícue. <sup>15</sup> Iemona afe izói cue dibénedo nana afe jíllóillíuái ómoímo jino ñue llúaíbiacadícue, jíca Rómamo itíomoi íadi.

### *Ñúefue riírede*

<sup>16</sup> Bie ñúefue uai jino cue llólleri méairuíñeítícue, mei aféuaimo ite Juzíñamui ríino nana áfemo ñnotino jíllóíllena. Nano fueñe judíuaina jíllotaíte, ie mei daje izói judíuáiñedinona jíllotaíte. <sup>17</sup> Bie jíllonauái Juzíñamui anamo ñue jáícina cai íllena caina fidítate. Dama Jesumo cai ñnogafuíaído Juzíñamui anamo ñue jáícina íitícaí. (Abí díne jíáíena íñede.) Jaiái Cuegáuái daíí daíde: “Ínogafuedo Juzíñamui anamo ñue jáícina íitímie, zííñona cáíte.”

*Nana énie nairai íaiói fiénidifuiái ícoínia ite*

18 Mei monámona bite Juzíñamui iere izire duere finuafue nana fiénidinomo, naa comécina jaícinaíñedinomo jaiái zúillana, ja birui fidídicaí. Dani íaióiimo ite íaífuedo ua ráfuenta ónuana rairuícaciaí. Daje izói afémaci jíáimacina ua ráfuenta onóillena jeruídíaí.

19 Cai onoiga Juzíñamui dibénemo itífuenta daje izói ñue onódiaí; mei dama afémie íemo itífuenta nana caímo cíotateza. 20 Juzíñamuimo ite ie cíóñena raa, ie finócafuiáido caímo ónoredede. Jaca énie finuaruimona afémie nahí Juzíñamui nana uáfodo ónoredede. Daje izói afémie jaca ríinorededeza uáfodo ónoredede. Bífuiaina comini náfueñediaí; íemona dani íaiói ícoínia daí ite. 21 Mei Juzíñamuina onódiaí íadi, íemo nitárede ñúefuiaina íemo nitáñediaí. Daje izói íena “Figora” daíífinidiaí. Mei jíáfodo ráííñede raamo comécidíaí. Iaiói abina onótatañede comeci jííifomo fiébicaide. 22 “Nimáírainidicaí” daíífrediaí íadi, abina onóñedinona jáidiaí. 23 Ziiño Juzíñamuimo ite ebíredífuenta ziiñoñede come jánaraina méidotiaí. Afe baimo figóñede jánaraina finódiaí. Féedinuiaí jánaraina finódiaí. Jaizai jánaraina finódiaí. Táicaide rille jánaraina finoda jeire otíaí.

24 Ie jira Juzíñamui íaióiimo ite fieni comeci óiacanafuemo íaióina zóofete. Daíí afémaci dani jofo conímamo méaífuiái finódiaí. 25 Juzíñamuimo ite ua ráfuenta íñoñeno táínofuiaí jeire otíaí. Afe emódomo ie finoca raamo ñúefue nitádiaí, mei íadi fueñe afe finode Juzíñamuimo ñúefue nitáñediaí. Daje izói ie finoca raamo caímare ánozioidiaí, mei íadi nahí Juzíñamuimo cáimadoñediaí. Bie Juzíñamuina jaca ninomo cáimadoaredicaí. Daíí íteza.

26 Mei jira Juzíñamui jíáie meáire comeci óiacanafuemo íaióina zóofete. Ringóniaí daa íaiói ini diga íllana féitatiaí; féitano aillo méaífuiái jíáinori otímaci. Juzíñamui ringóniaí jóonia izói íacañeno afe jóoniafuenta uáitatiaí. 27 Daje izói ííñiaí daa ringo diga ñue íllana féitatiaí. Féitano fieni illáfuedo íaiói abí bóobicaide, conímaíimo fieni finóllena. Afe ííñiaí conímamo méaífuiái finódiaí, íemona dani afémaci abímona comuídífueri duere zefuídíaí. Bie izói Juzíñamui íaióina duere finótate, dani íaiói comeci ífue jaícina jóíñena ícoínia.

28 Ja mei Juzíñamuina onóacañediaí, jira íaiói comeci jaícina jóíñenafuemo Juzíñamui zóofegaiaí, Juzíñamui rairuícáfuiái finódimaci íaiói íllena. 29 Afémaci naga íaífuiáiimo itíaí; comeci jaícinaíñenafuemo itíaí. Daje izói jiruírenafuemo itíaí; fieni jítainafuiáiimo itíaí; naga ráaniaína óiacanafuemo naa fiénidifuiái diga itíaí. Daje izói afémaci úradorííredino; come titáíredino. Fuiríllafuedo úritiaí. Jífuemaríírediaí; ñúeodo jáíñedino. Táínona conímamo fieni úrííredino. 30 Afémaci jíáíma jánana fieni úritiaí. Juzíñamuina éoidiaí. Daje izói ríímacimo náfueñediaí. Táínofuiáiimo comécidino. Daje izói fieni abí ínotino. Fiénidifuiáiimo comeci facada finóírediaí. Iaiói úruiaí móotiaí ocuícáfuenta jeire oñediaí. 31 Afémaci abina onóacañediaí. Iaiói daina izói finófinidiaí. Buna duéruíñediaí. Caímare uáiduano íba óñellena onóñediaí. Daje izói afémaci jíáímamo dúecaíñediaí. 32 Juzíñamui ocuíllana ñue onódiaí, íadi óiacañediaí. Afe nana bie fiénidifuiáiimo itino jaca ziiñona duere finólliaíiza, áfena jíái onódiaí. Onódiaí íadi aféfuaina féitañeno nai uícadiaí. Nane bie emódomo jíáímaci afe fiénidifuiái finua llezica, íaióina: “Caímare bie izói cai illí,” daídíaí.

## 2

*Juzíñamui nahí uafue daína izói comínimo ríire jícánote*

1 Jáíma fieni illafue ríire o jícánollena íñede. Naga come “Cue nífuenidicue” daííndiaí. Nana omoi dáafuemo itíomoi. Mei jíáímamo ite fieni illafue ríire o jícánua llezica, dama o abí duere finótaitio. Aféfuena ríire jícánotio íadi, o jíái dáafuiáiimo itio. 2 Mei jíí, bífuiáiimo itino Juzíñamui duere finótaja llezica, afémie nahí uafue daína izói ríire

jicánoteza, áfena onódicaí. <sup>3</sup> Mei o, jiáima fiēni illafue riire o jicánua llezica, o jiái daje izói dáafuiamo itio. Daií o illa llezica “Juzíñamui ie duere finóllifuemona nibai cuena jílloite,” ¿daídio? ¡jílloñeitio! <sup>4</sup> ¿Juzíñamui omo ziiñona fuiñede dúecaillafuena jámairuitio, naa omo ie járitañenafue diga? Afe bie Juzíñamui omo dúecaillafuedo, afémie o comeci ífuena ñúefue dibénemo méidotaacadeza, ¿afe jaca o comécimo úibicaiñedeza, ero ua? <sup>5</sup> Mei o, comécina iere riiredioza. O comeci ífuena méidoacañedio. Iemona o duere finóllifuiaina aillo ofítaoicaidio. Ua Juzíñamui cíocaizaibilliruimo o jaícina jóoide duere finuafue jino omo llóite. <sup>6</sup> Aféruido naga come dani íaioi finócafuiái izói, íaioimo íbátaite. <sup>7</sup> Aféruido ebíredifue jenódinomo, ziiñona cáataitino íaioimo iite. Daje llezica, nana Juzíñamui íaioimo ñúefue nitállena jenódinomo, naa ziiñona illa raa jenódino diga, Juzíñamui ziiñona cáataitino íaioimo fécaite. Aféfuaiaina jenódiaioi, mei nágarui féitañeno ñúefue dibénemo ífirediaioi. <sup>8</sup> Mei íadi aféruillaido nana fiēni abi ínotinona, Juzíñamui duere finoite. Daje izói nana ua ráfuena jeire óiacañedinona Juzíñamui ie riífuedo duere finoite, fiēnidifuiái jeire íaioi ua jira. <sup>9</sup> Nana fiēni mácafiredinomo aillo duere zefuúllifue iite, naa jamánomo íaioi comeci zúunaillifue diga. Nano fueñe daií judíuaimo iite; ie mei jiái daje izói judíuaiñedinomo cómuite. <sup>10</sup> Mei jiáifodo ñúefuiái finódinomo, Juzíñamui íemo ite ebírenafue íaioimo iite, naa comeci caimare uái illafue diga. Daje llezica Juzíñamui íaioimo ñúefue nítaitite. Nano fueñe daií judíuaimo iite, ie mei jiái daje izói judíuaiñedinomo cómuite.

<sup>11</sup> Comínimona dámie jiáie come baimo Juzíñamui gáigamie iñede. <sup>12</sup> Nana fiēni itino Moisés ocuífafuena nai onóñena llezica, íco nine táinocaitiaioi, aféfuena nai onóñenano. Daje izói nana jiáie fiēni itino Moisés ocuífafuena onódiaioi íadi, afe daje bie ocuífafuedo riire jicánolliaioi. <sup>13</sup> Mei ocuífafuena táinona cacádino Juzíñamui anamo ñue jaícina iñediaioi, mei íadi ocuífafuena jeire otino Juzíñamui anamo ñue jaícina itíaioi. <sup>14</sup> Dáarie ocuífafuena onóñede judíuaiñedinono afe ocuilla daina izói dani íaioi comécido jeire otíaioi. Iemona afémaci dani abi lletádinona itíaioi. <sup>15</sup> Mei jii, íaioi ñue mácafuedo íaioi comécimo ocuica uai cúeinana ácatafirediaioi. Afe llezica íaioi comeci úrilla uai ñue íaioi uaina nabaide. Daje llezica íaioi ífoci úrillafue fiēnidifue íaioi finóadi, áfena íaioimo llóite. Fiēnidifue nai íaioi finóñenia, <sup>16</sup> Juzíñamui comínimo riire jicánolliruimo íaioi ífoci úrillafue íaioina ráruite. Aféruillaido naga comíni báinino finoca raana Jesucristodo Juzíñamui riire jicánoite, cue lloga jílloilluiai daina izói.

### *Judíuai Moisés ocuífafuemo figo náfueñediaioi*

<sup>17</sup> Mei ja birui, “Judío ímedicue” daídio. O jílloillena, Moisés ocuífafuemo ínotio; o Juzíñamui dibénemo fiēni abina ínotio. <sup>18</sup> Juzíñamui comeci jítáinafue onódio; afe ocuífafue omo llote: “Nana o nícidogafuemo ñuera diga o nizeri”. <sup>19</sup> “Uínidino izóidino ífóllena, ñue uáfuaena onódicue,” daídio. “Daje izói jítifodo macádinona ñue egáiñollena onódicue,” daídio. <sup>20</sup> “Abina onóñedinona llófueredicue,” daídio. Daje izói, “Urue izóidino jaícina llófueredicue,” daídio. “Ua nahí ráfuena onótate uai afe cai ocuífafuemo ite,” daiífiredio. Afe izói, “Nana ífócido onóigafue caimo ite,” daídio. <sup>21</sup> Mei jiáimana llófuetio íadi, ¿nibái mei dama o abina lletáñedio? Omoi meríriñeno iri daiícadio íadi, ¿nibái mei merírifiredio? <sup>22</sup> Omoi jiruíreñeno iri, dama daiícadio íadi, ¿nibái mei jiruiredio? Jánaraiaina éoidio íadi, ¿nibái mei íaioi illácomo ite ráífide ráaniai o mériano ráaredimiena jáidio? <sup>23</sup> Ocuilla uai dibéfodo iere abi ínotio; mei íadi Juzíñamuina jámairuitio, afe daje ocuífafuena jeire o oñena ícoinia. <sup>24</sup> Meita Cuegáuai ñue daide: “Judíuaiñedinono omoi ícoinia Juzíñamuina fiēni úritiaioi.”

<sup>25</sup> Moisés ocuífafue jeire o oíadi omoi finófirena bacano ícoi quétafue uáfuaena omo ráifite. Mei íadi afe uai figo o íñoñeniadi, jaca quétañegamie izói íitio. <sup>26</sup> Mei jiáifodo, daa bacano ícoi quétañegamie ocuífafue daina izói jeire oíadi, afémie bacano ícoi quétacamie izói facádoga, quétañega íadi. <sup>27</sup> Afe bacano ícoi quétañegamie, mei íadi ocuífafue jeire

otímie, ona riire jicánoite, bacano icoi quetácamiēna o íadi, daje izói cuega ocuícáfue omo ite íadi, mei áfena jeire oñédioza. <sup>28</sup> Judíona jáillena dama jinófenemo cíoide ráaiñede. Daje izói bacano icoi quetácamiēna jáillena fia abimo cíoide ráaiñede. <sup>29</sup> Mei íadi nahí ráfuiái jáífodo jóide. Nahí jáidímie ie comécimo áfena jaide. Daje izói nahí bacano icoi quétáfue comécimo dúide. Cuega ocuilla uaimo jaináiñede; mei íadi come joréñodo ie comécimo ite. Bie izói itímie comínimona jíeruñegaza, mei íadi Juzíñamui jíeruiga.

### 3

<sup>1</sup> Judío ímiēna cue íllemona ¿mínica mei baimo óiticue? ¿Bacan quétáfue mei nibénemo ráifide? <sup>2</sup> Judío ímiēna cue íllamona áillofuiái ícoīnia ñue íiticue. Daje izói quétafuemo aillo ráifinafue ite. Nano fueñe Juzíñamui ie comeci úrilla uai Judíuaimo orede. <sup>3</sup> Iaiōimona dáarie íaiōi ínogafuēna féitaiōi. Féitaiōi íadi, Juzíñamui lloga uai jáanonide, mei afe Juzíñamui jaca féitafinidímie. <sup>4</sup> Ie íaiōi féitaja íēna nie izói nibáiñede. Mei jíífodo íteza: nana comini taino llófredino ille llezica, Juzíñamui nana ie jetáacaigafuēna nai uáfueña jáicina finode. Daií Cuegáuai úrite:

O daína uáillaimona jáicinaidímieña o íllana ónoitaiōi.

Riire o jicánua mei, comini ñue ínogamiēna íitio.

<sup>5</sup> Mei caimo ite fiénidífuedo Juzíñamui jáicinaidímie illáfueña jino uáfomo cíotaiadi ¿nie izói dáiticaí? ¿Mei Juzíñamui cai duere finóllena jáicinaíñedímie? (Jamai come úrilla izói úriticue.) <sup>6</sup> Mei íeñedeza. Mei Juzíñamui comécina jáicina íñeniadi, ¿nie izói nana énie comini riire jicánoite? Afémie jaca ninomo comécina jáicina jóidímienamona, nana náiraina riire jicánorede.

<sup>7</sup> Mei cue tánofuiáido Juzíñamui uafue nai jamánomo cue ebíruiadi, ¿nibái mei fiénidímiedicue izói Juzíñamui riire cuemo jicánote? <sup>8</sup> Bie uáfueña, ñúefue bíllena nibái mei fiénidífueña finóñedicaí. Afe bie izóidífue llófuiana dáarie caimo jítadiaiōi. Bifue caimo jítáđino comeci fiēni jítainafuedo úritiaiōi. Bie izói itino duere finólliaiōi.

#### *Nana caimo ite fiénidífue ícoīnia*

<sup>9</sup> ¿Mei níifue? ¿Cai bie judíuai jíáie comini baimo ñuera? Mei ua íeñede. Ja como fidíticaí judíuai naa jíáie comini diga riirede fiénidífue anamo itíaiōi. <sup>10</sup> Jaiái Cuegáuai daií daide:

Buna jaca íaífuenidímieña íñede.

Jaca ninó daa ñúemiēna íñede.

<sup>11</sup> Daje izói jaca ninó ñúefueña onócadímieña íñede.

Daje izói Juzíñamui daa jenódimieña íñede, ie diga íllena.

<sup>12</sup> Nana Juzíñamuiimona onido jáidiaiōi.

Afémaci dani fiénidímacina jáidiaiōi. Buna ninó ñúefue finóñēna.

Jaca ninó daa íñede.

<sup>13</sup> Iaiōi úriragoi íbaiñega raiafo izoide, mei iere íaire úritiaiōiza.

Iaiōi fueño jífueमारifrediaiōi.

Iaiōi fueño ite úrilla jaiō afoi izoide, mei jíáima jánana iere fiēni úritiaiōiza.

<sup>14</sup> Afémaci daa faidórafuiáido úritiaiōi, naa

íairede uáillaido.

<sup>15</sup> Come titállena jarire áizicaidiaiōi.

<sup>16</sup> Iaiōi fiēni illáfuedo aillo jíáimaci táinocaitadiaiōi.

Daje izói comínina zúunaitadiaiōi.

<sup>17</sup> Afémaci comeci caimare uái illáfueña onóñediaiōi.

<sup>18</sup> Daje izói afémaci Juzíñamui ñue jacírenafuemo due jiza comeci facáñediaiōi, —daií jaiái Cuegáuai daide.

19 Nana jaiái ocuícáfue daina uaina, afe ocuícáfue anamo itínomo dúide. Bífueña ñue onódicaiza. Daií Juzíñamui mamérite, nana comini úrillana llícaitalena; daje izói naga nairai Juzíñamui riire jicánollifue anamo íaiói itábicaillena. 20 Ocuica uai jeire cai úado, buna Juzíñamui anamo ñue jaícina íñeite. Ocuícáfue caina jílloñaite; daa caimo ite fiénidifuiaina caina onótate.

### *Jílloillifue cai ñnogafuedo comuide*

21 Mei birui, jácara ocuícáfue oni eneno fiano, Juzíñamui anamo ñue jaícina cai íllena afémie cómfuena caimo onótate. Bie cómfuena uai lloraini ciegánico facádoiadi ónorede. Daje izói ocuilla uai cúeinanicomona jái ónorede. 22 Juzíñamui anamo ñue jaícina cai illifue bífuedo ite. Dama Jesucristomo cai ñnuado bie izói íticaí. Nana ie uaimo ñnotinona afémie daje izói fínoite; dáamie jáimie baimo gáñeno nana dájerize jaícina jóoneite. 23 Mei naga come fiénidifuiarede; jílloite Juzíñamuimona nana jica itíaiói. 24 Mei íadi Juzíñamui caimo dúecaillanona, fia íbátáñeno ie anamo ñue jaícina caina itátate. Mei dama ie jító Jesucristodo caina jílloite. 25 Cai finoca fiénidifue íbana Juzíñamui Jesucristo tíllamo dane ote. Iemona íaifueña dogá izói iticaí. Bie múiñuafue cai ñnogafuedo caimo dúciite. Bifue daií íficaide Juzíñamuina jaícinaidimie daíllena. Mei jaiái finoca fiénidifuiái íbana raire otátáñede; afémie comécina járidoñedimie. 26 Daje izói daií íficaide birui Juzíñamui jaícinaidimie daíllena. Nana Jesumo ñnotinona Juzíñamui nai birui afémie anamo ñue jaícina itátate. Iemona Juzíñamui nai jaícinaidimiena íoicaite.

27 Ie mei ¿come abí ñnuafue mei ñie izói ite? Afe abí ñnuafue oni eneno fiébicaite. Ocuícáfuiái jeire íaiói úado nai fiéni abí ñnuafuemo itíaiói. Mei íadi Jesucristomo ñnogafuemo fiéni abí ñnollifueña íñede. 28 Nana cai llogáfuiaimona bifue jino llúana ñue baite. Dama Jesumo ñnotimie Juzíñamui anamo ñue jaícina írena. Ocuica uailai afémie jeire ua oni jáífodo joide. Afena Juzíñamui náfuñede, dama íemo ñnuana náfuete.

29 ¿Meita Juzíñamui dama judíuai íena? Ieñede. Daje izói afe Juzíñamui judíuaiñedino ie. 30 Mei jii Juzíñamui damade. Afémie baimo jáíena íñede. Afémie nana íemo ñnotinona ie anamo ñue jaícina itátate. Afémaci bacano ícoi íaiói quétajana náfuñede. Daje izói quetáñenana náfuñede. 31 Ie mei ñibaí dámie jicánoite. ¿Meita cai ñnogafuedo ocuilla uaina uáitaiticaí? Ieñedeza; úaitañeíticaí. Mei jáífodo Jesuna cai ñnuado afe ocuilla uaina uáfueña jíeruiticaí.

## 4

### *Abraham Juzíñamuimo ñnua izói cai ñnollena cai onótate*

1 Mei áfemona cai jaiáidigima Abraham dibénemo jáífue jicánoíticaí. ¿Afe Abraham mei ñie ñúefue ote? Daina uai jeire ie ófirenamona abí dine nífuena oñede. 2 Mei Abraham ie finócafuiáido Juzíñamui anamo ñue jaícina ie itábicaíadi, afémie abí ñnorede. Mei íadi Juzíñamui uícori afémie abí ñnonide. Ie finócafuiáido Juzíñamui anamo ñue jaícina itátáñega. 3 Mei jáífodo Ciegáuai daina izói, “Abraham Juzíñamuimo ñnote.” Iemona Juzíñamuimo ie ñnuado Juzíñamui íena “Íaifuenidimiedio” daide. 4 Da come táijadi, afe táijina íba fia íemo dúecaillano íñega; afe táijitatimie íena íbárede. Mei íadi cai jílloillifue cai táijicanado íba llínua izói llínnonide. 5 Mei jáífodo, dámie jílloña táijina finóñeno, ie jílloillena dama Juzíñamuimo ñnorede; mei Juzíñamui íemo ñnote íaifuiaredimiena llínnofiredeza. Mei íemo Juzíñamuimo ie ñnuado, Juzíñamui íena: “Íaifuenidimiedio,” dáite.

<sup>6</sup> Dama David come cáimafuiaido úrite. Dámie ie uícodo finócafuiaina Juzíñamui náfueñede. Ua náfueñede, mei íadi íemo ie ínuado Juzíñamui íaifuiainide dainámiena afe ínotímie jaide. Afe daiítadímie iere caimare ite. <sup>7</sup> David daináuai daide:

Iaioimo ite fiénidifuiaina Juzíñamui dogánona iere ióbidiaioi.

Daje izói íaifuiaina oni féitagamiiai iere ióbidiaioi.

<sup>8</sup> Daje izói íaioimo ite fiénidifuena náfueñegano iere caimare itíaiioi.

<sup>9</sup> ¿Meita bie cáimafuiái dama bacano ícoi quetaca judíuaimo duide? Ieñedeza; nana comíni íena mameide. Jira bacano ícoi quétañega judíuaiñedimacimo daje izói afe cáimafue íaioimo duide. Jae llotícueza Abraham Juzíñamuimo ínuado Juzíñamui íena: “Íaifuiainidímiedio,” daide. <sup>10</sup> Mei íadi ¿níruido daí íena daina? ¿Bacano ícoi quetaa mei daí daina? ¿Nibai quétañenia daí daina? Jíi, uáfueza, nai quétañena llezica daí íena daina. <sup>11</sup> Afe: “Íaifuenidímiedio,” daina méifodo, Abraham bacano ícoi quétafueña Juzíñamui ocuide. Bie quetáinafue onóillena jóonega raa izoide, Juzíñamui ja bímie ie ínuafuedo íaifuenidímie daíllena. Daí Abraham nai quétañena llezica Juzíñamuimo ie ínuamona, nana judíuaiñede ínotino moonna jaide. Iemona Juzíñamui daje izói nana afémacina: “Íaifuenidíomoi,” daide. <sup>12</sup> Uáfueza. Abraham nana afémie dama ie ínua izói ínote quetácano moo. Mei nanoide cai moo Abraham ie bacano ícoi nai quétañega ía, ñue Juzíñamuimo ínoteza.

### *Juzíñamui jica ía raíre llogáuai comíni ínuamona ñue ícoimo fuitaca*

<sup>13</sup> Mei jíi, Juzíñamui Abrahana ñuera jica ía raíre fidítauai daide. Aféuai llote: “O nana o erófene ígímaíari nana éniena máíñoitíomoi.” Abraham Juzíñamuimo jaíai uícodo ínua jira, Juzíñamui bíuai íemo llote. Fia ocuilla uai ie jeire úado Juzíñamui daí íena daíñede. Ua, dama Juzíñamuimo ie ínuado Juzíñamui íena: “Íaifuenidímiedio,” daide.

<sup>14</sup> Mei dani ocuilla uai jeire otino ñúefueña íaioi maíñoadí, íemona ínogafue comínimo figo jónoñede. Daje llezica Juzíñamui jica ía raíre llogáuai ráifinano niné feide. Mei íadi daítañedeza jíáfodo joide. Juzíñamuimo cai ínuafuedo ie caimo lloga ñúefueña maíñooredícaí. <sup>15</sup> Ocuilla uai llóina méifodo aféuai jeire oñédino duere finótalliaioi. Mei íadi ocuilla uai nai lloñena llezica, aféuai náfuenide.

<sup>16</sup> Afe Juzíñamui Abrahamo jica ía raíre llogáuai, Juzíñamui ñue riire mamede, nana íe erófene ígímaíai afe ñúefue jeire íaioi óllena. Mei jira, afe Juzíñamui lloga ñúefue, ía fecaca raa izói comíni Juzíñamuimo ínuado íaioimo írede, mei áfena íaioi ñéfina cígimona ónidiaioiza. Bífue daííacade, Juzíñamui uícodo raíre llogáuai daa ocuilla uai jeire otino íeñedeza, mei íadi nana Abraham ínua izói ínotino íe. <sup>17</sup> Iemona Abraham Juzíñamui eróicana nana cai moonna jaide. Abraham afe Juzíñamuimo ñue ínote. Jaíai Cuegáuaido Juzíñamui Abrahana daí daide: “Aillo náíraíai moonna ona jónetícue.” Afémie daí daírede, mei Juzíñamui tíidinona meine abído caátaitaredeza. Daje izói íñede ráaniaina Juzíñamui itátarede.

<sup>18</sup> Aféfuíaimo Abraham fáicanocaiñeno ínoide. Ua comíni daina izói Abraham jamánomo jónaiteza, ja úruenide. Abraham daí úruereíllinona úíñonina llezica nai Juzíñamuimo ínuano úíñoide. Afe daí Juzíñamui íena daina izói, Abraham “aílo náíraíai moonna” jaide. Juzíñamui bie izói íena daide: “O uícoide erófene ígímaíai aílo jébutiaioi,” daide. <sup>19</sup> Abraham cien fimónamo ánozide íadi, íe ínogafue jaca féíñede. Afémie jónailla izói íe aí jónaíllana onode. Ua afengo iere jónaíllamona tííacade. Jae úruena comúitanide. <sup>20</sup> Mei íadi afe llezica Abraham jíízíñeno Juzíñamuimo ínofírede. Juzíñamui jica ía raíre llogáuaina ruífruíñeno nai íemo ínoicaide. Mei jíáfodo Abraham áfena féítañeno íere

izire ñnote. Jaca comeci rairuñño Juzíñamuimo úrioicaide. Juzíñamuimo íobioicana úrite.  
<sup>21</sup> Afémie daide:

—Nana jaiái Juzíñamui jica ia raire cuemo lloga rafue Juzíñamui uáfueña cuemo zúitaite,  
 —d-aide. <sup>22</sup> Iemona, íemo ie ñnuado Juzíñamui íena daide: “Íaifuenidimiedio,” daide.

<sup>23</sup> Bie Juzíñamui Abrahana daina “Cuemo o ñnuado jae íaifuenidimiedio” daa Abrahamo cúñegaza, <sup>24</sup> mei íadi nana caimo cuega cai ñnollena. Mei jira tíllanomonca cai Ocuíraima Jesús cáatate Juzíñamuimo birui ñnoticaí. Iemo cai ñnuado caína: “Íaifuenidimiedio,” dáite. <sup>25</sup> Afe Jesús caimo ite fiénidifue ícoínia duere finótagamiéna jaide. Afe mei Juzíñamui anamo ñue jaícina nífuenino cai íllena afémie cáataga.

## 5

### *Juzíñamui “Nífuenidimiedio” daina méifomo ñue cai illifue*

<sup>1</sup> Mei afe jira, dácaíño Juzíñamui anamo ñue jaícina nífuenino cai illa mei, meine abido Juzíñamuina jáciruññeiticaí. Afe comeci caimare uái illafue cai Ocuíraima Jesucristo ie tíllado cáiena ote. <sup>2</sup> Mei jii, cai ñnuado bie afémie cai cánuafue dibénemo jónegacai. Aferi izire jaináidicaí. Iemona íobifiredicaí, mei Juzíñamuimo ite ebíredemona cáiena oni máíñoiticaíza. Afemo ocuíticaí. <sup>3</sup> Daa bie cai ocuírillamo íobiññeiticaí, mei daje izóí duere cai zefuíllifueño íobiticaí. Mei onódicaíza duere cai zefuíllifue cai comeci járitaññafue caimo comuide. <sup>4</sup> Iemo afe comeci fígomie dáinana caína jáitate. Iemo fígomie dáinana mei Juzíñamui cáimafueño úíñoifireiticaí. <sup>5</sup> Iemo bie úíñoínafue caína zúucaitaññeite, mei Juzíñamui caína ie izíruillafue ñue caimo llóteza. Bie caína ie izíruillafueña ie oreca Ñuera Joréñodo onódicaí.

<sup>6</sup> Dani cai ñéfinca cígimona jíllonidicaí. Daí cai illa llezica, Juzíñamui jica ia mamécaruimo, Jesucristo nana fiénidino ífomo tízaibite. <sup>7</sup> Biniemo comécina jaícina jóidimie tílla ífomo títimienca íñede. Mei nibai jamánomo fígomie ífomo, daa tírede. <sup>8</sup> Mei jáífodo cai fiéni illa llezica, Cristo cai ífomo cai jíllonilla tízaibite. Afedo Juzíñamui caína ie izíruillafue caimo cíotate. <sup>9</sup> Iemona ja birui Cristo tíllamona Juzíñamui anamo ñue jaícina iticaíza, ie jira íraíruimo ite duere fínuafueña, Cristo cai rairuíllado, jamánomo oni eneno íredicaí. <sup>10</sup> Nai afémie bacáuai ímácina cai illa llezica, ie Jitó cai ícoínia tíide. Daí ie tíllamona, Moo Juzíñamui comécina jáciruítanegacai. Ja birui cai comeci íena jáciruññenamona, birui ie cáanado jamánomo ñue jílloredicaí. (Ua caade Cristo Juzíñamui uícomo caído úrite. Afe daí ie úrioinado, íco bite duere cai finóllifueña jílloniticaí). <sup>11</sup> Daa bífueñedeza, nane bie emódomo cai Ocuíraima Jesucristodo Juzíñamuimo íobioiticaí, mei afe Crístodo Juzíñamuina cai jáciruññenafueña oticaíza.

### *Nanoide Adán caimo comuítagafueña Juzíñamui caína éoicaide; mei jáífodo Cristo caimo comuítagafueño Juzíñamui caimare caído eróicaide*

<sup>12</sup> Mei onógaza, dáamiemona fiénidifue nana comínido jaide. Ie mei afe fiénidifueña tíllafue daje izóí naga cómemo comuide, mei naga come fiénidifuiaredeza. <sup>13</sup> Moisés ocuilla uai nai íñena llezica, fiénidifue jaca comínido ite. Mei íadi ocuilla uai nai íñena llezica, afe fiénidifue comínimo nítañega. <sup>14</sup> Mei íadi jaiái Adán illágimamona Moisés illágimamo fiénidifuiái finódino tícoizifrediaíoi, mei títade ríino anamo itiaíoi. Juzíñamui jónega íaíoi comeci ñue úrilla uaimo náfueñediaíoi. Daí náfueñenamona íaíoi fiénidifue comuide. Mei jáífodo Adán fiénidifue Juzíñamui uáfodo lloga rairuica uai jeire ie oñenamona comuide. Mei íadi bie Moisés uícodo itino fiénidifue jáínodo comuide. Adán finoca fiénidifue izóí comuñede. Afe Adán uire biite Cristo jana.

15 Adán náfueñegafue Juzíñamui caïmo fia iga cáïmafue izóïñede. Mei dama Adán náfueñegafuedo nana comini timáritiaïoi. Mei íadi Juzíñamui raiñóñeno caïmo fecaca jíllonafue jamánomo baïmo ñuera. Dama Jesucristodo aillo comini canócaiaïoi. 16 Dáamiede finoca fiénidifue jaca Juzíñamui caïmo fecaca jíllonafue izóïñede. Mei afe daade Adán náfueñegafuemona cai duere finóbillifue zúide, mei jiáïfodo Juzíñamuimona caïmo lloga jíllonafuedo, Juzíñamui raiñóñeno aillo cominina ie dibénemo ñue jaícina itábicaite, aillo íaïoi náfueñegafuiaï íaïoïmo ite íadi. 17 Mei jii, daa come náfueñenamona titáfirede riino anamo nana comini are ninomo itíaiïoi. Mei jiáïfodo dáamiede Jesucristodo nana Juzíñamui anamo raiñóñeno ñue jaícina jóonegano, jamánomo baïmo ñuera zíiñona íaïoi ille riino óitiaïoi.

18 Mei dáii Adana náfueñegafuemona duere finóbillafue nana cominimo comuide. Daje izóï Jesucristo nífuenide comécimona tízaïbillafuemona, duere finóbiñenafue nana cominimo zuide. Daje llezica zíiñona cai illifue caïmo comuide. 19 Bie daïde: dáamiede jeire óñegafuemona nana comini fiénidifuiãredinona jáidiaïoi. Mei íadi dáamiede Jesucristo jeire ogáfuemona aillo comini Juzíñamui anamo nífuenidinona ñue jóonegaiaïoi. 20 Mei jaiaï Juzíñamui cai ocuilla uai caïmo lloga, caïmo ite fiénidifue jino uáfodo cai onóïllena. Ua, ocuilla uai llua mei caïmo ite fiénidifuiã aillo jebuide. Mei íadi daje llezica Juzíñamui caïmo dúecaïllafuiaï daje izóï afe fiénidifuiã baïmo aillo jamánomo jebuide. 21 Iemona, fiénidifue caïmo íllamona afe riïrede fiénidifue caina titárede. Daje izóï Juzíñamui caïmo izire dúecaïllano, Juzíñamui anamo nífuenino ñue jaícina cai illa llezica, cai Ocuíraïma Jesucristodo, afémie caina zíiñona cáatarede.

## 6

*Comini fiénidifuiãmo íllamona tíidino izóidiaïoi, mei íadi daje llezica afémaci Crístomo ñnuamona cáadiaïoi*

1 Nana bie caïmo llógamona ¿nie izóï dáiticaï? ¿Mei nibai fiénidifue finócana uiticaï, Juzíñamui jamánomo caïmo ie dúecaïllafue caïmo ácatallena? 2 ¡Mei íeñedeza! Cai bie ja fiénidifue dibénemo tíidinodicaïza ¿mei nie izóï, fiénidifuemo nai íoicaiticaï? 3 ¿Nai bífuena onóñediomoï? Nana cai ie báutizaïllaruimona Jesucristomo uáfuenta jainaina llezica, dáaruido afe Cristo tíilla dibénemo jaináitagacaï. 4 Mei jii, cai báutizaïllaruimona Cristo diga dáafomo raigacaï izóidicaï. Iemona aféruimo tíidinona maméidicaï. Ua tíidinona mamécacaï, áfemona Cristo ie tíillanomona meine abido cáadimiena jailla izóï, birui cáadena cai jáïllena. Daï cai jaïllano cómfuemo íocairedicaï. Mei jii, Cristo ie Moomo ite jamánomo ñuera riinodo meine cáadimiena jáitaga, íemo daje izóï afe daje riinodo cómfuemo íocairedicaï.

5 Uáfuenta dáiticaï, Cristo tíilla izóï tíidinona jae mamécacaï. Iemona daje izóï ie meine abido cáadimiena jailla izóï, dani cai tíillanomona meine cáataga izóï cómfuiaïmo íredicaï. 6 Cristo cruzmo coraïca llezica nauï fueñe cai illafue dáanomo titácaza onódicaï. Uafue, afefue titaca, nanómona cai comécimo ite fiéni gáinano caina anáfenoñeïllena. Iemona fiénidifue dibénemo rairuïcanona íñeiticaï. Daje izóï riire tájitatimie jainaina izóï, fiénidifuemo jáinaïñeiticaï. 7 Mei jii, Cristo diga tíidimie ja íaïfuemona oni jirecaïde. 8 Iemona dácaïño Cristo tíilla izóï dáanomo afémie diga, cai comeci fiéni óiacanafue tíide izóï féitaga. Nauï daï ie diga cai tíillamona, daje izóï biruïllaïdo afémie diga cai íllana ua onódicaï. 9 Mei onódicaïza, Cristo dácaïño tíillanomona meine abido cáadimiena jaide. Daï meine jaïllano ja meine abido dánomo tíiñeite. Afémie ja ménacaïño tíinide. 10 Mei Cristo ie tíïllaruïmo, fiénidifue dibénedo dácaïño tíide, jaca ninomo nane tíiñeïllena. Mei íadi afémie meine cáadena jaïllano ie cáanano Juzíñamuïmo duide. 11 Daje izóï, mai



fiénidifue dibénemo tíidino izói omoi iri. Mei jiáifodo Juzíñamui íena cáadinona mai omoi iri. Afemo izire comécimo mai omoi facáoiri, mei cai Ocuíraima Jesucrístomo dájena jaináidiomoiza.

<sup>12</sup> Ie jira fiénidifueña omoi abina náamatatañeno iri; afefue omoi ziiñona iñena abi ana úillemona abí omoi rairuiri. Mei Taife comuítaga caimo ite íaifue cai abi fieni jítainafue jino déillena ocuíoideza. Afemona izire abi omoi rairuiri. <sup>13</sup> Dani omoi abina fiénidifueña finótañeno iri. Mei jiáifodo dani omoi abina Juzíñamuimo omoi jaináitari; ua, tíllanomoná meine cáadena jaide izóidino afémiemo omoi abi jaináitari. Ie jira nana omoi abina Juzíñamui ñúefue finóllena, omoi jaináitari. <sup>14</sup> Ja benómona fiénidifue ómoína ana úiñeite. Mei ocuilla uai anamo ja íñedicaiza; mei jiáifodo Juzíñamui cairi dúecaillafuemo itícaiza.

*Comini jacire riire rairuúllaruimona daa ráfuena caína onótate*

<sup>15</sup> Ie mei ¿nie izói itícaí? Mei ocuilla uai anamo íñedicaiza mei jiáifodo Juzíñamui cairi dúecaillafuemo itícaiza; íemona ¿meita fiénidifue finóredicaí? Ieñedeza, finónidicaí. <sup>16</sup> Ñue onódiomoiza, ómoimona nágamíai riire ocuídillaímamo fecaca llezica, aféllaíma ocuúllana ñue jeire órediomoi. Daje llezica aféllaímamo izire jaináidiomoi. Bie izói caimo ite fiénidifuiái, jacire ocuídillaíma ana uilla izói, nana caína ana uite. Afemona tíllafue naga cómemo comuide. Mei íadi Jesumo cai íñua llezica jiáie cai ocuídillaíma Juzíñamuimo dúidicaí, comécina jaícina ñue jóidimacina nágarui cai íllena. <sup>17</sup> Mei íadi ómoiri Juzíñamuina: “Iere figora,” daidícue. Mei nauí fiénidifueño izire rairuícana omoi illa llezica, ómoimo lloga llófueinafuena ja ñue jeire otíomoiza. <sup>18</sup> Afe fiénidifueña oni omoi jirecailla mei, jiáie ocuíraima Juzíñamui rairuícana jaídiomoi. Iemona comécina jaícina ñue jóidinona nágarui írediomoi. <sup>19</sup> (Ua omoi onoiga comini ráfuiaído úriticue, mei omoi ífoci déiñenamona bífuiaína ñue cacánidi omoi.) Nauí fieni illáfuiáimo omoi abina jaináitafirediomoi. Nane afe baimo jiáie jamánomo fieni abi fínuamo abina finótadiomoi. Nauí daí abina omoi finota izói, mai birui comeci jaícinaínaífuemo abí omoi jaináitari, dama Juzíñamui íena oni eneno ñue mamécanona omoi íllena.

<sup>20</sup> Nai fiénidifuiáimo riire rairuícana omoi illa llezica, comeci jaícina jóinaífuemo jaináíñediomoi. <sup>21</sup> Nauí omoi illáfuiáina birui meáruitíomoi. Mei aféfuiaímona ¿nie cánuafuiái otíomoi? Oñédiomoiza; tíllafue diné jaca ómoína uite. <sup>22</sup> Mei íadi fiénidifueña oni eneno omoi jirecaillamona, ja birui Juzíñamui rairuícanaíomoi. Iemona birui afémiemo ñue jaináidiomoi. Bie izói omoi íllamona, Juzíñamui íbana ñue caimare ómoína cánoite. Ua afémie íeíena ómoína oni eneno ñue fínoite. Iemona afe ícoímo ziiñona illáfueña óitíomoi. <sup>23</sup> Fieni cai íllamona daa tíllafue óitícaí. Mei íadi Juzíñamui raiñóñeno fia caimo iga raa, cai ziiñona illífué. Bie ziiñona cai illífué dama cai Ocuíraima Jesucrístomo dájena cai jaináinamona caimo iga.

## 7

*Iima áireinamona ríngo iníreinamona daa ráfuena cai onótate*

<sup>1</sup> Amatíai, onódiomoiza, da come dama nai íe tíñeniadi, ocuilla uai nai íemo dúide. <sup>2</sup> Ja omoi onóigafue jino llóitícue, áfedo jiáífuena omoi onóillena. Da inírede ríngo, íe iní caana llezica, ocuilla uaido íe inímo cuinaca izói jainaide. Mei íe iní tílla mei, afe íemo jaináitate ocuilla uáimona afengo jae oni jirecaide. <sup>3</sup> Afe llezica afengo jiáie íímamo inírena ñuera. Afengo daí iníreilla jiruíreñede. Mei íadi íe iní nai ítemo afengo jiáie íima díga illa afengo íere jiruírede.

<sup>4</sup> Cue amatíai, birui Jesucristo abímo dájena jaináidicaí; ua iníredíngo inímo jainaina izói jaináidiomoi. Afe Crístomo omoi jaináinamona, íe tíllado tíidinona mamécaomoi. Ie jira ocuilla uai dibénemo tíidino izói itícaí. Fueñe bie ocuilla uaimo, ríngo inímo jaináilla izói,

jaináidicai. Mei íadi ja birui tíidino izói cai íllamona afe ocuilla uaimo jaináiñedicai. Dama tíillanomonona meine abido cáadimiena jaide Crístomo jaináidicaiza. Afe bie Crístomo cai jaináinana Juzíñamui caimo comuítate. Ua comuítate caido ie comeci jítáinafue ñue ícoimo cai fuitállena. <sup>5</sup> Mei nanómona comini comécimo itifue dibénemo cai ífirena llezica, afe ocuilla uai cai abimo ite fiéni óiacanafuiaina cazítate. Aféfuiai caina ana tíillinomo uite. <sup>6</sup> Mei íadi ja birui afe ocuilla uai dibénemo tíidino izóidicai. Fueñ afe ocuilla uai anamo riire iticai, mei íadi ja birui afe uáimona ñue oni jírecaidicai, Ñuera Joreño cómuena méidoga caimo itífuedo Juzíñamui ocuícamacina cai íllena. Jaiai cuega ocuilla uaido Juzíñamui ocuícamacina ínidicai.

*Cuomo ite íaifue cue caimare illafue llótaidote*

<sup>7</sup> Iemona ¿mei nie izói dáititicaí? ¿Ocuilla uaina fiénidifue daíredicai? ¡Daíínidicai! Mei íadi afe ocuilla uaido fiénidifuena onótagacue. Afe uai nai jino lloñena llezica fiénidifuena onóñedicue. Ja omoi onóigafue jino llóiticue, áfedo jáífueña omoi onóíllena. Ocuilla uai nai cuena dáíñeniadi, aino come raana óiacanana onóñedicue. Mei íadi afe daíí llua mei fiéni óiacanana onódicue. <sup>8</sup> Afena cue onónamona, bie ocuilla uai llúado, cue comécimo ite naga fiéni jítainana uáfodo cazítaga. Mei ocuilla uai nai cuemo lloñena llezica, fiénidifue tíide izói uái illano figo onóñedicue. <sup>9</sup> Nauídiruimo, ocuilla uai cúemona nai oni eneno illa llezica, cue comeci úrilla caimare ite. Mei íadi ocuilla uai ja llúaíbillado fiénidifue meine abido comuide. Afefue meine comuíllamona fállena cue orede. <sup>10</sup> Dinómona bie izói cuemo zúide. Daje cuena ñue zíiñona illífuemo úirede uaillai, ñue illífuemo cuena uíñede. Mei jáífodo cue dibénemo, cuena ana tíillanomo uite. <sup>11</sup> Mei jii, fueñe fiénidifue cuemo íñede daídicue. Mei íadi ocuilla uaina cue fídiamona, cuemo ite fiénidifuiaina onódicue. Afe ícoinia Juzíñamui fáiacagamiéna iticue.

<sup>12</sup> Afemona onoiga, afe ocuilla uai iere ñuera. Daje izói lletara uai jamánomo ñuera. Afe uai ñue jaícina jóidíuai. <sup>13</sup> ¿Meita bie ñuera ocuilla uai cuena ana tíillinomo úirede? Ñue onóigaza, úinide. Mei jáífodo cuemo ite fiénidifuedo ana tíillinomo uigacue. Afemona uáfueña cíotagaza, bie fiénidifue ua nahí fiénideza. Afe cuena ana uillafue ñúefuedo finoca. Daíí Juzíñamui ocuilla uai, nana fiénidifuiái jamánomo íaire nana caina onótate.

<sup>14</sup> Afe ocuilla uai Juzíñamui Ñuera Joréñomo dúidifue. Afena onódicaiza. Mei jáífodo nanómona cue comécimo itifue Ñuera Joréñomo dúíñede. Mei izire rairuícamié izói íaifue finuanamo fecácamié izóidicue. <sup>15</sup> Birui cuemo íficaidifueña onóñedicue. Ñue cue comeci jítainafueña finóñedicue, mei íadi cue comeci éoillafueña áfena finófiredicue. <sup>16</sup> Mei cue comeci jítaiñenafue cue finóadi, afe cue finócafue fiéninana onódicue, mei Juzíñamui Ocuilla uai cuena áfemona rairuúdeza. Iemona afe bie ocuilla uaina nahí ñuera daídicue. <sup>17</sup> Mei daíí áfena dama finóñedicue, mei jáífodo cuemo ite íaifue aféfuemona comuide. <sup>18</sup> Mei onódicueza, dama cuemo ñúefueña íñede. Bíedo daííacádíicue, nanómona cuemo itifue ñúeñede. Mei jii, cue comeci ñúefue finóacade, mei íadi áfena jaca finónidicue. <sup>19</sup> Cue jitaiga ñúefueña finóñedicue; mei íadi cue jítaiñega fiénidifuiaina finócadíicue. <sup>20</sup> Iemona cue finóacañega fiénidifue cue finóadi, dama cúeñedeza, cuemo ite fiénidifuemona comuide.

<sup>21</sup> Daíí jaca bie izói cuemo íoicaide: mei ñúefue cue finóacania, áfena baiñeno dama cuemo ite íaifuiái báífiredicue. <sup>22</sup> Mei jáífodo cue comécido Juzíñamui ocuilla uaina gáidíicue. <sup>23</sup> Mei íadi afe llezica cue comécimo ite jáíie niné cue úiacade uaina comécido onódicue. Afe uai cue ífoci úrilla ñúefueña niné féítaoide. Afe bie fiéni cue rairuíoide uai cue abimo ite. Afe uai cuena llavéoide.

<sup>24</sup> ¡Nai iere íóbiñedimiedíicue! Bie ana tíillamo cue uite abímona, ¿bu oni cue jírecaitalle? <sup>25</sup> Dama Juzíñamui íe Jitó cai Ocuíraíma Jesucrístodo bífuemona cuena oni jírecaitarede. Iemona, ja birui Juzíñamuina “Iere figora” daídíicue. Iemo cue illafue bie izói ite: Juzíñamui ocuilla uai anamo cue itábicaíllena dama Juzíñamui jóonega cue comeci ñue

úrillado finóredicue. Mei íadi dama cue abi dibénedo nanomo cuemo itífuedo llavécaigacue. Dinómona fiénidifue cuemo íoicaide. Ioicaillamona fiénidifuiaina jaca finóicaidicue.

## 8

### *Juzíñamui Ñuera Joreño úicaigamie illafue bie izoide*

<sup>1</sup> Mei ja benómona, nana Jesucristomo dájena jaináidinomo duere finótaituiai jaca iñede. Afémaci Juzíñamui Ñuera Joreño riinodo afe Joreño illa izói ífirediaioi. Dáanomo afémaci nanómona comécimo itífuiiai izói coméciñediaioi. Daje izói nánorafuiaina náfueñediaioi.

<sup>2</sup> Juzíñamui Ñuera Joreño cai rairuilla uai, dájena Jesucristomo cai jaináinamona, caina ñue cáataite. Afe llezica caina rairuide Ñuera Joreño uai, afe nanómona cue rairuilla fiénide uáimona cuena oni jirecaitate. Afemona fiénidifue ana tíllinomo cuena úiñeite. <sup>3</sup> Moisés ocuica uáimona finónidifue, Juzíñamui daade ie Jitó ana óriano áfena finode. Afe caimo ite fiénidifue mona oni cai jirecaillafue Moisés ocuilla uáimona finónide, mei nanómona cai comécimo fiénidifuiiai íllado, afe uai riinonideza. Iemona afe uai figo jinoñede. Ie jira Juzíñamui cai oni jirecaitallena, daade ie Jitó jamai cómena bie éniemo jécitade. Afe mei, cai fiénidifuiiai ícoinia cai ifomo Juzíñamui ie Jitó fatátate. Bie izói daina daiíacade, bíniemo ite fiénidifuiiare dino comínina íaioi illa izói, afe izói Juzíñamui ie Jitó ana bíniemo orede. Afe bie izoide ória mei, afémie abi, cáie izói eroide, mei íadi afémie íaifuenide. Afe izói ie íllamona afémie bíniedo ua nífuenidimiena jáicaillado nana caimo ite fiénidifuiaina anáfenode. <sup>4</sup> Mei ocuica uai jeire cai óllena, afémie nana bie izói finódeza, mei ja nano cai comécimo comuídifuiaimo coméciñedicaiza. Afena ja náfueñedicaí. Mei jáífodo Juzíñamui Ñuera Joreño ífuiaimo comécioidicaí; aféfuiaína ñue náfueticaí.

<sup>5</sup> Nano comécimo fiéni comuídifuiaimo coméciidino, daa bie cai abi ífuiaimo izire comécido llícioidiaioi. Mei jáífodo Ñuera Joreño ífuiaimo coméciidino afe Ñuera Joreño daináuaimo izire comeci fáioidiaioi. <sup>6</sup> Da bie cai abi ífuiaimo comeci izire cai llícioia, ana tíllinomo caina uite. Mei jáífodo Ñuera Joreño daináuaimo izire comeci cai fáioia, zíñona illífue mo caina uite. Iemo daje izói caina caimare uái illínomo uite. <sup>7</sup> Daje bie cai abi ífuiaimo izire comeci llícioidino, Juzíñamui uáitatimacina jáidiaioi, mei afémaci, nana comíni Juzíñamui ocuilla uaina gáñediaioiza. Afémaci áfena gáñenamona afe uai anamo ínidiaioi. <sup>8</sup> Ie jira nano cai comécimo comuídifuiaimo jaináidino Juzíñamuina íóbitanidiaioi.

<sup>9</sup> Mei íadi Juzíñamui Ñuera Joreño ja ómoimo íllamona, comécimo fiéni itífuiaimo, cuinaca izói, izire jaináñediomoi. Mei jáífodo Ñuera Joreño dájena iere jaináidiomoi. Cristo Ñuera Joreño ña iñédimie Cristo íeñede. <sup>10</sup> Cristo ómoimo íllamona ómoimo ite joreño caade. Ua, Juzíñamui anamo ñue jaícina itábicaillamona omoi joreño cazítaga izoide. Mei íadi afe llezica caimo ite fiénidifue cai abina ana tíllinomo uite. <sup>11</sup> Mei jáífodo Jesucristo tíllanomona Juzíñamui Ñuera Joreño do meine abido cáadimiena jáitaga. Iemo afe Cristo cáadena jáitate Juzíñamui omoi tíifirena abina nane meine cáadena jáitaitate. Ua ómoimo ite Juzíñamui Ñuera Joreño do Juzíñamui cáadena jáitagamacina ómoína fínoite.

<sup>12</sup> Amatiai, mei daií cai comécimo fiéni ífiredifuiaimo coméciñellena, izire ocuicanodicaí. <sup>13</sup> Da bie omoi abi ífuiaimo omoi coméciioiadi, tíllinomo ana ómoína uite. Bie cai comécimo itífue jaca fiénidifue caina finótate. Mei íadi afe ómoína finótate fiénidifue Ñuera Joreño do omoi anáfenoiadi jaca ninomo cáaitiomoi.

<sup>14</sup> Nana Juzíñamui Ñuera Joreño ífocamaci, Juzíñamui úruiai. <sup>15</sup> Mei jii, ómoimo iga Ñuera Joreño, jacire ráiruite joreñoñede. Daje izói ómoimo ite Ñuera Joreño ómoína meine jacíruitañede. Mei íadi afe ómoimo iga Ñuera Joreño Juzíñamui jítótaiaina ómoína mamede. Afe Joreño Juzíñamuina “Cue Móodio” caina daiítate. <sup>16</sup> Da bie Ñuera Joreño caimo ite

joreño diga, dájena nabáizabite “Juzíñamui jítódicai” caina daiíllena. <sup>17</sup> Afe daií ie jítótiaina cai íllamona, Juzíñamui raire uícodo caimo lloga feci raa izoide cáimafue maiñóredicai. Afe cáimafue dama Cristo ie, mei afémie Juzíñamui nahí Jitoza. Mei íadi ja birui áfena daane afémieoiri maiñóredicai. Afe Cristo duere zefuilla izóí, daane birui duere cai zefuíadi, Juzíñamui caina cíote. Iemona Juzíñamui ebíredifuenta íemo nitalle izóí, afe izóí caimo nítaite.

<sup>18</sup> Iemona ja biruíllaido duere cai zefuilla figo ráañenamo comeci facádicue. Afefue ráañenari ióbídícue. Ua afe aillónedeza áfena lloñédícue: mei afe uire caimo cómuite ñue ebíredifue jamánomoideza. Afe ebíredifue duere zefuíllafue baímo jamánomoideza, afe duere zefuíllafuena úibiñoñeiticai. <sup>19</sup> Nana Juzíñamui finoca cómena maméñedinui, Juzíñamui jítótiai meine cáadino jaillano jino cíotalliruimo iere izire úiñoidiaíoi. <sup>20</sup> Ua comínimo ite fiénidí fue ícoínia, nana afe Juzíñamui comuítaganui, zuure fíallífue mo mamécaiaíoi. Dani íaíoi jítainamona aféfuemo mámeñegaiaíoi. Mei íadi Juzíñamui daií íaíoi na mamede; afe ie comeci jítaina ízoi mamécaiaíoi. <sup>21</sup> Mei afémie nana ie finócanona riire ocuícafue mo oni jirénoiacade. Daje izóí ie finócanona niné táinocaitífue mo oni jirénoiacade. Afe íaíoi jirénollífue mo Juzíñamui ñue coméciide. Daií íaíoi oni jirecaítaite, Juzíñamui jítótiaíoi ebire jaícina joide cáimafuena íaíoi maiñórilla. <sup>22</sup> Onódicaíza, jaiaí fiénidí fue bíniemo táinéinanomona, nana Juzíñamui finoca cáadinui, abí izírenari murífrediaíoi. Ua jaíaímona nai biruímo, ringo úrue jocóacana llezica izínaila izóí, nana ie comínina mámeñega comuítaganui izi cácadiaíoi. <sup>23</sup> Daa afémaci izi cácañenaza; daje izóí cai izi cácaillano, afe caina jaícina ñúeitalliruido izire ocuíriticai, Juzíñamui Ñuera Joreño caimo ite íadi. Juzíñamui ícoí aillo caimo fecalle caimátaillífuiaímona, bie Ñuera Joreño fueñe raire uícodo caimo íga. Mei íadi nai bíniemo iere zuure murífredicai; mei Juzíñamui jítótiai maméidicai íadi, móonidíza jaíaíe come íena náamataja izóí, cai ie náamatalliruimo ocuíriticaíza. Aféruimo nana fiénidífuiaímona, naa jaíaíe cai rairuíoide íaífuiaíri, Juzíñamui cai abina oni jirecaítaite. <sup>24</sup> Afe bie cai jíllollífue mo úiñoídicaí. Jesucristo daií caimo llogáuaimo afe jeire cai úamona, afemo úiñoídicaí. Afemo daií izire cai úiñoínado jíllotagacai. Cai úiñoíga raana cai cíonamona, jae afemo úiñoñeiticai, mei jae íteza. <sup>25</sup> Mei jaíaífodo cai cíónena raamo cai úiñoíadi, ja afemo raire járitaño úiñoíredicai. Iemona Juzíñamui Ñuera Joreño, Juzíñamui jítótiaina cai maméinamo uaina nabaide.

<sup>26</sup> Daje izóí Juzíñamui Ñuera Joreño mei ní fue Juzíñamuimona cai jícallena ñue caina cánuaíbite. Juzíñamuimona jaícina ie jitailla izóí cai jícajana onóñédicaí. Mei daií cai illa llezica, Ñuera Joreño come uaido jino llónide murilla uaido Juzíñamuimo caido izire jícade. <sup>27</sup> Juzíñamui naga come comeci ífuena ñue onóíllena izire jícanofiredímie. Afemona Ñuera Joreño caido daiíacanana Juzíñamui ñue onode, mei Ñuera Joreño, Juzíñamuimo jaínáidínodo Juzíñamui comeci jitailla izóí izire íaíoi mo jícadeza.

### *Nana zuure íaífuiaímona caí fófecaíredicai*

<sup>28</sup> Onódicaíza, Juzíñamui nana cómemo íficaitífuiaína ñue jaícina mamede, nana íena izíruitino ñue íllena. Ua Juzíñamui comeci jítaina izóí, ie jírigano ñue íaíoi íllena, Juzíñamui illa dígamíemo cómuítífuiaína ñue jaícina zúitafírede. <sup>29</sup> Mei Juzíñamui nana ie uícodo onóígano nanómoma mamede, ie Jitó illa izóí íaíoi íllena. Bie izóí íaíoi íllamona Juzíñamui Jitó ámatiaína itíaíoi. Afemona aillo ite ámatiaí cígímona Jesucristo dama námiena jaide, Juzíñamui jaiaí uícodo mámia izóí. <sup>30</sup> Nana daií ie mamécanona, daje izóí íaíoi na jírite. Nana ie jíriganona, daje izóí ie anamo ñue jaícina itábicaítate. Daje izóí, nana daií ie anamo ñue jaícina itábicaítaganomo Crístomo nitaca ebíredifuenta afe izóí íaíoi mo nitade.

<sup>31</sup> ¿Bífuena nie izóí dáíticai? Juzíñamui cai dibénemo íadi, ¿mei bu caina anáfenolle? ¡Cai anáfenoitena íñede! <sup>32</sup> Juzíñamui dama ie daade nahí Jitona cáimona rairuíñede.

Mei jáifodo nana ñue cai jílloillena, ie daade Jító titállena jeruíñeno fecade. Iemona onódicaiza, nana jáie cai jitaille riiduana naa ie Jítóiri nágarui caimo fecáfireite. <sup>33</sup> Juzíñamui nizécamacimo, ¿bu fiénidifuena nitárena? Afe izói nitaitimie iñede, mei afémaci nífuenidinona Juzíñamui jae jino uáfodo llógaza. <sup>34</sup> Afe Juzíñamui nizécanona, ¿mei bu duere finótarena? Iaioina duere finótaitimie jae iñede, mei Jesucristo íaioi ícoinia tízaibiteza. Afe baimo Jesucristo tíllanomona meine abido cáadimiena jailano, Juzíñamui nabézimo ráinazaide, dinómona Juzíñamuimona cai ie canóllifuena izire jicállena. <sup>35</sup> Cristo cai ie izíruillana, ¿bu mei féitarena? ¿Meita duere cai zefuíadi, Cristo caina izíruillana féitaite? Féitanide. ¿Meita llotáiredifuiaí caina ie izíruillana féitaite? Féitanide. ¿Meita fiéni caina finóacadino caina ie izíruillana féitaite? Féitanide. ¿Meita júbietailafue caina ie izíruillana féitaite? Féitanide. ¿Meita inícuironinafue caina ie izíruillana féitaite? Féitanide. ¿Meita jácifuiaí caina ie izíruillana féitaite? Féitanide. ¿Meita tízaillafue caina ie izíruillana féitaite? Féitanide. <sup>36</sup> Juzíñamui Cuega Uai bie izói dáideza:

Nágaruillaí o ícoinia tíllanomo áinozitagacai, mei íadi tíñedicai.

Daje llezica caina titalle ovéjaiaí izói mamédiaíoi.

<sup>37</sup> Mei íadi nana bie zúuredifuiaimona, caina izíruitimie Jesucristodo, caifófeficaidino baimo ñue jino jáidicai. <sup>38</sup> Iemona ñue onódicueza, Juzíñamui cai ie izíruillana ráruitena iñede. Naga raamo cai júriadi Juzíñamui féitañeno caina izíruioide. Cai tíllifue Juzíñamui caina izíruillana cáimona feitañeite. Daje izói biniemo cai cáanafue caina ie izíruillana cáimona rairuínide. Daje izói Juzíñamui abi imaci caina ie izíruillana cáimona rairuínide. Daje izói fiéni ríinorede júriaí caina ie izíruillana cáimona rairuínide. Daje izói biruido comuídifuiaí caina ie izíruillana cáimona rairuínide. Daje izói uire cómuitifuiaí caina ie izíruillana cáimona rairuínide. <sup>39</sup> Daje izói Juzíñamui abi imácimona ríllaini caina ie izíruillana cáimona rairuínide. Daje izói Taífemo jaináidino ríllaini caina ie izíruillana cáimona rairuínide. Ua nana Juzíñamui finócanuiaimona buna Crístodo caimo jino ciótaga izíruillana cáimona rairuínide.

## 9

### *Juzíñamui jaiái uícodo Israel nairai nize*

<sup>1</sup> Ja birui jáifue ómoimo llóiticue. Crístomo cue jaináinamona táinona llóñeiticue. Daje izói Juzíñamui Ñuera Joreño nabáioicaigacueza cue comeci urilla uai ñue jino deide. Afedo bie cue lollifue nahí ua ráfueza, onódicue. <sup>2</sup> Be ñie: nana cue nairai comíniri iere zúruiticue. Afémaci Crístomo ínoñenamona zúufueri comécina cuidíridicue. <sup>3</sup> Iemo mei cue dáinamona nibai afémacina jíllotareniaí, Juzíñamuina, “Mai fiéni cue faido,” nibai raire dáiticue. Mei íadi cue daína izói Juzíñamui cue faidódena, cue nairai imácina cánoñeite. <sup>4</sup> Afémaci jaiái Juzíñamui nizécamie Israel, méifomo comúcana jáidino. Daje izói afémacina Juzíñamui daide:

—Bimaci cue nairai, —daide. Afe mei íaioi cígimo ie íllado íemo ite áillue ebírede ríino Juzíñamui íaióimo jino ciótate. Daje izói íaioina ie ñuera finóllifuiaí Juzíñamui íaióimo llote. Iemo Juzíñamui Moisédo ocuica uaina llogáiaíoi. Daje izói Juzíñamuina nahí caimátaitajana onótagaiaíoi. Daje izói Juzíñamui lloga caimare íaioi illúuai íaióimo íteza. <sup>5</sup> Bimaci mámecina jica jalleide júduai jáiáidigimamona comútagano. Iirainomo íaioi náiraímona Cristo cómena jócuai biga. Bífuaímona Juzíñamui naga ráfuaí jamánomo ocuállana onódicai. Iemona nana náiraímona illa dígamiaí Juzíñamuina jaca ninomo fáicanocaiñeno íóbitarediaíoi. Mai daíí íteza.

<sup>6</sup> Díga ñúefuiaí cue náiraímo duide; mei íadi Crístona náfueñediaíoi. ¿Mei nibai? ¿Nibai Juzíñamui uícodo lloga Israelna ñuera daínaúai figo déizabiñede? Daíí daíñedicueza. Jáifodo jóide. Nana Israel náiraína maméidinomona dáarie Juzíñamui nízeñegano. <sup>7</sup> Daje

izói Abraham méifomo comuídino dáarie ie nahí úruiañediaioi. Jaiai uícodo Juzíñamui Abrahana daide:

—Dama Isáacimona cómutino o uáfueña méifomo comuídina jaille, —daide. <sup>8</sup> Bie uai jáífueña cai onótateza: Dáamie ñuera náiraimo jócuado, dama áfedo “Juzíñamui jítódicue” dañide. Mei jáífodo Juzíñamui uícodo daña uai fúitamona jocócana, dama afémaci ie uáfueña méifomo comuídina mameina. <sup>9</sup> Juzíñamui Abrahana uícodo daña uai be ñie: “Uire afe nauí cue mamécaruimo meine bíiticue; íemo o ai Sara jító jócoite,” daide.

<sup>10</sup> Iemo nai jáífueña ite. Rebeca jító íaillinoi dáamiena móorediaillinoi. Iaillinoi moo cai jaiáidigima Isaac. Afe jító íaillinoi guarázaillinoi. <sup>11-12</sup> Mei íadi íaillinoi nai jocóñeniadi, afe ménaillinoi nai ñífuenina illa llezica, Juzíñamui Rebécana daide: “O jító nánoramie ie méifoide ama anamo jabóidimiena íite.” Juzíñamui daí daide, bífueña cai onóillena: Afe íaillinoimona dáamiena Juzíñamui nizéllena dama Juzíñamui comeci jítaina izói mamede. Afe Juzíñamui íaillinoimona dáamie níziafue íaillinoi finócafuemona comuñede. Dama Juzíñamui mámiamona íaillinoimona dáamie nizécamienna jaide. <sup>13</sup> Juzíñamui Cuegáuai bie izói daide: “Jacob cue nizécamié, íemona cue izíruigamié, mei íadi Esauí cue ruifíruigamié.”

<sup>14</sup> Iemona dáarie ñibai dáitiaioi: “Juzíñamui daí dáamiena fia ruifíruillano jáímie nizeda máíñua jáicina jóíñede.” Mei íadi bie comini dañáuai uáfueñede; jáicina jóíñedífueña Juzíñamuimo jaca íñede. <sup>15</sup> Mei Juzíñamui Moisená ja dáideza: “Daa cómemo cue dúecaiacaniadi, afémiemo dúecaiticue. Daje izói daa cómena duéruillano riire ibana cue óiacañeniadi, íemo ibana óñeiticue.” <sup>16</sup> Bie Juzíñamui daña uáimona onódicaiza: Juzíñamui dáamie eneno nízia afe come óiacanamona daingo comuñede. Daje izói afe come riire finuamona Juzíñamui níziafue comuñede. Juzíñamui afémie nízia dama cómemo Juzíñamui dúecaiacanamona comuide. Daje izói afe ímana ie canóacanamona comuide. <sup>17</sup> Mei jii, Juzíñamui ie Cuegáuaido, Egipto illáimana daide: “Ja illáimana o jóneticue, cuemo ite áillue ríino jáíimacimo odo jino cíotallena. Afe llezica iere duere o cue finólledo cue mámece naga náiraíaido jica jalléitaitio,” daide. <sup>18</sup> Ie jira onódicaiza: Juzíñamui dama ie óiacana izói, daa cómemo dúecaite; íemo Juzíñamui dama ie óiacana izói jáíe come comécina riireitaite.

<sup>19</sup> Bífuiamona daa come ñibai cuena jicánoite: “Mei Juzíñamui afe ie óiacana izói finófiredeza, jáífodo índicai. Iemona ¿ñibái mei fiénidífue ícoina caimo nitáfirega? ¿Bu mei Juzíñamui óiacanafueña uáitarena?” <sup>20</sup> ¡Ací! ¡Daí dañámie cacai! ¿O iere ua ímiedicue daídio, Juzíñamuimo riire júfidollena? Mei nana Juzíñamui comuítagaiza bie jáíífueño coméciri. ¿Mei ñibai nogo, afe nogo niráingona dáite: “¿Ñibái mei cuena bie izói nitio? ¡Dáíñeite! <sup>21</sup> Nogo niraingo daingo ie comeci óiacana izói afe nogóraina nírede. Afe daje nógorafella átuedo daa ebire eroide icíruna nírede, íemo daje nógorafella enéfenemona jamai nogócirina nírede.

<sup>22</sup> Iemona daje izói Juzíñamui finócafuiái ñúeraza, onódicai. Afémiemo ínoñedinona Juzíñamui duere finótaacade, íemo ite fiénidífueña gáñenana jino ácatallena. Afe llezica íemo ite aillo ñuera ríino jino comínimo onótaiacade. Mei íadi afémaci fiéni illafue ibana raire otátañede. Ie icírafue anamo itínomo, Juzíñamui raire comeci járitañede. Iaiomoo dúide niné táinocaitallífueña nai are ocuñede. <sup>23-24</sup> Daje izói Juzíñamuimo ite jamánomo ñuera ebíredinona comínimo jino onótaiacade. Iemona Juzíñamui dáarie judíuai, daje izói dáarie judíoñedinona nizeda íaiomoo dúecaide. Dúecaillano íaioi fiéni illafue ibana oñeno íaioi jíllotate. Afe ie dúecaillado nizécandicai. Afémie jaiai uícodo, íemo ite ebíredífueña afe cáiena oni cai maíñóllena caina mamede. Daí finuamona, íemo ite jamánomo ñuera ebíredífuiái Juzíñamui caimo jino fidítate. <sup>25</sup> Jaiai Juzíñamui uai jino llóraima Oseas cuegánicomo Juzíñamui bie izói daide:

Cuemo jaináñede comínina “Cúeiena” náamataiticue.

Daje izói nauí cue izíruiñega náiraina “Cue izíruiñegamacina” mámeiticue.

<sup>26</sup> Daje izói batí jiáie éniemo itínona Juzíñamui daína “Cue comíñiñediómoi,” afénomo itínona “Cáataite Juzíñamui jitótiaína mamélliaioi,” —daí Oseas daide.

<sup>27-28</sup> Mei íadi Israel nairai dibénemo Isaías daide: “Israel comini iere aillo jebuídiaioi, ua monáillai fuédamo ite facádonide guamájiái izói, jamánomo áillomaci. Mei aillo jebuídiaioi íadi, afe náiraímo Juzíñamui raire duere finótalle mei, daa dúemacina fiébitiaioi. Dani afe dúemaci jíllotiaioi. Mei jii, Juzíñamui ie daína uai izói náiraina duere zefuúllifue jino zuítaite.” <sup>29</sup> Dáamie Isaías afe duere zefuúllifue uícodo llote:

Mei jamánomo riinorede Juzíñamui, caína due méfomo cómuitinona níriñeniadi, Sodoma íemo Gomorra diga jofue nairai niné táinocailla izói niné táinocaiticai, —daide.

### *Jesucristo cai jíllotalle ñúefue daje izói Israel comínimo dúide*

<sup>30</sup> Cai lloga uallai bie izói daiíacade. Be ñie: Judíoñedino Juzíñamui anamo ñue jaícina íaioi illínona figo jenóñediaioi, mei íadi Juzíñamuimo íaioi íñuamona, Juzíñamui anamo ñue jaícina itátagaiaioi. <sup>31</sup> Mei jiáifodo afe Israel nairai, (judíuaina maméidino) Juzíñamui anamo ñue jaícina íaioi itátaite ocuilla uállaina jenódiaioi, mei íadi afe uállaina ñue ícoímo figo dúcitañediaioi. <sup>32</sup> ¿Ñibái mei afeno baiñediaioi? Mei Juzíñamuimo íñuado íaioi comeci ñue jaícina jóillifueña jenóñediaioiza. Dani íaioi nícidogafuiaímo comécidiaioi. “Ñibai aféfuiaído Juzíñamui anamo ñue jaícina íiticaí,” daidíaioi. Ie jira Juzíñamui oreca jíllotaitimíemo, ñie Jesumo, uíeco riire finódiaioi; ínuano Juzíñamui anamo ñue jaícina íñediaioi. Come iodo jáiadi éicitaila izói, Jesumo éicitaidiaioi. Afémie íomo éicitaitate nofici izóidimie mei afémie ñúemie, mei íadi ruifíruigamie. <sup>33</sup> Juzíñamui Cuegáuai afémie dibénedo bie izói úrite:

Omoí cácareí, judíuai íomo éicitaitate nofici izóidimiena jóoneticue.

Afemo comini éicitáillano oni ñibéfodo báitíaioi.

Mei íadi nana íemo ínotino íena méairuíñeitiaioi.

## 10

<sup>1</sup> Cue ámatiaí, nane ómoína dáiteticue: Cue nairai israelitas imaci jíllotillena, nana cue comécido izire óiacadicue; íemo áfena Juzíñamuimo jicáfiredicue. <sup>2</sup> Bie ñúefue afémacimo nitáredicue: Juzíñamui comeci jítainafuemo nágarui iere járidofirediaioi. Mei íadi áfena ñue jaícina íaioi fidiñenamona daí táinomo járidotiaioi. <sup>3</sup> Comini Juzíñamui anamo ñue jaícina íe itátallifueña, íaioi ífócimo ñue denóñede. Mei jiáifodo Juzíñamui anamo itábicaíñeno dani íaioi mameca comeci ñue jaícina jóitaitifueño járidotiaioi. Ie jira Juzíñamui lloga ñue jaícina itátaitifueña maiñóñediaioi. <sup>4</sup> Mei jii, Cristo billano nana íemo ínotino Juzíñamui anamo ñue jaícina itátagaiaioi. Ie jira comini Juzíñamui eróicana ñue íaioi íllena, Moisés ocuica uaimo dani íaioi níciduafueña Cristo jae féitate.

<sup>5</sup> Ocuica uai jeire úado Juzíñamui anamo ñue jaícina cai illifue dibénemo Moisés bíena daide: “Nana ocuica uallai dáamie ñue ícoímo fuitáadi, áfedo afémie are íite.” Mei íadi afe uállaina ñue jeire otímiena íñede. <sup>6</sup> Mei jiáifodo, Jesumo cai íñogafuedo Juzíñamui anamo ñue jaícina cai illífueña Juzíñamui Cuegáuai bie izói daide: “O comeci anado bífueña daí jicánoñeno iri: ¿Bu mei caífo monamo jaille, Cristo ana cai jíllotataíbillena?”

<sup>7</sup> Daje izói bie jiáifue daiíñeno iri: ¿Bu mei ana tíidino illánomo jaille, afénomona Cristo caína caífo jíllotataíbillena?” <sup>8</sup> Juzíñamui Cuegáuai bie izói daide. Be ñie: “Ací, Juzíñamui jíllotaja uaina ja cacádiómoi. Ie llógamo ja comécidiómoi.” Bie uallai ómoímo cai lloga omoí íñollifue. Be ñie: <sup>9</sup> O fúedo jino comínimo “Jesús cue nahí Ocuíraíma,” o daiíadi, nane daje lezica afémie tíillanomona meine abido cáadimiena Juzíñamui jáitagamiemo o comécido o ínoiadi, ua jíllotio. <sup>10</sup> Mei Juzíñamui anamo ñue jaícina cai itábicaillena,

afémiemo comécido ínoredicai; ie mei Jesucrístomo nahí cai jaináinafuenta, cai fúedo jino comínimo llóredicai, áfedo ñue cai jílloillena.

<sup>11</sup> Juziñamui Cuegáuai daide: “Nana íemo ínnotino íena meáiruiñeite.” <sup>12</sup> Jesucristo nana náiraimo daje uaido úrite. Judíoñedinona énenoruiñeno daje uaido íaioimo úrite, naa judíuai diga. Nana nairai Ocuíraima daade Jesucristo; nana afémiemo jicádinomo afémié jaca dúecaifirede. Ja ie jira íemo ite jamánomo ñúefuiaimona íaioimo fecáfirede. <sup>13</sup> Mei Juziñamui Cuegáuai daí dáideza: “Nana cai Ocuíraima Jesucrístomo jícaino jílloitiaioi.”

<sup>14</sup> Mei íadi Crístomo nai íaioi ínnoñeniadi, ua afémiemo jicánidiaioi. Daje izói afe jílolle uai nai íaioi ñue cácañeniadi áfemona nai ínnonidiaioi. Iemo afe uai jino llóraima nai íñeniadi, afe uaina ua cacánidiaioi. <sup>15</sup> Afe izói, uai jino llóraimana nai íaioi ocuñeniadi, afe ñúefue uaina ua jino llónide. Jira Juziñamui Cuegáuai bie izói llote: “Núefue lluáibitímie billa iere ñuera.”

<sup>16</sup> Mei íadi nana cue nairai imaci, Cristo daína ñúefuena jeire oñediaioi. Jaiai uai llóraima Isaías dama bie izói daide: “Ocuíraima, cai lluáibigafuena jaca buna ínnoñena!” daide.

<sup>17</sup> Aféfuiaimona bie izói onódicai: ñúefue fidínamona comini ínnotinona jáidiaioi. Iemo dáamie Cristo daína uai jino lluáibillamona, comini afe ñúefuena fidídiaioi.

<sup>18</sup> Mei íadi jicánoticue: ¿Mei nibai nana judíuai afe ñúefuena fidíñediaioi? ¡leñede! Ja fidídiaioi. Juziñamui Cuegáuai daje izói llote:

Afefue llóraini úrilla uai nana énie náiraiaido cácaaide.

Iaioi daínauaillai nana énie fuédamo jica itínuiamo ñue jalleide, daide.

<sup>19</sup> Dánomo nane jáífuenta jicánoticue: ¿Mei nibai afe cacánafue Israel comini ifócimo nai figo déiñede? Dáamie Moisés, Juziñamui dibénedo fueñe uai ote. Moisedo Juziñamui daide: Ua cominiñedimacimona ómoína úradoitaiticue.

Daje izói abina onóñede nairai ícoína ómoína icíritaiticue, daide.

<sup>20</sup> Afe mei Isaías jacíruiñeno Juziñamui daínafue llote. Be ñie:

Cuena jenóñedino ja cuena baitíaioi.

Cuena jicánoñedinomo dama cue abina ja onótaticue, daide.

<sup>21</sup> Israel nairai dibénemo Juziñamui daínauai Isaías llote. Be ñie: “Nágaruillaído cue uaina náfueacañedinona uáidoticue. Mei íadi fairíoñediaioi. Daje izói cuena uáitaoidinona uáidoticue, mei íadi náfueñediaioi,” daide.

## 11

### *Israel náiraímona dáarie jílloitiaioi*

<sup>1</sup> Iemona nane jicánoticue: ¿Ja nibai Juziñamui ie nizeca Israel náiraína ruifruiga? ¡Jaca íeñede! Mei cue dama Israel nairai ímiedicue. Daje izói Abraham izíedicue. Iemo Benjamín comínimona comuídicue. <sup>2</sup> Jaiai ñinomo uícomo íeiéna onoíga Israel comínina birui ruífiruiñeite. Uáfueza, uai llóraima Elías daína uaina onódiomoi. Aféuai Juziñamui Cuegánicomo ite. Juziñamuimo Elías jícaja llezica, Israel nairai fieni finócafuaí íaioimo riire jítade. Daide: <sup>3</sup> “Cue Ocuíraima, o uai jino llórainina fatíaioi. Daje llezica o íóbitalle illánuiaina niné táinocaitatiaioi. Afemona dama cue fiébilla. Iemo daje izói nane cuena titáacadiaioi,” daide. <sup>4</sup> Mei íadi Juziñamui ie uai fairíote: “Siete mil dígamaci eneno cúeiéna ja níiriticue. Afémaci afe taino juziñamui Baal jánarai anamo caiñici ifodo dújuñediaioi, ie íóbitallena,” daide. <sup>5</sup> Ie jira daje izói birui judíuaimona ínnote dúemacina eneno mamécaiaioi. Juziñamui nana comínimo dúecaillano daa bimácina oni eneno nizede. <sup>6</sup> Bie níziafue Juziñamui caimo dúecaillamona comuide. Iemona come finóacanamona comuñede. Mei íadi cai níziafue come finóacanamona comuñeniadi, Juziñamui caimo dúecaillafue nahí caimare dúecaillafueñede.



<sup>7</sup> Bie daináfue ¿mei nífuena cai llote? Be nñie: Israel comini íaiói jenoca Juzíñamui anamo ñue jaícifuenta baiñédíaiói. Mei íadi Juzíñamui nizeca dúemaci afe íaiói jenócana otíaiói. Ie mei baiñédímaci Juzíñamui íaiói comécina ríiretade. <sup>8</sup> Juzíñamui Cuegáuai daíí daide: “Bimácina Juzíñamui comécina tíidino izói finode. Uina cíoiñedino izói íaióina finode. Daje izói jefona cacáñedino izói íaióina Juzíñamui finode. Nai afémaci jaca biruillaímo bie izói itíaiói.” <sup>9</sup> Iemo jiái David Juzíñamuimo jícajano daide: Juzíñamui ióbitallena íaiói finoca güilláfuiái táinona finódíaiói. Afe jira Juzíñamuina daídícue: Mai duere íaiói finoiri. Iemona aféfuiai tácofo izói íaióimo jáiteza; daje izói llójeji izói jáiteza. Afe táinona finócafuiaímo éicitaillano izói duere finóllíaióiza. <sup>10</sup> Daje izói uina nirídino izói mai mei íaiói jáilleza, Juzíñamui ñúefuiai íaiói ónoñeilleza. Iemo nágarui iere baizídaitaganona íitíaióiza, daide.

### *Judíoñedino jíllotafue*

<sup>11</sup> Ja birui nane jícanótícue: ¿Ja nibai judíuai íaiói éicitaillamona niné nana táinocaitallíaiói? ¡Jaca iñédeza! Mei jíáífodo judíuai Juzíñamui lloga uaina cacáacañena llezica, judíoñedino aféuai cacáillano íaiói jíllóillífué maíñódíaiói. Afe íaiói máíñua Israel comínina úradoitate, afe jíllonafue otíno illa izói íaiói íllena. <sup>12</sup> Iemona judíuai ínoñenafue írainomo nana náiraíaina canode. Afe judíuai ícoímo fuitáñeno zóofenocaillafue, judíoñedínona ñue canode. Mei íadi judíuai meine abído Jesumo ínuauilla llezica, nana náiraíai jamánomo ñue ézicillíaiói.

<sup>13</sup> Ja birui judíoñedínono úritícue. Mai omoi cácarei. Mei judíoñedínono ñúefue llúájillena Juzíñamui orécacueza, afe bie cue llócaillífuemo iere járitáííredícue. <sup>14</sup> Nibai áfemo ríire cue táíjinamona, cue nairai comini, omoi illa izói íacaitíaiói; afe izói íaiói íllena jítaídícue. Afemona afémacimona dáarie ñue jíllóbicaítíaiói. <sup>15</sup> Mei Juzíñamui judíuai ruifíruillamona nana jíáíe nairai Juzíñamuimo comeci caímare uái illáfuenta llogáíaiói. Iemo uire judíuaina íaióina Juzíñamui caímare dáanomo uáidua llezica, iere jamánomo caímare nana íítícai. Ua aféruimo tíide meine abído cáadena caímare illa izói caímare íítícai. <sup>16</sup> Mei jíí, Abraham Juzíñamuimo dúinamona, nana ie anamo comuícaídino Juzíñamuimo dúidíaiói. Daje izói da amena jáinao Juzíñamui íeiena maméíadi, daje izói nana afe amena ícaíruai Juzíñamuimo dúide.

<sup>17</sup> Mei íadi dáarie Abraham anamo comuídino íaiói ínoñenamona Juzíñamui comínina íñeillena ruifíruigaiáiói; íemo ie uai jeire omoi úamona Juzíñamui comínina itátagaomoi. Afe ruifíruigamací ífomo jae jóonegaomoi; jóoneficaillano Juzíñamui Abraham imácimo lloga ñúefuiai daje izói llíñoredíomoi. Ie jira judíuai ñuera olivo amena naa ie ícaíruai díga izóidíaiói. Iemo omoi nano fueñe jazicí amena ícaíruai izóidíomoi, mei judíoñedíomoi. Jae judíuaimona dáarie íaiói ínoñenamona amena ícaíro jaitaina izói jaitácaíaiói. Afe mei omoi ínuamona afe jaitácaíruai méífomo jóonegaomoi. Ua, jaiái jaitaca ícaíruai jíáíe aménamona méífomo zicóllena jóonegano izóidíomoi. Birui daje moi ícoráímo jaináidíomoi. Afe ñuera olivo íjido cáadíomoi. <sup>18</sup> Ie jira abína ínoñeno iri. “Olívomona jaitaca ícaíruai izóidímací baímo ñúeracue” daííñeno iri. Afe izói daínidíomoi, mei ñuera olivo moi ícoraíaina cáatañedíomoi; dani jíáínamona zicóllena jóonega ícaíruai izóidíomoi. Mei uáfueza, dani Juzíñamui nizeca comínimo birui omoi jaináínamona ie lloga ñúefuiai llíñoredíomoi.

<sup>19</sup> Nibai dáamie dáíte: “Dáarie afe ñuera olivo ícaíruai jaitácaíaiói, afe méífomo cue jóonellena”. <sup>20</sup> Jíáínamona ñuera olívomo zicódíomoinia ñuera, mei íadi jaitaca izóidímací jíáífo joide: Juzíñamuimo íaiói ínoñenamona jaitácaíaiói. Dani omoi ínogafuemona jóonegaomoi. Iemona áfedo dani abína ínonidíomoi. Mei jíáífodo omoi jaitábiza abína ñue

omoi rairuiri. <sup>21</sup> Mei Juzíñamui nano nizécanona figo íaiói íñoñenamona jizíñeno íaióina ruifíruite, afémie daje izói omoi figo íñoñeniadi, amena ícairo jaitaina izói, jizíñeno raire ómoína ruifíruiteza. <sup>22</sup> Mai bífuemo omoi coméciri. Juzíñamui daií omoi jóoniano iere ñuera. Afedo afémie ómoimo dúcaifirenana fidídiomoi. Mei íadi nane afémie iere riire jaícina ocuídime, mei ie uaimo náfuenedimacina afémie iere duere finode. Mei jíáfodo afémie ómoiri dúcaifirede. Iemo fáicanocaiñoeno ie uaina jeire omoi oíadi, ie dúcailla dibénedo ífireitíomoi. Afefue jeire omoi óñenia, jíái ómoína afémie jáitaite. <sup>23</sup> Mei jíáfodo judíuai nane abido íñoia, afémaci abido dáanomo jofo jóonelliaíoi. Mei Juzíñamuimo meine íaiói jóonelle ríino ite. <sup>24</sup> Mei omo judíoñediomoiza, jica ite onínemaci izóidiomoi; Juzíñamui comínimo due jiza dúñediomoi. Daií omoi illa llezica Juzíñamuimo omoi ínuado, afémie ie comínina ómoína itátate. Ie jira nano fueñe ie nizécamacimona oni nibéfodo baídino íaiói ínoiadi, abido daje ie comínina itátallena, Juzíñamui dibénedo jamánomo juánide.

*Irairuillaído Israel nairai jílloitiaíoi*

<sup>25</sup> Amatiai, omoi cacai. Afe olivo amena ráfuenta ja ómoimo lloticue, uáfodo ónoñega Juzíñamui mamécafuena comécido omoi onóillena. Juzíñamui nanómona comécido mamérrillafuena ómoína fidítaiacaducue. Aféfuena ónoillano Juzíñamui comínina omoi itátagafuedo abina íñoñeitíomoi. Juzíñamui mamérrillafue bie izói joide: Juzíñamui Israel nabémacina comécina riire finode, mei íadi nano íanori íaiói comécina ríiretade. Íaiói comeci ríireta mei, Juzíñamui nana jíáie náraina caimare uáidote, íaióimona nana Jesumo ínotino nizéllena. <sup>26</sup> Nana Juzíñamui óiacana dieze íemo ínotimaci ofille mei, nana Israel nairai jílloizíitiaíoi. Mei Juzíñamui Cuegáuai daií daide:

Cai Jíllotaraima dani cáimona cómuite.

Afémie Jerusalén jófuemona biite. (Afe jofue jíáfodo Sióna mameide.)

Jacob meifo igímaiai íaifuiaina afémie múiñoite.

<sup>27</sup> Íaiói fiénidifuiái oni cue dolle mei nana uícodo cue lloga ñúefuiái ñue fuite, daide.

<sup>28</sup> Nana comíni jílloille uai dibénedo judíuai fairíoñediaíoi. Iemona judíuai Juzíñamui ruifíruigaza, ie bacáuai imácina jáidiaíoi. Ie bacáuai imácina íaiói íllamona Juzíñamuimo cai nabáirillino comuide. Mei íadi Juzíñamui nai íaióina izíruite, íaiói jaiáidigímaiai ie nízia jira. <sup>29</sup> Mei uáfueza. Juzíñamui ja ie fecaca raana abido bairóñede. Daje izói cai ie uáiduafluena jaca jíáfodo méidoñede. <sup>30</sup> Naui Juzíñamui uaina íñoñediomoi; mei íadi jíái birui judíuai daje izói íaiói íñoñenamona Juzíñamui ómoiri dúcaizaide. <sup>31</sup> Ja birui nano áinori judíuai Juzíñamui uaina íñoñediaíoi, Juzíñamui ómoimo dúcailla izói íaióimo dúcaillena. <sup>32</sup> Bie uáillaimona bífuena onódicai: Nana jíáie comíni ie uaina dájerize íñoñediaíoi. Ie uaina cai íñoñenamona fiénidifuiái finófiredicai. Iemona Juzíñamui nana caina dájerize cai gaiga fiénidifuiáimo llaveca izóidinona jóonete. Afémie bie izói caina daide, afe méifomo afémie nana caimo dájerize dúcaillena.

<sup>33</sup> ¡Diga Juzíñamui ebírede comeci ífuiái caimo ie dúcaillena, naa ie onóigafuiái diga! ¡Afémie iere ráfuenta baitádimie! Uícodo ie mamérrillafuiaina cai jino llónidicai. Daje izói eneno dáarie comínina ie níziafuiaina, onóñedicai. <sup>34</sup> Cai Ocuíraima comeci úrillafuiaina buna onóñede. Daje izói afémiena bu llófuetimie íñede. <sup>35</sup> Iemo jíái cai Ocuíraimamo raana izájitimie íñede, afe raa íba llínollena. <sup>36</sup> Mei nana ráaniai Juzíñamui comúitaga. Nana afémie finoca; daje izói íeiena nana finode. Jaca zíñona Juzíñamuina íóbioitaredicai. Aquíe izói íteza.

## 12

*Juzíñamuimo ñue jaícina cai dúina uai*

<sup>1</sup> Cue ámatiai, birui Juzíñamui caina dúecaillamona, ómoimo izire jicádicue. Dani omoi mai Juzíñamui anamo itábicairi. (Dani omoi comeci gáinafue finóñeno, mai Juzíñamui comeci jítainafue omoi finori, cai ie ocuilla izói.) Juzíñamui ióbitalle rille jaiiai íemo jaiiai feca izói, nai omoi caana llezica, Juzíñamui anamo dani omoi mai ñue itábicairi, íena ie ñue facátagamacina omoi íllena. Afe llezica dama íeiena eneno ñue finócamaci omoi íllamona, omoi ie ocuilla uai, mai jeire omoi oíri. Nana bífuiai ñue cai fínuamona, cai joréñodo Juzíñamuina caimátaitadicaí. <sup>2</sup> Biniemo ite comini comeci táinomo facáoidiaíoi. Mai, afe izói omoi íñeno iri. Mei jiáífodo, omoi comeci ífuiai, mai jiáífodo méidori. Daií omoi comeci ífuiai omoi méiduamona afe izói Juzíñamui nana o illafue cómfuena méidoite. Afemona Juzíñamui comeci ñue jítainafue ónoiticaí. Daje izói ie jítaina ñúefue ónoiticaí, naa ie cai ióbitallífuiaíri. Daje izói ie ciona jaícina jóidífuiaína ónoiticaí.

<sup>3</sup> Juzíñamui cuena dúecaillano cuemo jóonegafuedo, nana ómoína dáititue. Juzíñamui cai fibítajafuemo da comécina facáredicaí. Afedo abí cai ínolle ñuera. Mei íadi afefue baimo táinodo ínonidicaí. Iemona nana ómoimona dámie, afefue baimo dama ie abina ínoñeno iri. Mei jiáífodo illa dígamie comécina ñue jaícina facárede, Juzíñamui íemo lloga ie comécimo Juzíñamui comuítaga ínuafue daina izói. <sup>4</sup> Da come abimo aillo táijide ráaniaí ite. (Onoi jiáífodo táijide. Daje izói idai táijina jiáífoide. Daje izói fue táijina jiáífodo joide. Daje izói jefo táijina eneno jiáífoide joide.) Mei íadi daade cai abi íadi. Naga cai abimo ite raa eneno jiáídofofo caina canode. Daje táijinamo íñediaíoi. <sup>5</sup> Daje izói, áilloziena Jesumo ínoticaí. Aillo cióidicaí íadi, daade abi izóidicaí. Ua, Crístomo dájena cai jaináinamona, dáamiede abina iticaí. Dáamacidicaí. Afe llezica dáamiedicaí abimo ite táijide raa izói, dani conímamo dájena jaináidicaí.

<sup>6</sup> Naga cómemo Juzíñamui jóonega táijinana fibíllafue jiáífodo joide. Juzíñamui comeci óiacana izói, afémie naga cómemo fecade. Bie táijinana fibíllafue ñue jeire óredicaí. Dáamiemo Juzíñamuimona onoiuga uailai jino llóllena fibítaga. Afemona áfena afémie rairuíñeno jíeruiredede. Nano ie ínogafue íllaze jino llófuerede. <sup>7</sup> Jiáímaci cai canófireille fibíllafue Juzíñamui caimo jóoneiadi, áfedo rairuíñeno canóredicaí. Daje izói llófuiana fibítagamie, afe ie llófuefirenamo ñue járitairede. <sup>8</sup> Afe izói jiáíma comécina náiretallena fibítagamie, áfemo afémie ñue járitairede. Daje izói comini canolle raa fécafiredimie, afe íbana ie maiñóllemo comécinide. Fia íaíoiimo dúecaillano fecádenia ñuera. Afe izói comini jetállífuena ocuídímie caimare abi rairuíoicana ocuírede. Duéredino canófiredimie, caimare íaíoiina canórede.

### *Jesumo ínotino finórede uai*

<sup>9</sup> Táinona lloñeno conímama izírui. Íaí fue bai oñeno iri, mei íadi ñúefue jeire omoi oíri. <sup>10</sup> Jiáímana caimare nahí ama izói izírui. Afémiemona raíre uícoficaiñeno iri, mei jiáífodo méífomo fiéñeno raíre íena o uícofo o otátari.

<sup>11</sup> Ráiraíeñeno jiere omoi iri. Ñue naire cai Ocuíraímamo omoi táijiri.

<sup>12</sup> Cai ocuírinafueмона caimare omoi ífireiri. Duere omoi zefuíadi, áfemo raíre járitaiñeno, íaícana caimare úriri. Juzíñamuimo úrillana jaca féitañeno iri.

<sup>13</sup> Jesumo ínotino jitailla raana, íaíoi canóllena jeruíñeno fecari. Nana omoi jofomo uáiduaíbitinona caimare uáidori.

<sup>14</sup> Omoi fiéni finódinona ñue caimátaitari. Íaíoi íbana fiéni faidóñeno, íaíoi cáímafuaí Juzíñamuimona jicari.

<sup>15</sup> Caimátaidino díga caimare omoi iri. Daje izói raamo jíridinomo omoi dúecairi. Eedino díga omo eeri, íaíoi íirallena.

<sup>16</sup> Conímama úradoíñeno iri, dájena illa dígamie mo ñue coméciri. Daje izói fiéni abina ínoñeno iri, mei jiáífodo comécina mánaidino izói omoi iri. “Íere baitádimiedicue” comécido daiíñeno iri.

<sup>17</sup> Da come fiēni omo finóadi, afe ibana afémiena fiēni finóñeno iri. Mei jiáifodo, nana comini eróicana iba oñeno ñue o finori. <sup>18</sup> Omoi illa dino, nana comini comeci jacíruiñenafuedo caimare uái omoi iri. <sup>19</sup> Cue izíruiga ámatiaí, fiénidifue comuíadi, ibana omoi oñeno iri. Mei íadi aféfuena fáicanocairi. Afémie Juzíñamui duere finólleza. Mei jii, Juzíñamui Cuegáuai daide: “Duere finóllifue cuemo dúideza. Daje izói cue iba ólleza. Daí cai Ocuídime daide.” <sup>20</sup> Nane dánomo daide: “O bacáuai ímie jufíruiá, icíñeno íena ecari. Iemo afémie jiróacaniadi, ie o jirótari. Bie izói ie o fínuamona, izire íena méaicaitaitio,” Juzíñamui Cuegáuai daí daide. <sup>21</sup> Fiénidifue omoi anáfenuamona abí omoi rairuiri. Mei jiáifodo ñúefue jeire omoi úado, fiénidifue maí omoi anáfenori.

## 13

<sup>1</sup> Nana comini omoi jamánomo ocuídillaima ocuica úiñotillaini anamo ñue omoi itábicairi, mei nana ocuídillaini Juzíñamui jónegaza. Afémie jóneñega ocuídimeña iñédeza. <sup>2</sup> Iemona afe úiñotillaimana uáitaoidime Juzíñamui jónegamiena uáitate. Nana daí uáitatino, afe ie uáitaja ícoinia afémacina Juzíñamui duere finótaite. <sup>3</sup> Mei jii, ñúefuena jeire ófiredino ocuídillainina jacíruiñeitiaí; mei jiáifodo fiēni finódino jacíruiñena jónegaiái. ¿Meita ocuídillaimana jacíruiñedimeña íacadio? Maí ñúefuena jeire o oíri. Iemona aféllaima “Facátagamiedo” ona dáite; <sup>4</sup> mei afémie Juzíñamui táijitagamieza, ñúefue dibénemo o jaináillena canóllena. Mei fiénidifue o finóadi, aféllaimana jacíruiñedio, mei afémie duere finótalle ríino táinomona iñegaza. Uafue, afémie Juzíñamui táijitagamie nana fiēni itino duere finótallena. Nana íaí o fiēni finócafue íllaze ñue jaícina íaí oina duere finótaite. <sup>5</sup> Ie jira ocuídillaini anamo itábicairedi omoi, daa duere omoi finobiñeillena, mei íadi daje izói Juzíñamui jónega omoi comeci úrilla uai jeire omoi óllena. <sup>6</sup> Afe bie izói ñue omoi íllena, ocuídillaini lloga gobiérnomo íbárede úcubena íbáfredi omoi. Mei jii, aféllaini Juzíñamui táijitagano. Afe íaí o táijinamo izire járitaí oiaí oí.

<sup>7</sup> Iemona naga cómemo dúide raana, maí jeruíñeno ñue íemo ine. Gobiérnomo cai jaináinamona, íaí o ocuica úcube llínoraíma lloga gobiérnomo dúide úcubena maí omoi fecari. Daje izói gobierno caímo jícana oga raa, emódomo raiñócana áfena maí omoi íbari. Naga ocuídillaimamo dúide ñúefuedo jacíruiñinafue, áfedo ñue íena omoi jacíruiñi. Daje izói naga jamánomoidillaimamo dúide ñúefuena, maí áfena íemo omoi nitari. <sup>8</sup> Omoi záitaiñega íbállifueña bumo itáteñeno iri; jiáifodo daa ñue íbállifue ite. Afefue jiáimana cai izíruillifue. Afemona daní conímaíaina izíruiredicai. Mei naga conímana izíruitime, áfedo Juzíñamui ocuica uaina ñue jaícina fuitádeza. <sup>9</sup> Jaiái Juzíñamui ocuica lletara uailái daide: “Jiruífueña finóñeno iri, cómena titáñeno iri, meríríñeno iri, jiáimamo táinona lloñeno iri, jiáimemo ite ráaniáiri úradoiñeno iri.” Mei íadi bie ocuica uailái naa jiáie lletara uáillairi daa bie dáinamo dájena itíái oí: “Dama o abina o izíruilla izói, afe izói o abí cómena izíruiri.” <sup>10</sup> Izíruitime ie abí cómemo fiénidifueña finóñede; íemona izíruillafuedo Juzíñamui ocuilla uailái ñue jaícina jino zuitárede.

<sup>11</sup> Nana bífuiaímo jeire omoi ua llezica, birui cai illáruillaimo ñue maí cai uibóilli. Ja íere abí cai rairuilliruimo ja dúcidicai. Afemo ñue omoi comécioiri. Mei Jesucristo caína jíllotajano uire jiáiruido caína uábiteza. Afe ie cai uábilliruimo ja áinozide. Fueñe Jesús uaina cai ínua llezica, afe cai ie uábillirui bai jica ite, mei íadi birui ja aféruimo itícaíza. <sup>12</sup> Bie énie fiénidifue áreña naí o izoide. Afe bie áreña naí o ja monáiacade. Jítinomo finoca fiénidifueña fínuana ja fáicanocairedicai. Fuiríraíma ie abí ríidua llojeco jítaja izói, afe izói íaí fue cai fínoñeillena cai comeci rairuillafueña jeire óredicai. Ie mei ñúefuedo, úzefomo itino izói macáredicai. <sup>13</sup> Ua, úzefomo itino izói, maí ñue jaícina cai macalli. Jifáifrenafuemo maí cai íñeilli, naa fiénide aillo güillárenafuairi. Afe izói nana jiruífuiáimo

mai cai íñeilli, naa jíáie comeci meáire óiacanafuiai.ri. Daje izói dájena comécíñedimaci izói íñeno omoi iri. Iemo jíái fiénide júfidogafuedo mai cai úriñeilli, naa úradoillafuiai.ri. <sup>14</sup> Mei jíáifodo Jesucristo ñue illa izói, ie cánuado afe ñue illáfue mo mai omoi iri. Omoi comécimo íte fiéni óiacanafue mo, áfemo mai omoi comécíñeno iri. Daje izói, afefue omoi finóllemo mamériñeno omoi iri.

## 14

### *O ama jánana fiéni úriñeno iri*

<sup>1</sup> Juzíñamui uai como fueñe jabo íñotimiena, ñue jofu omoi cígimo llínori. Afémie ínogafuena féitaiacaniadi íena caimare uáidori. Ua, ie ínoga onóñega uáillaimo aillo omoi úridoñeno caimare íena omoi uáidori. <sup>2</sup> Mei jíi, “Naga raana íáiruiñeno güíredicai,” daííredinona íte. Daje izói dáarie Juzíñamuimo jabo íñotino “Rillena riñeno da ria llizíllana güíredicai,” daíírediaioi. <sup>3</sup> Ie jira naga raana güítimie mai afe ríllena fímairitimiena jámairuiñeno iri. Afe izói, fímairitimie, mai naga raana güítimie mo comeci fiéni facáñeno iri. Mei Juzíñamui afe íaillinoi, íemo ínuamona, ie comínina caimare íaillinoina uáidoteza. <sup>4</sup> Afémaci Juzíñamui ocuícamaciza, íaioina fiénidifuedo jícanonidio, mei afémaci óieñedeza. Dani íaioi ocuídime mo uai orédiaioi. Íaioi illafue riire jícanollena dama íaioi ocuídime mo dúide. Ocuícame illafue ñúenia, ie ocuide Juzíñamui uícomo méairuiñeno náidaite. Ie illafue fiénia, ie ocuide Juzíñamui duere íena fínoite. Mei íadi afémie ñúefue dibénemo féitañeno íte, mei cai Ocuíraima Jesucristo ríinoredeza, afémiena ñúefue mo jácina jáináitallena.

<sup>5</sup> Daje izói, dáame nágaruillai baímo daa illíruí eneno rairuide, Juzíñamuina caimátaillena aferuí judíuái ráfuena jira. Jíámaci naga mona daje izói ñúeruillai, daídíaioi. Illa dígamie dama íe comeci úrillafuena ñue onótaredeza. <sup>6</sup> Daruina eneno ráruitimie, cai Ocuíraima íóbitallena íeiena íllamona, aféruina eneno rairuide. Daje izói nana raana güítimie cai Ocuíraima íóbitallena íáiruiñeno güífirede, mei afémie afe güílleri Juzíñamuina “Íere figora” dáideza. Daje izói cai Ocuíraima íóbitallena fímairitimie fímairillano Juzíñamuina “Íere figora” daide.

<sup>7</sup> Nana cáimona buna dama íe comeci íóbioillena ínide; daje ízoi buna dama íe comeci íóbillena tíñede. <sup>8</sup> Cai caana llezica cai Ocuídime mo jáináidicai. Daje izói cai tíadi, nai íemo jáináidicai. Iemona cai caana llezica, mei níbai cai tíilla llezica, jaca cai Ocuíraima íédicai. <sup>9</sup> Mei jira Cristo tízaíbillano, meine abído cáadime na jaide, cáadino náamata izói, daje izói tíidinona náamatalena.

<sup>10</sup> Mei íadi comínina náamañedio. Iemona ¿níbai mei o ama jánana fiéni úrillano íena riire jícanotio? ¿Níbai mei íena ízíruiñeno jámairuitio? Mei jíi, nana cai Cristo uíécomo ácatallícaí. Afénomo afémie caímo ítífue na riire jícanoite. <sup>11</sup> Juzíñamui Cuegáuai llote:

Uáfue na jaca níno mo cáadime na cue íllana onódiomoíza; afe izói uáfue na comíní cuemo eróicana íaioi cañici ífodo dújuzaiítiaioi.

Daje izói nana comíní jino uáfodo ñúefue na Juzíñamuimo nítaítiaioi, daide.

<sup>12</sup> Iemona jae onódicaíza, cáimona illa dígamie dama íe illáfue na afe Juzíñamuimo jáanoñeno jino íemo llórede.

### *O ámana ñúefue mona oni níbéfodo baítañeno iri*

<sup>13</sup> Ie jira benómona mai conímaína comécido fiéni úriñeno iri. Mei jíáifodo, nágaruí omoi finócafuaído conímána fiénidifue mo omoi baítañeno iri áfemo mai ñue omoi maméirí. Daje izói omoi illáfue mo afémiena fiéni facátañeno iri. Afemona abí omoi rairuí.

14 Jae onódicueza, nana güille naa rílleniari, dama íainideza. Ua, cai Ocuíraima Jesumo cue ínuamona, ie daina izói, cómena íáiruitaite güille íñédeza, ñue onódicue. Daa “Bíena cue güadi cuena íáiruitaite” comécido daidímiemo, afe raana afémie güadi íena íáiruitarede. 15 Mei jíáfodo, o ama comécilla rairuica güille o güíllamona o ama o rítaiadi, íena ja figo izíruiñedio. Mai daade o güíacaga güíllado, Jesumo o ínote ama íaifuemo féiraitañeno iri; mei afémie jíllloillena Cristo tíizaibiteza. 16 Omo ite ñue finócafuiado jíáimacina fiéni úritañeno iri. 17 Mei jíi, daa cai güiga raado Juzíñamui comínimo jaináñedicai; daje izói daa cai jiroca raado afémacimo jaináñedicai. Mei jíáfodo Juzíñamui anamo ñue jaícina cai íllamona Juzíñamui comínimo jaináitagacai. Daje izói Ñuera Joreño caimo comútaga caimare comeci uái illáfuedo, afe dibénemo jaináitagacai. Daje izói íeri cai íóbioillafuedo, dájena ie comínimo jaináitagacai. 18 Cristo lloga iodo jailla llezica, nana bífuiaina jeire otímie Juzíñamuina íóbitade. Afe llezica afe izói finófredino comini ñue facátagamaci.

19 Iemona, naga come conímana caimare uái itátatífuiaina nágarui mai cai jenófireilli. Daje izói conímana Juzíñamuimo baímo izire jaináitaja raa, mai cai jenófireilli. 20 Daa o óiacaiga güíllado, dani omoi cígiri Juzíñamui comútaga caimare dájena omoi jaináinana, mai fia táinomo fáifitañeno iri. Uafue, nana Juzíñamui finoca güille güírede, mei ja ñúeraza. Mei íadi daa o güiga güíllado jíáimana ñuera íomona oni nibéfodo o baítaiadi, afe fiénide. 21 Daje izói rille o ríamona jíáimana fiénidífuemo o baítaiadi, ríllena o ríñeille, afe baímo ñuera. Afe izói vino o jíruamona íena ie ínogafue o uáitaiadi, vínona o jíróñena afe baímo ñuera. Daje izói nana o finuafuiaimona jíáima ínogafue jabo o féitaiadi, afe o finócafue fiénide. Mei íemona afefue o finóñedionia jamánomo ñuera, o ama ínogafue o féitañeillena. 22 Iemona bie güíllafue, níbai güíñenafue dibénedo o ñuera ínogafue fáicanocaiñeno, Juzíñamui eróicana dama óiena ñue o mameri. O comécido mamérimamona finócafufuiai dibénedo ñuera o daíreniadi, áfedo caimare itio. 23 Mei íadi dámie Juzíñamuimo figo ínoñenamona ie güille jíízreoicana güadi, afémie fiénidífuemo báide. Mei Juzíñamuimo ínuamona cai onoiga íena íóbitallífué cai finoca ñuera, mei íadi nana aféfuiai jinomo cai finócafufuiai fiénideza.

## 15

### *Dama o abina íóbitañeno o ínote ámana ñue íóbitari*

1 Nane Jesumo ínotínuiaimona dámerie ñue ríinorede. Jíáimaci figo comécina náinidiaioi. Cai ja comécina ríinoredinodicai, íemona nai comécina ríinidinona canóredicai. Afefue caimo llonódacaigafue. Afedo dani cai abina íóbitanidicai. 2 Cáimona illa dígamie ie ínote ámana íóbitarede, afémie ñue íllena. Daje izói íena Juzíñamuimo aillo ínotaredicai. 3 Mei Cristo dama ie abiri íóbillena jenóñede. Mei jíáfodo Juzíñamui Cuegáuai íemo zúilla. Afe uai daide: “Afe báíñoridino Juzíñamui jíáima báíñoia cuemo baite.” 4 Nana jaiái uícodo Juzíñamui Cuegáuillai cai llófuellena cuega. Aféuaimo cai comeci fíraja uai baiticai. Afe izói bíuai cai facáduamona comeci járitañenafue caimo comuide. Iemona Juzíñamuimo íco cai nabáírizaillíruimo ocuídídicai. 5 Juzíñamui afe comeci járidoñenafue llotímie. Daje izói afémie, cai comeci fírajano caina náiretade. Iemona omoi ie canóllena afémiemo jícadícue, illa dígamie jíáimaíari dájena caimare omoi íllena. Mei Cristo Jesús daí caina dáideza. 6 Afe llezica, dájena omoi comécillena íemo jícadícue, cai Ocuíraima Jesucristo Moo Juzíñamuina dáuaido omoi caimátaitallena.

*Judíoñedinomo Juzíñamui ñúefue jae llujáiga*

7 Mei daí Cristo caimare cai uáidua izói, afe izói conímana caimare omoi uáidori, Juzíñamuimo ebíredifue nitállena. 8 Mei bie cue daina uai: Cristo judíuui ñue finuaibite. Nana Cristo táijina fueñe judíuaimo dúide, cai nanóidigimana daina uai ñue fuitállena. Afedo Juzíñamui ie méidoñega llogáuaina caimo jino ácatate; mei Juzíñamui afe ie daina uai jaca jíáfodo méidofinideza. 9 Daje izói judíoñedino Juzíñamuimo ióbillena Cristo ana bíniemo bite. Iemona Juzíñamui íaioimo dúecaillari ióbidiaioi. Juzíñamui Cuegáuui jaiiai uícodo daí daide:

Ie jira afe izói judíoñede náiraiai cígiri omo caimátaiticue.

Omo ñúefue cue nitalle rua afémaci cígimo róiticue.

10 Ie mei jíáinomo Cuegáuui daje izói daide:

Judíoñede náiraiai mai omoi cáimacairi, naa Juzíñamui imáciairi.

11 Nane jíáinomo Cuegáuui daje izói daide:

Naga judíoñede náiraiai, cai Ocuíraima ióbiri.

Mei afe Juzíñamui jamánomoidimieza, íemo omoi ióbiri.

12 Mei daje izói Isaías cuete:

Isaí (illaíma David moo) ie méifomo comuídigimamona jamánomoidillaíma cómuite.

Afémie nana judíoñedino cígiri illáimaite.

Afe comini aféniemo ocuírítiaioi, daide.

13 Juzíñamui caina íemo ocuírítate. Ie jira íemo omoi ínuamona ñue cáimafue jeire omoi óllena, aféniemo jícadicue, daje izói omoi comeci caimare uái illafue jícadicue. Afe llezica Juzíñamuimo omoi nabáirizaillena birui jabo ocuírídíomoi. Afemona Ñuera Joreño ríinodo ñue izire omoi ocuírillena Juzíñamuimo jícadicue. Mai mei daí Juzíñamui ómoína ñue ézicíteza.

14 Cue ámatiai, ñue onódicueza, ñúefuina jeire otíomoi naa omoi fibítainafuiai. Daje llezica illa dígamie jíáimacina caimare llófuiana onódiomoi. 15 Mei íadi bie cue cuegábedo, bíuailai ómoimo iere jino uáfodo cueticue, afe uáillaina omoi féitañeillena. Juzíñamui cuemo dúecaillano cuemo jónonocaigafue jino lloticue. 16 Bie cue táijinafue: Juzíñamui lloga cai jíllóillifue ómoimo cue llujállena. Afefue ómoimo lloticue, Juzíñamui íena omoi maméillena, mei judío imáciñediomoiza. Ie mei, Juzíñamui ómoína caimare uáidoite, mei omoi ja Ñuera Joreño ñue finócaomoiza.

17 Mei daí dama Jesús cue ínuamona, Juzíñamuimo cue táijinafuerei ióbillano caimare iticue. 18 Dama Cristo cuedo finócafuiari llócaiticue, mei áfedo judíoñedino Juzíñamui uaina jeire otátaticueza. Jíámie táijinafuena jaca jino llócañeiticue. Afe íaioi Juzíñamui uailai jeire ua, cue daina uáillaido jino ñue ícoimo fuitádicue. Daje izói cue ñue táijnado íaioína ñue jaícina ínotadicue. 19 Afe izói jino cue cíotaga uaido comuítaga cíorainina ráamona íemo jíáie onóillena finócafuiari, íaioína ñue jaícina ínotadicue. Daje izói Ñuera Joreño ite ríinodo íaioína ñue jaícina ínotadicue. Bie izói cue finuamona Jesucristodo cai jíllóillifue llujállena ja ñue ícoimo fuitádicue. Ua Jerusalémona oni jica nágagobiaido aféfuena llócaidicue. Ua ícoimo Ilírico éniemo záitajidicue. 20 Afe daí, nai jaca Cristo mámecina cacáñedinuaimo, afe ñuera cai jíllonafue llócaidicue. Daí oni jícado llócaidicue, jíáima jae llógamo dánomo nane cue llóñeillena. 21 Mei íadi Juzíñamui jaiiai Cuegáuui daina izói:

Juzíñamui ífuena nai lloñéganuai afémiena ñue ónoítiaioi.

Daje izói jaca íena cacáñedino nane aféfuena como fídítiaioi, daide.

### *Pablo Rómamo jáillena comeci facade*

22 Diga icaiño omoi uáiduallena comeci facáfiredicue, íadi jaca jáinidicue. Mei como ómoimo cue lloga oni nágagobiaido cue llócaigafuemo záitaiacadicueza; bínidicue. 23 Mei ja birui bígobiaido cue táijicana ja fuitádicueza. Jaiiai diga fimónaiiai omoi diga íacadicue.

<sup>24</sup> Ja birui Espáñamo cue jáizailla llezica ómoína méiñuaibiacadicue. Omoí cígiri cue illa llezica, iere caimare íticue. Afe mei Espáñamo cue jáiacana llezica, omoí cue canóllena jítaticue. <sup>25</sup> Mei íadi birui fueñe Jerusalemo ite ámatiai canolle raa úticue. <sup>26</sup> Macedonia énie imaci, naa Acaya énie comíniri, Jerusalemo ite dúredino canolle úcube ofítallena maméritiaioi. Afe íaioi ofítaga úcube cuedo Jerusalemo óreitiaoí. <sup>27</sup> Afe bie úcube oréllemo ñue coméciidiaioi. Mei jii, afefue ñue jaícina joide. Uafue benó ítimaci afémacimona aillo comeci cáimafuiai íbáñeno itíaioi. Iemona birui Jerusalemo ite ínotinomo raire íballe ite. Ua judíuaimo ite Jesumo ínotino, íaioimo ite comeci cáimafuiai, jae judíuainédinomo dájeze fecádiaioi. Iemona benó Macedóniamo ite ínotino naa Acaya ínotinori, judíuaimo ite ínotinona, afe íbana íaioimo ite úcubedo canócadiaioi. <sup>28</sup> Bie íaioi afémaci cánua mei, afe izóí íaioi jóonega úcube cue izájille mei, Espáñamo jáitícue. Ua omoí uáidocana afénomo jáitícue. <sup>29</sup> Ñue onódicueza, omoí cígiri cue dúcille llezica, nana Cristo uáimona comuide cáimafuiai ómoimo llófueredicue.

<sup>30</sup> Amatai, cai Ocuíraima Jesucristo mámedido izire ómoimo jicádicue. Daje izóí Ñuera Joreño caimo comútaga izíruillafuedo izire ómoimo jicádicue. Mai, cue diga dájena omoí iri, Juzíñamuimo dájena cai úrillena. Juzíñamui cue canólleza, mai izire omoí jicari. <sup>31</sup> Dinó Judea éniemo ite ínoñedino cue íaioi llaitáacanamona cue ie zuitálleza izire Juzíñamuimo jicari. Afe llezica bie cue uiga Jesumo ínotino canolle úcube caimare íaioi llínolleza, daje izóí Juzíñamuimo omoí jicari. <sup>32</sup> Bie Juzíñamuimo omoí jicáfireillifuiiai ómoimo jóonenocaidicue, Juzíñamui comeci jítaina izóí omoí illánomo caimare cue dúcillena. Afe mei omoí cígiri nano áinori cue ílledo cue comeci ñue náireite. <sup>33</sup> Mai, comeci caimare uái illáfueña fecade Juzíñamui omoí ñue nábaiteza. Daiítadeza.

## 16

### *Pablo ie onóigamaci uáidote*

<sup>1</sup> Birui cai Jesumo ínote miringo Fébena, ómoína caimare uáidotadicue. Afengo Cencrea jófueño ite Juzíñamuimo gairídímaci canófiredingo. <sup>2</sup> Cai Ocuíraima mámedido aféngona caimare omoí llínori. Mei nana Jesumo ínotino illa dígamie jáimana daíí caimare llínofiredeza. Daje izóí nana afengo jitailla raana aféngomo omoí fecari. Afedo aféngona canórediomoiiza, mei afengo jaiiai aillo comínina canófiredeza. Iemo jíaí daje izóí cuena canódeza.

<sup>3</sup> Iemo Aquílamo ie ai Priscila diga, uai orédicue; mei afe íaillinoi Cristo Jesús uaimo cue tájicana llezica cuena nabáidiaillinoi. <sup>4</sup> Jácinomona cue íaillinoi jíllotado íaillinoi illafue jacire fiévide. Aferi afe íaillinoína “Iere figora” daidicue. Dama cue daíí daíñenaza, nana judíuainédinomona gairífirede ámatiai daje izóí “Iere figora” daidíai. <sup>5</sup> Daje izóí Aquila Priscila jofomo gairífirede cai ámatiai uáidori. Daje izóí cue izíruiga nabai Epeneto uáidori. Afémie fueñe Acaya éniemona Crísto ínotimie. <sup>6</sup> Afe izóí ómoído iere tájifiredingo María omoí uáidori. <sup>7</sup> Iemo llavéracomo cue llaveina llezica, cue diga llaveca cue nabai Andrónico, Junias diga, daje izóí afe íaillinoi omoí uáidori. Cáizie ímie íaillinoi. Jesús orécamacimona mámedina jica jalleide íaillinoi. Afe íaillinoi nai Crísto cue ínoñenia, raire uícodo Crísto ínotiaillinoi.

<sup>8</sup> Afe izóí cue izíruiga nabai Amplias uáidori, mei cue izóí cai Ocuíraimamo jaináideza. <sup>9</sup> Iemo Cristo Jesumo cue tájina llezica, cue nabai Urbano uáidori. Daje izóí cue izíruiga Estaquismo uai orédicue. <sup>10</sup> Afe izóí Apeles uáidori, mei diga ícaíño Crísto ie ínogafueña afémie jino comínimo cíotateza. Daje izóí nana Aristóbulo comini uáidori. <sup>11</sup> Cue nairai ímie Herodiómo daje izóí uai orédicue, naa cai Ocuíraimamo ínote Narciso comíniri. <sup>12</sup> Daje izóí Trifena ie ai Trifosa diga uáidori. Afe íaillinoi cai Ocuíraima



tájinamo tájifirediaillinoi. Daje izói cai izíruiga miríngo Pérsida uáidori, mei afengo cai Ocuíraima tájinamo tájifiredeza. <sup>13</sup> Iemo mámecina jica jalleide Ocuíraimamo ínotimie Rufo uáidori, naa ie ei diga. Afengo aillo cuena ie izíruillado cue ei izoide. <sup>14</sup> Daje izói Asíncritomo uai orédicue. Iemo Flegonte, íemo Hermas, íemo Patrobas, íemo Hermes, daje izói íaioiri ite ámatiai uáidotícue. <sup>15</sup> Daje izói Filólogo, Julia, Olimpás, Nereo, naa ie miríngooiri uáidori. Iemo nana íaioiri ínote ámatiai uáidori.

<sup>16</sup> Mai, illa dígamie Crístomo izíruillamona conímana caimare uáidori. Daje izói benó Juzíñamuimo gairíracuai imaci ómoimo uailai orédiaioi.

<sup>17</sup> Amatiai, bifue jeire omoi óllena izire jicádícue. Conímaiaina éoitadinomona abí omoi rairuiri. Afémaci jíaimana fiene ícítailla izói finódiaioi, omoi ñue ínogafue féitallena. Baimáci jíaimana énenoruitaitiaioi. Bie íaioi lloga uai, naui omoi cue llófuiafuena uáitaacadeza. Afémacimona oni jicado omoi iri. <sup>18</sup> Afe izóidino cai Ocuíraimo comeci jitaina izói íñédiaioi. Dani íaioi comeci gáinanomo tájídíaioi. Afe llezica íaioimo ite caimare ebírerie urilla uaido, comécina nífuenidinona jífuetiaioi. <sup>19</sup> Nana jíaie comini Juzíñamui uai jeire omoi úana fidídiaioi. Iemona áferi íóbídícue. Iemo ñúefue dibénedo iere baitádimacina omoi íllena jitáidícue. Mei jíáfodo fiénidífue fínua dibénedo nífuenide onóñedimacina omoi íllena jitáidícue. <sup>20</sup> Mei onódicaiza, comeci caimare uái illafue llote Juzíñamui Taife uaina anáfenoiteza, omoi ie áfedeñeillena. Mei cai Ocuíraima Jesucristo ómoína ñue ézicíteza.

<sup>21</sup> Cue diga tájiaicade nabai Timoteo ómoimo uai orede. Daje izói cai nairai ímiai Lucio, íemo Jasón, íemo Sosípater diga ómoimo uailai orédiaioi.

<sup>22</sup> Pablo ocuica rabe cúeraimadícue; cue mámecei Tercio. Daje izói Jesumo cue jaináinamona uai ómoimo orédicue.

<sup>23</sup> Benó ite Gayo ómoína uáidote. Birui afémie jofomo itícue. Daje izói nana Juzíñamuimo gairíacadinomo íaioi dúcillena, afécona nano íanori íaioimo fiede. Daje izói cai jófuemo ite úcubemo tájídímie Erasto, uai ómoimo orede. Iemo cai ama Cúartona mámeceiredímie uai ómoimo orede.

<sup>24</sup> Mei cai Ocuíraima nana ómoína ñue íllena ézicíteza. Daiítadeza.

*Iraicaiño Juzíñamuimo caimátaillafue Pablo úrite*

<sup>25</sup> Juzíñamuimo mai cai caimátailli, mei afémie omoi ínogafuena iere izire ínotaredeza. Cue ómoimo jino lloga cai jílluille uai daií dáideza. Daje izói Jesucristodo omoi cue llófuiafue daií dáideza. Juzíñamui jaiái ie comécido mamérilla izói, ja birui judíoñedino comécina ñue náiretade. Ua, bínie nai cómuiñenia, bífuena jica ia daií comécido mamede. Ja diga fimona jaide íadi, aféfuena báinino íteza, nai jino comínimo uáfodo llóñega. <sup>26</sup> Mei íadi ja birui Juzíñamui uai llócaidino cáiena fieca Cuegáuaido, afefue jae jino denoca. Bifue ziiño Juzíñamui ocuilla izói caimo íficaide. Bie fueñe báinino Juzíñamui comécido mamérellafue, ja birui nana náiraiaimo jino cíotaga, aféfuena íaioi onóillena. Daje izói afefue jae jino íaioimo cíotaga, comécido ínota afe uaimo ñue jeire íaioi óllena.

<sup>27</sup> ¡Daade jamánomo baitade Juzíñamuimo ebírede ñúefuiai nítaicaiza! ¡Daií afémiemo Jesucristodo ziiñoña jaca ninomo llóiticaiza! Mei daiítadeza; jae ñie.

## NANOIDE SAN PABLO CORINTO IMÁCIMO ORÉCABE Primera Carta del Apóstol San Pablo a los Corintios

### *Coríntomo ite Jesucristomo ínotinomo Pablo cuete*

<sup>1</sup> Cue Páblodicue. Ñúefue llujillena Juziñamui comeci jitaina izói Jesucristo jóonegamiedicue. Bie izói daina Jesucristo orécamedicue. <sup>2</sup> Cue, cai ama Sóstenes diga, Corinto jófue mo ite Juziñamuimo gairífredino uáidotico. Afe llezica bibe ómoimo cueticue. Omoimo Jesucristomo dájena jaináinamona Juziñamui iédiomoi. Juziñamui íena omoi jáillena afémieoiri ómoína jíríte. Nágagobiaimo ite cai Ocuíraima Jesucristo mámedido jicáfiredino, daje izói Juziñamui íeiena uáidogaiaioi. Afe Ocuíraima Jesucristo afémaci ie, daje izói cáie. <sup>3</sup> Cai Moo Juziñamui, cai Ocuíraima Jesucristo diga, íaillinoína ñue uái illifue dibénemo ómoína jóoneiteza. Daje izói afe íaillinoi ómoína ñue ézicíteza.

### *Jesucristomona comuide caimare illafue*

<sup>4</sup> Nágarui ómoiri Juziñamuina iere figura daiífredicue, mei Juziñamui Jesucristodo ñue caimare ómoína itátate. <sup>5</sup> Mei jii, Jesucristomo dájena omoi jaináinamona, Juziñamui nana ie cáimafuiai ómoimo orede. Nana ie caimare úrillafue Juziñamui ómoimo llote. Daje izói ie onóigafuiai ómoína onótate. <sup>6</sup> Mei daií Juziñamui Crístodo daina uai ja ómoimo bie nahífueña ite. <sup>7</sup> Bíemona cai Ocuíraima Jesucristo cíocaizaíbilliruimo nai dúciñena llezica, nana Juziñamui lloga uaina ómoimo íteza; abi diné jíáie uaina jítaiñeitiomoi. <sup>8</sup> Afémie íco írairuimo ómoína náiretaite. Iemona cai Ocuíraima billíruimo dúcille dino buna ninó fiénidífueña ómoimo nitáñede. <sup>9</sup> Juziñamui uícodo ie dainana jaca ñue ícoimo fuitáfiredo. Afe ínotifrega Juziñamui ie jító Jesucristomo cai nabáirillena caina uáidote. Afe Jesucristo cai Ocuídime.

### *Crístomo gairífredino dájena íñeno oni eneno comécidiaoí*

<sup>10</sup> Amatiai, omoi cacai. Cai Ocuíraima Jesucristo mámedido izire ómoimo jicádicue. Dájena omoi jainairi. Daje izói eneno omoi bozíetañeno iri. Mei jíáfodo jíáimana énenaruiñeno ñue dájena omoi iri. Daje izói dáafue mo comeci fácaitiomoi, íemo daje izói dáafue mo omoi maméritiomoi. <sup>11</sup> Cue amatiai, bifue ómoína daidicue, mei Cloé comínimona dáarie cuemo llotíaoi, omoi cígiri jíáimana ruifíruillano oni enénorie itíaoi, daií daidíaoi. <sup>12</sup> Bie izói cue cacánafuedo ómoína daiíacade. Omoimona illa dígamíai jíáfodo úritiomoi. Dáarie cue Pablo iédicue daide, jíáimaci cue Apolos iédicue daide, jíáimaci cue Pedro iédicue daide, jíáimaci cue Cristo iédicue daide. <sup>13</sup> Mei íadi nana omoi Cristo abi izóidinodíomoi. ¿Meita afe Cristo abi énenorie fecaca? Daiítañede. ¿Meita Pablo omoi méfomo cruzmo coraica? Córaiñega. ¿Meita Pablo mámedido omoi báutizagaomoi? Daiítañede. <sup>14</sup> Cue mena come Crispo Gayo diga báutizadicue. Omoimona abi dine jíáimacina báutizañedicue. Aferi Juziñamuina “Figora,” daidicue. <sup>15</sup> Iemona ómoimona buna “Cue bie Pablo mámedido báutizagacue,” daiínde. <sup>16</sup> Iemo jíái daa Estéfnas comini báutizadicue, mei íadi cuemo úbicaiñedeza, abí dine jíáimacina báutizañedicue. <sup>17</sup> Mei Cristo cuena “Comini o báutizari,” daiíñede. Cuena “Cue ñuera jíllona uai o llócairi,” daide. Mei íadi cue abi ínotade comini bacácido cuena llotátañede, Cristo cruzmo tíllana cue ráifitañellena.

### *Cristo llogáfue mo Juziñamui ríino ite naa ie baitácafuiari*

<sup>18</sup> Afe bie Cristo cruzmo tíllafue, nana nine táinomo báitino dibénemo ráifiñede taino uaillai izoide. Mei íadi ñue jíllotino dibénemo, Cristo cruzmo tíllado cai comeci illafue

méidorede, mei afe uaimo Juzíñamui ríino íteza. <sup>19</sup> Jaiai Juzíñamui Cuegáuaido afémie bie izói daide:

—Iere baitádino onóigafuiaina niné táinocaitaicue.

Daje izói fibídino fibíllafuena ráifitañeiticue, —daide.

<sup>20</sup> Ja biniemo fibídime ¿mei níifuemo cánoite? Comini comeci ífuena ñue méidoñede. Daje izói fia fibíllafue llófueraima canóñede. Afe izói binie ráfuiái júfidotimie canóñede. Mei nana biniemo fibíllafuiái Juzíñamui ja jiáifodo méidoga. Ráifiñede taino uáillaina méidoga. <sup>21</sup> Juzíñamui nana ie finóllifuiaina onófirede. Iemona “Fia binie comini báitajafuedo cuena ónoñetiomoi,” afémie daiñocaide. Mei jiáifodo Juzíñamui íaioimo lloga uaillai íaioi ínuado afémacina jíllotaacade, afe bie lloga uai jiáimacimo ráifiñede taino uai izoide íaioimo cíocaide íadi.

<sup>22</sup> Iemo Judíuai fia dánamona comuide cíorainina ráaniaina cíocadiaioi. Iemo judíoñedino iere báitajafue jenódiaioi. <sup>23</sup> Mei cai, cruzmo coraica Cristo rafue jino llófredicai. Ie mei judíuai afefue llófuiana meáruitiaioi. Iemo judíoñedino aféfuena “Ráifiñede taino uaillai,” daidíai. <sup>24</sup> Mei jiáifodo Juzíñamui jílloilena maiñócano dibénemo afe Cristo cairi tilla llogáfuemo Juzíñamui ríino ite. Daje izói afémaci íena afe llogáfuemo Juzíñamui baitaca uai ite. Daa Juzíñamui jírigamie judío ímie íadi, bifue afémiemo ráifide. Daje izói Juzíñamui uáidogamie judíoñedime íadi, bifue dájerize íaillinoimo ráifide. <sup>25</sup> Mei jí Juzíñamui lloga uai, ráifiñede taino uai izói comínimo cíoide, mei íadi afe uai énie comini baitacafue baimo iere baitade. Daje izói Juzíñamui finócafue ríinonina izói comínimo cíoide, mei íadi comini máirie baimo jamánomo ríirede. <sup>26</sup> Amatiai, mai Juzíñamui omoi jírrillafuemo uibíoicairi. Omoimona baitádinona figo íñede, mei íadi nai ie comínidomoi. Daje izói ómoimona ríillainina figo íñedeza. Iemo ómoimona jica jalleide comínina figo íñede, mei íadi nai Juzíñamui izíruigamacidomoi. <sup>27</sup> Mei jiáifodo, binie comini daina abina onóñedino Juzíñamui jae nizeca, ráfuiaina baitádino méaicaillena. Daje izói binie comini daina ríinidimaci Juzíñamui jae nizeca, nana “Mairídicue” daidino meáicaillena. <sup>28</sup> Iemo biniemo ite jica jalléiñedino naa jámairuigamací diga Juzíñamui jae nizede. Nana bie Juzíñamui nizécano jamai comini. Juzíñamui bie izói jamai comini nizede, abi ínota “Aillomiedicue” daidino ríinitallena. <sup>29</sup> Iemona buna Juzíñamui uícomo abina ínonide. <sup>30</sup> Mei dama Juzíñamui ómoína Cristo Jesumo dájena jaináitate. Daje izói Juzíñamui, Jesucristo cai ífoci déitatimiena jóonete. Iemo Crístodo, Juzíñamui anamo ñue jaícina cai íllena, afémie caimo jóonete. Afe llezica Juzíñamui íeiena Crístodo caina ñue finode. Afe bie Crístodo daí jíllodicai. <sup>31</sup> Afémie daí finode, Juzíñamui Cuegáuai daina izói jaícina jino fuitállena. Afe uai daide: “Dámie abí ínoiacania, cai Ocuíraimado abí ínori,” daide.

## 2

### *Dama coraica Cristo rafue Pablo comínimo llote*

<sup>1</sup> Birui ómoimo cue llua izói, afe izói nauí Juzíñamui ua rafue ómoimo cue lluaíbillaruido, cue baitaca féirede uaido ómoimo úriñedicue, “Iere ráfuiaina baitádimiedio” cuena omoi dáíñeillena. <sup>2</sup> Mei nauí omoi cígiri cue illa llezica daa Jesucristo ráfuena naa ie coraíafue diga, abi diné jiáifuena ómoína onótacañedicue. <sup>3</sup> Aféruillaído ómoiri ríinidime izói iticue. Ie jira benena cue jácieri cuidíridicue. <sup>4</sup> Ómoimo jino cue llua llezica fia énie come baitaca uaido ómoína jíeruítacñedicue. Mei jiáifodo Juzíñamui Ñuera Joréñodo jíeruítadicue. Daje izói Juzíñamui ite ríinodo: “Bífuena omoi jíeruiri,” daidicue. <sup>5</sup> Daí ómoína daidicue omoi ínogafue, Juzíñamui ríino dibénemo íllena; daje izói omoi ínogafue binie comini onóigafuemo jáinaiñeillena.

### *Juziñamui da ie Ñuera Joreño do onoiga*

<sup>6</sup> Mei íadi ómoimona Juziñamuimo ñnogafuemo ñue móonaitinomo cue baitaca uaido úriticue. Bie cue baitaca uai bínie comini íeñede. Daje izói bínie uíñote ríillaini uáiñede. Afémaci naa íaiói uáillairi niné cíocaiñeitiaíoi. <sup>7</sup> Jaiái uáfodo ónoñega Juziñamui fibíllafuiaido úriticai. Afémie jaiái énie comuíacana uícodo báinino mamérillafuedo úriticai. Aféruillaído caimo zíñona fuíñeite jíllollifue caimo mamede. <sup>8</sup> Nana bínie uíñote ríillainimona bífuena buna onóñede. Bífuena onódiaíoi na cai ñuera Ocuíraíma Jesucrístona coráiñediaíoi. (Aféfuena íaiói onóñenado íena coráidiaíoi.) <sup>9</sup> Mei íadi Juziñamui cáiena mamécáfue ie Cuegáuai daína izói ite. Afe uai daide:

Bínie comínimona jaca buna cíóñena ñuera raa Juziñamui íena izíruitino íaióiena jóonete.

Afe izóidena comini jaca cacáñediaíoi.

Daje izói áfemo jaca buna comeci facáñena.

<sup>10</sup> Afe bífuiaína Juziñamui ie Ñuera Joreño do caimo llotátate, mei afe Ñuera Joreño nana Juziñamuimo ite uáfodo ónoñega ráfuiaína onóillena izire jícanofiredeza. Iemona afémie cai fidítate.

<sup>11</sup> Bíníemo ite comínimona, ¿mei nímie jíáíma comeci ifue onona? Dama afémiemo ite joreño ie comeci ífuena onona. Afe izói dama Juziñamui Ñuera Joreño Juziñamui comeci ífuena onona. <sup>12</sup> Bínie comini fiéni comécíllafuiaí uícaíñegacai, mei íadi Juziñamui caimo oreca Ñuera Joreño úicaigacai. Juziñamui ie Ñuera Joreño caimo orede, aillo jeruíñeno caimo ie fecaca ráfuiaína cai onóillena. <sup>13</sup> Juziñamui Ñuera Joreño caimo llófuega uáillaído afe bífuiaído ómoímo úriticai. Dani cai fibíllafuemona cai onoiga uáillaído ómoímo úriñedícaí. Afe daíí Ñuera Joreño úicaiganomo Ñuera Joreño lloga ua ráfuiaí jino ñue lloticai.

<sup>14</sup> Mei jíí, Juziñamui Ñuera Joreño úicaíñegamie afe Ñuera Joreño lloga ráfuiaína jeire oñede. Mei afémiemona bífuiaí ráífiñede taino uaillai izóideza. Aféfuiaí afémiemo jánaide, mei bífuiaí cómemo dama Juziñamui Ñuera Joreño do llófuegaza. <sup>15</sup> Mei íadi Juziñamui Ñuera Joreño igámie naga ráfuiaimona nífué ñuena, nífué fiénina daíírede. Mei jíáífodo Ñuera Joreño íñegamie afe izói daííñide. Iemona Ñuera Joreño íñegamie Joreño igámiemo jaca nífuena jícanonide. <sup>16</sup> Mei Juziñamui Cuegáuai daide: “¿Bu mei cai Ocuíraíma comeci fácafue na onona? ¿Mei nímie Juziñamuina llófuerena?” Mei íadi ie Ñuera Joreño do Cristo ífocí úrillafue caimo ite.

## 3

### *Dájemo táijidino izói Juziñamui ocuica uai llujáillena canódicai*

<sup>1</sup> Amatíai, bie lloga Cristo comeci fácafue nai ómoímo figo jóobiñede. Iemona Ñuera Joreño úicaigano izói nai ómoímo úrinidícue. Mei jíáífodo Ñuera Joreño nai figo jáináñedino izóidiómoi. Crístomo jáináidino dibénemo nai figo onóñede úruiaí izóidiómoi.

<sup>2</sup> Iemona nauí ómoímo féinino llófuetícue. Nai monoi jirode úruiaí izóidiómoi; jáiaide güille nai ómoímo dúíñede. Iemo afe izói ñue baitácafue nai ómoímo jaca dúíñede. Nai aféfuena jeire ónidíómoi. <sup>3</sup> Mei nai Ñuera Joreño nai jáináñena llezica jamai come izóidiómoiza. Nai birui jíáimana úradoidíómoi, íemo ícírafuena jenófiredíómoi, íemo nai jíáimana énenoruidíómoi. Iemona bíníemo ite Juziñamui Joreño nai íñegano izóidiómoi. Nana íaiói eneno bozíetaíllafuiaína nai jeire otíómoi. <sup>4</sup> Omoimona dáarie “Pablo íédícue,” daide. Jáímaci “Apolos íédícue,” daide. Bie izói omoi illa, nai bíníemo ite Juziñamui Ñuera Joreño úicaíñega comini izóidiómoi.

<sup>5</sup> ¿Mei nímie Páblona? ¿Mei jíáí nímie Apólona? Coco bie daa Juziñamui ocuícamiédicoco. Daa cócodo cai Ocuíraímamo ínotíómoi. Cai Ocuíraíma cuemo jóonega táijinamo

táijidicue. Daje izói Apolos dama íemo jóonegamo táijide. <sup>6</sup> Cue bie fueñe ritímie izóidicue. Ie mei Apolos afe rigaji jáinoia riáitatimie izoide. Mei íadi afe rigaji zicótatimie daade Juzíñamui. <sup>7</sup> Iemona cue bie fia ritímiedicue. Iemo Apolos fia riáitatimie. Bie coco jabóidimiedicoco. Mei íadi Juzíñamui jamánomoidimie, mei afémie afe rigaji zairítaiteza. <sup>8</sup> Nana ido ritímie, afeji jáinoia riáitatimie nágaillinoi daje Juzíñamui ocuícamié íaillinoi. Mei íadi illa dígamie nano ie táijina dieze Juzíñamui íbaite. <sup>9</sup> Coco bie dama Juzíñamui jetácamo dájemo táijidicoco. Ie mei omoi Juzíñamui riga jacafai izóidíomoi.

Nane jiáie raa izóidíomoi. Juzíñamui como nicana uiga jofo izóidíomoi. <sup>10</sup> Cue bie jofo níraini ocuídímiedicue. Juzíñamui cue ocuilla izói, bico jáaillirai riire naidánetimie izóidicue. Iemo jiáimie afe jáaillirai acónimo ticáidímie izoide. Ie jira naga tícaitimie rairuídicue, fieni ie ticáiñeno ñue ie ticáilleza. <sup>11</sup> Mei jii, abi diné jiáimie riire naidaide jáailliraina naidánenide. Afe jae riire naidánega jáaillirai izóidímie Jesucristo. <sup>12</sup> Mei naga come bie jáaillirai caifófemo ie illínona nírede. Afe bíena daírede mei naga come illafue bie nillico izóideza. Dámie afe jáailliraina mameide Jesucristo caifófemo oro izóidedo ie illínona nírede, jiáimie quenírede llojefe izóidedo ie illínona nírede, jiáimie ráifide noficiai izóidedo ie illínona nírede, jiáimie amena iedo ie illínona nírede, jiáimie fia uifizaído ie illínona nírede, jiáimie zicicai izóidedo ie illínona nírede. <sup>13</sup> Iemo ico jiáiruido Cristo comínimo itifue riire jicánuaibilliruimo naga come ie nigano uáfori cíote. Aféruido Juzíñamui cai táijina fácaite. Irai izóidedo naga come nigánuai Juzíñamui fácaite. <sup>14</sup> Irai cúaritañega raado nitímie Juzíñamui ie táijina íbaja raana jirídoite. <sup>15</sup> Mei jiáifodo cúarirede raado nitímie minícana jiridoñeite. Nana ie táijina niné táinocaiteza; dama táinori llégite. Mei íadi dama afémie jíllote. Ua, jofo bóoamona nana raaie uzilla mei, dama come jíllona izói, afémie jíllote.

<sup>16</sup> ¿Omoi bie Juzíñamui jofo izóidíomoi nai onóñediomoi? ¿Daje izói Juzíñamui Ñuera Joreño ómoimo íllana onóñediomoi? <sup>17</sup> Afe bie Juzíñamui ico íaifuenidico. Iemona ómoimona dámie bie Juzíñamui jofo eneno botáadi, afe cómena Juzíñamui jiái niné táinocaitaite. Omoi bie íaifuenidico izóidíomoi.

<sup>18</sup> Nane daa come dama abi jífueiza áfemona abí omoi rairuiri. Omoimona dámie “Bínie ráfuenta iere baitádimiedicue,” daíadi, afémie meine abido ínoñedino daina izói ráfuenta baitáñedimiena jáirede, Juzíñamuimo ite nahí rafue baitállena. <sup>19</sup> Mei bínie comíni baitácafuaia Juzíñamuimona ráifiñede taino uaillai. Ie Cuegáuai daide: “Iere baitádinona Juzíñamui dani íaioi bífueinamo írebaimo jilla izói jíitate.” <sup>20</sup> Nane dánomo daide: “Baitáðino comeci fácafuaia ráifiñenana cai Ocuíraima onode.” <sup>21</sup> Ie jira jiáimamo jaináillado jaca buna abina ínonide. Afe omoi dáamíemo jaináilla uai jiáifodo jóide. Nana omoi canóðino ómoimo jainaide. <sup>22</sup> Daa cómemo jáinaiñeno nana bimaci ómoimo jainaide: Pedro, Apolos diga ómoimo jainaide, cue jiái Páblodícue ómoimo jaináidicue. Daje izói nana bíniemo ite ráaniai Crístodo ómoiena Juzíñamui mamede. Daje izói Crístodo Juzíñamui ómoina cáatate. Iemo omoi tíadi, Crístodo afe tíllana jáciruiñeitiomoi. Iemo biruíllaido Crístodo caimare írediomoi. Iemo uire jiáiruido ómoimo ífcaitífueimo Crístodo jáciruiñeitiomoi. Nana bie ñúefuaia ómoie. <sup>23</sup> Iemo Cristo iéðiomoi, ie mei Cristo Juzíñamui ie.

## 4

### *Jesucristo orécano táijinafue*

<sup>1</sup> Iemona Cristo canóðino omoi caína daírediomoi. Daje izói uáfodo ónoñega Juzíñamui lloga uaillai jino comínimo llófuetino omoi caína daírediomoi. <sup>2</sup> Mei jii, táijinana jóonegamie ie ocuídímie ínofirenana afémiemo jino cíotarede; ie ocuíllana ñue ícoimo

fuitárede. <sup>3</sup> Mei íadi cúemona, omoí cuemo itífue jicánodoiari járitañedicue. Daje izóí dáarie cuemo itífue jicánodoi dino cuena dáinana figo náfueñedicue. Afe izóí cue itífue dama cue jicánoiadi áferi járitañeiticue. <sup>4</sup> Mei cue comeci úrilla nífuena cuemo nitáñede. Mei íadi afe izóí cue comeci úria, nai ua Juzíñamui eróicana ua nífuenidimiedio cuena daiñede. Mei cuemo itífue jicánotimie dama Jesucrístoza. <sup>5</sup> Mei jira, Cristo nai biñena llezica jáíima táijinafuena riire omoí jicánodoiñeno iri. Daa cai Ocuíraima jicánuaibillirui omoí ocuíriri. Aféruido afémie jítifomo báinino itínona bai úzefomo uáfori cíotaite. Daje izóí aféruido cai Ocuíraima naga come comeci mamérrillafuiai uáfodo onótaite. Iemona Juzíñamui naga come nano ba íemo dúide dieze ñúefuiai íemo fécaite.

<sup>6</sup> Amatiai, mei ñue omoí íllena bífuiaido omoí o úriticue. Omoí canódimie Apolos ífue dama cuefue diga jae ómoímo lloticue, omoí ñue dájena comécillífue uáfodo omoí onóíllena. Bífue ómoímo lloticue ómoímo coco cíotagafuiaido Juzíñamui Cuegáuai baimo omoí coméciiñeíllena. Afe uai caina daide: Dáamie dibénemo gáííñeno omoí iri. Daje izóí jáíimiena jámairuiñeno dájeze nana íaíoímo omoí íñori. <sup>7</sup> ¿Mei nie come jáíimaci baimo ómoína ñue íñua? Nana omoí onoiga ñúefuiai Juzíñamui fecácaza. Jaca Juzíñamui fecáñegana íñede. Iemona ¿níbái mei dáamiedo abina íñofirediomoí? Abina íñofiredimie: “Cue comeci jítaina izóí cuemo fecácaza,” daiífirede. Mei íeñedeza. Omoí dani fécañegaza. Mei jira áfedo abina íñonidiomoí. Nana caimo ite ráaniaimona dani cai ocuilla izóí íñede. Nana Juzíñamui caimo fecaca.

<sup>8</sup> Birui ja “Nana Juzíñamui caimo fecáacagafuiai ja cai ógaza,” daií comécidiomoí. Nana omoí jitaica ráaniai níbai ja omoí oga. Nana omoí onóacaga ífuiaina níbai ja ñue baitádiomoí. Níbai ómoína cai canóñenado ja illáicomínina jáidiomoí. Mei íadi táinodo abi íñotiomoí. Iemo afe llezica cai bie jalléíñedicai. Mei íadi ómoína: “Ua illáicomínina omoí íi,” daidicue. Afe daií cai bie omoí diga dájena illáimaiticai. <sup>9</sup> Cai bie Cristo orécamiiai jino íirainomo Juzíñamui fíecacai. Cai bie lláviano títino izóidicai. Jira cai bie nana énie nairai acárilla raa izóidinona jáidicai. Iemona nana comíni naa Juzíñamui abi imáçiri caimo éroitiaíoí, mei afémaci abi fáiacaitadinodicaíza. <sup>10</sup> Cristo rafue cai llócaillamona caina jáíimaci “Abina onóñediomoí,” daidíaíoí; mei afe llezica “Crístodo ráfuiaina baitáidinodicai,” daidíomoí. Omoí ríiredinona illa llezica, cai bie ríinidinodicai. Caina comíni jámairuilla llezica ómoína ñue jacíruitiaíoí. <sup>11</sup> Mei jaiiai nai biruimo júbieri duere zefuídicai. Daje izóí cai jirole jainoi íñénari jáí duere zefuídicai. Daje izóí figo ínícuironidicai. Daje izóí comíni caina fieni finódiaíoí. Uái cai illino íñede. <sup>12</sup> Aillo cai táijinamona iere llégidicai. Iemo comíni cairi jainónaitimaci; mei íadi íaíoína Juzíñamui canolle uaido fairíoticaí. Caina fieni finóllena racádiaíoí; mei íadi ocuídicaí. <sup>13</sup> Cairi fíenidífuedo úritiaíoí; mei íadi afe comínina comeci mánainafuedo fíaicana llófueticaí. Afe llezica oni dotaca íáirede raa dota izóí, afe izóí caina ráííñedinona caina mámiano náfueñediaíoí. Nai biruimo cuidoda oni faíga íáirede raana caina mamédiaíoí.

<sup>14</sup> Bífuiaina omoí meáidaillena cueñedicue, mei jáíáfodo omoí ñue íllena rairuíllano, lloticue, mei cúemona izíruiga jítótiaí izóidiomoíza. <sup>15</sup> Mei cómemona facádonide Cristo ráfuena llófuetino ómoímo ite íadi, nai omoí íñogafue tainédimie daade. Cristo Jesumo omoí íñollena, omoí moo izóí omoí comútatimiedicue, mei cai jíllona uaina ómoímo llotícueza. <sup>16</sup> Ie jira ómoímo cue cíotaga cai ñue illífuedo omoí jáíllena, izire jicádicue. Daje izóí cue llogáfuedo omoí jairi daidicue.

<sup>17</sup> Afedo omoí jáíllena, Crístomo cue íñotaga Timoteo ómoímo orédicue. Afémie cue izíruiga jító izóidimie. Afémie, Crístomo cue íñuamona cue lloga ñue cai illáfuena ómoímo úbicaitaite. Afe bie afémie ómoímo llujáíllífue izóí, afe izóí nágagobiaimo ite Juzíñamuimo íñotimacimo, cue jáíí llófuefiredicue. <sup>18</sup> Omoímona dáarie abina íñuano, daidíaíoí:

“Pablo caina éroizaibiñeite,” daidíai. (Afe izói dáinado cue uaina uáitaacadiaí.) <sup>19</sup> Mei íadi cai Ocuíraima Jesucristo comeci jítaiadi raire omoi cue méiñuaillena ocuídídicue. Iemo cue billíruimo afe abina ínotimaci nie ñúefue jíímacimo finódiaí. Afe cue onóillena fácaítídicue. Afedo íai. ñuera ríino ite, nibai iñédeza, ónoítídicue. Aillo íai. úrilla uaina náfueñeítídicue. <sup>20</sup> Mei jí, fia cai úrilla uaido, Juzíñamui illáimana illáruimo jaináitañegacai. Mei jíáfodo Juzíñamui Ñuera Joreño ríinodo cai comeci itíídicue méiduano ie illáimana illáruimo jaináitagacai. <sup>21</sup> ¿Mei nie izói óiacadi. omoi? ¿Mei nibai ómoína duere cue fínuaíbillana óiacadi. omoi? ¿Níbai izíruillafuedo comeci mánainafuedo ómoímo cue éroizaíbillana óiacadi. omoi?

## 5

### *Pablo fiénide meáíídicue finódíídicue duere finóllena llote*

<sup>1</sup> Ja birui omoi cígímo ite iere fiénide jíruíídicue comíni cue fidítai. Omoímona dáamie ja ie moo ogango dama ie aina ote. Afefue iere jamánomo meáíídicue. Afe izoide fiéníídicue Juzíñamuina ónoñedíídicue jaca rairuídíídicue. <sup>2</sup> Mei íadi bie izói ómoímo illa llezica jnai omoi iere abina ínofíredíídicue! (Afe izói omoi illa iere figóñede.) Mei jíáfodo áferi iere zuure íredíídicue. Daje izói áferi meáíídicue. Bie izói jíruíídicue omoi cígímona mai oni ore. <sup>3</sup> Náamiena omoi díga dama cue iñédíídicue, mei íadi afefue díbénemo cue comeci facáoinana ñue onóíídicue. Ie jira afe bie jíruíídicue ie duere finóllena jae cai Ocuíraima Jesucristo mámedíídicue. <sup>4</sup> Iemona Jesucristo mámedíídicue dáanomo omoi gairíídicue llezica, íemo cue comeci facáoinamo ñue omoi uibíoícaílla llezica, íemo jíí cai Ocuíraima Jesucristo omoi cígíri ríinorena llezica, <sup>5</sup> mai afe íímana ómoímona jino dótano Taífena náamataga comínímo íena omoi zóoferi, ie abi fiéní jítainafuíí níne táinocaitallena. Afemona cai Ocuíraima Jesús billíruimo afémíídicue joreño jíllóbícaíteza.

<sup>6</sup> Afe íaíídicue nai ómoímo illa llezica omoi ñue íáiníídicue illa izói abí ínotíídicue. Afe abí ínuana figóñede. “Mei daa cómemo ite íaíídicue aillo ie abímo itíídicue íáíretáíteza.” ¿Comíni dáina uaina onóñedíídicue? Afe uai daíde: “Pan finóadi afe aillo fáítate raa tamédíídicue. Due jiza fáítatena jóonega íadi, nana afe magáfecíídicue aillo fáítate.” Afe izói daa come finoca íaíídicue aillo ie abímo itíídicue íaire finode. <sup>7</sup> Iemona ómoína fiéní finode come ómoímona oni jica oreri, mei afémíídicue jácaíídicue pan fáítara izóííídicue. Ie jira afe fiéní meáíídicue ómoímona ñue muiñori, ñue jáíídicue íaíídicue íaíídicue omoi íllena. Iemona fáítatena jóonega comue pan izóííídicue íííídicue. Ja onóíídicue, afe bie izóííídicue ua íííídicue, mei Cristo nana cai ícoíídicue fagámíídicue jáíídicue. Afémíídicue cai ífomo fatá Juzíñamuimo fecaca oveja jiza izóííídicue, caímo ite íaíídicue oni dóllena. Afémíídicue pascua rafue illa llezica cai uibíoígámíídicue. Ie jira bie íaíídicue oni omoi fáínocai; mei íaíídicue muiñócanona cai íllena, Cristo tíídeza. <sup>8</sup> Iemona nágarui cai illáíídicue táíídicue úríídicue coméíídicue mai cai illí. Daje izói ñúefuíídicue coméíídicue mai cai illí. Afe izoide comeci fáítate raa jóonega comue pan izoide. Mei jíáfodo íáíídicue coméíídicue cai íadi, daje izói éoícaíídicue coméíídicue cai íadi, afe izoide comeci jácaíídicue pan fáítate raa izoide. Afe izói mai cai íííííí. <sup>9</sup> Nauí ómoímo cue cugábemo ómoína daíídicue: “Bie izói jíruíídicue comínímo nabáíííídicue íríí.” <sup>10</sup> Bíníídicue jaca jíruíídicue ite, daje izói iere ráanaiacáíídicue ite, íemo meríííídicue ite, íemo jánarai íóbíídicue ite. Bímáíídicue díga omoi nabáíííídicue lloñédíídicue. Aféíídicue rairuídíídicue bíníídicue oni jáíídicue. Mei íadi afe izói ocuííídicue. Mei íadi onóíídicue, afémáíídicue illa izói índíídicue. <sup>11</sup> Mei ómoína cue daíííídicue jíííídicue jóíídicue. “Crístomo íínote omoi ámadíídicue” daíííídicue íadi afémíídicue jíruíídicue, afémíídicue díga nabáíííídicue íríí. Daje izói afémíídicue iere ráanaiacania afémíídicue díga nabáíííídicue íríí. Iemo dáamie jánarai íóbíídicue, íemo afémíídicue jíííídicue íríí íríííídicue, íemo ie meríííídicue, afe izoide “Crístomo íínote omoi

ámadicue” daidímie diga nabáiriñeno iri. Iemo jiái bie izoide come diga omoi güiñeno iri. 12-13 Biniemo ite ñnoñede fiénidinomo itífue riire cue jicánolle cuemo dúñede. Mei íaioimo fiene itífuiái dama Juziñamui riire jicánoteza. Mei jiáifodo omoi dani ómoimo jaináidinona riire jicánorediomoí. Ie jira afe bie fiénidifuiairedímie omoi cígimona oni oreri.

## 6

### *Juziñamuimo ñnotino júfidogafuiái oni ñnoñedinomo llujájinide*

<sup>1</sup> Dani ómoimona dámie jiáimamo júfidogafue comuíadi, ¿nibái mei oni jiáimacimo afefue záitallena jáidiomoí? mei afémaci cai ñnogafuemo jaináñedimaci. Dani omoi cígiri ite Juziñamuimo dúidinomo jicárediomoí, o júfidogana jaícina záitallena. <sup>2</sup> ¿Nai onóñediomoí Juziñamui iédino nana bínie comini itífueña riire jicánoitíai? Mei uire bínie comini riire jicánoitíomoíza, ¿nibái mei omoi cígiri ite dúefuiaina raíre záitanidiomoí? <sup>3</sup> Iemo jiái, ¿nai onóñediomoíza Juziñamui abi imaci, ángeles daínamaci, itífuiaina riire jicánoitícai? Mei uafue Juziñamui abi imaci itífuiaina riire jicánoitíomoíza, ómoimo ite bínie ífuiái raíre záitallena ómoimona juánide. <sup>4</sup> Bie cai illáfueмона comuide júfidogafuiái ómoimo comuíadi, ¿mei nibái mei Juziñamuimo gairídino dibénemo iñédinomo llujáfirediomoí, afefue jaícina ómoimo finóllena? <sup>5</sup> Bie izói ómoína daidícue omoi méaicaillena. ¿Mei nibái omoi cígiri ámatiaimo comuídifueña jaícina fínuaña baitádimie iñede? <sup>6</sup> Ja birui da ama jiáimamo júfidogafue comuíadi, Juziñamuimo ñnoñede jaícina finóraíma uícomo llujáfirediomoí. ¿Meita bie izói írede? ¡Inide!

<sup>7</sup> Uáfodo onóigaza, nanómona daa júfidollífue omoi cígiri comuíadi, jiáie o ñue illáfueña táinomo fáifitaite. (Daje izói o júfidogafue Juziñamui ífueña jámairuitade.) Daa cáimona dámie fiene o finóadi, afe iba o óñeille baímo ñuera. Daje izói daa come cue raa júfuiano baíróadi afe meine cue óñeille iere baímo ñuera. <sup>8</sup> Mei jiáifodo fiénidífue fáicanocaiñeno, dani omoi ámatiaimo fiene finódiomoí, íemo jiái omoi ámatiaína jífuiano raana baírófirediomoí.

<sup>9-10</sup> ¿Nai onóñediomoíza? nana jiáimana fiene finódino Juziñamui illáimana illíruimo dúciñeítiaioí. Omoi jífueñeno iri, mei naga fiénidino Juziñamui illáimana illíruimo jáinañeítiaioíza. Daje izói áreiñeno jiáie ringo jetáidino dúciñeítiaioí, íemo jánaraina íóbitadino, íemo jiruífueredino, íemo jiáie iima diga fiene itímíai, íemo merírifiredino, íemo iere ráanaíacadino, íemo jifáifiredino, íemo jiáimamo fiene úritino, íemo jífueña baírófiredino; nana éniemo ite bie izoide comini Juziñamui illáimana illíruimo dúciñeítiaioí. <sup>11</sup> Nauí ómoimona dáarie bie izoide. Mei íadi ja birui Jesucristo ñue íáinino finócaomoí. Daje izói Juziñamui íeiena ñue mamécaomoí. Afe izói Moo Juziñamui Ñuera Joréñodo, íemo jiái cai Ocuíraíma Jesumo omoi ñnuado Juziñamui anamo ñue jaícina itábicaídiomoí.

### *Cai abi Juziñamui eróicana iere ñúeraza áfena íaidonidícai*

<sup>12</sup> Comini daífirediaioí, “Cue bie cue comeci jitailla izói íredícue.” Afe uafue, mei íadi naga íaioí comeci gáinafue íaioína ñue finóñede. Uáfueña daa come dama ie comeci jitailla izói írede, mei íadi afe comeci jitaíllafue íena anáfenotanide. <sup>13</sup> Mei uáfueña: cai güille, cai jébeígoí ie; daje izói cai jébeígoí güille íena finoca. Mei íadi jiáíruido Juziñamui nágaillinoí güille naa jébeígoí diga jiáifodo méidoite. Mei íadi “Bie cai abina jiruífue íena mameca,” daínide, dáarie daí daífirediaioí íadi ¡mei afe uáfueñede! Bie cai abi cai Ocuíraíma ie. Afe íbana cai Ocuíraíma cai abimo dúide, cai ñue raíruíocaillena. <sup>14</sup> Iemo Juziñamui cai Ocuíraíma Jesús cáadimíena jáitate. Afe daí ie fínua izói, afémie dama ie ríinodo cáadimacina caina mámeite.



<sup>15</sup> ¿Onóñediomoiza ómoimona illa dígamie ie abi dama Cristo abimo dúide? ¿Meita Cristo abimo dúidimie jiruiredingomo dájena jóoneredicue? ¡Jaca jóonenide! <sup>16</sup> ¿Mei nibai jiáifue onóñediomoiza, dáamie jiruiredingo diga íadi afémie abi daa afengo abi izóicaide? Mei jii Juziñamui Cuegáuai áirenafue dibénemo bie izói daide: “Íima ie ai diga afe íaillinoi dámiena ja mameide.” <sup>17</sup> Afe izói dáamie cai Ocuíraimamo dájena jaináadi, afémie dájena joréñoredimiena jaide.

<sup>18</sup> Iemona mei jiruífueмона oni omoi iri. Nana jiáie cai finoca fiénidifue cai abina figo íáiñede, mei íadi áireiñeno jiáie ringo diga jiruifue cai finóadi, cai abina bácadicai. <sup>19</sup> ¿Mei onóñediomoiza, omoi abi Juziñamui caimo iga ie Ñuera Joreño illano? Iemona afe Ñuera Joreño jaca omoi diga íteza. Omoi abi dani ómoieñedeza, Juziñamui ie. <sup>20</sup> Mei omoi abi Juziñamui jamánomo ráifidena ibácaza. Mei jira cai abido Juziñamuina ióbitaredicai, íemo jiái daje izói caimo ite joréñodo íena ióbitaredicai, mei afe bie cai abi naa cai joreño diga Juziñamui íeza.

## 7

### *Pablo come áirenafue llófuete*

<sup>1</sup> Ja omoi cuemo jicánoga uaillai afe íbádiuui llóiticue. Uáfueza dámie áireiacañenia dama illa figura. <sup>2</sup> Mei íadi aillo jiruifue íteza, naga íima áirede. Daje izói naga ringo inírede. <sup>3</sup> Airedimie dama ie ai afémie diga íacana dieze, afémie írena. Iemo daje izói iníredingo ie ini afengo diga íacana dieze, afengo írena. <sup>4</sup> Iníredingo “Cue abi daingo cuemo dúide,” daiñide. Afengo abi ie ini íeza. Daje izói áiredimie “Cue abi bie dama cuemo dúide,” daiñide. Ie aimo jaináideza. <sup>5</sup> Íima ie ai diga íacania ráiruiñeno jiéruiri. Daje izói ringo ini diga íacania ini ráiruiñeno jiéruiri. Mei íadi nibai jiáiruideo da come ie ai diga nano nígarui iere Juziñamuimo íaillinoi comeci facáacana llezica, aféruillaido dájena íñediaillinoina ñuera. Afe mei nane raire meine dájena írediaillinoi. Mei are dájena íaillinoi jáicañenia, abi jitáinafuena ocuíninamona fiéni íllena Taife íaillinona facátaiteza.

<sup>6</sup> Bífuiái caimare ómoie íllena lloticue. Riire lletara uai daina izói lloñédicue. <sup>7</sup> Cúemona nana comini cue áinino cue illa izói itíaioina, ñuera. Mei íadi Juziñamui illa dígamiaimo jiáifoido ocuilla ríino fecade. Dámie áinino dama illa ocuírede. Jiáimie áinino dama illa ocuínide.

<sup>8</sup> Ja birui áinidinomo naa fecínguui diga úriticue. Damádimie dama cue illa izói itíaioina ñuera. <sup>9</sup> Mei íadi dámie ie abi jitáinafuena ócuiñenia afémie raire áirede. Daa come ie abi jitáinafue íena anáfenoa fiénide, íemona raire áirena ñuera.

<sup>10</sup> Mei íadi áiredino iníredino diga afémacina bie izói ocuídicue. Iníredingo ie inina jaca dotánide. Bie ocuilla uai dama cúeieñedeza, cai Ocuíraima Cristo ie. <sup>11</sup> Mei íadi iníredingo ie ini dotáadi afengo daingo írede; mei jiáifodo afengo afe dai íacañenia, afengo meine ie ínimo abido bírede. Daje izói áiredimie ie aina jaca fáicanocainide.

<sup>12</sup> Iemo jiáifue dibéfodo cai Ocuíraima úriñedeza, dama cue ñue fibíllafuemona úriticue. Daa Jesumo ínotimiemo nai íñoñede ai íadi, íemo afengo nai afémie diga íacana llezica, afémie afengo diga írede. Afémie afe ie aina dotánide. <sup>13</sup> Daje izói daa Jesumo ínotingo ie ini nai Jesumo íñoñede íadi afémie afengo diga íacana llezica afengo afémie diga írede. Afengo afe ie inina dotánide. <sup>14</sup> Mei jii, Jesumo íñoñede áiredimie Jesumo ínote aimo jaináillamona Juziñamui ñue finócamiena jaide. Daje izói Jesumo íñoñede iníredingo ie Jesumo ínotimiemo jaináillamona, Juziñamui ñue finócamiona jaide. Afe izói íñeniadi, omoi jitótiai íñoñedino úruiai izói itíaioi. Mei íadi afe izói jóoiñede. Afémaci Juziñamui ñue finócaiaioi. <sup>15</sup> Mei íadi Jesumo íñoñedimie izire ie aina oni oréacania, dama daiítadeza; orérede. Daje izói Jesumo íñoñedingo izire ie ini fáicanocaiacania, dama daiítadeza; fáicanocairede. Aféfuena júfidoñeno iri, mei Juziñamui “Nágarui uái omoi ífireiri,” caina

dáideza. Bie izói ífcaiaidi Jesumo ínote ama naa ínote miringo diga rairuínino afe ínoñediemo jaináitanide. <sup>16</sup> Mei íadi Jesumo ínote iníredingo cácarei. Nai ónoñegaza nibai odo o ini jílloite. Daje izói Jesumo ínotimie cácarei. Nai ónoñegaza nibai odo o ai jílloite.

<sup>17</sup> Iemona illa dígamie dama Juzíñamui íemo jóonia izói, afe izói nágaruillai írede. Iemo, fueñe Juzíñamuimo cai ínua llezica aféruimo cai táijina izói, afe izói nai birui táijiredicai. Bie izói nana Jesumo gairídínona ocuídícue. <sup>18</sup> Dáamie Juzíñamuimo ínua llezica ie bacano ícoi quetátañenia, dama daítadeza; quetátañeno iri. Daje izói jíáimie Jesumo ínua llezica jaiái quetácaza dama daítadeza; jíáfodo júfidoñeno iri. <sup>19</sup> Dáamie ie bacano ícoi quetaca nibai quétañega áfena náfueñeno iri. Mei jíáfodo Juzíñamui comeci jítainafue jeire cai olle iere ráifina. <sup>20</sup> Illa dígamie fueñe Juzíñamuimo ie ínua llezica aféruimo ie illa izói, afe izói nai birui írede. <sup>21</sup> Aféruimo jíáima jeruícamiéna o ia, áfemo járitañoeno iri. Mei íadi afe ímamona oni o jáillino o báia, áfena maiñori. <sup>22</sup> Mei jíi, dáamie como fueñe Juzíñamuimo ie ínua llezica, aféruído afémie jíáima ocuífíregamie. Ja ie ínua mei Juzíñamui dibéfomo afémie bu ráiruiñegamiéna jaide, cai Ocuíraima táijinafue ie finóllena. Mei daje izói jíáimie como fueñe Juzíñamuimo ie ínua llezica, aféruído afémie bu ráiruiñegamie. Ja ie ínua mei Cristo izire ocuífíregamiéna jaide. <sup>23</sup> Juzíñamui iere ráifidena íbácaomoiiza. Iemona jíáima riire ocuífíregamiéna omoi íñoeno iri. <sup>24</sup> Amatiai, omoi cácarei, ómoimona illa dígamie como fueñe Juzíñamuimo ie ínua llezica, nanómona ie táijina izói, Juzíñamui eróicana afemo táijífireiri.

<sup>25</sup> Mei birui nahí ánidino naa inínidingotiai diga afémaci ífue llóiticue. Afémaci cue lletalle uaina cai Ocuíraima cuemo lloñede, mei íadi cue fibíllamona cue onoiga uai llóiticue. Mei Juzíñamui cue cánuado cue lloga uaina ínoredeza. <sup>26</sup> Mei birui iere jacíredíruillaiza, cúemona bifue ñue cioide: daa come birui ie illa izói jíáfodo méidoñoeno írede. <sup>27</sup> Mei birui ja áiredio, afe mei ánidimie abina maméñoeno iri. Mei daje izói, birui nai ánidioza, mai ringona oñoeno iri. <sup>28</sup> Mei íadi o áirenia, afefue fiénidífueñedeza. Daje izói daa jitaingo inírenia, fiénidífueñedeza. Mei íadi biruillaído naga áiredimie naa iníredingotiai diga íaiói illafue ánidímaci baímo iere juárede. Afe bie júaredífuiaimona ómoína rairuíacadícue.

<sup>29</sup> Amatiai, ómoína cue daííacanafue bie izói jóide. Bíníemo Juzíñamuina cai íóbitallirui aréiñede. Ja benómona cai illífuena jíáfodo maméredicai. Birui áiredimie, ánidimie izói írede, raíre jíáimaci jacíredífuemona cánuallena. <sup>30</sup> Daje izói come tíllamo zúunaitino birui zúnaiñedíno izói írediomoi. Daje izói caímare iráizizaidíno ja birui caímátaiñedíno izói írediomoi. Daje izói nana ráaniai íbáritino ja birui íaiói íbaca raana “Cáieíñede” daííírediomoi. <sup>31</sup> Iemo bíníe ráaniai fecáfíredíno, daje izói afe ráaniairi caímátaidíno ja birui afe ráaniaimo figo járitainidíomoi. Mei bie cai ciona énie naa ie ráaniairi ja fúioicaideza.

<sup>32</sup> Omoi gágudífuiaimona oni ómoína óiacadícue. Dáamie nai áinina llezica, cai Ocuíraima ífuiaimo járitairede, cai Ocuíraima íóbitallena. <sup>33</sup> Mei jíáfodo áiredimie ie ai íóbitallena, bíníe ráaniairi járitaífirede. Iemona afémie mena ocuídímie anamo ite izóidemona, ie finóacagafuina finónide. <sup>34</sup> Ringóniaimo jíái daje izóidífue ite. Nai inínidingo cai Ocuíraima ífuiaimo járitaite. Afengo joreño naa ie abi diga Juzíñamui íena iere íacade. Mei íadi iníredingo ie ini íóbitallena bie énie ráaniairi járitaide.

<sup>35</sup> Ñue omoi íllena bífuiaí ómoímo llóiticue. Omoi áireiacanafuena rairuíacañedicue. Mei jíáfodo comíni eróicana ñue jaícina omoi illífuena jítáidícue. Iemo jíái cai Ocuíraima Jesús ocuífí fue jízíñoeno jeire omoi óllena, bífuiaí ómoímo llóiticue.

<sup>36</sup> Mei ómoimona daa come comécido daíía: “Cue jícanogango dibénedo ñue jaícina finóñedicue,” íemo afe llezica afengo are díno jítáingoiñeiteza, afémie comeci ñue faca izói,

izire ie áireiacana izói áirede. Ie jicánogango ie olle fiénidifueñedeza, afe íaillinoi áirena rairuínide. <sup>37</sup> Mei íadi jíámie jíáfodo comeci facáadi, mei afe ñuera. Ie jicánogangona ie aina ie óiacañenia daje izói afefue jíái ñuera; mei afémie ie jicánogango raire óñeillena ie comeci ñue daina izói, jica ia ñue mamédeza. Afe izóidifue íaifueñede. <sup>38</sup> Nana bíuailaimona bie izói onódicaí. Jicánogango otímie ñúefue finode, íemo jicánogangona onédimie afe baimo ñúefue finode.

<sup>39</sup> Iníredingo, ie ini nai caana llezica, ie inimo cuinaca izói jainaide. Mei íadi ja ie ini tilla mei, afengo bumo jaináñede. Jesumo ínnote afengo gáigamiemo iníreirede. <sup>40</sup> Mei íadi cue comeci faca izói, afengo meine nane iníreiñeden a baimo caimare iite. Bie uai ómoimo cue llua llezica, Juzíñamui Ñuera Joreño cuemo ite izoide daidicue.

## 8

### *Jánarai íena mameca rílleniaí ifue San Pablo llote*

<sup>1</sup> Ja birui omoi jicánoga jíáfue llóiticue. Jánarai íóbitallena fia fecaca rille ifue llóiticue. Fere uáfueza, bífuiaimo fibídicaíza. Mei íadi cai onóigafuemon a cai abi fieni ínnuana aillo comuítate. Mei jíáfodo jíáimana cai izíruillafue nana comínina náirecaítate.

<sup>2</sup> “Baitádimiedicue” daidímie Juzíñamui ie onótaacanaze nai onóñede. Nai abina onóñede.

<sup>3</sup> Mei dáamie Juzíñamui izírui a, afe íbana Juzíñamui ñue afémiemo éroite.

<sup>4</sup> Mei ja birui jánarai íóbitallena fia fecaca rille ifue llóiticue. Omoimona dáarie bie izói daidíaioi: “Afe rílleniaína ríri” daidíaioi. Jíámaci “Ríñeno iri” daidíaioi. Fueñe bífuiaimo omoi cácarei. Mei ñue onóigaza bie jánarai nahí ráañede, ráifiñede fia raaza. Daje izói ñue onóigaza jíáie Juzíñamui jaca iñede. Juzíñamui jaca daade. <sup>5</sup> Mei comini, monamo aillo ite juzíñamuillai daíadi, daje izói bíniemo jíái aillo juzíñamuillai ite íaioi daíadi, íeñede. <sup>6</sup> Mei íadi cáimona cai Moo Juzíñamui jaca daade. Afémie baimo jíái juzíñamui iñede. Uáfueza comini juzíñamuina mameca taino juzíñamuillai aillo ite. Daje izói íaioi mameca Juzíñamui jabóidillaini aillo ite. Mei íadi cai onoiga daade Moo Juzíñamui naga ráaniaí finódimie. Iemo bie cai afémie íena iticaí. Iemo jíái cai Ocuídímie daade; afémie Jesucristona. Afémiedo naga raa comuítaga. Cai jíái daje izói afémiedo comuítagacai.

<sup>7</sup> Mei íadi nana comini nai bífuiaína onóñediaioi. Dáamierie nai jánarina íóbitajana fibídiaioi. Afémacimona taino juzíñamuimo fecaca güillena, “Bie güille cai juzíñamuillai ie” comeci anado daidíaioi. Daí íaioi comécilla mei áfena rítíaioi. Iemona afe taino juzíñamuillai güilledo íaioi ífoci úrillana bácadiaioi, mei íaioi ínogafuena nai figo baitáñediaioíza. <sup>8</sup> Mei uáfueza, fia cai güigado Juzíñamui caimare caina uáidoñede. Cai güia, nibai cai güíñeniadi áfena Juzíñamui lloñede. Cai güiadi, afémie íena caina caimare fínoñeite. Daje izói güíñeíticaí íadi, caina fieni fínoñeite. <sup>9</sup> Iemona ja onódicaíza rairuíneno güiredicaí. Mei íadi áfemona abí omoi rairuíoicari, mei dáarie íaioi ínogafuena nai figo baitáñediaioíza. Jánaraimo fecaca rille o ríana íaioi fidíadi, afémacina fiénidifue mo baiítatio. Afemona abí omoi rairuiri. <sup>10</sup> Afe bie güille ráiruiñegaza onódio. Iemona jánaraimo dúide güirácomo güizájidio. Afe llezica ínogafuena nai figo baitáñedimie o güillana cióadi, afémie dáíte: “Cue jíái cue güizájiticue,” dáíte. Mei íadi afémie dibénemo, taino juzíñamuillaina jacíruillano afémacimo fecaca güille güite. Daí ie íllamona dama ie comeci úrilla bácade. <sup>11</sup> Iemona o ñue onóigafuedo, figo baitáñede o ama fiénidifue diné féiraitadio. Mei íadi Cristo jíái afémie jíilloillena tíide. Jira o afémie féiraitalle fiénide. <sup>12</sup> Afe jira, ínogafuena nai figo baitáñedimie fiénidifue mo afémie o ífóadi, áfede Cristo fieni finódio. <sup>13</sup> Ie jira rille cue ría ícoínia cue ama fiénidifue mo cue baiítaíza, ja benómona jaca ríllena ríñeíticue. Daí cue illa jamánomo ñuera, afémie fiénidifue mo cue báítañeillena.

## 9

*Jesucristo orécamie buna ráiruinega*

<sup>1</sup> Ñue onóigaza, nana jiáie Jesús jiáinomo orécamiai izói, rairuínidicue. Mei cai Ocuíraima Jesuna afémaci íena ciona izói, íena jiái ciódicue. Iemo jiái omoi dani Jesumo íinogano cai Ocuíraimamo cue táijinamona comuide. <sup>2</sup> Jiáimaci, “Bie Pablo Jesús óreñegamie” nibai cuena dáitiaoí. Mei íadi afe izói cuena daínidíomoi, ómoína cai Ocuíraimamo ja ínotadicueza. Iemona omoi dani Jesumo ínuamona, cuena bie uáfueña Jesús orécamie daítaite.

<sup>3</sup> Omoimona cue uáitatino uaina bie izói óitícue. <sup>4</sup> Juzíñamuimo gairídino cuemo fecaca güille naa jirolle diga áfena cue llínolle bu cúemona rairuínede. <sup>5</sup> Daje izói jítaidicueña jiáie Jesús orécamie fínua izói, Jesumo ínotingona cue aina óredicue, cue diga jáicaillena. Iemo afengo jítaille güille daje izói ómoimona llínoredicue. ¿Ero ua? Ua, cai Ocuíraima Jesús ámatiai naa Pedro diga, ringo ua izói, cue jiái afe izói ringona óredicue. Iemona afengo ómoimona ecárede. <sup>6</sup> ¿Mei omoi nie izói comeci facádíomoi? ¿Nibai coco dáillaínoí cue nabai Bernabé diga, nanómona coco ónoído tájinafuena fáicanocainidíococo, ñúefue coco llujáillena? Mei íeñedeza. <sup>7</sup> Mei daje izói ¿nie fuíríraima dama ie güille diga jáireña? Jáinide. Jaca afénomo ecácaza. ¿Nie come jíriconá ríadi áfemona afe llizállajina afémie riéñede? Jaca afe izóidímie íñede; jaca afémie aféjiaina riéfirede. ¿Mei nie ovéjaiai úíñotímie ie úíñoga oveja monoi omida afémie jiróñede? Jaca afémie áfeji jirófirede. <sup>8</sup> Fia come daína izói bífuiai cue llua daíí omoi comécíñeno iri, mei jaiai Moisés cai ocuilla uai daje izói dáideza. <sup>9</sup> Afe ocuilla uai cuiánicomo daide: Arroz izoide trigo, juráreto gájirillena záizia llezica, áfemona íaíoi güilleza fue maíñeno iri. Ñue onóigaza, bífuena Juzíñamui dama juráreto jíicana daííñedeza, <sup>10</sup> mei jiáífodo biedo Juzíñamui cai llote. Bie ocuilla uai cai ñue íllena cuega. Mei jii, jacafai tíeraima afénomona llizide raana otá güirede. Daje izói trigo gájirillena juráreto zaízítatímie áfemona otá güirede. Afemona afe íaillinoí güillena camare ocuírídíaillinoí. <sup>11</sup> Iemo ritímie rífirega izoide Juzíñamui uailai ómoimo fueñe llotícue. Ie mei birui ómoimo ite bíníe ráaniai abido cue maíñolle figora. ¿Mei nibai ómoimona bie áillue izói cíoide? <sup>12</sup> Mei jiáie llófueraini ómoimona íaíoi güillena ófirediaíoi, ie mei bie cai afémaci baímo fia ecáregacai.

Mei íadi bie daína izói cai güillena ocuínedícai. Mei jiáífodo ómoimo ñúefue lluaíbitícue. Nana cue jitaiga ráaniai dama cue íbaca. Omoimona minícana fia oñédícue, cue lloga Cristo daína uaina omoi ruífruíza daíí. <sup>13</sup> Mei jii, jiáífue ñue onódiomoi, nana Juzíñamuimo gairíracomo tájifiredino afeco ie güilledo írediaíoi. Bífue bie izói daííacade; nana Juzíñamui íóbitallena fecaca rille jobáiranomo tájifiredino, afénomo fecaca ríllemona come jítáillaze otá rírediaíoi. <sup>14</sup> Mei birui cai Ocuíraima daje izói ocuide. Nana jíllona uai llócaidino, íaíoi llófuega comínimona güillena otá güirediaíoi. <sup>15</sup> Mei íadi cue bie daína izói jaca fínóñedícue. Daje izói bie cue cuezábedo ómoimona minícana fia jicáñedícue. Güille ómoimona cue jicáñenamona júbieri tíidicueña, afe figo cuemo ráifíñede. Raiñóñoño bie ñúefue cue llujáiri íere íóbidícue. Afe bie cue íóbillafue cue tílla baímo jamánomo ráífide.

<sup>16</sup> Jíllona uai cue llócaillado abína ínonidícue, mei afe llócaillena jónegacueza. Bífue llócaíñedícueña jñii duere cue zefuilla! <sup>17</sup> Ie jira, dama cue comeci jitailla izói bífuena cue llócaíadi, Juzíñamuimona jirídoredícue. Mei íadi afe izóíñedeza. Juzíñamui cue níziano bie ñúefue cue llócaillena cue jónete. Afena cue jaca jámairuínidícue. <sup>18</sup> Iemona daíí cue llócailla jirídua jiáífodo jóide. Nie afe cue jirídogá daítana fia cue íóbillafue; mei raiñóñoño bie ñúefue cue llujáillari íere íóbidícueza. Nana cuemo dúide tájijnana íbatañedícue. Uai

llóramo izói cue tájinamona, cuemo dúide ráaniai ómoimona raiñoñoeno fia oñédicue. Aferi iere ióbidicue.

<sup>19</sup> Mei comínimona buna ráiruiñegacue, mei íadi nana comini ocuállimiena abí mamédicue, baimo aillo comínina Crístomo cue jaináitallena. <sup>20</sup> Judíuai cígimo cue illa llezica, judío ímiena abido jáidicue, afémaci Crístomo cue jaináitallena. Bie izói daína, Moisés ocuica uai anamo itinona Crístomo cue jaináitallena, afe Moisés lloga uai anamo abíjóoneticue. Mei íadi uáfueña afe ocuica uaimo dúiñedicue. <sup>21</sup> Iemo jáínomo, afe Moisés ocuica uai anamo iñédinona Crístomo cue jaináitallena, íaiói izóidimiena jáidicue. Mei íadi uáfueña Cristo uai anamo cue íllamona Juzíñamui uai anamo iticue. <sup>22</sup> Juzíñamuimo íinogafueña nai figo baitáñedino cígimo cue illa llezica, afémaci izói abí mamédicue, afémaci Crístomo íaiói íinogafue cue móonaitallena. Bie izói daína, nana comínimona illa dígamie íaiói illa izói íacadicue, mei nibai jáífodo íaióimona dáarie cue jíllotallena. <sup>23</sup> Nana bífuiaína finófredicue cai jíllona uai jica jalléllena. Daje izói bífuiaí finódicue, ñuera cai jíllotate uai caimo onótaga núefuiaína cue maiñoñleza.

<sup>24</sup> Ja onódiomoiiza, jáíimacimona aillo comini áizia, illa dígamie fia jirídoga raana oñede. Dáamie jirídote. Mai riire omoi aizi, jirírolle raa omoi jirírolleza. <sup>25</sup> Nana jífanuafuemo maméritino, jífanoiacana uícodo abina náinitade raana fímaidiaíoi. Afémaci iere abina fímaidiaíoi, riire zábifirede raa íaiói jirírolleña. (Mei aféruillaído íaiói jirídoga rábiaí finoina ífo icuifoí are iñeno riire etúdeza.) Mei íadi jáíimaciri fuírrienailla izói, riire nícidotícaí, jaca ninomo zábinide raa cai maiñoñleña. <sup>26</sup> Cue dibénemona uínidimie izói ebena aizíñedicue. Iere níciduano, come jana fatímie izói táinona fañédicue, mei íadi comini ñue íinotallena riire nícidotícaí. <sup>27</sup> Mei jáífodo abí fímailla izói cue abina duere finódicue. Daí abí cue rairuállamona dama cue abina ñue jíruitadicue. Bie izói finóicaídícaí, jáíimací cue llócailla mei, ruiíruillano Juzíñamui jino cue dótañeillena.

## 10

### *Jánaraimo caimátáífredino lleta uai*

<sup>1</sup> Cue ámatiaí, bífuena ómoína fidítaacadícaí. Nana cai jaiáidígima Juzíñamui jóonega mona uílliena eroide raa anado jáioicaídaíoi. Daje izói nana afémaci Jáirede Monáíllaina ruica jaitádaíoi. <sup>2</sup> Daí íaiói jáíllamona afe mona uílliedo, daje izói monáíllaido dájena Moiséoiri jaináitagaíoi. <sup>3</sup> Daje izói nana afémaci Juzíñamui monámona cocítaga güille güífrediaíoi. <sup>4</sup> Iemo nana afémaci afe Juzíñamui nofícimona totátaga jainoi jirófrediaíoi. Mei íaiói jáioicailla llezica afe íaiói nabáioicaide jamánomo riirede nofíci llócuca jiródiaíoiiza. Afe nofíci daína Cristo. <sup>5</sup> Mei íadi afémaci nabézie Juzíñamuina ióbitañede. Iemona zaféredizicimo tícoizitiaíoi.

<sup>6</sup> Nana bífuiaí cai onóillena daí íficaide, afémaci gaiga fiénidífuiaína cai gáíñeillena. <sup>7</sup> Afémacimona dámerie jánaraimo caimátáílla izói omoi caimátáíñoeno iri. Juzíñamui Cuegáuai íaiói finócafueña bie izói daide: “Afe comini fia ráinaillano güífrediaíoi, jirófrediaíoi. Afe mei náidacaillano rafue finoda záífrediaíoi.” (Daí íaiói jánaraimo caimátáítaíoi.) <sup>8</sup> Afémacimona dáarie jiruírena izói, mai cai íñeilli. Daí íaiói jiruírenamona afémacimona daje monado veintitrés mil dígamie titácaíoi. <sup>9</sup> Afémacimona dáarie Juzíñamui afémacimo riire járitañenafueña náfueñoeno, fiéni íena facátatíaíoi. Afemona díga comini Juzíñamui oreca jaio ainica íaiói tílla. Mei jira, afémaci Juzíñamui fiéni facátaja izói mai íena cai fácatáñeilli. <sup>10</sup> Daje izói Juzíñamuimo omoi ríiríñoeno iri. Mei afémacimona dáarie Juzíñamuimo ríiríillano úrioidino titade Juzíñamui abí ímie titácaíoi.

<sup>11</sup> Nana bífuiaí cai jaiáidígimamo íficaide, áfena cíoillano comini bífuiaimona ñue abí cai rairuállena. Afe mei, cai onóillena Juzíñamui afe bífuiaí ie Cuegánicomo cuetátate, afe

izoidifuiamona cai bigímaiai ñue abi cai rairuúllena. Mei ja birui írairuillaímo itícaíza. <sup>12</sup> Mei áfemona, “Ñue ínotícue” daídímie daítadífuemona ñue abí rairuiri, afémaci izói cai báííñellena. <sup>13</sup> Omoímo comuide facátaina duere zefuúllafuiai, daje izói nana jíáímacímo comuide, daní ómoíñedeza. Mei íadi Juzíñamui jaca ínofíregamie. Mei onódicaíza, Juzíñamui caimo ite máirie baimo, rírede facátafuedo caina fácatañeite. Mei jíáfodo facátafue comuilla llezica Juzíñamui áfemona omoí jílluille iona ómoína onótaite. Afemona afe facátafuena ja ñue ocuiredíomoi.

<sup>14</sup> Ie jira, cue izíruiga ámatiai, jánaraimo caimátaillamona oni omoí jírecairi. <sup>15</sup> Ráfueña baitádinomo úrilla izói ómoímo úriticue, íemo ómoína cue daííllífue mo daní ñue comeci omoí facari. <sup>16</sup> ¡Cácarei! Cai Ocuíraíma tíllamo cai úibicaillena, ñue finoca comunión illácurimona cai jíróadi, Cristo díena dájena caimare mamécacai. Daje izói afe illa dígamíemo fecaca comuníomo jainaide pan, cai güíadi, Cristo abína dájena caimare mamécacai. <sup>17</sup> Aíllomaci cai íadi, daje pan cai güíllamona daade come abína itícaí.

<sup>18</sup> Mai Israel nairai finoca ráfuiamó comeci omoí facari. Juzíñamuímo fecaca rílleníai ritino, afe fecaca rílle mo dájena mamécaíai. <sup>19</sup> Bie cue dáinamona jánarai ua raaza dáííacañedícue. Daje izói, afe jánaraimo caimátaillena fecaca rille, jíáíe rille baimo ráífideza dáííacañedícue. <sup>20</sup> Cue dáina bie izoide: Juzíñamuína onóñedino fia iga raa afe jánaraimo íai. <sup>21</sup> Fieñide jóríai anamo dájena caimare omoí itábicaíri, daííñedícue. (Daítademona ómoína rairuúacadicue.) <sup>22</sup> ¿Meita cai Ocuíraímana rícaítaacadíomoi? Jaca daí íacañedícaí. ¿Meita cai Ocuíraíma baimo ríredíomoi, afémie duere omoí fínoñellena? Jaca daí ríinidícaí.

*Crístomona comuide conímana cai izíruíllafue cai rairuúíllafue baimo ñuera*

<sup>23</sup> Uáfueña dáina. Dámie ie comeci jítaina izói fínuana rairuúínde. Mei íadi afe izói illa cómena canóñede. Mei uafue, dámie ie comeci jítaina izói írede, mei íadi afe ie comécina mánaítallena ñue canóñede. <sup>24</sup> Daní omoí ñue illífue jenóñeno, jíáímací ñue illífue jenóredíomoi.

<sup>25</sup> Fecáriracomo nana fecaca güílleníai jíáfodo o ífoci úrillado jícanoñeno uái daí omoí güíri. <sup>26</sup> Mei nana bíníe Juzíñamuímo dúideza naa afemo ite rílleníairi.

<sup>27</sup> Mei jíáíruido Juzíñamuímo ínoñedímie ona: “Güízai” daííadi, jaíllano jíáfodo ífoci úrillado jícanoñeno nana o íe écajana uái daí güíri. <sup>28</sup> Mei íadi dáamie: “Bie lícíai jae jánaraimo fecácaza,” ona daííadi, áfena ríñeno íri; daí daídímie comeci fieni o fínoíza. Daje izói afémie ífoci úrilla o úaitañelleza. <sup>29</sup> O ífoci úrillana lloñedícueza, afémie ífoci úrilla o zánoñeíllena, daí daídícue.

Mei níbai dáamie jícanoíte: “¿Níbaí mei jíáíe come ífoci úrillado rairuúícaí? <sup>30</sup> Nana cue güígari Juzíñamuína: Fígura cue daíí, níbaí mei jíáíma cue güíllari fieni úrite,” daí afémie dáíte. <sup>31</sup> Iemona bizóidífue ñuera: Omoí güílla llezica, omoí júrua llezica, nana omoí jetáacaígaíue jeta llezica, mai nana afe omoí fínóacaígaíuína Juzíñamui íóbillena finori. Afe daí aillo ñúefue íemo nítaítíomoi. <sup>32</sup> Nínó jíáímana oni níbéfodo fíenidífue mo o illáfuedo baítañeno íri. Ua, júdíuáina baítañeno íri, daje izói júdíóñedínona baítañeno íri. Iemo Juzíñamuímo ínotínona baítañeno íri. <sup>33</sup> Cue díbenemona, nana comínina nana cue fínócaíuíaido íóbítaacadícaí. Dama cue ñue illífue jenóñedícue, mei jíáfodo nana jíáímací ñue illífue jenódícaí, ñue íai. jílluíllena.

## 11

<sup>1</sup> Cristo cíótaga ñúefuedo cue jaílla izói, ómoímo cue cíótaga ñue illáfuedo omoí jairi.

*Juziñamuimo cai caimátaifirena llezica, ringóniaí jaca jiáimacina lletánidiaioí*

<sup>2</sup> Cue ámatiaí, ómoimo ñúefue nítaiticue mei cuemo uibíoifirediomoíza. Daje izói omoi cue llófuiana jeire uano áfedo jáifirediomoí. <sup>3</sup> Mei íadi ja birui jiáifuena omoi onótaacadicue. Bifue bie izoide. Cristo nana íñiaí ifoci izói Ocuídime. Iemo nana ringo ie ini ocuica; afémie afengo ifódimie. Afe izói Juziñamui Cristo ifode. <sup>4</sup> Iemona dáamie Juziñamuimo úrilla llezica, ie ifoci ibaia, afe ie ifócina meaire finode, mei ifoci ibailla jiáie come ocuilla anamo íllana llóteza. Daje izói Juziñamuimona onoiga uai afémie llua llezica, ifoci ibailla ie ifócina meaire finode. <sup>5</sup> Mei jiáfodo, daa ringo Juziñamuimo úrilla llezica, iemo Juziñamuimona onoiga uai llua llezica, afengo ie ifoci íbáiñenia, afe afengo ifócina meaire finode. Afe íbáiñena afengo ífo itirai nana cuidoca izoide. <sup>6</sup> Daa ringo ifoci íbaiaañeniadi mei dáaruido nácina cuidórede. Mei nácina cúidocana, ifoci íbáiñena daje izói meáirede. Mei íadi ringo ie ifoci naado cúiduana meáiruiadi, afengo ifoci íbáirede. <sup>7</sup> Íñiaí íaioí ifócina íbáinidiaioí, mei iima Juziñamui jánana eróideza. Daje izói iima Juziñamui ñue ocuilla ríinona jino cíotatimieza. Mei íadi ringo iima ñue ocuilla ríinona jino cíotaite. Uáfueza, Juziñamui íñiaí anamo íñena izói, afe izói íñiaí ringóniaí anamo íñede. <sup>8</sup> Mei iima Juziñamui íñua llezica, ringómona finóñedeza. Mei jiáfodo ringo ímamona finócaza. <sup>9</sup> Iima jitailla jira ringo finoca; mei íadi ringo jitailla jira iima finóñega. <sup>10</sup> Afe jira ringóniaí ifócina íbáirede, afengo ie ini ñue ocuícana anamo illa daíllena. Daí írediaioí mei Juziñamui abí imaci eróicana ítíaioíza. <sup>11</sup> Mei íadi Crístomo cai jáinaina dno iima ringónino ínide. Daje izói ringo ímanino ínide. <sup>12</sup> Mei uáfueza ringo ímamona finoca, daje izói uáfueza naga íñiaí ringo jéiciga. Iemo nana Juziñamui comuítagacai.

<sup>13</sup> Bíemona ¿nie izói coméciidiomoí? conímamo omoi daini. Ringo ifoci íbáiñeno Juziñamuimo úriadi, meita figora, nibai figóñede. Mai daini. <sup>14</sup> Nanómona omoi izóidino griego imaci onóigaza: Iima ífótirena baiñede; meaire cíoideza. <sup>15</sup> Daje izói afe abina cai onónafue jiáifuena dáanomo cai llote. Ringo ífótirena ñue baite, mei áfedo aféngomo ñúefue nítaitiaioí. Jaca afe ringo ifoci íbáillena, ie ífóti áretiina comuítaga. <sup>16</sup> Mei dáamie bizóidifue júfidoacaniadi, bie cue llógamo mai cacai, mei Cristo orécamaci cue díga jiáifoidifueña náfueñedicaí. Daje izói Juziñamuimo ínotino bifue baimo jiáifo maméñediaioí.

*Cai Ocuíraimamo cai uibíñoga güilla rafue jiáimaci bácala*

<sup>17</sup> Bie izói cue dáinado ómoimo ñúefuena nítaiñeiticue, mei omoi gairíllafuiaimo ñue íñeno, conímama fiñi finódiomoíza. <sup>18</sup> Fueñe bifue llóiticue. Dámierie omoi illáfueña cue fíditatiaioí. Juziñamui cáimacaillena omoi gairilla llezica, jiáimana énenoruidiomoí, daídíaioí. Afémaci cuemo llógana jabo ínoticue. <sup>19</sup> Afe eneno bozíetaillafue comuífiredeza, nibézie Crístomo nahí ínotinona, nibézie ínoñedinona jino uáfodo daíllena. <sup>20</sup> Conímama omoi énenoruillamona, bie izói zúide. Gairíllano omoi güillafue omoi bácacaza, ja birui áfena cai Ocuíraima íeñede. <sup>21</sup> Mei güizájillamo dúcina llezica, illa dígamie dama ie atica güille güizájillena járitaifirede. Iemo dáarie jufíruilla llezica, jiáimaci jífáizaíbitiaioí. <sup>22</sup> ¿Meita birui omoi jofónidiomoí, afénomo güitá omoi jiróllena? Bie izói omoi íllado Juziñamuimo nahí ínotinona jámairuitiomoí. Afe dáaruido güíllenidinona meáiruitadiomoí. ¿Mei nie izói ómoína dáiticue? ¿Mei ómoimo ñúefuena nitáredicue? ¡Aferi ómoimo ñúefuena nitánidicue!

*Cai Ocuíraima úraicaiño güíllamo cai úbicaillafue  
(Mt 26.26-29; Mr 14.22-25; Lc 22.14-20)*

<sup>23</sup> Uáfueza, cai Ocuíraimamo cai uibíñoga güillafue fiñi omoi fínuamona, ómoimo ñúefue nitánidicue. Mei nauí ómoína cue daina izói, bie omoi cue llófuiafueña dama cai Ocuíraima llotátacueza. Afefue be ñie: Cai Ocuíraima Jesús afe ie Judas fécaja naio, pan llínote. <sup>24</sup> Llínuano Juziñamuina: “Íere figora” daide. Daina méifodo fécano daide: “Mai omoi

güi. Bie cue abi; omoi ñue íllena ditaca izói ómoimo cue fecácaza. Bífuedo cuemo omoi uíbicaifireiri,” daide. <sup>25</sup> Daje izói íaioi güilla méifomo, jiróracuri llínnota daide: “Afe bie jiróracuri eromo ite iji, ómoimo cue comúitalle cómofuena ómoína onótate. Afe bie Juzíñamuimo dájena omoi jaináitalle cómofuena cue die uáfueña íficaitate. Diga ícaíño bie íjimona omoi jiróadi áfejido cuemo omoi uíbicaifireiri,” daide. <sup>26</sup> Nana bífuiaí jira, Jesucristo nai meine ana biñena llezica, nágaruillaí bie pan omoi güíadi, íemo bie jiróracuri ero iji omoi jiróadi, áfedo Jesús cai ícoínia tíllana jino uáfodo llóitiomoi.

*Afe bie cai Ocuíraimamo cai uíbicaillafue jaca ñue comécillamona finórede*

<sup>27</sup> Mei jira, nie come bie paana Juzíñamuimo ñúefuena nitáñeno güíadi, daje izói afe jirócaí afémie fiéni jiróadi, afémie cai Ocuíraima abi naa ie die diga fiéni finode. <sup>28</sup> Ie jira, illa dígamie nai afe pan güiñena llezica ie ifoci úrillana ñue onórede; daje izói áfeji ie jiróacana llezica áfena onórede. <sup>29</sup> Mei onóigaza afe pan Cristo abina caina onótate. Dámie aféfuena ñue náfueño ebena güíadi, afe daí ie güíllamona dama Juzíñamui íena duere fínoite. Daje izói dama Juzíñamui ie duere finóllíji jírua izoide. <sup>30</sup> Daí omoi íllamona ómoimona aillo irárediaíoi. Jáíe comíni náinidiaíoi. Iemo daje izói dáarie tíidiaíoi. <sup>31</sup> Mei jáífodo daní cai ifoci úrillana ñue cai náfueña Juzíñamui caimo riire jícanoñeite. <sup>32</sup> Mei íadi cai Ocuíraima riire caimo jícanoíadi, afe jícanuado afémie izire caina lletade bíniemo ite Juzíñamuimo ínoñedíno diga cai duere finobiñeillena.

<sup>33</sup> Mei cue ámatiaí, bie izóideza: Comunió gütállena omoi gairíadi, dámie riire güiñeno dájena omoi gütálleza conima omoi úíñori. <sup>34</sup> Dámie ie jufíruiadi dama ie jofomo güizájirede, fiéni omoi gairíllado Juzíñamui duere omoi fínoiza daí. Ico omoi cue eróizaille llezica, omoi jícaíca jáífuaí jaícina jóoneíticue.

## 12

*Juzíñamui Ñuera Joreño illa dígamie Juzíñamuimo cai táijinana fibíllena caimo fecade*

<sup>1</sup> Amatiaí, Juzíñamui Ñuera Joreño illa dígamie fecaca Juzíñamuimo táijinana fibíllena ómoína fidítaacadícue.

<sup>2</sup> Ñue onódiomoi, nai Juzíñamuina omoi onóñena llezica, úrinide jánarai anamo íllena cuinada zonóicaigaomoi. <sup>3</sup> Iemona: “Bífueña omoi onoiri,” daidícue. Jesuna faidódímie jaca Juzíñamui Ñuera Joreño úrinide. Daje izói Juzíñamui Ñuera Joreño úriñedímie jaca uáfueña, “Cue Ocuíraima Jesús” daínide.

<sup>4</sup> Illa dígamie afe fecaca jáíforie Juzíñamuimo táijinana fibíllena ite. Mei íadi aféfuiaí daade Juzíñamui Ñuera Joreño fecácaza. <sup>5</sup> Illa dígamie jáíforie conímána canóredícaí, Juzíñamui ocuícamacína cai íllena. Mei íadi daade cai Ocuíraima anamo itícaí, ie cai íóbitallena. <sup>6</sup> Illa dígamie cai illafue ñue jáícina jóoillena, Juzíñamui diga jáíforie caina ocuíoide. Mei íadi daade Juzíñamui nana comínina ocuíoide. <sup>7</sup> Juzíñamui Ñuera Joreño caido jáicanana cai ónoillena facáfíreña raana illa dígamie Juzíñamui fecade, nana jáímaci cai canóllena. <sup>8</sup> Ie jira Juzíñamui Ñuera Joreño dámie iere baitádimiána jáillena íena fibítate, jáímaci llófuellena. Iemo jáímieña daje Ñuera Joreño nimáiraíma úrifíreña izói úrillena íena fibítate. <sup>9</sup> Iemo jáímaci afe daade Ñuera Joreño jamánomo Juzíñamuimo ínotagaiaíoi, áfedo jáíe Juzíñamuimo ínotíno ñue canóllena. Ie mei jáímaci iráredíno jíllotaraímana fibítagaiaíoi. <sup>10</sup> Iemo dáarie uaido dáinamona comuide raa fínuana fibítagaiaíoi. Iemo jáínona Juzíñamui daína uai uáfodo jino llóllena fibítagaiaíoi. Iemo jáímaci nae ua Ñuera Joreño úrillana daje izói nae táino jóriaído úrillana onóillena Juzíñamui fibítate. Iemo jáímaci nai llófueñega jáíforiede uáillaído úrillana onóillena fibítagaiaíoi. Iemo nai jáímaci afe daína uallaí ñue jino dobáíñuana onóillena fibítagaiaíoi.



11 Mei íadi nana bífuiai daade Juzíñamui Ñuera Joreño fecaca. Ua dama ie óiacana izóí, illa dígamíemo jíáíforiede fibíllafuiaiina fecade.

*Nana cai bie dáamie abímo dúidicai*

12 Bífuiai nana bie izóí jóide, mei Cristo íemo ínotino díga, daade abí izóideza. Afe daade abímo jaináidinuiaina aillo ite. Mei aillo ite íadi, nai afe abí daade. 13 Afe izóí aillo jíáífoidinona cai íllamona, níbai judíodicai, níbai griégodicai afe jaca mámeñega. Mei daade Ñuera Joreñodo nana cai daade abina jaináitagacaiza. Daje izóí níbai rairuícanodicai, níbai ráiruíñeganodicai daje abina iticai. Ua daade Juzíñamui Ñuera Joreño daade abina finócacai. Afe daade Juzíñamui Ñuera Joreño úicaitagacai.

14 Cai abí daje izóíñede, mei díga ráaniai daade abímo jaináinaza. 15 Mei jíi, come eiba: “Cue bie ónoñedicueza daje abí íñedicue,” daííadi, daíí dáinado daje abímo ie jaináinana uáitanide. 16 Daje izóí come jefo: “Cue bie uíjñedicueza daje abí íñedicue” daííadi, daíí dáinado daje abímo ie jaináinana uáitanide. 17 Mei cai abí nabáinino daa uíj íadi ¿nie izóí cácaiticai? Daje izóí cai abí nabáinino daa jefo íadi ¿nie izóí jálliana cácaiticai? 18 Mei íadi nana cai abímo jaináidinuiaina, afe abímo ñue baitínuiaimo, Juzíñamui ie comeci jítaina izóí jóonete. 19 Nana cai abí dáadeniadi afe nabáíñiaí illino íñede. Ua abí íñede. 20 Mei íadi ja onódiomoi, dáamíemo jaináidinuiaina aillo ite, íadi jaca ie abí daade.

21 Daje izóí nane jíáífue, cai ui ónoina: “Ona jítaíñedicue” daíínide. Daje izóí ífoci eíbana: “Ona jítaíñedicue” daíínide. 22 Mei jíáífodo cai abímo ite mairíñedino iere jamánomo jítaírede. 23 Daje izóí cai abímo ite figo comécíñegano áfena iere ñue uíñoticai. Iemo cai abímo jino uáfodo cíotanidinona, áfena iníroido ebire finode. 24 Mei íadi cai abímona uáfori cíoidino cíotanidino izóí ebire finónidiaioí. Bie izóí Juzíñamui cai abímo itínuiaina dájemo jofo ñue zorode, cai figo comécíñegano ñúefuena jamánomo cai nitállena. 25 Juzíñamui daíí zorode, cai abímo itínuiái conímana énenoruíñeilla. Mei íadi jíáífodo illa dígano conímamo comeci úrede. 26 Come abímo itínuiaimona daano izi cácana llezica, nana jíáínuiái daje izóí duere zéfuitiaioí. Daje izóí dáanomo ñúefue nítano caimare íadi, nana jíáínuiái dájena caimare itíaioí.

27 Mei jira bie izóí nana omoi Cristo abídiomoi. Omoimona illa dígamíai daa ie abímo itínuiái izóidiomoi. 28 Afe jira Juzíñamui jíáífodo táijinana dáarie íemo ínotinomo jóonete. Nano fueñe Cristo orécamaci jóonete. (Afémaci jíáífo mameina ie apóstoles.) Afe mei jíáínona Juzíñamuiomona ogáfuiái uáfodo jino llotino jóonete. Afe mei nane jíáínona ie uai llófueraini jóonete. Iemo uaido dáinamona raana comúitatino jóonete. Iemo iráredino jíllotaitino jóonete. Iemo jíáímacina canófiredino jóonete. Iemo jíáímacina ocuífireitino jóonete. Iemo nai llófueñega jíáízie uáillaído úritino jóonete. 29 ¿Meita cai nana Cristo orécanodicai? Ieñedicai. ¿Meita nana cai bie Juzíñamuiomona ogáfuiái uáfodo jino llotínodicai? Ieñede. ¿Meita nana cai ie uaina llófuetínodicai? Ieñede. ¿Meita nana cai bie uaido raana finódinodicai? Ieñede. 30 ¿Meita cai bie iráredinona jíllotaredicai? Jíllotanidicai. ¿Meita cai bie nana nai llófueñega jíáízie uáillaído úritinodicai? Ieñedicai. ¿Meita cai bie nana aféuai dobáíñuano jino uáfodo llóredicai? Jaca nana llónidicai. Dámíerie dobáíñorediaioí. 31 Mei ie jira, nana bie fibíllafuiaiimona baímo ñuera fibíllafuiaiina Juzíñamuiomona omoi óllena afe omoi nícidori. Mei íadi afe fibíllafuiai baímo, jíáíe ñúefuena ómoímo llófueitícue.

## 13

*Jíáimana cai ízíruillafue*

1 Mei uáfueza, nai llófueñega jíáízie uáillaído úrillana cue fibíadi, íemo afe baímo Juzíñamui abí imaci úrilla izóí úrillana daje izóí fibídícue ia, mei íadi jíáimana cue ízíruíñeniadi,

fia taino ficírede juaí izóidicue. Iemo jiáie taia ficírede lloéturu izóidicue. <sup>2</sup> Daje izói Juzíñamuimona ogáfuiái jino llúana cue fibíadi, íemo nana nai uáfodo onóñegafuiái llúana cue fibíadi, íemo jamánomo nimáiraimana cue jáiadi, íemo idu jáinua Juzíñamuimo ínogafue cuemo íadi, mei íadi jiáimana cue íziruiñenia, táinomo fáifitícue. <sup>3</sup> Daje izói, nana cuemo ite ráaniai jiáimaci canóllena fia cue fecáadi, íemo Juzíñamui ióbitallena dama cue abi cue jobáitaiadi, mei íadi afe llezica jiáimana cue íziruiñenia, nana cue finócafuiái cuemo ráifiñede.

<sup>4</sup> Mei jiáifodo, jiáimana izíruitimie jaca járitaiñede. Afémie dúecaifirede. Daje izói úradoifinide, íemo afémie uícofiñede, íemo fiени abí íinoñede. <sup>5</sup> Daje afe jiáimana izíruifiredimie meáiredifuena jaca lloñede, íemo afémie ie abina jacire maméñede, íemo afémie jaca riicaifinide. Jiáima fiénidifue íemo finóadi, fiени coméciñeno raire féitate. <sup>6</sup> Afe jiáimana izíruitimie jiáimaci fiénidifuiái fínuari zúureite, mei jiáifodo ua ñúefueri ióbifirede. <sup>7</sup> Nana íemo comuídifuiáiri caimare ocuide. Raire járitaiñeno aféfuiaimo ñue úiñoode. Juzíñamuimo izire ínuaño aféfuiairi jacinaíñeno ñue ocuírde.

<sup>8</sup> Izíruillafue zíiñoa jaca záiñeite. Mei íadi Juzíñamuimona uícodo onoi ga ráfuiaí záite. Daje izói jiáimaci uáillaído úrilla llícaite; íemo daje izói ífócido onóigafuiái záite. <sup>9</sup> Mei biruillaído cai ífócido onóigafuiái ñue ícoimo baitañedicaiza, jabo onódicaí. Daje izói Juzíñamui uícodo onoi ga ráfuiaímona due jino lloticaí, mei due onódicaiza. <sup>10</sup> Mei íadi uire Juzíñamui nana ráfuiaí caimo baitálliruimo afe ícoimo ñue báitañegafuiái fáicanocaille.

<sup>11</sup> Nai cue úruena llezica úruiaimo itífuiaído úritícue. Urue comeci fácaja izói, comeci facádicue, íemo úrue ífoci úrilla izói itícue. Mei íadi ja cue móonailla llezica, úrue illa izói cue illáfuiaína fáicanocaidicue. <sup>12</sup> Daje izói birui Juzíñamui dibénemo cai onóigafuiái jaicuíbicaide. Dámie jáiara acáranimo figo cíoiñena izói afe izói Juzíñamui ífuiaína birui figo baitañedicaí. Mei íadi íco jiáiruido nana ñue báitaiticaí. Birui cue ífoci úrilla figo déiñedeza, jabo onódicue, mei íadi aféruido nana ñue ónoitícue. Ji, Juzíñamui cuena onona izoi ñue jaícina ónoitícue. <sup>13</sup> Mei daí Juzíñamuimo ínogafue, íemo jiái ocuírinafue, íemo jiái izíruillafue jaca zíiñoa féiñeite. Bie daámanidemona izíruillafue iere jamánomoide.

## 14

<sup>1</sup> Mei ie jira, afe izíruillafue iere jeire omoi oiri. Afe ua llezica Juzíñamui Ñuera Joreño fecaca jiáiforie tájinana fibíllena izire omoi jenori. Omoi jenolle llezica, Juzíñamuimona onoi ga uai jino llua baímo izire jicari. <sup>2</sup> Mei íadi dámie nai llófueñega jiáizie uaido úriadi, dama Juzíñamuimo úrite. Comínimo úriñede; mei afémie úrillana buna canóñenaza. Afe ónoñega uaido úritimie Ñuera Joreñodo úrite, mei íadi afémie daína uai uáfodo onóñena báinino jóoide. <sup>3</sup> Mei jiáifodo afe Juzíñamuimona onoi ga uai llotímie, comínimo úrite íaioi joreño dibéfuemo íaioi ñue móonaitallena; daje izói ñue íaioi náireillena, íemo jiái íaioi caimare fíralleña. <sup>4</sup> Afe jiáizie uaido úritimie dama ie joreño dibéfuemo móonaite; mei íadi afe Juzíñamuimona onoi ga uai llotímie, Juzíñamuimo jaináidinona ñue móonaitaite.

<sup>5</sup> Afe nai llófueñega jiáizie uaido úrillana nana ómoiena jitáidicue. Mei íadi Juzíñamuimona onoi ga uai jino omoi llóllena iere baímo jitáidicue, mei afe onoi ga uai jino llua, jiáizie uaido úrilla baímo ráifide, Jesucrístomo ínnotino aillo móonaitallena. Mei íadi afe jiáifoide uaido úritimie úrilla dobáíñoraima íadi, afefue ñuera; mei áfedo nana Juzíñamuimo jaináidino daní íaioi joreño dibéfuemo daje izói ñue móonaitaíoi za. <sup>6</sup> Ie jira ámatiaí cácarei. Uire omoi cue uáiduaibia omoi cígiri Ñuera Joreño úritate jiáizie uaido cue úriadi, cue úrilla ómoimo due jiza ráifiñede. Mei jiáifodo Juzíñamui caimo onótagafuiaído cue úriadi afefue ómoimo ráifide. Daje izói omoi ífoci ua uaina cue déitaiadi afefue ráifide. Iemo daje izói Juzíñamuimona onoi ga uai ómoimo jino cue lloia afefue jiái ráifide. Daje izói omoi cue llófuia ráifide.

<sup>7</sup> Mai nana omoi rúado taiga raamo ñue coméciiri, áfemona ñue onóillena. Afe raa jaca comécinideza. Be totibacui, íemo arpa, íemo juai diga caimare ficire úrite, mei íadi jiáima fienu taia, áfena cacádino afe úrilla uaina ónoñeitiaioi. <sup>8</sup> Daje izói comini jobáiriacana llezica, uáidua juai táiniendi comini figo áfemo mámeriñeitiaioi. <sup>9</sup> Afe izói ómoimo íficaide: dáamie jiáifoide ónonide uaido omoi llófueia ie dáinana bu onóñena. Afémie táinomo úrite. <sup>10</sup> Uáfodo onóigaza; bie éniemo diga jiáie nairai uailai ite. Afe uáillaina onódinomo nana aféuailai ñue baite. <sup>11</sup> Mei íadi cuemo úritimie uaina cue ónoñenia, afémie mona jicánemiedicue. Daje izói afémie cúemona jicánemie. <sup>12</sup> Ie jira, afe Ñuera Joréñomona fecaca táijnana fibíllena omoi iere gáina llezica, mai Juziñamuimo jaináidinona ñue móonaitallifuiaina iere izire omoi jicari.

<sup>13</sup> Afe jira nai llófueñega jiáizie uaido úritimie afe ie dáina uaina ñue jino llúana fibíllena Juziñamuimo jicárede. <sup>14</sup> Mei jiáizie uaido Juziñamuimo cue úriadi, ua cue joréñodo úriticue, mei íadi cue ifoci úrilla, táijiñeno oni eneno ite izoide. <sup>15</sup> Mei íemona ¿ñifue fínoiticue? Cue joréñodo naa cue ifoci úrillado Juziñamuimo úriredicue. Daje izói cue joréñodo naa cue ifoci úrillado afémie roredicue. <sup>16</sup> Mei jii, dama o joréñodo Juziñamuimo o úriadi o áinori ite, áfemo fibitañega cacáreidimie, Juziñamuina figura o daífirenafue dibénemo ínide. Mei o dáinana onóñedeza. <sup>17</sup> Mei nibai Juziñamuina figura o daífirena Juziñamuimo ñue cacaide, íadi jiáimana dama ie joreño dibénedo ñue móonaitañede. <sup>18</sup> Nana omoi baimo jiáizie uaido úriredicue. Aferi iere Juziñamuina figura daidicue. <sup>19</sup> Mei íadi Juziñamuimo jaináidino gairífirena llezica, ónoñega jiáfodo jóide uailai baimo, jubeba diga ñue onoiga uai cue dáinana gáidicue, jiámaci cue llófuellena. Mei íadi diez mil féirede jiáizie uai afémaci cígimo cue úrillana gáñedicue.

<sup>20</sup> Amatiai, úruiai comeci faca izói, afe izói comeci omoi facáñeno iri. Mei jiáfodo éicomini izói comeci omoi facari. Mei íadi fiénidifue dibénemo jézainidino izói omoi iri. <sup>21</sup> Jaii cai ocuilla uai ciegánicomo Juziñamui íemo cacácañede Israel náiraina bie izói daide:

—Bie náiraina jiáie uáillaído úritinodo duere fínoiticue; onínemacido íaioi llétaiticue.

Mei íadi afe bie uaido nai cuena náfueñeitiaioi.

Daí cai Ocuiraima daide, —aquíe izói ie uai llote.

<sup>22</sup> Mei daí afe jiáizie uaido úrillana fibíllafue Juziñamuimo ínoñedinomo dúide, jiáie onótate raa izói íaioina onótallena. Ínotinomo dúñede. Mei íadi Juziñamuimona onoiga uai jino llúana fibíllena Juziñamuimo ínotinomo dúide, jiáie onótate raa izói íaioina onótallena.

<sup>23</sup> Mei jira nana Juziñamuimo jaináidino dánomo gairilla llezica, íemo nana omoi jiáizie uaido omoi úriadi ie mei áfemo fibitañega ínoñedinomo omoi cígimo bíadi, nibai “Uáiritaidino izóidiomoi,” dáitiaioi. <sup>24</sup> Mei jiáfodo Juziñamuimona onoiga uai jino omoi llua llezica, íemo fibitañega ínoñedimie omoi cígimo bíadi, ie comécimo ite fiénidifuea uáfodo ónoite. Nana omoi dáinana cacáillano afémie dama ie comécina méiñotaite. <sup>25</sup> Afe daí dama ie comeci onóigafuii jino ciocaillamona, cañícido ana dújullano Juziñamuina cáimadoite. Iemona: “Uáfuea, Juziñamui omoi cígiri íteza” dáite.

### *Omoi gairilla llezica nana omo llólfuii jaicuíñeno jáicina lloiri*

<sup>26</sup> Mei jira, amatiai, omoi gairíllifuii bie izói írede: Omoi gairilla llezica ómoimona dáarie Juziñamuimo rollírua jino llóiacade. Iemo jiámie llófueacade, íemo jiámie Juziñamui íena onótágafue jino llóiacade, íemo jiámie jiáifoide uaido úriacade, íemo jiámie afe jiáizie uaido úrilla jino dobáiñoiacade. Nana bífuii ñuera. Mai bífuii daí íteza, Juziñamuimo jaináidino ñue móonaillena, daje izói íemo nai ínoñedinomo ínotallena. <sup>27</sup> Jiáizie uaido omoi úriadi mena come dáaruido úrinide. Jiámie úrilla llícailla méifomo úriri. Daámani come daí úrerede. Naga come jiáifoide uaido úrilla fuíllamo ie lloga uai dobáiñoirede. <sup>28</sup> Mei íadi uai dobáiñoitimie íñeniadi, mai nie izói jiáifoide uaido daíñeno iri. Dámie úriacania dama

ie comécido Juzíñamuimo úriri. <sup>29</sup> Daje izói afe Juzíñamuimona onoiga uai llotínomona damieámani úrrede, íadi daje llezica úrinidiaioi. Llotímie fuilla méifomo íemo cacáreidino fairíorediaioi, ie dáinana ja Ñuera Joréñomona comuide, nibai íeñede daiíllena. <sup>30</sup> Mei íadi dámie uai jino llua llezica, Juzíñamui jíáie ana ráiidimie mo jíáifue íena onótaiadi afémie raire fueñe úritarede. Nano fueñe úritimie ie úrillana fáicanocairede. <sup>31</sup> Afe daií nana omoi Juzíñamuimona onoiga uai llotino llórediaioi. Uafue dámierie jino llórediaioi, áfedo nana omoi onóicaillena; daje izói áfedo nana omoi comeci náirecaillena. <sup>32</sup> Nana afe Juzíñamuimona onoiga uai llotino dani íaioi joréñona rairuirediaioi, nai jíáimie úrilla fuiñena dino. <sup>33</sup> Mei Juzíñamui caimare uái illifue comuítatimie; íemo, úrillana féitate gáguana afémie comuítañede.

Nana jíáinomo ite Juzíñamuimo jainaide gairídino fínua izói birui ómoína finótaiticue. <sup>34</sup> Juzíñamui íóbillena omoi gairilla llezica, cígimo ite ringóniai úrilla rairuireda, íñiaina ie llófuellena. Juzíñamui ocuilla uai daina izói, aféngotiai íima anamo caimare írediaioi. <sup>35</sup> Aféngotiai daa rafue onóacania, jino jofomo íaioi ínimo jícanorede. Daa ringo comini gairilla cígiri úria meaire cioide.

<sup>36</sup> Mai cácarei, ¿Meita Juzíñamui uai dani ómoimona comuide, daií comeci facádiomoi? ¿Daiíñede! Daje izói aféuaina dani ómoimo llógaza comeciñeno iri; mei diga jíáimaci íena, daje uaina jae llogáiaioiza. <sup>37</sup> Daa come Juzíñamuimona onoiga uai jino llotímiedicue daiíadi, bie ómoimo cue ciegáfuaiaí cai Ocuíraíma Jesucristo cai ocuilla uai afémie daiírede. Daje izói daa come Ñuera Joréñodo úritimiedicue daiíadi, afémie cue cueda dibénemo Jesucristodo cai ocuilla uai daiírede. <sup>38</sup> Iemo afe cúegana ailli cue daina bie izói daiíacañedimie mo omoi náfueñeno iri.

<sup>39</sup> Cue ámatiai, bíemona Juzíñamuimona onoiga uai jino llua jeire omoi oiri. Iemo daa come jíáizie uaido úria, rairuñeno iri. <sup>40</sup> Mei íadi afe llezica, omoi lollíuaina jaicuíñeno daje fuémoma jíámamo meaire cíotañeno lloiri. Daje izói nana omoi jetaca raana jaicuíñeno ñue jaícina maméfireiri.

## 15

### *Jesucristo tilla meine abido cáadimie illafue*

<sup>1</sup> Cue ámatiai, ómoimo cue lloga jíllona uai ómoína uibíñotaacadicue. Afe uaina jae jeire otíomoi. Iemo bie uaido ñue itíomoi. <sup>2</sup> Daje izói cue lloga uai omoi náfueia bie Juzíñamui uai omoi úado jíllotagaomoi. Mei íadi nauí nibai táinona omoi íñoia jae jíllonediomoi.

<sup>3</sup> Cue onoiga jamánomoidifue nauí ómoimo lloticue. Juzíñamui Cuedáuai daina izói, Cristo cai fiénidifuaiaí muiñóllena tillaífueña jae omoi llófueticue. <sup>4</sup> Iemo nane afe Cuedáuai daina izói, Cristo raíga daruíamáni íllamona meine abido cáadimiena jáillana ómoína llófueticue. <sup>5</sup> Iemo afe Cristo Pédro mo cíocaide; afe mei nana jíáie ie orécamacimo cíocaide. <sup>6</sup> Nane afe mei dáaruído quinientos baímo íemo ínotinomo cíocaide. Afémacimona aillo nai itíaioi, íadi dáarie jae tíidiaioi. <sup>7</sup> Nane afe mei Santiagomo cíocaide, íemo nane nana ie orécamacimo cíocaide.

<sup>8</sup> Nana jíáimacimo cíocailla mei, íraínomo afémie cuemo cíocaide. Iemona úrue jíáifodo jocoína izóidimiedicue, mei Crísto mo cue dóbaicaillafue jarire cuemo íficaideza. <sup>9</sup> Mei Jesús orécamacimona jofófenemo ráifidimiedicue. Juzíñamuimo jaináidino fállena cue racáfirenamona, nauí ie orécamie cuena daiínide. <sup>10</sup> Mei íadi Juzíñamui ñue cuemo íllado, bie izói iticue. Afémie cuemo dúecaillano afémie cue cánuana táinomo fáífitañedicue. Mei jíáifodo jíáie ie orécamaci baímo, iere riire táijidicue. Mei íadi afe izói dama táijinidicue. Juzíñamui cuemo dúecaillano cue diga jáicaillado daií tájiredicue. <sup>11</sup> Mei birui, afe ñúefue

nibai cue lloga, nibai afémaci lloga, afe lluaífueña náfueñedicue. Mei íadi bie ñúefue ja ómoimo cai llogafue, daje izói afefue omoi ñnogafue.

<sup>12</sup> Mei bie ómoimo cai llogafue Cristo tíllamona meine abido cáadimiena jailla. Afe llogafue bie izói ítena, ¿mei nie izói ómoimona dáarie: “Tíidinomona buna meine abido cáadinona íñeite,” daidíai? <sup>13</sup> Meita íai? daína izói tíidinomona buna cáañenaza, daje izói meita dama Cristo cáañeite. <sup>14</sup> Iemo meita Cristo cáañedeza cai llócaiga uai ráifiñede. Daje izói omoi ñnogafue ráifiñede. <sup>15</sup> Iemo afe baimo, cai bie Juzíñamui dibénemo taino llotínodicai, mei Juzíñamui Cristo meine abido cáatate daidícaiza. Meita tíidino meine cáañenaza, daje izói Juzíñamui Cristo meine cáatañeite. <sup>16</sup> Mei tíidino meine abido cáañeniadi, meita afe Cristo cáañeite. <sup>17</sup> Iemo meita Cristo cáañedeza, omoi ñnogafue ómoína ñue finóñede. Nai ómoimo ite fiénidifuiaimo nai jaináicaidíomoi. <sup>18</sup> Meita íai? daína izói Cristo cáañedeza, Crístomo ñnote tíidino táinomo fáifidiai. <sup>19</sup> Meita Crístomo cai ocuírínafue daa biruillaído biniemo cai illa llezica caimo dúideza, nana comini baimo cai duere finócanodicai.

<sup>20</sup> Mei íadi afe izóiñede. Cristo tíllanomona meine abido cáadimiena jailla ñue onóigaza. Amena llizíllajimona jotáiritiji fueñe ualla izói, Cristo nana tíidinomona meine abido caadino ifódime. <sup>21</sup> Mei bie izói daa cómemona, Adán daínamiemona tíllafue fueñe biniemo comuídeza; daje izói tíidino meine abido cáaillifue daa cómemona comuide. Afémie Jesucristo. <sup>22</sup> Afemona nana comini Adamo jaináideza, tíitiai?; iemo daje izói nana Crístomo jaináidino meine abido cáaitiaí. <sup>23</sup> Mei íadi nana nairai daje llezica meine abido cáañeitiaí. Nágamiiai íai?imo dúide dieze, íai? cáatalliruido cáaitiaí: raire uícodo oga llizíllaji óina izói, Cristo fueñe meine abido cáadimiena jaide; afe mei Cristo billíruimo dama Cristo iédino cáaitiaí. <sup>24</sup> Iemo írairuimo dúcite. Aféruimo Cristo nana biniemo ite ráirede illaini naa monamo ite ríñoredinuiari niné táinocaitaite. Afe mei nana ie illáimana illa ríino naa ie anamo itínuiari ie Moo Juzíñamui fécaite. <sup>25</sup> Mei jii, Cristo nai illáimana írede, Juzíñamui nana íena éoidino Cristo anamo itábicaítalle dino. <sup>26</sup> Come tíllafue caina anáfenoacade caina éoidime izoide. Mei íadi afe cai titade ríinona Cristo írainomo niné táinocaitaite. Afe mei jáie táinocaitallimiena íñeite. <sup>27</sup> Mei Juzíñamui nágafuiana Cristo anamo jónete. Cristo ñue afémaci ocuállena. Juzíñamui Cuegáuai bie izói daíadi, Juzíñamui Cristo anamo íñénana uáfodo onóigaza, mei Juzíñamui naga raa Cristo anamo jónetimeza. <sup>28</sup> Iemo nágafuiai Cristo anamo itábicailliruiamo, dama afe Cristo Juzíñamui Jitoza ie Moo anamo itábicaíteza. Juzíñamui nágafuiai Cristo anamo itábicaítimie. Aféruimo bífuiaído naga ráaniai dibénemo Juzíñamui jamánomoidimiena íite. Naga ráfuiai naa ie comuítaga ráaniairi ñue jácina afémiemo dúite.

<sup>29</sup> Nane jáífue “Tíidinona meine cáañeite” daífiredinona dáitíicue. Dáarie tíidino dibénedo báutizatatio ite. Meita tíidino meine cáañeitiaíza, ¿nibái mei daí báutizatatio? Iemo tíidino dibénedo báutizafue ¿minícamo ráífide?

<sup>30</sup> Iemo cue, cue nabáíñiai díga, Juzíñamui ñúefue ícoina, nágaruillaído iere caina titáacade jácifueño ífiredícaí. Meita tíidino meine abido cáañeíteza, daí cai íadi ¿miníca caimo ráífilla? <sup>31</sup> Nágaruí cue titállena mamédiaíza jácinomo itíicue. Uáfueña daí itíicue. Cue ámatiai, cai Ocuíríma Jesucrístomo omoi ñnuari uáfueña iere íóbidíicue. Afe uáfueña cue íóbilla izói, daje izói uáfueña nágaruí titáacagacue. Iemona tíidino meine abido calle uáfodo onóigaza. <sup>32</sup> Iemo meita tíidino meine cáañeíteza, jamai cómena cue illa, Efésomo ite illáirede rille izóidimaci díga nauí cue fuíríllamona ¿miníca cuemo ráífilla? Mei afe izói cue illa cuemo ráifiñede. Meita uáfueña tíidino meine cáañeíteza, afe taino llotino ñue jácina daidíai. Afémaci daína bie izói jóide: “Mai raire cai güilli, güillano cai jirolli; mei úreitiruiamo raire tíiticaíza afe mei nine íñeíticaí,” daidíai.

<sup>33</sup> Jiáimamo omoi jífuefiñeno iri. Abina ñue onona uai uáfodo jóideza: “Fiénide nabáiñiai ñue illáfuiaina niné táinocaitate.” <sup>34</sup> Mei jiáifodo, ñue abina omoi onoiri. Omoi illafue ñue jaícina jóoneri. Fiénidifuenta finóñeno iri. Mei ómoimona dáarie Juzíñamui nai figo onóñedeza. Omoi méaicaillena bie izói ómoína daidicue.

*Tiidino meine abido cáadinona illena abi Pablo lloste*

<sup>35</sup> Nibai birui ja dáarie jicánoite: ¿Mei nie izói tiidino cáaitiaioi? ¿Mei afémaci abi nie izói éroite? <sup>36</sup> Afe izói jicánua abina onóñedimie úrilla izoide. Mei daa rífiregaji cai ríadi, afeji tiide izói énie anamo fiébirede, áfemona ie iroci zicóllena. <sup>37</sup> Eniemo riga raa, afenomona zicódirociñede, mei jiáifodo dama ie iji ríina. Iemo diga jiáiforiende íjiai ríina: bellaji ríina, íemo mazácaji ríina, íemo arroz iji daje izói ríina. <sup>38</sup> Afe ríinaji zícua llezica ie ciona izói Juzíñamui comuítate. Dani aféjiai dúina izói zicótate. (Bellájimona bellari zócaja, íemo mazácajimona mazácarí zócaja.) <sup>39</sup> Mei afe izói naga cáadinuiai abi jiáiforie eroide. Come abi jiáifoide, íemo rille abi jiáifoide. Daje izói féedino abi jiáifoide, íemo chámuniaí abi jiáifoide. Nana daje izói eróiñede. <sup>40</sup> Iemo jiái monamo ille abi ite, íemo jiái éniemo illa abi ite. Biniemo illa abi ebírede, mei íadi monamo ille abi ebire eroína jiáifoide. <sup>41</sup> Jitoma egáiñua fiui egáiñuana eróiñede; jiáifodo egáiñote. Daje izói ucudu egáiñua izóiñeno, jitoma jiáifodo egáiñote. Iemo jiái daa ucudu jiáie ucúdumona egáiñua jiáifodo cíoide. <sup>42</sup> Tiidino meine cáailifue bie izói jóide. Rífaite íeizi éniemo raiga, íemo tíñeitinona meine abido cáate. <sup>43</sup> Jámairuiga abi éniemo raiga, ie mei ebire cíoitaga abi meine cáate. Daje izói nane ríinide abi éniemo raiga ie mei ñue íocirede abi cáate. <sup>44</sup> Biniemo cai jocoina abi éniemo raiga, ie mei mona dibénemo dúide abi cáate.

<sup>45</sup> Mei daí Juzíñamui Cuegáuai lloste: “Nanóidimie Adana cáadimiena íficaide. Iiraie Adán daina Cristo ziiñona cáatatena joréñoredimie,” daide. <sup>46</sup> Juzíñamui dibénemo cai comuítatimie nano fueñe cómuitañega, mei jiáifodo biniemo cai nanóidimie Adán fueñe comuítaina. Afe méifomo Juzíñamui dibénemo cai comuítatimie cíocaide. <sup>47</sup> Nanóidimie énie ie finóinaza éniemo dúide. Méifoide Adán daina Cristo mona ie. Afémie cai Ocuíraíma. <sup>48</sup> Afe énie finóinamie izói, nana bínie comini ie abi izóidiaioi. Daje izói Jesumo inuamona monamo dúidino afe monámona bitímie izóidiaioi. <sup>49</sup> Iemona énie ie finócamiena cai eroína izói, afe izói mona ímiena éroiticaí.

<sup>50</sup> Amatiai, omoi cacai, ómoína dáaiticue, nana bínie dúide cai abi die diga jaca Juzíñamui illáimana illánomo jofo jáinide. Daje izói raire táinocaitatífue ziiñona illínomo dúíñede. <sup>51</sup> Mei íadi nanómona uáfodo onóñega ráfuenta ómoína onótaacadicue: nana tíñeiticaí; mei íadi nana jiáifodo méidoficaiticaí. <sup>52</sup> Uáfuenta, Juzíñamui íiraie vudugoi fúunua llezica, jarire ui bótacailla izói raire jiáifodo méidoficaiticaí. Afe vudugoi ficire cáacaillamona tiidino meine abido jaca tíñeillena cáatalliaioi. Afe llezica cáimona cáadimaci jiáifodo méidoficaiticaí abido tíñeillena. <sup>53</sup> Mei caimo ite raire féitífue ziiñona féiñeitífuenta méidoficairede. Daje izói cai tíite abi ziiñona tíñede abina méidoficairede. <sup>54</sup> Iemo afe bie caimo ite raire féitífue ziiñona féiñeitífuenta méidoficailla llezica Juzíñamui Cuegáuai daina ñue jaícina zúite. Daje izói cai tíite abi ziiñona tíñede abina méidoficailla llezica afe Cuegáuai ñue jaícina zúite. Afe Cuegáuai daina bie izói jóide:

Caímo ite tíillifue,

caína éoidimie anáfenoina izói, anáfenoga; ja táinocaide.

<sup>55</sup> Cai tíitaitífue caina izi cácatafirena ríino jae íñede.

Caina nie izói níbaiñeite,

mei ie molleroi izoide raa ja birui íñédeza.

<sup>56</sup> Nana comínimo fiénidifuiái íllamona, tíitaitífue caina jacíruitade. Iemo jaiai Juzíñamui cai ocuilla uai llúamona cai fiéni finócafuiai duere finórede. Iemona tíillifue cai

anáfuenuana jaca jacíruiticai. <sup>57</sup> Mei Juziñamui cai Ocuíraima Jesucristodo áfemo caina anáfenotañenamona íena iere figora daiífredicai.

<sup>58</sup> Ie jira, cue izíruiga ámatiai o ñnogafuena jiáifodo méidoñoño ñue jeire omoi oiri. Juziñamui ocuica táijinafuemo nágaruillai iere omoi náfuefireiri. Mei ñue onódiomoiza, cai Ocuíraimamo dájena cai táijinafue, jaca táinomo fáifíñeiteza.

## 16

### *Dúrede cai ámatiai canóllena úcube eneno ofítafue*

<sup>1</sup> Crísto mo ñnote ámatiai canóllena úcube omoi jicánoga eneno ofítallifue llóiticue. Galacia éniemo ite Juziñamuimo jaináidino cue llófuia izói, afe izói omoi ofítari. <sup>2</sup> Naga semana táiniaruimo, ómoimona illa dígamie omoi oga úcubemona due jiza Juziñamui íena oni eneno jóneri. Nano omoi llínua dieze oni eneno jóneri. Daií uícodo omoi ñue eneno énofireiri, cue billíruimo afe úcube ómoido cue íraíñeillena. <sup>3</sup> Uire cue bille llezica omoi nizada dani baillímiedo afe úcubena Jerusalémo óreiticue. Afe llezica omoi cuelle útimíiai mámece illábedo íaioina óreiticue. Afe bie izói omoi ofítaga úcubena Jerusalémo ite ámatiaimo óreiticue. <sup>4</sup> Onoñegaza, cue jíeruia afémaci díga dane jáiticaí.

### *Pablo jiáinomo jáillena mamérite*

<sup>5</sup> Cue jáiadi Macedonia éniemo jáiacadicue. Afe méifodo daií Coríntomo dúciiticue. <sup>6</sup> Mei nibai nano nié dino omoi cígiri íiticue. Nibai ónoñegaza bie rozírediruillaina omoi cígiri záitaiticue. Afe mei oni jiáinomo cue jaille llezica cuena canóredíomoi. <sup>7</sup> Mei ómoimo fia jarire érocaillano jáiacañedicueza, cai Ocuíraima comeci jítaia, omoi cígiri are íacadicue. <sup>8</sup> Mei íadi Pentecostés rafue dúcille dino, benó Efeso jófuemo íiticue. <sup>9</sup> Mei iere ñue Juziñamui uaimo cue táijillíruimo íticueza. Aillo comini birui aféuaimo jíeruicadiaioi. Mei íadi afe llezica aillo afe uaina uáitatino ite.

<sup>10</sup> Timoteo ómoimo bíadi, mai omoi cígiri caimare íena omoi itátari. Afémiena omoi áifedoñoño iri. Mei afémie daa cai Ocuíraima ocuícamo cue izói táijideza. <sup>11</sup> Ie jira ómoimona buna afémiena jámairuíñoño iri. Mei jiáifodo cue ie éroizaibilleza caimare afémiena omoi canori. Mei naa jáíie ñnote ámatiaioiri íena ocuúridicue.

<sup>12</sup> Cai ama Apolos dibénemo llóiticue. Naui íemo izire jicadicue, jáíie ámatiaioiri omoi éroizaillena. Mei íadi afémie birui jáiacañede. Uire ie jáiacallíruimo jáite.

### *Iraicaiño uáidonocailla uai*

<sup>13</sup> Mai abina ñue omoi onoiri. Crísto mo omoi ñnogafue jiáifodo méidoñoño jeire omoi oiri. Jacíruiñoño ñue íociredímie izói omoi iri. <sup>14</sup> Nana omoi jetáacagafuiai, conímana izíruillafuedo finori.

<sup>15</sup> Amatai, birui onódiomoiza, Estéfnas mámeceiredímie comini, nano fueñe Acaya éniemo ñúfuemo dóbaicaidino. Dóbaicaillano jáíie Crísto mo ñnote ámatiai canóllena ja maméritiaioi. <sup>16</sup> Jira afémaci, naa jáíie afémaci izóidinori anamo omoi caimare itábicaillena iere jitáidicue. Daje izói jiáinona canófredino, naa jabo ocuúidinori anamo mai caimare omoi itábicairi. <sup>17</sup> Ja Estéfnas, Fortunato, Acaico díga bíllari iere íóbidicue, mei cúemona jica itíomoiza cuena canónidíomoiza. Mei íadi afémaci ómoimona féiredifue cuemo finódiaioi. <sup>18</sup> Afémaci cue comécina iere náiretadiaioi; daje izói ómoina náiretadiaioi. Afe izoide comínimo ñue omoi jíeruiri.

<sup>19</sup> Benó Asia éniemo ite Juziñamuimo jaináidino ómoimo uaillai orédiaioi. Daje izói Aquila ie ai Priscila díga naa íaillinoimo gairíidinori, cai Ocuíraima mámeceido uai ómoimo orédiaioi. <sup>20</sup> Nana benomo ite ámatiai oreca uaillai, mai omoi llínori. Daje izói conímana caimare uáidori.

<sup>21</sup> Cue Páblodicue. Dama bie cue ónoido cuega uai ómoimo orédicue.

<sup>22</sup> Ninó dámie cai Ocuíraima Jesucristona izíruiacañedimie Juzíñamui faidólleza. ¡Cai Ocuíraima, mai raire biri!

<sup>23</sup> Cai Ocuíraima Jesucristo ómoína ñúefuena ézicíteza. <sup>24</sup> Nana omoi Jesucristomo jaináinado, ómoína cue izíruilla uai orédicue. Daiítadeza. Jae ñie.



## MÉIFODO SAN PABLO CORINTO IMACIMO ORÉCABE Segunda Carta del Apóstol San Pablo a los Corintios

### *Coríntomo ite Juzíñamuimo jaináidinomo Pablo cuete*

<sup>1</sup> Páblodícue. Juzíñamui comeci jítaina izói Jesucristo orécamiedícue. Timoteo cue diga illa llezica, Coríntomo ite Juzíñamuimo jainaide ámatiaimo bibe cueticue. Daje izói Acaya éniemo ite nana Juzíñamuimo dúidinomo bibe cueticue. <sup>2</sup> Cai Moo Juzíñamui, cai Ocuíraima Jesucristo diga ómoína ñue ézicíteza. Afe llezica ñue uái illano dibénemo Juzíñamui Jesucristo diga ómoína jóoneiteza.

### *Pablo duere zefuállafue*

<sup>3</sup> Cai Moo Juzíñamuina ióbitaredícai, mei afémie caina dúeruite Mooza. Daje izói afe Juzíñamui iere caimo dúecaifirede. Afémie cai Ocuíraima Jesucristo Moo. <sup>4</sup> Nana duere cai zefuilla llezica, afémie caimo dúecaifirede. Afémie caimo dúecaide, afe izói jáíie duere zefuáidinomo cai dúecaillena. Afemona Juzíñamui caimo lloga dúecaillafue jáíimacimo llóredícai. <sup>5</sup> Mei Cristo duere zefuállafue dibénemo cai nabaia izói, afe izói Cristodo caimo iere ie dúecaillafue jeire óíticai. <sup>6</sup> Ie jira, nibai dama duere cue zefuía, bie ómoína cue canóllena. Iemo nibai Juzíñamui cuemo dúecaiaidi, áfedo daje izói dúecaillafue, naa jíllonafue diga óítiomoi. Iemona daje cuemo comuide duere zefuállafue ómoimo comuíadi, raire járitañeno áfemo fia ocuíriredíomoi. <sup>7</sup> Omoi dibénemo uáfodo onóigafuemo ñue ínotícue, mei ñue onódícueza daje zefuállafue dibénemo omoi illa dieze, afe izói Juzíñamui fecaca dúecaillafue óítiomoiiza.

<sup>8</sup> Amatai, Asia éniemo cuemo comuide féiredífuiaína ómoimo fidítaiacadícue. Afénomo cuemo comuide riírede facátafue iere jamánomoideza, áfena ocuínidícue. “Níbai bífuemona jíllñoeno benó tíitícueza,” daííredícue. <sup>9</sup> Aféruimo méinellena llavécamié abí izói cue abí cacaide. Mei íadi tíidino meine abído cáatate Juzíñamuimo cue ínuana cue onóillena, afe zuufue cuemo comuide. Dama cue abí íñoñeillena cue llófuete. <sup>10</sup> Aféruimo Juzíñamui afe iere jacírede tíillafuemona cuena jíllotate. Afémie nai birui jaca cuena jíllotaocaide. Daje izói úireitruillaído afémie aféfuemona cue jíllotallemo ocuírícaidícue. <sup>11</sup> Uáfueña, cuedo Juzíñamuimo omoi jícaífireiaidi afémie cuena jíllotaite. Aillo comíni cuedo Juzíñamuimo úriadi, aillo íena ióbitaitaíoi. Juzíñamui cue ézicia ñúefuiaíri íena ióbitaitaíoi.

### *Pablo Coríntomo jáíñenafue llote*

<sup>12</sup> Daa cue comécido onóigafueri iere ióbidícue. Afefue bie izói jóide: cue comeci úrilla uai nífuenino bíniedo cue mácajana llote. Daje izói Juzíñamui eróicana jáíimana jífueñoeno cue mácaja llote. Omoi cígiri bie izói riire itícue. Juzíñamui caimare cue cánuado daíí itícue. Dama cue fibíllafuedo daíí íñédícue. <sup>13</sup> Omoiimo cue cuezábiamo báinino lloga uaina íñede. Omoi facádoia onóille raa ja uáfodo cuega.

Nane jáíífuena ñue omoi onóillemo ocuírídícue. <sup>14</sup> Aféfuena jabo onóíomoi. Afefue bie izói dáíiacade: Cai Ocuíraima Jesús billíruimo ómoíri caimare abí cue ínuana izói, afe izói cueri caimare abí ínoítíomoi.

<sup>15</sup> Nana bífuiaí iere cue jíeruillamona, omoi eróizaillena fueñe maméritícue. Daíí ménacaiño omoi cue éroizailleri ióbitíomoi. <sup>16</sup> Macedonia éniemo cue jaille llezica omoi jarire cue méiñonocaillena comeci facádícue. Afe mei Macedóniamona abído cue bille llezica nane dáanomo omoi cue éroizaillena maméritícue. Afe daíí afe méífomo judéamo cue jaille llezica cuena cánoítíomoiiza. <sup>17</sup> Bie cue mamérellafuiaí comeci cue faca llezica, ¿cuena nibai jáíífodo raire méídoíredímie izoide daídíomoi? Bie éniemo ite fiéndino mamérilla

izói nibai cuena mamérite daidíomoi. Afémaci “Jii” daidíai; íemo méifodo daje llezica “Dama ite” daifrediaí.

<sup>18</sup> Mei íadi Juzíñamui uáfueña daifredimie illa izói, afe izói táinona “Jii,” íemo “Dama ite” dáaruido ómoína daifinidíe. <sup>19</sup> Mei Juzíñamui Jitó Cristo Jesús jaca táinona “Jii,” íemo “Dama ite” dáaruido daifinideza. Iemo Silvano, Timoteo, íemo cue, Cristo daína uailai omoi cígiri lloticaí. Nana Cristo lloga uai táinoñedeza, ua uai. Ie dánana méidofinide. <sup>20</sup> Mei afémiedo nana Juzíñamui uícodo llogáuai ñue jaícina zúideza. Ie jira Juzíñamuina cai ióbitaja llezica, Cristo Jesudo “Daítadeza” daifredicaí. <sup>21</sup> Iemo jíái Juzíñamui ómoína naa cairi Crísto ríire jaináitate, nana cai ínogafuemona oni jíáfodo cai báíñeilla. Daje izói afémie ie táijnafuemo ñue caina jónete. <sup>22</sup> Juzíñamui ie Ñuera Joreño caimo íllado caina dama íeiena mamede. Afe ie Ñuera Joreño caimo íllamona íco jíáiruido Juzíñamui caimo fecállifueña cai llínollena uáfodo onódicaí.

<sup>23</sup> Mei jíáifuemo omoi coméciri. Omoina duéruiticueza, ómoína duere cue finoñeilla, uícodo cue mamérilla izói nai ómoimo biñédíe. Juzíñamui afe bie cue uaina nabáilla jicádíe, aféuai uafue daílla. Cue daína uai uáfueñenia, Juzíñamuina abí fatátaticue.

<sup>24</sup> Omoi ínogafueña ríire ocuácañédíe, mei omoi ínogafuedo Jesucrístomo ñue ríire jaináidíomoi. Mei jíáfodo conímamo táijina izói, omoi iere aillo ióbillena ómoína canóacadíe.

## 2

<sup>1</sup> Ie jira omoi cue zúucaitaíbiñeilla mamériticue. <sup>2</sup> Mei omoi zúucaitadícuenia ¿mei bu cuena ióbitalle? Cue zúucaitadino dani cuena ióbitalle, mei íadi cue dinena ómoína zúucaitaacañédíe. <sup>3</sup> Ie jira nauí ómoimo cue cugábemo cue daína izói cueticue. Omoina zúucaitaíbiacañédíe. Mei jíáfodo cuena ióbitaredíomoi. Mei nauí aféruimo uáfueña onódicueza, cue caimare illarui omoi caimare ítiomoi. <sup>4</sup> Omoi nauí cue orécabe cue cuia llezica, iere cue comeci zúurenari éedíe. Mei íadi omoi zúucailla afévena cueñédíe. Mei jíáfodo ómoína iere cue izíruilla omoi onóilla cueticue.

### *Fieni finófredimie ie illafue múíñua mei, meine caimare uáidua*

<sup>5</sup> Mei íadi ómoimo ríire úriacañédíe bie izói daíticue. Dámie fieni illa dama cuena zúunaitañedeza, mei jíáfodo cue baímo nana ómoína zúunaitade. Daí daídíe iere ríifueña jáíñeilla. <sup>6</sup> Omoi garilla llezica afe cómemo omoi mameca duere finóllíe ja figo báiteza. <sup>7</sup> Mei benómona afémie méi jíáfodo úrredíomoi. Nauí ie finoca fiénidíe omoi féitano caimare íena omoi uáidori. Daje izói íena dúcairedíomoi, aillo ie zúunaillamona afémie jamánomo anado fieni jáíñeilla. <sup>8</sup> Ie jira ómoimo izire jicádíe, afémie omoi izíruilla meine abido íemo omoi onótallena. <sup>9</sup> Nauí uícodo bifue dibébedo ómoimo cueticue. Nauí omoi cue llófuiana nibai jeire ótiomoi, nibai jeire óñeitiomoi; áfena cue onóilla ómoimo cueticue. Daje izói, omoi comeci ífue onóilla afébedo ómoína facátaticue. <sup>10</sup> Mei ja benómona, ómoína fieni finódimie omoi caimare uáidoia, cue daje izói caimare íena uáidotíe. Meita afémie fieni finuado cúemona nino féitalle fiénidino íadi, aféfuena féitaticue. Uáfueza ñue ómoína canólla Cristo eróicana aféfuena féitaticue. <sup>11</sup> Mei afe zúunaitagamie raire abido íena caimare uáidoredícaíza, afe zúufuedo Taife raire íena ana úíñeilla. Mei Taife comínina bífuefírena uailai ñue onódicaíza.

### *Pablo Tróasmo uái íñénafue*

<sup>12</sup> Jesucristo lloga uai Troas jófue jino cue lluaíbilla llezica, cai Ocuíraíma áillomaci cuena jíéruitajamona Juzíñamui cue ocuilla táijnafueña uáfodo caimare fuitaredíe. <sup>13</sup> Mei íadi Coríntomona bícade cue ama Tito afémie cue cióñenamona cue comeci uái íñede. Mei jira Troas imácina facádonocaillano, oni Macedonia éniemo íena jénuaídíe.

### *Jesucrístomo cai jaináinamona buna anáfenoñegacai*

<sup>14</sup> Juziñamuina iere figura daiñiredicai; mei Cristo nana éoidinona anáfenua izói, Juziñamui dáfeodo, Cristo diga, nágaruillaído caina úicaiteza. Afe llezica ziórede raa caimare jállia izói, afe izói Juziñamui Crístona onóillifuena caído nágagobiaído jica jalléitate. <sup>15</sup> Cristo Juziñamuimo fecaca ziórede uguci izóidinodicai. Nana jilloitínomo jallédicai, daje izói niné féiraitínomo jallédicai. <sup>16</sup> Afe niné féiraitínomo titade jucui izói íaire jállecaide. Mei íadi jilloitínomo caimare íocire cáatate jállia izói jállecaide. Bie Juziñamui ebire mamérillafue, ¿bífuena bu mei ñue llínorena? Juziñamui cuena cánua izói canóñenia jaca buna figo llínonide. <sup>17</sup> Juziñamui uailai jáíimacimo fécano úcubena llínoñedicue. Afena jaca rainóñeno llócaidicue. Jáíimaci úcubé óllena afe uai jáífodo méidua izói méidoñedicue. Mei jáífodo Juziñamui orécamié izói, afémié eróicana jáíima jífueño uáfodo úriticue.

### 3

#### *Juziñamui comue ñue finóllifue bie izói daide*

<sup>1</sup> Bie izói cue úrilla, ¿ómoimona nie izói cacaide? Nibai ¿dama cue abi ínollena meine dáanomo ñue úriticue? Mei íadi daiñañede. ¿Nibai cue ñue illánona onótatibiai ómoimo izájirede? Mei nibai jáíimaci fínua izói, ¿ómoimona cue ñue illánona onótatibiai jicárede? <sup>2</sup> Mei daiñañedeza. Dani omoi cue ñue illánona onótatibe izóidiomoi. Omoi baimo jáíie onótatibena jítaiñedicue. Cue comécimo joide come ñue illánona onótatibe izóidiomoi. Aféuaina nana comini cúemona onórediaíoi. <sup>3</sup> Dama Cristo cuega onótatibe izóidiomoi. Cuedo ciegábiai izóidiomoi, mei cuedo ñúefuena llotátagaomoiza. Jamai tintado ciegabe izóiñediomoi; mei jáífodo caade Juziñamui Ñuera Joreño uicaiganodiomoi. Daje izói Moisés noñicomo ciegáuai fia comini eróicana jeire oñediomoi, mei íadi omoi comeci úrillado Juziñamuina íóbitaacadiomoi.

<sup>4</sup> Nana afe bie ñuera cue dainana jacíruiño daiíredicue, mei Crísto Juziñamuimo daa uai fiéño inofiredicueza. Uáfueza, nana cue dainana afémié ómoimo zúitaiteza. <sup>5</sup> Mei íadi nana cue jetáacagafuiai finolle ríino dama cúemona comuñedeza; mei jáífodo nana cue finócafuii Juziñamuimona comuide. <sup>6</sup> Ie lloga comue finóllifue cue táijillena, afémié ñue cuena ríinoretade. Afe Juziñamui comue finóllifue, jaii cuega ocuífue jeire cai úado caimo zuitánide. Mei jáífodo Ñuera Joreño comuítaga cai comeci zíiño cáatino caimo íllado, Juziñamui comue finóllifue caimo zuitárede. Afe cuega cai ocuilla uai cai titállena llote, mei íadi Ñuera Joreño cai comécina cáataite.

<sup>7</sup> Afe Moisés lloga ocuilla uai nofici finóinabícimo cuega. Aféuai lluaíbilla llezica, iere riire ebíredifuiído lloga. Aféruido Israel nairai, mei Moisés uiéco jáífodo iere quenire eróideza, afémiemo eróinidiaíoi. Mei íadi afe riire ebíredifue fíaicana dúioicaide. Iemona afe ícoimo cai titalle ocuilla uai lluaíbilla llezica iere ebíreia, <sup>8</sup> Ñuera Joreño caimo lluaíbiba uai, ua afe titade uai baimo jamánomo ebírede. <sup>9</sup> Bifue bie izói dáiacade: mei cai fiénidifuiaimona cai titállena llote ocuilla uai iere ebíreia, birui aféuai baimo nífuenino cai íllena Juziñamui llogafue jamánomo ebírede. <sup>10</sup> Afe ocuilla uai nauí iere ebírede, mei íadi Juziñamui como finoca jamánomo ebíredifue comuillamona, afe nanoide ocuilla uai jae figo ebínide; ja birui ráañede. <sup>11</sup> Iemona nauí lloga are iño raire záitífue ebíredenia, afe zíiño záíñeitífue nauí llogáuai baimo jamánomo ebírede.

<sup>12</sup> Ie jira afe bífue mo ocuírillano, jacíruiño caimare úriticue. <sup>13</sup> Mei íadi cue bie Moisés fínua izói finóñedicue. Afémié uiéco quenire cíoina are iñédeza féibicaide. Ie jira afe quenire cíoide dúillana Israel nairai cíoiñeillena, Moisés ie uiéco iníroina ibaide. <sup>14</sup> Mei íadi dama Moisés uiéco íbaina llezica afe nairai, uina cíóñedino izói, íaiíoi ífoci úrilla figo déíñede. Birui afe jaii llogafue íaiíoi facádua llezica, afe íbaille iníroi izóidífue íaiíoi onóillifuena jánaide; mei afe íbaille iníroi izóidífue nai oni óñegaza. Afe jízitatífue

dama Cristo oni órede. <sup>15</sup> Nai biruimo Moisés cuezánicuai íaiói facádoia, afe ibáiraroi íaiói ifoci úrillana féitaoicaide. <sup>16</sup> Mei íadi dáamie cai Ocuíraimamo ínoia, afe ibáiraroi oni oga. <sup>17</sup> Cai Ocuíraima afe íaióina zíñona cáatate Ñuera Joreño. Afe ie Ñuera Joreño jéruitimie fiénidena fínuamona ráiruiñegamiéna jáite. Daje izói afe Ñuera Joreño cai Ocuíraimamo ínote come, Moisés ocuica uáimona ráiruiñegamiéna jaide. <sup>18</sup> Mei íemona cai uíeco ibáillaroi izóidifue íñédeza, uáfori cíoide acárani izóidinodicai. Afemona, cai Ocuíraima ebíredifue acárani egáñua izói, jáimamo ja ciótaticai. Afe daíí cai bie Cristo izóioicaidicai, mei nágaruillaído ie ebíredifue jamánomo náamatafiredicaiza. Bifue cai Ocuíraima finócafue. Afémie Ñuera Joreño.

## 4

<sup>1</sup> Afemona cue bie jaca comécina náinidino izóíñedicue, mei Juziñamui cuena dúecaillano bie táijinafue cuemo jóoneteza. <sup>2</sup> Báinino jáima jífuefirenana ruifruiticue naa jáie meáiredifuiáiri. Daje izói jáima caimare bífua uaido úriñedicue. Afe llezica Juziñamui uaina méidota jáífodo lloñedicue. Mei jáífodo jaca uáfuedo úriticue. Afedo Juziñamui eróicana nana comíni comeci ñue úrillado afe cue lloga ua uaina íaióina jéruitadicue. <sup>3</sup> Mei íadi cai llócaiga jíllona uai comínimona nano nígamie mo nai ónonino cacaide. Afefue daíí ite, mei afémaci daní ñine íaiói táinocaillifue mo jáideza. <sup>4</sup> Mei afémaci Juziñamuimo ínoñenamona bínie naama Taife, ui nirilla izói, íaiói ifoci úrilla uaina féitate, cue lloga comíni jíllotata ebírede Cristo ñúefue íaiói ónoñeillena. Afe ñúefue ñue úzere egáñote raa izoide. Iemo afe Cristo Juziñamuina jino uáfodo ñue onótate cáadimie. <sup>5</sup> Jino cue llócaina llezica, dama cue abí íena lloñedicue, mei jáífodo afe Jesucristo cai Ocuíraima llócaidicue. Iemo cue dibénedo Jesuna cue izíruillamona ñue omoi íllena canódimiedicue daíí firedicue. <sup>6</sup> Mei Juziñamui énie comuítaja llezica, afémie “Mai batí jítino egáñuairi” daide. Afe daíí daidímie, cue comécimo ie ñúefue egáñua izói jóonete. Afémie daíí cuemo jóonete, Crístodo cuemo ácataga Juziñamui ebírede cáimafue ñue cue onóillena.

### *Juziñamuimo ñue cáí ñnuado cáí illafue*

<sup>7</sup> Mei íadi afe Juziñamui ráifide cáimafue cue zíñona íñeite abido onótacue. Bie cue abí are íñeite énie niina íciru izoide; mei íadi afe ñúefue méidotarede íno bie cue jamai abimo jóoneta, afe ríino dama cúemona comuíñenana omoi onóillena; íemo jáífodo afe ríino Juziñamuimona comuíllana omoi onóillena. <sup>8</sup> Daíí cue íllamona díga féirede finónidifuiái cuemo comuíadi, jaca Juziñamui cánuado aféfuíai ñúeite. Daje izói aillo ónonidifuiái zuure cuemo comuíadi, jaca nai ocuíríñedimie izói íñedicue. <sup>9</sup> Mei jáíimaci cuena duere finóllena cuemo racáadi, jaca zóofeñegacue. Fáinamona ana dotaca izói iticue íadi, jaca ñiné táinocaiñedicue. <sup>10</sup> Náganuíaimo cue jailla llezica, Jesús íaiói fállena mámia izói maméfiregacue. Nágaruillaído afe titállena mamécamié izói cue illa llezica, afémie ñue cuena náiretade, birui ie cáananona jino comínimo cue onótallena. <sup>11</sup> Mei nai cue caana llezica, nágaruillaído Jesús ícoínia jacire titállena mamécacue, Jesús cáanana, are íñeno tíite cue abido ciótafireillena. <sup>12</sup> Daíí cue zefuillamona cue dibénedo títaigamiéna jáiticue, mei íadi omoi dibénedo dáaruído omoi cáataganona jáitiomoi.

<sup>13</sup> Juziñamui Cuezáuaimo dáamie duere ie zefuíbicailla llezica daide: “Juziñamuimo ínoticue ie jira úriticue.” Mei daíí cue jáí afémie ínua izói ínoticue, ie jira Juziñamui ñúefuedo úriticue. <sup>14</sup> Ñue onódicueza, afe tíide Cristo meine abido cáatate Juziñamui, afe cáataga Jesúoiri nane cuena cáataite; íemo daane cue, naa ómoiri, ie illánomo úite.

<sup>15</sup> Nana bífuiái ñue omoi íllena daíí íficaide. Iemona nai aillo jáíe comínina Juziñamui ñue éziciíte. Aillo ie ézicia izói afe díeze aillo comíni jamánomo ñúefue íemo nítaitiaíoi.

<sup>16</sup> Mei íemona cue jaca comécina náinidino izói iñédicue. Meita cue abi náinioicaide íadi, cue comeci dinena jaca nágarui náireioicaide. <sup>17</sup> Mei íemona bíniemo cue caana llezica duere cue zefuállafuiai figo ráañede. Raíre llícaite. Ie méifomo afe zuufue baimo ite aillo ninomo fúíñeite ebírede cámafuiiai cuemo cómuite. <sup>18</sup> Ie jira uído cue ciónamo ébicaiñedicue; mei íadi cue cióñenafuiaimo ébicaifiredicue, mei afe ciona raana are iñeno raíre táinocaiteza. Mei íadi afe cióñena raa jaca zíñona íite.

## 5

<sup>1</sup> Ja ñue onódicueza, cue caana abi are iñeno zabide jofo izoide. Iemo jíai onódicueza, bie cue abi táinocaille llezica, Juzíñamui cúeiena monamo zíñona zábiñeitico ja nite; afeco come ónoído níñega. <sup>2</sup> Uáfueza, cue caana abido cue illa llezica, monamo itícomo iere cue jáiacana comécido éfiredicue. <sup>3</sup> Afénomo jaiániacadícue, mei afeco iniroi come abi jífua izói, cue joréñona ñue jífoiteza. Afemona come abimo iñede joréñona íñeiticue. <sup>4</sup> Bie jofona mameca abimo cue illa llezica iere zúunaillano comue abina izire óiacadicue. Mei, bie cue jácaie abina, iniroi come abímona duiñua izói, cue joréñomona duiñóacañedicueza; jífoñega joreño izói íacañedicueza. Mei jíáfodo iniroi jita ízoi, comue cue abi cue joréñomo jítáacadícue. Daíi cómuena méidoacadícue, bie cue táinocaite abi, comue cue cáailinodo nine féitallena. <sup>5</sup> Dama Juzíñamui bie izói abi cue méidollena cuena mamede. Iemo birui ie Ñuera Joreño afémie cuemo fecade. Afe ie Ñuera Joreño cuemo íllado ñue onódicueza, nana Juzíñamui cuemo fecalle ñue llínoiticue.

<sup>6</sup> Mei áfemona, comue méidoga abi cue llínollena áfena ñue cue onónamona caimare ocuírídicue. Nai bie abido cue illa llezica, onódicueza, monamo cue illícomona jino iticue. Bie izói daina cue Ocuíraima diga iñédicue. <sup>7</sup> Afe llezica birui fia cue ciónafuedo ínidicue, mei jíáfodo Juzíñamuiamo cue ínogafuedo íredicue. <sup>8</sup> Mei jira uáfueza cue llínollena ñue cue onónamona caimare ocuírídicue. Bie cue illa abina fáicanocaiacadícue, monamo jaillano cai Ocuíraima diga cue íllena. <sup>9</sup> Ie jira bie éniemo afémie diga cue iñena llezica, daje izói afémie diga cue illa llezica, jaca íena cue íóbitallena jamánomo nícidoticue. <sup>10</sup> Mei comíni finócafue Cristo riire jicánoranomo nana cai afénomo ácataredicaíza. Afénomo illa dígamie bíniemo illa abido íaiói íñua dieze, nibai ñúefue nibai fiénidífue, áfeze jíridoítiaíoi.

### *Juzíñamui meine caina caimare uáiduafue*

<sup>11</sup> Ie jira afe naga come Juzíñamui riire jicánollemo ñue jacíruioicana comeci facádícue. Afemo cue comécillamona naga cómena Juzíñamui llógamo jíeruitaacadicue. Mei íadi cue illáfueza Juzíñamui onode. Afe izói cue ñue illáfueza omoi onóillemo ocuírídicue. <sup>12</sup> Dáanomo dama ñue cue illáfuedo úriñedicue. Mei jíáfodo cuedo caimare omoi úrillena bie izói ómoína daídícue. Afemona jínoidífuedo abí ínotino uai omoi ollúuai íteza. Afémaci jofo comécimo itífueza náfueñediaíoi. <sup>13</sup> Mei nibai comínimona dáarie cuena daina izói, uáiritaidímie izói iticue íadi, Juzíñamui íena daíi iticue. Mei jíáfodo uáiritaiñedicueza ñue omoi íllena canódicue. <sup>14</sup> Mei ñue onódicaíza dama Cristo dainámie nana comíni meífomo tíide. Afe caina ie izíruillamo comécillano, nana aféniemo ínotino íaiói fiénidífuiiai tíidena mámano áfena fáicanocaidiaíoi. Afemo cue comécillado Cristo caina izíruilla ñúefueza cuena izire llócaitate, ñue omoi íllena. (Daje izói bie Cristo caina izíruilla, ñue illáfuedo cue jáillena cuena ocuíoideza.) <sup>15</sup> Uáfueza, Cristo nana comíni meífomo tíide, nana cáadino daní íaiói jitailla izói íñeillena; mei jíáfodo, afémaci dibénedo tíillano meine cáadímie Cristo comeci jitailla izói íaiói íllena. <sup>16</sup> Ie jira bínie comíni jínoidífuedo comeci faca izói, nino bumo comeci facáñedicue. Mei nauí uícodo Crísto bínie comíni comeci faca izói, comeci facádícue, mei íadi ja birui daíi aféniemo comeci facáñedicue. <sup>17</sup> Mei

daií, Crístomo dájena jaináitagamie comue cómena jaide. Jaiai ie illáfuiái fiénocaillano nágafuiái cómofuiaina méidoga.

<sup>18</sup> Nana bífuiái Juziñamui mámiama Juziñamui dama afémiema Crístodo meine caimare cuena uáidote, íemo jiái nana comini afémiemo meine caimare úritallena cuena ocuñocaide. <sup>19</sup> Bie izói daiíacana: Juziñamui ie Jitó Crístodo nana comínina íena meine caimare uáidotade. Aféruimo, comini finoca fiénidifue féitana caimare íaioina uáidote. Afe dáruido Juziñamui meine comínina caimare uáiduafue oni llujállena cuena jónonocaide. <sup>20</sup> Afemona Cristo íena uai llotínona ómoimo biticue. Ie jira birui ómoína cue daína uai, dama Juziñamui ómoimo cuedo jicaca uai izoide. Mei jira Cristo dibénedo ómoimo izire jicádícue. Mai, meine abido Juziñamui caimare uáidori. <sup>21</sup> Afe Cristo jaca íaifuenta finóñede. Mei íadi cai meífomo Juziñamui afémiena fiénidifuiáiredimie izói duere finode. Daií íena finode, Juziñamui anamo ñue jaícina illáfuemo cai íllena; mei ie ñue illa izói cai íllena Juziñamui jitáideza.

## 6

<sup>1</sup> Afe daií Juziñamui táijinamo afémiena nabáidícue. Ie jira afémie ómoimo lloga ñuera cáimafuiái táinomo omoi fáifitañoeno iri. <sup>2</sup> Mei Juziñamui ie Cuegáuaimo daide:

Comínimo caimare cue uáidollena cue mamécaruimo ona cacádícue.

Daje izói jíllonaruimo ona canódícue.

Ja birui Juziñamui caimare o uáiduarui. Daje izói birui o jíllonarui.

<sup>3</sup> Iemona Juziñamuimo cue táijina llezica, buna llótaidonidícue, cue táijinafuemo fiéni íaioi úriñeillena. <sup>4</sup> Mei jiáifodo nana cue jetáacagafuiáido Juziñamuimo táijidimie cue íllana ácataacadícue. Duere zefuídícue íadi comécina raire járidoñoeno fia ocuídícue. Afedo Juziñamui íena cue íllana jino ácataticue. Daje izói cue jitaica raa íñena llezica, íemo llotáiredifuiái cuemo comuilla llezica áferi járidoñoeno ocuídícue. <sup>5</sup> Daje izói cuena zechénuano llavédiaioi. Cue duere finóllena jacire lléjellejedino cigiri iticue; íemo iere rírede táijinamo iticue. Diga ícaíño raire íniana onóñedicue; daje izói jiái jufíruiticue. <sup>6</sup> Daje izói íáinidimiena cue íllado Juziñamuimo ñue táijidimiena cue íllana ácataticue. Iemo diga jiáifuiáido daií cue íllana ácatafiredícue. Uafue uaina cue onónado ñue cue illáfuena cíotaticue. Iemo cue járitañenafuedo naa cue dúcaifirenafuiáido áfena cíotaticue. Iemo jiái Ñuera Joreño cuemo íllado, naa jiáimana jífueñoeno cue izíruifirenado Juziñamui íena cue íllana ácatafiredícue. <sup>7</sup> Iemo ua uai cue llócaillado, naa Juziñamui ríino cuemo íllado: nana bífuiáido Juziñamuimo ñue táijidimiena cue íllana ácatafiredícue. Afe llezica jaícina joide illáfuedo jáifiredícue, mei áfedo fiénide uáillaina oni caitáredícueza. Daje izói áfedo cue abina ríidoredícueza. <sup>8</sup> Darúrie ñúfuiái cuemo nitádiaioi, mei jiáiruido fiénidifue cuemo jitádiaioi. Daje izói jiáiruido cuedo ñue úritiaioi, íemo jiáiruido cuena íáiruitiaioi. Iemo dáríe cuena comínina bífuetimiena daidíaioi; mei íadi jaca uáfuenta úricaidimie itícueza. <sup>9</sup> Iemo dáríe cuena “Bu ónoñegamedio” daidíaioi; íemo jiámaci “Ñuera cai cómedío” daidíaioi. Darúrie titácamié izói iticue, íadi nai cáaoicaidícue. Iere duere finócacue íadi méineñegacue. <sup>10</sup> Zuure iticue íadi jiáifodo jaca íóbidícue. Mei ráanidimiedícue íadi, aillo jiámacina ráaredino izói ráanaitadícue. Dúredino jofófemo dúredimie izói cue íadi, nai ráaredimie izói nana ráaniairi íóbidícue.

<sup>11</sup> Coríntomo íte cue ámatiaí omoi cacai. Omoi diga báinino úriñedicue, jaca uáfodo úrifiredícue. Cue comécimo itífuena uáfodo jino ómoimo llotícue. <sup>12</sup> Omoína iere duéruillano rairuñeno ómoína caimare uáidofiredícue. Mei íadi omoi dinena cuena ñue izíruillana ráiruitíomoi. <sup>13</sup> Urue Moo, íe úruena izire jica izói, afe izói ómoína izire jicádícue. Omoimo uáfodo jino cue llua izói, afe izói omoi comécimo itífuena jino uáfodo cuemo omoi llóllena izire jicádícue.

*Caade Juzíñamui illaco izóidicai*

<sup>14</sup> Juzíñamui inoñedino dájena omoi jaináñeno iri. Omoi jaináidi, dájena jaícina iñénafue comuídeza; ómoína jiáifodo itátaite. Mei ¿nie izói jaícinaidifue fiénidifue diga dáanomo jaináirede? ¡Jaca jaináinide! ¿Mei úzefo naa jítifo diga dájena nabáirede? ¡Nabáinide!

<sup>15</sup> ¿Táife meita Cristo diga dájena caimare írede? ¡Jaca ínide! Juzíñamui inotino inoñedino diga ¿nífue dájena íaioimo dúina? Dáanomo dúitífue iñede. <sup>16</sup> Mei dama Juzíñamui dáina izói caade Juzíñamui illaco izóidíomoi. Afémie daide:

Iaioimo íticue; íaioi cígido macácaiticue.

Cue be íaioi Juzíñamuiticue.

Afe izói cue comínina ítiaioi, daide.

Iemona Juzíñamui illaco jánarai diga ¿nífue dájena íaioimo dúina? Dáanomo dúitífue iñede.

<sup>17</sup> Ie jira cai Ocuíraima bie izói daide:

Juzíñamui inoñedino cígimona oni omoi jai, afénomona oni omoi ii.

Íairedifuiái dibénemo iñeno iri.

Iemona ómoína caimare uáidoiticueza.

<sup>18</sup> Afe llezica omoi Móoiticue.

Iemo dáaruído omoi cue úruiaína ítiomoi.

Afe bífuena jamánomo riírede cai Ocuide Juzíñamui daí daide.

## 7

<sup>1</sup> Cue izíruiga ámatiai, Juzíñamui jaiai uícodo lloga cáimafuiái bie izói joide. Afe daí caimo íllamona nana jiáiforiede cai íaifuiáimona muiñócana izói oni íredicai. Abi íaifuena daje izói cai joreño íaifuena fáicanocairedicai. Juzíñamuina ñue jacíruillano cai comeci íaininafue ie erócana jaícina jóneredicai.

*Corintio imaci comeci méidua*

<sup>2</sup> ¡Mai cuena caimare omoi uáidori! Cue bie jaca buna fiéni finóñedicue. Daje izói buna íaire finóñedicue. Iemo ómoimona jaca buna jífueñedicue. <sup>3</sup> Bie izói cue dánado ómoína íaire finótañedicue. Mei nauí ómoína cue dáina izói, nai cue caana llezica, nágarui ómoimo cue comeci fáioidicueza. Uáfuena dájena cue tílliruimo ómoimo cue comeci fáioidicueza.

<sup>4</sup> Ómoína iere caimare inotícue; daje izói ómoiri ñue abi inotícue. Iemona diga duere zefuállafue cuemo comuilla llezica cue comeci jaca náirede, íemo jiái jamánomo caimare íticue.

<sup>5</sup> Mei daí nauí cuemo comuídeza. Nauí Macedonia éniemo cue jailla llezica afénomona uái cue illirui jaca iñede. Mei jiáifodo náganuiaido féiredifuiái cuemo comuide. Cuena uáitatino nágafene cue ciríoidiaioi, íemo diga jiáifuiáiri comécido jacínaioicaidicue. <sup>6</sup> Mei íadi comécina náinidinona nácaitaírede Juzíñamui cuemo dúecaide; cuemo dúecaillano Tito dúcinado ñue cuena nácaítade. <sup>7</sup> Daa ie dúcinari íóbiñedicueza, mei dáanomo omoi méidoga ñue illáfuedo afémiena omoi nácaítari íóbidicue. Afémie omoi iere cuena cióacanafue cuemo llote. Iemo jiái nauí omoi cígimo comuídifueri omoi iere zúnaillana Tito llote. Daje izói cueri omoi comeci lícitaillari, naa cuemo omoi jíruiacanari íóbidicue. Bífuiaína cue fidínamona jamánomo íóbidicue.

<sup>8</sup> Mei nauí ómoimo cue orécabe ómoína zúucaitate íadi, birui áferi zúucaíñedicue. Mei níbai nauí áferi zúucaidicue, mei íadi birui Tito cuemo llua izói afebe are ómoína zúucaitañenana fidídicue. <sup>9</sup> Iemona birui íóbidicue. Omoi zúucaillari íóbiñedicue, mei jiáifodo afe omoi zúucaillafuedo omoi comeci ífuena méiduari íóbidicue. Bie zúucaillafue ñue omoi ocuállado Juzíñamuina íóbitade. Iemona ómoimo riire cue cugabe ómoína fiéni finóñede. <sup>10</sup> Mei uafue, Juzíñamui íóbillá ñue cai ocuíoiga zúucaillafuiái cai comeci ífue ñúefuena méidotade. Iemo afe ñúefuena méiduado jíllóiticaí. Mei íadi bíniemo ite

ñinoñedino zúucaillafue íaioina ana tíllinomo úite. <sup>11</sup> Omoimo comuide zúucaillafue ñue omoí ocuállari Juzíñamui íóbide. ¡emo birui omoí cígimo ñue comuídifuiamo omoí éroi! Afe zúucaillafue nauí ómoimo ite fiénidifue mo riire ómoina ñue comécitade. Iemo afe zuufue omoí finoca fiénidifue na jino uáfodo llotátate. Daje izóí afe zuufue dani ómoina ríicaitade; íemo ómoina jacíruitade. Afe méfomo iere cuena cíóacadiomoi. Afe llezica omoí cígiri ite fieni finódimiema duere finótaiacadiomoi. Nana bífuiaimo omoí nífueninana jino ñue cíotatiomoi. <sup>12</sup> Mei daíí afe orécabe cue cuia llezica afe fieni finódimiemo figo comécíñedicue. Daje izóí duere zefuídimiemo figo comécíñedicue. Mei jíáifodo ñue omoí illífuemo comécídicue, cuemo omoí comeci ñue fáiana, Juzíñamui eróicana, omoí onóillena. Ie jira afebe ómoimo cueticue. <sup>13</sup> Iemona bífuiaido cuemo caimare dúecaídiomoi.

Mei íadi omoí cuemo dúecailla baímo Tito iere caimare íllari jamánomo íóbídicue. Mei nana omoí afémie ñue uái íllena íena canódiomoi za. <sup>14</sup> Nauí omoí dibénedo Títomo cue úrilla uai meáiruiñeno jaca ñue cuemo baite. Omoíri abi cue ínuana afémiemo lloticue. Ja birui, nana ómoina cue daína uai uáfue na jailla izóí, afe izóí ómoíri Títoma cue daína uai uáfue na jaide. Iemona nauí afémiema cue daína uai táinomo omoí fáífitañenari iere íóbídicue. <sup>15</sup> Ja birui Tito ómoina iere izíruite, mei nana ómoimo ie dáinado cue ocuífafuiai jeire omoí úamo afémie caimare uibíoideza. Daje izóí jacíruioicana caimare ie omoí llínuamo nai comécioide. <sup>16</sup> Iemona ómoina jaícina ñue cue ínuari íóbídicue.

## 8

### *Jeruíño fecáredicaí*

<sup>1</sup> Amatiai, birui Macedonia éniemo ite Juzíñamuimo jaináidinomo afémie dúecaífirenamona íaioí jeruíño dígá raa fecáfirenafue ómoimo llóiacadicue. <sup>2</sup> Mei íaioimo comuide féiredífuiai iere íaioina jacire facátate íadi, caimare itíai. Daje izóí iere duérediaioí íadi, ráaredino izóí raana jeruíño fecáfirediaioí. <sup>3</sup> Mei dani íaioí comeci ñue jítaina izóí nana íaioimo ite dieze jeruíño fecádiaioí, íemo afe íaioí írede úcube baímo nane fecáfirediaioí. Aféfuemo uaina nabáidicue. <sup>4</sup> Bie Macedonia imaci Judéamo ite ámatiai íaioí canóllena cuemo izire jícadiaioí. <sup>5</sup> Íaioimo comeci cue faca baímo fecáfirediaioí; mei fueñe Juzíñamui comeci jítaina izóí, “Juzíñamui ocuilla raire fínoíticai,” daínano afémiemo ñue ínotiaioí. Afe mei daje izóí “O ocuilla raire fínoíticai,” cuena daídíaioí. <sup>6</sup> Afémaci daíí daína jira, Títomo izire jícadicue, afémie nauí omoí cígiri taineca omoí jeruíño fecaca úcube iráíafue birui ñue ícoimo fuitállena. <sup>7</sup> Mei nágafuiai dibénemo iere ñue finódiomoi: ínogafue dibénemo jamánomoidiomoi. Iemo ñue llófuiana jamánomo baitádinodiomoi, naa ífoci úrillafuiai. Daje izóí ráiraíeño íocirenafue dibénemo jamánomoidiomoi, naa cuena omoí izíruillafueri. Daíí omoí íllamona, mai bie jeruíño raana fécafue dibénemo daje izóí jamánomoidinona omoí iri.

<sup>8</sup> Bie fécafue na ómoina finótañedicue. Daa jíáimaci raire raana fecáfirenafue na omoí onótaacadídicue, áfena omoí fidínamona íaioí feca dieze raire omoí fecállena. Afe daíí raire omoí fecáacano omoí izíruillafue na jíáí uáfue na dáítiomoi. <sup>9</sup> Mei caí Ocuíraíma Jesucristo caímo dúecaillana ñue onódiomoi za. Afémie fueñe monamo illa llezica bínie comíni ráanaílla baímo jamánomo ráaredimie. Mei íadi bíníemo bíllamo caína izíruillano dama abina dúeredimíema finode, ie dúerenado Juzíñamui dibénemo caína jamánomo caí ráanaitallena. Mei uáfueza, nauí Cristo monamo illa izóí, afémie caína itátaiacade.

<sup>10</sup> Bie jíáímacimo fecáfirenafue dibénemo omoí ñue íllena, cue comécimo ite cue fácaja ñuera uai llóíticue. Nauí jaide fimónamona nai biruimo afe jeruíño fécafue na ñue tainédiomoi. Daa due jiza fécaítino izóí, tainéñedíomoi, mei jíáifodo íocire caimare fecáfirediomoi. <sup>11</sup> Jira benómona mai ñue ícoimo omoí fuitari. Nano fueñe omoí táinia



llezica, omoï íocire caimare fecáfirena izóï, afe izóï áfena ñue ícoïmo fuitari. Omoïmo ite dieze, jeruñeno fecáfireiri. <sup>12</sup> Dámie uáfueña Juzíñamuimo fecáacania, afémie Juzíñamuimo fecaca raa Juzíñamui caimare llínoite. Mei uáfueña comínimo ite dieze Juzíñamui caimare llínofiredeza. Afe baimo cómemo iñédena afémie táinona jicáñede.

<sup>13</sup> Jiáimaci omoï canófirenado ómoïna dúeredinona finóacañedicue. <sup>14</sup> Mei jiáifodo illa dígazie dájerize omoï ráareri, daidicue. Jiáiziena jamánomo baimo ráareri, daiñedicue. Birui íaioï jitailla raana omoï ñue fecáredíomoi. Iemo uire omoï jitáilliruimo omoï jitailla raana afémaci ómoïmo fecárediaioï. Afe bie izóidemona afémaci naa ómoïri jaícina dájerize ráareitíomoi. <sup>15</sup> Jaiai afe monámona Juzíñamui oreca maná daina pan izóidena dibénedo Juzíñamui ciegáuai daje izóï daií dáideza: “Aillo ofítatímiemo minícana fiébiñede. Iemo figo ofitañedímiemo ie jitaica raana iñede.” Iemona nana dájerize ráareitíomoi za.

### *Tito naa ie nabáñiairi*

<sup>16</sup> Ja jiáinodo Juzíñamuina “Figora” daiñiredicue. Mei omoï ñue íllena ómoïmo cue comeci úina izóï, afe izóï Juzíñamui Tito comécina ómoïmo jóonetadeza. <sup>17</sup> Afémiemo cue jóonenocaigana afémie ñue jiéruite. Iemo dama ie comeci ómoïmo járitaifirenamona, ja birui dama ie comeci jítainado omoï eróizaide.

<sup>18</sup> Tito diga daa ñue mámecina jica jalléidimiena orédicue. Nana gairífirede Juzíñamuimo jaináidinodo ie mámecei jica jalleide. Jíllona uaimo afémie iere ñue táijnado ie mámecei jica jalleide. <sup>19</sup> Daa bífueñedeza, mei jiáifodo Juzíñamuimo jaináidino afe bie cai ama nizédiaioï cue diga jáillena. Daje izóï cue canóllena afe ñue ínotimiena nizédiaioï. Afe jiáimacimo omoï dúecaille úcube cue fecállemo afémie cuena cánoite. Cai Ocuíraimamo ñuera uai nitállena bie izóï finódicue. Daje izóï íemo jiái omoï íocire comínina canóacanana ácatallena, bie izóï mamédicue. <sup>20</sup> Bie úcube cue iráiamo buna fieni úriñeillena bie izóï finódicue. <sup>21</sup> Bie izóï ñue jaícina uáfodo canóacadicue, Juzíñamui eróicana ñue cue íllena. Dama Juzíñamui eróicana daií iñédicueza, daje izóï jiái comini eróicana daií iticue.

<sup>22</sup> Afe íaillinoïdo jiáie cai izóï ínote ámatiaimona dáamie orédicai. Afémie íocire ie mamérillana diga jiáifuiáido ácatate. Iemo birui ómoïmo iere ñue ie ínuado, ie íocire mamérillana jamánomo jino ácatate. <sup>23</sup> Daa come “¿Mei bu Títona?” daiíadi, “Jadíe omoï cue cánuamo cue nabáñiredimie,” omoï daiíri. Iemo afe Títodo jaide íaillinoïmo comini jicánoiadi, “Crístomo jaináidinomona orecaiaillinoï,” omoï daiíri. Afe llezica “Bie come íaillinoï ñúefue Crístomo nitáñirediaillinoï,” omoï daiíri. <sup>24</sup> Iemona bie oreca íaioïmo, uáfueña íaioïna omoï izíruifirenana ñue íaioïmo ácatari, nana Juzíñamuimo jaináidino onóilleza. Afe izóï bie orécamaci ñue omoï llínuado, ómoïdo abí cue ínuana, uafue daiítaitíomoi.

## 9

### *Amatiai éna úcube iráica*

<sup>1</sup> Juzíñamuimo ínotino, cai ámatiai izóidino íaioïena úcube iráia dibenedo, ómoïmo uáfueña cúenidicue, <sup>2</sup> mei omoï fecállena raire mamérifirenana ñue onódicueza. Omoï Acaya énie imácídiomoi. Nauide fimónamona omoï fecalle raamo raire mamérifirenana Macedonia énie comínimo jaca caimare llófiredicue. Macedonia comínimona nabézie, omoï íocire mamérillana fidíillamona comécido náicaidiaioï. <sup>3</sup> Mei íadi bie úcube iráia dibénedo ómoïdo cue lloga ñúefue táinomo fáñiñeillena, bie cai ámatiai ómoïmo orédicue. Daií íaioïna uícodo orédicue, nauí cue daina izóï áfemo ñue omoï finóbillena. <sup>4</sup> Macedonia imácimona dárie cuedo jaia, nai omoï finóbiñenana baizájillena gáñedicue. Daií omoï íllana íaioï baizájadi, afe cuena meáidaitade, mei áfedo nano uícodo omoï ñue cue ínuana táinomo fáñitaitíomoi za. Iemo jiái afémaci daií omoï íllana cíocaizaibiadi daje izóï dani ómoïna meáidaitaite. <sup>5</sup> Afe bíemona nano uícodo ómoïmo bie cai ámatiai cue orelle iere

jitáiredeza, daií comeci facádícue. Iemo daje izói afémaci nauí uícodo omoí mameca aillo úcube iráiana ñue ícoímo fúitana cánoítiaíoi. Bimaci omoí cánuamona afe úcube iráiana fúitano, afe úcube caimare omoí fecállemo ñue finóbitiomoi. Iemona afe omoí fecalle cue riire ocuínidícue. Dani omoí comeci ñue jítainana ácataitiomoi.

<sup>6</sup> Ja cue lollífuemo omoí uibíoiri. Due ritímie jaca due jofo ote. Iemo daje izói aillo ritímie aillo jofo ote. <sup>7</sup> Ie jira illa dígamie ie comeci caimare mamérilla izói ie úcube írede. Jeruillano éoinamona fecánide. Daje izói jíáima ocuíoillamona ínide. Mei Juzíñamui caimare fecáfiredimiena izíruiteza. <sup>8</sup> Cai Moo Juzíñamuimo nana jíáifoide omoí cáimacaitade ráaniai iere aillo íteza, facadoñeno jamánomo ómoímo fecárede. Daií nana dani omoí jitaica ráaniaina ómoímo nágarui ífireite. Mei íadi dani ómoieñedeza, mei jíáifodo ómoímo aillo ite ráamona, nana jíáiforiède raado jíáimacina jeruíñeno canóredíomoi. <sup>9</sup> Juzíñamui Cuegáuai bie izói daíde:

Dúredinomo afémie jeruíñeno aillo fecade.

Comínimo afémie ñue finócano jaca are iite.

<sup>10</sup> Iemo afe daade Juzíñamui omoí ríllena jíáie ríamo llizítano ómoímo fecáfírede. Daje izói afe riga zícuaamona, Juzíñamui áfemona omoí güille raana comuítano ómoímo fecáfírede. Iemona nana omoí jitailla ríllena afémie ómoímo fécaite; íemo dáanomo omoí rigánuaína jamánomo aítátaite; áillamona jamánomo aillo ótiomoi. Daií omoí jamánomo óllemona jíáimaci canolle raa díga icaiño ómoímo íteza. <sup>11</sup> Afemona díga jíáiforiédena ráareitíomoi, jíáimacimo jeruíñeno aillo omoí fecáfírellena. Iemo cue uire omoí orelle úcube cue izájillamona jíáie cai ámatiaína Juzíñamuina “Iere figura” daítaite. <sup>12</sup> Mei jira afe bie cánua Jerusalemo ite cai ámatiaímo cai feca llezica, daa íaíoi jitaica ráaniai íaíoiimo fecáñedicaíza, mei íadi afémacina Juzíñamuina “Iere figura” daítaticai. <sup>13</sup> Iemona dani afémaci Juzíñamuido ñue úritiaíoi, mei bie cánua Cristo ñuera uaina omoí jíeruillana íaíoiimo jino ácatate. Daje izói afémacimo íemo naa jíáimacimo jeruíñeno aillo omoí fécajana íaíoi ciónamona, Juzíñamuimo ñuera uaina jóneítiaíoi. <sup>14</sup> Iemona ómoína iere duéruillano, afémaci afe íbana ómoína Juzíñamuimo jícaítiaíoi. Juzíñamui ómoído jino cíotaga aillo dúcaífirenamona afémaci ómoído Juzíñamuimo úrifireítiaíoi. <sup>15</sup> Ie jira Juzíñamui afe caímo lloga áillo dúcaífirenana jamánomo ñuénamona, fia iga raa izóideza, áfena jino uaido jaícina llónidicaíza. Afe caímo dúcaífirenari Juzíñamuina “Iere figura” mai cai daílli.

## 10

### *Cristo orécamiena íllamona Pablo ocuilla ríino ite*

<sup>1</sup> Cue Páblodícue. Cristo caímo dúcaífiredeza, íemo jíái afémie iere cáimamíeza cue daje izói izire ómoímo jícaítícue. Omoímo riire cue úrizaíbiñeíllena ja biruí jícadícue. Dáarie cuena uáitatino bie izói cue díbénedo daíífirediaíoi: “Pablo omoí cígiri illa llezica afémie iere comécina mánaídímie, mei íadi afémie jica jíáínomo illa llezica afémie abído riire ocuídímiena dóbaícaide,” daídíaíoi. <sup>2</sup> Mei jíáifodo, omoí cue eróizaíbilla llezica, riírede uaina ómoímo cue úrizaíbiñeíllena izire jícadícue. Mei ómoímona dáarie cuemo fíénide uai jíadino ite. Afe íaíoi jítaica uai bie izói joide: “Nana ie finócano daa bíníe comíní jítaína izói finoca,” daí daídíaíoi. Iemona afémaci cue úritaja, riírede uáíllaido íaíoiimo úriredícue. Mei íadi afe izói cuena úritaño iri. <sup>3</sup> Mei uáfueza, ua cómedícue, mei íadi bíníe comíní fuírífírena izói fuíríñedícue. <sup>4</sup> Fíénidífuíai oni cue caítalle raa, bíníe comíní fuírilla raa izóíñede. Mei jíáifodo cue fuírilla raa Juzíñamui ríinona ríinorede, abí ríídollena riire finócacuai izóidena cue táinocaitallena. <sup>5</sup> Mei áfedo cuemo fíeni jíácana oni caítadícue; daje izói cuena íaíoi cáitajana oni féítatadícue. Nana uáitaiacadino íaíoi abí ínúano jíáimaci Juzíñamuina raíre onóñeíllena jííztaífirediaíoi. Ie jira nana íaíoi comeci faca uáíllai Cristo anamo itátaitícue, afe Crístona íaíoi comeci jíeruillena. <sup>6</sup> Cue llógana omoí jíeruilla ñue ícoímo dúcílle llezica, nana jíáie uáítaíredínona duere fínoítícue, íaíoi jíeruíñena ícoína.

<sup>7</sup> Daa jínofene cioide ráaniaimo eróidiomoi; uáfueza, náinidimiena cue eróinamo eróidiomoi. Ninó dámie “Uáfueza cue bie Cristo iédicue,” daiíadi, bífueмо afémie uíbicaitarede: Cristo íena ie illa izói, daje izói cue Cristo iédicue. <sup>8</sup> Mei diga icaiño, cuemo ite riinodo cue llóyadi nai áferi méaidaiñeiticue. Mei cai Ocuíraima afe ríino cuemo jónete, áfedo Juzíñamui dibénemo ñue omoi cue móonaitallena. Omoi niné cue táinocaitallena cuemo ínega. <sup>9</sup> Fia rabedo ómoína jácidotimie izói íacañedicue. <sup>10</sup> Dárie cue ciegábiaido daidíaioi: “Jamánomo riire ocuífiredede; mei íadi afémie comini eróicana úrilla llezica, afémie ríimieñede. Afe llezica ie úrilla uaina iere jáimairuirede,” daidíaioi. <sup>11</sup> Afe izói úritimie bie izói onótarede: Jicana rabedo riire cue úrilla izói, afe izói omoi cígiri cue ille llezica riire úriticue. Nane afe dáaruido afémacina riire ócuiticue.

<sup>12</sup> Afémacimona dáarie daní íaioiena ñue caimare úritiaioi. Táinomo abi ínuado úritiaioi. Afémaci illa izói jaca mamériñedicue. Daní táinomo íaioi comécillado conímamo comécidiaioi. Ñuera come daiíllena daní conímamo facádiaioi. Daií fácajamona abina onóñedimacina jáidiaioi. <sup>13</sup> Cuemo dúíñede raado abina íñoñeiticue, uai cue llócaillena mózizaillinona llotimie, Juzíñamui. Afémie ñuera uailai cue llócaillena omoi illánomo cuena dúcitate. Uáfueza Corinto dinomo cuena jáitate. <sup>14</sup> Ie jira cuemo dúide táijinafue baimo jáiñedicue. Mei nauí Cristo ñúefue fueñe ómoimo jino dénuai biticueza. Iemona afe omoi cígiri cue táijille cuemo dúide. Nano fueñe lluáibiñedicuenia afe táijille cuemo dúíñede; mei íadi daiítañede. <sup>15</sup> Jáíimaci táijinana cúeiena abimo maiñoñedicue. Afedo abina íñoñedicue. Mei jáíifodo Juzíñamuimo omoi ínogafue ñue móonaille dinori, omoi cígiri jamánomo cue táijilleмо ocuírídicue. Mei íadi cuemo dúide táijinafuedo táijifireiticue. <sup>16</sup> Iemona afe méifomo omoi illa batífenemo jica itínomo jíllona uai llujíredicue. Mei íadi afe llezica jáíima taineca táijinamo táijíñeiticue, ie táijinado abí cue íñoñeillena.

<sup>17</sup> Mei jáíifodo daa come abí ínoiacania, cai Ocuíraimado abí ínoiteza. <sup>18</sup> Dama ie abido ñue úritimie, ñuera come daiífirenamiena jáíñeite; mei jáíifodo daa Juzíñamui ñue úrillamie, ñuera come daínámiena jaille.

## 11

### *Cristo óreñega taino llotino Pablo diga*

<sup>1</sup> Abina onóñedimie izói due jiza úriticueza. Raíre cue uai oñeno fáicana cue úrillamo ómoína cacáretaacadicue. Mai fáicana abí cue ínuamo omoi cácarei. <sup>2</sup> Omoína iere uríoifiredicue. Afe omoi cue uríoilla Juzíñamuimona comuide. Dámie ie áireiacania jetañega jitaingo óllena jica ia mámano jicánote. Afe jicánogango daa afémiemo iníreirede. Mamécaruimo afengo moo aféngona izájite. Afe izói Crístomo ómoína cue izájillena ja Crístodo mamédicue. Ie jira ómoiri iere uríoídicue. <sup>3</sup> Mei comini nánoidingo Evana jaio bífuiano jífua izói, afe izói jáíimaci ómoína bífuiana jacíruiticue. Afemona figo abí omoi ráiruiñenia jífuefitiomoi. Iemona Crístomo ñuera comécido omoi comécillana oni jáíifodo féitaitiaioi. Daje izói Crístona nahí omoi izíruillana féitaitiaioi. Afena jacíruiticue. <sup>4</sup> Cue llócaiga Jesús izóiñedimiena ómoimo llotíaioi. Afemo fáicana caimare ñue cacáreidiomoi. Afemo nibai omoi ínollena jacíruiticue. Iemo nauí ómoimo cue lloga o maiñoca Ñuera Joreño izóiñedena jáíifoide joreñona abimo maiñoñeidiomoi. Iemo jáíi uícodo cúemona omoi cacana ua jíllona uai izóiñedena jáíifoide uai jeire otíomoi. <sup>5</sup> Birui baie omoi cígido jáillamaci “Cai bie Cristo orécamaci baimo ñúemacidicai,” daidíaioi. Mei íadi afémaci jofófenemo ráííñedimiedicue, daií comécíoidicue. Iemona ¿nibái mei cuemo cacáreñeitiomoi? <sup>6</sup> Mei nibai cue úrilla uai figo jíñoñeniadi, nai cue onoiga rafue jino llúana

dibénedo iere baitádimedicue. Nana ómoimo cue llócaillado afe bie cue onógafuiaiina jaca nágarui jino ómoimo ácatafiredicue.

<sup>7</sup> Jíllona uai ómoimo raiñóñeno cue llúado, omoi anamo cue abina itátaticue. Daií iticue cue baimo ñúefuedo omoi jalléillena. Daií cue illa ¿ñibai fiénide? Daiítañede. <sup>8</sup> Jiáie Juzíñamuimo jaináidino omoi cue canolle úcube ibádiaioi. Omoi cígiri cue íllena afe úcube cue llínua afémacimona cue bairoca izoide. <sup>9</sup> Omoi cígiri cue illa llezica, cue jitaica raana ite. Mei íadi áfena jaca ómoimona raiñóñedicue. Aféruillaido Macedóniamona bite cai ámatiai, cuemo iñede raana fecádiaioi. Afe daií cue abina rairuídicue, omoi cígimo nana cue finócafuiai ómoimo juare zúíñeillena. Iemo nauí cue illa izói, afe izói omoi cígiri jaca daií ífireiticue. <sup>10</sup> Cristo ñúefue ua cue onona izói, afe izói nane jiáifuena ua onódicue. Afefue bie izói daide: Nana Acaya éniédo raiñóñeno tájifireiticue. Afe cue tájina cue raiñóñenari cáimacaiticue. Iemo afe cuemo ite cáimafue buna cúemona báiroñeite. Afena uáfodo onódicueza. <sup>11</sup> ¿Ñibái mei daií úriticue? ¿Ñibai ómoína cue gáñenado daií úriticue? ¡Ieñede! Omoína iere cue gáinana Juzíñamui ñue onode. <sup>12</sup> Mei íadi jaca cue finua izói finócaiticue, cuena uáitatino abí ñnotañeillena. Jaca ómoimo raiñóñeno tájifireiticue, baie abí ñnotino íaioi abí ñnua raa cue bairóllena. Afémaci úcubena ómoimona izire jicáfirediaioi Cristo ua orécamiéna cue illa izói íaioi íllena. Mei úcube íaioi ófirenamo ñnotiaioiza, áfedo “Cristo orécanodicaí” daiíllena. Ie jira afe íaioi ñnoga uai oni caitácadicue. Iemona jaca raiñóñeno ómoína canófireiticue. <sup>13</sup> Baie afémaci Cristo óreñega iere taino llotino. Daje izói afémaci jiáimacina jífuefiredino. Iemo jiái afémaci come jifeia jiáifo eroína izói, Cristo orécamacina comínina íaioimo comécitaacadiaioi. <sup>14</sup> Afe bie jiáifodo afémaci eróinafue cáimona jánañede, mei dama Taife egáñnote Juzíñamui abí ímiena eróillena méidoficaideza. <sup>15</sup> Ie jira, Taifemo tájitagano ie méidoficailla izói méidoficaifirediaioi; afe jiáifoide raa ízoiñede. Iemona jifeide come eroína izói bimaci ñue ite comínina eróillena abina jiáifodo méidotiaioi. Mei íadi íaioi finócaiga fiénidifue dúina dieze afémaci táinocaitiaioi.

### *Cristo orécamiéna ie íllamona Pablo duere zefuide*

<sup>16</sup> Nane dáanomó ómoína dáititcúe: Bie jabo abí cue ñnuamona cue úrillamona bu cuena “Uáiritaidimie” daiíñeno iri. Mei íadi daa come daií comécido daiíadi, dama uáiritaidimie izói úriticueza fia omoi eroiri, áfedo jabo abí cue ñnollena. <sup>17</sup> Afe bie abí cue ñnua uaina, cai Ocuíraimamo ite rínodo cuena daií daiítañede. Mei jiáifodo dama uáiritaidimie izói úriticueza. <sup>18</sup> Mei daní íaioi daina ñuera uaido abí ñnotinuai aillo íteza; afe íaioi taino abí ñnuana izói, afe izói abí ñnoiticue. <sup>19</sup> Omoi zánuaño dáititcúe, omoi jamánomo baitádinodimioiza, mai uáiritaidimie izói cue úrillamo caimare fíaicana omoi cácarei. <sup>20</sup> Mei ómoína baie riire tájitatínona caimare fíaicana cacáreidiomoi. Iemo jiái ómoimo ite raana báiruaíbitino uaimo caimare fíaicana cacáreidiomoi. Iemo jiái ómoína náamataíbitino uaimo fíaicana caimare cacáreidiomoi. Iemo jiái omoi jamairuitinomo caimare cacáreifirediomoi. Iemo omoi uieóna fatade izóidino, afe ñí ómoína fiéni úritinomo fíaicana caimare cacáreidiomoi. <sup>21</sup> Bie izói cue daina cuena meáiruitade, mei íadi dama cue jamairuillado dáititcúe, cue bie afémaci finua izói, cue finóllena figo ríinidicue.

Mei íadi aillo jiáie comíni jacíruiñeno daiífiréna izói, cue jiái jacíruiñeno dáititcúe, mei íadi áfedo uáiritaidimie izói úriticue. <sup>22</sup> ¿Meita afémaci hebreo imaci? Cue jiái daje izóidicue. ¿Meita afémaci Israel nairai iédiaioi? Cue jiái daje izóidicue. ¿Meita afémaci Abrahámona comúidino? Cue jiái afémaci izóidicue. <sup>23</sup> ¿Meita afémaci Cristo tájitagano? Cue bie afémaci baimo Cristo ocuícamiedicue. (Bie izói cue dánado uáiritaidimie izói úriticue.) Cue bie afémaci baimo jamánomo tájidicue. Cue bie afémaci

baimo zéchedogacue. Daje izói afémaci baimo llavécacue. Iemo diga ícaiño titáacagacue. <sup>24</sup> Cinco dígacaiño judío nairai duere cue finua llezica, cuena zechénotadiaioi. Nágarui duere cue íaiói finua dáruido treinta y nueve dígacaiño cuena zechénotiaioi. <sup>25</sup> Iemo dacaiñoámani cuena ragüüzido fatíaioi. Iemo dácaiño nofíciaina cuena níjidiaioi. Iemo dacaiñoámani cue jailla áillue nocáe buide. Iemo dácaiño cai buíllamona daa naio daa mona diga afórede monailai cígimo iticue. <sup>26</sup> Dáanori uái iñeno iere macáfiredicue. Iemo diga imani jacíredinuiaimo iticue, íemo jacírede merírifiredino cígimo iticue, íemo dama cue comíniri jacíredifuiái cígiri iticue naa jicánemaciri. Iemo áillue jofue cígimo ite jacíredifuiái cígimo iticue. Daje izói áillue nairai jinomo ite jacíredifuiái cígimo iticue, íemo jiái monáillaimo jaci cácadicue. Iemo jiái taino ámatiaí cígimo jaci cácadicue. <sup>27</sup> Daje izói juárede táijnamo iticue naa féiredifuiáiri. Diga ícaiño mona naio diga iníñeno táijidicue. Daje izói iere juí cácadicue, íemo jiái jainoi iñénari duere zefuídicue. Diga ícaiño Juzíñamuimo comeci fácano güiñeno jáicadicue. Daje izói rólliemo duere zefuídicue. Daje izói incuíronino jáicadicue.

<sup>28</sup> Nane bífuiái baimo jiáifuiái cuemo comuide. Nágaruillaido náganuiaimo ite Juzíñamuimo jaináidinomo cue comeci úicaide. Iaióina abíoidicue izói duere zefuídicue. <sup>29</sup> Iemona daa come figo Juzíñamuimo ie íñoñenamona duere zefuádi, afe cuena duere zefuítate. Daje izói dámie íaifue mo comeci nine féiacaniadi, cue comeci niné féizailla izoide. Iemona afe cuena meáidaitade; daje izói cuena rícaitate. <sup>30</sup> Mei afémaci táinodo cuena abí ínotaadi bie izói dáititue: Cue mairíñenana jino ácatate raado ñue cue úrillena baimo gáidicue. <sup>31</sup> Cai Moo Juzíñamui bie cue daína ua uaina onode. Afémie cai Ocuíraima Jesucristo Moo; íemo jiái afémie jaca ninomo íóbioitaregaza. <sup>32</sup> Naui Damáscocomo cue illa llezica afe nairai jabóidillaíma naga nazemo úiñorainina jóonete, llaitada cue llavéllena. Afe nairai nahíllaima Areta mámeciredimie. <sup>33</sup> Mei íadi jiáie Juzíñamuimo ínotino, eróirafomona cirígaido cuena ana agüínetiaioi; mei afe jofue onífene cirínua raa caifo jicado íteza. Daí afémacimona botada jíllodicue.

## 12

### *Juzíñamui Páblomo nicaí anado ua ráfuedo úrite*

<sup>1</sup> Dámie dama abido caimare úria minícana oñede. Ie úrilla jiáie raamo ráifiñede. Afe fue ñue onódicue ia, cai Ocuíraima nicaí anado cuemo ácataga raa jino llóredicue. Afe llezica uícodo nai buna ónoñegafuiái cuemo llote. <sup>2</sup> Afe cuemo ácataruimona ja catorce fimona jaide. Aféruimo Crístomo cue jaináinamona caifo tercera monamo Jesucristo illámonamo uigacue. Onóñegaza nibai caana abido uigacue, nibai íeizinino uigacue. Afe dama Juzíñamui onoiga. <sup>3</sup> Cue úinaruimo nibai abí diga uigacue, nibai daa cue joreño úina, áfena onóñedicueza; dama Juzíñamui onoiga. <sup>4</sup> Juzíñamuimo ínote tíidino jáillinomo uigacue. Afénomo Juzíñamuimona dama cuemo duide ebírede uáillaina cacádicue; afe uáillaido Juzíñamui rairuídeza birui úrinidicue. <sup>5</sup> Afe cuemo ácataga raado abina ínoredicue, mei íadi áfedo abina íñoñeiticue. Dama cue abina íñoñeiticue. Mei jiáifodo cue mairíñenado ñue cue úrillena iere gáidicue. <sup>6</sup> Mei dama abido cue úriacaniadi, afe abina onóñeno úrilla izóiñede, mei jáicina uáfueña úriticue. Mei íadi áfedo úriñeiticue, mei cue ciona izói comini cuemo comécillena jitáidicueza. Afe izói cúemona íaiói cacana izói áfeze cuemo íaiói comécillena jitáidicue. Afe baimo aillo jiáiforie cuemo íaiói comécillena jítaiñedicue.

<sup>7</sup> Afe cuemo jino onótaga raa iere jamánomo ebire cioide. Ie jira áfedo jamánomo abina cue íñoñeillena, duere zefuítacue. Afe duere cue zefuilla come abimo eedo llúina izoide. Afe eedo, Taife come izi cácatate raa izói, cuena duere finuaíbite. <sup>8</sup> Bie duere cue zefuilla

raa cai Ocuíraima oni oréllena dacaiñoámani íemo jicádícue. <sup>9</sup> Mei íadi cai Ocuíraima cuena daide: Cuemo ite o cue cáimadofirena nana omo comuide duere zefuilla o ocuállena ñue cánoite. Mei daa come náinina llezica, cuemo ite ñuera ríino afémiedo ñue jino ácatarede,” daide. Ie jira cuena náinitade raari ióbidícue, afe daí Crístomo ite ríino cuedo jino ácatallena. <sup>10</sup> Mei jira cue náininari ióbidícue, íemo comini cuena báñuari ióbidícue. Daje izói raana cue jitáillari ióbidícue. Afe izói cue duere íaiói finóacanari ióbidícue. Iemo Cristo ícoinia féiredífuiaí cuemo comuillari ióbidícue. Mei jamánomo íaiói cuena uáitaacana llezica, afe llezica Juzíñamui cue cánuado comécina jamánomo íociredimiena jáidícueza.

*Coríntomo ite Juzíñamuimo jaináidínomo Pablo comeci úicafírede*

<sup>11</sup> Dama cue abí ífuedo cue úricaillamona uáiritaidimiena jáidícue; mei íadi daí cue úrillena cuena ocuíoide izói itíomoi. Mei daní omoi ja birui cuedo ñue úiredíomoi; mei ráifíñedicue ia, omoi cígido jaide Cristo óreñega jamánomoidino jofófenemo ráifíñedicueza. <sup>12</sup> Naui omoi cígido járitaiñeno fíaicana táijidícue. Afe cue táijicaillaruiamo jíáiena onótate raana finódícue naa cíórainina ráaniairi. Afe dáaruido ebire cáimacaitate ráaniaina finódícue, nana bífuiaido Cristo ua orécamedícue daíllena. <sup>13</sup> Jíáie Jesumo jaináidíno cígiri cue illa llezica, cue jitaica raana raiñódícue; mei íadi omoi cígiri afe izói iñédícue. Daa bífuedo jíáie ínotino jofófenemo ómoimo comécidícue. Afe ómoimo cue raiñóñena dibénedo ómoimo fieni cacáiadi áfemona meine caimare cue uáidori.

<sup>14</sup> Ja birui dacaiñoámani omoi cue eróizaibillena finóbidícue. Iemo omoi cígimo cue íllena ómoimo juare fínoñeítícue; mei ómoimo ite úcube cúeiena máñuaibiñeítícueza. Mei jíáfodo daní omoi Juzíñamuimo ñue jaináitallena bíítícue. Mei uafue, éicomini úruiaí íena úcubena ofítarena. Uruiaí ie moo íena ofítanide. <sup>15</sup> Omoi comeci ñue íllena dama cuemo ite díga caimare fúitaitícue. Daje izói ómoiri cuemo ite máriena jeruíño fúitaitícue. Omoína jamánomo cue izíruiadi ¿afe íbana meita omoi jofófenemo cuena izíruiaredíomoi? Daítañede mei íadi birui afe izói ómoimona dáarie cuena daí finódiaíoi.

<sup>16</sup> Nana ómoína cue llótaiuaibiñedicue. Afena ñue fairíotíomoi; mei íadi afe méífomo dámierie jíáfodo daídíaíoi: “Irebaimo jíta izói caina bífuiano úcube ote,” daídíaíoi. <sup>17</sup> Naui ómoimo cue orécamacimona, ¿meita cuemo izájillena dámie ómoína bífuiano úcube ote? ¡Oñede! <sup>18</sup> Omoi méíñuaillena Tito izire jicádícue. Afémiedo daa jíáie ama orédícue. ¿Meita afe Tito úcube óllena ómoína jífujete? ¡Daítañede! Tito, íe nabai, íemo cue, cue macáfírena izói, daje izói nana macádicaí, ¿ero ua? Dájena ñue comécillado táijifíredicaíza, ¿ero ua?

<sup>19</sup> “Caído abí ríidotio,” níbaí caina comécido daídíomoi. Mei íadi afe izói jóíñede. Mei jíáfodo Juzíñamui eróicana Crístomo jaináitagamie izói úriticaí. Mei cue izíruiaga ámatiaídíomoiiza, nana bie izói cue daína omoi comeci Juzíñamui dibénedo ñue móonaillena llotícue. <sup>20</sup> Mei omoi diné cue bille llezica cue comeci óiacana izói iñédíomoi cue cíoizaibillena jacíruitícue. Iemo afe íbana omoi comeci óiacana izói iñédícue cue omoi baizájillena jacíruitícue. Iemo dájena ñue omoi jaináiñenamo jacíruitícue. Daje izói omoi íradoifírenamo jacíruitícue; íemo jíáimana omoi ícífírenamo jacíruitícue. Iemo afe llezica jíáimana duéruiño daní abí omoi úcificaiillari jacíruitícue. Iemo jíáima uaita uai omoi llófírenari jacíruitícue. Iemo jíáimaci jánari omoi úrifírenari jacíruitícue. Daje izói fieni abí omoi ínofírenari jacíruitícue. Iemo ocuícana náfueñedíno izói fieni ebena omoi ífírenari jacíruitícue. <sup>21</sup> Iemo jíái uire omoi cue éroizaibille llezica omoi daí íllari cue Juzíñamui ómido cuena meáidaitalleri jacíruitícue. Iemo afe llezica níbaí aillo ómoiri cue éeiri jacíruitícue, mei jaiái nínómona díga fíénidífuiaí omoi fíñuari éedícueza. Mei ómoimona aillo nai íaíomoi ite íaífuiaí féitañediaíoiiza. Daje izói íaíomoi ite jíruiífueña fáicanocaiñediaíoi, íemo íaíoi comécina jíríoiide fieni finócafuaí oni níne féitañediaíoi.

## 13

*Pablo írtaicaiño íaiói uáidua uai, íaióimo llonódacaiga uai diga llote*

<sup>1</sup> Naui ménacaiño omoi méiñuaidicue. Ja birui nane meine omoi méiñuaibiticue. Onódiomoiza, naga júfidoga rafue mena, nibai daámani uai nabáiraini daje izói úriadi, afe júfidogafue ñue záide. <sup>2</sup> Naui méifodo omoi cue méiñuaibilla llezica, nana naui uícodo fieni itínona duere cue finóllena llonódacaidicue. Birui benó jica cue illa llezica dáanomo naui ómoína dama cue dáinana llóiticue: “Uire nane omoi cue méiñuaibia naui uícodo fieni itínona naa ómoiri dúecaiño duere fínoiticue,” daidicue. <sup>3</sup> Iemona omoi jenoca Cristo cuedo úrilla onótafirena raana ñue ónoitiomoi, mei áfena jenófirediomoiza. Omoiri Cristo náinidimie izóíñedeza, afémie ríinorede, Cristo omoi diga jifáñoñedeza, ríiredimieza. Omoína ñue rairuíoide. Omoi cígiri íemo ite ríino jino cíotate. <sup>4</sup> Uáfueza, Cristo náinidimie izói cruzmo coraica, mei íadi birui afémie Juzíñamui ríinodo caade. Afe daí Cristo náinina izói dájena náinidicue, mei íadi dájena afémiemo cai jaináillado Juzíñamui ríinodo íiticue, omoi ñue cue finófireillena. <sup>5</sup> Mai dani ñue abina omoi onoiri. Afemo, mai ñue comeci omoi facari, Juzíñamuimo ñue íinoga uai iere jeire omoi úana omoi onóillena. Omoi comeci ifue facada ñue jónefireiri. Jesucristo ómoiri íllamo ¿meita áfemo comeciñediomoi? Mei nibai jíáfodo jóide. ¿Meita táinona ínotiomoi? ¡Afe daí íñeiteza! <sup>6</sup> Mei uáfueza, cai bie táinona llotimieñedicue. Afemo ñue omoi comeciocaillemo ocuáridicue. <sup>7</sup> Iemo afe llezica fiénidifue omoi fínoñeillena Juzíñamuimo jicáfiredicue. Daa ñúefue dibénemo omoi íllena jicádicue. Mei íadi ñue jaícina llófuefiredimie cuena daííllena jicáñedicue. Dámie “Jaícina lloñedio” dáíadi áfena llóñeiticue. Ñúefuemo omoi ille comini cueri dáinana baímo ráífide. <sup>8</sup> Jaca ua uai jeire omoi oíadi úaitañeiticue; ómoína lletánidicue. Mei jíáfodo afe uaina nabáiredicue. <sup>9</sup> Ie jira ómoína cue lletáninamona náinina cue cíoiadi, áferi caimare íóbidicue, mei afe llezica omoi ñue comécina náirediomoiza. Iemo nífuenino ñue jaícina omoi íllena jaca jicáoifireitícue. <sup>10</sup> Nai omoi cue méiñuaibiñena llezica, bibe uícodo ómoímo cueticue, uire ómoímo cue bíadi omoi diga riire cue íñeillena. Uáfueza, omoi riire cue lletalle ríino Juzíñamui cuemo iga. Mei íadi omoi cue táinocaitallena cuemo íñega. Mei jíáfodo Juzíñamui dibénemo omoi comeci ñue cue móonaitallena cuemo iga.

<sup>11</sup> Cue ámatiai, ñue íitíomoiza. Dani nífuenino jaícina omoi illínomo omoi comeciiri. Bie ómoímo cue lloga uai náfuiano, conímama omoi náicaitaíreiri. Conímamo dájerize caimare omoi comeciíreiri. Daje izói jíái dájena ñue uái illífue omoi iri. Iemo cai uái illífue comuítate Juzíñamui omoi diga ífireite, íemo ómoína ie izíruifirenana ónoitiomoi.

<sup>12</sup> Caimare conímama omoi uáidori. <sup>13</sup> Nana benó ite dájena Juzíñamuimo ínote cai ámatiai ómoímo uai orédiaíoi.

<sup>14</sup> Ja birui cai Ocuárima ómoína ñue fínoiteza. Daje izói Juzíñamui ómoína izíruifireiteza. Iemo Ñuera Joreño ómoína nabáioicaiteza. Daítadeza. Jae ñie.

## GALACIA ENĒ IMACIMO SAN PABLO ORECABE

### La Carta del Apóstol San Pablo a los Gálatas

*Pablo, Galacia éniemo ite Juziñamui uaimo ñnofiredinomo cuete*

<sup>1</sup> Cue Páblodicue. Juziñamui ñúefue llujillaena orécamiedicue. Dani comini cuena jóoniamona llujañedicueza. Daje izói comini cue óriamona llujitagamieñedicue. Mei íadi dama Jesucristo llujitagamiedicue. Daje izói afe Jesús tíidinomona meine abido cáatate Moo Juziñamui llujitagamiedicue. <sup>2</sup> Nana Galacia éniemo ite Juziñamuimo gairifiredinomo bibe cueticue. Daje llezica nana cue diga ite ámatiai uai orédiaioi. <sup>3</sup> Moo Juziñamui fecaca comécina uái illafue dibénemo mai omoi iri. Cai Ocuíraima Jesucristo afe bífuiaí daje izói caimo llote. Aféfuiaí dibénemo mai omoi iri. <sup>4</sup> Mei afémie, cai fiénidifuaí dóllena, titállimiena dama ie abina izájide. Daií cai Moo Juziñamui jitaina izói, afémie ie abina izájide, bie fiénidiruillaímona oni cai jirecaltallena. <sup>5</sup> Juziñamui daií cai jíllojamona, afémiena “Jamánomo cáimamedio” mai cai daiílli. ¡Afémie jaca daií íteza! ¡Mail!

*Abí dine cai jílloille uaina jaca iñede*

<sup>6</sup> Juziñamuina raíre omoi zóofiailla uai, cuena fáigacaitade. Zóofiano, ja jíáie táinomona lloga jíáfodo joide fia daina jíllo uaimo íacadiomoi. Aferi fáigacaidicue. Mei Juziñamui, Cristo caína izíruillado omoi jílloillena, jae caimare ómoína uáidoteza. <sup>7</sup> Uáfuea dáitícue: abí diné jíáie jíllo uai jaca iñede. Mei íadi dáarie ómoína áfedotimaci, cai bie Crístomo ñnuamona cai jíllo uaina, jíáfodo feire méidoacadiaioi. <sup>8</sup> Mei íadi jíáie come afe cai jíllo uaina uáitajano, jíáfoidifue ómoimo llóyadi, mei dama Juziñamui afémiena fáidoiteza. Nibai dama cue daií jíáfodo llóyadi, Juziñamui faidóllícueza. Daje izói monámona biite Juziñamui abí ímie daií llóyadi, mei Juziñamui íena fáidoiteza. <sup>9</sup> Nauí ómoimo cue llua izói, birui nane daje izói daidicue: Dinó omoi jíáfodo llófueacadino cáimona omoi cacana jílloafuea afémaci uáitaiadi, mei afémaci Juziñamui faidólliaioiza.

<sup>10</sup> Bie riire cue dánado ¿mei nibai comini bífueticue cue íaioi cáimadollena? ¡Mei íeñede! Dama Juziñamuina íóbtaacadicue. ¿Mei nibai comini uícori fígomiena íacadicue? ¡Daje izói íeñede! Comini uícori fígomiena nai cue íacaiadi, mei Cristo táijitagamiena ínidicue.

*Pablo Juziñamui ñúefuea llujitimiena jáillafue*

<sup>11</sup> Mei ámatiaína ja maméidiomoi, ja bífuea nane omoi uíbitaticue: Cue lloga jíllo uai comínimona comuíñede. <sup>12</sup> Daje izói aféuaina comínimona cacañedicue. Ua áfena bu llófueñegacue. Mei jíáfodo aféuaina dama Jesucristo onótacacue.

<sup>13</sup> Nauí judíuaí ñnogafuaimo cue jainaina llezica, cue illáfuea jae onódiomoi. Aféruído Juziñamuimo gairifiredinona iere duere íaioi cue finóllena riire cue rácajana fidídiomoi. Daje izói nana íaioína niné cue táinocaitallinona onódiomoi. <sup>14</sup> Afe llezica, cue uzútiaí daínauaillaimo iere izire cue jaináiacanamona, judíuaí ñnogafuemo baímo baitádimiena jáidicue. Aféfuemo comécina iere fígomiena jáidicue. Ua aillo cai judíuaímona, daane cue comuíllagimamona baímo fibídimiena jáidicue. <sup>15</sup> Mei íadi nai cue jócoñenia, Juziñamui cuena nízedede. Daií níziano, iere cuena ie izíruillamona, cuena uáidote. Cue ie uáidua mei, ie óiacana izói, ie Jitona cue onótate. <sup>16</sup> Ua, ie Jitona cue onótate, afe Jitó cue onónamona Juziñamui ñuera jíllo uai judíoñedino cígimo cue llujillaena. Daií Juziñamui cue uáidotemo, bumo nífuea “Mai cue llofue” jicánoñeno, dama oni Arabia éniemo raíre jáidicue. <sup>17</sup> Ua, Jerusalemo ite nano cue uícomo uáidoga Jesús ñúefue llujitinomo



úrizañeno, raire oni Arábiamo jáidicue. Diga irui dinomo cue illa mei, abido Damáscomo biticue.

<sup>18</sup> Afe llezica Jerusalemo are nai jáiñedicue. Dafimonaámani dinomo cue fuita mei, Jerusalemo jáidicue, Pedro diga cue úrilla. (Afémie jáifo mameina Cefas.) Aféruimo dama Pédrona ñue onódicue. Quince dígarui ie diga nabáiricadicue. <sup>19</sup> Aféruillaído jáie Jesús ñúefue llujáitimacimona dámie ciódicue; afémie Santiago, cai Ocuíraima ama. <sup>20</sup> Juziñamui eróicana úriticue: Bie ómoimo cue cuega nahí uáfueza, daidicue.

<sup>21</sup> Afe méifodo Siria éniemo naa Cilicia énie diga jáidicue. <sup>22</sup> Judea éniemo ite Crístomo gairífredino nai cue uiecona onóñediaioi. <sup>23</sup> Dáafuena fididiaioi. Afefue bie izói daide: “Jaii cai fállena cai racádimie, ja birui cai ínollifue llocana uite. Jaii jáiruido aféfuena afémie nine táinocaitacade.” <sup>24</sup> Iemona cuedo Juziñamuimo ñúefue jónetiaioi.

## 2

### *Jiáie Jesús orécamaci ja Pablo caimare uáidotiaioi*

<sup>1</sup> Catorce fimona fuilla mei, Bernabé diga meine Jerusalemo jáidicue. Afe dáaruido Tito uiticue. <sup>2</sup> Juziñamui cuena daina izói dinomo jáidicue. Dino Jerusalemo Juziñamuimo ínnotino ocuífiredo jalléidino dáarie ite. Iaiiori oni eneno fueñe dánomo gairídicue. Dinomo judíoñedinomo cue llófirega jílona uai íaioimo jino lloticue. Bie izói íaioimo llujáidicue, nana cue llócaigafue táinomo fáifiñeilla; daje izói birui jino cue llogafue táinomo fáifiñeilla. <sup>3</sup> Aféruído cue nabai Títone judíuai lloga uai izói, finóñediaioi; afémie judíoñedino íadi, ie bacano icoi quetátañediaioi. <sup>4</sup> Afe llezica dáarie táinona llote ámatiai, báinino cai cígimo dúcidiaioi. Afémaci Tito bacano icoi quetácadiaioi. Afémaci cai cígimo uíñodoimaridiaioi, rairuínino cai íllana onóilla. Mei ja birui Jesucrístomo cai jaináinamona, Moisés ocuica uáimona uáfodo jirénogacaiza. Afémaci nane abido áfemo caina izire rairuícana izói finócadiaioi. <sup>5</sup> Mei íadi íaioi llógana naado jeire oñédicaí, mei oni íaioi taino llujáfue abina uitátañedicaiza. Daií íaioina jieruñédicaí, mei ua jílona uai jaca jeire omoi óllena, iere jitáidicaiza. <sup>6</sup> Mei íadi afe Jerusalemo ite ocuífiredo jalléidino comue jáifuena cuemo lloñediaioi. Afémaci jalléinafuena figo náfuñedicue, mei onódicueza: Juziñamui, fia jinofe ífuena riire jicánoñede. Mei jáifodo afémie naga cómemo dájerize ñue jáicina jicánoite. <sup>7</sup> Ua, jáie cómofuena cuemo lloñeno, dama cue llujáigafue ñue jieruítiaioi. Ñuera jílona uai, judíoñedinomo cue llócailla Juziñamui cuemo jóniana como fididiaioi. Afe uícomo daje ñuera jílona uai judíuaimo Pedro jino llócailla fididiaioi. Afe táijina Juziñamui Pédro jónete. <sup>8</sup> Mei uáfueza, Pedro ória izói, cue jái orécacue. Daje Juziñamui Pedro judíuai cígimo oreca. Ie mei daje Juziñamui judíoñedino cígimo cuena orede.

<sup>9</sup> Aféruillaído Santiago, Pedro, Juan diga nanoide ocuídino. Bie ñuera táijinafue Juziñamui cuemo jóniana íaioi fidinamona, cócona Bernabé diga caimare uáidotiaioi. Daií cócona finódiaioi, ja nana dáamacidicaí daiíllena. Iemo, afémaci judíuai cígimo táijizailla llezica, coco jái oni judíoñedino cígimo táijizairedicoco. Daií cócona daiírediaioi. <sup>10</sup> Daa rafue cócomo jicádiaioi: “Mai jaca féitañeno, duéredinomo comeci ómicoi uíbifireiri,” daidíaioi. Afefue cue finóllena jaca járitaifiredicue.

### *Antioquía jófue Pablo Pédrone lletade*

<sup>11</sup> Mei jáiruido Pedro Antioquía jófue dúcia mei, íemo eróicana íena riire lletádicue, mei rairuiredifue ie finua jira. <sup>12</sup> Fueñe afémie judíoñedino diga güizájifiredo. Mei íadi Jerusalemo ite Santiágo jaináidino dúcina llezica, afe Pedro judíoñedino diga dánomo abido güizáñede. Iaiomona jirecaillano oni eneno ífiredo; mei Jerusalémona bite bacano icoi quétafue llotínona Pedro jacíruiteza. <sup>13</sup> Afénomo Jesumo ínnote jáie judíuai ite. Pedro oni eneno jáillana íaioi cóillano, afémaci daje izói judíoñedino cígimona

oni jirecaidiao. Iirainomo jiaí Bernabé íaioi fiénide oni jirecaillamona daje izói jirecaide. Afefue jiaímacina jífueoicaide. <sup>14</sup> Mei íadi, ñuera jíllona uai ua ðaina izói íaioi iñénana cue cíoullano, nana dáanomo gairídino eróicana Pédrona daidicue:

—O judíoño, mei íadi benomo judíoñedino illa izói itio. Benomo judío illa izói iñédio. ¿Ñibái mei birui judíoñedinona judíuai illa izói jóoneacadío? —dino Pédrona lletádicue.

*Nana jiaíe comini izói, judíuai Crísto íaioi ñnogafuedo jíllorediao*

<sup>15</sup> Cai bie jaca jocóinanomona judíuaidicai. Juzíñamuimo comécifiredicai. Judíoñedino Juzíñamuimo comécina facáñediaioi. Iemona fiénidifuiaredinona itíaoi. Cai afémaci izóiñedicai. <sup>16</sup> Mei íadi onódicaiza: Moisés ocuica uai iere ñéfinamona, buna Juzíñamui anamo ñue jaícina ínide. Mei dama Jesucrístomo dánirre íaioi ñnuado illa dígamie daí jaícina írede. Iemona judíoñedino izói, cai daje izói, Jesucrístomo ñnoticai, afe íemo cai ñnogafuedo Juzíñamui anamo ñue jaícina cai íllena. Uafue, Moisés ocuilla uai iere ñéfinamona buna ñue jaícina ínide.

<sup>17</sup> Birui cai judíuai cígimona dámie Crístomo ie ñnogafuedo Juzíñamui anamo ñue jaícina íacaniadi, bie izói daírede: “Judíoñedino izói fiénidimiena iticue” daírede. ¿Meita bífuemona “Cristo fiénidimacina caina itátate” daírede? ¡Daínide! Mei Cristo jaca buna fiénidimiena itátañedeza. <sup>18</sup> Mei jiaífodo, nauti niné cue táinocaitaga Moisés ocuícáfue, meine abido jeire cue óiacaiadi, ua cue fiénidena uáfori jino cíotaiticue. (Mei afefue iere cue ñéfinamona Juzíñamui anamo ñue jaícina ínidicueza.)

<sup>19</sup> Afe Moisés ocuícáfue ja cuemo dúíñede. Da afe uai jeire cue oñenamona cuena titade izói finode. Afe Moisés uaimo cue dúíñenamona, ja Juzíñamui dibénemo, tíllanomona meine cáadímie izói iticue. <sup>20</sup> Cristo nauti cruzmo coraica tilla izói, ja birui tíide izói finócamiedicue. Iemona ja birui cue cáanano dama cúeieñede; Cristo cuemo íllado cáadícue. Afe bie éniemo ite bie cue cáanano, dama Juzíñamui Jitomo cue ñnuado ófiredicue, mei afémie cuena izíruillano, dama ie abina cue meífomo cruzmo tízaideza. <sup>21</sup> Juzíñamui cue jílloullena caimare cue cánuafuena jaca ruifruiacañedicue. Mei dámie Moisés ocuica uai jeire úamona Juzíñamui anamo ñue jaícina ítenia, Cristo tílla ráifiñede.

### 3

*Moisés ocuica uai comini ñnogafue abido joide*

<sup>1</sup> Aí, Galacia comini, iere abina onóñedinona itíomoi. ¿Bu aima izói omoi bífua, ua uaina omoi jieruiñeíllena? Nauti ómoimo cue lluaruido, coraica Jesucristo jino uáfodo ómoimo fidítaticue. <sup>2</sup> Mai bifue cuemo omoi lloíri: ¿Nífuedo afe Ñuera Joreño ómoimo ite? ¿Meita Moisés ocuica uai jeire omoi úado ómoimo ite? ¡Íñega! Mei jiaífodo, ¿omoi cacana uai omoi ñnuado afe Ñuera Joreño nibai ómoimo ite? Jí, áfedo ite. <sup>3</sup> ¿Ñibái mei iere abina onóñedinona itíomoi? Jesumo omoi ñnua mei, Juzíñamui Ñuera Joreño nanómona ñue omoi canode. Afémie ómoína canode ñue jaícina omoi íllena. ¿Meita ja birui afe cánuana zóofiano dama ómoimo ite ríinodo nibai ñue fúitaitiomoi? ¡Jaca fuitánidiomoi! <sup>4</sup> ¿Nana omoi duere zefuillafue jaca ómoimo nibai ráifiñede? ¿Ñibai taino abiri aféfuiai ómoimo daí íficaide? Aféfuiai táinona íllamo comécíñedicue, mei daítañedeza. <sup>5</sup> Nauti Juzíñamui ie Ñuera Joreño ómoimo fecade. Iemo Juzíñamui omoi cígiri uaido finoca cíorainina raana comúitate. ¿Mei nibái bífuiaína Juzíñamui ómoimo finode? Ocuica uai jeire omoi úamona, afémie aféfuiaína finóñede. Mei jiaífodo dama cúemona omoi cacana uai omoi ñnuamona afémie bie izói finode.

<sup>6</sup> Abraham Juzíñamuimo ñnote; íemo ie ñnuamona comécina ñue jaícina jóidimiena Juzíñamui íena caimare uáidote. <sup>7</sup> Ja bífuemona onórediomoi: Nahí Abraham erófene

igímaiaí Juzíñamuimo ínotino. <sup>8</sup> Juzíñamui nana uire ie finóllifuiaina raire uícodo onode. Iemona ie Cuegáuaido aféfuiaína afémie jino llote. Nana íemo uire ínotino judíoñedino íadi, Juzíñamui anamo ñue jaícina itátaillifuena Juzíñamui raire uícodo onode. Afena ie onónamona bie ñúefuiaí jaiaí uícodo Abrahana daide: “Naga náiraiaí ómona ñúefuemo ézicilliaíoi,” daide. <sup>9</sup> Mei daí nana Juzíñamuimo ínotino dájena Juzíñamuimo ínote Abrahámoiri ñúefuemo ézicilliaíoi.

<sup>10</sup> Nana íaíoi jílloillena Moisés ocuica uaimo ínotino ja fiene faidócaiaíoi. Mei daí Juzíñamui Cuegáuai dáideza: “Nana Cuegánicomo ite ocuica daínafuena, nágari ñue fuitáñedino ua fiene faidócaiaíoi.” <sup>11</sup> Bífue mona ñue onódicaíza: Ocuica uai iere ñéfinamona buna Juzíñamui anamo ñue jaícina jóoneñega. Mei jiáifodo Juzíñamui Cuegáuai daide: Juzíñamuimo ie ínogafuedo Juzíñamui anamo ñue jaícina jóonegamiena jáidimie, afe daa ie ínogafuedo are zíñona íte. <sup>12</sup> Afe Moisés ocuica uai comini ínogafue abido joide. Bíuailaina ñue ícoimo fuitáacadimie, aféuailaido írede.

<sup>13</sup> Ocuica uai caí faidóllifuemona Cristo caína oni jírecaitade, mei afémie caí ícoinia faidóbideza. Juzíñamui Cuegáuai bie izóí daide: “Naga aménamo agüñeta fagámie faidócaza.” <sup>14</sup> Bífue daí íficaideza, judíoñedino ñúefuemo ézicillena. Ua Juzíñamui Abrahamo lloga ñuera ézicirafue daí Jesucristodo judíoñedinomo fecaca. Bífue daje izóí íficaideza, Juzíñamui uícodo lloga Ñuera Joreño caí ínogafuedo caimo íllena.

### *Moisés ocuica uai, Juzíñamui Abrahana daínana oni caitánide*

<sup>15</sup> Cue ámatiaí, naga come onóigafuemona dafue ómoimo llóiticue: Dámie contrato llínoiadi, ie mámeceí afébemo cuega, íemo afe ja cúegana buna oni caitánide. Daje izóí afe cuega baímo buna jiáíuaina zotánide. <sup>16</sup> Ja onódicaíza: Afe ñuera uícodo lloga uailaí Abrahamo Juzíñamui jaiaí llote; daje izóí Abraham erófene ímiemo lloga. Aillo ie erófene igímaiaímo Juzíñamui Cuegáuai daíñede, mei jiáifodo “O erófene ímiemo llóiticue” daide. Afe daínámie Cristo. <sup>17</sup> Cue llogafue bie izóí joide: Juzíñamui riírede méidoñega uai Abrahamo llote. Afe llezica afefue féiñeillena Juzíñamui afe uaina riire jóonete. Afe lloga uai contrato izóíduai; jiáifodo méidonideza. Ie jira cuatrocientos treinta diga fimona záilla méifodo Moisés lloga ocuica uai, uícodo Abrahamo lloga uaina oni caitánide. Daje izóí méifodo ocuica uai, uícodo Juzíñamui lloga uaina ráifitanide. <sup>18</sup> Juzíñamui daínamo ie ínuamona Abraham jílloide. Afe bie méidonide Abraham jílloilluaina Juzíñamui raiñoñeno íemo fecade. Iemona afe jílloina uai, Moisés ocuica uaimo jaínáíñede. Moisés ocuica uaimo jaínáíadi, aféuai ja uícodo lloga jaca raiñoñeno iga raa izóíñede. <sup>19</sup> Iemona, Moisés ocuica uai ¿niemo ráífide? Afe ocuica uai méifodo baí nabaica, comini íaíoi finoca fiénidifuiaina onótallena. Afe nabaica uai are íñede. Ñúefuena lloga Abraham erófene ímie Cristo bíllamo, afe nabaica uai záide. Afe ocuica uai monámona Juzíñamui abi imácido lloga. Iemo íaíoi llua mei, Moisés aféuaina jino comínimo llote. <sup>20</sup> Juzíñamui Abrahamo úrilla llezica jiáímado Abrahamo lloñede. Dámie daí uáfodo úriadi, jiáie llóitimiena jítaiñede. Bie Abrahamo úritimie daade Juzíñamui.

### *Moisés ocuica uai ¿nié izóí comínina canode?*

<sup>21</sup> ¿Mei nibaí bífue daíacade Moisés ocuica uai, Juzíñamui lloga ñúefuiaina uáitaacade? ¡leñedeza! Uáitaacañede. Mei cáataite ocuilla uai ígadenia, aféuai jeire caí úado Juzíñamui anamo ñue jaícina íredicaí. <sup>22</sup> Mei jiáifodo Juzíñamui Cuegáuai daína izóí, nana fiénidifue mo llavécanodicaí. Daí Juzíñamui uícodo mamede, nana Jesucristomo ínotino jíllobicaillena. Uafue, Juzíñamui afe bie izóí mamede Crístomo ínotino íaíoi ínogafuedo Juzíñamui lloga ñuera jílloñafuena íaíoi óllena.

<sup>23</sup> Jesumo caí ínogafuena naí jino déiñena llezica, ocuica uai caína llavécanona finode. Aféruillaido Jesumo caí ínollifue jino déillemo ocuírídicaí. <sup>24</sup> Iemona Juzíñamui afe ocuica

uaina caimo mamede, cai ñue rairuillena. Ua úruiaí ñue fibítatimie izóí caina rairuide. Daií afe ocuica uai caina úiñoide; nai Cristo bíñeille dino. Afe daií Cristo bíllemo afémiemo cai inuado, Juziñamui anamo ñue jaícina íredicai. <sup>25</sup> Birui ja Jesumo cai inollifue déideza, ja afe Moisés lloga fibítatiuai dibénemo dúñedicai.

<sup>26</sup> Mei Jesumo omoi inogafuedo, ja omoi nana Juziñamui úruiaídiomoi, ja Cristo Jesumo dájena jaináidiomoi. <sup>27</sup> Omoimona báutiza mei Cristo Jesumo dáena jainaide dieze, nana omoi afémie comeci ífueña ja jeire otíomoi. <sup>28</sup> Ja biruímona cai cigiri bie judíona dainámiena ñede, bie Griego dainámiena ñede. Daje izóí llavécamienna ñede. Oni eneno jirénoga dainámiena ñede. Afe izóí ringo ima diga oni jaífodo mámeñega. Ja Cristo Jesumo cai jaináinamona nana cai dáamacidicai. <sup>29</sup> Ja Cristo íediomoi, Abraham erófene igima izóidinona jaídiomoi. Iemona Juziñamui Abrahamo uícodo lloga ñuera jilloillifueña, feci raa máñua izóí, máñoitíomoi.

## 4

<sup>1</sup> Bie izóí cue daiíacanafue: Daa come jitó mónaillano, ie moo tílla mei, moo raana náamatarede. Mei íadi afémie nai úruena llezica maiñónide. Afémie nai jofo eromo ocuífregamie izoide, afémie nana afecho raana maiñóreite íadi. <sup>2</sup> Afémie nai úruena llezica, íena úiñoitino ite, ie moo jaífodo ie úiñoitnomona oni olle dino. Daje izóí ie jetállifue ocuidino ite. <sup>3</sup> Jaca bie izóí caimo comuífiredo. Cai jilloilliuai nai déiñena llezica, nai úrue illa izóidicai. Aféruillaído aillo bínie comini nícidogafuiaí anamo, izire ocuícano izóí, iticai. Dáarie cómemona ocuica uáillaído llavécacai. <sup>4</sup> Mei íadi nana Juziñamui mamécafuiaí ñue zuilla mei, jaiaí uícodo ie mámiarui dúciamos, Juziñamui ie Jitó Jesús orede. Afémie ringómona jococa. Moisés ocuica uai anamo judío izóí comuízaíbite. <sup>5</sup> Afémie daií bite, nana Moisés ocuica uáillaído llavécano aféuaimona oni jirecaitallena. Daií cai jirecaillamona Juziñamui dama ie jitótiaína cai jaíllena cai mámano, caimare caina uáidoite.

<sup>6</sup> Iemona, ie jitótiaí omoi íllana omoi onóillena, Juziñamui ie Jitó Jesucristo Joreño omoi comécimo orede. Afe caimo oreca ie Joreño riire daiífiredo: “¡Cue Moo!” daide. <sup>7</sup> Mei daií o ja Juziñamui jitódio. Ja riire ocuícamiñedio. Ie jítóna o íllamona, ie uícodo lloga ñúefuiaína Juziñamui Cristodo omo fécaite.

### *Pablo Juziñamuimo inotímacimo comeci úide*

<sup>8</sup> Nauí Juziñamuina nai omoi onóñena llezica, taino juziñamuillaímo izire ocuífreganodiomoi. Afe omoi llaveina juziñamuillaí ua juziñamuíñede; fia jífuaí juziñamuillaí. <sup>9</sup> Mei birui ja ua nahí Juziñamuina onódiomoi. Mei jaífodo ñue daina, Nahí Juziñamui ja ómoína onode. Ja íena omoi onónamona, ¿nié izóí meine abido afe riínide jilloñenafuiaína jeire óiacadiomoi? Dáanomos íaíoi llavéinanomos ¿meita abido jaírediomoi? <sup>10</sup> Diga iruillaí oni jaífodo nai coméciífirediomoi. Daje izóí diga fiuillaí eneno jaífo coméciífirediomoi, naa diga fimónaíari. <sup>11</sup> Nibai nana omoi cigiri cue tájiacana táinomos jifánofide izóideza áfena jacíruiticue. (Afe cue comécina lícioide.)

<sup>12</sup> Amatiaí, izire jicádícueza: Cue comeci ífue illa izóí, mai meine afe izóí omoi iri. Mei cue omoi illa izóí jae itícueza. Mei omoi cuemo minícana fiénidífueña finóñediomoi. <sup>13</sup> Cue omoi cigiri nano illáfueña onódiomoi. Aféruillaído, cuemo comuide duícori duere cue zefuillamona afe jillona uai jino ómoímo lloticue. <sup>14</sup> Afe cuemo ite duico cue facátaina, mei íadi afe jira cuena jamairuiñediomoi. Daje izóí cuena ruifíruíñediomoi. Mei jaífodo Juziñamui abí ímie izóí caimare cuena línotíomoi. Ua Jesucristo omoi líñolle izóí cuena caimare línotíomoi. <sup>15</sup> ¿Nee mei afe omoi cacana cáimafuiaí? Afe cue irárenaruímo cuena iere izíruillano, dani omoi uíjina jirénota cuemo fecácadiomoi, íadi fecánide. Afe

ñúefue omoí dibénemo nitáredicue. <sup>16</sup> Ja ua uai ómoímo cue llúamona ¿Meita ja birui omoí bacáuai ímiena jáidicueza? ¡leñedeza!

<sup>17</sup> Afe baie jicana bite comini ómoímo iere caimare coméidiaoí. Mei íadi comeci ñue jítaillamo coméiñediaoí. Omoí bífuellena caimare úritiaoí. Afémaci cúemona ómoína bairóacadiaoí, uire íaioímo omoí jaináillena. <sup>18</sup> Jiáimacimo ñue íllena caimare coméicillana ñuera. Mei íadi cue illa llezica daje izoí cue iñena llezica come comeci ñue jítaillamo daí coméiirede. Daiítadeza. Nauí omoí cígímo cue illa llezica, afe onínemacido daí jífuefiñediomoí; mei íadi birui omoí cígímo cue iñena llezica nágarui jaca daí jífuegaomoí. <sup>19</sup> Cue úruiaí, ringo úrue jocóacania duere zefuilla izoí, nane ómoíri duere zefuícue. Ua Cristo comeci ífue nai omoí ñue ónoñeille dño, nai ómoíri duere zefuíticue. <sup>20</sup> Birui izire omoí cígíri íacadícue, jáífodo ómoímo cue úrillena. Onóñedicueza, nié izoí ómoíri coméiciticue.

### *Abraham aí Sara, ie oga jáíingo Agar íaínguaí ñúefuena caína onótate*

<sup>21</sup> Ja birui Moisés ocuica uai anamo íacadíno úriticue. Mai bifue cuemo omoí llone: ¿Afe ocuica uai dáinana cacáñediomoí? <sup>22</sup> Afe uai daíde: Abraham mena jítórede. Daa jító ie táijítafiregango ie. Jiáie jító ie nahí aí ie. Afengo buna ócuiñegango. <sup>23</sup> Ocuífiregango jocócató nana bíniemo ite úruiaí jócua izoí jococa. Mei jáífodo nahí aí jocócató Juziñamui uícodo daináuai fuitállena jococa. <sup>24</sup> Bifue caí onoiga ráamona Juziñamui caí fidítafue. Afe mena ringo mena contrátomo táijina izóidiaínguaí. Íaínguaímona daa Sinaí idu ie contrato izoide. Afe ocuífiregango jítótíai ocuífieillínona jocócaíaoí. Afe ocuífiregango mámeceí Agar. <sup>25</sup> Afe Agar Juziñamui Sinaí ídumo lloga uai izoide. Afe Sinaí idu Arabia éniemo ite. Afénomo Juziñamui contrato comínido finode. Biruillaí Jerusalén jofue afe jaiái Sinaí idu izoide, (mei Moisés dibénemo íacadíno afénomo gairífirediaíoíza.) Ie ocuica uai anamo llavécanona itíaoí, naa aféfuemo jaináíacadínori. Ocuífiregango Agar úruiaí izóidiaíaoí. <sup>26</sup> Mei íadi monamo ite Jerusalén comini lláveñegaíaoí. Afe jofue caí ei izoide, mei caí bie afe Jerusalemo jaináídnodicaíza. <sup>27</sup> Juziñamui Cuegáuai bie izoí daíde:

Oíniño, úruenidío íadi, mai caimare o iri;

Urue jócua izírenafuena onóñedingo, mai caimare o róiri.

Mei úrue jocóñena jira dotácango, ñue ogángo baímo jítótíaireitío, daíde

<sup>28</sup> Amatíai omoí cácareí, caí bie Sara jító Isaac izóídnodicaí. Juziñamui uícodo lloga jítótíaidicaí. <sup>29</sup> Mei jaiái aféruillaímo íaíllinoí illa izoí, birui afe izoí iticaí. Aféruímo come comeci jítainamona jocócamie Ismael, afe Juziñamui Joréñodo jocócamie Isaacina fiénidífueña racade. Biruillaí afe izoí iticaí. <sup>30</sup> Mei Juziñamui Cuegáuai ¿nié izoí daíde? Afeuai daíde: “Afe jofuero ocuífiregangona ie jító diga oni orerí. Mei ocuífiregango jító, afe ócuiñegango jító diga dájena jofu naama fecí ráanaína maiñónideza.” <sup>31</sup> Amatíai, bífuemona onódicaíza: Caí bie ocuífiregango jító izoíñedicaí, mei jáífodo caí bie buna ócuiñegango jító izóidicaí.

## 5

### *Izire ocuíñena dibéfuemo omoí ífireiri*

<sup>1</sup> Cristo afe ocuica uáimona oni eneno jirénogacaí, lláveñeganona caí íllena. Afe dibéfuemo ñue jaícina omoí iri. Meine dáanomo izire ocuilla uai anamo abína maitátaiñeno iri, mei lláveñeganona itíomoíza.

<sup>2</sup> Cuemo omoí cacáreiri. Omoí llotímie Páblodícue; jira ómoína dáíticue, bacano ícoí quétafue jeire omoí óiadi, Cristo ómoímo ráífiñeite. <sup>3</sup> Nane ómoína dáanomo daííacadícue: Omoímona dámie ie bacano ícoí quetátaadi, nana jiáie Moisés ocuica uáíllaina ícoímo fuitárede. <sup>4</sup> Moisés ocuica uai jeire omoí úamona Juziñamui anamo ñue jaícina omoí íacaniadi, jae Cristo dibénemo dúíñediomoí. Daje izoí Juziñamui caína izíruíllafuemoná

oni eneno itíomoi. <sup>5</sup> Mei cai jiáifodo onódicaiza: Juzíñamui Ñuera Joreño, daje izói ie uai ñue cai ínuado, Juzíñamui anamo ñue jaícina cai illífuemo úiñoidicai. <sup>6</sup> Iemona daií Jesucristomo ñue jaináidicai. Iemo cai jaináiadi, afe quétafue caimo ráifíñeite. Cai quetátaiadi, nibai cai quetátañeniadi, daje izói ráifíñeite. Mei jiáifodo afémiemo cai ínogafue ua ñue ráifide. Afe bie cai ínogafue jiáie cómena naa Juzíñamui diga cai izíruillena canode; áfemona Juzíñamuimo cai ínogafue iere ráifide.

<sup>7</sup> Fueñe Juzíñamuimo ñue ínofirediomoí. Mei íadi birui, ¿bu afe ua uaina ómoína fáicanocaitaga? <sup>8</sup> Juzíñamui áfena ómoína fáicanocaitañede! Afémié ómoína caimare uáidofiredeza. <sup>9</sup> Bífueña féitañeno iri: Pan finóadi afe aillo fáitate raa tamédiaioi. Due jiza fáitate raa jónega íadi, nana afe magáfecina aillo fáitate. <sup>10</sup> Juzíñamuimo cue ínuano, afémié ómoína ñue rairuillena onódicue. Ja onódicueza, cue daináfueмона oni jiáifodo comeci fácañeitiomoíza. Bífueмона omoi comécina oni nibéfodo féitaitimiena Juzíñamui duere fínoiteza. Afefue llotimiena Juzíñamui raa dáíñeite, afémié nibai illaima, nibai jamáimie.

<sup>11</sup> Amatiai, cúemona jiáifue llóiticue. Mei bacano quétafuena nai ocuídicuena judíuai nibai cuena fállena rácañeitiaioi. (Mei íadi cue íaioi fállena rácana onódiomoí.) Afe izói cue llóíadi, Cristo cruzmo tilla ñuera rafue íaioína rícaitañeite. <sup>12</sup> Mei íadi afe onina bite omoi gáguaibitino dani íaioi jiñíjina, comini meróniai ie ñetaina izói ñétaitaioíza. (Afémaci méaicaillena Pablo daií daide.)

<sup>13</sup> Amatiai, mei jiáifodo uáidogamacidiomoí, ráiruñeganona omoi íllena. Ua ja birui ráiruñeganona itíomoíza, mei íadi afe o rairuñenamona, comécimo fieni itífuiaína finóñeno iri. Mei jiáifodo afe ómoimo ite izíruillafuedo ñuera ocuífreganona omoi iri; daií conímána cánoitiomoíza. <sup>14</sup> Mei nana jiáie ocuilla uailai daa bie ocuica uaimo dájena itíaiioi. Be níuui: Dama o abina o izíruilla izói, afe izói o abi cómena izírui. <sup>15</sup> Mei íadi ómoimona dani conímána fue erodo omoi éoia, daje izói úradoillano conímamo omoi ríicaiadi, ómoína niné táinocaitaiteza; afe izóidemona abí omoi rairuiri.

### *Come comécimo fieni itífuiai Juzíñamui Ñuera Joreñomona jiáifodo jóide*

<sup>16</sup> Ómoína cue dainafue bie izói jóide: Juzíñamui Ñuera Joreño dibénemo mai áfemo omoi illafue jónefireiri. Afedo omoi comeci fieni finóacanafuiai fínoñeitiomoíza. <sup>17</sup> Mei dani cai comécimo comuide fieni finóacanafuiai Juzíñamui Ñuera Joreña uáitafirede. Nane abido dájena Juzíñamui Ñuera Joreño cai comeci fieni finóacanafuiaína uáitafirede. Afe ménafue jaca conímána uáitaofirede. Iemona omoi comeci jitaina izói figo finónidiomoí. <sup>18</sup> Mei íadi Juzíñamui Ñuera Joreño ifócaomoí íadi, Moisés ocuica uai anamo íñeitiomoí.

<sup>19</sup> Comini comécimo fieni itífuiai dibénemo jaináidino íaioi finócaigafuiai jino uáfodo onórede. Be nífue: Afémaci jiruifue íemo íaifue finófirediaioi; jiáie fiénidifue rairuilla uaina náfueñediaioi. <sup>20</sup> Afémaci jánaraimo caimátaifirediaioi. Daje izói fue boréfueña finódiaioi; daje izói jiáimana éoifirediaioi. Dájena caimare íñediaioi; úradoifirediaioi; ráaiñederi raire iere ríicaifirediaioi. “Fueñe dama cúeiena fínoiticue” daiífirediaioi. Cominina bozíetaitatiaioi; jiáimana énenoruidiaioi. <sup>21</sup> Afémaci jiáima raari úradoifirediaioi. Daje izói afémaci cómena titáfirediaioi. Jífairediaioi; fieni jéerie íaioi güilla llezica conímamo riire lléjellejediaioi. Bizóidifuiaina afémaci jaca finócaide. Naui úcodo omoi cue lloga rairuilla izói, nane birui ómoína ráruiticue. Bie izóidifuiiai finódino jaca Juzíñamui illáimana illáruimo jáinaíñeitiaioi.

<sup>22</sup> Mei jiáifodo Juzíñamui Ñuera Joreño cai comécimo bífuiaina cómuite. Aféfuiai bie izói jóide: Izíruillafue, íobillafue, comeci uái illifue, comeci mánaicana úrillafue, comeci cáimafue; jeruíñeno fecáfiredie. Jiáima dainana raire jeire ófiredie. <sup>23</sup> Afémié comeci mánaifiredie; comeci daina izói ie abi járitañeno ñue fáicana ocuífiredie. Bífuiaina

rairuide ocuilla uaina iñede. <sup>24</sup> Nana Crísto mo ja jaináidino, íaioi comécimo nanómona itífuiaina, faga izói, féitatiaioi, naa íaioi comeci fienu finóacanafuiari. <sup>25</sup> Iemona Juziñamui Ñuera Joreño do íredicai. Daií cai íllamona, mei nana cai jetáacagafuemo, afe Ñuera Joreño aféfuemo caina ífoiteza.

<sup>26</sup> Cai bie abina fienu ínonidicai. Afe izói cai íadi, conímaiai diga íciriticai, mei íadi afe izói mai cai íñeilli. Daje izói jiaímari úradoiñeno cai illi.

## 6

### *Conímana omoi canófireiri*

<sup>1</sup> Amataiai, omoimona dámie fiénidifuemo baiízaidenia omoi cióadi, omomona Ñuera Joreño dibénemo izire jaináidino afe baiídimiena omoi canori, meine ñúefue dibénemo ie ílleza. Jaca comeci mánaínafuedo íena canori. Naga come áfemo báíiredeza, ie jira illa dígamie afe baiífirenafuemono abina rairuírede. Taife cai facátafue naga cómemo comuífiredeza. <sup>2</sup> Illa dígamiaiai conímana canófireiri, áfedo jiaímamo zuufue comuíadi ie comeci náirecailleza. Bie izóidedo Cristo ocuilla uaina ñue ícoimo fúitaitiomoi.

<sup>3</sup> Jamáimie illa llezica dámie abi ínota “Jamánomo ímiedicue” daiíadi, afémie dama ie abi jífue. <sup>4</sup> Omoimona illa dígamie dama ie abi áadori. Mei aféfuena o jíeruiadi, dama o abi ífuedo íóbitaitio; mei o illafue ñuera daiíllena jiaíma illafue dibénedo abina fácañeitioza. <sup>5</sup> Illa dígamierie dani caimo itífuiaimo náfuefireitica.

<sup>6</sup> Juziñamui uáillaina llófuegamie nana íemo ite ñuera ráaniaina dieze, meine ibana afe ie llófuetimie mo írede.

<sup>7</sup> Mai jiaífuero omoi jífuefiñeno iri; jaca Juziñamui buna báíñuano jífueñegaza. Naga come ie rífirega raa ríadi, afe llizíllana dama jofo óite. <sup>8</sup> Nanómona cai comécimo itífuiiai íóbitaitifue cai finóadi, afe cai comécimo itífuiaimona cai tíillifue óitica. Mei jiaífodo Juziñamui Ñuera Joreño cai íóbitaadi, afe Joreño mona zíñona cai illifue óitica. <sup>9</sup> Ie jira ñúefue cai fínuana, mai cai zefuíruíñeilli. Mei áfemo fácanocaiñeno comécina náiredinona cai íadi, uire Juziñamui mamécaruimo riga ófirena izói, ñúefuena maíñóriticaiza. <sup>10</sup> Afe jira, ñúefue fínua llezica nana comínimo, nana cai abi ie máriedo ñúefuena finóredicai. Iemo Juziñamui ínote cai ámatiaimo, baimo aillo ñúefuena finóredicai.

### *Abí rairuíllauai, íraicaiño uáiduafe diga*

<sup>11</sup> Mai ómoimo bie jéerie cue cúegamo omoi eroiri. Afe bie dama cue ónoido cue cuega. <sup>12</sup> Afe quétafuena omoi ocuídino ñúefuedo lloñédiaioi. Dama comini uícomo ñue íaioi íllena daií daidíaioi. Daií ómoína ocuídiaioi, Cristo tílla ícoinia jiaímaci afémaci rácaiza daií. <sup>13</sup> Mei afe quetácano, nana Moisés ocuica uai ñue ícoimo fuitáñediaioi. Mei íadi ómoína quetátaacadiaioi, omoi íaioi quetátafuedo abi íaioi ínollena. Afe quétano omoi abimo íllado iere abi ínotiaioi. <sup>14</sup> Mei cúemona dama cai Ocuíraima Jesucristo tíllado abi ínoticue. Abi diné jiaífodo abi cue ínollena iñede. Mei Cristo cruzmo tíllado, nana biniemo ite fiénidifuiiai faga izói cuemo dúíñede. Afe ibana cue aféfuaimo faga izói jaináiñedicue. <sup>15</sup> Mei Crísto dájena cai jaináinamona, ja afe quétafue ráfiñede. Daje izói íemo cai jaináinamona quetáñenafue jiaí ráfiñede. Mei jiaífodo cómuena meine abido jocócamienu cai illa, iere jamánomo ráfide.

<sup>16</sup> Bie izói daináuai jeire otínomo comeci caimare uái illafue íteza. Daje izói Juziñamui ómoimo dúecaillafuemo ítiomoi. Bie izói daináuai jeire omoi óiadi, Juziñamui ua comínina jaitiomoi. Mai mei, Juziñamui ie ua comínina ñúefuemo ézicíteza.

<sup>17</sup> Ja biruímona buna cuena áfeduaibiñeno iri, daidicue. Cue abimo ite boáfiai méifuai, cai Ocuíraima Jesús táijitagamienu cue íllana onótate.

<sup>18</sup> Daje Juzíñamuimo ínóte cue ámatiai, cai Ocuíraima Jesucristo nana ómoina ñue éziçíteza. Mai daiítadeza. Jae nñe.



## EFESO IMACIMO SAN PABLO ORECABE La Carta del Apóstol San Pablo a los Efesios

### *Pablo Efésomo ite Juzíñamuimo ñnotino rabedo uáidote*

<sup>1</sup> Cue Páblodicue. Juzíñamui comeci jitaina izói Jesucristo orécamedicue. Bie izói daina ñúefue llujillena, ie ocuícamedicue. Efeso jófuemo ite Juzíñamuimo jaináidino bie rabedo uáidotícue. Afémaci Jesucristomo ñue ñnotino. <sup>2</sup> Cai Moo Juzíñamui ñue éziciga dibéfuemo omoi iri. Daje izói ie caimare illáfuemo omoi iri. Cai Ocuíraima Jesucristo daje izói ómoína bie ñúefuiaiimo jóneiteza.

### *Crístomo cai jaináinamona cai comécina náiretatífuiái Pablo jino lloste*

<sup>3</sup> Cai Ocuíraima Jesucristo Moo Juzíñamuina ióbitaiticai, mei Jesucristomo dájena cai jaináinamona, afémie monámona nana cai comécina náiretate ñúefuiaiina jae caina éziciteza. <sup>4</sup> Nai énie comuíñena llezica, Juzíñamui Jesucristodo caina nizede, ie eróicana nífuenino ñue finócamona cai íllena. <sup>5</sup> Jaiai uícodo caina izíruillano ie comeci jitaina izói, Juzíñamui caina náamatade Jesucristodo ie jitótaiina cai jáillena. <sup>6</sup> Iemo ie izíruiga jitóoiri dájena cai íllamona, afémie caimo dúecaifirede. Afe jira nágarui Juzíñamuina ióbitaredicai, caimo ie dúecaillana iere figura cai daiífireillena. <sup>7</sup> Caimo iere dúecaillano, Juzíñamui ie Jitó tíllado, ie die tóillado caina jíllotate, mei áfedo Juzíñamui cai fiénidífuiaina féiteteza. <sup>8</sup> Afémie cai ifoci ñue dénuamona, ie caina iere dúecaillafuena, afémie jamánomo ñue caina onótate. <sup>9</sup> Juzíñamui jaiai uícodo mameca ónoñega ie comeci óiacanafue caina ja fidítate. <sup>10</sup> Bie Juzíñamui uícodo mamécafue ie fácaruimo dúcia, ñue ícoimo fúitaite. Aféruimo Juzíñamui dáanomo nana éniemo ite náiraiina ie Jitó Cristo anamo itábicaite, naa bíniemo ite rílleniai, naa jíaie ráaniairi. Daje llezica monamo ite ríinoredino Cristo anamo ítiaioi naa afénomo ite jíaie ráaniairi.

<sup>11</sup> Jaiai uícodo Juzíñamui caina nizede, Jesucristomo dájena cai jaináinado ie comínina cai íllena. Nana bífuiái jica ia Juzíñamui mamérilla izói ñue joide. Juzíñamui ñue onona dieze, afe izói afémie ñue finófirede. <sup>12</sup> Ja cai bie nanómona Crístomo ñnotinodicaiza. Juzíñamui daií caina ñue nizede, aféniemo ite áillue ebíredífuiaido ñúefue íemo cai nitállena. <sup>13</sup> Daje izói uáfueña lloga, omoi jílluille uaina cacádiomoi. Cacáillano afe uaina omoi ñnuamona Jesucristomo jaináitagaomoi. Daje llezica Juzíñamui jaiai uícodo llua izói Ñuera Joreñoña igáomoi, dama Juzíñamui íeiediomoí daiíllena. <sup>14</sup> Afe Ñuera Joreño caimo íllado, íco jíáiruideo Juzíñamui dainafue cai maiñóllena, uáfueña onódicai. Afe ie lloga dainafue cai maiñólliruimo nai dúciñede. Mei íadi nana íemo jaináidinomo, fiénidífueño jaca due íaioi jainaiñeillifue afémie llóite. Daií ie llua mei nana afémie cáiena lloga dainafue máíñoiticai. Ie jira afe Juzíñamuimo ite áillue ebíredífuiaido íena ióbitaredicai.

### *Pablo Juzíñamuimo ñnotino ifoci ñue denóllena Juzíñamuimo jicade*

<sup>15-16</sup> Iemona cai Ocuíraima Jesumo omoi ñnogafuena cue fidínamona, Juzíñamuimo ómoiri “fere figura” fácaíñeno daiífiredicue. Daje izói nana Juzíñamuimo jaináidinona omoi izíruillana cue fidínamona, nane figura daiífiredicue. Afe llezica Juzíñamuimo cue jicáfireña dáaruideo ómoimo jaca uibíoifiredicue. <sup>17</sup> Juzíñamui ómoimo jino llogáuaina ñue comécido omoi baitállena jicáfiredicue. Ua, cai Ocuíraima Jesucristo ebírede Moo Juzíñamuimo jicáfiredicue, Juzíñamuina ñue omoi onóillena. <sup>18</sup> Daje izói Juzíñamui omoi ifoci ñue denóllena jicádícue. Afemona Juzíñamui uáidogano úiñoga ñue cómuitífuiaina ñue ónoitiomoi. Daje izói Juzíñamui omoi ifoci denóllemona íemo jaináidinomo, Juzíñamui fecalle ñuera ebírede cáimafuiaina ónoitiomoi. <sup>19</sup> Iemona bie izói ónoitiomoi: Juzíñamui

iere ñúefuiaina riñoredimie. Afe bie íemo ite áillue riño ja birui nana íemo ñnotinona ñue comécido íaioina canode. <sup>20</sup> Naui Juzíñamui, daje bie íemo ite áillue riñona cai onóillena, Cristo tíllanomona meine abido cáatate. Daií íemo ite áillue riñona comínimo jino iere uáfori ciótate. Afe daje riñodo Cristo cáatajanona, monamo ie nabézimo Juzíñamui íena rainade. <sup>21</sup> Dinomo jamánomo ocuídillaimana Juzíñamui íena jóonete. Iemona nana jiáie riñoredinuiái Cristo anamo itíaioi, naa jiáie ocuífiredinuiáiri. Daje izói nana illaini Cristo anamo itíaioi naa jabóidillainiáiri. Daje izói nana mona eromo ite riñoredinuiái, Juzíñamui ie aillo riñodo Cristo anamo dájena jóonete. Nana jiáie mameca riñoredino cai comeci facáacana dieze, daje izói Cristo anamo itíaioi. Nana biruimo itínuiái ie anamo itíaioi, naa ico jiáiruillaido ítinuiáiri. <sup>22</sup> Afe dáaruído Juzíñamui nana ráaniaina Cristo anamo jóonete. Daje llezica nana Juzíñamuimo dájena jaináidinomo, Juzíñamui Cristo ífócina mameide. Iemona ífoci cai abi ocuilla izói afémie íaioina ocuífiredo. <sup>23</sup> Mei jii, Jesucristomo dájena jaináidino ja Cristo abina mamécaiaioi. Afe jira afémaci nana Cristo comeci ífuiaina iere jeire otíaioi. Mei dama Cristo nana ráfuiaina ñue ícoimo fuitátatimieza.

## 2

### *Juzíñamui caina izíruillado jíllodicaí*

<sup>1</sup> Omoi fiénidifuiaimona nai tíidino izói omoi illa llezica, Juzíñamui Cristo tíllamona meine abido cáatajado afe dáaruído ómoína cáatate. <sup>2</sup> Naui afe fiénidifue dibénemo are itíomoi. Biniemo ite fiénide nairai illa izói are itíomoi. Afe llezica omoi áinodo lláifoide fiénide joreño jitáinafue finófrediomoí, mei afe joreño nana fiénide joriai nahí ocuiraímaza. (Afe daje fiénide joreño Taife.) Juzíñamuimo jieruiñedinona afémie riire ocuíoide. <sup>3</sup> Naui jiáiruillaido nana cai afe izói fieni iticaí. Cai abi fieni jitáinafuiái jeire ófiredicaí. Afe nanómona cai comécimo ite cai óiacaiga fiénidifuenta fáicanocaiñeno ícoimo finóoicaífiredicaí. Daje izói cai comeci fia fácafuiaína jeire oticaí. Iemona nana jiáimacina duere finóllemono dúina izói, Juzíñamui iere duere finóllifuemono dúidicaí. <sup>4-5</sup> Mei íadi Juzíñamui iere caina dúecaillano, nai cai fiénidifuiaimona tíidino izói cai illa llezica, afémie caina izíruillano Cristo cáatajado dáanomona tíllanomona caina cáatate. Mei jii, dama Juzíñamui ómoiri dúecaillano jíllotagaomoí. <sup>6</sup> Uafue, Cristo Jesús cáataja llezica, Juzíñamui afémie diga daane caina cáatate. Afe mei Juzíñamui Cristo abimo monamo caina rainade. <sup>7</sup> Juzíñamui daií finode, nana ico ninomo illáruillaido ítinuiáimo afémie iere caina izíruillafuena onótallena. Ua, Juzíñamui daií finode afémie Crístodo caina dúecaillafuena nana uícomo cómuitinomo fidíillena. <sup>8</sup> Mei jii, Juzíñamuimo ite ómoína izíruillafuedo afémie iere ómoína dúecaide. Ie jira, íemo omoi ñnuado jíllotagaomoí. Afe jíllonafue dani ómoimona comuíñede, mei jiáifodo afefue Juzíñamui ómoimo comuítaga. <sup>9</sup> Ñúefuemo are cai ñéfinamona afe jíllonafue caimo fécañega. Ie jira áfedo buna abina ñnonide. <sup>10</sup> Mei jii, Juzíñamui nano fueñe comini finua izói, afémie ie joréñodo como jéciganona ja cai finode. Iemo ja birui, jaiái uícodo ie mámia izói, Crístodo Juzíñamui meine caina cáatate, ñúefuiái cai finóllena.

### *Ñue uái cai illifue Cristo caimo lloga*

<sup>11</sup> Iemona nauí omoi illáfuemo mai omoi comeci uibíoiri. Judío nairai íeñediomoí. Ie jira judíuai “Bacano icoí que táñegamacina” ómoína mamécaiaioí. Dani afémacina cai bie “Íeizina quetácanodicaí” daidíaioí; mei jaiái íaioí finófirena izói, íaioimona nágamíiaí íaioí bacano icoí quetácaza. <sup>12</sup> Nauí omoi ñnoñena llezica, Crístonona oni eneno itíomoi. Israel náiraímo Juzíñamui nizécanomo jaináíñediomoí; íemona Juzíñamui íaioímo lloga ie ñuera finóllifuiái fidíñediomoí, naa uícodo ie lloga cáimaduafuiái diga. Aféruillaido

Juziñamuina onóñeno, biniemo zuure itiomoï, mei caimare omoï ocuirillifue iñédeza. <sup>13</sup> Naui Juziñamuimona iere oni jica itiomoï; mei íadi ja birui Cristo cairi tïllamona, ie die tóillamona, Juziñamuimo ánozitagamoï. Ja Crístomo dájena jaináidiomoï. <sup>14</sup> Cristo jáimana cai iciñenafue comuítatimie, mei dama afémie judíuai judíoñedino diga dáaziena finode. Iemona íaioï bacáuai imáciñediomoï. Naui ómoïna oni eneno itátate éoinafuena ja Cristo niné féitate. <sup>15</sup> Dama ie abi izi cácanado, ua ie tïllado, ocuica uai ñue ícoïmo fuitade. Fúitajano, áfena záitate. Afe ocuica uai iere rairuide. Ie mei Cristo mena náiraimona, judíuai judíoñedino diga, dáaziena comue náiraina finode. Afe ménade náiraijai ja dama Crístomo dájena jaináitagaijai. Afedo afémie cai conima diga cai iciriñenafue nana caïmo comuítate. <sup>16</sup> Afe bie izói, Cristo cruzmo ie tïllado, bie mena nairai dáamacina fínuano, nauí íaioï fuirífirenafuena záitate. Afe llezica, Juziñamui dibénemo ñue uái íaioï illifue Cristo afémacimo jino denode. Dénuano, íaioïna jeire otátate. Afemona comínimo Juziñamui caimare eroide.

<sup>17</sup> Cristo afe ñue uái cai ille uaina nana comínimo lluaíbite. Onínemacimo Cristo afe uaina lluaíbite. Omoï afe onínemaci izóidiomoï. Daje izói áinori ite judíuaimo, afe uaina afémie lluaíbite. <sup>18</sup> Iemo Cristo cai jïllotajamona, mei nibai judíuaidicai, mei nibai judíuainedicai íadi, nana cai afe daje Ñuera Joréñodo, Moo Juziñamuimo ánozifiredicai. <sup>19</sup> Afe jira, Juziñamui dibénemo ja onínemaciñediomoï. Daje izói dani íaioï illánomo dúñedino izóñediomoï. Mei jáífodo nana Juziñamuimo jaináidino jainaila izói, uafue íemo jaináidiomoï. Dájena Juziñamui náiraidiomoï.

<sup>20</sup> Nana omoï ebírede niga jáilliraina dallíraide anáneco izóidiomoï. Cristo oréfiregamaci llófueinafuena iere baitádinona ja jáidiomoï. Ua jáillirai jáicina maïri naidánia izói, aféfuemo ja riire jóonegamoï. Afe bie Cristo orécamaci Juziñamui uai jino llóraini. Dama Jesucristo afeco nahíllirai izóidimie. <sup>21</sup> Bie Nahílliraimo izóidimie nana afeco Juziñamui nicana uite. Afe izói afemo nana jofócaiai ñue jáicina jóonega. Jofócaiai dallíraidemo dúina izói, daade Jesucristomo jaináidiomoï. Afeco nilla fuilla mei, jae Juziñamui ñuera irácona jáidiomoï; ñuera gairíraco izóidiomoï. <sup>22</sup> Daje izói Crístomo dájena omoï jaináinamona, nana jáie Crístomo innotinomo dájena jaináidiomoï, daaco náiraina Juziñamui íena, omoï jáillena. Iemo Juziñamui Ñuera Joreño ómoïmo íllado Juziñamui ífirenaco izóidiomoï.

### 3

#### *Jíllona uai judíoñedino lluaíjillena Juziñamui Páblomo jóonenocai*

<sup>1</sup> Iemona Juziñamuimo ómoïri iere cue comeci facáfiredicue. Omoïna izíruite Páblodicue; Cristo Jesús ñuefue ómoïmo cue lluaíjilla jira llavécamedicue. Omoï judíoñediomoï, íemo ómoïna ñue íllena cue cánua jira llavécacue. <sup>2</sup> Ja nibai Juziñamui cuemo jóonega bie táijnana fidíidiomoï. Jii, Juziñamui ie cáimaduafuiai ómoïmo cuena llotátate. <sup>3</sup> Juziñamui ie nai jino lloñega nanómona mamérrillafue cuena fidítate. Ie mei cuemo lluno aféfuemo iere baitádimiena Juziñamui cuena jóonete. Afe ie mamérrillafuedo ja nano íanori due ómoïmo cuetícue. <sup>4</sup> Aféfuena omoï facáduamona, afe nai jino llóñega Cristo dibene illáfuemo iere cue báitajana ónoitiomoï. <sup>5</sup> Afe báinino comeci ie fácafue nauí jáíruiillaïdo bumo Juziñamui jino lloñede. Mei íadi birui Juziñamui ie Ñuera Joréñodo, ie eneno nizeca íainide orécamacimo aféfuena jae onótate. Daje izói jáie ie uai jino llórainimo fidítate. <sup>6</sup> Afe jaijai jino raire llóñegafue bie izói jóide. ¡Cácarei! Jíllona uaina inuamona, judíoñedino naa judíuairi daje Juziñamui cai cáimaduafuiai dájena máíñoitiaioï, mei dáamiemo jaináidiaioïza. Ua Crístomo, dáaziena jaináidiaioïza. Daje izói Juziñamui lloga Cristo Jesús caina ñue finóllifue judíuaimo dúina izói, birui judíoñedino jino dáide.

<sup>7</sup> Cue jamáimedicue, mei íadi Juzíñamui dama ie ríinodo, cue canóllena mamérite. Iemona afe bie ñúefue jáimacimo llujállena jónegacue. <sup>8</sup> Nana Juzíñamuimo jaináidinomona iere erófenemo iticue. Mei íadi Crístomo ite facádonide aillo cáimaduafuiai judíoñedinomo llujájitimiena Juzíñamui mamécacue. Afe bie cue llujáille iere cuemo ráifide. <sup>9</sup> Juzíñamui jaijai ninómona jino llóñega mamérellafue nana comínimo jino llóitimiena dama Juzíñamui jónegacue. Afe Juzíñamui nana ráaniai finóraima. <sup>10</sup> Juzíñamui nana bífuiaina daií íficaitade, nana íemo dájena jaináidinodo, nana monamo ite ríinoredino Juzíñamui iere jamánomo naga ráfuiaina báitajana onóillena. <sup>11</sup> Juzíñamui jaijai ninomo uícodo comeci mamérella izóí, nana bífuiaina cai Ocuíraima Jesucristodo ñue ícoimo fuitade. <sup>12</sup> Iemo Crístomo dájena cai jaináinamona Juzíñamuimo ja áinoziredicai, mei cai ínuamona afémiemo meáiruñedinona itícaiza. <sup>13</sup> Ie jira izire ómoimo jicádícueza: Birui omoi abiri duere cue zéfuidícueza, mai náinidimaci izóí omoi íñeno iri; mei jáífodo caimare omoi comécíioiri; mei afe ómoiri duere cue zéfuia afe ómoimo ebírede nitaina izóidífueza.

*Cristo iere jamánomo caina izírúitimiena íemo ínotino onóillena Pablo Juzíñamuimo jicade*

<sup>14</sup> Ie jira cai Ocuíraima Jesucristo Moo anamo caiñícido ana dújullanona nana ie comini íena íemo izire jicádícue. <sup>15</sup> Nana éniemo ite ie comini, naa monamo itínuijai díga, afémiemona comuídiaioi. <sup>16</sup> Cai Moo Juzíñamuimo jamánomo ñuera ríino ite. Afe ie ríinomona, ie Ñuera Joréñodo, iere omoi comeci ñue náireillena izire íemo jicádícue. <sup>17</sup> Afe llezica omoi ínogafuemona Cristo omoi comécimo nabáirífíreillena Juzíñamuimo jicádícue. Daje izóí Juzíñamuina iere omoi izírúillena jicádícue. Iemo afe izírúillafuemo izire omoi jaináillena jicádícue. Nane dáanomo omoi ínogafuiai jeire oga uaina ñue omoi ífócimo denóllena Juzíñamuimo jicádícue. <sup>18</sup> Daje izóí Cristo caina izírúilla omoi ónoillena jicádícue, naa jáíe íemo jaináidinori. Mei afe ie izírúillafue monáillaji aillona izóideza. Afe monáillaji ruícafene jica íllana bu onóñede. Mei íadi afémie caina izírúillafue iere ruica are illa izóinana omoi onóillena jicádícue. Daje izóí áillue imani eraí iere fuiri jica illa izóí, afe caimo facádonide Cristo caina ie izírúillafue omoi onóillena jicádícue. Afe izóí Cristo caina izírúilla iere monáillaji ana jica afórena izoide. <sup>19</sup> Mei jíi, afe bie izírúillafue ñue omoi fidíillena jicádícue. Nana cai onórede aillo ráfuiai baímo, bie izírúillafue jamánomo áillue. Afefue omoi fidínamona, nana Juzíñamuimo ite aillo ñúefuiaina ñue jáícina oruízítio moi. Mai, daií íteza.

<sup>20</sup> Ja birui ie aillo ñuera ríino, cai comécimo ífirenamona nana cai comeci fácarenafuiai baímo, afémie iere jamánomo ñúefuiai caimo finórede. Daje izóí nana cai jicárenafuiai baímo afémie iere finórede. <sup>21</sup> Ie jira aillo ebíredífuiai afe cai Juzíñamuimo mai cai nitalli, mei Cristo Jesumo dájena jaináitagacaiza. Mai mei Jesucristodo jaca ninomo naga cómutigimado aillo ñúefuiaina Juzíñamuimo cai nitalli. Daiítadeza.

## 4

*Juzíñamui Ñuera Joréñodo dáamacina maméidicai*

<sup>1</sup> Nana bífuiaimona, omoi jáícina ñúefuedo macállena riire ómoimo llóiticue, mei cai Ocuíraima Cristo ícoinia llavécamedícueza. Ua Juzíñamui uáidogamací maca izóí, omoi macállena izire ómoimo jicádícue, mei uafue ie uáidogamací itíomoiiza. <sup>2</sup> Nana omoi, mai jiba abina ínoñedinona omoi iri; daje izóí comécina mánaidimacina omoi iri. Dani conímana izírúillano illa dígamie jáímamo comeci járitaño omoi iri. Afe izóí conímana omoi dúcaífireiri. <sup>3</sup> Afe llezica mai Ñuera Joreño ómoimo comuítaga dájena jaináinafue ñue rairuífireiri. Ua, omoi dáaziena dani conímana comécina jacíruiñenafuedo dáamacina jaináífireiri. <sup>4</sup> Daa cómemo da abi illa izóí, daade abi. Afe abi Cristo ie. Afe daade come

abi izóidicai. Afe izói Ñuera Joreño daade. Daje izói Juzíñamui nana caina daa uire ñue finóllifue mo úiñotagacai. <sup>5</sup> Cai Ocuíraima daade. Daje cai ñnogafue jeire oticai. Daje izói dáafue mo báutizagacai. <sup>6</sup> Iemo Juzíñamui daade; afémie nana íemo ñnotimaci Moo. Afe izói afémie nana comini Naama. Afémie nana íficaidifuiái dibénedo ie comeci jitáinafue finode; nágafulaímo jetáfirede.

<sup>7</sup> Mei íadi Cristo comeci jitaina izói, cáimona illa dígamíemo jíáiforiede ñúefue finolle ríinona, Cristo caímo fecade. <sup>8</sup> Juzíñamui Cuegáuai daí uícodo daíde. Be ñie: Caífo monamo jailla llezica aillo nauí llaveca izóidino afémieoíri uite.

Iemo fia iga jíáimaci cánuafuiaína comínimo fecade, daíde.

<sup>9</sup> Afémie caífo jailla daína uai jíáifue caina onótate. Afedo nauí uícodo fueñe afémie monámona ana bíllana fidídicai. Aféruído bie fiénidifuiáirede éniemo afémie monámona iere jica ana bite. <sup>10</sup> Afe ana bitímie, abído nana caífo ite monániaí caifófenemo jáidímie dáamiede. Dinomo jaide, afénomona nana ie finócanuiaímo illáimaillena. <sup>11</sup> Iemo afe bie Cristo illa dígamiena ñue ríinoretade jíáiforiede ñúefuiaína finóllena. Dámierie ie orécamacina afémie jóonete. Jíáimacina Juzíñamuimona oga uailaí jino llóraimana afémie mamede. Iemo jíáimacina cai jíllonafue uaina llotátate. Naí jíáimacimo ie comínina ñue úiñollena ocuide, íaíoi llófuellena díga. <sup>12</sup> Afe daí cai Ocuíraima nana íeiena ñue fibítate, ie ocuica táijina ñue íaíoi jetállena, íemo nana Crístomo jaináidinona móonaitallena; mei afémaci Cristo abi izóidimaciza. <sup>13</sup> Afemona cai ñnogafue dibénemo ñue dájena maméidimacina jáiticaí. Daje izói Juzíñamui Jitona cai onona dibénemo ñue dáamacina íiticaí. Afe daí ñúefuiaína ñue izire jíéruitinona íiticaí. Uafue, nana ñúefuiaína Cristo izire jíeruilla izói, afe izói ñúefuiaína rairuíñeno iere jíéruiticaí. Jíeruillamona ñue móonaiticaí. <sup>14</sup> Ja úrue izóidinona íñeiticaí. Mei íadi jífueacadino comue llófueinafue llúamona, úrue izoide naí figo baitáñedinona jífueitiaíoi. Iaíoi comeci ñue fácajana raíre jíáifodo méidoitiaíoi. Bie jífuetino ebire lloga taino lluáfuedo bie úrue izóidino ñnoga ñúefuiaína ñiné féitaitaíoi. <sup>15</sup> Mei íadi conímana izíruillano, íemo uáfueña cai úrilla llezica, maí Cristo díeze cai móonailli. Crístomo izire jaináillano nana ie comeci itífuiái maí jeire cai ófireilli, mei Cristo afe cai jainaina abi ífoci daínámie. <sup>16</sup> Afémie, ífócina íllamona, nana caina caímare ocuíoide; ñue daa cómena caina jaináitate, mei illa dígamie jíáimíemo ñue dúinaza. Nana afe Cristo dáamiena jaináitagamací caímare daní jíáimacíri táijina llezica, caímare itíaíoi. Ua Crístomo jainaide, daade abi izóidino naari conímana izíruillafuedo móonaioicaide. Móonaillano caímare ite.

*Crístomo dájena cai jaináinamona comue illáfuedo macáredicai*

<sup>17</sup> Iemona bie ómoína cue daíillifue izói, cai Ocuíraima mámedido ómoímo jóonenocaidícue. Ja biruímona, Juzíñamui onóñegano illa izói, maí omoí íñeno iri. Iaíoi taino comeci úrilla uai daína izói ífirediaíoi. <sup>18</sup> Iaíoi comeci úrilla uai onóñeno jíitífono fiébicaidiaíoi. Juzíñamui comuítaga comue illafue afémacimo íñede, mei íaíoi comeci ríirenamona ja abína onóñedimacina jáidiaíoiiza. <sup>19</sup> Ja íaíoi comeci meáífuena lloñediaíoi. Iemo nana íaífuiaí illa díno, áfemo aillo gáinafuedo iere jeire otíaíoi. <sup>20</sup> Mei íadi afe daí, Cristo llófueñegaomoi. <sup>21</sup> Mei ñibaí, uáfueña Cristo illafue omoí cacana mei, íemo ite uafue uai dibénedo afémiedo llófuegaomoi. <sup>22</sup> Ie jira nauí omoí fiénide illafue dibénedo izire ómoína dáitícue: Afe nanómona ómoímo itífuiái, maí zabide ñiroí oni dúíñua izói omoí meídori. Afe nauí ómoímo itífuiái jaca ómoína fiéni finode; mei omoí fiénide gáinafuiái jífuegaomoiiza. <sup>23</sup> Mei jíáifodo biruí cómuena méidoredíomoi; nana omoí comeci óiacanafuiái méidorede. Nana omoí ífoci úrillafuiaína méidoredíomoi. <sup>24</sup> Afe llezica comue comeci itífuiái, comue ñiroí jítaja izói, maí jeire omoí oíri. Afe comue itífue Juzíñamui illa izói Juzíñamui comuide. Iemo aféfuena jeire omoí úamona, omoí uáfueña

íaidonide ñue illafue otíomoi. Daje izói afe omoi comue comécimo itífuiyai omoi úamona, ñue jaícina jóide illáfuedo jáitiomoi.

<sup>25</sup> Iemona tánofuiyai lloñeno iri. Mai jááfodo illa dígamié conímamo uáfuenta úriri, mei nana cai dáaziena daje abimo jaináidicaiza. Afe abi Cristo ie.

<sup>26</sup> Omoi iciribicaiadi, afe icirafue ana fiénidifue mo ómoína uitátañeno iri. Daje izói daarui náaruido are iciriñeno iri. Raire féitari. <sup>27</sup> Due jiza omoi comécina Taife illáimaillemo “Jii” daiñeno omoi iri.

<sup>28</sup> Naui meríriraíma bairódime diga, mai abido merírriñeno iri. Mei jááfodo ze-fuíruíñeno táijizairi. Iemo ñue táijiferenamona o táijina iba óitio; áfedo o jitaille ráaniai íbaitio. O iba mei, ua dúeredimacimo íaioi jitailla raa íaiomimo fecáredio.

<sup>29</sup> Fiénide uáillaído íaire úriñeno iri. Mei jááfodo ñuera uáillaído úrifireiri. Cacádinona comeci náiretalle uaido omoi úrifireiri, íaiomina ñue ézicitalle uai diga. <sup>30</sup> Daje izói Juzíñamui Ñuera Joréñona zúuretañeno iri; mei afémie ómoimimo íllado, jae Juzíñamui íeiena mamécaomoi. Ua biruímona Juzíñamui illánomo ñue jaícina ómoína jíllotalliruimo, afe Ñuera Joréñodo Juzíñamui íena ñue mamécaomoi.

<sup>31</sup> Nana comécimo ite éoinafuiaina oni mai omoi féitari, nana ríifuiyai diga. Daje izói nana icirillamona comuide riire úrillafuiyai lloñeno iri, naa jáíe báíñuafuiairi. Nana illa diga fiénidifuiyai niné féitari.

<sup>32</sup> Iemo jááfodo, illa dígamié jáíimimimo dúecaillano comeci mánaidimiena iri. Cristo íena omoi íllamona, Juzíñamui omoi fiénidifuiyai íbana oñede. Afena féitateza. Afémie féitaja izói, afe izói illa dígamié jáíima finoca fiénidifuenta omoi féitafireiri.

## 5

### *Juzíñamui úruiai izói cai íllena Pablo caímo llo*

<sup>1</sup> Juzíñamui izíruiga úruiai omoi íllamona, mai afémie illa izói omoi iri. <sup>2</sup> Cristo caina izíruilla izói jáíimana omoi izíruifireiri. Mei jii, caina ie izíruillamona Cristo cai jáínona fecácamié. Afémie Juzíñamui íóbitallena titada íia fecaca rille izóidime. Aferi Juzíñamui íóbide. (Afémie dibénemo afefue ñue ziórede uguci izoide.) Mai afe izói conímama omoi izíruillado Juzíñamuina omoi íóbitari.

<sup>3</sup> Ja bie omoi Juzíñamuimo jaináidimoiiza, mai ómoimona ninó dáamie áinina llezica jáíe ringona jetáñeno iri. Daje izói nana jáíe íaifuiaina finóñeno iri. Jaca jáíe cómemo ite ráaniaimimo úradoiñeno iri. <sup>4</sup> Íairede méaifuiaina bummo lloñeno iri. Daje izói táinodo úrillafuiaido úriñeno iri. Iemo jáíimamo fiénide llagüeroilla uaina oréñeno iri. Mei bie izóidifuiyai Juzíñamui úruiaimimo íeñedeza. Mei jááfodo Juzíñamuina íere figora omoi daiífireri. <sup>5</sup> Jae cue lloga íima ringomo finoca fiénidifue bie izói jóide. Daa come nai áinina llezica, ringo jetáadi, fiénide. Daje izói ja ringo ua mei, jáíe ringo jetáadi, figóñede. Iemo íaifue naa úradoillafue diga finóadi, figóñede. (Afe úradoifiredime jamai jánarai íóbitadime izoide.) Ja onódimoiiza bie izoide fiénidifuiyai finuana fibídimie, Cristo Juzíñamui diga illáimana illíruimo jaináinide. <sup>6</sup> Jáíimana taino uáillaído omoi jífueñeno iri. Mei afe bie fiénidifuiyai finuamona, nana ie uaina cacáacañedinona, Juzíñamui íere duere fínoiteza. <sup>7</sup> Iemona, bie izói ite comini diga omoi nabáiriñeno iri.

<sup>8</sup> Naui nai omoi íinoñena llezica, jítifomo itíomoi; mei íadi birui cai Ocuíraimamo dájena omoi jaináinamona, ja úzefomo macádimoi. Iemona ñue uáfodo macádino izói mai omoi ífireiri. <sup>9</sup> Cai Ocuíraíma Jesucristo egáíñote raa izoide. Iemona cai comécina ñúeitade. Iemo ua uaido caina úritade. Daje izói cai jaícina ñue illí fue comúitate. <sup>10</sup> Cai Ocuíraíma ñue íóbitallifuenta, mai íere omoi onóicairi. <sup>11</sup> Báinino macádino finoca tánofue dibénemo íñeno omoi iri. Mei jááfodo afe báinino íaioi finócafuenta uáfomo omoi cíotari. <sup>12</sup> (Mei íadi

afémaci báinino finócafuiaí izóí cai úriadi, caina meáiruitaite. Ie jira benomo rabedo jino ómoimo llóñeiticue.) <sup>13</sup> Mei íadi nana íaioí illafue jino uáfodo ciótamona, afe fiénidifuiái iere íáirenana nana comini ónoitiaioí, mei Cristo egáíñua úzefo, nana comínimo ua comécimo itífuiaina jino ciótate. <sup>14</sup> Ie jira bie izóí daina:

Inídioza, mai cazi.

Tíidinomona mai náidacairi.

Iemona Cristo ie úzefomo ñue mácaitimiena ona jáitaite, daide.

<sup>15</sup> Mei íemona, nágarui omoí illáfuemo izire comeci omoí facáoiri. Naga fiénidifuiáimona abi omoí rairuiri. Abina onóñedino izóí omoí iñeno iri, mei jáífodo ñúefuena baitádinona omoí iri. <sup>16</sup> Biruido aillo fiénidifue íteza, o illafue táinomo fáifitañeno iri; ñúefuíaí omoí finófireiri. <sup>17</sup> Táinodo úritino izóí iñeno iri. Cai Ocuíraima comeci jítainafuena ñue omoí baitáocairi. <sup>18</sup> Jifáíñeno iri. Mei, afe jifáillafue come comécina aillo íaífuemo ana uitátate. Mei jáífodo Ñuera Joreño abí omoí úcaitari. <sup>19</sup> Illa dígamie jáímamo Juzíñamui uáillaído caimare omoí úriri, naa Juzíñamui rúairi. Daje izóí Juzíñamui Ñuera Joreño lloga rúaniaí omoí roíri. Daí omoí rúado cai Ocuíraimana iere íóbitaitíomoiza. <sup>20</sup> Illa dígaruillaí cai Ocuíraima Jesucristo mámecido Moo Juzíñamuina naga ráaniaíri figura omoí daíífireiri.

### *Crístomo ínotinona cai íllamona Pablo cai jofo eromo cai illafue llote*

<sup>21</sup> Illa dígamie jáíima anamo caimare omoí iri, mei Juzíñamui daíí cai ocuúdeza.

<sup>22</sup> Cai Ocuíraima anamo cai itábicailla izóí, naga ringo ie ini anamo itábicairede. <sup>23</sup> Mei naga ringo ie ini ocuífrega, íemo jáíí ie ini ñue úíñogaza. Afe izóí nana Crístomo ínotino, Cristo ocuícaciaioí; daje izóí Cristo ñue úíñogaiaioí. Afémie afémaci illaíma. Daje izóí afémie íaioí Jíllotaitimie. Afémiemo ínotino íemo dájena jaináinamona, ja ie izóidiaioí; ja dáamiede abi izóidiaioí. <sup>24</sup> Iemona Crístomo dájena jaináidinona afémie anamo illa izóí, naga inírede ringo ie ini anamo írede.

<sup>25</sup> Cristo íemo jaináidinona izíruilla izóí, mai naga íima ie aina izíruiri. Crístomo jaináidinomo Cristo ie abina fecade. <sup>26</sup> Afémie daíí ie abi fecade ñue íeiena íaioí íllena. Daje llezica afémie íaioímo ite íaífuiaí jáinoimo jococa muilla izóí, ie uaido íaioína muiñode. <sup>27</sup> Cristo daíí caina muiñode ñuera nífuenidinona ie uíécomo cai cíocaizaillena. Uafue, nana mallizai izóí abímo comuídena duano ebire eroide, lliríñede abi ígoína caina finode. Jaca due jiza fiénidifuenta fiéñede. Nana íaioína íeiena iere ñue finode. <sup>28</sup> Afe izóí naga íima dama ie abina izíruilla izóí, ie aina izíruirede. Ie aina izíruitimie dama ie abina izíruite. <sup>29</sup> Bu jaca dama ie abina éoiñede. Mei jáífodo cai abina ñue ecádicai, ñue úíñoticaí. Afe izóí Cristo íemo dájena jaináidinona ñue rairuide. <sup>30</sup> Mei afémaci dama íeieza; ja daa ie abi izóidiaioí. Cai bie afe abímo jaináidicaí. <sup>31</sup> Bífuiáimona Juzíñamui daina izóí, dámie ie moo, ie ei díga, fáicanocaillano, ie ai díga dájemo jaináicaite. Jáinaicaillano, daade come abi izóí itíaiillinoí. <sup>32</sup> Bie daade come abi izóí íficaillafue, jáíáimona áillue báinide rafue. Mei íadi afefue Crístomo dúide; daje izóí íemo dájena jaináidinomo dúite, daídícue. <sup>33</sup> Mei íadi daje llezica ómoímona illa dígamie omoí abina izíruilla izóí omoí aina izíruiri, daííacadicue. Iemo naga inírede ringo ie inina ñue jacíruiredeza, daídícue.

## 6

<sup>1</sup> Uruiaí, omoí cacai. Crístomo ínotinodiomoíza, o moo uai jeire omoí olle iere jítáirede, mei afe bifue Juzíñamuimo jáícina jóideza. <sup>2</sup> Bie lletara uai llua mei, Juzíñamui dáanomona ñue cai illífué llote. Daíí nana ie lletara uáimona dama búuaido Juzíñamui cai ñue illífué llote. Afe llétaja uai bie izóí daide: “O moo, o ei díga, ñue jacíruiri, <sup>3</sup> áfedo caimare o íllena, daje izóí bie éniemo are o íllena.”

<sup>4</sup> Ja úruiairedino, mai omoi cácarei. O úruiaina comécina ríicaitañeno iri. Mei jiáfodo riire llétaja uaido ñue íaioina llófuefireiri. Dai íaioina ñue omoi móonaitari, cai Ocuíraima Jesumo ñue íaioi ñnollena.

<sup>5</sup> Ocuífiregano, mai omoi cacai. Bínemo ite omoi ocuídime dáinana ñue jeire omoi oíri. Cristo ocuállamo o táijina izói o táijitatimie ráairuñeno ñue táijiri. Afémie ocuállana ñue jacíruiri. O táijitatimie uaina nibéfodo oñeno iri. <sup>6</sup> O ocuídime eroille lezica ñue táijiri, daje izói afémie iñena lezica náamonaze ñue táijiri. Dama ocuídime eroille lezica, íocire táijidimiena iñeno iri. Afe izoide táijide come jamai come íóbitade. Afe izói iñeno jiáfodo omoi iri. Cristo táijitagano izói, Juziñamui comei jitáinafuenta izire omoi finori, afémie omoi íóbitallena. <sup>7</sup> Comei ñue jitaina izói caimare omoi táijiri. Jamai come íena táijíñeno, cai monamo ite Ocuíraima íena ñue omoi táijiri. <sup>8</sup> Mei ja onódiomoiza, illa dígamie ie ñue táijifirenado cai monamo ite Ocuíramamona ñúefuena jirídoite. Rairuícemie, ráiruínegamie díga dájerize nano íaioi táijnaze jirídoite.

<sup>9</sup> Ocuífredino, mai daje izói omoi táijitaganomo ñue dúcaifireiri. Afémacina fiéni omoi jácidoñeno iri. Daade cai Ocuíraima anamo nana dájena itícaiza, omoi úbicairi. O táijitagano monamo ite Ocuíraima anamo illa izói, o jiái daje Ocuíraima anamo itio. Afémie da cómena eneno maméñedeza. Illa dígamie dájerize mamede. Aféfuemo omoi úbicafireiri.

### *Jesumo ñnotino comei náireitalle abi ríidua uai Pablo llote*

<sup>10</sup> Mei ámatiai, cai Ocuíraima Crísto ite ríinodo benómona mai riire omoi iri. Cai Ocuíraima Jesumo omoi jaináinamona riire abí omoi mameri. Mei, afémie jamánomo ríiredeza. <sup>11</sup> Juziñamui lloga abi ríidua uai, ñue jeire omoi oíri, naa ie ñuera ézicigafuiairi. Mei jii, dáarie comíni abi ríidollena ñue fuiríllena llojécuiroi jitádiaioi. Afe íaioi jita izói, nana Juziñamui cai ríidua uai, mai jeire omoi oíri. Afe uaido Taife jífuia uaina uáitarediomoí. <sup>12</sup> Jamai abina mairide come díga fuiríñedicaí. Mei jiáfodo fiénide joríaí díga fuirídicaí. Afémaci caifo cai acónimo táifodo macádiaioi. Afe cai díga fuirífirede joríaí nana bínemo ite jíitfodo jaide fiénidimacina fiéni ocuíoide. Bínie comínina “Cáiediomoí” daíioicaidiaioi, mei “Omoi náamadicaí” daíifirediaioi. <sup>13</sup> Ie jira Juziñamui lloga abi ríidua uáillaído abí omoi rairuiri. Afe bie uaido jobáirillaruiño ñue abina ríidoitíomoí. Dai abina ríidotíomoiza are ñue ríinoredinona íitíomoí. <sup>14</sup> Ie jira riire omoi iri. Fuiríraima círaigí ife riire tirínua izói jizíñeno ñue ie fuiríllena, afe izói Juziñamui lloga ua rafue jeire omoi oíri. Daje izói ñue jaícina omoi íllado nágarui ñue abí omoi ríidofireiri. Afe bie omoi jaícina illafue, fuiríraima jogobe ríidollena jítaca llojeco izoide. <sup>15</sup> Afe fuiríraima fuirízailla lezica ie ídaí ico riire maíga izói, áfedo riire ie naidáillena, afe izói Juziñamui comécina jacíruíñeno uai jeire omoi oíri. Afedo abina riire mámano, fiénidífuenta ómoína anáfenoñeiteza. <sup>16</sup> Iemo illa dígaruillaído Juziñamuimo omoi ñnogafuena féitañeno iri, mei áfedo Taife caimo mameca fiénidífuiaina oni caitáredíomoí. Omoi ñnogafue jae fuiríraima abi ríidollena úifirega llojeco finoina escudo izoide. <sup>17</sup> Iemo Juziñamui lloga jíllona uai jeire omoi oíri, mei aféuai, ífo ríidollena jíitáfirega ífo ico llojeco izoide. Iemo nana Juziñamui uáillaína mai jeire omoi oíri, mei afe Juziñamui uai, Ñuera Joreño ómoimo fecaca fuirira llojébici izóideza. <sup>18</sup> Nana bie cue ocuícáfuiái, mai Juziñamuimo jícano finori. Jaca Ñuera Joreñodo izire Juziñamuimo omoi jícafireiri. Bie izói omoi íllena, nana bífuiaína fáicanocaiñeno ñue abí omoi rairuíoicairi. Daje lezica nana Juziñamuimo jaináidinomo Juziñamuimo omoi jícafireiri. <sup>19</sup> Daje izói jiái cuemo jícafireiri; náiraímo cue úria, Juziñamui cue uai nabáilleza. Iemo jacíruíñeno íocire íaioímo cue úrillena, Juziñamuimo omoi jícarí, nauí báinino lloga jíllona uai jino comínimo cue fidítallena. <sup>20</sup> Bie ñuera uaido



comínimo úrilla Juzíñamui orécamedicue. Afe uai ícoinia, ja birui llavécamedicue. Iemo, bífuedo ñuera llujáitimie izói jacíruiño naire cue úrilla, mai Juzíñamuimo omoi jicari.

*Jiraicaiño uáidua uailla*

<sup>21</sup> Cai izíruiga ama Tíquico, cai Ocuíraima Jesumo tájinana fáicanocaiño canófredimie. Afémie nana cuemo itífuiaina ómoimo jino llóite, naa jiáie cue finócafuiái diga. <sup>22</sup> Jira, bímie ómoimo orédicue, cue illafue ómoimo jino llóllena. Iemo jiái áfedo omoi náireficaillena, íena ómoimo orédicue.

<sup>23</sup> Moo Juzíñamui, cai Ocuíraima Jesucristo diga, cai ámatiaimo ñue comeci uái illifue ómoina ñue onótaiteza. Daje izói Juzíñamuina ñue omoi izíruillena jicádicue. Ie jira Juzíñamui omoi ñnogafuena aillo mónaitaiteza daidicue, afe bífuiái omoi maiñóllena.

<sup>24</sup> Nana cai Ocuíraima Jesucristona féitaño izíruitinona, Juzíñamui ñue íaioina ézicíteza. Mai; jae ñie. Dai íteza.

## FILIPO COMINIMO SAN PABLO ORÉCABE La Carta del Apóstol San Pablo a los Filipenses

### *Filípomo ite Jesumo ñnotinomo Pablo llavéracomona cuete*

<sup>1</sup> Cue Páblodicue. Cue nabai Timoteo diga bibe ómoimo cuetícoco. Jesucristo táijitagamedicoco. Nana Filipo jófueimo ite Juzíñamuimo jainaide ámatiaimo cuetícoco. Daa bibedo omoi cígiri ite ocuídillainimo, naa eneno mameca canódinomo, cuetícoco. Cristo Jesumo nana dáaziena jaináidiomoi. <sup>2</sup> Cai Moo Juzíñamui ñue ézicigafueimo omoi iri, naa comeci caimare uái illafue diga. Daje izói cai Ocuíraima Jesucristo ézicigafue dibénemo omoi iri, omoi ie lloga comeci caimare uái illafue diga.

### *Pablo Jesumo ñnotinori Juzíñamuimo comécido úrite*

<sup>3</sup> Naga ómoimo cue úbicaifirenaruido, cai Moo Juzíñamuina: “Iere figura” daiífiredicue. <sup>4</sup> Juzíñamuimo comécido cue úriadi, jaca nana ómoiri caimare jicáfiredicue. <sup>5</sup> Mei fueñe tainéinaruimona ua biruimo Juzíñamui ñúfuedo dáafueimo naa ómoiri táijifiredicaiza. Afena figura daiífiredicue. <sup>6</sup> Juzíñamui nauí omoi comécimo ñúfueña déitate. Afe ñúfueña déitallifue tainédimie ua Jesucristo billíruimo fáicanocaiñeno déitaoicaite. Afe fue taino daiínideza onódicue. <sup>7</sup> Mei ómoína iere izíruillano nana ómoiri daií comeci cue fácafue iere jaícina jóide. Afe izói daje cuemo iga ézicigafue, jeire otiomoi. Llavécamedicue íadi, omoi cúeoiri jeire oga ézicigafue, ñúfue cue llujillena canode. Iemona cai jílloillifueña comínimo uáfueña ñue fidítaticue. Daje izói bífueña iere nahífueza daiítaticue. Afe izói bie ñúfueña uáitaacadino uíecomo daa bífuedo cai jílloillifuedo jaícina ñue úriticue. <sup>8</sup> Jesucristo ómoimo dúecaillano izíruilla izói, omoi cígiri iere cue íacanana Juzíñamui ñue onode. <sup>9</sup> Juzíñamuimo comécido cue úrillado ómoiena jicádicue. Dani conímana aillo jamánomo izíruillana jicádicue. Daje izói nana ñue fibíllafue abina omoi onóillifue diga, jicáfiredicue. Ua daií ómoiena jicádicue, ñúfueiaí omoi níziana omoi fibíllena. <sup>10</sup> Afe bifue jeire omoi óiadi, omoi comeci ifue íainite. Daje izói Cristo billíruimo nífuenidimona ítiomoi. <sup>11</sup> Daií Jesucristo omoi illáfueña mámeite. Ua ria llizilla jofo úaina izói, ómoína mámeite. Ua aillo ñue finócafuaí omoi illáfueimo Jesucristo mámeite. Afedo Juzíñamuimo ñúfue ebíredifue diga nítaitiomoi.

### *Cristo jítainafue cue fñuamona cue comeci ifue ráifide*

<sup>12</sup> Amatiai, omoi cácarei, cuemo zúidifuaína omoi fidítaiticue. Aféfuiaí Juzíñamui cai jílloillifueña jino llúana nahí uáfueña canode. <sup>13</sup> Benomo cue llavéinamona, nana nahíllaíma jofo abí úiñoraini, ñúfuedo cue llavéinana onódiaíoi; ua Cristo ñúfue jeire cue úamona ja llavécamedicueza, áfena nana onódiaíoi. <sup>14</sup> Llavécacueña íaíoi cíonamona, ja nana ñnote ámatiaimona nabémaci iere náicaidiaíoi, Juzíñamui uai jino llóllena. Ua meáiruñeno uáfori jino llotíaíoi. Daje izói cue llavéinamona cai Ocuíraimamo jamánomo ñnotiaíoi.

<sup>15</sup> Uáfueña dámierie cuemo úradoillano Crístodo úritiaíoi. Afémaci énenoruillano cue baímo jamánomoidimiena íacadiaíoi; mei íadi jíaimiaí comeci ñúfuedo jino llotíaíoi. <sup>16</sup> Dáarie dani íaíoi comeci óiacanafuaído Crístona jíáifo úritiaíoi. Cue llavébillafue baímo jamánomo raamo cuena jíiritaiacadiaíoi. <sup>17</sup> Mei jíaimaci cuena izíruillano Juzíñamui ñúfue jino llotíaíoi, mei nai benó llavéracomo cue íllana onódiaíoi. Ua Juzíñamui jílloillifueña cue uáitañena jira llavécacueza onódiaíoiza. <sup>18</sup> Mei íadi ¿cúemona níbai? Dáarie jaícina Crístodo úritiaíoi; jíaimaci Crístodo jíízreocana úritiaíoi. Mei daje ábiedo Crístodo íaíoi úriadi, cuena jaca íóbitade.

Afe cue ióbilla baimo jamánomo nai ióbioicaiticue. <sup>19</sup> Mei nana bífuiaimona nífuenino záiticueza onódicue. Ua cueri Juzíñamuimo comécido omoi úrillado ñue jílloiticue. Daje izói Jesucristo Joreño cue cánuado ñue jino jáiticue. <sup>20</sup> Jesucristodo meáiruiñeno cue úrilla cue comeci jítailafue. Afe daje bífue mo iere ocuírídicue. Birui cue illáfuedo jíaimaci Crístomo aillo ñúefue nitádiaioi. Afe bie nita baimo, nai jamánomo íaioi nitállena jítáidicue. Nibai cáaiticue, nibai tíiticue dama mei áfena lloñédicue. Dama Jesucristomo ñúefuiaina nita daidicue. <sup>21</sup> Nai tíiñeno cue jáicaiadi, Cristo comeci jítainafue cue fínuana jamánomo naga raa baimo gáidicue. Iemona nai cue cáanafue ñuera; íemo jíái cue tülle jamánomo baimo ñuera. <sup>22</sup> Mei íadi bie cue abido nai cue caana llezica, cai Ocuíraima comeci jítainafue biniemo jino denóllena tájifireiticue. Meita bie mena cuemo itífue mona ní fue nizada óiticueza onóñedicue. <sup>23</sup> Nai feire jánaideza, bie ménafuedemona ní fue óiticue. Aféfuena ñue cue onuille féirede. Mei jíáfodo caifo Cristo diné cue jáillena tíiacadicue; bie izóidifue cúemona jamánomo ñuera. <sup>24</sup> Mei íadi jíáie izói omoi cígido bie caana abido cue jáicallena, ómoiena iere jítáirede. <sup>25</sup> Mei daa bífuena jáicina onódicue; omoi diga nai cue ícaillena ñue onódicue. Omoi diga cue íllena jítáirede, omoi ñue ínogafue nágarui jeire omoi cue otátallena. Ua ómoiri cue illa jítáirede, jae jeire omoi ua izói afe baimo jeire omoi óllena. Daje izói omoi ñue ínogafuedo omoi ióbioicallena, omoi cígiri cue ícaillena nai jítáirede. <sup>26</sup> Mei daí nana omoi cígiri íiticue. Afe uire cue bílledo Jesucristona jamánomo aillo ióbitaiti omoi.

<sup>27</sup> Cristo ñúefuiaí úbicaillano, afe izói nágarui omoi illafue ñue jáicina jóoneri. Nibai omoi cue érozaiadi bifue jeire omoi úamona, omoi illa ñúefuena fidíacadicue. Daje izói ómoimona jica iticue íadi, daje omoi illa ñúefuena onóiacadicue. Afe bie izoide ñúefuena fidíacadicue: dáaziena caimare omoi jáináillana onóiacadicue. Daje izói jílloilliuaimona lloga ínogauaimo izire omoi níciduana fidíacadicue. <sup>28</sup> Daje izói omoi bacáuai ímilaina due omoi jáicaiñenana cuemo omoi lloiri, daidicue. Afe omoi jáicaiñenafue, niné íaioi táinocaillifuena uáfodo jino llotátate. Mei íadi daje llezica omoi jílloillifuena uáfodo jino llote. Bie omoi onóitainafue Juzíñamui dibénemona bite. <sup>29</sup> Mena rafue Juzíñamui ómoimo mamede. Nánorafue daide:

Cristo uaina iere jeire órediomoi za.

Nane jíáfue daide:

Cristo ñúefue jeire omoi ua méifomo, afémie ícoiri duere zefuífirediomoi.

<sup>30</sup> Cue naa ómoiri daje fuirilla izóidifue mo iticai. Naui cue fuirídime izói íllana cíódi omoi. Ja birui fuirídime izói, nai cue jáicana ráfuena onódi omoi za.

## 2

*Cristo jamánomo uáitagami ena jaide ie méifomo Juzíñamui jamánomo ñue ébifue íemo nitade*

<sup>1</sup> Ja birui Cristo ómoina náicaitarede. Afémie ómoina izíruillano, comeci zúuren amona omoi comécina cáimacaitarede. Ie Ñuera Joreño omoi diga ite. Coním ana izíruillafue dúecaillafue diga afe dibénemo ití omoi. Nana bífuiaina omoi onón amona, mai cue omoi ióbitari. <sup>2</sup> Ua caimare ñue omoi illáfuedo cuena ióbitari. Afe izói daje izíruillafue mo omoi jáináin amona cuena ióbitari. Afe mei dájemo comeci jítainafue jeire omoi úado cuena omoi ióbitari. Afe emódomo dáafue mo comécinado cuena omoi cáimacaitari. <sup>3</sup> Dani omoi comeci jitailla izói mamériñeno iri. Fia abi ínuafuedo nífuena lloñeno iri. Mei íadi comeci mánainafuedo omoi mamériri. Omoimona illa dígamierie omoi aino cómena o baimo comécina ñuera, omoi daífireiri. <sup>4</sup> Dani omoi ñue illáfue na jenóñeno iri. Mei íadi nana jíaimaci ñue illáfue na omoi jenori.

<sup>5</sup> Cristo Jesús comeci mámia izói, dájemo comeci omoi mameri. <sup>6</sup> Nano fueñe ie illa llezica afémie daa Juzíñamui izoide. Juzíñamui izói ie illa ríino afémie ite. Mei íadi ie fiénocaiga ríinona “Raire meine cue olli” daiñede. <sup>7</sup> Mei íadi afémie Juzíñamui izoina llezica afe íemo ite ríinona oni eneno fiénocaide. Fiénocaillanona jiba iima jéicia izói Cristo jéiciga. Daií ie jéicinamona fia jamai táijitagamie bie éniedo jáicana izói jáicade. <sup>8</sup> Jamai cómena ie illa llezica jamánomo comécina mánaidimiena abí mamede. Daií mámiano ie Moo Juzíñamui daináuai jeire uano dama tíizaide. Ua aillo meáire cruzmo tíizaide. <sup>9</sup> Ie jira Juzíñamui jamánomo aillo ñúefue íemo nitade. Ua áfemona nana jiáie mámeciai baimo jalléidicina Juzíñamui íemo jítade. <sup>10</sup> Daií bie mámecina Juzíñamui íemo jítade, nana comini ie anamo dújuillena. Ua afe Jesús dainácina íaioi cacánamona nana monamo itínuiái, bie éniemo itínuiái, daje izói énie anamo itínuiái cañícido ie anamo dújuitiaioi. <sup>11</sup> Daií dújuillano nana comini comécido íena ónuano, Jesucrístona nahí Ocuíraimana dáitiaioi. Daií dainado Moo Juzíñamuimo ñúefue nitaitaioi.

*Crístomo Jaináidino bínie egáñotino izóidiaioi*

<sup>12</sup> Mei jira, cue izíruiga ámatiai, nauí omoi cígiri cue illa llezica jaca ómoimo cue llogáuaina jeire otíomoi. Ja birui ómoimona jica itícuemo, nauí omoi úana izói, afe baimo aillo jeire omoi oíri. Dani omoi jíllonafuemo comécina mánaidimie izói jacíruioicana áfemo omoi comécioiri. Aféfuena nana comínimo ñue jino omoi denóoicairi. <sup>13</sup> Mei Juzíñamui afe ñuera comeci óiacanafuiái ómoimo fecádimie. Afémie dama ie comeci ñue jítainafuedo ómoína canófirede, omoi comeci ñue óiacanafuiái jino denóllena.

<sup>14</sup> Bífuiái jino omoi denolle llezica nana omoi jetácafuiái fiéni úriñeno omoi finori. Daje izói áfena júfidoñeno omoi finori. <sup>15</sup> Iemona bie izói omoi iri ninena jiáimaci ómoimo íaifue jóoneñeillena. Daií nífuenino omoi iri, áfemona íaifuenidinona omoi ílleza. Mei daií omoi íllamona, comécina íaifueмо féitate figóñede comini cígiri, Juzíñamui úruiaína mamélliomoiza. Iaioi cígiri, ucudu caifona bie jítirede énie egáñua izói, ie izói comini comeci jítirenana egáñoitíomoi. <sup>16</sup> Afe egáñuado zíñona cáataite uai íaioimo jino llóitíomoi. Daií Cristo billíruimo ómoiri meáidaiñeno caimare abí ínoitícue. Daje izói omoi ñue illáfuedo nauí ómoiri iere cue táijinafue táinomo jifánofiñenana onódicue. <sup>17</sup> Nauí ñúefuena omoi ínuaruimo dani omoi illáfueña Juzíñamuimo llotíomoi. Birui nai omoi ínogafue ñue jáicina cue jóoniamona, nibai benó cue tíadi, áferi cáimacaitícue. Afe llezica omoi cánuaibiga íóbillafueri íóbidícue. <sup>18</sup> Daje izói caimare omoi iri; cue cáimacailla dibéfuemo jeire omoi oíri.

*Timoteo Epafrodito díga Filipos comínimo oréillí fue*

<sup>19</sup> Cai Ocuíraima Jesús comeci óiacania, Timotéona omoi eróizaitaitícue. Omoi illafue afémie abido cuemo lluaíbiadi, iere áferi cáimacaitícue. <sup>20</sup> Cue comeci faca izói, comeci facade jiáie cómena íñede. Dama Timoteo cue izói comeci úrilla. Dama afémie omoi ñue illífuemo uáfueña comeci facáoifirede. <sup>21</sup> Nana jiáimaci dani íaioi comeci jítainafue jenódiaioi. Cristo Jesús dibéfuena lloñédiaioi. <sup>22</sup> Afémie cuemo ráifinafuena náganuaímo jino ciótagaza onódiomoi. Ñúefue jino cue llócaillado afémie cue díga, jító izói jáicaide. Ua moo ie jító díga táijicana izói cue díga táijicaide. <sup>23</sup> Cuemo ite itífuiaí jino déillana ñue cue onóadi, bie Timotéona omoi méiñOtaacadícue. <sup>24</sup> Cai Ocuíraima ñue ínotícue. Iemona nibai ómoína raire dama eróizaibitícue.

<sup>25</sup> Daje izói cúemona uáfodo jóideza, cue ama Epafrodito omoi cígimo jáirena. Afémie cue táijinana nabáifiredimie. Daje izói fuirilla izói cue llócaigafue nabáifiredimie. Mei íadi nauí cue jitaica raamo táijillena omoi cuemo orécamié, abido ómoimo orédicue.

<sup>26</sup> Mei afémie nana ómoína izire cióacade. Ie irárenana omoi fidínamona afémie comeci

iere járitaide. <sup>27</sup> Uáfuenta iere irárede; tíllanomo figo dúcide. Mei íadi Juzíñamui íemo dúcaillano íena jíllotate. Dama afémiemo dúcaíñedeza; mei jíái daje izói cuemo dúcaide. Ua Juzíñamui cuemo dúcaide, cuemo ite zúufuiai baimo jíáie aillo comeci zúufuiai cuemo bíñeillena. <sup>28</sup> Iemona íena iere oréacadicue, raire afémiemo omoi érocaillano iere omoi íóbicaillena, cue zúucaillafue raire niné féilleza. <sup>29</sup> Bie Epafrodítóna mai jamánomo caimare omoi uáidori, Juzíñamuimo izire jainaide ámaza. Nana ie illa izóidimíai caimare jacíruioicana íaioimo mai omoi cacáreiri. <sup>30</sup> Ua afémie Crístomo táijinafuedo tíllanomo figo dúcide. Dama ie cáanafue jacíredifueмо afémie jóonete cuena canóllena. Ua omoi bíninamona afémie cue cánuabillena iere jamánomo nícidote.

### 3

#### *Uáfuenta Juzíñamui íóbilla cai ñue jaícina illafue*

<sup>1</sup> Cue ámatiai, mai cai Ocuíraima omoi íóbioicairi. Cue cuegafue meine ómoimo cue lolle cuena áfedua izói íñeite, mei íadi ómoína iere ñue canode. <sup>2</sup> Íairuiga jiba jico izói fiénidifueмо itímacimona abí omoi rairuiri. Omoi bacano ícoi quetátafirediaioi. <sup>3</sup> Cai bie ua quetácamacínaza. Cai bie cai joréñodo Juzíñamui íóbillamacídicaí. Fia jínofenemo cioide raana íñoñédicaí. Cristo Jesús íeiena cai íllari caimátaidínodicaí. <sup>4</sup> Bífuiaimo aillo cue ínnoregafuiai ite íadi, áfena lloñédicue. Cue baimo buna aféfuiaimo ínonide. <sup>5</sup> Cue jocóinamona ocho dígarui íllamona cue bacano ícoi quetádiaioi, mei nahí israelita nairai ímiedicueza. Cue bie Benjamín izíemo jaináidímiedicue. Cue jocóinanomona hebreo ímiedicue. Ua hebreo ímie jítoídicue. Judíuai ocuícáfue jino cue dobáíñuamona cue bie fariséodícue. <sup>6</sup> Jacire ocuíoídmie izói Crístomo jaináidino fállena íaioina racádicue. Judíuai ocuícáfueмо lloga ñue jaícina illafue díbéfueмо, jaca nífuenidímiedicue. Bu úaitañegamiedicue. <sup>7</sup> Mei íadi nana bie nauí cúemona aillo ráifidífuiaína, ja birui aféfuiaina Cristo ícoína náfueñédicue. Ua aféfuiaina jamai ráifíñedífuiai izói áfemo comécíidicue. <sup>8</sup> Afe baimo aillo jíáífuemo comécíidicue. Cue Ocuíraima Jesucrístóna cue onóillífue, nana cuemo itífuiai baimo aillo ráífide. Iemona cuemo itífuiaína féitaticue. Cristo ícoína naga cuemo itífuiaína cue féitaga. Ua aféfuiaina oni dotáacaiga raa izói comécíidicue, afe íbana Cristo cue náamatallena. <sup>9</sup> Daje izói cue afémiemo jaináiacadicue. Ocuícáfuenta cue ínuamona ñue illáfuenta llínoticue. Mei íadi afe ñue illáfuedo Crístomo jaináitíicue. Jesumo ínotinomo Juzíñamui iga nahí ñue illáfuedo Crístomo jainaiticue. <sup>10</sup> Cue comeci jítainafue Cristo cue onóillena. Daje izói ie tíllanomona meine abído cáatate ríinona, “Cuemo iri,” daídícue. Afémie duere zefuilla izói duere zefuícadicue. Afe daíí ie tíllaruimo ie illa izói íitíicue. <sup>11</sup> Afemona tíidínuaí meine cáallífueмо ocuírídícue.

#### *Cristo fueñe cue ocuilla izói cue jáillena, fúirilla izói izire nícidocana uiticue*

<sup>12</sup> Ja nana afe bie mamérrillafue otícue daííñédicue. Daje izói comeci jaícina ñue jóidímiedicue daííñédicue. Mei íadi Cristo fueñe cue ocuilla izói íacadícue. Ie jira nágarui aféuaimo nícidocana uiticue, afémie cuena daína izói cue jáillena. <sup>13</sup> Cue ámatiai, bífuiaimo ja dúcidícue dama daííñédicue. Mei cue nahí finóacaigafue jíáífodo jóide. Nauí cue illáfuenta féitaticue. Afe llezica nahí como cuemo déioicaitícuemo ríire comécíidicue. <sup>14</sup> Aízídino raire mózizailla izóidínomo dúciacadícue. Juzíñamuimona fia jíridolle raa izoide cue llínuaibillena, Juzíñamui monámona cuena uáidote. Crístomo cue jaináinamona afe jíridolle raana máíñoitíicue.

<sup>15</sup> Cáimona nana ínnogafuedo ñue móonaitino, mai bie izói cai comécioilli. Jíáífodo omoi comécííadi, Juzíñamui áfena ómoína fidítaite. <sup>16</sup> Mei íadi bifue mai cai náfuelli: cai onógafue izói mai ñue cai illi. Daje izói ñue jaícina mai cai comécioilli.

<sup>17</sup> Cue ámatiai, naui omoi cígiri cue íllana ciódiomoiza, afe izói omoi iri. Omoimo cue ciotagafue jeire otínomo izire comeci omoi facáoiri. <sup>18</sup> Ja aillo Cristo tíllafuena uáitativo íteza. Iemona diga icaiño afémacido ómoimo lloticue. Nane zuure ébicaillano dáanomo ómoimo llóiticue. Afémacimona abí omoi rairuiri. <sup>19</sup> Bie izói itino írairuimo niné táinocaitiaioi. Dani íaioi abí jítáinafuaina daidíaioi:

—Bie cue juzíñamui, —daidíaioi. Meáirede raana meáiruñediaioi. Mei íadi áfedo abí ínotiaioi. Fia bie énie ífueмо comécidiaoioi. <sup>20</sup> Mei íadi cai nana caifo mona imácidicai. Cai nana, cai jíllotade Ocuíraima Jesucristo monámona bíllemo úiñoticaí. <sup>21</sup> Cai zíññede abina afémie méduaibite, afémie ie abí ebire cíoina izói cai íllena. Afémiemo ite ríinodo naga raana náamatade. Iemona afe daje íemo ite ríinodo cai abí ífuena méidoite.

## 4

### *Jaca cai Ocuíraimamo caimátaioicairi*

<sup>1</sup> Cue izíruiga ámatiai, mei ómoína iere cióiacadicue. Omoi cue ióbioinamacidiomoí. Iemo cue jíridolle raa izóidiomoí. Ua cue izíruigamacidiomoiza; mai cai Ocuíraimamo jaícina riire omoi comécioiri.

<sup>2</sup> Evódiana mámearedingo íemo Síntique diga, izire jícadicue, dáafuemo ómingo coméciri. Mei cai Ocuíraimamo jaináinamona ebúñona maméidiomíngoza. <sup>3</sup> Daje izói jíaimiemo úriticue. O, cue táijnado jaca ñue cuena nabáidío. Ua cue ínoga nábaidío. Jira bie cai miríngotaina o canótaiticue. Mei afe íainguai cúeoiri afe jíllona uai cue llócinado nícidocaidiaínguai. Bíanguai, Clemente diga naa jíaimieoiri cúeoiri tájicadiaioi. Nana afémaci mámecei ja Juzíñamui zíñña illino óitino mámecei cúeinanico como cuela.

<sup>4</sup> Nágaruillaído cai Ocuíraimamo mai omoi caimátaioicairi. Nane dáanomo daidicue, mai caimátaioicairi. <sup>5</sup> Omoi comeci mánaina naga cómemo, mai ciótaitiomoiza. Cai Ocuíraima billíruimo ánozideza. Cai áinori íteza.

<sup>6</sup> Omoi comeci nífueмо jíritaitaño iri, mei jíáfodo naga ómoimo comuídfuiaína Juzíñamuimo úrilla llezica, afémiemo mai omoi lloiri. Daje izói omoi jitailla raana jícarí. Afe llezica “Iere figora” mai omoi daífireri. <sup>7</sup> Ie mei Juzíñamui comeci caimare uái illafue ómoimo íteza. Bie comeci uái illafue comíni onóiga táinofue baímo ñuera. Afe caimare uái illafue omoi comécina ñue ráiruite. Daje izói omoi comeci jarire úrillaфуena ñue manánaitaite. Mei Cristo Jesumo daane jáinaitiomoiza.

### *Ñúefuiaimo comeci omoi facáoiri*

<sup>8</sup> Cue ámatiai, íraicaiño omoi llóiticue. Nana nahí uáfuaímo omoi coméciri. Daje izói nahí caimare jacíruioigafuaímo omoi comécioiri. Daje izói nana jaícina illáfuaímo omoi coméciri. Afe izói nana íainidífuiaímo omoi coméciri. Daje izói nana ióbillafuaímo omoi coméciri. Daje izói nana caimare jalléinafuemo omoi comeci uibíoiri. Nana bie ñúefuiaímo omoi comécioiri. Daje izói nana ñúefuena nitáfireganomo afémacimo omoi uibíoiri.

<sup>9</sup> Omoi cue llófua izói mai omoi iri; ómoimo cue lloga lletárafuaímo mai omoi ínori. Cue dáinana omoi cacana izói, cue finócana omoi ciona izói, afe izói mai omoi iri. Iemona comeci caimare uái illafue fecáfirede Juzíñamui omoi diga ífireite.

### *Filipo imaci fia fecaca raa Páblomo orédiaioi*

<sup>10</sup> Meine nane cuemo omoi comécillari cai Ocuíraimado iere ióbidicue. “¿Nibái mei cuena féitativo?” ómoína daíacañedicue. Cue omoi canóacana raa átitimie íñedeza, onódicue. <sup>11</sup> Cue ráaninari ómoína fiéni úacañedicue; cuemo ite raari cue ióbillana ja fibídicue. <sup>12</sup> Duere cue íllana fibídicue. Daje izói aillo cue jitaica ráaniai íllana fibídicue. Nífue cuemo comuíadi, afe izóidífue cue ocuállana ja fibídicue. Nibai jeíredicue, nibai

jufíruiticue; afe izói caimare cue íllana fibídícue. Güiga alla cuemo íadi, mei cuemo íñeniadi daje izói ñuera. <sup>13</sup> Naga cuemo eróicana comuide raana ocuíredícue; mei Cristo cuena ríiduado ocuíredícue. <sup>14</sup> Mei íadi cue dúerena llezica cuemo omoi dúecaillamona, cue omoi cánua ñuera. Diga icaiño duere cue finóinari omoi zúunailla cuena náicaitade.

<sup>15</sup> Omoi Filipos imáciomoi, daje izói bífuena onódomoi. Nano fueñe jíllona uai cue llócaina llezica, daade cue canófiredinodíomoi. Ua Macedóniamona oni jíainomo cue jailla llezica daade cue canode Jesumo ínotinodíomoi. Fia fecaca ráaniai cuemo oréfiredíomoi. Afemona comínimo cue feca izói, íemo íaíomona cue llínua izói, afe dájemo naa ómoiri tájidinodícaí. <sup>16</sup> Nai Tesalónicomona cue illa llezica, omoi diga ícaiño, fia fecáfireiga ráaniaina cue jítaicaniaina cuemo orédomoi. <sup>17</sup> Fia ráaniaina cue llínoiacanamona comécíñedícue; mei íadi cue comeci jítaillafue, Juzíñamui uíecomona ómoimo aillo íi, daídícue. Iemona daí aillo omoi ofítaga raana uire maíñóritíomoi. Afemo comécíidícue. <sup>18</sup> Mei nana jae cue llínoga. Afena cue jitaica ráaniai baímo ja llínotícue. Epafrodítodo cuemo omoi oreca ráaniai figo baite. Baímo cue jítaíllena íñede; ja aillo íteza. Cuemo fia omoi oreca ráaniai íere Juzíñamuina íóbitade. Daí cuena omoi cánuado, Juzíñamui comeci jítaína finódomoi. Aferi Juzíñamui íóbicaillano afémíe áfena jeire ote. <sup>19</sup> Cue ínoga Juzíñamui nana omoi jitaica raana ómoimo fécaite, mei nana Cristo Jesús ebire comútaga ráaniai Juzíñamuimo dúideza. Ie jira íemo aillo íte ráaniai izói, afe izói ómoimo fécaite. <sup>20</sup> Mei ñuera ebíredí fue caí Moo Juzíñamuimo jaca íoicaideza. Daíítadeza.

#### *Iraícaíño uáidonocaillafue*

<sup>21</sup> Cue dibénedo nana Juzíñamuimo jaináidino Jesucristo mámedido omoi uáidori. Cue diga íte caí ámatíai ómoimo uai orédaíoi. <sup>22</sup> Nana benomo íte Juzíñamuimo jaináidino daje izói uai ómoimo orédaíoi. Romano nahíllaíma jofomo ítino íere ómoína izire uáidoiacadaíoi.

<sup>23</sup> Caí Ocuíraíma Jesucristo nana ómoína ñue ézicíteza. Mai daíítadeza; jae ñíe.

## COLOSAS IMÁCIMO SAN PABLO ORÉCABE La Carta del Apóstol San Pablo a los Colosenses

### *Pablo Colósamo ite Juzíñamuimo ñnotinomo cuete*

<sup>1</sup> Cue Páblodicue. Iemo cue nabai Timoteo diga ómoína uáidotícoco. Juzíñamui comeci jítaina izóí Jesucristo orécamiedicue. Afe orécamiedicue daiíacana uai, Jesucristo ñúefuena llujítagamiedicue. Cue ama izóidimie Timoteo diga, <sup>2</sup> Colosas jófuego ite féitaño ñnofirede ámatiamo bibe cuetícoco. Omoí daje izóí Crístomo jaináidíomoi. Cai Moo Juzíñamui ómoimo caimare eróicaiteza. Afe llezica Juzíñamui dibénemo icíriño uái illifue Juzíñamui ómoimo fécaiteza.

### *Pablo Jesumo ñnotinona Juzíñamuimo úrite*

<sup>3</sup> Omoiena Juzíñamuimo coco úrilla llezica jaca cai Ocuíraima Jesucristo Moo Juzíñamuina “Figora” daiífredicoco. <sup>4</sup> Mei Cristo Jesumo omoi ñnuana cócona ja fidítaiioiza. Daje izóí Juzíñamuimo jaináidinona omoi izíruillana cócomo llotíai. <sup>5</sup> Afe bie izóí itíomoi, mei monamo ómoimo éenoga maiñolle raamo ñue ocuítíomoi. Afe ómoimo lloga ua uai omoi cacánamona, ñue ocuítitagaomoi. Afe lloga ua uai ñuera jílona uai. <sup>6</sup> Afe daje lloga uai náganuaimo llócaillado oni aillo móonaioicaide. Ua, ríganiai llizilla izóí, iere jebuide. Mei daje izóí afe uai omoi cacana mei, omoi cígiri aillo jebuúdeza. Juzíñamui caina izíruillana omoi cacana mei, afe izíruillana ua ráfueza ja omoi onónamona, afe ñúefue ómoimo aillo oni móonaitagaza.

<sup>7</sup> Cai izíruiga ama Epafras bie ñuera uai ómoimo llófue. Afémie nauí cai méifomo afe uai llúamo táijide. Ie jira afémie ómoiena Cristo ñue ocuícamié, mei afe llezica afémie Crístomo féitaño iere ñnofiredimieza. <sup>8</sup> Afémie Ñuera Joreño ómoimo comútaga cuena omoi izíruillafue cuemo lluíbite.

<sup>9</sup> Jira áfena cai fidínaruimona biruimo jaca fáicanocaiño ómoiena Juzíñamuimo úrifredicoco. Juzíñamui comeci jítainana ñue omoi onóillena afémiemo jicáfiredicoco. Daje izóí nana jíáiforie ifoci úrillana omoi onótallena jicádícoco, naa Juzíñamui dibéneo onógafuiai. <sup>10</sup> Afe bíemona cai Ocuíraima Jesumo jaináidino illa izóí, ñue íredíomoi. Mei afe izóí omoi ille jítáiredeza. Daií omoi illamona afémiena nágarui ióbitaitíomoi. Afe afémie ióbilla raa be ñie: Riga llizíllajiai aillo illa izóí, omoi finoca ñúefuina aillo omoi jebuitallena; íemo jíái Juzíñamuina jamánomo ñue omoi onóillena. <sup>11</sup> Daje izóí nana cai ebírede Juzíñamuimo ite ñuera rínodo omoi ñue náireillena afémiemo jicáfiredicoco. Daií jicáfiredicoco nana ómoimo cómutifuiaina jaritaiño fáicana omoi ocuíoillena. Daje izóí caimare aféfuina omoi ocuíoillena ómoiena jicádícoco. <sup>12</sup> Nane daií omoi comeci náireillamona caimare cai Moo Juzíñamuina “Iere figora” omoi daiífireillena jicádícue. Mei nana afémiemo dúidinomo ie fecalle zíñona illifue ómoiena batí Juzíñamui illa úzeredínomoi omoi maiñóllena, afémie ómoína ñue finódeza. <sup>13</sup> Mei uáfueza, Taife ocuífiriga jítifomona Juzíñamui caina jíllotate. Jílluano ie izíruiga Jitó illáimana illánomo caina jóonete. <sup>14</sup> Mei afémie Jitó tíllado, caimo ite íaifuiái féitajano, Juzíñamui caina jíllotateza.

### *Cristo tíllado Juzíñamui diga icíriño dájena uái iticai*

<sup>15</sup> Afe bie cai Moo Juzíñamui jaca cióñenamié íadi, comini ciónamie izóí ie Jitodo ana bite; íemona afe Jitó Juzíñamui ñie ua izóidena caina onótate, naa ie comeci ífuiai. Afe Jitó nana comútaga ráaniai baímo jamánomoidimie. <sup>16</sup> Juzíñamui ie Jitodo nana monamo



itínuiaina finótate, naa éniemo itínuiari. Cíoide ráaniai naa cíõñena raa diga, nana afémiedo Juzíñamui finoca. Mei uáfueza, daa fiéñeno, nana afe cai cíõñena ríinoredinona naa ocuídillainiri, íemo jiái Juzíñamui abi imaci diga, dáamiedo finócaiaioi. Nana afe ie Jitodo finoca. Daje izói afémie íena finoca. <sup>17</sup> Mei afe Cristo nana ráaniai nai íñenia afémie jaca íteza. Daje izói dáamiedo nana ie finoca ráaniai oni féiraiñeno ñue jaícina itíaioi. <sup>18</sup> Afe baimo Cristo nana afémiemo jaináidino afe ifo dainámie. Iemo nane afémiemo ñnotino ie abi dainámaci. Afémie afe bie ie abi daina ñnotinona zíñona cáatatimie, mei afémie tíidinomona fueñe meine cáadimienaza. Afémie daií fueñe meine cáadimiena jaide, nana itífuiái baimo jamánomoidimiena íllena. <sup>19</sup> Nana Juzíñamui zíñona illa izói, nana afe izói Cristo íllena Juzíñamui jitaide. <sup>20</sup> Nane daje izói afe Cristo tíllado, Juzíñamui nana afémie comuítaganuiaína icírafuenino dájena caimare uái illífuemo jóoneacade. Mei uáfueza, nana biniemo itífuiái naa comini diga, íemo jiái nana monamo itínuiari, Cristo cruzmo tíllado Juzíñamui éoiñeno dájena caimare uái itátaacade.

<sup>21</sup> Naui diga íaífuiái omoi finuamona Juzíñamuimona iere jicánemaci izóidiomoi. Daje llezica omoi comécido Juzíñamuina éoidinona itíomoi. Mei íadi ja birui Juzíñamui afémie diga ómoína icírafuenino dájena uái illífuemo jóonete. <sup>22</sup> Cristo tíizailla llezica ie abi izi cácanado, Juzíñamui daií ómoína caimare dájena uái illífuemo jóonete. Afémie bie izói finode, íaífuenidinona, daje izói nífuenidinona afémie uíécomo cai ie jóoneillena. Uáfueza, afémie bie izói finode íeiena cai íllena. <sup>23</sup> Bie izói uáfueza omoi íllena, fáicanocaiñeno jaca ñnorediomoi. Afe izói amena ana jica jainade riire illa izói, riire írediomoi. Daje llezica ñuera jíllona uaina omoi cacánamona omoi maiñoca caimare ocuírillafuena fáinocainidiomoi. Afe bie ñuera jíllona uai ja náagobiaido llócaiga. Iemo afe izói afe llócaigamo cue jiái canódicue, mei afe uai llócaillena Juzíñamui jóonenocaigacueza.

### *Pablo Jesumo ñnotino cánoitimiena jóonega*

<sup>24</sup> Birui omoi ícoína duere cue zefuíllari íobidicue. Mei áfedo Cristo abi daina afémiemo ñnotinori nana uícodo lloga nai duere cue zefuíllana ñue ícoimo fuitáredicue. <sup>25</sup> Mei omoi ñue íllena Juzíñamui cuemo jóonenocaigafuedo nana afémiemo ñnotino cánoitimiena jáidicue. Mei uáfueza, Juzíñamui nana comínina llóicaiga uai, afe uai jino cue llúana ícoimo fuitállena jóonenocaigacue. <sup>26</sup> Afe bie ñuera uai jaiái ninómona ua biruimo comini figo onóñediaioi; diga igímaiaí záilla méifomo afe uai nai retáiruiga raa izói joide. Mei íadi ja biruimo íeiedinomo ja jino báifitate. <sup>27</sup> Juzíñamui ja judíoñedinomo afe bie naui báinino ite uai ñuera áillue cáimafuena jino ómoimo onótaiacade. Bie báinide uai daina, Cristo ómoimo illa lloite. Iemo íco jiáiruido ñue caimare omoi illífuemo omoi ocuírillena afémie jino dénoite.

<sup>28</sup> Cai bie Crístono jino uáfodo lloticaí. Afe llezica nana comínina ñue rairuidicaí. Daje izói nana ñúefuiái ñue íaioi onóillena afémacina nana llófiredicai. Afe izói naga come Crístomo dájena jaináillamona afémie dibénedo ñue íaioi móonaillena llófiredicue. <sup>29</sup> Bie cue fuitállena, nana Cristo cuemo iga máriedo fúirienaila izói nágarui Juzíñamuimo izire jicáfiredicue.

## 2

<sup>1</sup> Mei bífuena ómoína fidítaacadicue. Jaca ómoiena iere fuirilla izói Juzíñamuimo riire jicáfiredicue; daje izói Laodicea jófuemo itino íena, íemo jiái nana cue uíecona cíõñedino íena riire jicáfiredicue. <sup>2</sup> Afémaci comeci náireillena fuirilla izói Juzíñamuimo riire jicáfiredicue. Iemo afe comeci náireillamona conímána ñue íaioi izíruillena riire níciduano jicáfiredicue. Mei daií dájena omoi jainaina jira, bie naui figo báitañega uai Cristo omoi

ñinua mei, omoi diga íllana ñue jaícina onórediomoi. Afe daií uáfori jaícina afémiena ñue omoi onóillena, riire níciduano nágarui Juzíñamuimo izire jicáfiredicue. Mei jii, nana bie riire nícidotícue, figo ónoñega Juzíñamui ñuera uaina ñue omoi onóillena; mei afe báíñega Juzíñamui uai daina dama Crístoza. <sup>3</sup> Mei uáfueza, nana comeci jamánomo úrillafuiai naa onóigafuiai afémiemo ite. <sup>4</sup> Bu ómoína ebírede uáillaído bífueñeillena, nana bífuiai ómoimo llóitícue. <sup>5</sup> Cue abi omoi cígiri iñede íadi, benómona jicana izire ómoimo comécicue. Iemona daií cue fídía izóí dájena camare omoi íllari ióbicue. Daje izóí fáicanocaiñeno Crístomo omoi ñnuari ióbicue.

<sup>6</sup> Jae cai Ocuífirede Jesucrístomo ñue omoi ñnuamona ie lloga iodo jáirediomoi. <sup>7</sup> Afe bie daiíacade, amena riire jáinaja izóí, Crístomo riire jáináirediomoi. Iemo jáí daje llezica jáinónide jáillirai izóí omoi íllena, nágarui Cristo uallai jeire omoi ua baímo jamánomo jeire ófireiri. Mei afe izóí llófuegaomoi. Iemo afe llezica nágarui Juzíñamuina “fere figora” mai omoi daiífireiri.

### *Crístomo cai jáináinamona cai comeci cómuena méidoga*

<sup>8</sup> Mei birui ñue abí omoi rairuiri, baimaci omoi jífueacadeza. Afémaci táinodo ifoci úrillado, daje izóí íaiói lloga taino uáillaímo jífuebiñeno iri. Mei afémaci Cristo dibénemo iñédiaíoi. Mei jáíafodo jáiai ninomo comini lloga taino uai dibénemo jáináidiaíoi. Daje izóí dama bínie raa dibénedo comini comécillafuiai jáináidiaíoi.

<sup>9</sup> Mei íadi nana Juzíñamui zíñona ñue illa dieze, afe izóí Crístomo nana ñue jaícina ite. <sup>10</sup> Iemona Crístomo dájena omoi jáináinamona, Juzíñamuina oruide comini izóidíomoi. Afe Cristo nana monamo ite ocuídillainina, naa cai cióñena ríinoredinona ocuífirede. <sup>11</sup> Iemo nane daje izóí Crístomo dájena omoi jáináinamona ja bacano ícoi quetácano izóidíomoi. Mei íadi ua quetañegaomoi, mei jáíafodo nanómona omoi jocoína llezica ómoimo ite íaifuemona ja jíllodíomoi. Mei ua, bacano ícoi quétaja izóí, omoi fiénidífuemona quetaca izóí jíllodíomoi. Afe bie quetáfírena Crístomona comuide. <sup>12</sup> Iemo nane jáífuemo cacáreiri. Mei omoi báutizanamona Cristo éniemo ana raía izóí ja raigáomoi. Bie nanómona omoi fiéni finócafuiái titaca izóí, ja fáicanocaitíomoi. Iemo Juzíñamuimo ite áillue ríinomo omoi ñnuamona Cristo izóí cómomiena afémie diga ja cáadimacina itíomoi; mei Juzíñamui dama íemo ite ríinodo Cristo tíide meine cáatateza. <sup>13</sup> Naui jáíruido ómoimo ite íaifuiamona comeci diné tíidino izóidíomoi. Daje izóí quetátañena judíuainédino omoi illa llezica, omoi fiénide óiacanafue jeire omoi úamona, comeci dine ónonino tíidino izóidíomoi. Mei íadi birui Juzíñamui nana omoi fiénidífuiái féitajano, dájena Cristo diga ómoína abído cáatate. <sup>14</sup> Caimo ite íaifue íballe raa izoide. Afe cai íbañenia tíiredicai. Mei íadi Cristo tíillado Juzíñamui cai íbácana záitate. Afe cai íbácana Juzíñamui fiébiñeno ñue íbaja Cristo cruzmo coráiado ácatate. <sup>15</sup> Mei afe llezica Cristo cruzmo tíillado, monamo ite ocuídillainina, naa cióñena ríinoredinona afémie ríinitade. Afémie uáfori íaiói illáiena báiruado, nana afémaci baímo ie jamánomoidimie íllana ácatate.

### *Monamo ite ñúefuiaina omoi jenori*

<sup>16</sup> Mei bíemona ninó dáamie omoi güille dibénedo omoi jánana júfidoiadi, áfemo mai náfueñeno omoi iri. Daje izóí omoi júrua dibénedo ninó dáamie fiéni ómoína úriadi, áfemo náfueñeno mai omoi iri. Iemo jáí dáarie judíuái lloga ráfuiamoi eneno omoi comécíñenado, ninó dáamie omoi jánana júfidoiadi, áfemo mai náfueñeno omoi iri. <sup>17</sup> Mei nana bífuiai, uire Cristo bíllifue dibénedo comini ñue onóillena canódeza. Mei íadi Cristo bíllamona afe cai onótatífuiái jítaiñega, mei dama Crístomo nana uafue raa báífideza. <sup>18</sup> Iemona nino dáamie ómoína fiéniruiadi, mei afémie táinona mánaidimiena íllana ómoimo ácatateza, áfemo náfueñeno omoi iri. Daje izóí afémaci diga Juzíñamui abi imaci ómoína ióbitafireiadi, áfemo náfueñeno omoi iri. Mei afémaci ónoñega nicai anado ciófirena raado

úrifiediaioiza. Afémaci jiba come comeci fácafuiado abi iere ínofirediaioi. <sup>19</sup> Afémaci Crístomo dájena jaináineno itíaioi. Mei jáifodo Cristo nana íemo ínnotino ifódime. Afe ifo izói mamécamié nana ie abi écaja izói comécina náiretajamona afe abina móonaitade. Afe izói nana ie abimo jaináidino conímamo dájena jaináitajamona, ie abina móonaitade. Afémie Juzíñamui mamérilla izói nana bífuiaí ocuífiredede.

<sup>20</sup> Mei Cristo tíllaruimo afémie diga tíidino izói jáidiomoi; bie daiíacade nanómona omoi fiéni finócafuiái titaca izói omoi fáicanocaigaza. Afe llezica bie énie ocuífiredede cai cíóñena ríinoredinomona zuitácamaci izói jáidiomoiza. Iemona ¿nibái mei nai biniemo dúidino izói ífirediomoi? ¿Nibái mei ie ocuífufuemo jeire otíomoi? <sup>21</sup> Dáarie bie íaioi ocuica fímairilla uáimona bie izói daide: “Bie riñeno iri,” íemo jáí “Afeniaina güiñeno iri,” íemo nane jáí “Baie jetáñeno iri,” daide. <sup>22</sup> Nana bie rairuúllafuiái bie éniemo ite jétamona fúioicaité güilleniáimo dúide. Jira aféfuiaimo náfuenidíomoi. Nana afe íaioi ocuica uaillaí fia jiba comini dáina uaillaí. Daje izói fia jiba comini llófuega. <sup>23</sup> Mei uáfueza, afe bífuiaí báitafuiái izói cacáreide, mei afe ocuídino, “Bie cai dáina izói monamo itínona mai omoi caimátáifireiri” daií daidíaióiza. Daje izói fia comini dáina comécina mánaidinona ómoína oréacadiaioi. Iemo jáí comini íaioi abi táinona duere zefuítatiaioi. Mei íadi nana bie íaioi ocuífufuiai cai comécimo ite fiénide óiacanafuiái rairuúllena canóñede.

### 3

<sup>1</sup> Iemona, Cristo diga meine abido cáatagamaci omoi illa jira, mai mei mona dibénemo ite raa omoi jenori. Mei afénomo Jesucristo Juzíñamui nabézimona illáimana íteza. <sup>2</sup> Daje izói mona dibénemo ite raamo comécillano áfemo omoi járitaifireiri. Mei jáifodo biniemo ite ráfuiaimo izire comeci uitáñeno omoi iri. <sup>3</sup> Mei Cristo tíllaruimo afémie diga jae tíidinona jáidiomoi. Jae omoi jaiaí fiéni finóacagafue titaca izói afe omoi fáicanocaiga. Iemo ja birui Crístomo dájena omoi jaináinamona omoi uáfueña cáatagano; íemo jáí Juzíñamui dínomo rairuúcaomoi, mei Cristo daje izói Juzíñamuimo dájena jaináideza. <sup>4</sup> Dama Cristo cai uáfueña cáatagano. Iemo afémie cíocaille llezica, afémie diga cíocaitíomoi. Afe llezica afémiemo ite jamánomo ebírede ñúefuiaimona ómoiena máíñoitíomoi.

#### *Cai jaiaí illafue méiduano cómfuedo jáiredicai*

<sup>5</sup> Ie jira nauí bie éniemo omoi jainaina jira, ómoimo diga fiéni óiacanafuiái ite. Aféfuiaí titalle izói mai omoi fáicanocairi. Naga áinidimie ringo diga jaca iñeno o iri. Iemo jáí, áiredimie ie áíñedingo diga jaca iñeno o iri. Iemo daje izói jáíe cómemo íaifuiáido comécíñeno omoi iri, íemo jáí omoi abímona comuide jiruífueña omoi finóñeno iri. Daje izói omoi comeci fiéni óiacanafueña jeire oñeno omoi iri. Iemo nane jáíe cómemo úradoiñeno omoi iri, mei úradoifiredimie diga raa óiacanamona jánaraímo caimátáidimie izóideza; Juzíñamui ífuiaí baímo jamái binié raana izíruíteza. <sup>6</sup> Ie jira nana bífuiaimona íemo cacáñedinona Juzíñamui iere duere finófirede. <sup>7</sup> Iemo jaiaí Crístomo omoi ínnoñena llezica, nana bie izóidífuiaí finófirediomoi. <sup>8</sup> Mei íadi ja birui nana bie fáicanocairi: Jáímamo icíriñeno omoi iri, íemo rírede uaillaí bumó lloñeno omoi iri. Daje izói jáíe fiénidífuiaí finóñeno omoi iri. Iemo jáíma jánana úriñeno omoi iri. Daje izói jáíma zanóllena fiénide uáillaído íaire úriñeno omoi iri. <sup>9</sup> Conímamo táinona lloñeno omoi iri, mei omoi jaiaí fiéni illafue jae méidogaza. Daje izói nano omoi finófírega jae fáicanocaigaza. <sup>10</sup> Iemo ja birui comue iníroi jita izói ñue illáfueña ja méidotíomoi. Iemo afe comue illafue comuítatimie Juzíñamui. Ie jira ie illa izói afémie caína cómuena finótacana uite. Iemona afémiena ñue ícoímo ónoitícaí. <sup>11</sup> Afe jira afe cómomaci judío ímiena ie íllana náfuenidiaioi. Iemo jáí judíoñediníena ie íllana daje izói náfuenidiaioi. Iemo jáí afémaci bacano quetácamiéna ie íllana náfuenidiaioi; daje izói quétañegamiéna náfuenidiaioi. Afe izói afémaci onínemaci íllana, íemo jáí onóñedino íllana, íemo jáí izire ocuífíregano íllana,

íemo jiái ócuifinigano íllana náfuenediaioi. Mei jiáifodo afémacimo Cristo iere jamánomo ráifinamona dama afémiemo náfufirediaioi. Mei Cristo naga íemo ínotinomo ífiredeza.

<sup>12</sup> Iemona bífue mo cácarei: Juzíñamui ómoína izíruite. Izíruillano afémiemo ómoína nize de ie íaifuenide comínina omoi íllena. Mei ie jira bie ñúefuiaí izóí omoi ífireiri: Jiáimacimo dúcaifireiri. Jeruíñeno canófredimiena omoi iri. Comécina mánaidimiena omoi iri, cáimafuiaido úrifireiri, járidoñeno omoi iri. <sup>13</sup> Conímamo jaca járidoñeno fáicana omoi canori. Daa come jiámamo icíriadi afémiemo ñúefuedo omoi jicari, áfedo icírafue záillena. Omoi íaifue ícoinia Cristo oni féitaja izóí, afe izóí jiáimie omo fienu finóadi afe ícoinia oni o féitafireiri. <sup>14</sup> Nana bífuaí emódomo iere omoi izíruifireiri. Mei afe izíruillafue cómena dájena jaináitateza, jiáimaci diga. Afe daí jiáimacina cai izíruillamona, nana afe ñúefuiaí jaícina caina finótate. <sup>15</sup> Iemona Cristo comuítaga caimare uái illafue omoi ifoci úrillana ífoiteza. Mei dáamaci izóí íemo cai jaináinamona afe bie izóí cai íllena Juzíñamui caina uáidoteza. Afe llezica jaca Juzíñamuina “Figora” omoi daífireiri.

<sup>16</sup> Mai mei nana omoi comécido Cristo daínauai jeire óredimoiiza. Afe mei aféuái ñue omoi onónamona conímama omoi llófuere. Iemo daje llezica áfedo conímama ñue onóicana comécina omoi náretari. Iemo jiái Juzíñamui íobitalliruai omoi rófireiri, jiáie íena caimátailliruai diga. Daí ruano omoi comécido Juzíñamuina “Figora” omoi daífireiri.

<sup>17</sup> Mei jii, nana omoi jetácaga raa, íemo jiái ómoimo ocuica caimánidifue diga, naa omoi daíillifuiari cai Ocuíraima Jesús mámedido omoi finófireiri. Afe llezica Moo Juzíñamuina afémiedo “Figora” omoi daífireiri.

#### *Crístomo ínotinomo dúide comini diga finófirega uai*

<sup>18</sup> Daje izóí bie jiái llollífue mo omoi cácarei. Iníredingotiai, mai omoi inítiai anamo ñue ífireiri, mei Crístomo ínotinguaína omoi illa jira, afefue ínoredeza. <sup>19</sup> Daje izóí inítiai omoi áitaiña ñue izíruiri; afénguaina fiéniruiñeno omoi iri. <sup>20</sup> Uruiaí, omoi móotiaína nágafue mo omoi cacáreiri, mei afe daí omoi íllamona cai Ocuíraima íobide. <sup>21</sup> Móotiai, omoi úruiaína ícidoñeno omoi iri, afémaci jacinaillamona minícana finónide daí íaioi íñeillena. <sup>22</sup> Ocuífiregano, bíniemo ite omoi ocuínona nágafuiaimo ñue omoi cacáreiri. Daa afémaci ñue ómoimo comécillena afémaci fia eroína llezica ñue cacáreíño, mei íadi jiái daje izóí afémaci éroiñena llezica ñuera comécido omoi cacáreiri, mei Juzíñamuina ñúefuedo jacíruiticaiza. <sup>23</sup> Daje izóí nana omoi finóacaiga raa, ñúefuedo finori. Comini dibémedo izóí táijíño, Juzíñamuimo o táijina izóí omoi finori. <sup>24</sup> Mei ja onódomoiiza, Juzíñamui ómoimo lloga omoi jirídolle zíñona illifue afémiemo ómoimo fécaiteza. Mei uáfueza Cristo ocuícamacina maméidimoiiza. Afémiemo omoi ua Ocuíraima. <sup>25</sup> Mei íadi fienu finódimie afe íbana ie fienu finua dieze duere finóbite. Mei Juzíñamui jaca dáamie oni énenorie maméñede. Nana daje dieze jaícina duere fínoite.

## 4

<sup>1</sup> Ocuíraini, omoi anamo ite ocuífireganomo ñue jaícina omoi eroiri. Afémaci jitaica raamo uibíoicana omoi ocuífireiri. Mei monamo omoi Ocuíraima ítena onóredimoiiza.

<sup>2</sup> Mai fáicaiñeno Juzíñamuimo omoi úrifireiri. Jaca afémiemo cáaoína izóí úriri. Afe llezica “Figora” Juzíñamuina omoi daífireiri. <sup>3</sup> Daje izóí cáiena Juzíñamuimo omoi jicáfireiri, cai Ocuíraima uailai ñue cai llócaillena. Juzíñamui bie izóí caina itátallena omoi jicari. Daje izóí nauí comini figo ónoñega Cristo dibémedo uai, uáfori cue llófuellena omoi jicari, mei daí llófuere diceza. Nauí afefue cue llua jira ja birui llavébidicue. <sup>4</sup> Mai omoi Juzíñamuimo jicari, bie ñúefue cuemo dúina izóí, onóreoicana jino cue llóllena.

<sup>5</sup> Crístomo ínoñedino cígimo jaca ñue onódimie izóí omoi ífireiri. Nágarui Cristo illafue afémacimo raire omoi ácatafireiri. <sup>6</sup> Nágarui cáimafuiaido úrredio. Daje izóí jaca ñue oíacano o úriri, illa dígamie uai ñue o óllena.

*Iraicaiño uáiduafe*

<sup>7</sup> Cai izíruiga ama Tíquico, cuemo birui itifue ómoimo lluájite. Afémie fáicanocaiño iere cue canófredimie. Daje izói afémie cai Ocuíraima cue diga ocuífregamiena ite. <sup>8</sup> Ie jira afémiena ómoimo óreiticue, birui cai illafue ómoina onótallena; íemo jiái omoi comeci náiretallena. <sup>9</sup> Afe llezica jiáimie Onésimo mámeciredimie Tíquico diga jáite. Afémie cai izíruiga ama, íemo jiái iere ínofiregamie. Afémie ómoimaci ie. Afe íaillinoi nana benomo ífredífuiaí ómoimo llóitiaillinoi.

<sup>10</sup> Iemo cue llavébilla llezica cue nabai Aristarco, uaillai ómoimo orede. Daje izói Bernabé enaize Marcos uaillai ómoimo orede. Marcos dibénedo jiáie lluáfuiái ja onódiomoiza. Afémie omoi méiñuaiadi, caimare íena omoi uáidori. <sup>11</sup> Iemo jiái Jesús ómoina uáidote. Afémie jiái Jústona mámeciredimie. Juzíñamui illaíma illano dibénedo cue táijina llezica, daa afe bimaci judíuaimona Crístomo ínotino cue canódino. Afémaci iere daa cue íóbitadino. <sup>12</sup> Iemo jiái Epafras uaillai ómoimo orede. Afémie ómoimaci ie. Daje izói Cristo ocuífregamie. Afémie ómoiena jaca izire Juzíñamuimo jicáfiredé, fáicanocaiño Juzíñamuimo omoi ínollena. Daje izói Juzíñamui dibénedo ñue omoi móonaillena íemo jiái nana Juzíñamui comeci jítaina izói jaícina ñue omoi finóllena, afémie Juzíñamuimo jicáfiredé. <sup>13</sup> Afémie iere ómoimo comécíillana uaina nabáifiredicue. Daje izói afémie jiái Laodicea jofue comínimo iere comécíifiredé, naa Hierápolis jofue comíniri. <sup>14</sup> Iemo jiái izíruiga manóriraima Lucas uai orede, daje izói Demas.

<sup>15</sup> Iemo jiái Laodicea jófuego ite ámatiaí uáidori. Daje izói Ninfas dainámie omoi uáidori, naa ie jofomo gairífirede ínotino diga. <sup>16</sup> Bie rabe omoi nana facádua mei, Laodicea Juzíñamuimo gairíracomo facádollena omoi oreri. Daje izói Laodicéamo cue oreca rabe omoi diné dúciadi, nana omoi facádori. <sup>17</sup> Jiái Arquípomo lloiri: “Mai cacai, Juzíñamui omo jónega ie táijina mai ñue jaícina o fuitari,” daíri.

<sup>18</sup> Cue Páblodicue. Afena uafue daíllena, bie uáidua uai dama cue ónoído ómoimo cueticue. Onótiomoiza, cue mei llavébidicueza; ie jira Juzíñamuimo cue dibénedo úiri. Juzíñamui ñue ómoído eróiteza. Mai daítadeza. Jae ñie.

# NANOIDE SAN PABLO TESALONICA IMÁCI MO ORÉCABE

## *Primera Carta del Apóstol San Pablo a los Tesalonicenses*

### *Tesalónicamo ite ñnotimacimo Pablo ie nabáñiairi rabe cuetíaioi*

<sup>1</sup> Cue Páblodicue. Bie rabe Tesalónica jófue mo ite Juzíñamuimo gairide ámatiaimo cueticue. Benó cue diga ite cue nabai íaillinoi Silvano Timoteo diga dáabemo cai uai cueticue. Moo Juzíñamuimo dájena jaináidiomoi. Daje izói cai Ocuíraima Jesucristo dájena jaináidiomoi. Cai Moo Juzíñamui ézicigafue mo caimare omoi iri. Daje izói Juzíñamui fecaca comeci ñue uái illáfue mo omoi iri. Afe izói ie jító cai Ocuíraima Jesucristo comeci ñue uái illáfue mo omoi iri.

### *Tesalónica imaci íaioi Jesumo ñnuafue ñue jino ácatatiaioi*

<sup>2</sup> Nana ómoiri Juzíñamuina “Figora” daífiredicai. Daje llezica Juzíñamuimo cai úrillamo nana ómoina uibíoidicai. <sup>3</sup> Cai Moo Juzíñamui uie como ómoina uibíoidicai, jamánomo ñnuafuedo omoi táijina jira. Afe llezica aillo izíruillafuedo comínina canócana táijifirediomoi. Ie emódomo cai Ocuíramamo omoi úñuafue jaca fáicanocañediomoi. <sup>4</sup> Cai ámatiai, Juzíñamui ómoina izíruite. Afe Juzíñamui nizécamacidiomoi za onódicai. <sup>5</sup> Meita nauí jíllonafue ómoimo cai lluaíbillaruido aféfuena fia daína uáillaído lloñédicai, mei íadi Ñuera Joreño ríinodo lloticai. Daje izói afe fue uáfuena ñue cue onóigamona áfena uai jizíñeno jino ómoimo lloticai. Omoi cigido cai ñue illáfue mo, áfedo omoi comeci ñue illena onódiomoi.

<sup>6</sup> Omoimo cai jino cíotaga illafue izói ja dani ñue macádiomoi. Daje izói cai Ocuíraima Jesucristo maca izói macádiomoi. Afe llezica cai llogáuaina ñue jeire otíomoi. Ua Ñuera Joreño fecaca cáimafuedo afe uai jeire otíomoi, afe fue ícoinia duere finócaomoi íadi. <sup>7</sup> Iemona ñuera illafue jino cíotatinona íficaidiomoi. Ua nana Macedonia éniemo ite ñnotimacina, daje izói Acaya éniemo ite ñnotinona fidítatiomoi. <sup>8</sup> Mei jira Ocuíraima Jesucristo llogáuai ómoimona nana Macedóniammo énie Acaya énie diga jica jalleide. Ie mei afe baímo Juzíñamuimo omoi ñnogafue jae náganiammo jica jalleide. Ie jira jae cai jíáifodo daíllifue íñede. <sup>9</sup> Mei afeno imaci omoi ñue caina llínuafue llotíaioi. Ie emódomo jánaraimo omoi ñnuafue fáicanocaillano caade Juzíñamuimo omoi ñnollena llotíaioi. Afe ua caade Juzíñamuimo omoi como fue ñue táijnafuedo úritiaioi. <sup>10</sup> Ie baímo tíllanomona Juzíñamui cáataga Jító, monámona meine bíllena ie omoi úñuafue llotíaioi. Afe meine abido cáataga Jesús, cai jíllotaraíma; ua uire biite cai iere duere finóllifue mona, afémie caina jíllotaite.

## 2

### *Pablo Tesalónicamo táijnafue*

<sup>1</sup> Amatai, nauí ómoído cue illafue fia táinomo baíñede, dani áfena ñue onódiomoi za. <sup>2</sup> Afe cue billa uícode Filipos jófue comini caina baíñota duere caina finódiaioi. Mei íadi Juzíñamui cai cánuamona afe ñue jíllonafue uáfodo jacíruiñeno ómoimo jino lloticue, jíáimaci caina uáitaoidiaioi íadi. Afena onódiomoi. <sup>3</sup> Cai comeci jífue inamona ómoimo cai llogáfuiái lloñédicai. Daje izói fiéni ómoina maméñedicai. Daje izói ómoina jífue acañedicai. <sup>4</sup> Omoimo cai llogafue jíáifodo joide. Cai fígomie illena Juzíñamui facátagamacidicai. Nue jíllonafue uai Juzíñamui ómoimo caina llotátate. Mei jira daí ómoimo jino lloticai. Comini baímo Juzíñamuina íóbitadicai, afémie cai comeci ífuiái eroille

jira. <sup>5</sup> Ebírede uáillaído ómoína fia bífueñedicaí. Afena onódiomoiza. Iemo fia úcube caí óllena táinofuiaina lloñédicaí. Juzíñamui bífuemo uai nabáiraimana afefue uáfuellena. <sup>6</sup> Comínina ñúefuiaina caimo nitátañedicaí. Mei íadi omoi onódiomoiza; daje izói jiáimaci onode, caí Cristo orécamacídicaí. Afemona ocuilla riino caimo ite, omoi caí ocuállena. Aféfuemo ómoína izire cacáreitaredicaí. Mei íadi afe izói ómoína ocuíñedicaí. <sup>7</sup> Jiáifodo ómoína icíñeno fíaicana omoi cígimo llófueticai. Ua úrue ei úruiaí comuítaja úiñua izói, ómoína dúecaillano izíruiticaí. <sup>8</sup> Omoína jamánomo izíruiticaí. Iemona Juzíñamui lloga ñúefue ómoímo llóllena ñue ja finóbídicaí. Afe baímo nana caí comeci ífuiái ómoímo fecáacadicaí, ómoína iere caí izíruillamona. <sup>9</sup> Amatiaí, nauí caí jitaica raa caí óllena izire caí táijina, uibídiomoi. Ua daí riire caí níciduana áfemo uibíoidiomoi. Mona naio diga táijifiredicaí ómoímona bu abina jafue fínoñeillena. Mei afe llezica Juzíñamui lloga ñuera uai ómoímo jino lloticaí. Afe uaina jai ínotimacídiamoi.

<sup>10</sup> Jaca omoi uíécomo íaífuenino macádicaí. Daje izói buna jífueñeno macádicaí. Nana omoi Juzíñamui diga áfemo uai nabáífrediomoi. Daí buna caimo nífuena nitánidiaíoi. <sup>11</sup> Mei illa dígamie omoi comécina náiretadicaí, onódiomoiza. Daje izói úrue moo ie úruemo dúecaillano fíraja izói ómoína fíradicaí. <sup>12</sup> Juzíñamui íeiena omoi maméinamona omoi jaícina nágarui ñue macállifue jitáirede. Afefue nauí ómoímo ocuídícue. Juzíñamui ie náamataganona jíirite ie illáimana illánomo omoi jáillena, afe llezica Juzíñamui ebírenafuena omoi onóillena.

<sup>13</sup> Bífueri iere Juzíñamuina “Figora” daíífredicaí. Cáimona omoi cacana Juzíñamui uai dibénedo, “Afe uai jiba come uai” daííñediomoi. Mei íadi aféuai illa izói, dama Juzíñamui nahí uai jeire otíomoi. Afe Juzíñamui uai ja omoi ínotino comécimo ñúefuiaina déioicaide. <sup>14</sup> Amatiaí, cácarei. Omoi comínimona duere omoi finóbiadi, jae judéamo ite Juzíñamuimo gairídino izói íficaidiomoi. Afémaci Jesucrístomo daje izói jaináidiaíoi; mei íadi íaíoi éniemo ite judíuaimona daje duere finóinafuemo duere zefuídiaíoi omoi zefuilla izói. <sup>15</sup> Afe judíuai duere finódino caí Ocuíraíma Jesuna fatíaíoi. Jaiái ninomo daní íaíoi Juzíñamui uai jino llóraini fatíaíoi. Afe judíuai dáarie jófuemona caina jino jíúdiaíoi. Afémaci Juzíñamuina íóbitañediaíoi. Daje izói nana comínina uáitaoidiaíoi. <sup>16</sup> Mei judíoñedinomo bifue caí llóiacaniadi caina rairuácadiaíoi. Daje izói aféfuemona afe judíoñedino jíllollena, caí lloi daíi caina rairuácadiaíoi. Afe ícoínia íaíoi fiénidífuiaí aillo ofíoicaide. Mei íadi biruí ícoímo aféfuiaí ícoínia Juzíñamui íaíoina jamánomo duere finode.

### *Pablo meine Tesalónica comíni eróizaiacade*

<sup>17</sup> Amatiaí, ómoímona nano nié dino oni jáidicaí. Mei conímana cíóñedicaí íadi ómoímo comeci facáoidicaí. Afe jira izire ómoína cíoizaíbiacadicaí. <sup>18</sup> Omoi illánomo caí jáillena mamériticaí. Cue dama diga ícaíño iere jáiacadícue. Mei íadi naga caí jáiacanaruillaído Taife llótaidogacaí. <sup>19</sup> Mei ie jira ¿Mínica mei caí úiñoigafuena? ¿Mínica caí íóbillafuena? ¿Mínícamona caí caimátaillafue comuide? ¿Mínícamona caí comeci zuitáinafue comuide? Mei cue llófuega Juzíñamui uaina ñue ínotíomoiza. Ie jira caí Ocuíraíma Jesucristo billíruimo daní omoi, daa bie caí comeci íóbillafuena. <sup>20</sup> Uáfueña, omoi caí comeci zuitáinafueña, caí cámafue diga.

## 3

<sup>1</sup> Mei jira afe baímo are cue úiñonidícue. Ie jira benó Aténasmo dama cue illífuena maméritícue. <sup>2</sup> Afe llezica caí ama Timoteo ómoína eróizaitadícue. Afémie Juzíñamui ñue táijitagamie. Afémie caí diga Jesucristo ñúefue jino llúamo táijide. Omoi ínogafuemo ómoína ñue riire naire itátaite. <sup>3</sup> Iemona ómoímona buna baie duere omoi finóinamona omoi ínogafuena féitañede. Mei afe bie zúufuiaído duere caí finóbille jitáirede. Afena

onódiomoiza. <sup>4</sup> Afe emódomo nauí ómoiri cai illa llezica afe duere cai zefuállifue ómoimo lloticaí. Afe daií ómoimo ja íficaide. Ja onódiomoiza. <sup>5</sup> Ie jira áfena ja iere cue ocuñenamona, omoi ñnogafuedo mácajana jicánodadicue. Mei Taife ómoína fiénidifueмо baiitate izóinamona cue comeci jacíruioide. Daií cai táijina táinomo jifánofide izoide.

<sup>6</sup> Mei íadi ja birui Timoteo Tesalónicamona meine dúcide. Afémie ñue omoi ñnuafue izíruillafue diga cai lluaíbite. Caina izíruillano caimo omoi uibóinafue Timoteo lluaíbite. Ie mei ómoína cai cióacana izói caina iere cióacadiomoi; daií Timoteo caimo lluaíbite. <sup>7</sup> Iemona aillo duere cai finóinafue illa llezica omoi ñnogafuedo ñue jaícina omoi mácajana fidídídicue. Aferi cai comeci iere ñue fírazite. <sup>8</sup> Cai Ocuíraimamo ja birui ñue jaináidíomoi. Afena cai onónamona caimo cómofuena comuide. <sup>9</sup> Ua ómoiri iere ióbidicaí. Juzíñamui uiécomo caina iere ióbitadiomoi. Afe aillo cámafueri Juzíñamuina ibana “Iere figura” fáicanocaiñeno daiíredicaí. <sup>10</sup> Mona naio diga conima uiécomo eróicana ómoimo cai úrillena Juzíñamui izire jicádicaí. Afe llezica omoi ñnogafuemona nai fiébide uai jaícina cai fuitállena Juzíñamui jicádicaí.

<sup>11</sup> Omoi cai eróizaillena daa cai Moo Juzíñamui naa cai Ocuíraima Jesucristori cai canóllena jitáidicaí. <sup>12</sup> Omoi ñnogafue oni móonaillena cai Ocuíraimamo jicádídicue. Afe izói conímana omoi izíruillena jicádídicue; daje izói naa jíaimacairi. Omoína cai izíruilla izói mai nana jíaimacina omoi izírui. <sup>13</sup> Omoi comeci jaícina jónellena jicádídicue. Daje izói cai Moo Juzíñamui uiécomo omoi nífuenillena ñue finócafue jicádídicue. Iemona cai Ocuíraima Jesús billíruimo méairuiñeitiomoi. Aféruimo nana íemo jaináidíno afémie diga bené biite.

## 4

### *Juzíñamui ióbitade illafue*

<sup>1</sup> Cue ámatiaí, omoi cácarei. Birui cai Ocuíraima Jesús mámecido izire ómoimo jicádídicue. Daje izói izire ómoína llétaitídicue; nauí ómoimo cai lloga Juzíñamui ióbilla illafue daií omoi iri. Aféfuena afe emódomo aillo omoi móonaitaocairi.

<sup>2</sup> Cai Ocuíraima Jesús riífuedo ómoimo lloga lléfafuena onódiomoi. <sup>3</sup> Juzíñamui dama ie nabaina finócamacina omoi jáillena afémie jítaide. Ie jira nana omoi jiruíreñeno iri. Dama nahí ai diga illa figona. <sup>4</sup> Ua Juzíñamui eróicana áireri. Afengo ua mei íena jámairuiñeno íena o izírui. <sup>5</sup> Juzíñamui onóñedíno fia íaioi comeci fiéni óiacanafuedo áirenaza, mei íadi afe izói omoi iñeno iri. <sup>6</sup> Daje izói izire ómoína dáitídicue, o abi come ie áina jífueta bairóñeno o iri. Daje izói o abi come ie inina jífueta meríñeno o iri. Afe bie izói itínona cai Ocuíraima Jesús, afémacina iere duere finoite, ómoimo cai llua izói. <sup>7</sup> Juzíñamui íaifuenidíno nágari cai íllena caina ocuide. Afe daií ie nabaina finócamacina cai íllena ocuide. <sup>8</sup> Ie jira bie llogafue jámairuitímie jiba cómena jámairuiñedeza; mei íadi Juzíñamuina jámairuite. Daje Juzíñamui ie Ñuera Joreño caimo fecaca. Afe bie Ñuera Joreñodo Juzíñamui íeiena caina ñue finode. (Afémie íena ñue finódogacai.)

<sup>9</sup> Juzíñamui ómoína llófuete conímana omoi izíruillena. Ie jira jíaie ámatiaína omoi izírui cue llóllena jitáinide. <sup>10</sup> Mei jíi, afe daií nana Macedonia éniemo ite ámatiaína ñue izíruiomoi. Mei íadi omoi izíruillafue aillo móonaiocaillena izire jicádídicue. <sup>11</sup> Caimare ñue illáfueмо mai riire omoi iri. Daje izói dani omoi nícidogafuiaí izire omoi llínori. Nauí omoi cai llua izói mai ñue izire omoi táijiri. <sup>12</sup> Afemona onínemaci omoi uáillaímo ñue cacáritiaioi. Afe llezica omoi ñue táijinamona minícana jítaiñeitiomoi.

### *Cai Ocuíraima billafue*

<sup>13</sup> Amatiaí, tíidíno íficaillafuena omoi onóñenana jitáiñedídicue. Aféfuena omoi fidíadi zúucaíñeitiomoi. Jíaie cáaillfueмо comécíñedíno zuure jáitiaioi. <sup>14</sup> Afe Jesús tíllano



meine abido cáanafuemo cai ínua izói, afe daje izói Juzíñamuimo ínnotino tídiaioi íadi, Jesucristodo Juzíñamui íaioi cáatallifuemo ínnotícaí.

<sup>15</sup> Ie jira cai Ocuíraíma cai llófueinafue ómoímo llóitícue. Afémie billíruimo cáímona cáadímaci tídímacímona uícoficaiñeítícaí. <sup>16</sup> Mei dama cai Ocuíraíma riire ocuille uaido úricana monámona ana biite. Afe llezica Juzíñamui abi imaci illaíma uai cáacaite. Daje llezica Juzíñamui ficírede vudugoi cáacaite. Iemona Jesucristomo ínnotino tídímaci nano fueñe cáaitiaioi. <sup>17</sup> Afe mei aféruimo caade ínnotino afe cáataga tídíno díga daane úillie cígímo itábicaítícaí. Ua dínomo nana dáanomó itábicaítícaí, cai Ocuíraíma Jesucristo díga caífo táífomo cai cíozaillena. Afemona cai Ocuíraíma díga jaca ua nínomo zíñona íítícaí. <sup>18</sup> Ie jira búaido conímána caímare omoí fírari.

## 5

<sup>1</sup> Mei íadi afe íirairuillaído cue ómoímo cuelle jítaínide. <sup>2</sup> Afe afémie billíruína ñue onódíomóiza. Omoí due jiza úíñoillíruimo cai Ocuíraíma dúcíte onódíomóiza. Ua merírizaíbitímie naío billa izói biite. <sup>3</sup> “Comecí ñue uái illafue nana caímo ite. Cai jacíruillaí fue íñede,” comíni dána llezica níne íaioi táínocaíllí fue ónonino íaioímo raíre zúite. Ua ríngo úrue jocóacana llezica ero izírena izói, afe táínocaíllí fue íaioímo zúite. Afemona jaca buna oni jíllonide.

<sup>4</sup> Mei íadi, ámatiaí, omoí cácareí. Jítífo íñédíomóiza, cai Ocuíraíma bíllemo jáicaiñeítíomóiza. Ua, meríriraíma jacínaílla izói jáicaiñeítíomóiza. <sup>5</sup> Mei nana omoí úzefomo jáináídnodíomoi. Daje izói monánemacídíomoi. Naío imáciñedícaí; daje izói jítfífo imáciñedícaí. <sup>6</sup> Ie jira jaca ínínídímacídícaí jíáímaci ínía izói. Afe jira cai abína ñue onónafuedo cáaoíredícaí. <sup>7</sup> Ínídíno jaca naío ínídíaioi. Jífaííredíno jaca naío jífaííredíaioi. <sup>8</sup> Mei íadi monánemacína cai íllamona abína ñue cai onónafuedo cai íllana jítaírede. Jesumo cai ínuaífuedo abína dani ríídoredícaí. Daje izói jíáímána cai izíruillaífuedo abína dani ríídoredícaí. Ua fuíriraíma íe jogóbemo jítaíca llojécodo íe abi ríídúa izói, afe izói bífuíaído dani cai abína ríídoredícaí. Afe jíáí fue, cai jíllóillemo cai úíñoínaí fue ua ífomo jítaíca ríídúa llojeco ízoíde. Afedo fuíriraíma íe ífona ríídote. <sup>9</sup> Mei cai duere finóbillena Juzíñamui caína maméñede. Mei íadi cai Ocuíraíma Jesucristodo jíllónafuemo cai dúcínána Juzíñamui caína mamede. <sup>10</sup> Jesucristo caíri tíide daane afémie díga cai íllena; ua daje izói cai caadí cai tííadi, afémie díga ítícaí. <sup>11</sup> Ie jira uáíllaído conímána omoí náíretari. Afe izói maí dani omoí comecí rííretari. Ja bíruí afe bí fue omoí fínua izói, baímo omoí finóoícaíri.

### *Pablo ámatiaí cáímafuedo lletade*

<sup>12</sup> Amatiaí, omoí cígímo Juzíñamui uáíllaído táíjídíno maí uaimo ñue omoí cacáreíri. Daí ízire jícadícue. Mei afémaci cai Ocuíraíma Jesucristo uai ómoína jeire otátatiaioi. Jesucristo mámedído ómoína lletádiaioi. <sup>13</sup> Íaioi caímo táíjínamona, íaioi dáínána ñue cai cacáreíllena jítaírede. Daje izói íaioína cai izíruíllena jítaírede. Coníma comécína omoí jacíruiñeno íri.

<sup>14</sup> Daje izói, ámatiaí, ómoímo jíáíe uai jóonenocaidícue: Afe uaíllaí daíí bie izói ite. Táíjacañedínomo íaioi táíjílleza riire omoí lloíri. Comécína náínídínona maí omoí náíretari. Juzíñamui uai como jabo ínnotínona maí omoí canorí íere íaioi ínollena. Naga cómemo o comecí járidoñeno maí omoí úriri.

<sup>15</sup> Dámie fiení omoí finóadí afe íba úamona abi omoí rairuíri. Mei abído dájeícána jíáííodo ñue omoí finorí. Conímamo ñue omoí finorí. Afe omoí finóllí fue ízire omoí jenorí. Daje izói nana jíáímíllaído ñue omoí finorí.

<sup>16</sup> Jaca caimare omoi iri. <sup>17</sup> Fáinocaiñeno Juzíñamuimo úriri. <sup>18</sup> Nágarui ómoimo íficaide raana, mai Juzíñamuina “Figora” omoi daíri. Mei Jesucristomo ñnotimacina cai íllamona, afe izói cai daíífirenana Juzíñamui óiacade.

<sup>19</sup> Juzíñamui Ñuera Joreño cómemo úritallifuenta rairuíñeno omoi iri. <sup>20</sup> Juzíñamui úritagamíai llogáfuenta jámairuíñeno omoi iri. <sup>21</sup> Nana daináfuiái omoi facátari Juzíñamui llogafue iéniadi onóillena. Facátajamona ñúefuenta jeire omoi oíri. <sup>22</sup> Nana figóñedífue mona mai oni omoi iri.

<sup>23</sup> Ja birui Juzíñamuimo jicádicue. Juzíñamui cai comeci ñue uái illafue caimo fecáfirede. Daje Juzíñamuimo, nana omoi ñue íeiéna maméillena íemo jicádicue. Daje izói benómona cai Ocuíraima Jesucristo bíllemo, Juzíñamui omoi joreño, omoi comeci, omoi abi diga, nana jaca íaidoñeno ñue úiñollena jicádicue. <sup>24</sup> Omoi Ocuíraima Jesús dainana jaca oni jíáiuaimo úinide. Afémie nana bífuiaina dúcitaite.

*Iraicaiño uáiduanó ézicite*

<sup>25</sup> Amatíai, mai Juzíñamuido caimo omoi jicáfireiri.

<sup>26</sup> Ñue cáimaduano nana ámatíai omoi uáidori.

<sup>27</sup> Cai Ocuíraima ríifuedo ómoimo uai jóonenocaidicue bie ciegabe nana ámatíaimo jino omoi facádollena.

<sup>28</sup> Cai Ocuíraima Jesucristo ómoína ñue ézicíteza. Jae ñie. Mai, daítadeza.

## MÉIFODO SAN PABLO TESALONICA IMÁCI MO ORÉCABE

### *Segunda Carta del Apóstol San Pablo a los Tesalonicenses*

*Tesalónicamo ite Juzíñamuimo ñnotimacimo Pablo ie nabáññairi rabe cuetiaioi*

<sup>1</sup> Cue Páblodicue. Bie rabe Tesalónica jófuemo ite Juzíñamuimo gairide ámatiaimo cuetiecue. Benó cue diga ite cue nabai íaillinoi Silvano Timoteo diga dáabemo cai uai cuetiecue. Cai Moo Juzíñamuimo jaináidiomoi. Daje izói cai Ocuíraima Jesucristomo jaináidiomoi. <sup>2</sup> Ñue cai Moo Juzíñamui ézicigafuiaimo omoi iri. Daje izói Juzíñamui fecaca comeci ñue uái illáfuemo omoi iri. Cai Ocuíraima Jesucristo fecaca ézicigafuemo daje izói caimare omoi iri, ie comeci ñue uái illafue diga.

*Jesucristo billa llezica, Juzíñamui éniemo ite fiénidinona duere fñoite*

<sup>3</sup> Amatiai, ómoiri Juzíñamuina “Iere figura” daiífiredicai. Daií ómoina cai daiíllifue ñue jaícina jóide, omoi ñnogafue oni aillo mónaioicailla jira. Dani conímaiaina jamánomo ñue izíruioicaidiomoi. Iemona áferi Juzíñamuina “Aillo figura” daiífiredicai. <sup>4</sup> Ua omoi iere ñnogafue jáie Juzíñamuimo gairídinomo aféfuere ióbioicana úriticai. Jáimaci, Jesumo ñnoñedino, jacire omoi duere finóllena racádiaioi. Mei íadi afe duere omoi zéfuillafue cígiri, ñue comeci jaríreiñenafue jino cíotatiomoi naa ñue omoi ñnogafuiairi. <sup>5</sup> Ja duere finótagamacidiomoi, mei íadi Juzíñamui ómoimo ñue comeciide ie illáimana illíruimo ñue nífuenino omoi dúcillena. Bífuemona Juzíñamui jicánuafue ñue jaícina jóinana jino náiraimo cíotate. Afe Juzíñamui illáimana illíruido duere finócaomoi.

<sup>6</sup> Mei Juzíñamui ñue jaícina finódime, omoi duere finódino ibana duere íaioina finótallena. <sup>7</sup> Ua cai izói duere finócamacidiomoi, mei íadi Juzíñamui cai izói ómoina caimare ocózinaitaite. Ua cai Ocuíraima Jesucristo bíniemo cíocailliruimo, afémie caina caimare ocózinaitaite. Aféruimo afémie ie jamánomo rírede abi imácri monámona cíocaite; ua réiciai izoide cígido cíocaitiaioi. <sup>8</sup> Juzíñamuina onócañedino Jesucristo íaioina duere finótaibite. Daje izói cai Ocuíraima Jesucristo ñúefuena jeire óiacañedino duere finótaibite. <sup>9</sup> Nana afe fiénidimacina jaca ninomo jíllloñoeno duere íaioina finótaite. Ua cai Ocuíraima uíecomona jica ninomo dótaite. Afémie ebire illánomona jica ninomo íitiaioi. Ie ríinona ónoñeitiaioi. <sup>10</sup> Aféruido Jesucristomo jaináidino íena “Iere figomie” dáitiaioi. Daje izói nana ie uaimo ñnotino íena caimare ióbitaite. Ja ómoimo cai llogáfuena ñue ñnotiomoi za.

<sup>11</sup> Bifue jira ómoiri Juzíñamuimo comeci úrifiredicai. Omoi nífuenino illafue Juzíñamuimo jicáfiredicai, Jesucristo jírígamacina omoi illa jira. Daje izói nana omoi comeci jitaina ñue illifue, ñue ícoimo Juzíñamui ríinodo fuitállena jicádicaí. Afe izói Juzíñamui uai omoi jeire úamona finócafuiái fuitállena Moo Juzíñamuimo jicádicaí. <sup>12</sup> Bífuemona cai Ocuíraima Jesucristo mámecei omoi nícidogafuedo ñue caimare úbicaitaite. Afe ibana cai Moo Juzíñamui cai Ocuíraima Jesucristo diga ómoina izíruillamona ñúefuiaí ómoimo nítaite.

## 2

*Iere fiénidifuiaina orúdimie billifue*

<sup>1-2</sup> Amatiai, birui jae cai Ocuíraima Jesucristo billífuena ómoina nauí cue fidítagafue emódomo uai nabáiacadicue. Afe izói afémiemo dáanomo cai gairíllifue emódomo ja

ómoimo lloíacadicue. Dáarie taino llotino cai Ocuíraima billirui ja dúcidez daidíai. Afemona omoi comécinafuena raire jiáfodo meídoñeillena izire jicádica. Daje izói jiáie taino llogafue ite. Afe taino llotino dáifirediaoi:

—Cai llogafue Juzíñamui Joreñomona oga. Cristo ja bíteza, —daidíai; mei íadi aféfuere jacínaiño omoi iri. Afe izói omoi cacana fia júfidogafuere jacínaiño omoi iri. Ie emódomo nie rabe omoi llínoia cai úrilla izóidibe, aféberí jacínaiño omoi iri. <sup>3</sup> Niémona táinofuemo jífuefiño abi omoi rairuiri. Ua Jesucristo billa uícodo, Juzíñamuina comíni uáitallifue uícodo cómuite. Aféruillaído iere fiénidifuiaina oruídimie cíocaita. Afémie dama nine táinocaille. Dai Juzíñamui íena mamede. <sup>4</sup> Bímie Juzíñamuina bacáuaredimie. Nana Juzíñamuido mameca ráaniaina bímie uáitano niné táinocaitaibite; daje izói nana Juzíñamuimo caimátaidinona anáfenuaibite naa jiáie caimátailla ráaniairi. Afémie Juzíñamuimo gairíracomo, afeco naama Juzíñamui izói, ráinazaibite. Dámie “Cue bie Juzíñamuidicue” daílle.

<sup>5</sup> ¿Nauí omoi diga cue illa llezica bifue ómoimo lloticue, íadi aféfuemo úbicaiñediomoí? <sup>6</sup> Afe fiénidifuiaredimie nai bíñeillena jizilla raana onódiomoí. Afémie billirui raire cíocaiñeillena Ñuera Joreño nai rairuide. <sup>7</sup> Afe jiáinomo lloñega fiene illa maméinafue bie éniemo ja comuide. Aféfuena rairuídimie cai cigímona oni ógana fiénidifuiái jamánomo jebuíoicaita. <sup>8</sup> Aféfuena rairuídimie oni ollíruimo afe jamánamo íáibadimie cíocaita. Iemo cai Ocuíraima Jesús ana billano, ie fuemo ite faidórafuedo afe íáibadimiena títaite. Ua ie billa meáirenado afémiena niné táinocaitaite. <sup>9</sup> Afe jamánomo fiénidimie Taife tájinafuedo bite. Aillo íemo ite ríino ácataite. Afedo aillo cíorainina uaido finoca ráaniaído táinona jífueite naa jiáie taino onótate ráaniai diga. <sup>10</sup> Iemona afe íáiba naga fiénidifuiáido niné táinocaitallimacina jífueite. Jae niné táinocaitallimaci, Juzíñamui ua ñúefuena jeire óiacañedino jaca jílloneitiaoi. <sup>11</sup> Afe jira Juzíñamui íaiói fiénidifue ínuamona íaioina íáibado jífuetaita. Daje izói táinofuiaina íaioina ínotaite. <sup>12</sup> Mei fiénidifuiái Juzíñamuina ñúefue baímo íaioí gáinamona, Juzíñamui íaioina duere finótaita.

### *Jílloneillena nizécano*

<sup>13</sup> Mei cai benómona jaca ómoiri Juzíñamuina “fere figura” daífiredica. Jae cai Ocuíraima izíruiga daje ámatiaídica. Jaca jae nanómona Juzíñamui jílloneillena nizécamacidiomoí. Mei ua ñúefue omoi jeire úamona Juzíñamui ómoína nizede. Daje izói caina ñúeitata Joreñodo Juzíñamui ómoína nizede. <sup>14</sup> Afe jira cai ómoimo lloga ñuera jíllona uaido Juzíñamui ómoína jírite, cai Ocuíraima Jesucristo illa ebíredifue dibénemo omoi íllena.

<sup>15</sup> Amatiai, mai bífuemo jaícina omoi coméciri. Omoi cigiri dama cue llogáfuiaina, ie emódomo nana rabeo ómoimo cue cuedáguaina féitaño omoi iri. <sup>16-17</sup> Mai birui cai Ocuíraima Jesucristo cai Moo Juzíñamui diga omoi comeci caimare náretari. Mei jira cai Moo Juzíñamui ie comeci cámafuedo caina izíruite. Afe llezica afémie cai comeci zúurenafue cámafueña méidofirede jaca ninomo caimare cai íllena. Daje izói Juzíñamuido ñue cai illifue cai úñoillena afémie caimo jino llote. Afe izói omoi comeci jaícina Juzíñamuimo jóillena jicádica. Afemona bie nana ñúefuiai daírediomoi. Daje llezica afe ñúefuiai jino comínimo ácatarediomoi.

## 3

### *“Cairi Juzíñamuimo omoi jicari”*

<sup>1</sup> Amatiai, íraifue ómoimo llotícueza. Cairi Juzíñamuimo omoi jicari, cai Ocuíraima llogáuai nágaboiáido raire dúcíteza. Afe emodo aféuai omoi jeire ua izói, afémaci jeire ólleza. <sup>2</sup> Juzíñamuimo mai jiáfodo omoi jicari. Bie íáirede fiénidino cigímona cai zúitailleza,

mai Juziñamuimo omoï jicari. Mei nana comínimona nai nana ñnoñediaioïza. <sup>3</sup> Mei íadi cai Ocuíraïma jaícina uafue llotímie. Afémie jiáino fiénidifuemo omoï báiiñeïllena ómoïna riire jaícina mozióide. Daje izóï íaifuiamona ómoïna rairuíoide. <sup>4</sup> Cai Ocuíraïma ñue ñnogamie ícoïnia, nauï ómoïmo cai ocuícáfuiái jeire omoï úana ñue onódicai. Iemona daje izóï aféfuiaina uire nágaruillaïdo jeire omoï óllena ñue onódicai. <sup>5</sup> Mai cai Ocuíraïma ómoïna cánoiteza, Juziñamui ómoïna izíruïllafuena omoï onóïllena. Daje izóï Cristo comeci járidoñenafue ómoïmo íllena jicádicue.

*Naga come dani íaioï táijñamo táijñede*

<sup>6</sup> Amatiai, birui cai Ocuíraïma Jesucristo mámeçido ómoïna ocuídicaï. Naga táijñacañede ámamona oni omoï iri, mei afémie ómoïmo cai llogáfuiái afe dibéfuemo íacañedeza. <sup>7</sup> Mei nauï omoï cígiri ómoïmo cai cíotaga táijñina izóï, afe izóï omoï íllena onódiomoi. Cai omoï cígiri fia táijñeno iñédicaï. <sup>8</sup> Daje izóï omoï güíllena íbáñeno fia güíñédicaï. Mei jiáifodo mona naio diga ocózinaiñeno táijñiredicaï, ómoïmona daa cómena cai llégitañeïllena. <sup>9</sup> Ua afe omoï caina canolle daií cai jicalle ríino caïmo ite, mei íadi táijñiredicaï ñue illáfuenta ómoïmo fidítallena, bie ómoïmo cue cíotagafue izóï omoï íllena. <sup>10</sup> Nauï omoï cígiri cai illa llezica, bie lletara uai ómoïmo lloticaï: Táijñacañedímie jaca güíñeiteza. <sup>11</sup> Mei jiáimaci caïmo llotíaioï ómoïmona dáarie táijñediaioï. Táijñeno fia illa llezica jiáie comini illáfuiamoi afémaci gágutajñirediaioï. <sup>12</sup> Afe daií ite comínina cai Ocuíraïma Jesucristo ríinodo ocuídicaï. Afe llezica íaioïna riire daidicaï: Mai ñifue lloñeno omoï táijñiri dani omoï jitaica ráaniaï omoï ólleza, daidicaï.

<sup>13</sup> Amatiai, omoï jetaca ñuera raana zefuíruñeno omoï ñedóicairi. <sup>14</sup> Ninó dámie bie rabedo cai daináuaina jeire oñeniadi, bu mei afe uaina ñnoñedimienaza mai mei omoï eróiri íena onóïllena. Ie mei afe cómemona ifo oni omoï fáinocairi, ie meáidailleza. <sup>15</sup> Mei íadi afémiena uáïogai ímiena maméñeno omoï iri. Afémie ama izóï ñue omoï llófueri.

*Iraicaiño Pablo afémaci caïmare uáidonocaïllafue*

<sup>16</sup> Mai cai comeci ñue uái illafue llóñede Jesús, nágaruillaïdo, íemo náganuaïdo afe comeci ñue uái illáfuenta ómoïmo llóiteza. Afe izóï cai Ocuíraïma ómoïna nabáifireiteza.

<sup>17</sup> Mai, cue Páblodicue. Bie uáïdua uai dama cue ónoïdo cueticue; bie cueticue cue mámeçi diga. Nana cue cuezábiaïmo daií jóneñiredicue. Bie izóï cúefiredicue. <sup>18</sup> Cai Ocuíraïma Jesucristo ézicigafuemo ítiomoi. Jae ñie. Ja daiítadeza.

## NANOIDE SAN PABLO TIMOTÉOMO ORÉCABE Primera Carta del Apóstol San Pablo a Timoteo

### *Pablo Timotéomo cuete*

<sup>1</sup> Páblodícue. Jesucristo ocuícamedícue. Cai Jíllotaraima Juzíñamui cai Ocuíraima Jesucristo díga íaillinoi daina uaido orécacue. Afe Jesucristodo cai ñue illifue abi úiñoticue.

<sup>2</sup> Juzíñamui uai coco ínogafuemo nahí cue jitó izóidí. Ie jira bibe omo cueticue. Cai Moo Juzíñamui íemo ñue cai Ocuíraima Jesucristo díga o ézicillena iere jitáidícue. Daje izóí afe íaillinoi omo dúecaillena jitáidícue. Iemona afe íaillinoi o comeci ñue uái íllena óiacadícue.

### *Jíáimaci íaioi taino lluáfuiaido o jífueñeillena abí o rairuiri*

<sup>3</sup> Naui Macedóniamo cue jailla llezica Efeso jófuemo o fiébillena izire jicádícue. Aféruido afénomo o fiénocaidícue, afénomo itínuiaimona dáarie taino llófuiana íaioina o rairuíllena.

<sup>4</sup> Daje llezica íaioi jaiái ninomo lloga ráfuiái naa jagai díga, áfena íaioina júfidotañeítioza. Íaioi jaiáigima lloga fuiñede ráfuiái llúana ráruitioza. Nana bífuiái taino lluáfuiaimo cai comécina uite. Mei íadí nana bífuiái Juzíñamui caimo jóonega íemo cai ínogafuena ñue ícoimo fuitáñede.

<sup>5</sup> Juzíñamui caimo jóonega llujáillifue bie izóí joide: Illa dígamie conímana ñue izíruiredicái. Afe bie izíruilla íainide comécimona comuide. Daje izóí afe izíruilla comeci ñue úrillamona comuide; bie izíruilla afe izóí jíáimana jífueñede Juzíñamuimo ínogafuemonona comuide. <sup>6</sup> Bie ñue izíruillafue díbénemona dáarie oni táifodo jáidiaioi. Afe taino llua ínota oni jíáfodo féiraitaioi. <sup>7</sup> Afémaci Juzíñamui lletara uai llófuetinona jáiacadiaioi, mei íadí dani íaioi daina uaina onóñediaioi. Iocire llófuetiaioi íadí íaioi llócaiga uaina ñue baitáñediaioi.

<sup>8</sup> Juzíñamui lloga lletara uai ñúeraza onódicái. Búaido Juzíñamui naga come lletállena mamérite. Dámie Juzíñamui mamérilla izóí afe uaimo comécíadi ñuera. <sup>9</sup> Afe lletara uai ja ñúefuiái finófiredinomo llóñega. Afena ñue onódicái. Mei jíáfodo fiénide comínimo mameca. Bie izoide comínimo Juzíñamui lletara uai dúide. Afe comini illaíma lloga uaina uáitafirediaioi. Ocuícana náfueñediaioi. Fiénidífueña finófirediaioi. Daje izóí fiéniruidinona itíaioi. Afe izóí Juzíñamuina jacíruiñediaioi. Daje izóí Juzíñamuimo ínogafuemo náfueñediaioi. Iemo Juzíñamui lletara uai, moo ei díga fatínomo dúide. Daje izóí comínina titáfiredinomo dúide. <sup>10</sup> Afémaci naga ringomo fiéni comeci fácajano íáire finófirediaioi, afémaci áirediaioi íadí. Daje izóí jíáie ímana íáire finódiaioi. Juzíñamui lletara uai nana bie izoide comínimo dúide. Daje izóí cómena llaitádinomo dúide. Táinona úrifiredinomo dúide. Daje izóí uafue daíllena táinomo Juzíñamui mámecei llínotinomo dúide. Iemo Juzíñamui lletara uai nana jíáfodo jífueñede llófuiafuena uáitafiredinomo dúide. <sup>11</sup> Afe bie jíáimacina jífueñede llófueinafue Juzíñamui cuemo llogafue daje izóí jóoide. Juzíñamui cuemo lloga uai nana comini ñue jíllona uai. Afe uai oni comínimo cue llujáillena, iere ñuera Juzíñamui jóonegacue.

### *Juzíñamui cuena dúecaillari iere figora daidícue*

<sup>12</sup> Cai Ocuíraima Jesucristona “Figora” daidícue, mei afémie ie uai jino cue llujáille ríinona cuemo ígaza. Juzíñamui cuemo comécido facade: O táijnana fáicanocaiñeno ñue fuitáfiredí, daide. Jira bie uai llujáille táijíllena Juzíñamui cuemo jóonete. <sup>13</sup> Jaiái uíécodo Juzíñamuina íáire daífiredícue. Daje izóí íemo ínotinona duere finóllena racáfiredícue. Afe llezica cue uaido Juzíñamuina icídícue. Bífuiaido Juzíñamuina duere finódícue íadí,

ja birui afe Juzíñamui nana bie ñúefuiái cuemo jóonete. Jaiái aféruillaído ie uaimo cue ñinoñena jira Juzíñamui iere cuemo dúecaide. Daje izói cue finuafue cue onóñena jira cuemo dúecaide. <sup>14</sup> Iemona cai Ocuíraíma iere ñue cuena ézicite. Daje llezica Cristo Jesumo dájena cai jaináinado aillo íemo ñnogafue naa ie izíruillafue diga caimo comuide.

<sup>15</sup> Bie izóidifue iere uafue. Nana áfemo ñnoredicái. Bifue bie izói daide: Cristo Jesús fiénidino jíllotallena ana bíniemo bite. Afe fiénidinomona cue iere jamánomoina.

<sup>16</sup> Mei daí iticue íadi Juzíñamui iere cuemo dúecaide. Are íllamona Juzíñamui cuemo dúecaillado náiraímo Jesucristo ie ñue comeci mánainafue cuedo jino íaioímo cíotote. Iemona comínimo ñúefuiái ja cíotatimiena jáidicue, mei fiénidifuiarede Páblodicuemo Juzíñamui iere dúecaideza. Jesumo cue ñnuamona cue comeci ífueña méidotícue. Afena onóíllamona nana zíñona illifue óiacadino, cue comeci ífue méidua izói, afe izói afémaci afémiemo ñnota íaioí comeci ífue ñúefueña méidoitiaioí. <sup>17</sup> Ie jira jaca tíñede buna cíóñena Juzíñamuina íóbicaadicaí. Afémie daade Juzíñamui, daje izói nana ráfuiaina onódimie. Afe zíñona Jamánomoidillaímamo ñue ebírede uai jaca nágarui íemo jóoneticái. Daí jóoide.

<sup>18</sup> Cue jító Timoteo, bifue omo jóoneticue. Riire fuirídime izói o iri. Nauí Juzíñamui mámeçido odo úritino, ñue o illifue llotíaioí. Afémaci daína izói mai birui o ñnori. O comeci úrillafue ñue o jóoneri. <sup>19</sup> Dámierie íaioí comeci úrillafueña náfueñenamona nocáe buíllamona táinocailla izói, íaioí ñnogafueñemona oni táinocaidiaioí. <sup>20</sup> Himenéomo Alejandro diga afe izói comuide. Ie jira afe íaillinoí Taífemo izájidicue, Taífe anamo íaillinoí daí zefuíllena. Dinomo Juzíñamui jánana úriñeíllena ónoitiaillinoí.

## 2

### *Juzíñamuimo cai úrilla lluaíue*

<sup>1</sup> Fueñe ona dáitícue: Mai nana comini íena Juzíñamuimo o jicáfireiri. Afena Juzíñamuimo ñnotinona o lloiri. Iemo jáí, izire comínimo ie dúecailleza mai jicari. Daí nana comini íena Juzíñamuimo o úrifireiri. Afe llezica nana comínido afémiena iere figora o daífireiri. Daí féitañeno nana comínido Juzíñamuimo ñue úrifireiri. <sup>2</sup> Gobierno oreca omoi úñotimie íena Juzíñamuimo jicáredio, naa jáíe jaboide illaini diga. Afémaci íena izire o jicari, áfedo nífuenino caimare cai íllena. Daje izói comeci ñue uái illáfueño íredicái. Afe daí cai jicamona nana cai illáfueña Juzíñamuimo ñue mámeiticaí. Daje izói conima diga comécina ñueiticaí. <sup>3</sup> Bifue iere ñuera, cai jíllotafirede Juzíñamuina ñue íóbidade. <sup>4</sup> Mei afémie comeci jítáinaíue nana comínina jíllori, daide. Daje izói afémacina ua ráfueña onoiri, daide. <sup>5</sup> Cai Juzíñamui jaca dáadeza. Daje izói Juzíñamui eróicana caina ñue finódimie caido úritimie daade. Afémie Jesucristo. Afémie íaífuenidimie íadi, cai izóidimie. <sup>6</sup> Juzíñamui mamécaruimo dúciamona Jesucristo ie abina éeruiñeno nana cai jíllloillino íbana izájiga. <sup>7</sup> Iemona nana judíoñedinomo afe Juzíñamuimo ñnolle ua ñúefue cue llófuiaíllena orécacue. Daí jíllona uai lluaíjifiredimiena jóonegacue. Crísto mo cue ñnuamona táinofue lloñédicueza, uafue llotícue.

<sup>8</sup> Ie jira nágagobiaído naga cómena: Juzíñamuimo omoi úrifireiri, daidicue. Ñue nífuenide comécido omoi jicari. Jáímamo ríicaiñeno comécido Juzíñamuimo omoi úriri. Daje izói daní omoímo júfidoñeno comécido íemo omoi jicáfireiri. <sup>9</sup> Daje izói ringóniaí iniroí jítáíllifue llóitícue. Jabóidíngo ringo jíta izói, naga ringo jítaiteza. Iima jiruídollena jítaca abina cíotote iníroina, jítañeno iri. Daje izói comini cíodollena ífótirai jamánomo ebire finóñeno iri. Jabo ífo jua figona. Daje izói quenírede raana aillo jiróñeno iri, naa jamánomo ráífide iniroí diga. Jámaicuro jítáoirena. <sup>10</sup> Mei jáífodo comínimo dúecailla ñúefuiaído naga ringo finóbiri, naa jáíe caimare uáiduaíuái diga. Mei nana Juzíñamui íeíena ñue finódogango bie izói íteza. <sup>11</sup> Ringóniaí llófueinamo uai oñeno cacáreitiaioíza. Comeci

mánainafuedo afe uaina onóicaitiaioi. <sup>12</sup> Nairai cígiri ringo llófuellena rairuídícue. Ringo ímana anáfenotañedicue. Mei jáífodo, ringo iima anamo úriñeno uái iri, daidícue. <sup>13</sup> Mei Juzíñamui nano fueñe Adán finódeza, afe méifomo Eva finode. <sup>14</sup> Adán jífueñega, mei íadi ringo Taife jífuega. Iemo jífuefillamona afengo fiénidífue mo baiíde. <sup>15</sup> Mei íadi naga ringo Juzíñamuimo ínogafue mo jeire oíadi, íemo ei ocuífafuiai ñue ícoimo fuitáadi afengo jíllóite. Afe llezica afengo naga cómena izíruirede. Iemo comeci ñue fínuafue dibénemo írede. Daje izóí ñue jaícina macállífue mo írede.

### 3

#### *Ocuídillaímo jítaírede ñue illafue Pablo llote*

<sup>1</sup> Ja cue lollífue iere ua rafue. Dámie ocuídillaímana jáiacade ñuera. Afe izóí tájíacanafue ñuera. <sup>2</sup> Ie jira afe izoide ócuitillaíma mamécámie jaícina ñue írede. Afémie nífuenino macárede. Afe daíí afémie mácafue jáímie lletánide. Afémie daango ótena figura. Ménango ónide. Afémie comínimo lloga uaido jífánodoínide. Daje izóí ráfueña ñue baitádimiena írede. Naga come afémiena caimare jacíruirede. Daje izóí nana afémiemo mácaibitínona afémie jáífodo comécíñeno ñue caimare uáidorede. Iemo jáímacina caimare llófuere de. <sup>3</sup> Afémie jaca jífáinide. Daje izóí afémie fuirínide. Come jífuiamona oga úcubena, afémie llínonide. Mei jáífodo jeruñeno raana fecáfirede. Iemo comeci ñue uái illafue dibénemo írede. “Aillo úcubena cue ollí” daíínide. <sup>4</sup> Dama ie jofuero comíni ñue ocuírede. Dama ie úrue ñue raire cacáfireillena lletárede. Daje izóí ie úrue jáíe eicomínina ñue jacíruitarede. <sup>5</sup> Dámie ie jofona ocuíllana ónoñeniadi, ¿mei nie izóí Juzíñamuimo gairíracona ócuíte? ¡Ocuínide! <sup>6</sup> Ie jira como fueñe Juzíñamuimo ínotímie, Juzíñamui íco ocuídillaímana ínide. Como fueñe Juzíñamuimo jáináitagámie raire illáímana jóoniamona afémie iere abína ínoite. Iemo fiéni abí ínuamona, Juzíñamui Taife ana duere finóllífue mo dótaja izóí, afe izóí bímie daíí zéfuite. <sup>7</sup> Afe Juzíñamui íco ocuídillaíma ñue jacíruigamiena írede. Afémie daíí íllamona, Crístomo nai ínoñedíno ñue íena úritiaioi; ie jánana fiéni úrinidiaioi. Afémie afe izóí írede, meáífue dibénemo ie íñeillena; daje izóí Taife uai íena jítañeillena.

#### *Jabóidillaímo jítaírede ñue illafue*

<sup>8</sup> Daje izóí comíni dínenana nana jabóidillaíni ñue jacíruiganona írediaioi. Daje izóí ie úrilla uai jáífodo méidonide. Iemo afémie jífáinide. Daje izóí come jífuiamona oga úcubena llínonide. <sup>9</sup> Afe izóí cai ínollena jino lloga ua ráfueña afémie fáicanocaiñeno jeire órede. Daje llezica afémie comeci úrilla uai nífuenino írede. <sup>10</sup> Afémaci ñuera daííllena facátagamacina írediaioi. Facata mei íaioi nífuenia jabóidillaínina írediaioi. <sup>11</sup> Daje izóí aféllaini finódogango ñue jacíruigangona írediaioi. Daje izóí aféngotíai jáímamo fiénidífueña íaioimo llónidiaioi. Iemo lloga uaido jáímamo jífánodoínidiaioi. Aféngotíai nana ocuica raana fáicanocaiñeno fuitárediaioi. <sup>12</sup> Afe jabóidillaíni dáangona áiredena figura. Ménango ónide. Daje izóí íaioi úruiaína ñue ocuírede, naa íaioi jofuero comíniri. <sup>13</sup> Naga jabóidillaíma íaioi tájíana ñue fuitádíno ñuefueña otíaioi. Comíni iere ñuefue íaioimo jóoneitiaioi. Daje llezica íaioi Cristo Jesumo ínogafueña jamánomo meáíruíñeno llórediaioi.

#### *Cai ínoga jáiai báinino llogafue ja jino uáfodo denode*

<sup>14</sup> Raíre o éroizaillena comécídicue. Nai cue bíñena llezica, bibe omo cuetícue. <sup>15</sup> Mei nai are cue bíñena llezica, Juzíñamuimo jáináidímie jítaíga ñue illífueña o onóillena llóítícue. Afe Juzíñamuimo jáináidíno caade Juzíñamuimo ínotíno. Afémaci Juzíñamui ua ráfueña ñue



riire úiñotiaioi. Jofo riire mozíoide jíaillirai izóidiaioi. Ie jira afe rafue uaina oni caitánide. <sup>16</sup> Jaiai báinino lloga cai ñnogafue iere jamánomo ebírede; nana comini ja uáfodo onoiga. Be níuui:

Juzíñamui cai cigimo cómena jéiciaibite. Ñuera Joreño afémiedo úrite; daide: Bímie comécina jaícinaidimie, daide. Afémie Juzíñamui abi imácimo ácatagamie. Diga náiraiáido ie illafue llócaide. Biniemo aillo comini íemo ñnotiaioi. Afe mei afémie caifo monamo abido uiga.

## 4

### *Juzíñamuimo ñnogafuena féitaitino ifue*

<sup>1</sup> Ñuera Joreño jino caimo uáfodo llote, írairuillaído dámierie íaioi ñnogafuena féitaitiaioi. Féitajano cómena jífuate jóríai jitáinafuiái jeire óitiaioi. Daje izói Taífemo jainaide fiénide jóríaimona onóigafuemo ñnoitiaioi. <sup>2</sup> Afe izói, comeci ífuena jíáifo jóidino llógana cacáreitíaiioi, naa táinona úrillafuiáiri. Afe bie jífuefiredino ja íaioi ífoci úrillafuena ja niné féideza. Uzírede llojedamo uzide onoi cacáñena izói, bie comini itíaioi. <sup>3</sup> Bie Juzíñamuimo ñnogafuena féitate comini jíáimaci árenana rairuídiaioi; daje izói ringona: “Inireiri,” daíñediaioi. Daje izói ñuera cai güillemona dáarie: “Güiñeno,” daidiaioi. Mei íadi afe bie güille Juzíñamui comútaga, íemo ñnotino ecállena, naa ñúefuena onódinori. Afe güilleri íobillano Juzíñamuina “Iere figura” íemo jaináidino daírediaioi. <sup>4</sup> Mei nana Juzíñamui finoca güille ñúeraza, bácanide. Iemona afémie caimo fecaca raana oni fáinidicai. Mei jíáfodo Juzíñamuina “Iere figura” daínano, nana ñue llíñoredicai. <sup>5</sup> Juzíñamui uai afe güillena ñue finode. Daje izói íena figura cai daífirena afe cai güillena ñue finode.

### *Jesucristo ñue ocuícamié bie izói írede*

<sup>6</sup> Bífuiái cai ámatiaimo o llófueia Jesucristo ñue Ocuícamiéna íitio. Afe bie llófueinafue jeire o oía bie ñnofirega uai dama ñue ona comécina náiretaite. O jeire oga uaido ñue riire íitio. <sup>7</sup> Mei íadi bie fiénide énie ie ráfuiaina náfueñeno o iri, naa jíáie taino jagai izóidífuiáiri. Juzíñamui illa izói o íacanamo áfemo nágarui o comeci llícitairi. Afedo riire íitioza. <sup>8</sup> Cai abi cai ríireta, daa bíníe ífueimo caina canode. Mei jíáfodo Juzíñamui illa izói íllena cai nícidoia naga ñúefuemo caina canode. Daí cai íllemona biruillaído caina canode, íemo daje izói uire bítífueimo jaca caina cánoite. <sup>9</sup> Bífue iere nahí ua ráfueza, nana áfemo ññorediaioi nana cáioiri. <sup>10</sup> Afe bífue jira iere comeci fácaíticai. Iemo áfemo zéfuidicai. Ua zegóruioicana ñéfuidicai. Mei ñue cai íllena caade Juzíñamuimo ocuírídicaiza. Afe caade Juzíñamui nana comini jíllotaibite. Iemo ñnotino ja jíllotaimie.

<sup>11</sup> Bífuiáido nana comini o ocuífíreiri. Daje izói aféfuiaí o llófueiri. <sup>12</sup> O fia jítócomena jira comini o llófuiáfue jíáimana jámairuitatañeno iri. Mei jíáfodo ñue Juzíñamui izói illafue Juzíñamuimo ñnotinomo jino cíotaitimíena íitioza. Ñue o úrillafuedo afémacina onótaitioza. Daje izói comini eróicana ñue o mácafuedo íaioina onótaitioza. Iemo naga cómena ñue o izíruillado íaioina ñue cánoitioza. Cristo izói o íllamona ñue íaioina llétaitioza. Daje izói Juzíñamuimo izire o ñnogafuedo llófueitioza, naa o comeci íáinidífuiáiri. <sup>13</sup> Nai cue dúciñena llezica, Juzíñamui cuega uaillai comínimo o facádoíreiri. Daje izói cai ámatiaína o íociretari. Afémacimo ñue o llófueíreiri. <sup>14</sup> Juzíñamui omo iga o fibíllafuiái fáicanocaiñeno o iri, mei nauí Juzíñamuimo gairííredino ocuídillaini Ñuera Joreño daína izói, íaioi onoi omo bitádiaioiza.

<sup>15</sup> Bífuiaina fáicanocaiñeno o finóíreiri, o jamánomo jíáino baímo íaioi onóilleza. <sup>16</sup> O illafue ñue abi o rairuiri, naa jíáino o llófuiáfueiri. Fáicanocaiñeno riire abí o mameri. Ñue íimana o comúlleza. Bie cue daína izói o íadi, o jíllotio, naa o uaimo cacáreidínori.

## 5

*Crístomo ñnotino uiécomo ñue o illifue*

<sup>1</sup> Eicomemo lléjecaiñeno o iri. Mei jiáifodo o moomo o llófuia izói fíaicana o lloíri. Jiáie jitócominina nahí o ama izói llófueiri. <sup>2</sup> Ringóniaina jéengotiaina dama o ei izói llófueiri. Daje izói jitáingotiaina nahí o miríngo izói o llófueiri. Iaióimo ñue comeci o facáfireiri.

<sup>3</sup> Uáfuenta raana jitaide fecíngotiaina ñue o canori. <sup>4</sup> Mei íadi jiáie jitórede daje izói enáizeñorede fecínguai ite. Afe úruiai íaiói éitiaina uzúngotiaina fueñe ñue úiñorediaíoi. Daje izói nahí ie enáizeño dani íaiói uzúngona úicairediaíoi, mei naga jitó enáizeño diga íaiói móotiaina izírurediaíoi. Afe bie izói illáfue mo Juzíñamui ñue íóbideza. <sup>5</sup> Ie mei cómenide ua fecíngo, dango Juzíñamuimo ñue ie finóllifue ocuírde. Daje izói Juzíñamuimo ie úrillafuenta nái mona diga afengo fáicanocaiñede. <sup>6</sup> Dango ie comeci gáina izói fecíngo ite. Caade íadi Juzíñamui díbenemo tíide izoide. <sup>7</sup> Bífuiaina íaiói o ocuiri, lletánidingotiaina íaiói ílleza. <sup>8</sup> Dámie ie nahí come úicaillana ráairuia ie ñnogafue táinomo jifánofide. Dama nahí comínimo ite duéredinona úicaicañedimie, Juzíñamuimo ñnoñedino fiénina baimo, afémie fiénide.

<sup>9</sup> Fecíngotiai íena mámece illabe fínoitio. Bie izói ñuera fecíngotiai mámece afébemo cúerena. Sesenta fimona ite fecíngo mámece cúerena. Afe bie fecíngotiai, daje izói dámiena iníredíngona írediaíoi. Afe ízoidíngo mámece cúerena. <sup>10</sup> Iemo jiái ie illafue ñueinamona jalléidíngo afengo mámece cúerena. Iemo jiái úruiai ñue comúitátíngo mámece cúerena. Jicana jiáima ie jofomo dúcia caimare uáidofiredíngo mámece cúerena. Iemo jiái Juzíñamuimo ñnotinomo rairuíñeno comeci mánainado canófiredíngo mámece afébemo jóonerena. Mei afengo naga jiáima cánuana ídai jócuia izóidena caimare finófiredéza. Iemo jiái duere zefuide comini canófiredíngo mámece cúerena. Daje izói nana jiáie ñúefuiái finódingo mámece jóonerena. Bie izóidifuiái nana daje fecíngo finórede; íemona afengo mámece cúerena.

<sup>11</sup> Mei íadi sesenta fimona jofófenemo ite fecíngo mámece jóoneñoeno iri. Mei aféngotiaimona dáarie dani íaiói comeci óiacanamona nibai Crístona zóofeitaiíoi. Zóofiano nane meine iníreiacadiaíoi. <sup>12</sup> Daí íaiói illa dani íaiói ícoínia daí ite. Mei fueñe íaiói Jesucristodo jáillena mamérillafue ja fáicanocaidiaíoi. <sup>13</sup> Afe baimo naga comini jofodo jáicaidiaíoi. Jáicaillamona, “Fia táijíñeno daí cue illi,” daídíaíoi. Afe llezica jiáimana úridoicana jáidiaíoi. Iaióimo dúíñede jiáimacimo itífuiaimo gágutajifirediaíoi. Comínimo ñue íñedífuedo úrioifirediaíoi. <sup>14</sup> Ie jira nai fecínaite jitáingona daídícue: Abído iníreiri. Iníreillano úruereiri. Daje izói jofo náangona ñue o iri, Taífemo jaináidíno ómoína úridoíñeilleza, daídícue. <sup>15</sup> Mei fecíngotiaimona dáarie, Juzíñamuina féitano Taífedo jáidiaíoi.

<sup>16</sup> Crístomo ñnotinomona daa cómemo úicaille fecíngo íadi, afe fecíngona dama afémie úicairede. Afe fecíngona Juzíñamuimo gairífiredinona úicaitañoeno iri. Mei afe gairífiredíno ua cómenide fecíngotiaina úicairediaíoi.

<sup>17</sup> Jesúmo gairídíno ñue ocuide éicomini, ñue táijidiaíoi ménacaiño íbárediaíoi. Daje izói ñue íaiói táijinamona mai caimare íaióina omói jacíruiiri. Iere comini ñue llófuetino, iere ñue lletádíno diga jiáie come íba baimo íbárediaíoi. <sup>18</sup> Mei Juzíñamui Cuegáuai daide: “Arroz izoide trigo, juráreto gájirillena záizia llezica, áfemona íaiói güílleza fue íbáiñeno omói iri.” Iemo jiáinomo jiáifodo daide: “Naga táijitagamie ie táijinado ñue íbárede.”

<sup>19</sup> Fia da come ocuide éicomemo fiénidífue jóoneiadi, áfena náfueñoeno o iri. Mei íadi mena nibai daámani uai nabáidimie afe izói afe cómemo llóíadi, áfemo cacáreiri. <sup>20</sup> Ocuide eicomínimona dáarie fiénidífue finóadi, nana comini eróicana afémiena o áadori, nana jiáie comini ñue abi jacínaificaillena. <sup>21</sup> Juzíñamui eróicana, daje izói cai Ocuíraima Jesucristo

eróicana bifue omo jóneticue. Daje izói Juzíñamui nizeca ie abi imaci eróicana omo jóneticue. Nana bie omo cue lloga lletara uai ñue o náfuere. Nana comínimo dájerize jaícina o lloiri. Dámie oni eneno mámeñeitioza. <sup>22</sup> Dámie ie illafue nai figo onóñena llezica, ocuídillaimana ie o maméllena raire íemo o onoi bitáñeno o iri. Bie izói o íllado jíaimamo ite fiénidifuena raire nábaizaiñeitio. Naga íaifuiamona oni o iri.

<sup>23</sup> Mei o ero izírefireia daa jainoi jiróñeno o iri. Iemo due vónona o jirori.

<sup>24</sup> Nai íaioimo riire jicánoñena llezica, comínimona dáarie íaioimo ite fiénidifuiái uáfori cíoide. Iemo jíaimacimo ite fiénidifuiái íaioi duere finoille mámia méfomo onórede. <sup>25</sup> Daje izói jíáie cómemo ite ñúefuiái uáfodo cíocai. Iemo jíaimacimo ite ñúefuiái cíóñena íadi, dinó íaioi diga báinino íñeite.

## 6

<sup>1</sup> Táijitafiregano íaioi ocuídimiaina ñue jacíruirediaioi, jíáie comíni Juzíñamui mámeçido fieni úriñeilla. Daje izói cai llófueinafuena fieni íaioi daiñeilla. <sup>2</sup> Afe izói Crístomo ínote ocuífiredimiaina ñue jacíruirediaioi. Juzíñamuimo ínogafuemo daje ámana íaioi maméiadi, nai ocuídímie ocuícamié diga conímana caimare jacíruirediaioi. Mei jíáifodo afe Juzíñamuimo ínote ámamo, jíaimaci baímo, riire táijirediaioi. Afe riire táijina ínotino, afe ocuídino izíruiga ámatiai. Afémaci dáamací. Dájena Crístomo ínotino. Bífue o llófueiri. Daje izói áfedo o lletámairi.

### *Juzíñamuimo cai ínogana, “Figo baite” cai dáinana canode*

<sup>3</sup> Afe bie cai Ocuíraíma Jesucristo lloga jaícina jóide llófueinafuemo coméçíñedímie, oni jíáifodo táinofuiái llófueite. Daje izói cai ínoga ñuera uaina afémie figo jeire oñede. <sup>4</sup> Daiítade come nífuena onóñedeza, táinodo abi ínote. Afémaci fia fiénide uáillaímo júfiduana iere gáidiaioi. Afe júfidogafuemoná aillo úradoillafue comuide. Iemo dájena caimare íñénafue comuide, íemo jíáimana éoinafue comuide, íemo jíáimana caimare uáidoñénafue comuide. <sup>5</sup> Dáanomona féitañega fuiríllafuiái, jíáifodo oni coméçina jóidímacimo comuide. Bie comíni ua ráfuena onóñediaioi. “Fia cai ínogafuedo iere cai ráanailli,” táinona coméçidiaioi. Bie izoide comínimona oni o iri. <sup>6</sup> Ua onóigaza, cai ínogafue jamánomo ráifide. Juzíñamui caímo fecaca raana “Figo baite” daiídímie, ie ínogafue ñue ráifide. <sup>7</sup> Mei jíi, bíniemo fueñe cai jocoína llezica minícana atíñedicaí. Afe izói uire cai tíia minícana úíñeiticaí. <sup>8</sup> Mei biruimo cai caana llezica caímo ite güílleri, daje izói caímo ite iníroiri “Figo baite” daiíredicaí.

<sup>9</sup> Mei jíáifodo aillo ráanaíacadino fieni comeci fácafue dibénemo jáidiaioi. Afémaci aillo fieni comeci óiacanafuiáímo raamo jíride izói itíai. Bie izoide fieni óiacanafuiái cómena fieni finode. Daje izói íaioi illafue niné táinocaitate; jofo zabilla méino izói niné táinocaitate. <sup>10</sup> Mei jíi, úcubena izíruillafue nana fiénidifuiái comuíllano aféfuiái jillaci. Dáarie iere izire úcubena óiacanamona, Juzíñamuimo íaioi ínogafuemoná oni nibéfodo jáidiaioi. Afémaci daní íaioi illáfuena táinona iere duere finódiaioi.

### *Juzíñamuimo cai ínogana, fuirilla izói riire Íredicaí*

<sup>11</sup> Mei íadi o Juzíñamui nízcamiedioza, bie ailli cue lloga izóidifuiáímona oni o iri. Ñue coméçina jaícina illáfuemo o mamériri. Juzíñamui illa izói maí o iri. Afémie mo ñue o ínofireiri. Jíáie comínina ñue o izíruiri. Comeci járidoñeno o iri. Coméçina mánaídímiena o iri. <sup>12</sup> Maí Juzíñamuimo ínogafuemo fuirilla izói nágaruillaído riire o iri. Juzíñamui omo iga zíñona illafue ñue jeire o oíri, mei áfemo Juzíñamui uáídogamiedioza. Afe Crístomo o ínogafuena comíni cíoicana jino llotio. Afe bie o llúamo o uai nabáidinona aillo ite.

<sup>13</sup> Ja birui Juzíñamui eróicana ona ñue ócuiticue. Afe Juzíñamui nana bíniemo itínuiaimo íaiói cáananona fecade. Daje izói Jesucristo eróicana ona dáititcúe. Afémie daje izói ñúefue jino uáfodo llote. Poncio Pilato uícomo ie illáfuena jáanoñeno llote. Daí Moo Juzíñamui, Jesucristo diga íaillinoi uícomo ona ócuiticue. <sup>14</sup> Omo cue ocuícana, jíáfodo méidoño, ñue jeire o oíri. Aféfuena ñue jeire o oíri, jíáima ona llétañeiteza. Bífuiái ua Jesucristo billíruimo jeire o ófireiri. <sup>15</sup> Juzíñamui jaiái uícodo mamécaruimo dúcia, Jesucristo cíocaizaíbiteza. Afémie daade cai iere ñuera ríinorede Juzíñamui. Daje izói afémie nana illáicomini ie Illáimaza. Daje izói afémie nana ocuífiredino Ocuídillaíma. <sup>16</sup> Dama afémie jaca zíñoza, tíñede. Afémie illano jamánomo meáire egáñoteza, buna áinozinide. Afémiena jaca bu cíóñede. Caade come jaca íena cíonide. ¡Jaca ninomo ñúefuiái afe Juzíñamuimo nitácaza! ¡Aillue ñuera ríino jaca ninomo aféniemo dúideza! Aquíe izói íteza.

<sup>17</sup> Bie éniemo aillo ráaredino abí íaiói íñoñeilleza ñue o lloiri. Daje izói íaióimo ite raamo ócuiñeitiaíoi, mei afe ráaniai are íñeitiaíoi. Mei jíáfodo: Dama Juzíñamuimo omoi ocuíriri, o daíri. Mei afe Juzíñamui ua cáadimie. Afémie jeruíño nana cai jitailla raana cai cánuano caimo fecade. <sup>18</sup> Afe ráanaitino ñue íaiói ílleza íaióimo ocuiri. “Omoi ñue fínoitífuiái ráanaitíomoi,” íaióina o daíri. “Omoi ite ráaniaímona jeruíño jítáidinomo jíáfodo comécíño fecari,” daí íaióina o daífireiri. <sup>19</sup> Daí íaiói íllamona, íco cómuitífue nahí raana máíñoitiaíoi. Afe maíñoíllena comécido ñue onódiaíoi. Afe dáaruido zíñoza illífuena óitiaíoi.

*Iraícaíño Timotéomo jóonenocaigafue*

<sup>20</sup> Timoteo, nana bie omo cue lloga ñúefuiái ñue o rairuiri. Bíniemo ite táinona úrioinafuiaimo cacáreiño o iri. Daje izói Juzíñamuina uáitafuemo cacáreiño o iri. Mei íaiói: “Iere baitádicue,” daína uai taino uaiza. <sup>21</sup> Mei bie izóidífuiái ínote comini ja baie Juzíñamuimo ínogafuiaímona oni níbéfodo jáidiaíoi.

Mai, Juzíñamui ona ñue ézicíteza. Jae níie. Mai daítadeza.

## MÉIFODO SAN PABLO TIMOTÉOMO ORÉCABE Segunda Carta del Apóstol San Pablo a Timoteo

### *Pablo Timotéomo cuete*

<sup>1</sup> Cue Páblodícue. Jesucristo ñúefue llujállena orécamiedícue. Juzíñamui comeci jítaina izói orécamiedícue. Daje izói uícodo lloga ziiñona cai cáailífue llujáitagacue. Cristo Jesumo dájena cai jaináinamona afe cáailífueña óitícaí. <sup>2</sup> Cue izíruiga jító Timotéomo bibe cuetícueza, ona Juzíñamui ñue ézicíteza, daííacadícue. Daje izói: Juzíñamui omo dúcaíteza daídícue. Iemo: Cai Moo Juzíñamuimona oga comeci ñue uái illáfueño íitioza, daídícue. Nana bie ñúefuiai cai Ocuíraíma Jesucristodo óredío.

### *Pablo Crístomo uai nabáiacade*

<sup>3</sup> Juzíñamuimo nágarui comécido úrifiredícue. Mona naio diga Juzíñamuimo cue úrilla llezica omo comeci uibífredícue. Omo cue úbicaillano Juzíñamuina: íere figora, daídícue. Cue uzútíai Juzíñamui íóbitallena ie ocuífíregana ñue íñua izói, afe izói íáinide comeci úrillafuedo ie ocuífíregana ñue íñofiredícue. <sup>4</sup> O comeci zúucaifírenamo uibíoidícue; íemona ona íere jaca cíoiacadícue, áfemona caímare cue íllena. <sup>5</sup> Taino lloñeno ñue Juzíñamuimo o íñuafueño uibíoidícue. Afe birui Juzíñamuimo o íñogafue nano fueñe o uzungo Loida íñoga. Daje izói o ei Eunice íñoga. Iemo bífueña o jaca ñue íñofíredíoza, ñue onódícue.

<sup>6</sup> Ie jira bie izóidena o ócúitícue. Naui omo onoi cue bítajamona Juzíñamui omo lloga llófuelle ríino féitañeno o iri. Niné ona féiza afefue nágarui meine ríire o uibíocairi. Irai dúzaide meine boota izói o uibíocairi. Afemona jamánomo o llófuelleza. <sup>7</sup> Mei Juzíñamui comeci jacíruillafueña caímo fecáñede. Mei jíáífodo comeci meáíruíñenafue Juzíñamui caímo fecade; íemo jíáímana cai izíruillafue, íemo abina ñue cai onónafue diga, caímo fecade.

<sup>8</sup> Ie jira cai Ocuíraíma, Crístomo uai nabáillana meáíruíñeno o iri. Daje izói ie uai ícoínia llavécacueza, cuena meáíruíñeno o iri. Mei jíáífodo ñuera jíllona uai ícoínia comuide duere zefuíllafueña ruifíruíñeno o iri. Omo cómuite duere zefuíllafueña rairuíñeno o llíñori. Mei Juzíñamuimo íte ríinodo cai comécina caímare fíraíteza. <sup>9</sup> Juzíñamuimo cai jaináillena afémie ñue caína jíllotate, daje izói caína uáídote, íe íaífuenide comínina cai íllena. Dani ñue cai illáfuedo Juzíñamui íena ínidícaí. Mei jíáífodo dama Juzíñamui jaiái uícodo maméíllado íeíena ítícaí. Daje izói Jesucristomo cai jaináillado Juzíñamui caína izíruite. Daí caína íe izíruillado íeíena ítícaí. Mei jaiái ninomo nai énie comuíñena llezica, Juzíñamui caína izíruite. <sup>10</sup> Mei bie caína íe izíruillafue, cai Jíllotaríma Jesucristo ana bíniemo bíllado, afefue caímo jino onótate. Afe Cristo cai tíllafueña ja jacínitate. Daje izói jíllona uai llúado, ziiñona cai illafue jino uáfomo cíotate. Ua, íemo íñotino ziiñona ítátallena afe Juzíñamui uáfodo caímo onótate. Afe bie ziiñona cai illafue buna jaca niné táinocaitainide.

<sup>11</sup> Bie ñuera uai llujállena Juzíñamui jóonegamiedícue. Judíoñedíno llófuellena, Juzíñamui orécamiedícue. <sup>12</sup> Iemo afe bíedo nana bífuiai duere zefuídícue. Mei íadí áfena meáíruíñedícue. Cue íñoga Juzíñamui comeci ífueña ñue cue onónamona, jacíruíñedícue. Mei afémie cuemo jóonenocaigafue jaca féíñeíteza. Afe bifue Juzíñamui dama Cristo billíruimo ñue úíñoite, mei afémie íere ríinoredeza. Afena onódícue.

<sup>13</sup> Naui jaícina joide llófueinafue o cue llófuia izói, áfena o llófuefíreiri. Juzíñamuimo cai íñogafueña jeire o oírí. Daje izói Jesucristomo dájena cai jaináinamona caína íe

izíruillafuemo o iri. <sup>14</sup> Cai diga ite Ñuera Joreño canócaza Juzíñamui omo lloga ñuera rafue féitaño o iri.

<sup>15</sup> Ja onódioza: Nana Asia énie comini ja cuena zóofetiaioi. Afémacimona bie mena ima íaillinoi: Figelo, íemo Hermógenes. <sup>16</sup> Mei íadi bie afe jíaimie Onesíforo dibénedo nana ie comini diga, mei cai Ocuíraima afémacimo caimare dúcaiteza. Mei afémie diga ícaño cue jitaica raana atífiredede. Llavécacue íadi jaca meáiruñeno cuemo atífiredede. Iemona Juzíñamui afémie comécina nácaiteza. <sup>17</sup> Uafue, Rómamo afémie illa llezica cuena are jénua ícoinia baite. <sup>18</sup> Cai Ocuíraima cai comeci ifue riire jicánolliruimo afe Onesíforomo dúcairi, Juzíñamuina daidicue. Ja ñue onódioza, Efésomo cai illa llezica, afe Onesíforo diga ícaño caina canode.

## 2

### *Jesucristo dibénemo itímie ñue fuirídímie izoide*

<sup>1</sup> Cue jító Timoteo, Jesucristomo dájena cai jaináinamona Juzíñamuimo ite ñúfuiaimo iticai. Afedo ñue o náireiri. <sup>2</sup> Cúemona o cacánafuemo cue uai nabáidinona aillo íteza. Iemona afefue mai oni jíaie ñue ínofredimíaimo o jóneri. Afémaci daje izói oni jíaimacimo llófuiailleza.

<sup>3</sup> Duere zefuillafue omo comuíadi, Jesucristo dibénemo ñuera fuiríraima izói abí riire o mameri. <sup>4</sup> Naga jíaimiena anáfenoacade fuiríraima fuiríllena mamériode. Iemona uícodo nana jetáacaigafue fácanocaite; afémie jae náamatagaza. Fácanocaillano daa ie ocuídillaíma anamo itábicaite, afe ie jíiritillaíma íóbitallena. <sup>5</sup> Daje izói naga jíánora raamo jíánotímie ñue jaícina jíánorede. Jíánua ocuide uai daína izói jíánorede. Afémie fieni jíánoia, minícana jíridoñeite. Táinomo jíánoteza. <sup>6</sup> Jacafai ríllamo izire táijidímie afe ie riga llizilla jeia llezica, afe ritímie fueñe ótena figura. Dama íeiena fueñe jofo óite. <sup>7</sup> Omo cue llógamo ñue comeci o facari, íemona cai Ocuíraima ona nana ñue fibítaiteza.

<sup>8</sup> Mai tíllanomona meine abido caade Jesucristomo o úibicairi. Daje izói afe Cristo cai jaiaí illaíma David úicoidigimamona comuídímie. Afémiemo ñue o coméciri. Cue lloga ñue jíllona uai aci bie izói joide. <sup>9</sup> Bie ñúefue ícoinia duere zefuítacue. Jí, fíenidífue finódino izói maíáno duere finócacue. Mei íadi Juzíñamui lloga ñuera uai jaca buna llavénide. <sup>10</sup> Ie jira Juzíñamui nizécamaci cue cánua ícoinia duere zefuídícue, mei íadi áferi zúucañeno jaca caimare iticue. Afémaci ñue jíllobicaillena duere finócacue. Afe Jesucristomo dájena cai jaináinamona comuide jíllonafue iere ebírede. Iemo jaca zíñona fúñeite.

<sup>11</sup> Bífue táinoñedeza, iere uafue:

Afe Cristo tílla izói cai tíadi, afémie meine abido cáadímiena jailla izói, afe izói dani cai meine cáaillano afémieoiri íiticaí.

<sup>12</sup> Afémie ícoinia duere cai zefuíaí ie illáimana illánomo jáinaiticaí.

Afémiena cai jáanoiadi, afémie jíai caina jáanoite.

<sup>13</sup> Afémiemo cai ínoñeniadi, afémie jaca ie daína izói nai finófirede; Mei Juzíñamui dama ie abina jáanonideza.

### *Ñuera daíllena facaca táijiraíma*

<sup>14</sup> Bífuaímo jíaimacina ñue o comécitari. Daje izói bífuiaí cai Ocuíraima eróicana íaioímo jóneri. Íaioí ráifiñede júfidofirega uáillaimo mai afémacina júfidotaño o iri. Afe bie izoide júfidofirenafue ráifiñedeza, buna canóñede. Afemo cacáreidinona jíáfodo oni comécina jóitate. Daje izói íaioí ínoga ua uaina niné féitateza. <sup>15</sup> Juzíñamui uícomo figura daíllena facaca táijiraíma izói o iri. Iemo afe llezica jíáfodo lloñoño daje izói o illáfueña ñue jaícina o jónefireiri. Daí ñue facácamié ie meáicaillafue íñede. Daítade come Juzíñamui ua ráfueña jaícina comínimo llófuete. <sup>16</sup> Bíníemo ite táinona úrioinafuemona oni

o iri. Daií táinona úrifredino jamánomo fiénidifuaímo baídiaioiza. Anábaitagano izói íficaidiaioi. <sup>17</sup> Fieni íaioi llófueina uai raire jica jalleide. Come abímo comuide fiénide ñozagi jarire oni mónaioicailla izói, bimaci llófuega uai oni jalléicaide. Afe bie izói ja Jimeneo Fileto diga, bimaci izói, fieni llófuetinona jáidiaillinoi. <sup>18</sup> Afe íaillinoi Juzíñamui ua uáimona oni nibéfodo jáidiaillinoi. Juzíñamui tíidino meine abído cáaillifue dibénedo llotíaillinoi: Ja záide, daidiaillinoi. Daií jíáie comíni Juzíñamuimo ínogafuena uáitacana jáidiaillinoi. <sup>19</sup> Mei íadi cai ínoga uai oni cáitañeillena, Juzíñamui áfemo jíáie riirede uaina nabaide. Iemona féitañeno afe Juzíñamuimo ínoicaídicaí. Afemona cai bie riire mozíoiga jáilliraí izóidicaí. Juzíñamui nabaica uai Juzíñamui dama íeiena caina mameide. Afe uai bie izói jóoide: Cai Ocuíraíma nana dama ie nahí comínina ñue onode. Iemo afe Juzíñamui nabaica uai jíáfodo bie izói daide: Nana “Crístomo jaínáidicue,” daídino fiénidifueña féitano, aféfuemona ja oni írediaioi. (Bie ie nabaica uaido, Juzíñamuimo cai ínogafuena afémie riire finode.)

<sup>20</sup> Aillue jofo eromo diga raa ite. Ráifide oro ie finoina raa ite. Daje izói ráifide plata ie finoina raa ite. Iemo jiba ráifiñede amena finoina raa ite, naa nogóramona finoca raa diga. Dáarie bie ñuera rairuica jiróracuaido jicana bitínona jirótáfredicaí. Jíáie figo jínoñede jiróracuaido jalleide illáimana ecáñedicaí. <sup>21</sup> Afe izói naga jíáimaci canóllena Juzíñamui nizécamié, jaca comécina íaifuenino írede. Afémie jaca íaifuemona oni írede. Iemona afe cómena Juzíñamui íeiena ñue finóbitade. Ebena ñuera táijinanomo Juzíñamui raire íena óreite. Mei afémie íáinide ráifide oro finoina jiróraco izóidímieza.

<sup>22</sup> Jitócomena llezica comeci fieni óiacanafuaímona oni o iri. Mei jíáfodo come ñue jaícina illáfuedo o jairi. Daje izói Juzíñamuimo o ínofireiri, íemo jíáimana o izírufireiri, íemo comeci mánainafuedo naga cómena o uáidofireiri. Iemo, nana comeci íaifuenino Juzíñamuimo úrifredino diga o nabáiriri. <sup>23</sup> Daje izói táinomo comécilla uáillaina náfuéñeno o iri. Mei ja onódioza, bie izoide úrillafuaí fúirienailafue comúitate. <sup>24</sup> Juzíñamui ocuífregamié jaca jíáima diga ícírínide, íemo jíái fuírínide. Mei jíáfodo afémie nana comíni diga caímare írede. Daje izói jíáimacina caímare llófuerede. Iemo afémie jíáimamo jarire úriñeno, íaicana úrerede. <sup>25</sup> Daje izói Juzíñamui ocuífregamié naga ie llófueinana náfueacañedinona comeci manaí finuano, íaioina lletárede. Afémie daií íaioina lletárede, íaioi comeci ífue Juzíñamui méidotalleza. Iemona daje izói ua ráfueña Juzíñamui íaioina onótaiteza. <sup>26</sup> Bie izoide llógana jámairuitino Taife írebaimo jíilla izói itíaioi. Iemo afe Taife ie comeci óiacana izói afémacina ócuite. Mei íadi ua ráfueña íaioi onónamona jíllorediaioi. Afénomo jíizaidinona oni baírórede. Afémaci inídimie como cazilla izói, abína onóitiaioi; íemona Taife anámona jíllorediaioi.

### 3

#### *Comíni íirairuillaído illífue*

<sup>1</sup> Ja bífuaína o onótaiticueza. Íirairuillaído jacírediruina caímo mónaite. <sup>2</sup> Aféruimo comíni daní íaioi abína fieni izírúitíaoi, íemo úcubena íere duéruitíaoi, íemo íere fieni abí ínoítíaoi. Daje izói “Jamánomoidímiedicue” daínano, cómena canóñede tánofuaímo comécitíaoi. Iemo Juzíñamuimo fieni úritíaoi, íemo íaioi móotíaiái ocuilla uaina náfuéñeítíaoi. Iemo jíáimana “Íere figora” daííñeítíaoi. Daje izói Juzíñamuimo ínogafuena náfuéñeítíaoi. <sup>3</sup> Afémaci jíáimana íziruíñeítíaoi, daje izói féitañeno íaioímo duere finódimíemo dúecaiñeítíaoi, íemo jíáimacimo fieni úritíaoi. Iemo íaioi comeci fieni óiacanafuena “Dama íte” dáííñeítíaoi. Iemo jíáima íaioi ícíadi ñúéfuedo finóacañediaioi. Daje izói comínina íere izi cácataitíaoi. Nana ñúefuaína bacáuai ífueña mámeítíaoi. <sup>4</sup> Afémaci daní íaioi nahí comínina jíáie comínimo fállena

fécajifirediaioi. Iemo “Dama cue íacana izói íredicue,” daiífirediaioi; íemo táinomo comécillano “fere jamánomoidimedicue,” dáititiaioi. Daje izói Juzíñamui jenóñeno dani íaioi comeci gáinafuiaina jénoitiaioi. <sup>5</sup> Diga jinófene íuaido “Cue bie ñuera Juzíñamui uaina ínotimedicue,” dáititiaioi. Mei íadi jofona íaioi comeci ráatailla mei, afe ínogafuemo ite méidolle ríinona jáanotiaioi.

Afe bie izoide comini diga nabáiriñeno o iri. <sup>6</sup> Mei bimácimona dáarie, jíáimaci jofomo jaillano comécina ríinide ringóniai jífuefirediaioi. Afe ringóniai fiénidifuiaina oruide. Afe ringóniai nana fiéni óiacanafuiaina anáfenogaiaioi. <sup>7</sup> Diga ráfuiái onóiacadiaioi mei íadi Juzíñamui ua ráfuenta baitánidiaioi. <sup>8</sup> Jaiái Moisés illáruillaído mena aima Janes, Jambres diga, Moisés daina uai uáitataillinoi. Afe íaillinoi uáitaja izói, bie comini íirairuillaído ua uaina uáitaitaioi. Íaioi ífoci úrillafue oni níbéfodo jóoide. Juzíñamui ínogafuena fáicanocaidiaioiza; áfemo ínidiaioi, táinofue ínotiaioi.

<sup>9</sup> Mei íadi bimaci are jíáimacina jífuecana úñeitiaioi. Mei íanori íllamona nana comini íaioi jífuefirenafuena fíditiaioi. Jaiái Moisés uáitate íaillinoi táinona úrilla uaina comini fídia izói, nane afe izói bimaci táinona úrilla uaina nana comini fíditiaioi.

#### *Iraicaiño Pablo Timotéomo jónenocaigafue*

<sup>10</sup> Mei íadi o cue llófuiana ñue jeire otio. Cue maca izói jaca ñue macádio. Iemo cue mamérilla izói ñue mamérifiredio. Iemo Juzíñamui cue ínua izói, afe izói íere ínofiredio. Cue comeci jarire úriñena izói, afe izói fíaicana úritio. Jíáimana cue duérulla izói duéruitio. Diga juáredifuiái cuemo comuide, íadi fáicanocaiñeno Juzíñamui ñúefue llócadicue. Afe cue ocuilla izói ñue ocuíoídio. <sup>11</sup> Comini duere cue finóllena cuena racádiaioi, mei íadi áferi jacinaíñeno caimare iticue. Nauí Antioquía jófuemo duere cue zefuállana onódio; daje izói Iconio jofue, Lystra diga cuemo íaioi finócafue onódio. Nana racada duere cue íaioi fínuafuiaina onódioza. Mei íadi cai Ocuíraima nana aféfuaimona ñue cuena jíllotata. <sup>12</sup> Uafue onóigaza, nana Jesucrístomo jaináinamona ñue jaícina illáfuemo íacadino, nai ínoñedimacido duere zéfuitaioi. <sup>13</sup> Iemo afe llezica fiénide jíáimana jífuefiredino jamánomo fiénidifuiaimo ana jáitiaioi. Jíáimacina íaioi jífuiá llezica, dani jíáimaci íaioina jífueitiaioi.

<sup>14</sup> Mei jíáfodo omo llófuegafuaimo riire o comécioicairi, mei aféfuaimo íere ñue ínotioza. Iemo afe bífuiaina o llófuetimiena onódio. <sup>15</sup> Daje izói o dúemiedimona Juzíñamui ñuera Cuegáuaina fueñe onóicaidio. Aféuaimona llófuegao, jíllonafue o maiñóllena. Afe jíllonafue Cristo Jesumo o ínuado o oga. <sup>16</sup> Nana Juzíñamui Cuegáuái, Juzíñamui afe cueraini comécimo úrilla izói ñue jaícina cuega. Bie uai íere ráifide comini ífoci déillena. Aféuaido comini llófuerega; íemo afe bíuaido táinomona lloga uaina uáitarede; íemo áfedo jíáimacina lletárede; daje izói aféuaido jaícina comini ñue illífuena íaioimo llórede. <sup>17</sup> Afe daí Juzíñamui Cuegáuaido Juzíñamui ocuícamié ñue baitádimiena írede. Iemona afémie ñue finóbide, nana ñúefuiai íe finóllena.

## 4

<sup>1</sup> Juzíñamui eróicana, cai Ocuíraima Jesucristo diga, Juzíñamui uallaí o llófireillena íere omo llonódacaidicue. Mei Jesucristo bíniemo illáimana bille llezica, afémie nana caade comínina, naa tíidino diga íaioimo itífuena riire jícanoiteza. <sup>2</sup> Afémie raire bíacana jira, riire ona dáiticue: Nágarui Juzíñamui uallaí jino o llófireiri. Afemo riire o maméroiiri. Comini aféfuena cacáacana llezica, daje izói aféfuena afémaci cacáacañena llezica, nana afémacina jaca daje izói Juzíñamui uai riire o llófireiri. Ñue riire llófireiri Juzíñamui nai ínoñedino aféuaina íaioi jíeruillena. Daje izói afémaci illafue figóñedeza, bíuaido íaioina lletari. Iemo ñúeodo íaioi jáillena, mai riire íaioimo lloiri. Nana bífuiaina, nana comeci



járitañenafuedo fáicana o llófuefireiri. <sup>3</sup> Afe daí llófuefireiri, mei diga irui íllamona, comini ua llófueinafue mo cácañeitiaioiza. Mei jíáfodo daní íaioi fieni gáina izóí daní íaioi cacáacana izóí, íaioi llófueitinona aillo jénoitiaioiza. <sup>4</sup> Juzíñamui ua ráfueña fáicanocaillano, nana jagai izoide táinomona llogáfuaímo náfueitiaioi. <sup>5</sup> Mei jíáfodo o iri. Cáadimie izóí ñue abina o onoiri. Zúufue omo comuíadi, áferi jacínaiño abí riire o mameri. Iemo jíllona uai o llóllemo maméroi. Juzíñamui omo jóonega táijina ñue ícoimo o fuitari.

<sup>6</sup> Ja íanori íllamona Juzíñamui íobitallena fatá fecaca rille izóí, fécajigacue. Cue titáillirui ja ánozide. <sup>7</sup> Ñuera fuiríraíma izóí, fiénidífue anáfenua izóí táijinana jae riire ñue ícoimo fuitádicue. Iemo jífanotimacimona riire aizida goal orédimie izóí, afe izóí cue táijina fuillánomo dúcidicue. Iemo Juzíñamuimo cai ínogafueña fáicanocaiño, ja ñue ícoimo ínoticue. <sup>8</sup> Iemona ja birui cai Ocuíraíma cuemo fecalle fia jíridoga raa izóidífue mo ocuídícue. Afe ie billíruimo, Juzíñamui anamo ñue nífuenidímacimo dúide zíñona illáfueña afémie cuemo fécaite; mei afémie comínimo itífueña ñue jaícina jícanoitimieza. Dama cuemo fécañeiteza, mei íadi daje izóí nana ie billíruimo caimare ocuídínomo jíridorede zíñona illáfueña afémie fécaite.

### *Dama Páblomo dúidífuaí Timotéomo llo*

<sup>9</sup> Timoteo, maí raíre cue eróizabiri; riire áfemo o maméroi. <sup>10</sup> Mei cue nabai Demas, bínie ráaniaina jamánomo gáinamona jae cuena zóofeteza. Zóofiana jae Tesalónica jófue mo jaide. Iemo jíáie cue nabai, Crescéntena mámeciredimie, jae Galacia éniemo jaide. Daje izóí jíái Tito oni Dalmacia éniemo jae jaide. <sup>11</sup> Dama Lucas cue diga fiébilla. O billíruimo, maí Marcos júnuailano cue diné ómícoi biri, mei afémie benó cue táijina cuena iere cánoiteza. <sup>12</sup> Cue nabai Tíquico, Efeso jófue mo jae cue oreca. <sup>13</sup> O billíruimo cue fieca emódomo jítararoi o atiri. Nauí Troas jófue mo íte Carpona mámeciredimie jófue mo cue fieca. Daje izóí cue rabénicuai o atiri. Iemo jíáie cuega rábiaí féitaño o atiri, mei afébiaina iere jítaídícueza.

<sup>14</sup> Nauí Alejandro aillo fiénidífuaí cuemo nitade. (Afémie lloéfiaí fínuamo tájífiredimie.) Nana fieni ie úrillafuaí dieze cai Ocuíraíma aféniemo iba óite. <sup>15</sup> Afe Alejándromona abí o rairuíocairi, mei afémie cai lloga uaina iere uáitaacadeza.

<sup>16</sup> Nano fueñe cue abí ríidollífue, ríllaini uícomo cue llua llezica, bu cuena nabáiñede. Nana cuena zóofetiaioi. Juzíñamui afefue iba íaioímo óñeilla aféniemo jícadícue. <sup>17</sup> Mei íadi nauí abí cue ríiduaruimo cai Ocuíraíma cuena canode. Afémie cuena ñue riire finode, jíllona uai oni nana júdioñedinomo cue llujállena. Afémie afe llujállafue ñue ícoimo cuena fuitátate. Afe daí cai Ocuíraíma iere jacíredífue mona ñue cuena jíllotate. <sup>18</sup> Daje izóí nana jíáie fiénidífuaímona, afémie cuena jíllotaite, íemo dama íeiena cuena ráiruite, monamo íte ie illáimana illánomo cue dúcilla. Ñuera ebíredífue jaca nínomo íemo íteza. Daítadeza.

### *Iraícaíño uáiduaíuaí naa ézicigafuaí diga*

<sup>19</sup> Maí, Prisca, Aquila diga caimare uáidori, naa Onesíforo comini diga. <sup>20</sup> Erasto Corinto jófue mo fiébide. Cue nabai Trófimo íe irárenamona, Mileto jófue mo cue fieca. <sup>21</sup> Maí raíre rozíredíruillai nai dúciñena llezica benó o biri. Benómona jíáimaci omo uai orédiaioi, be nímaci: Eubulo, íemo Pudente, íemo Lino, íemo Claudia. Daje izóí nana Crístomo jáinaide ámatiaí o uáidotiaioi.

<sup>22</sup> Cai Ocuíraíma Jesucristo nágarui ómoímo nabáirífueilla Juzíñamuimo jícadícue. Daje izóí Juzíñamui nana omoí ézicilla jícadícue. Maí daítadeza; jae níie.

## SAN PABLO TÍTOMO ORÉCABE La Carta del Apóstol San Pablo a Tito

### *Pablo Títomo cuete*

<sup>1</sup> Páblodicue. Juzíñamui táijitagamedicue. Jesucristo orécamedicue. Juzíñamui nizécanomo ínotalle uai cue llujállena ie orécamedicue. Daje izói cai ínoga ua uai, íaiói onóillena orécacue. <sup>2</sup> Afe bie cai ínoga ua uai, jaca nínomo ñue cai illínomo cai ocuínanomo móirede. Nai énie cómuñenia úcodo, Juzíñamui afe zíñona cai cáillinona llote. Juzíñamui jaca táinona llófinide. <sup>3</sup> Ja birui ie llóiacaga uaina, ie mamécaruimo cuemo jóonega llófuecaillado caina onótate. Uafue, cai Jíllotaraíma Juzíñamui afe daje uai cue llófuecaillena cue ocuide. <sup>4</sup> Tito, daje izói Juzíñamuimo ínoticoco, íemona nahí cue jitó izóidío. Jira bibe omo cueticue. Afe llezica, cai Moo Juzíñamui cai Ocuífirede cai Jíllotaraíma Jesucristo diga o ñue ézicillena jitáidicue. Daje izói omo dúecaillena jitáidicue. Afe dáaruido caimare uái ñue o íllena jicádicue.

### *Tito Crétamo llófuete*

<sup>5</sup> Monáillai cigi idu Crétamo o cue fiénocaillaruido, nai figo finóbiñede raa ñue daje dine jaícina o finózillena ona fiédicue. Aféruido naga diga jofue illánuiamo ite Juzíñamuimo jainaide gairídnomo íaiói ócuitimiena o jóneri daidicue. Ñue ócuite eicomínina jenoda o jónetadicue. Afe izói nauí úcodo omo llonódacaidicue. <sup>6</sup> Naga ñue ocuide écome nífuenino írede. Daje izói afémie daa ringo otímie írena. Daje izói ie úruiai Juzíñamuimo ñue ínorediaíoi. Afe úruiai fiénidifuenta jóoneñegazana írediaíoi. Ocuilla uaina náfueñedino izói índiaíoi. <sup>7</sup> Iemo naga ócuitillaíma Juzíñamui dibénemo ocuícaciaíoi. Ie jira afémie nífuenino jaícina ñue írede. Daje izói afémie “Cue bie iere ríimedicue” daínide. Daje izói afémie comécina éocainide. Daje izói afémie jífaífinide. Daje izói afémie illáiredimiena ínide. Daje izói afémie fia Juzíñamuimo táijnado úcube otímiena ínide. <sup>8</sup> Mei jíáfodo, afémie ie jofomo mácaíbitinona jíáfodo comécíñeno caimare llínofiredimiena írede. Afémie ñue caimare finófredimiena írena. Afe izói dama ie abina ñue ocuídímiena írena. Afe izói afémie comécina jaícina ítmiena írena. Afe izói afémie Juzíñamuimo ñue jaináidímiena írena. Afe izói afémie dama ie abina lletádimiena írena. <sup>9</sup> Afémie ñue ínofirega íemo lloga uaimo iere comécirede, jíámaci comécina nácaitallena. Iemo jíái afémie daí írede, nana uáitatinona uafue daíitallena.

<sup>10</sup> Mei uafue, aillo ocuícana náfueñedino ite. Judíuaimo ite nabene. Afémaci táinodo úritiaíoi. Afe llezica comínina jífuetiaíoi. <sup>11</sup> Afémaci úrilla llícaitarede, mei dáarie afézie nana íaiói ñue ínogafue dobáíñotadiaíoi. Afe llezica llófuerainina uaido llófuefirediaíoi, meáirede fínuado úcube óllena.

<sup>12</sup> Afe Creta énie imácimona daade uai jino lloraíma, ie nabáitiaído úrite. Daíde: “Creta imaci táinofuerediaíoi, íemo jazici ie ríllenai izóidiaíoi, íemo iere güillárediaíoi, íemo jaca iere ráiraíediaíoi,” daíde. <sup>13</sup> Afémie uafue daíde. Ie jira ríire íaióina lletari, Juzíñamuimo íaiói ínogafuena féitañeno ñue jeire íaiói óllena. <sup>14</sup> Iemo daje izói ñue íaióina lletari, judíuai daní uibica uáillaímo íaiói náfueñeillena. Iemo jíái, ua uáimona oni jíicaidino comútaga ocuilla uaimo íaiói cácareíñeillena.

<sup>15</sup> Nana comécina íaífuenidímie mo naga raa íaífuenide. Mei jíáfodo íadí nana Juzíñamuimo ínoñedino íaífuaíredínomo naga raa íaífuaírede. Daje izói íaiói ífoci uibíllafue íáirede, nana íaiói comeci úrilla uai diga. <sup>16</sup> Afémaci “Juzíñamuina onódicaí”

daidíai, mei íadi íai finócado Juzíñamuina jáanotíai. Mei afémaci íairuigamacina jáidiaiza. Iemo náfueñedíno izóí itíai; íemo due jiza ñuera raana finónidiai.

## 2

### *Ñuera uafue llófueina uai*

<sup>1</sup> Tito, o daille uailai ñue uafue llófueina izóí jaca jaícina jóirede. <sup>2</sup> Nana éicomini jaca jífaifinidinona írede. Daje izóí ñúefuíaído jacíruiregaiaí. Iemo, abina ñue onódimiaina írediaí. Daje izóí Juzíñamuimo íai íinogafuemo íránifinidíme izóí írediaí. Daje izóí nágaruillaído ñue izíruicana ífirediaí, íemo jíai jaca comécina járitaifinidiaí. <sup>3</sup> Daje izóí eiringótiai úrioinide; íemo ñúefuedo jacíruiregaiaí. Afe izóí táinona llófinidiaí. Iemo jíai jaca jífaírado jífaifinidiaí. <sup>4</sup> Daií ñue íai íllana ácatarediaí, jíai ringóniai jítaínguai afe izóí íllena. Afedo íai ínítiaina izíruillena lollíai. Daje izóí jítaíngo íai úruiai gáillena llófueregaiaí. <sup>5</sup> Afe izóí íai abina ñue onóillena llófueregaiaí. Daje izóí íaifuiainidinona íai íllena llófueregaiaí. Afe izóí jofo ero finoca raa ñue úíñollena llófueregaiaí. Daje izóí illáinidíngo izóí íai íllena llófueregaiaí. Afe izóí íai íni ocuícana jíeruifireillena llófueregaiaí. Be daií írediaí, buna Juzíñamui lloga fieni úridoíñeillena.

<sup>6</sup> Daje izóí jítocomini ñue íai íociretari, abina ñue íai onóillena. <sup>7</sup> Iemo jíai, naga o jetáacaga díbénedo o ñue illa izóí íai íllena ácatari. Íai o llófuelle llezica, táino jífueñeno llófuefireiri. Daje izóí jífanodoíñeno lloiri. <sup>8</sup> Daje llezica táinodo úrinidí, buna o jánari úriñeillena. Afe daií o uáitaacadíno meáiruitiaí, mei ja odo fieni úrinideza.

<sup>9</sup> Iemo jíai, nana ocuícana íai ocuídíno anamo ñue íllena o llófuefireiri. Daje izóí cáimamacina íai íllena lloiri. Iemo uai ófireiñedinona írediaí. <sup>10</sup> Afe izóí íai táijina llezica íai ocuídíno ráai meríñedinona írediaí; mei jíáfodo naga táijinana jetátagamie ñue ínofiregamiena írede. Afe izóí írediaí, cai Jíllotaraima Juzíñamui lloga uai iere ebíredeza, dani afémaci abído onótallena.

<sup>11</sup> Mei jí, Juzíñamui caimo ie dúecaillana caimo cíotate. Afe caimo ie dúecaillado nana éniemo itino jíllorediaí. Afe jíllorenafue Juzíñamui jae caina onótate. <sup>12</sup> Afe caimo ie dúecaillamo cai comécíadi fieni illafue cai fáicanocaillena caina onótate. Afe izóí bie énie ímaci óiacaga cai fáicanocaillena onótagacai. Iemo jíáfodo biruillaído cai illafue ñue úillena caimo llote. Jaca abí ñue cai ocuífírena caimo llote, íemo cai illafue ñue jaícina cai jóoneillena cai llote. Afe izóí Juzíñamuimo dúide uaina caimare finóredícai. <sup>13</sup> Iemo daje izóí Juzíñamui uícodo lloga uai, caimare zuíllemo ocuíoiredícai. Mei aferui iere ríñoredíme Juzíñamui, cai Jíllotaraima Jesucristo caimare billíruiza. <sup>14</sup> Afémie cai ícoínia tíllinomo uigámie, nana fiénidífuiaímona cai jíllloillena. Daje izóí nana cai íaifuiái muiñóllena uigámie. Afedo afémie íena caina mamede, ñúefue iere íocíre cai finóllena.

<sup>15</sup> Be nie o llófuereina uai. Nana náinide comini comécina náicaitari, íemo lletáredíno omo ite ocuille ríno díeze íai oina lletáfíreiri. Buna ona jámairuitaíño iri.

## 3

### *Juzíñamuimo ínotino bie izóí írediaí*

<sup>1</sup> Jesucristomo ínotino énie illaíma anamo íai írena uibíñotari, naa ocuídínuaíri. Daje izóí aféllaímai ocuica uai íai jíeruillena uibíñotari. Afe llezica ebena ñúefuiai fínuamo iere jícairediaí. <sup>2</sup> Daje izóí jíaíma jánana fieni úrinide. Afe izóí afémaci comécina caimare uái itínona írediaí, íemo illáinidinona írediaí. Iemo daje izóí nana comínina omoi uáidua llezica, comécina mánaidímiena o illa jino íaiímo onótari.

<sup>3</sup> Mánaidímiena íredícai. Mei nauí uícodo daje izóí cai bie jaca abina onóñedinodícaiza. Juzíñamui lloga uaimo cacáreiñedícai. Aféruimo níne féiraitíno izóí ífiredícai. Daje izóí

nana cai começi fienni gáinafuiamo riire ocuícanaodica; íemo jiái cai íóbitade raamo riire llavécanodica; jaca nágarui fienni ífiredica, íemo jiáimamo úradoifiredica. Iemo comécina éoidica, daje izói conímama éoicaifiredica. <sup>4</sup> Mei íadi cai Jíllotaraíma Juzíñamui íemo ite cáimafue jino caimo cíotate, íemo nana náiraiaina ie izíruifirena diga. <sup>5</sup> Afémie caina jíllotaacade, mei íadi jaca nanómona cai daína ñúefuena cai fínuamona Juzíñamui caina jíllotañede. Mei jiáifodo dama afémie caimo dúecaillado caina jíllotate. Caímo ite íaifuiái dama ie múiñuado caina jíllotate. Afe llezica Juzíñamui Ñuera Joreño afe múiñuado, meine como jéiciganona caina finode. Iemona daje izói afe Ñuera Joreño como comuítaga ñúefuedo caina úcaite. <sup>6</sup> Cai Jíllotaraíma Jesucrístodo, Juzíñamui ie Ñuera Joreño jeruíñeno caimo fecade. <sup>7</sup> Afe daí Juzíñamui caina dúecaillano, nífuenidinodica; izói caimo caimare éroide. Afémie daí caina itátate, cai ocúrina zíñona cai illino cai maiñóllena.

<sup>8</sup> Bie uaillai iere uáfueza. Daje izói nana bífuiái jeire íaioi ólleza ona íaioina iere llotátaticue. Daí ona llotátaticue Juzíñamuimo ínotino bie ñúefuiamo nágarui íaioi jíruillena. Comíni canóllena bífuiái nana ñuera. <sup>9</sup> Mei íadi abina onóñedino júfidogafuemona oni o jíicairi. Daje izói jaiáidigima dibénedo lloga íaioi comuilla tánofuiamona oni o jíicairi. Afe izói jiáimana uáitafirenamona oni o jíicairi. Iemo jiái, Moisés lloga uaimo ite féiredifuiáido fuirídnomona oni jíicairi. Nana bie izóidifuiái cómena canóñede. Daje izói bífuiái ífócina úriñednomona comuide.

<sup>10</sup> Juzíñamuimo dájena jaináidino cígiri dámie eneno bozíetaiacania, íena uáidota ménacaiño lletari. Daí lletaca cacáacañeniadi, omo; cígimona íena ruifíruiri. <sup>11</sup> Uáfueña íena ruifíruiri, mei ja áfemona afémie fiénidimiena onóredeza. Afémie ñúefuemona oni nibéfodo fiénidifueño baíidimie. Iemo dama ie finoca fiénidifuedo duere finóbide.

*Pablo naa ie nabáiñiairi mamérilla uai*

<sup>12</sup> Artémama mámeciredimie, nibai Tíquicono mámeciredimie omo cue óreiadi méifomo, Nicópolis jofue illánomo raire cue eróizaibiri. Afénomo o jáillena raire mamériri, dinomo dáanommo conímamo dúcíticocoza. Mei afénomo rozírediruillai záitaiacadicueza. <sup>13</sup> Iemo nane jiáifue, Zénana mámeciredimie Apolos diga nana omo ite dieze íaillinoína canori. Afe Zena jiáimado ñue úrifiredimie. Iaillinoi jáille llezica jitaica raana íaillinoimo fecari, minícana íaillinoi jítaiñellena. <sup>14</sup> Iemo daa cai Juzíñamuimo jaináidino ñue lloíri, ñúefuiamo íaioi táijifireilleza; daje izói jiáie come jítaiadi, íaioi jitailla raana fecari. Iemona íaioi illafue ñue ráifiteza.

*Iraicaiño uáiduano ñue íaioi íllena Pablo Juzíñamuimo jicade*

<sup>15</sup> Nana cue diga itino omo uai orédaíoi. Cai izíruiga nabáiñia; daje Juzíñamuimo ínotino o uáidori. Mei Juzíñamui nana ómoína ñúefue dibénemo itáiteza. Daítateza. Jae ñie.

## SAN PABLO FILEMÓMO ORÉCABE La Carta del Apóstol San Pablo a Filemón

### *Pablo Filemomo cuete*

<sup>1</sup> Cue Páblodícue. Cristo Jesús ícoinia llavécamiédícue. Cai ama izóidímíe Timoteo cue diga illa llezica, Filemomo bibe cueticue. O coco táijinamo izíruiga nabáifredímíedio. <sup>2</sup> Afe llezica Juzíñamuimo ínotingo cai miringo izóidíngo Apiamo cueticue, íemo jíái Juzíñamui uaimo iere cai nícdogafuemo nabáifredímíe Arquípomo cueticue. Iemo jíái Filemón jofomo gairífirede Juzíñamuimo jaináidinomo cueticue. <sup>3</sup> Mai birui cai Moo Juzíñamui cai Ocuíraíma Jesucristo diga, ñúefue dibénemo ómoína itátaiteza; daje izóí caimare uái illí fue ñue ómoímo itátaiteza.

### *Pablo Filemón Jesucristona izíruilla íemo íe ínuana llote*

<sup>4</sup> Juzíñamui diga cue úrilla llezica omo uíbicaidícue. Uíbicaillano, jaca Juzíñamuina “Figora” dáifredícue. <sup>5</sup> Mei o ñue o finócafue fidídícueza. Cai Ocuíraíma Jesuna o izíruillana íemo o ínuana diga, fidídícue. Daje izóí nana Juzíñamuimo jaináidinona o izíruillana fidídícue. <sup>6</sup> Juzíñamuimo o ínuado jíáimaci afémíe uai jeire o otátallena Juzíñamuimo izire jicádícue. Afémaci o diga nana Cristo Jesúmona comuítaga cai ñue ínofirenafuiai, ñue onóillena jicádícue. <sup>7</sup> Afe daí jicáfiredícue, mei ja o izíruillado íóbídicueza, daje izóí áfedo cue comeci íocíredeza. Daí ori íóbídicue, mei Crístomo ínotino odo comécina fíracaiaíoíza.

### *Ríire ocuícamié Onésimomo Filemón dúecaillena Pablo íemo jicade*

<sup>8</sup> Iemona ja birui, Cristo orécamiéna cue íllado omo dúide finolle raana ríire ocuúredícue. <sup>9</sup> Mei íadí afe izóí ócuiñeítícue. Ríire ocuilla baímo caimare jícana gáidícue. Iemo conímana coco izíruillamona omo jícaítícue. Ua ja cue éíromadícue, íemo jíái Cristo Jesús llavécamiédícue. <sup>10</sup> Daí cue íllamona, daa cue onóigamiemo o dúecaillena jicádícue. Benó cue llavéjina llezica afémíe cue jíto izóidímíena jaide, mei afémíe comécina Jesucrístomo ínuamei afémíe jaináitaticueza. Afémíe Onésimo. (Jesucrístomo íe ráifidímíena omo íllana jaca comécíñedio.)

<sup>11</sup> Nauí Onésimo omo ráifíñedímíe izoide. Mei íadí birui cue o diga afémíe ráifidímíe izóí táijírede. <sup>12</sup> Meine abido íena omo orédícue. Afe íe cue ória cue iere izíruiga úrue ória izoide. <sup>13</sup> Nai benomo ñúefue ícoinia cue llavébilla llezica, afémíena “Benó cue diga fiebi” uáfúena daíacadícue, o méifomo afémíe cue canóllena. <sup>14</sup> Mei íadí nai o jíí dáííñenia minícana ocuúacañedícue. Daí daídícue, o cue jícajana ocuilla izóí íñeillena. Mei jíáífodo dama o comeci jítailla izóí cue jícajana o fínuaana jítaídícue. <sup>15</sup> Níbaí Onésimo nauí fía nígarui fidí oni o abímona jaide, meine billano biruímona o abímo afémíe jaca nínomo íllena. <sup>16</sup> Iemona birui ríire ocuícamié izóíñeno, mei jíáífodo izíruiga ama izóidímíena afémíe o diga írede. Afe jíra nauí ríire ocuícamié baímo ñúemíena o diga írede. Afe bímie iere izíruitícue, mei íadí o cue baímo íena izíruiredí. Birui daa afe ñue táíjíttallímíe izóí íena izíruinidí, mei afe baímo cai Ocuíraímamo jaináide ámana o izíruilla izóí, afe izóí íena izíruiredí.

<sup>17</sup> Iemona uáfúena cue nabáidímíe o íadí, cue o líínua izóí, afémíe o líínori. <sup>18</sup> Níbaí nano afémíe fíénide raa omo finóadí, íemo jíái níbaí miníca omo íbañenia, cuemo jíca, cue íbállena. <sup>19</sup> Ona uafue cue daíttallena cue ónoído cueticue: Afena íbaitícue. Cue Páblodícue. Mei jíáífodo cue ona uíbíñotaredícue, dama o ñue méidoga abí cuemo dúide,

mei Juzíñamuimo ona ínotadícueza. <sup>20</sup> Ua mii, cai Ocuíraimamo o ínuamona, afe bímie o llínuado caimare cue itátari. Crístomo dájena jainaide ama izói cue comeci fírari.

<sup>21</sup> Omo cueticue mei o jíeruifirena ñue onódicueza. Jiái onódicue, cue ocuica baimo finóredio. <sup>22</sup> Afe llezica cue iníllico uiécodo raire finori. Mei bie izói ocuídícue; Juzíñamuimo omoi jicállemona, Juzíñamui omoi cue eróizaibillena cuena óreite.

*Iraicaiño uáidua, caimare ñúefue dibénemo omoi itátallena*

<sup>23</sup> Cristo Jesús ícoinia cue diga llavécamie Epafras uai omo orede. <sup>24</sup> Daje izói jiáie cue tájínamo canódimaci Marcos, Aristarco, Demas, Lucas diga omo uai orédiaioi.

<sup>25</sup> Mai mei cai Ocuíraima Jesucristo ñúefue dibénemo ómoina itátaiteza. Daiítadeza. Jae ñie.

## HEBREO IMÁCI MO CUEGABE

*(Daa bimaci jiaífodo mameina Judíuai)*

*La Carta a los Hebreos*

*Juzíñamui ie Jitodo ja comínimo úrite*

<sup>1</sup> Jaiái ninomo cai judíuai jaiáidigimamo Juzíñamui úrite. Ua, ie uai llórainido diga icaiño, diga jiaífodo jóoide uáillaído úrite. <sup>2</sup> Mei íadi ja birui írairuillaído Juzíñamui ie Jitodo caimo úrite. Bie Jitó uaido Juzíñamui jaiái bie éniena naa úcuairi finode. Iemo naga raa íeiena náamatallena Juzíñamui íena mamede. <sup>3</sup> Afe Jitó ie Moomo ite ebíredena jino cíotatimie. Daje llezica afémie jino náiraímo cíotaga; ua daje Juzíñamui izóidimie. Nana finoca ráaniaína afémie dájena jaináitano ie ñue riírede uáillaído nágarui ñue jaícina finócana uite. Bímie, cruzmo dama ie die tótajado cai fiénidifuiái ñue múiñua mei, caífo monamo ite Juzíñamui nabezi dibénemo ráinazaide, dinómona nahí illáimaillena.

*Juzíñamui Jitó Juzíñamui abi imáciai baímo fígomie*

<sup>4</sup> Afémie afe jamánomo riíredinomo jáillamona, nana Juzíñamui abi imáciai baímo fígomiena jaide. <sup>5</sup> Juzíñamui ie abi imácionna dáamie jaca “Cue jitódio” daíñede. Ua, “Cue Jitódio, ja birui illáimana o jóoneitícue” jaca daje izóí íaioína daíñede. Mei íadi ie Jitó Jesucrístona daí daide. Daje izóí ie abi imácionna dáamiena “O moonna íitícue” daíñede. Dáanomo “Cue jitóitio” daíñede. Mei íadi Jesuna daí daide. <sup>6</sup> Ua Juzíñamui ie izoide daade Jitona bie éniemo comútajano daide:

Mai, nana Juzíñamui abi imaci, bie cue jitona jacíruiocana ñue omoí ióbitari.

<sup>7</sup> Mei íadi abi imáciai Juzíñamui daide:

Bimaci cue abi canórainína íllamona, íaioína ocuífiredícue. Iemona jairifo raíre náidacailla izóí, bimaci cue ocuícana raíre jetáfirediaioí.

Afe izóí nana cue canófirede cue abi imaci jacírede boode iraici izóí, íaioína ocuífiredícue, —daide.

<sup>8</sup> Mei jiaífodo ie Jitona daide:

Juzíñamui o íllamona, o illáimana illírui jaca ninomo zííñona íite.

Ñue comécina jaícinaínafuedo jaca illáimaífíreitio.

<sup>9</sup> Ua, comécina jaícinaínafuena izírúitio, mei íadi fiénidifuiáimo éoícana eróidíio.

Iemona Juzíñamui, ua o Juzíñamui, jae ona ióbitade.

Nana Juzíñamui uaina jíeruite o nabáíñiaí cáimadua baímo, cáimatagao, —daide.

<sup>10</sup> Jiaínomo ie Jitona Juzíñamui daide:

O Ocuíraímadíio.

Naga ráaniaí o táinia mei, bie énie finódio.

Nana monamo ite naga úcuai o ónoído finócana.

<sup>11</sup> Afe énie naa úcuairi niné táinocaitiaioí, mei íadi o jaca zííñona íitio.

Aféniaí jácara iníroillai zabilla izóí zábitiaioí.

<sup>12</sup> Iemo inícuro dócoiano oni jóonia izóí, oni eneno íaioína jóoneitio.

Iemona iníroi jiaíroína abímo jita izóí, bínie naa ucúduairi méidoficaitiaioí.

Mei íadi o jaca méidoñellioza, dinó níimieitio.

Omo itífue jaca zííñona íite.

<sup>13</sup> ¿Ñie mei ie abi ímiemo Juzíñamui llogámie:

O fairíconi o anamo cue anáfenotalle llezica mai benó cue nabézimo illaíma nabai izóí ráinazaíbi?

Daí dainámiena ñede. Dama ie Jitó Jesuna daí daide. <sup>14</sup> Nana afe Juzíñamui abi imaci Juzíñamui ocuica canófirede jóriaiai. Ua Juzíñamui orécaiaioi, afémiedo jílloitino ñue rairuúllena.

## 2

### *Cristo caimo llúaibiga jílloa uaimo ñue úñoredicai*

<sup>1</sup> Ie jira Juzíñamui Jitó, Jesucristo daí naga illaíma baimo jáidimiena illamona, nana Juzíñamuimona cai cacana uailai jeire cai olle iere jitáirede; omoi jefóniai ñue jinéoiri. Aféuaimo ñue omoi cacáreiri, oni nibéfodo fiénidifue mo cai báíñeillena.

<sup>2</sup> Mei Juzíñamui jaiiai ie abi imácido llogáuai jaca oni caitánide. Naga aféuaina jeire oñédino naa cacáfinidinori raire iere duere finócaiaioi. Mei afe fiénidifue finuamona Juzíñamui íaioimo jaícina ibana ote. <sup>3</sup> Mei íadi birui aféuai baimo jamánomo ñue riírede uaina cacádinodicai. Ie jira bie Crístromona cai cacana uáillaina jeire cai óñenia, ¿ñífuedo jaícina iba uáfue mona jílloiticai? jílloindicai! Afe baimo ñue riírede uai nano fueñe Ocuíraíma Jesucristo caimo llogáuai. Ie mei ie dainana cacádinodo aféuai jae cai uafue daíllena llotátaga. <sup>4</sup> Afe íaioi daina uaimo onótate raado Juzíñamui ñue uai nabáitate. Iemo jíai jacírede raado, aillo cíórainina raa diga afémie ñue uai nabáitate, íaioi daináuaimo ñue cai íinollena. Afe llezica Juzíñamui ie jitáinafue izói, ie Ñuera Joreño ñúefuiai finolle riino, illa dígamierie íaioimo fecade, daje izói caimo.

### *Jesucristo Juzíñamui Jitó íadi afémie cai illa izói, ía cómena íficaide*

<sup>5</sup> Cai úrifirena ñuera úreitiruillaido ñimie illáimaillena, Juzíñamui ie abi imácina: “Ílláinina jáitiomoi” daíñede. <sup>6</sup> Mei jíáfodo comínina illáimaitaacade. Jaiiai Juzíñamui Cuegáuaimo David Juzíñamuina daide:

¡Ñi naga come Juzíñamui dibéneo jamáimíina!

¿Ñibái mei íaioimo coméidido?

¿Ñibái mei íaioi jitótiaimo járitaitio?

<sup>7</sup> Mei uáfueña due jiza o abi imaci jofófemomo comínina comúitatio.

Íllaíma ebírenano naa ñúefue diga íaioimo nitáido.

<sup>8</sup> Naga raa íaioi anamo o itátatio.

Daí naga raa íima anamo itábicaillamona, jae minica ie anamo itábicaíñedena ñede. Mei íadi ja birui íima dibéneo naga raana náamatañega. Afe izóiñedeza; afémie nahí náamañede. <sup>9</sup> Mei íadi jíáfodo birui Jesuna cai onónamona íemo coméidicai. Afémie nana íanori due jiza Juzíñamui abi imaci jofófemomo jónegamie. Aféruído afe Jesús nano cai jíainona, tílla onóillena facade; mei afe llezica nana comini fiénidifue ícoínia Juzíñamui zóofegamieza. Ie mei tíide meine abido cáanamona jamánomoidimiena jaide. Afe mei afémie, illaíma izói, ñúefueña nitácamié, jae ebire finócamie, mei nauí ie tíllaruimo iere duere ie zefuúllamona. Juzíñamui cairi dúecaillano, nana comini niné táinocaitañellena cai ícoínia Jesuna daí zefuítate.

<sup>10</sup> Juzíñamui daí ie Jitó duere finoille caimare íemo jóbide. Ie jira Juzíñamui íaioina jílloitate ifódimie duere zefuúllafuedo nana cai jílloafueña ñue fuitade. Mei jíi, naga raa Juzíñamui íeiena ie ínuamona ja birui itíaioi. Afémie nana comínimona aillo jitótiaí jílloacade ie caimare ebírenanomo dáanomomo íaioi dúcizaillena. <sup>11</sup> Mei Juzíñamui dibénemo oni jónetimie Jesús, nana Juzíñamui dibénemo oni jónegamací diga daje Juzíñamuina móorediaioi. Iemona, cai baimo jamánomoidimie íadi, Jesús “Cue ámatiaidíomoi” daí dainana meáiruñede. <sup>12</sup> Afémie Juzíñamuina daide:

O mámeceí cue ámatiaimo jino llóiticue.

Nana omo gairídino cígiri rocana ñúefue omo nítaiticue.

<sup>13</sup> Jíainomomo Cuegáuaimo daide:



Cue Juzíñamuidio. Omo ñnoiticue.

Ie mei jiáinomo daide:

Be, benó iticue, Juzíñamui cuemo iga naa úruiairi.

<sup>14</sup> Onódiomoiza, nana cai jae cómena comuítacai. Daií cai íllamona, daje izói Jesús dama cómena comuíbicaide. (Ua, fia come izói jéciga.) Afe mei come abi íemo íllamona, ie tíllado cai títaite Taifena ríinitade. <sup>15</sup> Jaiáimona nana tílle jágiedo Taifemo rairuícamacidicai. Mei íadi Jesús jae cai jacíruiñeillena nane ñue cai finode. Ja ráiruiñeganona afémie daií cai ñue orede, nana nauí cai caana llezica tíllena jacíruiticai íadi. <sup>16</sup> Mei uáfodo onóigaza: Jesús ie bíllado Juzíñamui abi imácina cánuaibiñedeza, mei íadi cómena íficaillano nana Abrahámona comuídigi mana cánuaibite naa jiáie Juzíñamuimo ñnotinori. <sup>17</sup> Afémie cai cánuaibillemona ie ámatiai nana íaioi illa izói afémie íficaillana iere jitáiredeza, mei dúecaifirede nahí comínimona Juzíñamuimo comínido úritillaimana jáideza. Ua ñnofirega Juzíñamuimo úriraimana jáiacade, afe daií ie tíllado comínimo ite fiénidifuiái oni muiñóllena. <sup>18</sup> Mei Jesucristo íaifue fiéni facátafuiaimona duere zefuide, aféfuemo baiñede íadi; íemona ja birui fiéni Taife facátagamacina cánua ríino Crísto íteza, ja caina ñue canórede.

### 3

#### *Jesús Moisés baimo jamánomoidimie*

<sup>1</sup> Ie jira, cue ñue ámatiai, Juzíñamui uáidogamací dibénemo jaináidiomoiza, Jesumo izire comeci omoi facari; ua cai jeire oga ñúefue lluaíbitagamíemo ñue comeci omoi facari. Iemo nane Juzíñamui dibénemo caído ñue úritimíemo, mai íemo comeci omoi facari. <sup>2</sup> Bie Jesús íena daií mamédimie ocuica uaina jaca nágaruillai ñnofirede; ua, jaiáidimie Moisés nana íemo llogáuaina jeire ófirena izói, afe izói bímie nana íemo ocuica uaina jeire ófirede. <sup>3-4</sup> Jae onódiomoiza naga jofo come niga; dama abina niñedeza. Mei íadi naga ráaniai finódimie Juzíñamui. Iemo daje izói ja onódiomoiza, naga jofo niraíma afe nigaco baimo ñúemieza. Afémíemo jamánomo ñúefue jóonere. Ie izói afe bie Jesús Moisés baimo ñúefuena nitáregamie, mei naga raa afémie comuítacaza; íemo jiái daje izói Juzíñamuimo cai jaináinana Jesús comuítateza. <sup>5</sup> Ua, afe Moisés nana Juzíñamui íemo llogáuai, Juzíñamui dibénemo táijiacadimie izói, aféuaina ñue jaícina Juzíñamui eneno nizeca Israel náiraímo llotátate. Afe daií afémie ie méifodo bite llófuellífuemo uai nabáitate. <sup>6</sup> Mei íadi Cristo, jofona náamataga Jitó izói, nana ie anamo itínona ñue jaícina ocuíoide. (Afe daií Cristo Moisés báifene ímienaza onódicai, mei naga jitó, jofo ero táijiraíma baimo itímienaza.) Iemona Cristo dánana, cai ñnuafue ñue riire itífuedo are illa ícoímo jeire cai oíadi, Juzíñamui comínidicai. Afe llezica afémíemo caímare cai úíñuana jitáirede.

#### *Juzíñamui comini comeci caímare uái illafue*

<sup>7</sup> Ie jira Juzíñamui Ñuera Joreño jaiái Cuegáuaido daide:

Birui Juzíñamui daínauai omoi cacana llezica omoi coméciai ríiretañeno iri.

<sup>8</sup> Jaiái énie zaféredinodo Israel comini facátaruimo afémaci íaioi comeci riire fínuano Juzíñamuina uáitatiaioi.

Jií, afe izói omoi íñeno iri, daide.

<sup>9</sup> Iemo nane Juzíñamui daide:

Aféruillaído jaiái omoi uzútiái Judíuái cuemo ñnoñeno fiéni facátafuedo cuena facátatiaioi. Cuarenta díga fimónado nana íaioímo cue finócafuiaina ciódiaioi íadi, cuemo fiéni comécidiaioi.

<sup>10</sup> Ie jira afe bigíma cuena ríicaitade.

Afémacido daidicue: “Íaioi comeci cuemo figo jaináñenamona, cue lloga io onóñeno oni nibéfodo jáidinona itíaioi.”

**11** Iemona áferi icírillano riírede uaido daidicue: “Jaca cue lloga caimare comécina uái ocózinaillana óñeitíaioi,” daidicue.

**12** Amatíai, daje izói figóñede, ñúefuena íáiruiga íñoñede comécimona mai abí omoi rairuiri, afe izói omoi íñeilla. Mei afe izóidímie cai caade Juzíñamuimona oni eneno jica íteza. **13** Mei íadi nágaruillaído, Juzíñamui ómoína nai uáidua llezica, Juzíñamui dibénemo ñue riire jainairi. Iemo daní ómoimona ñue lletari. Daí ñue omoi llóiri, fiénidífue ie abi jífuiafuedo buna ómoimona dáamie comécina riíreiñellena. **14** Mei nanóidemona caimo ite izire ínogafue, riire fáicanocaiñeno uáfuena cai onóyadi, jae Cristo dibénemo jaináidinodícai. Aféfuemo rairuíñeno ñue omoi jíruiri.

**15** Juzíñamui Cuegáuai daí daide:

Birui Juzíñamui daínáuaina omoi cacana llezica, jaiái Israel Juzíñamuina uáitjaruimo comeci riirena izói, omoi comeci riíretañeno iri.

**16** ¿Bu mei afe Juzíñamui uai cacáдино íadi, nane dáanomo íena uáitate? Mei nana Egíptomona Moisés bairócamaci Juzíñamuina uáitate. **17** ¿Mei nímaci cuarenta díga fimona Juzíñamuina icíritate? Mei nana afe Juzíñamui uai íñoñeno fiéni finódino; ñí afémaci ícuruai énie zaféredinomo fiénocaiga. **18** ¿Ñí náiraina riírede uaido Juzíñamui daide: “Jaca cue lloga caimare comécina uái ocózinaillinomo dúciñeitiomoi?” Mei nana afe ie uaina cacádinona íadi aféuaina jeire oñédinona daí daide. **19** Daí íaioina daínana íaioi íñoñenado jofo cáimanomo dúcinidiaíoi. Ua daí ñúenomo íaioi dúciñenana onódícai.

## 4

**1** Ja birui Juzíñamui uafue caimo lloga caimare comécina uái ocózinaillana cai olle uai caimo ite. Aféuai nai caimo illa llezica mai ómoimona dáamie aféuai comécimo óñeilla daítadífuemona mai abí omoi rairuiri. **2** Mei uafue cai bie ñúefuena llogámacidícai. Ua afe jaiái Egíptomona bairócano ñúefuena llóina izói ñúefuena llogámacidícai. Mei íadi íaioi cacana uai figo íaioina canóñede; mei íñoñediaíoiiza fia táinona cacádiaíoiiza. **3-4** Mei íadi Juzíñamui lloga caimare comécina uái ocózinaillinomo nahí jofo jáidinodícai, mei ie uaina ñue cai ínofirenado. Birui Jesumo cai ínuamona, caimare comeci jacíruiñenafue dibénemo jónegacai. Jira ocózinairanomo táijiñeno cai illa izói, jae caimare uái itícai. Ie mei uire Juzíñamui illánomo ñue afémie díga caimare uái íticaí. Jaiái íñoñedinona Juzíñamui daide:

Íaiomio cue riícaillano ñue riírede uaido daidicue, “Afe cue lloga caimare comécina uái ocózinaillinomo jaca dúciñeitiíaioi,” daidicue.

Daí Juzíñamui íaioina daide. Mei íadi ua íaioi caimare illífue Juzíñamui are uícomo mamécaza; mei jae are énie ie comuítjaruimona, nana Juzíñamui ie finócafuiái, naa caimare cai illífuiaíri, jae fuitádeza. Mei Juzíñamui jíánomo ie Cuegáuaimo afe ie ocózinaillaruido úrite; daide:

Juzíñamui seis dígarui táijide; ie táijina mei siete iruimo nana ie finócafuiáimona caimare uái ocózinaide.

**5** Afe mei jíáruído ie Cuegáuaimo Juzíñamui daide:

Cue lloga caimare comécina uái ocózinaillinomo dúciñeitiíaioi.

**6** Iemo ñúefuena nanoide cacáдино íñoñenamona afénomo jofo íaioi jáinina méifomo, áfeo nai jíáimaci jáillena túide. **7** Ie jira Juzíñamui díga fimona jailla mei, David roránicuaído comíni uáiduano meine jíáie billirui íaiomio llote. Afécuaimo, due jiza íllamona cue lloga izói, Juzíñamui daide:

Birui Juzíñamui daínáuaina cacádimoiiza omoi comécina riíretañeno iri, daide.

<sup>8</sup> Mei íadi Josué afe jaiáidinona nahí caimare come comeci jacíruiñenanomo uiñede. Ie jira diga fimona illa mei Juzíñamui meine abido comini caimare illíruina úrite. <sup>9</sup> Iemona afe nahí caimare come comécina uái ocózinaillafue nai ite, Juzíñamuimo jaináidimacina dani íaioiena maiñóllena. Afe ñue caimare cai illífue ocózinaillaruiimo cai ocózinailla izoide. <sup>10</sup> Mei naga afe Juzíñamuimona oga caimare illífuea maiñódime, dama ie jílloille naa ie nícidogano fáicanocaillano, caimare uái ite. Ua Juzíñamui naga ráaniai ie finua fuilla mei, ocózinaillano caimare uái ite. Afémie uái illa izói caimare uái iticai. <sup>11</sup> Ie jira afe caimare cai illífuea mai ñue omoi maiñori. Mai benómona daí omoi ífireiri, ómoimona buna jáiairagima bífuea íaioi ñnoñenado íaifueo baiílla izói omoi báiiñeillena.

<sup>12</sup> Nana Juzíñamui lloga uai, jaca íocire cáadime izoide. Afe uai jaca ninomo riiredeza, buna oni caitánide uai. Aféuai comini ífocaimo défirede; ua íaioi comécina zuitáfirede. Mei jii, jáire jicaica lloéfaido abi ñeta iere jofo ícurumo raire dúcizailla izói, afe izói Juzíñamui uai nana cai comeci ífui ai onótate. Uáfuea cai comeci facáduana naa cai comeci jítailafuiai ídiano ñue uáfodo jaícina jino caimo onótate. <sup>13</sup> Nana Juzíñamui finócafui ai íemona oni retáidonide. Ua, daa Juzíñamui cióñenamiena iñede. Nana cai comécillafuiai cai finócafui ai diga, uáfori cai nahí Jicánoraima ui anamo ite.

### *Jesús Juzíñamui dibénemo caído ñue úrifredillaíma*

<sup>14</sup> Jae Juzíñamui Jitó, Jesús, mona úllie illano iere caifófenemo jaillano, Juzíñamui illánomo dúcide. Dúciillano Juzíñamuimo dibénemo caído ñue raire úriraimana jaide; ua afémie caído úrifredillaímana jónega. Afe bie úriraima caimo illaza, mai nana afémiemo cai comécilli; afémiedo cai ñnogafuiai fáicanocaiñeno jaícina riire ñue íemo cai ñnoilli. <sup>15</sup> Afe caído Juzíñamuimo úrifredillaíma nana cai abi ríidolle riino iñénana onode. Ua afe cai riino iñénamona cai féiraífirenana afémie onode. Ie onónamona caimo dúcaífirede; mei afémie cai izoide cómena íficaillamona, nana fiene facátafuiaína cai cacana izói cacade íadi afe fiénidífuiaimo baiíñede. Iemona Juzíñamui dinena jáiredicai. <sup>16</sup> Ie jira Juzíñamui illáímana illánomo cai úrizaiilli; mai omoi jacíruiñeno afe caído úrifredillaímadó Juzíñamuimo raire úrifireiri. Daí íemo úriredicai caína ie dúcaillano cai fiene finócafui ai iba caimo óñeillena; daje izói afémie cai jítaiílliruido cai canóllena, afémiemo úriredicai.

## 5

<sup>1</sup> Naga come dibéfodo Juzíñamuimo úritillaíma comínimona nizeda oga. Uano Juzíñamuimo comínido úrilla mamécamié. Daje izói afémie comini dibéfodo Juzíñamui íóbitalle ráfui ai finófireillena mamécamié. Íaioi Juzíñamuimo fia iga ráaniai afémie izájite. Daje izói íaioi fiénidí fue íba otátañelle fia fállena fecaca tóica rílleniai afémie Juzíñamuimo izájite. <sup>2</sup> Afémie ríinide cómena íllamona, íaioi illa izói abina onóñedimacina fáicana comeci járitañenado caimare firaizitaite. Daje izói oni nibéfomo baiídinona comeci járitañeno llétaite. <sup>3</sup> Mei afe nizécamié cai izói ríinidime. Iemona dama ie íaífuiai muiñolle tóica rille jíáimaci fécajilla izói, afémie jíái fécajirede. Ua nana comini dibéfodo izáíbilla izói, dama íeiena afémie izáíbirede.

<sup>4</sup> Afe iere ñuera Juzíñamuimo úriraimana íllena, buna dama ie comeci jítaina izói ínide; dama Juzíñamui jónegamié daí írena. Afémie caimare jacíruigamié. Jaiáidíruimo daí Juzíñamui Aarona uáidote. Uáiduano, Juzíñamui íena nizeda úritillaímana jónete. <sup>5</sup> Afe izói Jesucristo Juzíñamuimo comínido úriraimana íllena raire dama uícoficaiñede. Mei íadi Juzíñamui daí úritillaímana ie jóniacana llezica íena daide:

Cue jítódio; ja birui illáímana o jóneitícue, daide.

<sup>6</sup> Ie mei daí daínamiéna Juzíñamui jíáinomo nane daide:

Jaca ninomo Juziñamuimo comini dibéfodo úriraimadio. Ua jaiái ninomo Juziñamuimo úriraima Melquisedec izói jaca ninomo Juziñamuimo comini dibéfodo ziiñona úriraimana ítiio.

Aquíe izói Juziñamui ie Jitó Jesuna daide. <sup>7</sup> Cristo cai come izói bie éniédo jáicaillarullaido, izire écana Juziñamuimo comeci facade. Iemo dáaruído Juziñamuimo izire jicade. Afémie daií íena jillotaredimiemo comécido úrite; daide: “Bie cue tíiacanafuemoná mai cue jillota” daide. Iemo Moo Juziñamui anamo afémie ñue itábicaillamona comécido Juziñamuimo ie jícájana Juziñamui cacade. <sup>8</sup> Daií Jesucristo Juziñamui Jitó íadi, ie duere zefuillafuíaído ocuilla uai anamo itábicaillana fibide. <sup>9</sup> Afemona afémie daií nana cai jilloillifue ñue fuitállena jamánomo jáicina fibítagamiena jaide. Ie jira nana íemo ínotimaci dibénemo Jesús ziiñona Jíllotaraimana jaide. Ua ziiñona jíllonafue tainédimiena jaide. <sup>10</sup> Mei jira Melquisedec izóidimie Juziñamuimo comini dibéfodo ziiño úrifireitimiena, Jesús jae Juziñamui mamécamié.

### *Cai ínogafue meine abido cai jáanolle iere jacírede*

<sup>11</sup> Bífuiáido aillo úriacadicue, mei íadi iere cacáacañediomoi. Iemona nai figo baitáñedino izói itíomoi. Daií omoi íllamona, bífuiái ómoimo jino cue llolle iere féirede. <sup>12</sup> Naui nano Crístomo omoi ínuaruimona jae diga fimona jaide. Iemona jae oni jáímacimo omoi llófuerizaille iere jítáirede. Mei jáífodo ja birui meine abido Juziñamui llogáuái tainéinafuíaína ómoimo jáíama llófuelle jítáirede. Nai monoi jirode úrue izói meine abido úruetaidiomoi; nai figo baitáñedino izói itíomoi. Ua llíciaina nai rínide izóidinona abido jáidiomoi. <sup>13</sup> Mei jii, naga monoi jirófiredino, móonaiñena llezica nai dúetiru. Daje izói naga Juziñamui anamo ñue jáicina caina móonaitade llófueinafue dibénemo baitáñedimie nai úrue izoide. Mei afémaci nai móonaiñeno úruiai izói baitáñediaoiza. <sup>14</sup> Mei jáífodo dama móonaite éicomini llíciaina rírena. Afe izói juárede llófueinafue ñue onona dama comécina ñue jéedimacimo dúide; mei afémaci aillo facáfírenamona ñúefue fiénidifue baímo ñue onónana fibídiaoiza.

## 6

<sup>1</sup> Ie jira afe nánoide Cristo dibéfodo llogáfuiái ómoimo llúana ja moziñocaidicue, jáíe cómofue ómoimo jino cue llólle. Omoimo cue llolle bie cómofue, Juziñamui llogáuailaido ómoína ñue jáicina móonaitate. Aféfuiai mai jeire cai olli. Nano uícodo lloga ñúefue jillácina meine abido diga icaiño ómoína llófueñeiticue. Afe nanóidifuiái bie izói daide: “Omoína jíllotañeite omoi nícidogafuiái fáicanocaillano ñúefuena méidori. Méiduno, mai Juziñamuimo omoi ínnori,” daide. <sup>2</sup> Iemo afe nanóidifuiái báutizaafuedo úrite. Iemo dáanomo onoi cómemo bítafuedo úrite. Daje izói come tílle mei, afe tíidinomona meine abido cáailifue llote. Afe emódomo, írairuimo Juziñamui nana comínimo jicánolle mei ziiñona duere finótallifuedo úrite. <sup>3</sup> Nana bie nanoide llogáfuiaina meine abido llófueñeiticue. Mei íadi, Juziñamui comeci jítaina izói, afémie cue canólledo, ñue móonaitadifuiaina omoi llófueiticue.

<sup>4-6</sup> Daií birui ómoimo llófueacadícueza, mei nanóidifuiaina uáitajano oni jáífodo féiraitimiai íaioi illafue nano ñue ínogafuena jaca méidonide; mei afe ñúefuena nai náfueñediaoiza. ¡Mai, abí omoi rairuiri! Afe daiítadimaci naui dáaruina Juziñamui llófuegamaci izóidiaioi; ua Juziñamui dibénedo ífócina déitaganona itíaiioi. Daje izói, monamo ite Juziñamui daína caímátallifuena facádiaioi. Iemo daje izói afémaci Juziñamui Ñuera Joreño úicaillana jae facádiaioi. Afe llezica Juziñamui ebírede daínáuai cómena ñúetatifuena afe íaioi fácamona, ñúerana onódiaioi. Afe emódomo, Juziñamui Jitó uire illáimana illirui llezica, íemo ite comini cáímadolle rínodo jae bimaci canócaiaioi. Jae nana bie núefuiaina fibídiaioi. Mei íadi afe mei Juziñamui ífuiaína móonaitaoiñeno,

aféfuiaiana íaioi uáitaiadi ñúefuena méidofinidinona jáidiaioi; mei daí afémaci íllamona Juzíñamui Jitona cruzmo fatátatimaci illa izói afémaci dani itíaióiza. Ua nairai uíecori íena jifánodoia izói íena meáidaitadiaioi. <sup>7</sup> Bie izoide comini comue jacafai aífena izoide. Juzíñamui bíitaga noci naga éniemo diga ícaño biide. Iemona afe éniemona ñue ria aite, afe éniemo táijidino güllena. Aféniena Juzíñamui ézicite. <sup>8</sup> Iadi jáinomo noci bíilla mei, daa figóñede éegiai ailla, naa zaie diga. Afe izóidinie ráifiñedeza; nibai íanori íllamona Juzíñamui fáidoite. Iirainomo afénié jobáillamo dúide, naa afénomo zicódinuairi mei figóñedeza.

*Cai úiñoigafue caina riire nabaide cai ñnogafue féiñellena*

<sup>9</sup> Mei íadi cue izíruiga ámatiaidiomoi. Jae cue lloga faidórafue baimo jamánomo ñúefuiai dibénemo jaináidiomoi. Ua omoi jíllonafuemona comuide cáimaduafuiai maiñófirediomoiza. Aféfuena ñue onódicue. <sup>10</sup> Juzíñamui comécina jáicina jóidimie. Iemona nana íena omoi izíruillamona omoi finoca Juzíñamui comini cánua ráaniaina, afémie féitañede. Daje izói aféfuiaimo nai birui jieruitiomoi. Ua Juzíñamui jaináidinona izíruillano, ñue afémacina riire canófirediomoi. <sup>11</sup> Ie mei birui afe izire omoi nícidua izói, daje izói ómoimona illa dígamieriena Juzíñamuimo ocúiriri daidicue. Iemona omoi ñnogafuiai jeire ómoína otátaacadicue, omoi úiñoigafue táinomo fáifiñellena, mei jáífodo ñue jáicina omoi fuitállena. Afemo ómoína nágarui izire coméciri daidicue. <sup>12</sup> Daí izire omoi comécioillamona ráiraiédino illa izói íñeitiomoiza. Mei omoi ñue comécillamona, jáífodo daade Juzíñamui lloga ua caimare illafue dibénemo itino illa izói ítiomoiza. Afémaci íaioi ñnogafuedo íaioi abina ñue finóinafuena Juzíñamuimona otíaiioi. Ua comeci járitaiñeno are illa ícoimo Juzíñamui uícodo íaioimo lloga ñúefuena maiñóroidiaioi. Iaioi illáfuemo ñue omoi coméciri, íaioi illa izói omoi íllena.

<sup>13</sup> Mei jii, Juzíñamui iere ñnofiregamie. Jaiai Abraham illáruimo Juzíñamui uafue uai Abrahamo llote. “Aillo comini jebuítaitio” jaiai uícodo íemo llote. Llua llezica uafue daíllena Juzíñamui dama ie mámecina llínote, aféfuena Abraham ñue ñnollena. Ua Juzíñamui dama ie mámecina llínote, mei jáie baimo jamánomoidimiena íñédeza. <sup>14</sup> Daí Juzíñamui Abrahana daide: “Uafue iere ona ñue caimátaitaiticue. Jae cue o jítóretallemona, o erófene igímana jamánomo iere jebuítaiticue,” daide. <sup>15</sup> Iemona Abraham comeci riire járitaiñeno, diga fimona afemo úiñoode. Daí ie ocúirina mei, afe Juzíñamui lloga caimare ie nairai jebuíllifuena Abraham ñue maiñódeza. <sup>16</sup> Bínie comini cígimona dáamie uáfue daíacana llezica, afémie baimo riíredimie mámecido uafue daítate. Daí lloga uaina buna oni caitáñede. Nana dani íaioi júfidogana záitate. <sup>17</sup> Daje izói Juzíñamui ie lloga finóllifue, jáie ñue riírede uaido, aféfuena iere uafue daide. Afémie daí dáideza, mei ie uícodo lloga ñúefuena máíñoitinomo, afefue ua jáífodo méidonidena jino íaioimo uáfodo llóiacadeza. <sup>18</sup> Daí Juzíñamui mena caitánide uáillaído íaioimo llote. Afe ménacaiño ie daina dibénemo Juzíñamui táinona llónide. Afémie daí daide, afemona cai comécina ñue íociretallena. Iemona caimo ie lloga ñue cai jíllonafuemo fáicanocaiñeno ñnofiredicai. Mei jii, cai Jíllotaraima Jesucrístomo jarire jaillano caina ie úiñotaga comeci íaifue dóllena riire íemo jicádicai, caimo ite fiénidifue iba óñeillena. <sup>19</sup> Afémie cai jíllotallena caimare úiñooidicai. Iemona afémie caina daináuai cai comeci nífuenina ñue mozíoitade. Ua cai úiñoigafue caina riire nabaide cai ñnogafuiai féiñellena. Daí comeci docáiñeno ñue riire nabáitaga jacíruíñedinodicai. Mei cai jíllotaita cai úiñogamie Jesús, caifo monamo Juzíñamui nahí ie iránomo íteza. <sup>20</sup> Afe Jesús, cai jáillio ífódimiena afénomo jae jaide. Daí íllamona afémie jae comínido Juzíñamuimo zíñona úritillaimana jaide. Ua, jaiai Juzíñamuimo úriraima Melquisedec izóinado, Jesús jaca ninomo caído úrite.

## 7

*Jesús, jai ai Melquisedec illa izói comínido Juzíñamuimo úriraima*

<sup>1</sup> Afe Melquisedec Salem jofue illaíma. Afe llezica afémie comíni dibéfodo jamánomoide daade Juzíñamuimo úrifiredimie. Jai ai illáruimo Abraham jíáie aféniemo ite illáinina anáfenuaide. Iai oina anáfenuano Abraham meine bítemo, afe Melquisedec io anamo Abrahamo dúcizaide. Dúciillano Melquisedec, Abraham abi ñue finóllena Juzíñamuimo jicade. <sup>2</sup> Afe llezica Abraham nana ie bairoca ñuera ráaniaimona, Juzíñamui íena eneno mameca ráaniaina, Melquisedécimo raiñoñoeno fia fecade. Melquisedec nanoide daina mámecei “Comécina jaícinaidillaíma” fueñe daiíacade. Ie mei afémie nane jíáici ote: “Salem Illaíma.” Afeci “Comíni comécina caimare uái itátatillaíma,” daiíacade. <sup>3</sup> Afe Melquisedec moo mámecei jaca onónide, naa ie ei mámecei diga. Daje izói ie emódoidigíma jíái óñoñega. Daje izói afémie jocóinarui óñoñega, ie tíllarui diga. Iemona afémiena comíni “Zíiñoña itímie” daide. Afe Melquisedec comíni cigíri illáfuedo Juzíñamui Jitó zíiñoña cai dibéfodo úriraimana illáfueña caina fidítate.

<sup>4-5</sup> Mai bífueño ñue omoi coméciri, Melquisedécimo ite jamánomoidifueña omoi onóllena. Ua Melquisedec, cai nanoide jái airagíma Abraham baímo jamánomoidimie. Mei Abraham ie bairoca ráamona Melquisedécimo fecádeza.

Abraham enaize Jacob doce dígade jítorede. Iemo afe jítóniaí cigímona Leví comuídeza. Afémie comíni dibéfodo Juzíñamuimo úrillena Juzíñamui nizeda ogámie. Ie jira nana judíuai Juzíñamuimo úriraini Leví úcoidigimamona comuítagaiaíoi. Afe Juzíñamui nizeca Leví náiraina, Juzíñamui Moisés ocuica uaido daide: “Nana jíáie judíuai nairai imácimona Juzíñamuimo dúide ráaniaina órediomoí,” daide. Ua Leví náiraimo íbarede, nana jíáie Israel nairai daa Abrahámona comuídino íadi. Ie jira Leví comíni nana afe Juzíñamuimo dúide ráaniaina llínofirediaíoi. <sup>6</sup> Mei íadi afe Melquisedec, Leví nairai izíe íeñede. Mei íadi afémie áfena llínoñeniadi afe Melquisedec, Leví emódoidigíma Abrahámona Juzíñamuimo dúide ráaniaina uáfueña llínote. Iemona Melquisedec Leví baímo jamánomoidimieza onódicai.

Afe ráaniaí ie llínua llezica, Melquisedec Abrahamo úrite. Abraham Juzíñamui íemo ñue finóllifue, uiécodo fidítagamie. Iemo ja birui Melquisedec afémie ñue éziciano daide: “Juzíñamui ona ñue cánoiteza,” daide. <sup>7</sup> ¿Nibémie mei jamánomoidimiena? ¿Ezicitímie mei nibai ézicigámie? Ua, ézicitímie baímo jamánomoina. Afefue buna jáanoñega. <sup>8</sup> Nane jíáifue llóitícue. Cai cigímona eneno nizeca Leví comíni, Juzíñamui íena nano mameca ráaniaina llínofiredino. Mei íadi afémaci fia comíniza tífirediaíoi. Mei jíáifodo afe jíáie llínotímie Melquisedécina mámeceiredimie Juzíñamui Cuegáuai daina izói, tíiñoño caade izóidimie. Ie jira Melquisedec jamánomo báimoidimie. Leví imaci nai Melquisedec jofófeneidino. <sup>9</sup> Iemo jíáifue Levído daiírede. Leví Abraham erófene ígíma. Mei íadi afe Juzíñamui íena eneno mameca raana llínofiredimie jai ai uécodo Melquisedécimo ie uzuma Abrahamo Juzíñamuimo dúide raana íbade. Daií Leví comíni, jai ai uécodo Juzíñamuimo dúide raana Melquisedécimo íbádiaíoi. <sup>10</sup> Mei Leví nai jocóñena llezica ie comuíllino nai Abrahamo íteza. Ua Melquisedec ja Abrahamo dúcinaruimo, Leví jocóillino nai jaca ie nanoide uzúmamo ite. <sup>11</sup> Israel náiraimona eneno nizécazie Leví comíni. Aféziemona nizeca nanoide Juzíñamuimo úriraima Aarón. Afémie naa ie erófene ígímaíri comínido Juzíñamuimo úriraini. Ie jira afe úrirainido Israel nairai Juzíñamui ocuilla uáillaina llogáiaíoi. Mei íadi nana afe Juzíñamuimo úriraini finócafuiaí comíni ua zíiñoña jíllloillena figo jínoñede. Comíni comécina Juzíñamui jítaina izói nahí jaícina jóoitañede. Aarón naa ie erófene ígímaíri finócafuiaí figo jínoñena jira, jíáie afémie izóíñede baímo jamánomoidimiena jítáidicai, afémaci méifomo jóonellena. Ua Melquisedec zíiñoña

illa izóidimiena jítaidicai. (Ie jira afe Aarón comini meifo méidoitimiena Juzíñamui jae jino náiraimo ciótate. Afémie mámecei Jesucristo. Ua Aarón comini méifomo jóonegamie Melquisedec izóidimie Jesús; afémie Aarón dibéfomo jaináñede.) <sup>12</sup> Jae afe jaiái uícomo ite Juzíñamuimo úriraini nana dáanomo jiáiena íaiói méidua llezica, afe Moisés íaióimo ocuica uaillai daje izói jiáifodo méidorede. <sup>13</sup> Juzíñamui Cuegáuai daíí daínámie cai Ocuíraima Jesucristo. Afe como jóonega Juzíñamuimo caído úriraima Jesús, Leví nairai ímieñede. Jiáziemona comuídime. Ie nairai ímiaina jaca nizéñega, Juzíñamuimo comínido úrillena. Ua comini fia fecaca tóica rílleniai naa ráaniai diga Juzíñamuimo izájillena, nízeñegaiaíoi. <sup>14</sup> Ñue onóigaza cai Ocuíraima Jesús Judá náiraimona comuídime. Moisés afe náiraimo Juzíñamuimo úrirainina íllena, jaca lloñede.

<sup>15</sup> Afe jiáie como jóonega comínido Juzíñamuimo úriraima Jesús, jino cióillamona, bífuaiaina jino uáfodo baimo onódicai; mei dama afémie Melquisedec izóinaza. <sup>16</sup> Bímie dama ie ñue zíñona ífirenamona comínido Juzíñamuimo úriraimana jaide. Mei jiáifodo Leví náiraimona jaiái nizeca Juzíñamuimo úriraini ocuica uai daínado úrirainina jáidiaíoi. Afe uai ñie náiraimona nizéllena llote. <sup>17</sup> Mei íadi como jóonegamie Jesuna Juzíñamui ñue rírede nabáitaja uaido daide:

“Melquisedec izói jaca ninomo Juzíñamuimo comínido zíñona úriraimana ja birui itioza,” daide.

<sup>18</sup> Iemona afe uícodo ite ocuica uai jae oni caitaca, mei afe uai ríñideza. Iemo jiái, aféuai comini comeci nahí duáfueña figo jínotanideza. <sup>19</sup> Afe Moisés ocuica uai buna comécina nahí jaícina finóñede. Mei jiáifodo jiáie aféuai baimo, ñuera cai jíllotaite úñoigamie Jesucristo jae caimo ciótata. Afémiedo Juzíñamuimo ánozifiredicai, uáfodo Juzíñamuimo cai úrillena.

<sup>20</sup> Afe Jesucristo Juzíñamui riire nabáirede uaido jóonega. <sup>21</sup> Ie uícodo Juzíñamuimo úrirainina jáidino, riirede uaido jóoneñegaiaíoi. Mei íadi Jesús comínido Juzíñamuimo úriraimana jáillaraimo, Juzíñamui riire nabaica uaido ja daíí mameca. Mei Juzíñamui ie Cuegáuaimo Jesudo úrite, daide:

“Cue Juzíñamuidicue. Bifue riire cue nabaica uaido daidicue. Cue comeci faca uai jaca jiáiuaina méidoñeiticue.

O zíñona comínido Juzíñamuimo úriraimana itio;  
Ua Melquisedec izóidimiedio,” daide.

<sup>22</sup> Ie jira Jesucristo, Juzíñamui jamánomo ñuera caimo comue finóllifue caina ñue onótate. Ua Jesucristo aféfuemo iere uafue daide. Afe finóllifue Moisés lloga nanoide finóllifue baimo ñuera. <sup>23</sup> Jesucristo uícoidiruillaimo ite Leví náiraimona nizeca Juzíñamuimo úriraini ua aillo ite; mei íaiói tícoizifirenamona jaca jiáimiena méidofiregaiaíoi. <sup>24</sup> Mei íadi Jesús cai dibéfodo Juzíñamuimo úrillana, jaca jiáimiena méidonide; mei afémie jaca ninomo zíñona itímieza. <sup>25</sup> Iemona Jesús nana íedo Juzíñamuimo úrizabitinona, jaca ninomo jaícina ñue jíllotarede, mei afe Jesús, íaióiri Juzíñamuimo zíñona úriraimana íllaza.

<sup>26</sup> Ua, afémie izoide Juzíñamuimo comínido úritillaimana jaiái ninómona jítáidicai. Ñue cai jíllóillifue afémie caimo ñue zúitaitimie, mei afémie nahí ñuera nífuenidimieza. Afe llezica afémie nana fiénidimaci íaifue mona oni eneno rairuícamie. Ie mei afémie mona ero úcuai illa caifomo, Juzíñamui nahí illánomo uigámie. <sup>27</sup> Jaiái uícomo ite Juzíñamuimo úritillaini nágaruillaido tóica rílleniaina fatá Juzíñamuimo izájifirediaíoi. Nano fueñe dani íaióimo ite íaifue ícoinia áfeniaina izájidiaíoi. Afe mei comínimo ite íaifue ícoinia áfeniaina izájifirediaíoi. Mei íadi Jesús afe izói finuana jítáñede. Afémie dácaño nana comini íaifue ícoinia dama ie abi Juzíñamuimo fecade. Ua cruzmo ie duere zefuida tíllado abi fecade. <sup>28</sup> Afe Cristo uicódo lloga ocuíllafuedo llotino, jiáie jamai figo nahí jaícina finótañede

cominimona Juzíñamuimo úritillainina mamédiaioi. Mei jiáifodo, afémaci méifomo jónega úritillaíma Jesucristo, Juzíñamui ñue riire nabaica uaido jónega. Afémie jaca ninomo nahí jaícínaitaga Juzíñamui Jitó.

## 8

### *Juzíñamui caimo cómuena finóllifue, Jesús caimo jino denódimie*

<sup>1</sup> Nana cai daínáfuiamona llógana bie ñue nahífueña ómoimo llóiticue: Como lloga caimo ñue jóbide caido Juzíñamuimo úriraima birui ja caimo ite. Afémie caifo monamo ite Juzíñamui nabézimo ráinazaide. <sup>2</sup> Dinomo Juzíñamui nahí illánomo Jesús íllamona, jamánomo ñuera Juzíñamui uiécomo Jesús caido úricabite, cai jilloillifue ñue caimo zúillena. Afe Juzíñamuimo cai nahí ánozirano comini finoñega. Jaiai biniemo ite Juzíñamuimo ánoziraco comini niga. <sup>3</sup> Naga Juzíñamuimo úritillaíma, fia iga ráaniai, tóica rílleniai diga Juzíñamuimo fecáfireitimienna mameca. Ie jira cai dibéfodo Juzíñamuimo úriraima Jesús, daje izói dama ie fécajille raa jitáirede. <sup>4</sup> Biniemo afémie nibai abido ie bia, afémie caido Juzíñamuimo due jiza úriraimañeite, mei Moisés ocuícuaí daína izói Juzíñamuimo caido úriraini biniemo nai íteza. Daje izói bimaci nai benó Juzíñamuimo fia fecaca raana íemo izájifirediaioiza. (Ie jira caido ziiño úriraima Jesús, caifo monamo Juzíñamuimo cai ie canólledo úricabite.) <sup>5</sup> Biniemo ite Juzíñamuimo úriraini aillo ráfuiado nícidotiaioi. Nana íaioi nícidogafuai jánana mameide. Iaioi finócafuiái caifo monamo ite Juzíñamui nahífuiaina caina fidítate. Daje izói biniemo ite jaiai Juzíñamuimo ánoziraco, Juzíñamui nahífueña cai fidítaraco. Afena onódicaiza, mei Moisés afeco nitátaacanaruimo, Juzíñamui íena daide:

“Caifónedumo o illa llezica omo cue ácataga afécona o ciona izói, afe izói jaícina mai o niiri,” daide.

<sup>6</sup> Mei íadi biniemo ite Juzíñamuimo úriraini nícidogafue iere afe baimo, cai caifo monamo ite úritillaíma Jesús caido jamánomo ñúefueña nícidote. Mei jii, afe Jesucristo caimo zuitaca Juzíñamui ñuera cairi comue finóllifue, jaiai Moisés lloga finóllifue baimo ñuera. Mei Moisés ocuica uai baimo, Juzíñamui uícodo lloga cómfue jamánomo ñuera uáimona comuídeza. <sup>7</sup> Afe Moisés lloga nanoide finóllifue, comini jilloillena ñue jinoiadi, jiáie uire iite ñue finolle uai jítaiñeitiaioi. Mei íadi afe naonide uai íaioi jilloillena figo jinoñede. <sup>8</sup> Afe nano ocuica uai jeire otino nahí jaícinaidifue mo figo dúciñediaioi. Dúciñediaioimona, Juzíñamui ie Cuegáuaimo íaioina daide:

“Uire jiáiruido nana Israel náiraímo comue ñue cue finóllifue ócuiticue, naa Judá náiraíri.

<sup>9</sup> Jaiai íaioi uzútiaímo cue daína ocuica uai izói, ócuiñeiticue.

Jaiai aféruillaído Egipto éniemona afémaci billa llezica íaioina ifódicue:

Ua afémacina izire úcaidicue.

Mei íadi cue lloga ocuica uaina nano íanori fáicanocaillano, afena figo náfueñediaioi.

Afe jira íaioina zóofeticue,” Juzíñamui daide.

<sup>10</sup> Nai nane íaioina lluno Juzíñamui daide:

“Uíreitiruillaído Israel imácimo bie izói cue ñue comue finóllifue ócuiticue.

Aféruillaído cue ocuica uáillaina íaioi ifócimo jaícina déitaiticue.

Ua aféuaina íaioi comécido jeire íaioina otátaiticue.

Iemona afémacina dama cúeiena nane meine abido máíñoiticue.

Afe llezica íaioi nahí Juzíñamuina íiticue.

Iemo cue náiraína íitiaioi.

<sup>11</sup> Aféruillaído nana afémaci uáfodo ñue cuena ónodiaioiza, cuena íaioi onóillena abi diné jiáíma llónide.

Iemona ie abi ímiaímo buna Juzíñamuina onótanide. Daje izói dámie ie ámamo Juzíñamuina onóillena llóñeite; mei nana cuena ónodiaioiza.



Naga jamáimie, íemo jiái naga jamánomoide riíredillaíma, nana daje izói cuena ónoitiaíoi.

<sup>12</sup> Nana íaíoi mo cue dúecaillamona íaíoi fiéni finócafuíai íbana óñeitícue.

Nana íaíoi comeci íaífuiaina jaca ninomo féitaitícue.

Aféfuiaina úibiñoñeitícue,” dinó Juzíñamui daíde.

<sup>13</sup> Bie méifodo lloga Juzíñamui finóllífue, cómofuena méiduamona, afe uícodo Moisés lloga finóllífue jae jaiáiza feide. Afena Juzíñamui daí uáfodo llote. Iemo naga jaiái raa zabízaillamona raíre oni dotánocaiga; oni dotánocailleza cíóñelle.

## 9

*Bíniemo ite Juzíñamuimo áinozirano, jana izói jiáie monamo ite Juzíñamuimo áinozirano cai fidítate*

<sup>1</sup> Afe nauí nano lloga finóllífue llua llezica, Juzíñamui íemo áinoziraco nitátate. Afe nitátaja dáaruido, comíni Juzíñamuina íóbitalle uailái afémacimo daje izói lloga. <sup>2</sup> Afe lloga Juzíñamuimo áinoziraco Moisés nitátaga. Afeco ere niñeno jédaciede iníroina íbaícaco. Afe áreco ero ménaco titaca. Jinóidico Juzíñamui Ñúeco daína. Afeco eromo áillue mechera izoide egáñora ite. Siete diga dájemona boode raa ite. Dáanomo Juzíñamui dibénemo oni enénorie rairuica pan jóonerabani ite, naa afe páaniaíri. <sup>3</sup> Afe áinoziraco jofóidico Jamánomo Ñuera Rairuícaco daína. Afe jofóidico daje izói jédaciede iníroina ruica diné eróicana nacona íbaica. Jédaciede jígaroi izóidena fetaca. <sup>4</sup> Afe fetaca jédaciroi abímo uguci jobáirabani ite. Bibani llíaide órona jinófene aífítaga. Bie jofóidico eromo daa áillue ráaniaí éenora ite. Cajona eroide. Afe éenoraco nana jinófene órona aífítaga. Afe éenoraco eromo Juzíñamui nofíci íbícimo cuega ocuica uailái ite. Ie jira afeco nofíbícimo cuega Juzíñamui cai ocuilla éenuacona mameina. Iemo afénomo daa oro finoina nogo ite. Afégomo ite Juzíñamui monámona cocítaga güille. Afe güille mámece maná. Daa afe éenoracomo Aarón jigüida izoide radozi ite. Afe idozi jamái jazici radozi óinaza dúididozi. (Zícorede juzítufe izóíñede.) Mei íadi Juzíñamui afe idózina éniemo riñeno, fia táinomona zícótano raíre ñue llizítate. <sup>5</sup> Afe éenoraco íbáirabici emódomo mena oro finoina Juzíñamui abí imácina eroide jana naidáide. Mei íadi afe íaillinoí íáicorede. (Afe íaillinoí mámece ráimona “Querubines.”) Afe íaillinoí conima uíécomo eróidiaillinoí. Íaillinoí naidaina cígimo Juzíñamui cíocafirede. Afe Juzíñamuina cíóñenaza; dama íe abí egáñuana cíófirena. Afénomo faga tóiniaí díena recuífirediaíoi. Daí recuífirediaíoi, Juzíñamui meine abído comínimo dúecaillano, íaíoi mo ite fiénidífue íba íaíoi mo óñeillena, ua afe ícoínia íaíoina duere finoñeillena. Nana afe dibénemo ite duera nícidogafuiaina ja biruí benomo llónide.

<sup>6</sup> Afe ocuica áinoziraco nilla mei, íemo naa íe jofo ero ráaniaíri fínua mei, comínido Juzíñamuimo úrirainí jinóidícomo jáífirediaíoi. Afénomo íaíoi mo ocuica comínido Juzíñamui íóbitalle ráaniaí finófirediaíoi. <sup>7</sup> Mei íadi afe jofóidícomo, dama Juzíñamuimo úritillaíma jáífirena. Aféllaíma naga fimónaíaido dácaíño afeco jofo eromo jáírede. Faga tóiniaí díena jaca jofo úífirede. Dama íemo ite onóñeno finoca fiénidífue ícoínia daí díena Juzíñamuimo izájide. Ie mei nane nana comíni íaífue ícoínia jiáie díena Juzíñamuimo izájide. <sup>8</sup> Bífuiaido Juzíñamui Ñuera Joreño daa jiáífue na cai fidítaiacade. Afefue daíde: “Baie jinóidico nai illa llezica, jofóidícomo jiba comíni jaille nai rairuírede. Ua aféruillaído jofo dama Juzíñamui illánomo jáinidiaíoi. <sup>9</sup> Nana bie Moisés illágimado nícidogafuíai biruí cai onóillena canode. Ua comínimo ácatafírega raa izoide, aféruído Juzíñamuimo áinozillena nigaco, naa afe eromo íaíoi nícidogafuíairi, ñue jáícina caina onótate. Biruíllaído judíuai aillo faga tóiniaí jiáie fia fecaca raa diga, Juzíñamuimo nai izájífirediaíoi. Mei íadi afe bíedo íaíoi comeci Juzíñamuimo ñue jáícina jóitanide, mei íaíoi

comécimo ite fiénidifuiái nai féitañegaza, fia ibaica izói íteza. <sup>10</sup> Nana afe íaiói nícidogafuiái fia jinófene ífuiái. Nñe izói ítiaíoi daide. Dárie íaiói güille, jirole diga fimairillafuedo úrite. Afe izói fia emódoide múiñuafuedo úrite. Nana bífuiái fia nano nié dino comínimo ocuica, mei Juzíñamui jiáífueña méidolliruimo nai dúciñedeza. Ie jira aféfuíái daa aféruillái íena ráifide.

<sup>11</sup> Mei íadi caído Juzíñamuimo úrifireitillaímo Jesucristo, jae caímo dúcide. Afémiedo ñuera cáimafuiái caímo zúide, mei ua nahí Juzíñamuimo ánoziracomo afémie jaináideza. Afe jaiái bíniemo ite comini niga Juzíñamuimo ánoziraco jaboide. Afécomona cai íóbillafue baímo, Jesucristo jamánomo ñuera jíllonafue, caífo monámona ana caímo zúitaíbite. Afémie afe nahí Juzíñamuimo ánoziracomo dúide; afeco bínie comini níñega. Dama ie nahico monamo ite. <sup>12</sup> Nana comini íena, dácaíño afeco eromo ite jofóidicomo afémie jaide. Ie jailla llezica chivo die, juráreto jiza die diga uiñede; mei jiáífodo dama ie die uite. Mei jii, afémie íaífuenidimiena íllamona, cruzmo cai ifomo tíllano, ie die tótado ziiñona cai jíllonafue ote. <sup>13</sup> Jaiái Moisés daína izói, íaicaillamie íemo ite íaífue bie izói muiñórede. Múíñoñegamie Juzíñamuimo dúide comini cígido macánide. Daje izói afémie Juzíñamuimo nabáirinide. Ie jira faga tóniaí die atírede. Iemo jiáie Juzíñamuimo mameca juráreto jiza jobailla afe jízechoma atírede. Ie mei afe íaicaillamiemo aféchoma júdairede. Iemona afémie íaicaíñegamiena jaide. Mei jínofena muiñócaza. Ja Juzíñamui comínimo meine abido caímare úrirede. <sup>14</sup> Mei jii, Juzíñamui dáinamona afe tóniaí die riírede, come jinóidífue mo muiñóllena. Afefue daítania, ua onódicaíza. Mei Jesucristo die jamánomo riírede. Ua dama afémie ñue nífuenidimienado Juzíñamuimo ie abi dama izáíbite. Afe ziiño Ñuera Joreño ie cánuado Jesucristo dama ie abi Juzíñamuimo izájide. Iemona ie die tótamona nana cai comécimo ite íaífuiái na muiñótate. Ua nana cai jaiáimona nícidogafuiái caína ziiñona cáatañede. Mei íadi Jesucristo díedo cai comeci múiñua mei, ua ziiñona cáatagacái, afe jaca nahí caade Juzíñamui ocuícano ráiruñeno cai jetállena.

<sup>15</sup> Ie jira Jesucristo jae Juzíñamui comue finóllifue caímo jino zúitaitimie. Afémiedo nana Juzíñamui nízceno uafue uícomo lloga ziiñona cáimaduafueña maiñóritiaíoi. Juzíñamui daí nana comini jíllóillifue uícodo mamede, mei dama Cristo tíllado comini fiénidifuiái Juzíñamui dote. Ua jaiái uícodo lloga nanoide finóllifue illa llezica, nana aféruimo afémaci fiéni finócafuiái ja birui Cristo tílla jírrari, Juzíñamui dote; duano, nana íemo ínotinona jíllotate. Daí Juzíñamuimo ziiñona caímare nabáirillafue maiñódiaíoi. <sup>16-17</sup> Afe maiñórrillafue, come tílla méifomo íitífue izoide. Dámie tíadi ie fiébide feci raa jiáimie oni llínoga. Afémie nai tíñenia, feci raa oni llínoitimie minica raana nai llínonide. Ie jira oni llínoitimie íemo dúide raa maiñóllena, afe raa naama tílla jítaírede. Daje izói Juzíñamuimo caímare nabáirillafue cai maiñóllena, Cristo tílla jítaírede. <sup>18</sup> Afe jira jaiái uícodo lloga Juzíñamui ñue finóllifue táiniaruimo díena recuíñorediaíoi. <sup>19</sup> Moisés nana afe ocuica uailái nana comínimo jino llua mei, afe uailái cuiábicimo faga tóniaí díena cuirínote. Daje izói afe mei nana comínimo cuirínote. Ua llua mei, Moisés duera “hisopo” daína raroci llínote. Llínuano, afécimo jáirede oveja itíraína maíte. Iemo jáinoína jaícuica díedo afe rarócina riáitate. Ríaitano, ocuilla uai cuiábici naa comíniri díena cuirínote. <sup>20</sup> Cuirínua llezica Moisés daide: “Juzíñamui ómoiena ocuica ie finóllifue bie die uafue daítate,” daide. <sup>21</sup> Daje izói aféruillaído Moisés íaiói iniroi finoina Juzíñamuimo ánoziracomo díena cuirínote. Daje izói nana afeco eromo ite Juzíñamui íóbifirena raamo díena cuirínote. <sup>22</sup> Ua, Moisés ocuica uai daína izói jamánomo diga raa, díedo Juzíñamui dibénemo dua izói ñue finoca. Iemona die tótañegana comini comeci íaífuiái iba jaca órede.

*Cristo dama ie abi Juzíñamuimo izájille comini fiénidifuiaina muiñode*

<sup>23</sup> Afe comini niga Juzíñamuimo ánoziraco Juzíñamui ocuide, naa afeco eromo ite ráaniairi. Iemona nana afeco eromo ite ráaniairi Juzíñamui dibénemo ite nahífuiaina jánana cai ciona izói caina onótate. Nana biniemo ite afeco ero ráaniai Juzíñamui illánomo nahí itífuiái jana. Ie jira biniemo ite ráaniai dibénemo figura Juzíñamui daiíllena, bie die recuille jitáirede. Mei íadi Juzíñamui nahí illánomo jáifireitino dibénemo, bie die baimo ñuera Juzíñamuimo fia izájifireille raa jitáirede, afémacina Juzíñamui iere figura daiíllena. Ua tóinai die baimo Jesucristo jamánomo ñuera die jitáirede. <sup>24</sup> Iemona Cristo tílla llezica, afe Cristo biniemo ite comini niga Juzíñamuimo ánoziracomo eromo jofo jáiñede. Afe bico fia nahico jana. Mei jáífodo Cristo, Juzíñamui nahí illánomo caido úrillena jae cíocaizaide. <sup>25</sup> Afénomo Cristo dama ie abina, diga icaiño meine nane izájiñede. Mei íadi biniemo ite Juzíñamuimo comínido úritillaíma, naga fimónado faga tóinai die uillano, afe Juzíñamuimo jáiraco jofoide iere ñuera rairuiredicomo jaide. <sup>26</sup> Afémaci jáifirena izói Cristo jáifiredena figóñede. Mei nibai afémie daí diga icaiño jáiadi, íemo énie finuaruimona afémie afe izói diga icaiño meine abido tírede; mei íadi afe izóiñedeza. Afémie cai illáruillaído jaiái lloga Juzíñamui finóllifue fuilla llezica, dácaiño fia cómena íficaillano caimo cíocaizaibite. Ua afémie biniemo cai jáinona ie tíizaibillado, nana caimo ite fiénidifuiái niné féillena oni dote. <sup>27</sup> Ja onóigaza, naga come biniemo dácaiño tíide. Tílla mei, íaiói illafue Juzíñamui jáicina jicánoite. Aféfuena daje izói ñue onódicai. <sup>28</sup> Daje izói Jesucristo, comini fiénidifuiái oni dóllena dácaiño tíizaibite. Ie mei uire jáíruido afémie fiénidifuiaina duáibiñeite; mei jaiái ie dógaza. Mei íadi afémie uafue meine dáanomo cíocaizaibite, nana íena izire úiñoidinona jílloano monamo ie illánomo úillena.

## 10

<sup>1</sup> Mei jaiái Moisés ocuica uai naa ie lloga níciduairi, íco nirui bite caimare illífuiái jana. Afe ie lloga jáiaifue nahífueñede. Moisés bie íco zúitífue cai onóillena jana uícodo llote. Iemona naga fimónaíaido faga tóinai íaiói úifirena, íaiói comécina figo jáicina jóitañede. Mei uáfueña, afe faga tóinai íaiói úifirena Juzíñamuimo ánozidino nahí íaifuenidinona jáitañedeza. <sup>2</sup> Mei daí uafue íaifuenidinona íaiói jáiadi, nibai afe tóinai íaifuenidinona fáicanocaidiaíoi; mei jáífodo fáicanocaiñediaíoi, nai comécina jáicina jóoneñegaiaíoi. Daje izói áfede Juzíñamuimo ánozidino comécina íaifueña nahí nífuenidinona jáiadi, nibai jae íaiói fiénidifue izire íaióimo iñede. Mei íadi íaiói fiénidifue jaca izire íaióimo ite. Iemona onódicai, tóinai fecáfirena íaifueña figo doñede. <sup>3</sup> Mei íadi afe fatá Juzíñamuimo izájitaga tóinai cionamona, comini íaiói fiénidifue naga fimónaíaido úibicaitagaiíoi. <sup>4</sup> Mei jii, juráretuai, chívuai die diga, jaca come fiénidifuiái dónide. Mei áfemo ua dolle ríino iñedeza. <sup>5</sup> Ie jira Jesucristo biniemo bíacana llezica ie Moo Juzíñamuina daide:

Omo fia fecaca faga tóinai gáñedioza, comínina iere figura o daiíllena.

Mei jáífodo énie cómena ja cuena jécitaitio.

Afemona cue tílledo íaióina óiena nífuenidinona jáitaiticue.

<sup>6</sup> Ua comini íaifue ícoínia jobaica tóinai ja birui ona íóbitañede.

<sup>7</sup> Ie jira ciegánico cuedo úrilla izói birui ona daídicue:

“Moo Juzíñamui benó biniemo o comeci jitáillafue finuaibiticue,” daide.

<sup>8</sup> Nano fueñe afémie daide, nana afe Juzíñamuimo fia fecaca tóinai, íaifue ícoínia jobaica tóinai diga Juzíñamui comécina zuitáñede. Ua íena íóbitañede, nana afe nícidogafue jaiái ocuilla uai daina íadi. <sup>9</sup> Afe emódomo Jesús daide: “Moo Juzíñamui, ja o comeci jitáillafue birui benomo finuaibiticue.” Daí Juzíñamui nana afe jaiái ocuica nícidogafuiaina

zóofete. Zóofiano, afe méifomo Cristo dama ie abi cruzmo izájillafue Juzíñamui jeire ote, ñue comínimo caimare érocaillena. <sup>10</sup> Daií Jesucristo, ie Moo Juzíñamui comeci jítainafue izói finode. Daií ie finuamona jae dama Juzíñamui nabaina ñue finócamacina jáidicai. Mei jii, Jesucristo dácaiño jaícina nana cai fiénidifue oni eneno féitate. Mei ninomo féiñeitena cruzmo dama ie abi Juzíñamuimo izájideza.

<sup>11</sup> Naga judío Juzíñamuimo comínido úriraima nágaruillaído naidáillano daje izói faga tóinaiina Juzíñamuimo izájifrede; mei íadi afe rilledo comini íaifuiái dónide. <sup>12</sup> Mei jáífodo Jesucristo dácaiño comini fiénidifue ícoinia duere zefuida, tízaibite, afe izói dáanommo íñeillena. Ie tílla mei meine abido cáaillano caifo monamo Juzíñamui nabézimo ráinazaide, nana comini íaifue múiñuana fuilla jira. <sup>13</sup> Dinomo, nana ie fairíconi ie anamo íaioi itábicaillena afémie úiñoide. <sup>14</sup> Mei jii, Jesucristo, dácaiño ie Moo Juzíñamuimo ie abina izájide. Afe izájillafuedo, ñii cruzmo ie tíllamona, nana caina ie nabaina ñue finode. Jae nana cai comeci íaifuena ñue múiñuano jaca ninomo caimo caimare érocaide. <sup>15</sup> Aféfuemo Juzíñamui Ñuera Joreño uaina nabáide, iere uafue cai daiíllena. Ñuera Joreño Cuegáuaimo daide:

<sup>16</sup> Juzíñamui daide: “Uire jiáiruillaído cue comínimo bie izói jiáie como cue finóllifue llóitícue, naa jiáie cuemo ínotinori.

Aféruillaído cue ocuica uáillaina íaioi comécimo jaícina onótaitícue.

Ua afe uailai íaioi ífócimo ñue jino denótaitícue,” daide.

<sup>17</sup> Ie mei nane emódomo daide:

“Nana íaioi fiéni finócafuiái íbana otátañeítícue.

Daií oñena llezica, íaioi comécimo ite íaifuiaina jaca niné féitaredícue.”

Dinori Juzíñamui daide. <sup>18</sup> Nana comini fiénidifuiái daií dua mei, jiái íaifue ícoinia dóllena fatá fecaca tóinai jae jítaiñega.

### *Juzíñamuimo cai áinozillena jítáirede*

<sup>19</sup> Iemona, ámatíai, cácarei. Jae Juzíñamuimo cai jáillio uáfodo túide. Ua ie nahí illánamo, afe iere ñuera rairuícacommo caimare jacíruiñeno íemo úrizairedícai; mei Jesús cairi tízaibillano caina Juzíñamuina éoitadifue oni muiñócaza. <sup>20</sup> Afémie tuiñoca io ñuera rairuíredíco jédaciede íbáiraroido joide. Jira Juzíñamui illánomo cómena cáataite comue io Jesús tuiñuano, afe iodo afémie caina ífode. Afe io tuiñóllena dama ie abi izi cácatate, íemo cruzmo duere zefuírede. <sup>21</sup> Iemona Jesús nana Juzíñamuimo ínotinodo Juzíñamuimo Uritillaímana jae jaide. <sup>22</sup> Afémie ja cairi úrioinamona, mai Juzíñamuimo jacíruiñeno omoi áinoziri, mei íemo ñue cai ínuamona jae meáiruiñedinona mamécacaíza. Ie jira jífuenide comécido, mai omoi áinoziri. Ainozillano, mai íemo caimare cai úrilli. Ua táinona lloñeno mai íemo comeci cai facalli. Mei nana cai íáirede comeci ícoinia afémie jae jaícina oni féitagaza; ua come abi ñue jáinoido jocoína izói comécina muiñócacai. <sup>23</sup> Afe uáfodo jino comínimo cai lloga Juzíñamuimo caimare cai úrillafuena, mai fáicanocaiñeno áfemo izire cai ínofireilli, mei afefue caimo llotímie Jesús jaca ínofiregamíeza. <sup>24</sup> Daje llezica illa dígamíerie, mai conímamo ñue cai comécilli, conímana cai izíruillino cai jenóllena. Daje izói jiáimana ñuefuiaina rairuíñeno jiéruillinona jenóredícai. <sup>25</sup> Daje izói omoi Juzíñamuimo gairífrenafuena mai féitañeno iri. Dáarie aféfuena féitafiredíaiói. Daií illa fiénide. Mei jáífodo, Jesucristo meine billirui raire dúciacanana omoi onónamona, mai conímana ñue úrillauaido comécina caimare cai náireitalli, nana cai ínogafue féiñellena.

<sup>26</sup> Juzíñamui llogafue daide: Jaca dama Jesús tíllamo cai ínuamona jílloredícai. Aféfuena cai ie onótaja mei, mei íadi afe uaina nai cai ruifíruioiadi jae abi dine jiáie cai íaifue múiñoitena íñede. <sup>27</sup> Daií ruifíruoidímacimo jamánomo izire jácifue zúite, mei Juzíñamui

duere íaioi finóllifuemo jae ánozideza. Afémie iere íaioimo rícaillano iere boode jíáfodo joide iraimo íaioina duere zefuítaite. Ua nana Juzíñamuina bacáuaredinona irai amena cuarita izóidemo, Juzíñamui íaioina dinomo zíñona duere zefuítaite. <sup>28</sup> Moisés ocuica uaina ruifíruitimiena raire titádiaioi. Ua, mena nibai daámani uai nabáiraini daina uáimona, íemo dúecaiño íena titádiaioi. <sup>29</sup> Mei Moisés ocuica uaina ruifíruitimiena daí duere finóbiteza, Juzíñamui Jitona ruifíruitimie jamánomo izire duere finóllifue, afémie zúiteza. Afémie Jesús díena jámairuitimie. Afe tíllamo totaca díedo, afémie nauí dácaiño Juzíñamuimo oní eneno nizécamienna jaide. Mei íadi Jesuna ruifíruitimie caimo dúecafirede Ñuera Joréñona iaire daífiredimienna jaide. Daí ítimiena iere Juzíñamui duere finórede. <sup>30</sup> Ja birui daí ítimie fiénidífue iba ófiredimienna onódicai, níimie cai Moo Juzíñamuina. Afémie daide: “Afe iba ófiredimiedicue. Ua nana íaifuiái ibana duere finótáfiredimiedicue,” dáideza. Jáinomo Juzíñamui Cuegáuai daide: “Juzíñamui ie comini comeci ífueña jaícina jicánoite. Jicánuano íaioimo dúide duere finóllifue ócuite,” daide. <sup>31</sup> Daí ie úrillana cai onónamona, caade Juzíñamuimo duere finóllena izájina jamánomo jacírede.

<sup>32</sup> Mei íadi nauí íanori omoi illáfuemo uibíoiri. Aféruimo ñúefuena omoi onona mei, aillo duere zefuídiomoi, mei íadi aféruimo omoi ínogafue fáicanocaiño ñue ocuídiomoi. <sup>33</sup> Dáruillaído uáfori comini eróicana báíñuano duere finócaomoi. Jáiruillaído daí finócamacimo omoi nabáillamona duere zefuítagaomoi. <sup>34</sup> Afe llezica llaveca ámatiaimo dúecafirediomoi. Afe baimo, ómoimo ite ráaniaina jíáimaci báiruana caimare rairuíñediomoi, mei onódiomoiza, bíniemo ite raa baimo, jamánomo ñuera jaca bairónide raa ómoiena monamo íteza. <sup>35</sup> Ie jira nauí izire omoi ínoga uaina mai birui omoi féitaño iri. Aféuaina ñue omoi ínofireiri, mei ícoimo iere ñuera jirídoga ízoide raa máíñoitiomoiza. <sup>36</sup> Juzíñamui jítainafuena omoi jíeruilla llezica raire comeci járidoño írediomoi. Ua, omoi ínoga ñúefue, omoi are jaícina llocana uille mei, Juzíñamui uícodo lloga caimare jíllonafuena máíñoitiomoiza. <sup>37</sup> Mei jí Juzíñamui Cuegáuaimo daide: “Ja íanori íllamona, uícodo lloga bíitimie Jesucristo, jízíño raire dúcizaibite.

<sup>38</sup> Afémie nai biñena llezica, nífuenidena cue mamécamié, cuemo ie ínuado nágaruillaído caimare ie illano, cuena íóbiteite.

Mei íadi afémie afe ie ínoga uaina meine abido féitaiadi, afémieri íobiñeiticue,” dinó Juzíñamui daide.

<sup>39</sup> Mei íadi meine abido féitativo dibénemo jaináíñedicai. Afémaci daí íaioi ínoñenamona jíllonéitiaioi. Mei jíáfodo cai bie Jesucristomo ínotinodicai, daí dani cai jíllotagacai.

## 11

### *Juzíñamuimo cai ínuafue*

<sup>1</sup> Mei ¿minica ínuafuena? Ínuafue Juzíñamui daina uaina jeire cai uafue. Ínuamona cai úíñoga cáimafue jeire cai ollínona onódicai. Daje izói Juzíñamuimo ínuamona, ie lloga cáiena mameca ñuera raa cióñena íadi, afefue ua íllana comécido ua onódicai.

<sup>2</sup> Ua, ínuafuedo judíuai jaiáidigimamona Juzíñamuimo jaináidimíai, Juzíñamui comeci jítaillamacina jáidiaioi.

<sup>3</sup> Juzíñamuimo cai ínuamona, Juzíñamui ie úrilla uaido bínie fínuana onódicai. Daí ie fínuado nana bie cai ciona énie, táinomona Juzíñamui comúitate. Ua, minícana íñédeza cióñena ráamona naga ráaniai comuíbicaide.

<sup>4</sup> Juzíñamuimo ínuano Abel, Caín fecaca baimo, ñuera Juzíñamui íóbitalle raa fécaibite. Iemona Abel Juzíñamui dibénemo jaícina ítimiena jaide. Juzíñamui jíeruigamienna jaide. Mei Juzíñamui Abel fécaibiga raa línuamona, Juzíñamui comeci Abelna jítainana

onódicai. Daií Juzíñamui íena jíeruillafuedo Abel jaícinaidifuemo Juzíñamui uai nabaide. Afe Abel, jaiái uícodo Juzíñamuimo ie ínuado ñue illáfuedo jaide. Aféfuena cai fídiamona, afémie titácamié íadi, ie ínogafue, úrillauai izói caimo úrite. “Juzíñamuimo ñue cai ínolli,” caina daide.

<sup>5</sup> Iemo Enoc Juzíñamuimo ie ínuado tíñeno caifo monamo uiga. Daií tíllana ie ónoñeillena, cáanori monamo Juzíñamui uiga. Afe mei afémie bíniemo cióñenamié, mei afémie Juzíñamui úigaza. Afémie nai úiñega Juzíñamui ióbitadimie daínamié. <sup>6</sup> Mei jíi, Juzíñamuimo cai ínoñenia jaca íena ióbitanidicai. Dáamié Juzíñamuimo áinoziacania, Juzíñamui nahí illánona uícodo ie ínolle jitáirede. Nane íemo nana izire íena onóiacadino, ñue íbana dama ie abí ífuena íaioina onótaite. Aféfuemo uícodo daje izói ínorediaioi.

<sup>7</sup> Daje izói Noé, Juzíñamui lloga raire biíte nai cióñena duere finóllifuena fídiano Juzíñamuimo ñue ínote. Ínuano áillue jofóredicae finode, áfedo nana dama ie comíni daií jíllouillena. Noé daií dama Juzíñamuimo ínuado, nana jíáie ínoñede comínimo duere finótatiuai jino íaioimo llote. Afe izói Juzíñamuimo ínuado Juzíñamui comeci jitaina nífuenidimiena jaide.

<sup>8</sup> Afe mei jaiáidiruimo Juzíñamui Abrahana jírite, jíáie éniemo jaiánillena, áfeniena íco jíáiruimo íeiena maiñóllena. Abraham Juzíñamuimo ínuamona afe jírilla uaina cacáillano, raire ie illániemona oni jíáinomo jáizaide, ie dúcillino nai ónoñega íadi. <sup>9</sup> Abraham nai Juzíñamuimo ínuamona, Juzíñamui íemo fecáacaiga éniemo fia jícánemiena díga fimona fia íte. Ua, íniroi niina úicáifirega jofomo aféniemo are íoide. Daje izói Abraham comuítaga jíto Isaac, dínomona Jacob díga afénomo daje izoide íniroi nillácuaímo are itíaiillinoi naa ie comíniri. Juzíñamui daje éniema fecalle uaina Abrahamo llua izói, afe íaiillinoímo uícodo llote. <sup>10</sup> Ua Abraham afe jamái illácuaímo dama íeieñede éniemo caímare íoide. Afémie caímare íte, mei Juzíñamui díbénemo íte caímare táinocaitanide illínomo dúcillena afémie úiñoideza. Afe caímare illico Juzíñamui mamérillano dama ie uaido niga.

<sup>11</sup> Daje izói Abraham aí, Sara, Juzíñamuimo ínuamona, jamánomo jíonaite íadi, fueñe úruerena ríino ote. Iemona daa jíto jocode, mei Juzíñamui aféngona aféfuena uícodo daína uai, afengo íere ñue ínoteza. Afengo bie izói daide: Bímie ie daína uaina jíáífo méidofinidimie. <sup>12</sup> Iemona Abraham íere jíonaite íadi, íere aillo erófene ígímaíaina jebuítate. Ua jamánomo díga nairai jebuide; níi ja lloga monamo íte facádonide úcuaí izói itíaiói. Nane monáillai fuédamo íte facádonide guamai izói jebuídíaiói.

<sup>13</sup> Nana cai lloga comíni Juzíñamuimo nai íaioi ínoína llezica tídíaiói; nana Juzíñamui uícodo lloga ñúefuíaína nai llínoñediaioi, tíilla. Mei íadi afe lloga ñúefuíaí íco jíáiruimo zúillena jícana fídídiaioi. Fídiano caímare aféfuemo ínuano comécíidiaioi, mei bíniemo ónoñega jícánemacina íaioi illa raire méaicaiñeno llotíaióiza. Uáfueña bíniédo jaiánicana jáidiaioi. <sup>14</sup> Nana daií llotino, daní íaioi nahí illínomo íaioi jáiacanana llotíaiói. Ua jíáie éniemo jáillana íaioi úiñoínana caina fídítate. <sup>15</sup> Daií íaioi dáinamona, mei níbai jaiái íaioi illániemo comécíidiaioi. Daií íaioi comécíadi díga ícaíño meine abído afénomo jáirediaioi. Mei íadi abído afénomo jáíñediaioi. <sup>16</sup> Mei jíáinomo comécíidiaioi. Jíáie jamánomo ñuera illánomo, monamo íte Juzíñamuimo nabáírizaíllinomo izire úiñoídiaioi. Daií Juzíñamuimo íaioi ínuamona, Juzíñamui íere ióbite. Bie jaiánicana jáídino Juzíñamuina dáíadi: “O cue Juzíñamuidio,” daií íaioi dáinari Juzíñamui méaicaiñede. Mei íaioi jofue izoide ñuera illino, dínomo Juzíñamui díga zíñona nabáírizaíllena, Juzíñamui jae finócaza.

<sup>17-18</sup> Nauí Isaac jocoina llezica Juzíñamui Abrahana daide:

“O úicoitigima bie jító Isáacimona aillo jébutiaioiza,” daide. Diga iruillai íllamona Juzíñamui dáaruimo Abrahana ínuafue facátate. Iemo Juzíñamui ocuilla izói, Abraham nai Juzíñamuimo izire ínuano, ie jító oni uite, titada Juzíñamuimo fecállena. <sup>19</sup> Mei Abraham Juzíñamuimo ñue ínuano comeci facade: “Juzíñamui jamánomo ñue ríinoredimie; tíide come meine cáataite ríino íemo ite. Cue jító tíidena Juzíñamui meine íena cáatarede,” daí Abraham comeci anado daide. Iemo, Abraham ie jítóna fáiacana llezica Juzíñamui afémiemo raire úrillano, ie daade jítóna jíllotate. Abraham ie jítóna fañede. Ie jira jíáfodo daírede, tíllanomona Abraham ie jítóna meine abido ote.

<sup>20</sup> Daje izói Juzíñamuimo ínuamona Isaac ie jító íaillinoi Jacóbomo Esaú diga uire Juzíñamui orelle caimátaillifue ua llote.

<sup>21</sup> Daje izói Juzíñamuimo ínuamona Jacob, ie tíizailliruimo José jító íaillinoimo úrite. Urillano ie enaize íaillinoimo uire Juzíñamui orelle caimátaillifue jino llote. Afe llezica ie macara jigüida llínota ie abi mozíñuano caimare Juzíñamuimo úrite, ie íóbitallena. <sup>22</sup> Daje izói Juzíñamuimo ínuamona José ie tíizaillirui ánozillano, Israel comini Egipto éniemona uire oni dani íaioi éniemo jáillifue llote. Afe llezica ie ícuruai aféniemo fiéñeno oni úllena, úcodo uai íaioimo jóonete.

<sup>23</sup> Diga fimona jailla mei, Egipto ríillaima nana Israel como jéciga jítótiaina fazítate. Mei íadi Moisés jocoina mei, ie moo íaillinoi Juzíñamuimo ínuamona, illáimana jacíruiñeno Moisená retáidotiaillinoi. Dauíamani íena retáidotiaillinoi, afeza iere ñúezana jira. <sup>24</sup> Aféllaima jiza Moisená náamataja mei, Moisés móonalla llezica Moisés aféngomo dúillana ruifíruite; mei afémie Juzíñamui dibénemo jaináideza. Ie jira Juzíñamuimo ínuamona Moisés afe mámece oni faite. <sup>25</sup> Mei jíáfodo Juzíñamuimo jaináidino cígiri íllana, afémie jamánomo gaide, nana duere zefuíaioi íadi. Daje izói ie comínina fiene ie zóofiamona raire féite jabo íóbillafue dibénemo íllana afémie gáñede. Moisés Juzíñamuimo ínuano ñue coméciide.

<sup>26</sup> Biedo afémie coméciide: “Nana Egipto énie ebírede ráaniai baímo, Juzíñamui dibénemo ie dámie illa jamánomo ráifide, duere afémie zefuide íadi.” Afémie daí comeci facade. Ua Moisés, Cristo ícoinia zefuillano, féitañeno daí comécioifirede; mei Juzíñamuimo ínuamona baímo ñuera féinide raa izóidifue afe ie jírdollena afémie onódeza. <sup>27</sup> Iemona Moisés Juzíñamuimo ínuamona, afe Egipto illáimamo ite ríinona jacíruiñeno Egíptomona botade. Ua jacíruiñeno afe Moisés oni jaide, mei buna cíóñena Juzíñamuimo fáicanocaiñeno ñue nágarui comécifiredeza. Daí ie comécinamona, údo cíonamiemo ínua izói, Moisés Juzíñamuimo iere ínote.

<sup>28</sup> Daje izói Moisés Juzíñamuimo ínuamona, Juzíñamui lloga pascua rafue como fueñe finode. Ua Juzíñamui llua izói, Moisés íaioi jofóniai naze fuédamo oveja díena jíritate. Daí ínuamona, Juzíñamui oreca títaite abi ímie nana Israel nano fueñe jococa jítótiainamona buna títañede, aillo Egipto imaci jítótiái tícoizitiaioi íadi. <sup>29</sup> Daje izói Juzíñamuimo ínuamona nana Israel aillo comini “Jíairede” daína monáillai ñue zaférede iodo ruícafenemo jaitádiaioi, mei afe monáillai jainoi Juzíñamui oni gaitácaza, íaioi ruica jáillio tuiñóllena. Mei íadi Egíptomona racáidino afémaci jailla izói jáidiaioimo, meine io jáinoina íbáibicaillari coróbaitiaioi.

<sup>30</sup> Iemo Israel comini Jericó jofue anáfenoacadiaioi. Afe jofue ríire naidároga nofíbanina cirínoga. Iemo Juzíñamuimo ínuamona ie daína izói, siete dígarui afe ríire íbaica jofue jinófenedo ífoina macáoidiaioi. Iemona ícoi iruimo afe caífo nitaca nofici finoina jofue jinófene cirínuabani, Juzíñamui ana éniemo caitade. <sup>31</sup> Daje izói Juzíñamuimo ínuamona nauí úcodo fiénidingo, Rahab fañega, nana jíaie afe jófueimo ite ínoñedino fazícaicioi

íadi; mei Juzíñamui comínimona oreca éniena ñue onóillena méiñoitina afengo caimare cánuano jofo uáidoteza.

<sup>32</sup> Nai jino lloñega aillo ite jiáie jaiái Juzíñamuimo ñnofiredino. Bibedo íaiói illáfuiaina cue llóllena cue abi juánideza, nana llónidicue. Fia íaiói mámečiai jino llóiticue, íaióimo omoi ñue comécioillena. Afémaci Gedeón, Barac, Sansón, Jefte, David, Samuel; daje izói Juzíñamui uai jino llóraini ite. <sup>33</sup> Bimácimona dámerie Juzíñamuimo ñnuamona jiáie náiraina anáfenodiaíoi. Jiáimaci Juzíñamuimo ñnuano Juzíñamui jaícina jódifuena comínimo ocuide. Dáarie Juzíñamuimo ñnuamona ie uícodo llua izói, Juzíñamui canócaiaíoi. Dáarie Juzíñamuimo ñnuamona riírede jánallarillai fuena ibaica izói finode, íena íaiói ríñeillena. <sup>34</sup> Jiáimaci uzírede iraimo dotácaiaíoi ia, nai Juzíñamuimo íaiói ñnuado afe iráimona uzíñeno jino bitíaíoi. Dáarie Juzíñamuimo ñnuamona fuiríllafuiaimona otábiñeno jino ñue jíllodiaíoi. Iemo jóbairo illa llezica Juzíñamuimo ñnuamona dáarie maíriñedimíai ñue máirimíaina jaide. Daí Juzíñamuimo ñnuamona onina bite fuirírainina abido rainódiaíoi. <sup>35</sup> Daje izói Juzíñamuimo ñnuamona dáarie ringóniaimona íaiói úruiai tíide íadi, meine abido íaióimo cáataga.

Mei íadi jiáimaci nai Juzíñamuimo ñnua llezica, íbátarede tíide jíllotafuena lloñediaíoi, mei aféfuedo Juzíñamuina jáanotaiticai, daídíaíoi, íadi Juzíñamuina jáanotanidiaíoi. Ie jira iere duere zefuítano titácaiaíoi. Daítadena lloñediaíoi; mei afémaci meine abido caana mei, jamánomo ñuera zíñona illáfuaena méaicaiñeno maíñoacadiaíoiza. <sup>36</sup> Nai jiáimaci Juzíñamuimo ñnua llezica, fiénide zánonafuiaimona duere finóbidiaíoi. Jiáimaci riire zechénogaiaíoi. Ua dáarie Juzíñamuimo íaiói ñnuamona cúinajano llavécaiaíoi. <sup>37</sup> Daje izói jiáie Juzíñamuimo ñnotino noficiaina níjicaiaíoi; jiáimaci dáafemiáido amena dera izóidedo ñtácaiaíoi; jiáimaci caimare taino uáillaído bífuegaiaíoi, íaiói ñnuafue facátallena, íemo lloéfaido fagáiaíoi. Jiáie Juzíñamuimo ñnotino, íaiói ñiroinina jira, tóica rille igórainá jítaíodiaíoi. Daí fia macáoidiaíoi, mei jofónidiaíoiza. Ua iere ráanidiaíoiza. Ie emódomo duere zefuítano iere fiéni finócaiaíoi. <sup>38</sup> Daí finócaiaíoi íadi, Juzíñamuimo íaiói ñnogafuena fáicanocaiñediaíoi. Iemona bimaci Juzíñamui dibénemo iere izíruigano; mei íadi bíniemo ite ñnoñedino afe Juzíñamui uaina jeire otínona jámairuitiaíoi. Ie jira ñnotino afe ñnoñedimaci cígiri íllena, ñnoñedimacimo figo dúíñede, mei ñnoñedimaci comeci iere íáiredeza. ñnotinona jámairuillano, íaióina oni jíúfirediaíoi. Iemona ñnotinomona dámerie zaféredizicimo jáidiaíoi. Jiáimaci caifóneduai illánomo botádiaíoi. Íaiói jaillánomo ite ífuaimo ífirediaíoi, naa íduai ana ífuairi. <sup>39</sup> Nana bimaci Juzíñamuimo ñnuamona, ñue “figora” daínamacina jáidiaíoi. Mei íadi nana Juzíñamui uícodo lloga caimare ñue illífuiaína figo maíñoñediaíoi; jabo maíñoídiaíoi. <sup>40</sup> Mei Juzíñamui jae uícodo cai canolle jamánomo ñuera cáimaduafue mamédeza. Afe jamánomo ñuera cáimaduafue Jesucristodo cai nahí cai jíllóillifue. Daí jaiái ua Juzíñamuimo ñnotino naa cai diga, birui dáanomo jaiái Juzíñamui mameca nahí jíllóillifuemo dúciiticaí. Ua afémaci naa cai diga, Juzíñamuimo caimare nabáirillafuena jeire óiticaí.

## 12

### *Jesumo ñue jaícina omoi comécioiri*

<sup>1</sup> Ie jira, cue ámatiaí, comécido ñue omoi facari. Ua aillo jamánomo Juzíñamuimo izire ñnotino bíniemo cai uícodo macáoidiaíoi. Afémaci Juzíñamui cai íóbitallifuena caina ifode. Afémaci cai ñnogafuemo jaícina ífoite uai nabáiraini. Cai abido ífoina itíaíoi. Afémacimo cai comécillamona, nana cai jíztacana uite fiénidifuiái mai oni cai féitalli. Ua, caimo ite fiénidifue, abi llótaidote ñiroi izói caimo jíide. Jínamona jaca caina aruire itátate.



Afena fáicanocaillano, Juzíñamui ióbitallifuemo zefuíruiñeno mai izire cai nícidolli. <sup>2</sup> Afe llezica duere cai zefuállano féitano, mai Jesumo comeci cai facalli; mei afémie Juzíñamui ióbitallíodo, ínuaafuedo cai jáillena cai ifódímieza. Mei afémie ie Moo Juzíñamuina féitañeno ie fáainaruimo nai íemo izire ínnoide. Daí ie ínua, afémie izói jaícina cai ínollena, afémie cai ifode. Iemona afémie cai ínogafue ñue ícoimo fuitádimie. Ua, Jesús duere zefuide, íadi afe duere zéfuilla méifomo íite cáimafuemo, afémie ñue comécide. Afemo comécioillano uái daí cruzmo tízaide; mei áfedo nana íemo ínnotino caimare jíllobicaitiaioiza, afémie onode. Iemo afe meáirede tíllana náfuéñeno, abido meine cáadímiena jaide. Afe daí jaillano caifo Juzíñamui nabézimo Jesús ráinazaide.

<sup>3</sup> Ie jira, cai jíainona duere zefuítagamie Jesumo mai ñue omoi comécioiri, omoi duere finóbicaillamona omoi zéfuiruiñeillena. Daje izói Jesumo ñue omoi uibíoiri omoi comeci ñue náireillena. Mei afémie fáicanocaiñeno Juzíñamuimo ínnoicaide, fiénidino íena uáitajano duere ie finódiaioi íadi.

<sup>4</sup> Fiénidífue omoi comécina jírioides, íadi nágarui áfemona abi ráiruifiredíomoi. Afemona abi rairuállano iere juárede. Iemona jabo duere finócaomoi. Mei íadi fiénidífue omoi anáfenoacanamona nai tíñediomoi. Dama Jesús ícoinia jabo duere zefuídíomoi. <sup>5</sup> Afe llezica Juzíñamui caimare llogáuaina níbaí jae féitadíomoi. Aféuaido Juzíñamui ie úruiaí izói, ómoína llófuete; ona riire daide:

“Cue jitó, o Ocuíraíma Juzíñamui omo oreca duere zefuítajafuena jámairuiñeno iri, mei áfedo afémie ñue ona rairuállano lletádeza.

Daje izói fiéni o finuamona afémie duere o finóadi, comécina ríinidímie izói iñeno iri.

Mei jíáfodo, abi mámano, ie llétafuena ñue jeire oíri, ñúemiena o jáilleza.

<sup>6</sup> Mei Ocuíraíma Juzíñamui nana ie izíruiganona fáicana lletáfiredes, íaífuenidínona íaioi jáillena.

Afe izói nana ie ua onoiga jitótiaína llorebai mailla izói due ízitate, mei afémaci dama íeieza,” daide.

<sup>7</sup> Omoína izíruillamona Juzíñamui afe daí ómoína duere zefuítate, ómoimo llófuellena, baímo ñuera ie jitótiaína omoi jáillena. Ie jira duere zefuítagaomoi. Mei onódíomoiiza, bíniemo ite moo llétañega jitó ñue móonaiñeiteza. Iemona afe moo nana ie jitótiaína llorebai mailla izói ízitate. <sup>8</sup> Ie jira Juzíñamui ízitañegamie níbaí ie nahí jitóñedeza, móonidiza; mei nana nahí ie jitótiaí izi cácatagaiaioiza. <sup>9-10</sup> Afe emódomo cai bíniemo ite móotiaí nauí ñue cai móonaillena, ñue comeci íaioi fácamona, izire caina lletádíaoi. Ua nano íanori illáruillaído caina duere ínuaafuedo lletádíaoi. Ua izi cácatagacai. Afe llezica nai cai moona caimare jacíruiticai; jacíruióillano ñue íaioi anamo itábicaídícaí. Daje izói cai monamo ite Moo anamo jamánomo caimare itábicairedícaí; mei afémiemo cai ínuaano, nahí ie jitótiaína comuítagacaíza. Nana afémie duere cai ínuaafue cai dibénemo aillo ráífide, afémie ebire ñuera illa izói, daje izói cai íllena. <sup>11</sup> Ua, ja onódíomoiiza nana izi cácatafuemo illa llezica, áfena gáíñedícaí. Mei íadi afe izi cácatafue záilla mei, áfedo lletácano, Juzíñamui anamo ñue jaícina íficaillano, comécina jacíruiñedinona caimare jáitícaí.

### *Juzíñamui uaina ruifruilla iere jacírede*

<sup>12</sup> Juzíñamui daí omoi llétajana omoi onónamona, mai abí omoi mame. Ja abina náinidino izói omoi iñeno iri. Omoi zúurede comeci náiretari. <sup>13</sup> Afe llezica omoi duere zefuállafuemo, mai bífuemo jaícina comeci facádori. Aféfuado daíri “Juzíñamui íóbille jitótiaína móonaitagacai.” Daí o dánamona, jíaíe ómoímona Jesumo ínogana féitaacadino, comécina caimare náiretatio. Daí ie náireillamona afémie meine abido Jesús uaina izire ínocana jeire óite.

<sup>14</sup> Afe emódomo nana comíni cígiri, mai comeci ríicaitañeno cáimafuemo omoi iri. Daje llezica, Juziñamui ebire ñue illa izói, afe dibénemo mai omoi abi ífuiai nágarui méidocana uiri. Bie izóidifuemo omoi nai iñeniadi jaca buna Juziñamuina cíoiñeille. Mei íadi comeci íaininafuemo cai íadi, íena cíoiñeille. <sup>15</sup> Juziñamui caimo fecaca cai ie cánuafue aillo ite. Bifue nana jeire omoi ófireilleza izire omoi comeciiri. Daí íllamona buna fiénidifuemo oni nibéfodo báiiñeiteza. Daa daí oni fiénidifue dibénemo baídimie nana jáimaci comécina fieni finode. Mei jii, duere zefuillamona Cristo dibénemo figo jaináiacañedimie, jucúrede juia izoide. Mei afe juia illemo totáa, nana áfeji jucúredijina jaide. Daítade come nana ie aino comínina daje izói figóruiñede. Afemona abí omoi rairuiri. <sup>16</sup> Daje izói nana jiruírenafuiauimona abí omoi rairuiri. Afe llezica ómoimona dámie Esaú illa izói iñeno iri, mei afe Esaú jaca Juziñamui jítainafuemo figo comeciñedeza. Aféfuena jámairuillano, afémie nánoramie íadi, íemo ite maiñórille ríino, fia due jiza güille ibana fecade. <sup>17</sup> Afe Esaú illáfueña ñue onódomoiza; mai aféfuemo omoi comeciiri. Ico íirairuimo ie moo ézicirafuena Esaú maiñóacade, íadi ie moo ja íena ruifíruite. Afémie comeci ifue méiducana ie moomo izire jicade; íadi “Jii” daíñede. Afe nauí Esaú jámairuillafue jaca méidonide.

<sup>18</sup> Ja birui Juziñamuimo caimare nabáirillanomo dúcidomoi. Jaiai Juziñamui comíni áillue caifónedumo ánozidiaioi, Juziñamui daína uaina cacáillena. Afedu mámecei Sinaí. Afedu náaduna irai izói boode, aillo úillie diga. Afe llezica iere jacire nairíbicaide. Nairíbicaillano, jairifo riire jaiñode. <sup>19</sup> Aféruimo bainada izoide ficire cácaide. Afe llezica áillue come úrilla uai íaioimo ficire cácaide. Afe uai iere jacírede cacaide. Afemona, áfena cacáidino jáie emódomo lletara uaina llóñellena izire jicádiaioi. <sup>20</sup> Afe íaioi cacana íaioimo lloga lletara uai jamánomo iere juáredeza. Aféuai daide:

“Bie óode íduna omoi jetáiñeno iri. Ninena daa rille bídumo bíadi, raire nofíciado fáiri. Daje izói ninena bídumo bite come fáiri,” daide.

<sup>21</sup> Uafue, afe cacánafue naa cíocaidifue diga iere jacírenamona, dama Moisés uai ua: “Aferi iere jacínaiticue. Jacíruillano cuidíriticue,” daide.

<sup>22</sup> Mei íadi, jae jáifodo Jesucristomo omoi ínuamona, ja birui Juziñamuimo ite jacínide caimare nabáirillafue dibénemo dúcidomoi. Ie mei ícoimo monamo ite jaca caade Juziñamui uícomo úrizaitomoi. Juziñamui illa jofue, “mona ero ie Jerusalén” mámeceirede. Iemo jáifodo “Sión Caifónedu” daína. Afémiemo ja omoi caimare nabáirillamona diga íeza facádonide Juziñamui abi imaci Juziñamuina íóbioicana íráizitiaioi. <sup>23</sup> Ua, omoi ínuamona Juziñamui ómoína daide: “Ja cue daade Jitó Jesucristo izóidinodimoi. Cuemo ie dúina izói, afe izói ja cuemo jaináidimoi,” daide. Afemona nana Juziñamui íena comuítagamacimo jae jaináidimoi. Nana afe íemo jaináidino mámeceiai jae monamo cuega. Ie jira nana Moo Juziñamui ie comuítaganona, ñue jicánuana fibídimie izói, ñue íaioína ríidoite, mei afémie nana nairai Mooza. Jaiai ie anamo ñue itino, jae tíidiaioi, mei íadi íaioi ñuera joreño nai figo caimare iñediaioi. Ja biruíllaido Cristo cairi tíillano caina jíllotate. Daí nana íemo ínotinona jíllotano, afe tíidino ñuera joreñuai ñue jaícina caimare itátagaiaioi. <sup>24</sup> Uafue, Juziñamui comue caimare caimo fecállifue caimo llóiacade. Afefue caimo lluáibitímie Jesús, mei ie cruzmo ie die tótajado caimare íaifuenidimona finócaiza. Ie jira ie die, úrilla uai izói jamánomo ñúefue cai ífocimo denode. Mei jáifodo Abel die tóilla afe izói caimare ñúefuiai caimo lloñede.

<sup>25</sup> Nana bie caimare Juziñamui caimo llotátagaíuina jae onódomoi. Afena omoi onónamona, afefue ómoimo llotímie mai omoi ruifíruíñeno iri. Afe íena ruifíruillamona abí omoi rairuiri. Mei jaiai bíniemo Juziñamui jónega lletaráima dáinana ruifíruitino, duere íaioi finóinamona jaca jíllóñediaioi. Afe baímo birui monámona caimo llotímie dáinana cai ruifíruíadi, daje izói ua jíllóñeíticai. <sup>26</sup> Jaiai aféruimo ie úrilla uai éniena

diga icaiño riire docáitate. Mei íadi birui afémie uafue llote: “Nane afe emódomo dáacaiño éniena riire docáitaiticue, naa caifo ite monáiairi,” daide. <sup>27</sup> Afémie daina “Nane afe emódomo éniena dáacaiño docáitaiticue” Juzíñamui írairuillaído finóllifue caina daide. Aféruimo nana ie finoca raa, ranítado izírilla izóí níraidoite. Afe níraiduado nana nírairede ráaniaina, afémie oni niné táinocaitaite. Mei íadi nírainide ráaniai jaca méidonide; fiébillano zíiñona íitiaioi. <sup>28</sup> Ja birui Juzíñamui méidonide illáimana illánomo jaináitagacai. Iemona íena “Iere figura” cai daíífireilli. Afe llezica caimare úrillafuedo mai íemo cai íóbilli. Ua, ñue jacíruioicana ie uáillaímo mai ñue cai cacáreilli. <sup>29</sup> Mei jii, cai Juzíñamui, irai amena cuarilla izóí, nana íaifueredínona jaca zíiñona íaioina duere fínoite.

## 13

### *¿Nie izóí Juzíñamuina íóbitaredícai?*

<sup>1</sup> Amatiai, mai conímana omoí izíruiíreiri. <sup>2</sup> Daje izóí onina bitínona mai dúecaillano ñue caimare uáidori, mei daíí dárie jíáimana íaioí caimare uáidofírenamona ónonino Juzíñamui abí ímíiaina jofo llínotiaioi.

<sup>3</sup> Iemo Jesumo ínuamona llavécamacímo ñue omoí úibicairi. Ua dájena llavécano izóí, mai íaioímo comeci omoí facari, íaioina omoí canóllena. Daje izóí duere finoca Jesumo jaináidímacímo, mai omoí ñue comécíiri, mei dani omoí abina jíáimaci duere zefuítarede; íemo bimaci diga daíí zéfuitíomoíza. (Dáamacídiomoíza.)

<sup>4</sup> Daa come daje ringona áireia ñuera. Afémie dama ie ai abina onona ñuera. Iima dama ie ai jeta ñuera. Mai bifue íáiñeno ñue omoí fímairi. Mei Juzíñamui nana jiruíredínona izire jícanuano íaioina duere fínoiteza, naa dama áireíñeno ringo diga itínori.

<sup>5</sup> Daje izóí omoí comeci ífuena ñue onoiri. Ucubena aillo jitailla fiénide. Afemona abí omoí rairuiri. Mei jíáííodo ómoímo due jiza ite ráaniairi júfidoñeno caimare uái iri, mei Juzíñamui uafue dáideza: “Ona fáicanocaiñeiticue. Daje izóí jaca ona zóofeñeiticue,” daide. <sup>6</sup> Iemona mánicana jízireñeno daííredícai:

“Juzíñamui cuena canóíredímie; íemona fiéni cue finóacadímiena jáciruiñeiticue.”

<sup>7</sup> Iemo mai Juzíñamui uai ómoímo nano fueñe jino llófuetínomo ñue omoí uibíoiri, mei ñúeodo ómoína ífódiaioíza. Iaioímona comuide ñúefuiaímo, féitañeno mai ñue omoí comécíioiri. Afémaci Jesús ícoínia títaícaíaoi, mei íadi afémaci fáicanocaiñeno Jesumo ínua izóí, afe izóí féitañeno mai omoí ínofireiri.

<sup>8</sup> Mei jii, Jesucristo nanómona ie illa izóí, ja birui jíáííodo méidoñeno dáamieoicaide. Ua afémie jaca zíiñona dáamieite. <sup>9</sup> Ja birui diga jíáííodo cacaide onina bite ónoñega fiéni llófueinaíuaí ite. Aféíuaí ñúeomona oni níbéfodo omoí baíítaiacadeza; áfemona abí omoí rairuiri. Juzíñamui cairi dúecaillano cai cánuano cai comeci náirecaitate. Afe ie cai comeci náiretaja ñuera. Mei íadi afe jícana lluáíbiga güille rairuínafuiaína jeire cai óiadi, caina ñue cánoñeite. Daje izóí afe uai jeire otínona canóñede.

<sup>10</sup> Jesucristo cai ífomo fécafue Juzíñamuimo caimare cai nabáirillena dani caímo dúide. Nana Judíuaido Juzíñamuimo úriraini, ie jaiái gairíracomo aillo Juzíñamuimo ánozille nícidogafuiaí finódiaioi. Mei íadi afémaci Jesús dibénemo ite cáimafuiaína llínonidiaioi.

<sup>11</sup> Judíuaimona comínido Juzíñamuimo úritillaíma dáacaiño naga fimona afe faga rille die Juzíñamui icomo uite. Afe Juzíñamui icomo ite jofuide ñue rairuícacomo comíni íaííue ícoínia díena uite. Mei íadi afe faga rille, comíni illácuai jinomo jobáíírediaioi. <sup>12</sup> Afe izóí Jesús Jerusalén jinomo duere zefuide, dama ie die tóillado nana comíni fiénidííue oni dóllena. Daíí duano íaioina Juzíñamui íena mamede. <sup>13</sup> Ie jira nana Judíuái Juzíñamuimo ánozille nícidogafuiaína féitajano, mai dama Jesumo jaca cai ínolli. Ua, daíí íemo caimare cai jaináinamona jíllotícaí. Ie meáire duere zéfuilla izóí, duere cai zefuáídi, áfena

náfueñeno nai caimare íemo jáinaiticai. <sup>14</sup> Ja biniemo ñuera méidoñega illano caimo iñede; mei íadi Juzíñamui finoca monamo ite méidonide cai illínomo izire úiñoidicai, caimare ziiñona ie diga cai nabáirizaillena. <sup>15</sup> Iemo, Jesús caido Juzíñamuimo nahí úriraimana íllamona, mai Jesudo nágaruillai Juzíñamuimo ñúefue cai nitalli. Ua, cai fuemo ite uaido Juzíñamuina caimátaitaredicai. Cai Ocuíraima Jesús mámedido cai úriadi, jaca Juzíñamuina ebire ióbitaredicai. <sup>16</sup> Daje izói nágarui jáima canolle ñúefue jeire o úana, mai féitañeno iri. Aféruido jitáidinomo ómoimo ite raana jeruíñeno fecari; mei aféfuiaina Juzíñamui iere ióbideza.

<sup>17</sup> Omoi illaini llogáuaimo ñue omoi cacáreiri. Aféuai anamo ñue omoi itábicairi; mei omoi comeci ñue íllena aféllaini nágarui ómoina rairuífirediaioiza. Ua aféllaini ómoina rairuilla nie izói íadi, afémaci Juzíñamuimo jino llórediaioi. Ie jira íaioi táijinana omoi daidóñeno iri; mei jáífodo ñue íaioi anamo omoi itábicairi. Afedo aféllaini Juzíñamui ocuica táijinana caimare finoite. Mei íadi afémaci afe táijinana zúurecana finóadi, figo cánoñegaomoi.

<sup>18</sup> Mai birui caido Juzíñamuimo omoi úriri, afe Juzíñamui cai canólleza, mei cai comeci ífue íainideza. Mei jii, nágaruillai náganuiaimo illa dígamie íaioi eróicana ñue jaícina figomiena íacadicaí. <sup>19</sup> Ua, cuedo Juzíñamuimo comécido omoi úrillena izire jicádícue, raíre meine abido omoi cígimo Juzíñamui cue orélleza.

### *Iraicaiño uáidota ñue ézicinoçaillafue*

<sup>20</sup> Ja birui Juzíñamui ñue omoi ézicillena jicádícue; Moo Juzíñamui, comécina uái illafue comínimo fécaitimie. Iemona cai Ocuíraima Jesuna tíllanomona Juzíñamui meine abido cáatate, mei Jesús ie die tóillado nana caimo ite fiénidífuiaina muiñódeza. Múíñuano ziiñona Juzíñamuimo cai nabáirillafue cáiena mamede. Ua, Jesús jamánomo ñuera ovejai úiñoraima izoide. Afémie ovejai rairuilla izói, caína úiñofirede, comécina uái cai íllena.

<sup>21</sup> Afe bie Juzíñamuimo omoi comeci náireillena jicádícue. Ua nana ie ñuera ríinodo omoi comécina ñue jaícina caimare náireillena jicádícue. Afe bie cue jicácado ie jitáinafueña ñue comini eróicana finoitíomoi. Afe llezica Juzíñamui comeci óiacana izói dani caimo zúillena izire íemo jicádícue. Mei daíí jamánomo ebírenafue Jesucrístomo, ninomo fúíñeitena nitáredicaíza. Mai, daíí íteza.

<sup>22</sup> Amatiai, nana bie ómoimo cue cueda lletárafuiaimo járitañeno fia omoi coméciri. Afena izire ómoiena jicádícue, mei bie ómoimo cue cuedáuai íanorideza. <sup>23</sup> Iemo jáífueña ómoimo fidítaacadícue. Jae cai ama Timoteo llavéinanomona jae jino zuitaca. Omoi dine nai jáiñeíticuemo, afémie cue illánomo raíre dúciadi, nibai daane omoi éroizaíbiticoco.

<sup>24</sup> Nana omoi llófueite illáinina cuedo ñue uáidori, naa afénomo ite Jesumo ínotinori. Itáliamona benomo cai bite amatiai ómoimo uailai orédiaioi.

<sup>25</sup> Juzíñamui nana ñue omoi íllena ñue éziciteza. Mai.

Daíítadeza. Jae nie.

## SANTIAGO CUEGABE La Carta de Santiago

### *Ráidozitinomo Santiago cuete*

<sup>1</sup> Cue Santiágodicue. Juzíñamui táijitagamiedicue. Daje izói cai Ocuíraima Jesucristo táijitagamiedicue. Israel náiraimona doce dígazie nana éniedo ráidozitinona uáidotícue.

### *Juzíñamuimona oga onónafue*

<sup>2</sup> Cue ámatiai cácarei, ñie facátafuiai ómoimo jíriadi iere caimare omoi iri. <sup>3</sup> Mei jii omoi ñnuafue facátaficaiaidi áfedo baímo comécina járidoñenafuena onótalliomoi. Mei áfena onódiomoi. <sup>4</sup> Afe comécina járidoñenafue ñue jeire omoi móonaitari. Afedo jaícina jéetagamacina ítiomoi; omoi jítáillifuena íñeite.

<sup>5</sup> Omoimona dáamie figo onónenia, Juzíñamuimona onónafue mai o jicari. Iemona Juzíñamui áfena afémiemo fécaite, mei jii Juzíñamui jeruíñeno nágamiaimo onóillifuena fecáfirede. Afémie icíriñeno comínimo fecáfirede. <sup>6</sup> Mei íadi ñnuafuedo o jicari. Daí jítáirede; minícana o comeci anado ígicaiñeno jicari. Naga uaina ígiciredimie jorai bagua izói jairífodo dóbaidobaicaide. <sup>7</sup> Daítadimie Ocuíraimamona minícana óllena comécimo facáñeno iri. <sup>8</sup> Aféfuena onóigaza. Níimie birui bie raa óiacade, uire jíaíena óiacade, ñue jaícina macánide.

<sup>9</sup> ¡Ráanide ama, caimare o iri! Juzíñamui caifófenemo ona jóonelle jira. <sup>10</sup> Ráaredimie, o anáfeficaiaidi, áfena náfueñeno caimare o iri. Mei ráaredino ráitie záfia izóideza. Afe záfia are íñeite. <sup>11</sup> Jitoma bíllamona íena iere llirítaite. Caigáillamona afe záfia ana júide. Daí ie ebírenano fuite. Daje izói ráaredimie ie nícidocaigafuiai cígiri tánocaite.

### *Facátafuiai fiénidemo baítafuiai díga*

<sup>12</sup> Dáamie facátafuiai járitañoeno llínoiadi afémie caimare ite. Facátafuemona ñue oni jaillano ícoinia fia iga raa jirídoite, ñue facátaoicailla jira. Afe ícoinia fia iga raa ñuicirai izóidífue. Afe iga raa ua Juzíñamui ie illa zíiñoona cáataitinona. Ua Juzíñamuina izíruitinomo uícodo lloga zíiñoona cáataitinona íaioimo fécaite. <sup>13</sup> Dámie íaifuemo baítafuena cacáadi, afe Juzíñamui orécaza comécina facáñeno o iri, mei jira afe daítadífue Juzíñamui jaca jítáíñede. Daje izói Juzíñamui bummo afe íaifuemo baítafuena comuítañede. <sup>14</sup> Mei afefue jíaífodo bite. Dáamie dama ie comeci fiéni jítainafuiaiido comeci óiadi, áfedo íaifuemo báíte. Afe izói dáamie ie fiéni jítainafuiaiido jífueficailla; íemo afe jífuiafuedo afémie meine íaifuemo báíte. <sup>15</sup> Afe bie comeci fiénino jítainafuiaiimona íaífue comuide. Ie mei afe íaífue jae oruíbicaillamona tíllafue comuide. <sup>16</sup> Cue izíruiga ámatiai jífuefizaiñoeno iri. <sup>17</sup> Nana ñuera caímo iga raa, nana caímo jaícina jóbidífuiiai díga, caifona Juzíñamuimona bite. Afémie nana monamo ite egáiñotínona finode. Juzíñamui jaca dáamie; afémiemo jíaífodo meídogafuena íñede. <sup>18</sup> Afémie uáfueña úrilla uaido cáatatinona caína comuítate. Afena finode ie finócafuiaimona como fueñe oga llízie izói cai íllena; mei ie comeci jítaina izói finode.

### *Uáfueña Juzíñamuimo cai comécinafue*

<sup>19</sup> Ie jira izíruiga ámatiai cacai. Omoimona nágamiaiai jaca jefo jinéoiri, mei íadi fíaicana o úriri, daje izói fíaicana ríicairi. <sup>20</sup> Mei jii, ríicaidimie Juzíñamuina íóbitañede. <sup>21</sup> Mei daí nana íáiredífuiiai omoi fáicanocairi, jamánomo móonaioicaide fiénidífuiiai díga. Omoi comécimo lloga uai Juzíñamui úrilla uaina comeci mánainafuedo jeire omoi óiri. Mei jii afe úrillauai ríinorede omoi joreño jíllloillena.

<sup>22</sup> Jira úrillauai ómoimo lloga ráfuena fino. Fia aféfuemo táinona cacáreiño. Fia táinona omoi cacáadi dani abi jífueitíomoi. <sup>23</sup> Afe úrillafue fia táinona cacádimie aféfuena iere cácañenia, afémie acáranimo uieco ciona izóidimie. <sup>24</sup> Afémie ie izóidena ciode, mei íadi raire jailla lezica, ie izóidena féitate. <sup>25</sup> Cacánafuena féitañedimie jamánomo ñuera ocuícáfuea jeire ófirede. Afe jamánomo ñuera ocuícáfue caimo rairuíñenafuena itátaga. Aféfuemo méidoño afémie íoide. Afe ocuícáfue afémie íinota finode. Daí finódimie nana ie finócafuiado caimare ite.

<sup>26</sup> Dámie Juzíñamuimo comécidimie comeci facáoiadi, mei íadi fuena rairuíño úriadi, afémie dama abi jífueite. Afémie comécinafue táinobicaide. <sup>27</sup> Nífuenide comécinafue, Moo Juzíñamuimo erócana íainidifue bie izói ite; ñue Juzíñamuimo comécidimie móonidizaiaí íemo éinidizaiaí diga, íaioina duéruillano canófirede. Daje izói fecínguaina íaioi duéruillano canófirede. Afe lezica éniemo ite Juzíñamuina éoidimaci íaifuiado ñúemie abina íaidoñede.

## 2

### *Conímána énenoruíño iri*

<sup>1</sup> Cue ámatiaí, cai ebíruigamie Ocuíraima Jesucrístomo íinotimaciomoi. Daí omoi íinua lezica comínimona dáarie enénotaño iri. <sup>2-3</sup> Acatagafuedo dáitícue: Omoi gairíllanomo queniredena onoi icuíforedimie, ráifide inícuero jítaoidimie bíadi, afémiena daífirediomoi: “Bie ñúenomo rái.” Mei íadi afe lezica dúeredimie tíbaizarodo bíadi, afémiena jíáfodo líinota nibai dáitio: “Batí naidai,” o nibai dáitio: “Ana benó éniemo rái.” Daí ráanaitimiena raire ñue líinotíomoi, mei íadi dúeredimie buna náfuéñega. <sup>4</sup> Ie jira daí dani ómoimona dáarie énenoruidíomoi. Daí cómemo jícanotimiena dani omoi abi mamédíomoi, mei íadi íienidemo comécinafuedo abi mamédíomoi.

<sup>5</sup> Cue izíruiga ámatiaí, bíemo omoi cácarei. Bie éniemo úcubenidínona Juzíñamui nizede, íaioi ínuafue jamánomo jebuíllena. Daa afe izói íaioina Juzíñamui nizede, feci raa izói ie illáimana illáruina maiñóllena. Juzíñamui ie uícodo lloga uai daína izói afe illáimainanona íena izíruitimacimo fécaite. <sup>6</sup> Mei íadi dúeredimacina meáidaitadíomoi. ¿Uáfueñede, ráaredimaci ómoína llégitafirediaioi? Jíi, uafue. ¿Ríiredimaci uícomo ómoína gugúrioicana uitíaioi? Jíi, uitíaioi. <sup>7</sup> ¿Ñíie afe ráanaitimaci Crístona íairuioidino? Jíi, nímaci. Mei íadi afémie ñue izíruiga mámecido Cristo iédíomoi.

<sup>8</sup> Cúegáuaimona lloga jamánomo ocuícáfue omoi jíeruiadi ñue finódíomoi. Afefue daide: “O aino cómena izíruiri, dama o abina o izíruilla izói.” <sup>9</sup> Mei íadi conímána dámie omoi énenorua, íaifueimo baídíomoi. Juzíñamui ocuícáfue omoi ícoína jae daí ite. <sup>10</sup> Dámie naga ocuícáfue iere cacáadi, mei íadi dáallegoi ocuícallegoi nai fuitáñeniadi dama afémie ícoína daí ite. Uafue nana ocuícáfuaí fuitáñedimie zefuille izói dáallegoi fuitáñedimie daí daje izói zéfuite. <sup>11</sup> Mei daje Juzíñamui daide: “Jiruíreño iri,” afémie dánomo daide: “Cómána titáño iri.” Daa come jíruireñenia mei íadi cómena fáiaí, jae ocuícáfuea iere cacáñede. <sup>12</sup> Jira ñue o úriri; o illafue jaícina o jóoneri. Caimo rairuíñenafue itátaite ocuícáfuedo jícanollícaí, ie jira ñue cai íllana jítaírede. <sup>13</sup> Mei jíi, nana jíámacina duéruíñedino, afe íbana duéruíño, jícanollícaioi. Mei íadi jíámacina duéruitino nie izói níbaíñegaza ñue jáite, duéruillafue jícanollífue baímo ñue illa jírari.

### *Ínuafue níciduafue diga jítaírede*

<sup>14</sup> Cue ámatiaí cacai. Dámie ñúefuena finóñeniadi, mei íadi “Ínotícue” daíadi ¿nífuena ñuera? ¡Afefue ñúeñeite! ¿Afe daína ínuafue jíllotaite? Jíllotañeite. <sup>15</sup> Acatagafuedo dáitícue. Inícuironide güíllenide ama miríngo izóidino omoi cígimo íadi, <sup>16</sup> mei íadi ómoimona dámie fia uaido daíadi: “Ñue o iri. Rólliemona jíforiri. Mai güiri,” mei

íadi aféruimo ie abímo jitaica raa o fecáñeniadi, ¿nie izói ñue ite? ¡Ñúeñeite! <sup>17</sup> Cai ínuafuemo daje izói ite. Dáamie ie ínuafuemo níciduafuedo ácatañenia afe ínuafue jae ñine táinocaide, afe ie ínuafue nabáinina jírari.

<sup>18</sup> Mei ñibai, dáamie cuena dáite: “Ínuafue omo ite mei íadi cue nícidofiredicue.” Mei jira cue uai óiticue: ¡O ñue níciduafue eneno o ínuafuena cuemo ácatari! Afe llezica cue ínuafuena cue ñue níciduafuedo omo cíotaiticue. <sup>19</sup> Daade Juzíñamui íllana ínotio. Afe dinomo o ínuafue ñue baite. Mei íadi aféfuena fiénide janábaii daje izói ínotiaioi. Iemona afe jácieri cuidíridiaioi. <sup>20</sup> Abina onóñedimiedio. ¿Jaícina jáidifuenta onócañedio? Dáanomo dáiticue: Ñue níciduafuedo cíotañega ínuafue jaca ñine táinocaide. <sup>21</sup> Cai jáiáigima ímie Abrahana ie íáfuenidímie izóinado Juzíñamui ñue íena jíeruite. Ua Juzíñamui íáfuenidímiena íena ñue llínnote. Mei ie jító Isaac titada Juzíñamuimo fecaca raana izói fecáacana jira, daí íena llínnote. <sup>22</sup> Jira Abraham ínuafuemo bie uáfuenta cíodio. Abraham ie níciduafuedo ie ínuafuena ñue jino cíotate. Daje llezica afe bie níciduafuedo ie ínuafue ñue jaícina mónaioicaide. <sup>23</sup> Daí Cuegáuai dáinana ñue fuitade. Aféuai daide: “Abraham Juzíñamuimo ínote. Ie jira Juzíñamui íemo comeci facade: Afémie cuemo ínuafue ñue baite íena íáfuenidímiena cue llínollena, —daide.” Mei Abraham Juzíñamui nabaina mamécamie.

<sup>24</sup> Mei áfemona come níciduafuedo Juzíñamui íena íáfuenidímiena llínuafluena ónoitiomoi; dama ie ínuafuemonna llínoñedeza. <sup>25</sup> Afe bifue izói Rahábamo daí íficaide. Afengo jiruédingo. Mei íadi énie fidítaraini caimare llínuafluena, íaioina canode oni jáigodo ñue íaioi jáillena. Afe íaioimo nícidua jira Juzíñamui aféngona íáfuenidingona izói ñue llínnote. <sup>26</sup> Mei daí omoi ónoigafuemonna llóiticue. Naga joréñonide abi tíide, afe izói níciduafuedo nabáinide ínuafue ñine táinocaide.

### 3

#### *Cai fue rafue*

<sup>1</sup> Cue ámatiai cacai. Omoimona aillo llófueraimana íacadino izói íñeno omoi iri. Mei jii, nana llófueridino, cue izóidino baimo izire jicánollcai. Afena onódiomoi. <sup>2</sup> Nana cai aillo fiénidillegoi finódicai. Dáamie minícana fiénidillegoi ie daínafuemo íñeniadi, afémie ñue comécina figomie, ñue jaícinaidímie. Afémie nana ie abi rairuállana onode. <sup>3</sup> Mozíñoragai caballo fuemo cai jóoneadi caína iere íaioi ínnollena, ie ífo oni datállena finóredicai. Afemona nana ie abi diga dájade. <sup>4</sup> Daje izói áillue jofóredicaemo comeci omoi faca. Afecae jamánomo áillue íadi, afe llezica riírede jairífodo ñuitáicaide. Mei íadi datárama duera jiza datárabeñodo ie jáiacana diné datáicaide. <sup>5</sup> Afe izói cai fue ite. Cai abi aillona mei íadi fue duera. Mei íadi afe fuedo jamánomo áillue ráfuiai finórede. Uafue duera jiza récimona áillue ícaíena bóotate. <sup>6</sup> Jae come fue irai izoide. Afe fuemo jamánomo facádonide íafuiai ite. Afe bie fue Juzíñamui cai abímo finoca; mei íadi afe fue nana cai abina íaire finode. Fieni comini duere finóllirai ite; afe iráimona uneca izói cai fuemo fieni úrioidino ite. Iemona nana cai caana llezica finótagafuiai bóobicaide. <sup>7</sup> Ímado nana riire rílleniai tóirede, féedino, jaíoniairi, naa buináizairi. Nana áfeniai fibítagaiaioi. <sup>8</sup> Mei íadi fuena buna fibítanide. Cai fuedo bite íairede raana jaca buna llícaitanide. Aillo fieni úritadino, titade juia izói cai fuemo ite. <sup>9</sup> Afe daje fuedo cai Moo Juzíñamuimo caimátaioidicai; ie llezica Juzíñamui finoca cómena faidódicai. Uafue Juzíñamui dama ie eroille izói cómena finode. <sup>10</sup> Daje fuedo caimátailafue jino bite faidórillaífuiai diga. Cue ámatiai, cacai. Bifue izói omoi íñeno iri. <sup>11</sup> ¿Daje jainoi ífómona toráfomona ñúeji erírediji diga jino tórede? ¡Tónide! <sup>12</sup> Cue ámatiai, cacai. ¿Noménamona comáijina órede? ¡Onide!

¿Jíriconamo cineci llizírede, meita áfena? ¡Llízínide! Afe daje izói cúerediji naimérediji diga daje jainoi ifómona toráfomona jaca jino tónide. (Ie jira omoi fue rairuiri, fieni úrillafue o fuedo jino bíñeilla. Mei jira Juzíñamui imácidíomoi.)

### *Uáfuena ñue onónafue*

<sup>13</sup> Omoimo dáamie onódime, ñue baitádimie íadi, afe ie onóigafue nágarui ñue ie illáfuedo ácatari. Ua ie fibíllafuedo fecaca comeci mánainafuemo ie finócafuiái cíotari. <sup>14</sup> Mei íadi omoi comécimo izire úradoillafue íadi, afe llezica omoi finoca ráfuiaina járidotíomoi; bie omoi fibilla abi ínuafuemo comeciñeno omoi iri. Afe izóidifuiái táinofuiái, uáfuena jáanote. <sup>15</sup> Afe izoide fibíllafue Juzíñamuimona biñede, mei íadi afe fibíllafue bínie comini comeci úrillafue; Juzíñamuina éoidímaci onóigafue; dama Taife ifue. <sup>16</sup> Aillo úradoillafue, jarire uícodo máíñuafue diga illánomo, afénomo aillo júdaizitífue ite naa fiénidifuiáiri. <sup>17</sup> Mei íadi Juzíñamuimona fibíllafue otímaci nano fueñe nífuenino macádiaíoi. Ie mei afémaci mánaidímaci; ríifuedo ocuíñediaíoi; jíáimíemo uícodo comeciitadiaíoi. Afémaci dúecaillafuena oruídino; ñúefuena finófirediaíoi. Afémaci uáfodo úritímaci; jífueriñediaíoi. <sup>18</sup> Comeci ñue uái illáfuedo comuítatino afefue rigájíai izói comínido fecádiaíoi. Afemona ria llizilla izoide comeci jaícina ñúeitaitino llínotiaíoi.

## 4

### *Eniemo ite Juzíñamuina éoidímacimo nabáirillafue*

<sup>1</sup> Omoimo ite fuiríllafuiái çninena bite, júfiduafuiái diga? Omoi fieni comeci óiacanafuiáimona bite. Aféfuái omoi comécina jaca éoitade. <sup>2</sup> Omoi daa raana jítáiadi, áfena ómoimo llínonina jira fatíomoi. Jáíe raamo omoi úradoiadi áfena ónidíomoi, jira fuiríllano jóbairitíomoi. Omoi jitaiga raa oñédíomoi, Juzíñamuimo jicáñena jira. <sup>3</sup> Afémiemo omoi jicáadi llínoñediomoi, íaire jica ícoínia. Mei jíí áfena óiacadíomoi fia omoi caimare íacanafuiáimo dotállena. <sup>4</sup> Jáíifodo fiénidímacíomoi. Bíníemo ite Juzíñamuina éoidímacimo nabáiriacadino Juzíñamui fairíconina jáite. ¿Omoi meita bífuena onóñediomoi? Níimie éoidímacimo nabaina maméidíme Juzíñamui fairícomana dóbaicaide. <sup>5</sup> Cuegáuai taino lloñede. Aféuai daide: “Juzíñamui ie Ñuera Joreño caimo fecade cai diga íllena. Afe Joreño uríoína izói caina izírúite,” daide. <sup>6</sup> Mei íadi Juzíñamui caina ríiduafuedo baímo caina cánuaíbite. Mei jíí Cuegáuai daide: “Juzíñamui afe abi ínotínona rairuide; mei íadi comécina mánaidímacina íaíoiina ríiduafuedo íaíoiina cánuaíbite.” <sup>7</sup> Juzíñamui anamo mai omoi itábicaíri. Taífemo omoi mameri, íemona ómoimona oni bótaíteza. <sup>8</sup> Mai Juzíñamuimo ánozillano caimare omoi úriri; afe ibana afémie ómoimo caimare úrite. Íáífueredino, mai omoi comeci íaífuiái doíri. Juzíñamuina izíruiacadino íemo dáanomo íena éoidímacina izírúitino, mai omoi comeci íáínitari. <sup>9</sup> Omoi zúureficaíri; omoi cáillícaillí eeri. Omoi zadáilla jeme; jíáíifodo meídocaíri. Afe izói omoi cáimafue zúucaillano méidori. <sup>10</sup> Cai Ocuíraíma Jesucristo uíécomo omoi manánairi, íemona afémie ómoína caífo naídáneíteza.

### *Cai ama finócafue fieni jicánuaíue*

<sup>11</sup> Amatíai, jíáimana fieni omoi úriñeno iri. Amana fieni úritíme daje izói ocuífufuemo fieni úrite. Afe izói ámana fieni jicánotíme, daíí ocuífufuemo fieni fairíote. Mei jira ocuífufuemo fieni o fairíoadi, jira ocuífufuena íere cacáñedimiedio. Jae jicánoraimana íitio. <sup>12</sup> Mei íadi daade ocuífufue llotíme; afe llezica afémie jicánoitíme. Dama afémie cai jíllotaraima, jíáíe izói afémie cai táinocaitaraima. Mei, o, çníimiedio jíáímamo itífuiái o jicánodoíllena?

### *Úreitirui mona monáillirui onónide*



<sup>13</sup> Mai bíemo omoi cacai, omoi úrilla uaina daidino. Bie izói daiífiredi omoi: “Birui nibai uire jítiramo jiáie jófuego jíticai. Dinomo daa fimona fecárizaiticai, úcube cai óllena,” daidi omoi. <sup>14</sup> Mei íadi due onóñedi omoi uire jiti caimo íitifuena. Mei jii ¿minica mei cai cáatatinona? Cai cáatatinona daallu cíocaizaibite úillie izói. Iemona afe úillie nine táinocaide. <sup>15</sup> Bifue izói omoi daiírede: “Juziñamui jítaiadi íiticai. Iemona aféfuena nibai jiáifuena fínoiticai.” <sup>16</sup> Mei íadi afe ibana, o dáinana meidoiacañeno nai abi ínocana úriti omoi. Nana afe abi ínuafue fiénide. <sup>17</sup> Núefuena finuana onódimie afefue finóñenia afémie fiénidifue mo báide.

## 5

### *Ráaredimaci llétafue*

<sup>1</sup> ¡Ráaredimaci, bífuego omoi cácarei! Cáillicaili eeri, aillo duere finóbillifuiái ómoimo íiteza. Aféfuemo duere zéfuiti omoi. <sup>2</sup> Omoi ebírede ráaie jae rifaide. Omoi ñuera iníroillai ícuai güiga. <sup>3</sup> Omoi úcube quenírede ráaniai diga jae éezite. Afe éeíafue fiénidifue ómoimo nítaite, ie mei bie éeíafue omoi comeci duere fínoite; irai amena cuarítaoína izói ómoína fínoite. Afe birui írairuimo omoi ráaienai jae ofítati omoi. <sup>4</sup> Omoi güillena óinaruillaído táijitagamací úcube jeruídi omoi. Afe jeruica úcube ómoimo riire jiáifodo dájecana úrite. Nana nairai illaíma Juziñamui bie táijitagamací éecana dáinana cacade. <sup>5</sup> Bie éniemo jamánomo ñue ebírede ráaniai ómoimo ífiredi. Dani nana omoi comeci jitailla izói ífiredi omoi. Fia güillárenamona mero izói farédi omoi. Afe llezica fazílliruimo dúcizaide. <sup>6</sup> Nano fueñe nífuenidimacina titátati omoi, ie mei afémacina fati omoi. Afe nífuenidino ómoimo abi zóofetiaíoi, mei íadi íaíoi mo dúecaíño fati omoi.

### *Comeci járidoñenafue*

<sup>7</sup> Ie jira, ámatiai, cai Ocuíraíma Jesucristo billíruimo comeci járidoño omoi iri. Jacáfaimo táijidimie ráifide llizíllaniaína járidoño úiñote. Ua nano fueñeide uáici mei nai úiñoide. Iiraie uáici mei afe llizíllaniaína óite. <sup>8</sup> Daje izói omoi járidoño. Omoi comeci mame; cai Ocuíraíma billírui jae ánozideza. <sup>9</sup> Amatiai, conímamo ríiriñeno omoi iri, jicánollimacina omoi íñeillena. Mei jii, Juziñamui dama Jicánoraíma; afémie cai finócafuiái jicánollirui jae ánozide. <sup>10</sup> Cue ámatiai, uai llórainimo comeci uibíoiri. Iaiói nágarui ñue illafue caimo ácataiteza. Juziñamui mámecido íaíoi úrillamona iere duere zefuídiaíoi, mei íadi jaca járidoñediaíoi. <sup>11</sup> Duere zéfuillafue mona zefui cácañedino caimare itíaiói daiífiredicai. Jáiaigíma Job ie járidoñenafuena cacádi omoi. Afe llezica Juziñamui íemo írainomo finócafueña onódi omoi. Mei jii, Juziñamui cai Ocuíraíma caimo dúecaífrede, fiénidifuiái iba are ninomo caimo óñeite.

<sup>12</sup> Cue ámatiai cacai. Jamánomoidifue llóiticue. Juziñamui mámecei uafue daiíllena táinomo llínoño iri; afe daií mona mámecei énie mámecei diga táinomo llínoño iri, ñie jiáie raana táinomo llínuano uafue daiíllena daiíño iri. “Jii” o daiía ñie izói íteza. “Teñede” o daiía íeñeiteza. Afe izói mai omoi úriri Juziñamui duere omoi fínoñeilleza.

<sup>13</sup> Omoimona dáamie duere zéfuia afémie dama Juziñamuimo úriri. Dáamie caimare íadi afémie ñuefue nitada róiri. <sup>14</sup> Dáamie iráreia, gairíraco imácimona eicomínina járízairi, afémieri Juziñamuimo íaíoi úrillena. Afe llezica afémiemo Juziñamui mámecido cáredijina jóoneitiaíoi. <sup>15</sup> Ínuafuedo Juziñamuimo íaíoi úriadi iráredimie jíllobicaite, ie mei Moo Juziñamui íena náidacaitaite. Íáredifuiáimo nauí ie baíadi, afe íaífuiaí oni dófinamona, ñue nífuenidimíena Juziñamui íena llínoite. <sup>16</sup> Ie jira omoi íaífuiaí jofo conímamo omoi lloiri. Afena jáanoño iri. Afe mei conímamo Juziñamuimo omoi jicari, íemona ñue omoi jíllolleza. Fígomie izire Juziñamuimo úrillafue iere rínorede. <sup>17</sup> Uai lloraíma Elías jiba cai izóidimie. Juziñamuimo ie úrillado noci bíñeillena Juziñamuimo jicade. Jícamona jae

dafimonaámani átuedo éniemo nocina biíñede. <sup>18</sup> Ie mei dáanomo Juzíñamuimo jícamona meine bíizaide; áfemona énie naa llízieri zicode.

<sup>19</sup> Cue ámatiai, ómoimona dámie ua uáimona oni fieni nibéfodo jáiadi, jáimie íena meine abido atíderna ñuera. <sup>20</sup> Bífueña omoi onóilleza. Fiénidimie ie íáirede iómona meine atídime afe fiénidime joreño tíllanomona jíllotaite. Afe llezica aillo íaifuiái oni dóficaite. Jae nñe.

## SAN PEDRO NANOIDE CUEGABE Primera Carta del Apóstol San Pedro

### *Jesumo ñnote ráidozitinomo Pedro cuete*

<sup>1</sup> Cue Pédrodicue; Jesucristo orécamiedicue. Bibe Jesumo ñnote ráidozinaitinomo cueticue. Ua omoi éniemona oni Ponto éniemo, Galacia éniemo, Capadocia éniemo, Asia éniemo, Bitinia éniemo jae áfeniáido júdaizitagaomoi. <sup>2</sup> Mei íadi Moo Juzíñamui nizécamacidiomoi. Jaiai ie mamérilla izói, ja ie nizécanodiomoi. Ie Ñuera Joreño jae íeiéna mamécaomoi, Jesucristo uaimo iere ñue omoi cacáreillena; afe emódomo Jesucristo díedo íaifuenidimacina Juzíñamui eróicana omoi jáillena, jae mamécaomoi. Mei Juzíñamui ómoína aillo éziciiteza, íemo comeci caimare uái illafue ómoimo llóiteza.

### *Juzíñamui daina ñue uáfueña zúitifuemo caimare comécifredicai*

<sup>3</sup> Cai Ocuíraima Jesucristo Moo Juzíñamuina mai cai ióbioitalli. Mei nano fueñe afémie jamánomo caimo dúecaide. Dúecaillano como meine nane caina jéicitaacade. Ie jira Juzíñamui Jesucristona tídinuiaimona meine abido cáatate. Afe Jesús meine cáanamona Juzíñamui ua como meine jéicigacai. Afe bie cai comue dáanomo jéiciñafue ñue Juzíñamui caimo fecállifuemo caina nágarui úiñotate. (Afe fue cai zíiñona illifue.) <sup>4</sup> Afe fue amena záfia izóifede. Amena záfia jaca llirífireda, mei íadi afe fue zíiñona jaca ninomo lliríñede. Ua, Juzíñamui ómoína dainafue, monamo ite ñuera feci raa izóidena ómoína onótate. Afena Juzíñamui ómoína jóoneoide, omoi como meine jéiciamona ico jíáruído omoi maiñóllena. Afe feci raa izóidena, jaca niné táinocaitanide. Daje izói afe raa jaca íaidonide. <sup>5</sup> Juzíñamuimo omoi ñnuado íemo ite ñuera ríinodo ómoína ríidote. Ua ómoína ríidote, íemo ite jíllonafue díbenemo omoi dúcillena. Afe omoi zíiñona jíllonafue afémie ñue finode, írairuillaído jino ñue onótallena.

<sup>6</sup> Bífuiáido omoi jamánomo caimare itíomoi. Mei íadi dáaruirie jíáfodorie duere ze-fuírediomoi. Afe fue nibai jabo jitáirede. <sup>7</sup> Omoimo ite Juzíñamuimo ñnogafue, oro izoide. Naga oro iraimo facaca, bie ua oro daiíllena. Afe izói ómoimo ite Juzíñamuimo ñnogafue facárede. Caimo ícaifireda facátafuiai oro zia irai izoide. Nana bie facátafuiaimona nibáinino ñue jino bite Juzíñamuimo ñnogafue, aillo ráifide. Ua afe ñue ñnogafue oro baimo jamánomo ráifide, mei afe oro fúiteza. Mei jira ja daií facátagamie íemo ite ie ñnogafue ñuera. Ie ñnogafue ja nibáinino ñue jino jailla, áfemona ja figora. Jesucristo cíocaizaibilliruimo afémie ñue facátagamiena jáite. Dáaruina Juzíñamuimo ite ebírenafue llínoite. Daje llezica aféruimo ñúefuena Juzíñamui íemo nitárede.

<sup>8</sup> Jesucristona cíóñediomoi íadi, íena izíruiomoi. Afémiena cíóñediomoi íadi íemo ñnotiomoi. Afe omoi ñnuamona jamánomo caimare itíomoi. Afe cáimafue ñue omoi comécina zuitade. Ua afe aillo cáimafueri omoi daiílluai íñede. <sup>9</sup> Omoi ñnogafue ícoína omoi comeci jíllona máiñoitomoi.

<sup>10</sup> Jaiáidigima illáruillaído Juzíñamui uai jino lloraini afe bie jíllonafue ríire jícanotiaioi. Afe dáaruído bie jíllonafuena uáfodo onóillena jícájicanodiaioi. Afe uai lloraini Juzíñamui ómoimo finóllifue uícodo llote. Ua uire Juzíñamui ómoimo dúecaillano ómoimo fecállifuiari raire uícodo llotíaioi. <sup>11</sup> Cristo Joreño afe uai llorainimo Cristo uire duere finóbillifue raire uícodo fidítate. Afe dáaruído Crístomo ebire nitállifueña íaioimo daje izói fidítaibite. Afe íaioimo ite Joreño íaioimo lluíabigafuiai ñue onóillena, comécido jenódiaioi. “Bie lluíabigafue ¿bumo dúide?” daidíaioi. Afe emódomo: “¿Níruído bie llogáfuiari zúite?” daidíaioi. <sup>12</sup> Iemona Juzíñamui jíáfueña íaioimo fidítate. Afe fue daide: “Íaioi uícodo

llogáuaido aféruído itínuiaina figo canóñediaioi. Mei íadi nana caina ñue cánoitiaioi.” Daí Juzíñamui íaioimo lloste. Jae biruillaído ómoimo llogáuiai afe bie jaiiai llogáuai izói jóide. Birui ñue omoi jílloilluaina llotino, Ñuera Joreño ríinodo úritiaioi. Afe Ñuera Joreño monámona ana oreca. Afe bífuiaina Juzíñamui abi imaci dani comécido onóacadiaioi.

### *Juzíñamui íaifuenino cai illena ocuide*

<sup>13</sup> Mei jira nana omoi jetáacaga raamo ñue comeci facari. Omoi comeci ñúefuedo omoi úrifireiri, mei Juzíñamui ico nírui íeiena ómoina uáidoiteza. Ua Jesucristo cíocailiruido Juzíñamui ómoimo dúcailluaimo daa áfemo izire omoi coméciri. <sup>14</sup> Ocuíllana jíeruite úruiai izói omoi iri. Jaiiai Juzíñamuina omoi ónoñena llezica ómoimo ite comeci jítáillafue izói, omoi iñeno iri. <sup>15</sup> Mei birui jíáfodo ñue omoi iri. Nana omoi jetáacagafuiaiimo, jamánomo ñue íaifuenino mai omoi iri, mei ómoina uáidote Juzíñamui íaifuenidimieza. <sup>16</sup> Mei Juzíñamui Cuegáuai daí daide: “Cue íaifuenidimiedicueza, cue izói íaifuenino omoi iri,” daí Juzíñamui daide.

<sup>17</sup> Juzíñamui illa dígamie íaioi illáfuiari riire jicánoite. Ua illáicomínimo, jamáicomínimo dámie fiéñeno daje izói nana riire jicánoite. Ja birui afe bie Juzíñamuina “Cai Moo” daidíomoi. Afemona afémiena mai caimare omoi jacírui. Ua bie éniemo omoi ille dinó bie izói omoi iri. <sup>18</sup> Mei Juzíñamui omoi illa tánofuiaimona ja ómoina jílloitateza. Afe ómoimo ite tánofuiaiai omoi jaiáidigimamona otíomoi. Afe jíllo nafue ráifinana ñue onódiomoi. Bie ráifina órodo íbánide. Daje izói plátado íbánide, naa jíáie úcubetunido. <sup>19</sup> Afe jíllo nafue dama Cristo ráifide díedo íbátarede. Mei Jesucristo cruzmo, íainide boáfenide ovéjatiru izóidimie, Juzíñamuimo fállena fecaca. <sup>20</sup> Jaiiai ninomo bie énie nai cómuitañenia Cristo daí mameca, mei íadi are illa ícoimo, benó cai illa llezica, afémie cíocaizaibite ñue omoi íllena. <sup>21</sup> Afe bie Crístodo Juzíñamuimo ínotíomoi. Tíidimacimona Juzíñamui bie Crístona meine cáatate. Afe méifodo Juzíñamui ñúefue íemo nitade. Afemona afémiedo Juzíñamuimo ínotíomoi. Afe izói ja Juzíñamuimo izire comécidíomoi.

<sup>22</sup> Ja birui ua llogáuaina Ñuera Joreño omoi jíeruillamona omoi comeci íaifuiari muiñódiomoi. Afe omoi comeci íaifue múiñuamona omoi ámatiaina uáfuea nahí izíruiaredíomoi. Afe daí conímana mai omoi comécido, naa omoi ríinodo izírui. <sup>23</sup> Mei jíi, como meine jéicigaomoi. Come móomona meine jéicíñegaomoi mei tíitíiaioiza. Mei íadi Juzíñamui uaido meine jéicigaomoi. Afémie uai jaca ninomo féiñeno zíiñona ite. <sup>24</sup> Jaiiai Juzíñamui Cuegáuai daje izói lloste. Aféuai daide:

Nana bíniemo ite náiraimona illa dígamie jaca ráitiai izoide.

Iaioi jamánomo jalléinafue ráitiai záfia izoide.

Afe ráitiai dúifirede; dúillamona ie záfia uaide.

<sup>25</sup> Mei íadi cai Ocuídímie uai féiñeno jaca zíiñona ite.

Afe bie uai, ua ómoimo lloga ñue jíllo na uai.

## 2

<sup>1</sup> Mei jira nana ómoimo ite éoicana finócafuiari fáicanocairi. Daje izói jíáimana o jífueacanafue abido oñeno fáicanocairi. Comeci íáirena mei, emodo ífuedo comínina ñue úritímie izóidífue omoi féitari. Daje izói jíámamo omoi úradoñeno iri. Afe mei naga jíáimana ebena úacaillafuiari mai omoi féitaziri. <sup>2</sup> Mei afe méifodo como jococa úrue izói comeci náiretaite jirole jenori. Ua, monoi ii jírua izói Juzíñamui lloga íánino, juánide uailai mai izire omoi jenori, nágarui áfemo omoi comécillena. Afedo ñue riire móonaitíomoi. Daje izói aféuaido nanómona omoi ínoia, jílloitiomoi. <sup>3</sup> Ua daí omoi jenori, mei cai Ocuíraima comécina ñuéñana onódiomoi.

### *Jesucristo cómena zíiñona cáatate nofici izóidímie*

<sup>4</sup> Ie jira cai Ocuíraimamo mai omoi áinoziri; afémie cómena cáatate nofici izóidimieza. Afémie comínimona fiénide nofici ruifíruillano oni dotaca izóidimie. Mei íadi Juzíñamui dibénedo afémie iere ráifide nizeca nofici izóidimie. <sup>5</sup> Afe izói omoi cáatate nofici izóidimacidiomoi. Iemona Juzíñamui ómoína óiacade, ie cióñena ua ífirenaco níllena. Afemona abina omoi rairuíñeno iri. Daje izói Juzíñamui íeiena mameca, Juzíñamuimo comínido úrirainina dáaziena ómoína jóoneacade. Daií omoi jáillemona, uaido Juzíñamui íóbillena fecácafue íemo Jesucristodo fécaitiomoi. Afena Juzíñamui jeire óiteza. <sup>6</sup> Cai Ocuíraima Jesucristo bie nofici izóidimie. Ie jira Juzíñamui Cuegáuai uícodo daje izói llote; aféuaido Juzíñamui daide:

Afe cue irácomo, nii Sión daínácomo, dámie jóneticue.

Afémie iere ráifide nizeca ñue riire mozíoide nofici izóidimie.

Nana afémiemo ínotino meáidaiñeno táinomo fáifíñeitiaíoi, daide.

<sup>7-8</sup> Ja birui afémiemo ñue ínotimacidiomoi. Omoi bie nofici izóidimie jamánomo ráifide.

Mei íadi afémiemo ínoñeite comini, écitailla izói, afémiemo baíidiaíoi. Ua Cuegáuai benomo daína izói ja íaíoi mo zuide. Aféuai daide:

Afémie écitaitate nofici izói ite.

Ua áillue nofici mo écitaide baíilla izói afémie íemo ínoñedinona báitite.

Mei afe llogáuai jeire oñenamona, écitaidimie izói baíidiaíoi. Afe íaíoi baíille jaíai ninomo daií mamécamaci. Daje izói afe ñue riire nofici izóidimie mo íaíoi ínoñenamona nane jaíie daínaíuai íaíoi mo zuide. Íaíoi ínoñegamie dibénedo aféuai daide:

Jofo níraini oni dotaca nofici jae ua riire mozíoide nofici izói jaide.

### *Juzíñamuimo jaínáidimacidiomoi*

<sup>9</sup> Mei íadi nizécaziediomoi. Afe izói Jamánomoidillaíma Juzíñamui íédiomoi. Juzíñamui ocuífirega afémiemo comínido úrirainidiomoi. Afe emódomo Juzíñamui ñue finoca ie ocuífirega náiraídiomoi. Daje izói dama Juzíñamuimo jaínaide comínidiomoi. Bífuiái bie izói jóide, Juzíñamui cai jílloillena uaido jamánomo ebire finócafuiái jino comínimo omoi llóllena. Afe bíedo Juzíñamui, omoi jítifomona jino ie jamánomo ebírede úzefomo, ómoína jíríte. <sup>10</sup> Jaíai illáruido Juzíñamui ómoína daide: “Cue comíníñediomoi,” mei íadi ja birui Juzíñamuimo jaínaide náiraídiomoi. Jaíai ómoímo buna dúecaíñede, mei íadi birui Juzíñamui duéruigamacidiomoi.

### *Afe jaínáidino Juzíñamui tájítaganona itíaíoi*

<sup>11</sup> Izíruiga ámatiaí, Juzíñamuimo ínoñedino cígiri itíomoi za, jicánemaci izóidimoi. Ie jira izire jicádicue, bie éniemo ite táinomo come abí jitailla fiénidifuiáimona mai abí omoi rairuiri, mei afe abí jítáinafuiái omoi comécimo bacáuaina íoideza. <sup>12</sup> Juzíñamuimo ínoñedino cígiri omoi illa dínó ñue illa dibénedo mai omoi iri. Mei birui afémaci fiénidimacidiomoi izói, ómoína uáitaoidiaíoi. Mei íadi afe ómoína uáitaoidino, omoi ñue illáfueña íaíoi ciónamona, nibaí íaíoi comécimo ite fiénidifuiái ñúefuiáina méidoitiaíoi. Iemona Juzíñamui íaíoi na dúecaizaíbillíruimo afémaci daje izói Juzíñamui íóbioitaitiaíoi.

<sup>13</sup> Cai Ocuíraimana ícoína, nana comini jónega ríimaci anamo, mai omoi itábicaíri. Daje izói jabóidillaíma nahíllaíma anamo omoi itábicaíri. Afe nahíllaíma jamánomo ocuídime. <sup>14</sup> Afe nahíllaíma oreca jabóidillaíni, fiénidinona duere fínoitiaíoi, mei íadi ñúefue dibénemo itínona ébitaitiaíoi. Iemona íaíoi anamo ífireiri. <sup>15</sup> Mei jira Juzíñamui ñue illáfue mo omoi íllana jitaide, áfedo abina onóñedimaci, comécinino úritimaci díga íaíoi táinodo úrillauai omoi fáinocaitallena.

<sup>16</sup> Ráiruíñegamaci izói ñue omoi macari. Mei íadi afe omoi rairuíñenafuedo fiénicana abina omoi ínoñeno iri. Dáarie afe rairuíñenafuedo abí ínuamona fiénidifue finócadiaíoi. Afe izói omoi íñeno iri. Mei íadi Juzíñamui izire rairuica tájítaganon izói omoi macari.

Daií omoi íadi iere ñuera. <sup>17</sup> Dáamie jámairuiñeno nana íaioi íllaze ñue caimare jacíruioiri. Nana ámatiaina daje izói omoi izírui. Juzíñamuimo ñue izire omoi jacíruioiri. Daje izói nahíllaimana uáitañeno ñue omoi jacíruioiri.

*Cristo nauí duere zefuállafue afe izói cai íllena caimo cíotate*

<sup>18</sup> Táijitagamací, omoi ocuídímiaina ñue jacíruiocana íaioi anamo mai omoi itábicaíri. Omoimo dúecaífirede caimare ocuídímiaí, mai íaioi anamo itábicaíri. Daje izói jáíe riire táijítate ocuídímiaí anamo mai omoi itábicaíri. <sup>19</sup> Nágamíai taino abíri duere zefuítaadi, mei íadi afe llezica Juzíñamuimo comécina mona afémaci nai caimare ía, afe Juzíñamuina íóbitade. Juzíñamui ñue facátainafue afémacimo jóoneite. <sup>20</sup> Mei jáífodo fiénidífue omoi finóadi, íemona ómoína duere íaioi finolle llezica nai járidoñeno omoi ía, onóigaza afefue figo jínóneite. Mei íadi ñúefue omoi finuamona ómoína duere íaioi zefuítaadi nai járidoñeno omoi ía, ja omoi illafue Juzíñamui eróicana figura. <sup>21</sup> Ua afe daií omoi íllena Juzíñamui mamécamacídiomoi. Mei jii omoi ícoína Cristo iere duere finócaza. Afe íe duere zefuállafue omoi fidítate, afémie illa izói omoi íllena. <sup>22</sup> Afémie jaca due fiénidífue finóñede. Daje izói jaca buna jífueñede. <sup>23</sup> Fiénidíuailaí Jesumo íaioi nita llezica, íba olle fiénidíuailaína afémie lloñede. Izire íena zefuítatíaoimo, Jesús riire íbana otátañede; mei íadi dama afémie Juzíñamuimo dama íe uai jóonete, mei Juzíñamui ñue jáícina jónefirede riire jícanoraímanaza. <sup>24</sup> Daje Cristo cruzmo illa llezica, dama íe abido cai fiénidífuiaína abíocaíga izói uite. Ua afémie cai fiénidífuiaí uíga, aféfuiaí dibénemo tídinuiaí izói cai íllena. (Daií aféfuiaína fínoñeiticaí.) Mei afe méífodo, nífuenino Moo Juzíñamui ío dibénemo ñue jáícina íredicaí. Afémie aillo bofécamíena jaide ñue jíllotagamacína omoi jáillena. <sup>25</sup> Nauí úíñoñega júdaízite ovejaí izói ebena macadíomoi; mei íadi birui Crístomo ja meíne abido dúcídiomoi. Ovejaí úíñoraíma izói afémie ómoína úíñoñefirede. Afe izói afémie omoi comeci rairuítagamie.

### 3

*Aíredino íniredino díga íaioi ñue íllena llétafue*

<sup>1</sup> Nana ríimaci anamo cai itábicaílla izói, nana ómoímona íniredíngotíai dani omoi ínítiaí anamo ñue omoi itábicaíri. Mei omoi ínítiaímona níbaí dárie Juzíñamui llogáuaina nai ínoñediaíoi; mei íadi omoi ñue illáfueña íaioi cíónamona, íaioi comeci ífue níbaí ñúefueña méídotáite, jáíe uáíllaina nai omoi llóñeniadí. <sup>2</sup> Ua omoi íaioi anamo ñue íáínino itábicaíllafue áfena íaioi cíónamona, daje izói Jesumo ínoítiaíoi. <sup>3</sup> Jamáíngotíai fiérilla izói mai omoi fiériri. Mei aillo jino abímo jítaga raa izóidedo fiériñediaíoi. Mei jíra ía abí fiédua ráífide oro finoína raana jítañeno omoi íri. Afe izói jamánomo féirede ífótíí níllado fiériñeno íri. Daje izói aillo ráífide íníroína jítañeno íri. <sup>4</sup> Mei íadi omoi comécina ebire fiérilla izói ñue omoi finori. Afe omoi comécina mánainafueña járidoñenafue díga omoi fiéríta afe iere ñuera. Afe bie féíñede ebíredífue Juzíñamui eróicana jamánomo aillo ráífide. <sup>5</sup> Afe daií jáíáídnomo íte Juzíñamuimo ínoñefirede íáífueníngotíai comécina ñue fiéritadíaoí. Afe llezica íaioi ínítiaí anamo ñue itábicaídiaíoi. <sup>6</sup> Ua daií Sara Abraham daínáfueña jeire ote. Afe daií úamona afengo íena: “Cue ocuírímadí,” uáídoñefirede. Ja birui nífueño omoi jacínaiñeno, ñúefue omoi jeire oía, Sara izóídnogotíaina jáítíomoi.

<sup>7</sup> Afe dáanomo nana ómoímona áíredímiaí cácareí. Caimare omoi áítiaímo comécíllano, dani íaioímo dúide ñúefueña íaioímo nítarí. Mei ríngóniaí íma jófófemo jabóicana maírídeza. Daje izói Juzíñamui ómoímo dúecaíllano fecaca zííñoña íllífue, dájeze ríngóniaímo fecaca. Afemona cáímafuedo íaioímo úríredíomoi. Afe izói omoi íri, omoi Juzíñamuimo úrílla uai jíziñeílleza.

*Ñue omoi illa ícoinia duere zefuítagaomoi*

<sup>8</sup> Nana bífuiaimona daa ráifidiuaido nana ómoimo úriticue. Mai dáafuemo comeci fácano, conímana caimare omoi canori. Daje izói conímana omoi duéruiri. Ua nahí ámatiaí izói conímana omoi izíruiri. Come dúecaillano comécina mánaidimacina omoi iri. <sup>9</sup> Daje izói fiénidifue comuía afe ibana oñeno iri. Afe izói báíñuafue comuía, ibana báíñoñoeno iri. Mei jíáifo dájecana ñúefue iba íaioimo oíri; Juzíñamui ómoína ie ñúefue llínollena mamédeza. <sup>10</sup> Mei jíi; Juzíñamui Cuegáuai bie izói daide:

Biruíllaido ñue illáfuea izíruitimie, caimare are íacadimie diga, fiéni úrillafuemoná mai ie fue ráiruiteza.

Afe izói dámie caimare íllado are íacade ie fue rairuíredeza.

Iemo daje izói táinofuíaína mai afémie llóñeiteza.

<sup>11</sup> Fiénidifuaí afémie fáicanocaillano mai ñúefuemo comécíteza;

Iemo conímana comeci caimare uái illafue jenórede.

Afe mei afémie nágarui áfeodo jáiredeza.

<sup>12</sup> Mei cai Ocuíraíma comécina jáicina jóidimacina rairuíllano ñue úiñoteza.

Daje izói afémiemo íaioi úriadi, íaioimo cacáreide.

Mei íadi fiénidifue finódinomona ie uiéco oni jíicaide.

<sup>13</sup> Jíáimamo ñue finóllino jaca izire omoi jenóadi, jraamo omoi jíritaitimíena íñeite! <sup>14</sup> Mei íadi omoi jáicina ñue illáfuedo omoi duere zefui daí, caimare ítiomoi. Buna jacíruiñoeno iri; daje izói áfedo comeci llícitaiñoeno omoi iri. <sup>15</sup> Mei íadi Cristo omoi comécido nahí Ocuídillaímana mai omoi mameri. Mai uícomo ñue omoi finóbiri, ómoimo ite úiñogafue jícanotimaci uai omoi ólleza. Mei íadi jacíruióicana comeci mánaínafuedo afe fairíoína uai omoi oíri. <sup>16</sup> Omoi illafue ñue jáicina mameri, omoi comeci úrillafue nífuenino uái íllena. Ja Crístomo omoi ínuamona, omoi illafue ñuera. Afe omoi ñue illáfuedo fiéni úritino ite. Ie jira ua omoi abi illafue ñue jáicina jónefireiri, ómoimo fiéni úritino daní íaioi fiéni úrilla uáillairi meáidallena. <sup>17</sup> Juzíñamui jítaíadi ñúefue ícoinia duere omoi zefuíadi afefue ñuera. Juzíñamuina íóbitade. Mei íadi omoi fiéni finócafue ícoinia duere omoi zefuíadi afefue figo jínoñede. Afefue Juzíñamuina íóbitañede.

<sup>18</sup> Mei dama Cristo cai fiénidifue ícoinia, dama abido tíiñellinomo, dácaiño duere zefuíllano tíide. Afémie iere figomie, mei íadi cai fiénina ícoinia cáconi duere zefuízaíbite, Juzíñamui illánomo cai jáillena. Ie abi íeizi dibénedo titácamié, mei íadi Juzíñamui Joréñodo meine abido cáadimie. <sup>19</sup> Ie mei Cristo ie joréñodo, nai meine caífo náidañena llezica, jíáinomo íbaicoga tíidino joréñuai afémie llétajide. <sup>20</sup> Bimaci jaiái ninomo Noé illáruído llogáuaina jíeruiñedino. Aféruíllaido áillue nocáe Noé fínua llezica, fiénidino duere finólliruimo Juzíñamui comeci raíre járidoñoeno, fáicana áfemo úiñoide. Afe áillue nocaedo nana dane ocho dígamie jíllodiaíoi. Ua Juzíñamui izire comíni duere fínua mona, afe aillo jainoi cígimona jíllodiaíoi. <sup>21</sup> Afe jáinoimo cai uibíllano, íaioi jílluafue caina onótate. Ie jira afe jainoi báutiza jainoi izoide; mei báutiza jáinoido fiénidifue mona cai jílluana onótagacaíza. Bautismo ráifinafue fia abi íaí fue duáfueñede. Mei íadi ñue íainide comeci úrillafue Juzíñamuimo cai jícafue dibénemo bautismo ráifinafue comuide. Afe íainide comeci úrillafue afémiemo jícadicaí, mei Jesucristo tíide meine cáanafuedo jíllotagacaíza. <sup>22</sup> Afémie meine cáaillano monamo jaide. Jaillano Juzíñamui nabézimo ite. Nana Juzíñamui abi imaci, jae Jesús anamo itíaiói, naa jíáie ríimaciri. Ua nana márimaci baímo afémie ríinorede.

## 4

*Juzíñamui caímo fecaca eróicana, come márie illa díeze, íemo tájiredícaí*

1 Mei jira, Cristo dama ie abido duere zefuilla izói, dani omoi abina Crístodo duere zefuillena daií finóbirediomoí. Afena rairuíñeno omoi iri. Mei Cristo ícoinia abina izi cácatagamie abido fiénidifuiaina finóacañede. 2 Iemona nana ie cáanaruillaído Juzíñamui comeci jítainafue izói iite. Afémie bie éniemo jaináidino comeci jítáioinafuiaina fuitállena jénoñeite. 3 Afe Juzíñamuina onóñedino gáinafuiái izói jamánomo jaiái ninomo are omoi illa ja daií itíomoíza; meine daje izói iñeno omoi iri. Naui aféruillaído fiénidifue diné jaináidiomoí. Omoi comeci fiéni jítainafuiaimo íoidiomoí. Daje izói jamánomo fiénidíji omoi júruamona jifáifirediomoí. Omoi dáanomo aillo güilláruillaído fiénidifuiáiri faillíñafirediomoí. Daje izói jánaraimo gairífirediomoí, afe jánarai íóbitallena. Daií gairíllano aillo bie izoide íafuiái finófirediomoí. 4 Ja birui bie Juzíñamuina onóñedino, ja aillo jamánomo íafue dibénemo itíaiói. Iemona íaiói omoi fiéni nabáiñenari, fáigacaidiaíoi. Iemona ómoimo fiéni úritiaíoi. 5 Mei íadi afe fiénidímaci íaiói comeci ífue jino Juzíñamuimo llórediaíoi naa íaiói finócafuiáiri. Ua cáadino tíidino díga afémie íanori íllamona iere riire jicánoite. 6 Mei jii, Juzíñamui daina jíllona uai tíidímacimo úicodo llotátaga, afe tíidino joreño dibénedo Juzíñamui illa izói íaiói íllena. Jiái íemo baimaci, nana bínie comini túlla izói túitiaíoi íadi, ja Juzíñamui illa izói cáaitímacina írediaíoi.

7 Ja naga ráfuiái fuizáillinomo ánozide. Mei jira ñúefuemo comécidímacina omoi iri. Afe izói Juzíñamuimo ñue úrillafuemo jifánodoñeno izire omoi facáoiri. 8 Omoi finoca naga jiáie raa baimo, conímana iere omoi izíruiri; mei izíruillafue aillo íafuiaina enínaitaga izói niné féitateza. 9 Conímaíaina ómoimo mácaibitínona díga, omoi jofomo comécido ruifíruíñeno caímare llínofireiri. 10 Illa dígamaci Juzíñamui ómoimo iga táijina ríino daina izói jiáimana canórediomoí. Afe izói omoi íllamona Juzíñamui ómoimo fecaca jiáifodo onóigafuiaina ñue dájerize fecáramacina íitiomoí. 11 Dámie uailái jino llóiacania, comini llófuellena, Juzíñamui daina uailái jino llórede. Dámie jiáimana canóadi, Juzíñamui fecaca ríinodo canórede. Nana omoi táijinafuedo ñúefue Juzíñamuimo nitárediomoí. Jesucristo cai díga íllamona daií Juzíñamuina íóbitaredicái. Mei afe Crístomo nana ebirede ñúefue, daje izói ríino díga jaca afémiemo zíiñona dúideza. Aquíe izói jóideza.

*Jesucristomo cai jainaina ícoinia duere finócanodicái mei íadi meáiruíñedicái*

12 Izíruiga ámatiaí, ómoimo cómuite izire facátainafueri fáigacaiñeno iri. Aféfuíaina jánaidí fue daiíñeno iri. 13 Mei jiáifodo aféfuemo omoi caímataíoiri; ja Cristo duere zefuillafuiái dibénemo dúirediomoíza. Afe izói omoi íadi, Jesucristo ebire bíllana omoi cíollemona jamánomo íóbicaitiomoí. 14 Cristo ícoinia omoi íaiói báíñoia, cáimafue dibénemo íitiomoí; mei Juzíñamui ebírede Joreño úicaigamoíza. Omoi báíñotíno Crístori fiéni úritiaíoi, mei íadi omoi dibénomona ñúefuedo íemo úritiomoí. 15 Omoimona dámie duere zefuíadi, come fáfiredímie, mei níbai merírifiredímie dibéfuemo duere zefuíñeno iri. Daje izói íáibadímie, jiáie come ífue gágutajidímie dibénemo duere zefuíñeno iri. 16 Mei jiáifodo, Crístomo ínotínona omoi mameina ícoinia, duere omoi zefuíadi, afena meáiruíñeno iri. Ua meáiruíñeno aféfuéri Juzíñamuina omoi íóbioitari.

17 Mei ja Juzíñamui cai lletállíruimo dúcizaide. Ua dani Juzíñamuimo jaináidinomo jaícina llétafue fueñe táiniaide. Mei afe jaícina llétafue daií caímo táinéiadi, ¿nie izói Juzíñamui llogáuaina jeire oñédino, íraíruimo dúcille lezica, íitiaíoi? Afémaci lletállí fue jamánomo riire zúite. 18 Fígomaci dibénemo jíllóillí fue juare ia, Juzíñamui ñue jacíruiñedíno jíllóillíno iere féirede. ¿Nie izói níbaílliaíoi? ¡Níbaíñeitiaíoi! 19 Ie jira Juzíñamui comeci jítaila izói duere zefuídino, naga ñúefuíaína finóicairediaíoi. Afe lezica íaiói coméciaí Juzíñamuina rairuítarediaíoi. Mei Juzíñamui méidoñeno ínofiredímieza, íaiói comuítatímieza.



## 5

*Crístomo ñnotino llóina uai*

<sup>1</sup> Omoi gairífirena cígimo ite ocuide eicomínimo cue llóina uai llóiticue; cue ja afémaci izói eicómedicueza. Daje izói Cristo duere zefuilla uai nabáidimedicue. Ico ñírui Cristo bille llezica ie ebíredifue cíocailliruimo, afe ie ebi omoi cácaille izói, afe izói ie ebi cácaiticue. <sup>2</sup> Nana omoi uai anamo itínuiái ñue íaioina omoi úiñori, oveja úiñoraíma ie ovéjaiaí úiñua ízoi. Ráairuiñeno, Juziñamui jitailla izói, omoi comeci figónamona íaioina omoi úiñori. Jáíma izire ocuilla izói íaioina omoi úiñoñoeno iri. Dama úcube óllena úiñua izói íaioina omoi úiñoñoeno iri. Dama omoi comeci óiacana izói caimare omoi táijiri. <sup>3</sup> Omoi uai anamo itínona ríirerie comécina éoide comini úiñotimie úiñua izói omoi úiñoñoeno iri. Mei jáífodo omoi illafue ñue jaícina omoi mameri, omoi illa izói íaioi ílleza. Mei daíí ñue illafue fueñe íaioimo jino llotímiediomozza. <sup>4</sup> Afe jira Nahí Uiñoraíma Cristo cíocailliruimo ebírede ñúefue ómoimo nítaite. Afefue jaca ninomo féiñeite. (Comini dibénemona cómemo fecaca raa, jamánomoidimie daííllena, fia rábiai finoina ífo icuifoí. Afécuifoí etuda niné táinocaite, mei íadi omoi maiñoredifue jaca niné táinocaiñeite.)

<sup>5</sup> Afe daje izói, jitócomini, mai omoi ocuide éinamací ñuera ríiuai anamo itábicaíri. Ua nana omoi conímana comeci mánainafuedo daje anamo dájena itábicairediomoi. Mei jaiaí Juziñamui Cuegáuai daide:

Juziñamui, nana fiéni abí ñnotinona uáitaoide; ua íaioimona ie uieco oni jíicaide.

Mei íadi nana comécina mánaidínona afémie dúecaífirede.

<sup>6</sup> Mei jira Juziñamui ñue ríirede uai anamo ríiríñeno comécina mánaidimiena omoi iri. Afemona ie comeci daíílliruido afémie ómoína jamánomoidimiena jóoneite. <sup>7</sup> Nana omoi izire comeci llícidifuaí Juziñamuimo uáfodo lloíri; mei afémie ómoína iere rairuúdeza.

<sup>8</sup> Ñue cáadimie izói abí omoi rairuíoíri; mei caí bacáuai ímie Taífe caína jenódeza. Ua jufíruite jánallari rille jénua izói afémie caína jenódeza. Ua jenode caína fiénidífueмо ífóllena. <sup>9</sup> Afémiemo omoi ñnogafuedo izire uáitaoicana abí omoi mameri. Mei nágagobiaímo ite omoi ámatiaí dáafueri duere zefuíaíioíza onódiomoíza. <sup>10</sup> Mei íadi nano íanori duere omoi zefuilla mei, Juziñamui meine abido caimare duere zefuíñena dibénomo ómoína itátaite. Afe llezica íaífuemo comécina féitanide cómena ómoína mámeite. Ua dáaruído ómoína ríire nibáinino nabéfuena náiretataite. Afe daje Juziñamui fiénidífuemona abí rairuúllafuena caí ite, naa jíaíe canóinafuiaíri. Dáamie íemo ite ziiño ebírenafueмо ebi caí cácaillena, afémie áfemo caína mamede; mei Jesucrístomo caí jaínáíllamona, áfemo ebi cácaíticai. <sup>11</sup> Uafue, afe Crístomo nana ebirede ñúefue, ríino díga jaca ziiñoona dúide. Aquíe izói íteza.

*Iraífuena facádua uai*

<sup>12</sup> Bie íanori cue cuegabe Silvánodo ómoimo orédicue. Afémie ñue ñnofirede ámaza comécido onódicue. Afe bibedo ñúefueмо omoi íllena omoi llófueticue. Ja aillo Juziñamui ézicigafuaína jeire otíomoi. Iemona afémie ómoína iere izíruíteza ua onódiomoi. Aféfuedo ríire nibáinino ómoína mamedicue, uáfodo omoi onóillena. Bífue nágarui jaícina jeire omoi oíri.

<sup>13</sup> Babilonia jófueмо ite Juziñamuimo gairídino, Juziñamui omoi izói eneno ñizécano, ómoimo uailaí orédiaíoi. Daje izói cuedo jáicadimie Marcos ómoína uáidote. <sup>14</sup> Nahí ámána izíruilla izói caimare conímana omoi uáidori. Nana omoi Jesucrístomo jaínáidinodíomoíza, mai caimare uái omoi iri. Mai; jae ñíie.

## SAN PEDRO MÉIFODO CUEGABE Segunda Carta del Apóstol San Pedro

### *Jesumo ñnotinomo Pedro cuete*

<sup>1</sup> Cue Simón Pédrodicue. Jesucristo ocuífirégamiedicue. Daje izói ie oréfirégamiedicue. Iere ráifide ñnuafue jeire otínomo bibe cueticue. Omoi ñnogafue daa cai ñnogafue izói ráifide. Aféfuena ja fairíotiomoi, mei cai Jíllotatimie Jesucristo Juzíñamui diga comécina ñue jaícina jóidimieza. <sup>2</sup> Cai Ocuíraima Jesús, Juzíñamui diga, omoi onónamona diga éziciafuiái, daje izói comeci caimare uái illáfuiái dibénomo omoi iri.

### *Crístomo jaínáidinomo ite nie izóidifuiái*

<sup>3</sup> Nana cai comeci jitaica raa, Juzíñamui iodo caimare cai jáillena Juzíñamuimo ite ríinodo caimo fecaca. Afémie cai ie fidítamona bífuiaina caimo ite. Ua dama íemo ite ñúefuiaido afémie caina íemo ñnotade. Daje izói ie fáigacailla ebire finócafuiaido íemo caina ñnotade. <sup>4</sup> Iemona ie jífueñeno fecalle uai caimo llote. Bie caimo llogáuái iere aillo ráifide uai. Afe uáillaído Juzíñamui illa izói ítiomoi. Nana comini íaifue dibénemo fiene comeci jítainafuiaido uigámaci; mei íadi Juzíñamui ómoimo llogáuaido afe íaifuemona jae jíllodiomoi. Iemona Juzíñamui ñue illafue dibénemo ítiomoi. <sup>5</sup> Mei ie jira omoi ñnogafuemo, nágarui Cristo ñue illáfuedo omoi íocire jáillafuena aillo nabáicana uiri; afe omoi ñue jáillafuemo caimare fibíllafue daje izói nabáicana omoi uiri; <sup>6</sup> afe caimare fibíllafuemo, dama abina rairuíllafue omoi nabáicana uiri; afe dama abina rairuíllafuemo comeci járidoñenafue omoi nabáicana uiri; afe comeci járidoñenafuemo Juzíñamuimo caimare comécillafue dájemo nabáicana uiri; <sup>7</sup> afe Juzíñamuimo caimare comécillafuemo ámatiaina duéruillafue dájemo nabáicana uiri; afe ámatiaina duéruillafuemo nahí izíruillafue mai izire dájemo nabáicana uiri.

<sup>8</sup> Nana bie izói daináfuiái jeire omoi óiadi, afe llezica aféfuái ñue omoi móonaitiadi, omoi illafue táinomo báíñeite. Daje izói cai Ocuíraima Jesucristona omoi onónafue táinoñeite. <sup>9</sup> Mei íadi bífuiaina jeire oñédino uínidimie illa izói ite; jica cióñeno áinori ciódimie izói ite. Jaiái ie finoca fiénidifuiái dóinamo ja comécíñede. <sup>10</sup> Mei jira, ámatiaí, Juzíñamui uáidota eneno nizécamacidiomoi onódiomoi. Iemona jíredimaci izói omoi iri, aféfuái omoi comécimo riire amena jáinao izói íllena. Afe izói omoi íadi, jaca Cristo íomona oni nibéfodo jáíñeitiomoi. <sup>11</sup> Bifue daina izói omoi íadi, cai ocuide Jíllotaraima Jesucristo zíñona illáimana illánomo, rairuíñeno caimare jofo uáidolliomoi.

<sup>12</sup> Mei íemona bífuiaimo omoi comécioitaiticue; aféfuái onódiomoi íadi. Daje izói afe ómoimo birui ite ua uai jeire otíomoi íadi, nai jaca jaícina comécioitaiticue. <sup>13</sup> Bie ñue llóinafue uáfodo ómoimo cue lletalle nai cue jáicana llezica, cúemona ñue jaícina cíoide. <sup>14</sup> Mei jii, nauí cai Ocuíraima Jesucristo benó illa llezica, raire cue tiállano bie éniemo cue íñeillena cuena daide. Afémie cuemo llua izói ja raire íficaite. <sup>15</sup> Ie jira birui nana cue ríinodo llófueriticue, cue tilla méifomo bífuiaimo jaca ñue omoi comécillena.

### *Pedro Cristo jamánomo ñuera ébifuena ciónana jino llote*

<sup>16</sup> Nauí cue nabáíñiaí cue diga cai Ocuíraima Jesucristomo ite ñuera ríino ífuena omoi llófueticaí, ie meine abido billifue diga. Nana afe llófueinafuiái dani cai comécimo comuídifueñede. Táinofuena lloñédicaí, mei íadi dani cai uído ie jamánomo ñuera ébifuena ciódinodicaí. Iemona uafue lloticaí. <sup>17</sup> Ie Moo Juzíñamui íemo ñúefue nítana, jíaíe ebíredifue íemo fécana dani cai uído ciódicai. Juzíñamui ebire ie uaido daide: “Bie cue izíruiga jító.

Afémieri iere ióbioidicue,” daide. <sup>18</sup> Aquíe izói monámona Moo dáinana daní cai jefodo cacádicaí; mei afe ñue eneno nizeca ídumo afe cai Ocuíraímaíoiri jáidicaíza.

<sup>19</sup> Bie como cai llogafue baímo, jáíe nahí ua llogafue ite. Bie nahí uafue jaíai uícodo uai jino llóraini lloga cuegáuai. Afe cuegáuai cai llogáuaina nabaide. Bínie nai jítifomo illa llezica bíuaina ráiruiñeno iere jeire órediomoi. Aféuai mechera naio bóua jítifo egáiñua izoide. Ua aféuai nai mona mónaiñenia, jítifo egáiñua izói omoi comécina egáiñote. Afe mona monailla llezica monáiracudu izóidímie billano, omoi comécina ñue jaícina déitaite. <sup>20</sup> Mei fueñe bífuego omoi coméciri: Cuegáuailaímo ite uícodo jino lloga daínafuiai dama afe uai lloráimamona llóñega. <sup>21</sup> Mei onódicaíza, uai llóraini jaca daní íaíoi comeci jítinaífuiaído úriñediaíoi. Mei jáíafodo afe Juzíñamui íeiena maiñócamaci afémie dibéfodo úritiaíoi; mei Ñuera Joreño ífócaíaióiza.

## 2

### *Táinofuiaina llófueñredino (Jud 4-13)*

<sup>1</sup> Mei íadi afe dáaruillaído Israel comini cígiri táinofuiái jino llóraini ite. Afe izói omoi cígiri táinofuiaído llófueritino íite. Afémaci daní fiéni finode ífoci úrillafuena báinino omoi llófueítiaíoi, comini Juzíñamuimo íaíoi íinogafue féitallena. Daíí aféuaído íaíoiina jílloítate Ocuíraímana jáanoítiaíoi. Afemona íaíoi niné raíre táinocaillifue daní íaíoiimo zúite. <sup>2</sup> Íaíoiimo ite fiénidífue dibénedo aillo comini jáítiaíoi. Daní afémaci ícoínia cai ua ñue jaille iori fiéni úritiaíoi. Bie ñue ua cai jaille io Juzíñamui ñúefue. <sup>3</sup> Íaíoi aillo úcube llínoiacanamona, táinofuiaído omoi íaíoi jífuiaído úcubena llínoítiaíoi. Mei íadi íaíoi niné táinocaitaimie, íaíoi finócafuiaina cíoillano daíí íaíoi táinocaillifuena fáicanocaiñeno maméoi. Mei jaíai ninomo íaíoi duere finóllena mamécaíaióiza.

<sup>4</sup> Juzíñamui abí imácimona dáarie fiénidífuego baíídiaíoi. Afémaci íaíufuena Juzíñamui doñede. Doñeno duere zefuille iraimo íaíoiina orede. Jítifomo íaíoiina fiénocaide. Dinomo íco izire jicánolliruimo baí óllena cuinácaíaióoi.

<sup>5</sup> Daje izói Noé illáigma llezica fiénide comini íaíufuena Juzíñamui doñede. Mei íadi jamánomo áillue jáinoído afe fiénidínona Juzíñamui nana fiéñeno fuitade. Afe fiénide náiraímona dama Noéna naa siete díga íe comíniri Juzíñamui jílloítate. Afe Noé jaícina ñúefuedo íaíoiina lletade íadi jamáiena faitíaíoi.

<sup>6</sup> Bífue mei, daje izói Juzíñamui Sodoma jofue, Gomorra jofue imaci díga niné táinocaitate. Ua nana íaíoi jofue bóua mei, daa ímuíciaí fiébilla. Ua daíí izire niné táinocaitate, íe méífodo fiéni íitino, bífuena cíoillano, Juzíñamui fiénidino izire duere finófirede daííllena. <sup>7</sup> Afeno bóocuamona Lot daínámie comeci ñúénado íena jílloítate. Lot afe íáirede comini fiéni illáfue íe cíónamona íe comeci jamánomo zúucaide. <sup>8</sup> Bie comécina ñúemie Lot, nágarui fiénide comini cígiri íe íllari, íaíoi fiéni finócafuiaina cíode; íaíoi fiéni úrillafuiaina cacade. Aféfuiaí íe ñuera comécina zuure finode. <sup>9</sup> Daíí cai Ocuíraíma nana íena ñue jacíruitino íaíoi comeci fiéni facátafuiamona íaíoi jíllloíllena ñue onode. Daje izói afémie nana fiénidino íco íraícaíño íere jicánolliruimo duere finóllena oni eneno jóniana ñue onode.

<sup>10</sup> Nana íaire comeci jítinaífue jeire óiacadínona Juzíñamui íere duere fínoite. Cai Ocuíraíma ríinona jámairuitinona daje izói duere zéfuitaitiaíoi. Afémaci llétana cacácaíñedino. Illáimana jacíruíñedino. Daje izói monamo ite jóríai izoide ríinoredínona báíñuana jacíruíñediaíoi. <sup>11</sup> Juzíñamui abí imaci afe fiénidino baímo ríinorediaíoi. Daíí íaíoi illa íadi, afémaci afe jóríai izoide ríinoredínona fiéni daííñediaíoi. Ua cai Ocuíraíma uíecori afémacina báíñuafuedo “Duere zéfuitiomoi,” daííñediaíoi.

<sup>12</sup> Afe fiénidino ríllenai izói abina onóñediaioi. Afe ríllenai da ebena illáfue mo itíai. Ñúfue dine coméciiñediaioi. Fia llaitada fállena jocócaiaioi. Bie izói itímiaí ónoñegafue mo fiéni úritiaioi. Mei íadi afémaci jiba rille izói títiaioi. <sup>13</sup> Jiáie comini duere íaiói zefuítado duere finóbitiaioi. Ianori caimátaillifue mo jiáie iere ióbitadinodicaí, daíírediaioi. Afémaci meáidaitadimaci. Comeci fiéni finode raa izói omoi cígiri itíai. Daje llezica omoi finoca ráfuiado nabáiriacadiaioi ómoína íaire finóllena. Táinona jífue mo caimátailla raado jífanotiaioi.

<sup>14</sup> Afémaci nana ciona ringomo fia érocaineno llaitada jiruifue finóacadiaioi. Afémaci fiénidifue finuana iere gáidiaioi. Afena fáicanocaiacañediaioi. Comécina náinidinona bífueta íaifue mo uitíai. Naga raana izire máinuana iere fibidiaioi. Afe izoide comini íaire faidócano. <sup>15</sup> Afémaci Moo Juzíñamui ñuera iómona oni fiénidido jáidiaioi. Jaiaí uai llóraíma Balaam ífue mo jáidiaioi. Afe Balaam Beor jító. Afe Balaam fiénidifuaí ie finuado aillo úcubena llínoiacade. <sup>16</sup> Mei jíáfodo áfemona uáinide burra Balaam fiénidifuaí diné íena lletade. Afe burra come izói úrillano, Balaana uáiritaidimie úrilla izói rairuillano íena úritañede.

<sup>17</sup> Nana bie táinofuena llófueridino jainoi iñeno jainoi orano zafénailla izóidiaioi. Jairífo mo oni niné ñaitaca mona úillie izóidiaioi. Jamánomo jítirede jítinomo ziiñona íllena riire faidócaiaioi. <sup>18</sup> Mei aillo abí ínua uáillaído naa taino uallaí diga, ñúemacina jífuecana uitíai. Íaioi íaifuaído, comini abí jítainafuaí diga jíáimacina bífuetiaioi. Ua íaifue dibénemo itínomona uáfue mo jíllo dinona meine íaifue mo nane bífuiadiaioi. <sup>19</sup> Uífo mo raíre llotiaioi: “Uafue ráiruiñega comini izói íitiomoi,” daíírediaioi. Mei íadi afe daína llezica, daní afémaci íaifue dibénemo izire jaináitaganona itíai. Iemona afémaci fiénidifue finuana fáicanocainidiaioi. Illa dígamie íena anáfenode raa íena náamatade. Iemo áfemo izire jaináitagamiéna jaide. <sup>20</sup> Mei caí jíllotate Ocuíraíma Jesucrístona onódimaci, éniemo ite íaifuaímona oni jíllodiaioi. Bimácimona dáarie íaioi jíllua mei nauí íaioi anáfenogafue mo abído íaioi baííadi, nano íaioi illa baímo, jamánomo figoñeite. <sup>21</sup> Juzíñamui ñuera iona íaioi onóñenia afefue afémacimona figoñede. Mei íadi ja Juzíñamui iona onona mei, íaioimo iga ñuera lletárafuaína féitaadi, afefue jamánomo fiénide. <sup>22</sup> Jaiaí daína ua uai como afémacimo zúilla. Aféuai daíde: “Jico ie cicúecana abído güízajide. Daje izói mero abina ñue jococa nane dama ie íaíbimo nane jabíjabízajide,” daíde.

### 3

#### *Cai Ocuíraíma billifue*

<sup>1</sup> Cue izíruiga ámatiaí, omoi cácareí. Bie méifo díbe ómoimo cuetícue. Ménacaiño ómoimo cue orécabedo ómoína abí jífueñeno bífue mo comécitacade. Ñue llófue inafue mo ómoína comécitacade. <sup>2</sup> Afe jira jaiaí ñuera uai llorainí caímo llogáfue mo omoi uibíoiri. Daje izói Cristo orécamací ómoimo lloga jíllotate Ocuíraíma lletara uaimo féitañeno áfemo omoi coméciri.

<sup>3</sup> Nano fueñe bífue mo omoi uibíoiri: íco íraíruillaído Juzíñamui lloga ñúefuaína zanófire dino blítiaioiza. Afémaci daní íaioi comeci fiéni óiacanafuaído itíai. <sup>4</sup> Afémaci ómoimo zanoda jícanoítiaioi: “¿Ninomo ite ómoimo lloga meine bite Cristo? ¿Némeí afe? Caí jáiaigima tílla méifomo naga raa daje izói ite. Ua énie comuillarui mona naga rafue daje izói jáioicaide.” <sup>5</sup> Daíí llóitiaioi, mei jaiaí ninomo monana Juzíñamui ie uaido finuafue mo comécitacañediaioiza. Afe izói Juzíñamui uaido ocuillamona, zocade raa zocai ízoi, bínie jáinoimona comuide. Iemo jainoi cígido bínie Juzíñamui ie uaido riire itábicaítate. Aféfuena náfueñeno bie zanófire dino onóacañediaioi. <sup>6</sup> Afe mei daje izói énie anábaitade áillue nocí aféruillaído bie éniemo ite cáadinuaína niné tánocaitaíbite. <sup>7</sup> Mei íadi biruí ite mona énie diga daje Juzíñamui daína uaido tánocaitalle irai íena oni

jóoneoiga. Afe irai fiénidinuai niné táinocailliruimo ico íraicaiño iere jicánolliruimo afe bíniena naa diga cuarítaite.

<sup>8</sup> Izíruiga ámatiai, bie emódomo ífuena omoi féitañoeno iri. Cai Ocuíraimamona daa mona mil fimona izóideza. Daje izói afémiemona mil fimona daa mona izóideza. <sup>9</sup> Cai Ocuíraima ie daináfuiai fuitálliruimo dúcia bai jiáiruimo dúiñoñeite. Dámierie afémiena jiáiruimo dúiñoite daiífrediaioi. Mei íadi afémie cairi járitaiñede. Afémie buna oni fáiacañede, mei jiáifodo caimo ite fiénidifuiiai ñúefuena méidollena afémie iere jitaide. Afémie aféruina bai jiáiruimo dúiñoñeite. Féitañoeno ie mamécaruimo zúite.

<sup>10</sup> Cai Ocuíraima billíruui meríriraíma naio billa izói, nai due ócuiriñeitiaioimo déizaibiteza. Afe billíruimo mona naa íemo ite ráaniairi jacire niné táinoficaite; áfena iere ficire cácaite. Nana afe mona finua ráaniai naa úcuairi iraimo niné táinocaite. Afe llezica bínie naa íemo ite itínuiari cúarite.

<sup>11</sup> Ja nana daií táinocaillifuena omoi fidínamona, nana íaifuemona abi omoi rairuillifue iere jitáirede; benómona afémiena caimare íóbitaredicai. Ua Juzíñamui íeiena omoi illifue iere jitáirede. <sup>12</sup> Mai Juzíñamui ie nahí illáimana cíocaizaibilliruimo omoi úiñori. Uíñua llezica, omoi onóigafuedo aféruina raire mai omoi járidori. Aféruillaído mona ero iraido niné táinocaite. Nana énie finua ráaniai iraimo niné íbina jáitiaioi. <sup>13</sup> Mei íadi Juzíñamui uícodo caimo lloga comue monamo comue éniemo ocuídicaí. Afe comue éniemo mona diga, nana raa ñue jaícina jóite. Naga raa níífuenite.

<sup>14</sup> Izíruiga ámatiai, mei benómona nai bífuego omoi úiñoína llezica, nana ómoimo ite ríinodo omoi illafue jaícina jóoneri. Daií omoi comeci caimare uái illafue dibénemo íllamona Juzíñamui ómoimo eróicaizaibilleza. Afe izói omoi comeci íaicaiñoeno nífuenino Juzíñamui ómoimo cíoizaibilleza. <sup>15</sup> Nane jiáifuego omoi comécioiri. Afefue daide: Cai Ocuíraima comínimo járitaiñenafue, ua cai jíllloillifue. Daa bíuai cai izíruiga ama Pablo ómoimo cuete. Juzíñamui íemo lloga comeci jaícina fibíllafuedo cúefirede. <sup>16</sup> Nana afémie orécabiamona daa bífuiiai llote. Mei íadi dáarie ie uailai ñue onóillena iere féirede. Abina onóñedino afe féirediuaina jiáifodo mamédiaioi. Afe izói jabo ínotino aféuaina jiáifodo dobáiñotiaioi. Daje izói jiáie Juzíñamui Cuegáuai lloga uáillaina oni jiáifodo áífedotiaioi. Afemona afémaci dani abi niné táinocaitaitiaioi.

<sup>17</sup> Izíruiga ámatiai, nana bífuina ja uícodo onódiomoiza, mai fiénidinomona abi omoi rairuiri, afémaci jífuerillafuedo meine abido íaifuemo omoi báiza; omoi jeire oga ñúefuena niné féiza. <sup>18</sup> Mei jiáifodo, cai jíllotate Ocuíraima Jesucrístona, mai jamánomo ñue abina omoi onoiri. Caina ie duéruillafuego, omoi comeci ífue aillo oni móonaitaocairi. Iere ebire ñúefue dama Jesucrístomo mai birui omoi nitari. Daje izói zíiñoña ebíredifue afémiemo mai omoi nitáfireiri. Mai. Jae ñie.

## NANOIDE SAN JUAN CUEGABE

### Primera Carta del Apóstol San Juan

#### *Cáatate úrilla uai*

<sup>1</sup> Nana raa nano taineina llezica itímiedo ómoimo cueticai. Afémie Jesucristo. Afémiemona cai cacánana lloticai. Dani cai uído cai ciónana lloticai. Afémiemo eróidicai. Afémiena dani cai ónoído jetádicai. Afémie Juzíñamuimona uailai lluaíbitimie. Afémie uai caina cáatate. <sup>2</sup> Afe cáatatena itímie cai onóillena caimo cíocaide. Afémiena cíoillanona íemo uai faiticai. Afémie fecalle zíñona cáananona ómoimo jino lloticai. Nanómona afémie Moo Juzíñamui diga ite, ie mei caimo cíocaide. <sup>3</sup> Jira cai cacánafue cai cíonafue diga uáfuenta jino lloticai, daaco comínina omoi cai diga íllena. Ua afe izói uáfuenta Moo Juzíñamuimo dájena jaináidicai. Daje izói ie Jitó Jesucristomo jaináidicai. <sup>4</sup> Jira aféfuaiaina ómoimo cueticai aféuaido jamánomo caimare ñue omoi íllena.

#### *Juzíñamui nairai comeci egáioidimie*

<sup>5</sup> Bie úrillauai Jesucristo caimo llogáuai. Afena jino ómoimo lloticai: Juzíñamui comécina egáioidimie. Afémiemo jaca jítinona iñede. <sup>6</sup> Dájena afémiemo jaináidicai cai daiíadi, íadi afe llezica jítifodo cai macáadi, taino lloticai. Daje izói táinona finódicai. <sup>7</sup> Mei íadi Juzíñamui úzefomo illa izói, daje izói úzefomo cai macáadi, ua dájena conímamo jaináidicai. Iemo ie Jitó Jesucristo ie cruzmo tíllamona, ie die tótajamona nana cai fiénidifuiái dote.

<sup>8</sup> Cai fiénidifue iñede cai daiíadi, cai abi jífueticai. Táinofuefiredimacidicai. <sup>9</sup> Mei íadi Juzíñamui ñue jaícina finóllifueмо áfemo ínoredicai cai fiénidifuiái jino cai llóíadi, uáfuenta afe fiénidifuiaina afémie dóite. Nana íemo fieni cai finócafue íbana caimo óñeite. <sup>10</sup> Cai fiénidifuiái finóñedicai cai daiíadi, Juzíñamui táinofueredena cíotataiticai. Ie úrilla uaina uáfuenta jeire oñédicai.

## 2

#### *Cristo cáiconi ñue úriraima*

<sup>1</sup> Cue jítótiai, bífuiai ómoimo cueticue, íáiredifuiáimo omoi báíñellena. Mei íadi dámie íáiredifuiái finóadi, Moo uiécomo cáiconi ñue úritimie ite. Afémie Jesucristo. Ñue jaícina itímie. <sup>2</sup> Jesucristo cai fiénidifuiái ícoínia fagámie. Dama cai ícoíniañedeza, mei íadi nana énie comini fiénidifuiái ícoínia.

<sup>3</sup> Juzíñamui ocuífafuiái iere cai cacáreadi íena onódicaíza fídíticai. <sup>4</sup> Mei íadi dámie “Íena onódicue” daiíadi ie ocuífafuiái iere cácareñeniadi, afémie taino lloraíma, ua táinofuefiredimie. <sup>5</sup> Mei ie íbana Juzíñamui ocuífafuena finódimie, jae Juzíñamuina nabéfuena izíruite. Daií áfedo íemo cai jaináinana fídídicai. <sup>6</sup> “Juzíñamuimo jaináidicue” dámie daiíadi Cristo maca izói ie macállino jítáirede.

#### *Comue ocuífafue*

<sup>7</sup> Cue izíruigamací, comue ocuífafue ómoimo cueñédicue. Afefue nanómona ómoimo itífue. Afe jaiái rafue daje omoi cacana úrillafue. <sup>8</sup> Mei íadi ómoimo cue cuegafue comue ocuífafue izói ómoimo íficaízaíbite. Bie ocuífafue Crístomo nahí ua ráfuena ite. Afe izói bie ocuífafue ómoimo nahí ua ráfuena íite. Afefue ua nahífue, jítino oni jáioicaideza. Jae ua comécina egáíñollena ñue egáioinaza.

<sup>9</sup> Dámie “úzefomo iticue” daiíadi, íadi jíáimana nai éoia, afemie nai jítifomo ite. <sup>10</sup> Ie ámana izíruitimie úzefomo ite. Afémiemo mínícana fiénidifuiáimo baítaitena iñede. <sup>11</sup> Mei

íadi ie ámana éoicaidimie nai jítifomo ite; ua jítifodo macade. Niné jáideza onóñede, jítino uina cíoitañena jira.

<sup>12</sup> Jitótiai, ¡omoi cacai! Juzíñamui Jesucristo titáinanomo omoi fiénidifuiyai ibana ote. Ie jira bifue ómoimo cueticue. <sup>13</sup> Móotiai, ómoimo cueticue, nano tainéinanomo itímiena jae omoi onona jira. Jitócomini, ómoimo cueticue, Taifena omoi anáfenua jira.

Jitótiai, ómoimo cueticue, ja Moona omoi onóicailla jira. <sup>14</sup> Móotiai, ómoimo cueticue, nano tainéinanomo itímie omoi onóicailla jira. Jitócomini, daje izói ómoimo cueticue omoi ríredimacina jira; omoi comécimo Juzíñamui úrilla uai jeire omoi ua jira; Taifena omoi anáfenua jira.

<sup>15</sup> Biniemo ite Juzíñamuina bacáuaredino finócafuiaina izíruiñeno omoi iri. Daje izói íaioimo itífuiaina cacáreiñeno omoi iri. Dámie afémaci finócafuiaina izíruiadi, afe llezica Moo Juzíñamuina íziruiñeite. <sup>16</sup> Nana íaioimona lloga ráfuiyai minícana Juzíñamuimona biñede. Fia dani íaioi cígimona comuide. Comécina íáiredemona fiene óiacanafue bite. Cai ui ióbicailla jítaillamona jáie fiene óiacanafue bite. Caimo ite ráaniaimona fiene abi ínuafue bite. Nana afe billáfuiyai biniemo ite Juzíñamuina bacáuaredino llóolloga. <sup>17</sup> Afena bacáuaredino fúioicaide, naa íaioimo ite fiene óiacanafuiyai diga. Mei íadi Juzíñamui jítainafue finódimie jaca ninomo zíñona ite.

### *Uafue táinofue diga dájemo jaináñede*

<sup>18</sup> Jitótiai, jae írairuimo dúcidez. Cristo uáitaoidimie bíllana cacádiomoi. Ja birui aillo Cristo uáitaoidino cíocaide. Ie jira birui írairuina onódicaí. <sup>19</sup> Afémaci cáimona jino jáidiaioi. Mei íadi uáfuea cáieñediaioi. Uáfuea cáiena íaioi íadi, cairi fiébite. Ua afémaci cáimona jino jáidiaioi nana cáieñeitiaioiza uáfodo daíí áfedo onóillena.

<sup>20</sup> Mei íadi Cristo Ñuera Joreño igáomoi; íemona afémiedo onótagaomoi. <sup>21</sup> Omoimo cueticue mei, uáfuea omoi onona jira. Uáfuea omoi onóñenamona cueñédicue. Uáfueomona jáie daa táinofuea comuínide. Jae onódiomoiza.

<sup>22</sup> ¿Bu táinofueredimie? Jesuna Crístoñede daidímie, afémie dama táinofueredimiena. Níimie Crístono uáitaoidimie. Afémie Moo Juzíñamuina jáanote. Afe izói ie Jitona jáanote. <sup>23</sup> Jitona jáanotimie afémiemo daje izói Moona iñede. Mei íadi Crístono jíeruitimie daje izói Moona onode.

<sup>24</sup> Ie jira, nanómona omoi cacana úrillafue omoi comécimo ñue omoi jóoneoiri. Jira nanómona omoi cacánafue ñue omoi comécia Juzíñamui Jitomo dájena íitiomoi. Afe llezica cai Moori dájena íitiomoi. <sup>25</sup> Jesús uáfuea uícodo llote, zíñona cáananona caimo fecállena.

<sup>26</sup> Omoi jífueiacadino bifue ómoimo cueticue. <sup>27</sup> Mei íadi Jesucristo ómoimo fecaca Ñuera Joreño ómoimo ite. Ie jira daíí buna ómoimo llófuenidiaioi.

Daje Ñuera Joreño nana ráfuiaina ómoína llófullofuede. Afémie llogafue uafue; táinofueñede. Jira daíí Crístono dájena omoi iri, Ñuera Joreño ómoimo llua izói.

<sup>28</sup> Jitótiai, mai birui Crístono dájena jaináicairi, afémie cíocalliruimo ie daínana ñue cai ínollena. Daíí ie bíllemo ie uiécona méairuiñeíticai. <sup>29</sup> Ja onódiomoiza Jesucristo ñue jáicina finódimie. Afemona daje izói nana jáicina finódino Juzíñamui jítótiaiza ónoitiomoi.

## 3

### *Juzíñamui jítótiai*

<sup>1</sup> Mai ¡comécimo faca! Nii jamánomo Juzíñamui caína izíruiilla. Iemona ie jítótiaína maméidicai. Jae áfedicai. Ie jira éniemo ite Juzíñamuina éoidino cai izói comécíñediaioi, mei Juzíñamuina íaioi onóñena jira. <sup>2</sup> Izíruiiga ámatiai, jae Juzíñamui jítódicai. Írairuimo cai íficaillifuea nai caimo ácatañega. Mei íadi onódicaiza, Jesucristo cíocaia afémie izói íiticaí,

ie illa izói námiena cai ciona jira. <sup>3</sup> Nana afémiemo daií comécidimaci daní dáamaci nana íaifuaiaimona ñue dóficaitadiaioi, mei Jesucristo íaifuenidimie illa izói íiticaí.

<sup>4</sup> Mei íadi nana fiénidifue finódimaci Juzíñamui ocuícáfue uáitajano jámairuite. Mei jira fiénidifue ocuina ráfuena uáitaoina. <sup>5</sup> Jae Jesucristo bie éniemo cai fiénidifue oni duáibillana onódiomoi. Daje izói afémiemo nifue iñénana onódiomoi. <sup>6</sup> Mei jira nana afémiemo dájena jaináioicaidimaci fiení macánidiaioi; mei íadi nana fiení macáfiredimaci afémiena jaca cióñediaioi; íena onóñediaioi. <sup>7</sup> Cue jitótiaí cacai. Buna ómoína jífueñellena nane dáititue; ñúefue finófredimie ñúemie, Jesucristo ñúemiena illa izói. <sup>8</sup> Mei íadi fiení macáfiredimie Taífemo jaináidimie, mei nanómona Taife fiénidifuairedimiena ite. Uafue Juzíñamui Jitó Taife finócafuaí tainocaitaíbite.

<sup>9</sup> Juzíñamui jitótiaimona jaca buna figóñeno macáoicaiñede, Juzíñamui íemo iga cáanano íemo illa jira. Afémie fiénidifuena finóñide, Juzíñamui jitoza. <sup>10</sup> Afedo bu mei Juzíñamui úruiaínaza, bu mei Taife úruiaínaza onódiomoíza. Uafue nímierie ñúefuena finóñenia, ie ama íziruiñenia, afémie Juzíñamui dibénemo itímieñede.

#### *Conímana cai izíruillafue jitáirede*

<sup>11</sup> Mei jii nanómona omoi cacana úrilla uai, be nie uai: conímana cai izíruillafue jitáirede. <sup>12</sup> Caín izói omoi iñeno iri. Afémie Taife dibene ímie, íemona ie ama titade. ¿Ñibái mei íena titade? Caín úradoillano ie ama titade, Caín finócafuaí figóñena jira; mei íadi ie ama finócafuaí ñuera.

<sup>13</sup> Cue ámatiaí, Juzíñamuina bacáuairédino ómoína éoinamona fáigacaiñeno iri. <sup>14</sup> Jae tíizaille íomona zíñona cáaillíomo dóbaicaídicaí. Afena onódicaí, Jesuna ínotinona cai izíruilla jira. Mei íadi izíruiñedimie tíizaillíodo jaide. <sup>15</sup> Nágamie ie abi cómena éoidimie cómena titádimie izói ite. Íemo come titádimie comécimo zíñona cáanano iñénana onódiomoi. <sup>16</sup> Jesucristo ie cáanano cáiconi iga; áfedo nana izíruillafuaína onódicaí. Afe izói cai cáananona lloñeno Jesuna ínotinori daií abina zóoferedicaí. <sup>17</sup> Dámie ie illínomo jitáirede raa ítemo, ie aino come jitaíca raa iñénana cióillano, mei íadi íemona jeruide, ¿ñie izói Juzíñamuimo izíruillafue ie comécimo íteza? ¡Iñede! <sup>18</sup> Cue jitótiaí, ¡fia fuena daína uaido mai cai izíruiñeno iri! ¡Mei íadi ñue finóllifuaído uafue izíruillafuedo mai conímana cai izírui!

#### *Juzíñamui uíécomo ñue íena ínofírenafue*

<sup>19</sup> Jira daií uáfue mo jaináidimacidicaí onódicaíza; nane aféfuemona Juzíñamui uíécomo ñue íena ínofiredinodicaí. <sup>20</sup> Cai comeci cai ícoínia llóiaí, Juzíñamui cai comeci baímo aillo ñúemienaza onódicaí. Afémie nágafuaí onode. Íemona afe ícoínia caímo íbana óite. <sup>21</sup> Mei jira, izíruiiga ámatiaí, cai comeci cai ícoínia lloñeniadi Juzíñamui uíécomo ñue íena ínofiredinodicaí. <sup>22</sup> Nana íemo cai jicaca raana fécaite, ie ocuícafuaína jeire cai úamona; ua íena cai íóbitamona áfeniaína caímo fécaite. <sup>23</sup> Afémie ocuícáfue daide: “Íe Jitó Jesucristomo cai ínori. Afe emódomo cai conímana cai izírui afémie cai ocuilla izói,” daií daiíñoaíde. <sup>24</sup> Íe ocuícafuaína iere cacáreidimaci afémieoiri itíaioi. Daje izói afémie nágari íaioíri ite. Afémie jaca caímo íllana onódicaí. Ua afena afémie caímo iga Ñuera Joreño onódicaí.

## 4

#### *Ñuera Joreño Crístona uáitafírede jóriaína anáfenoacade*

<sup>1</sup> Bie énie tánofuaí llotínona oruízaídeza. Afémaci “Juzíñamuido úriticaí,” daídíaioi. Izíruiiga ámatiaí, ¡omoi cácareí! Naga “Juzíñamui dibéfodo úriticaí” daídímiena ínoñeno iri. Mei íadi íaioína facátari, ñie joreño íaioímo íllana onóillena, Juzíñamui ie, ñibaí íeñede. <sup>2</sup> Juzíñamui Joreño itímie omoi onóillifue llóititue. Nágamie Jesucristo ua cómena bíníemo bite jino onótatímie, afe cómemo Juzíñamui Joreño ite. <sup>3</sup> Mei íadi daií



jino onótañedimie Juzíñamui Joréñoñedimie. Afémiemo Crístona uáitafirede jóriai ite. Afe izóidena fiénide jóriai bíllena ja cacádiomoi. Mei afe jae bie éniemo ite.

<sup>4</sup> Jitótiai, omoi Juzíñamui iédiomoi. Omoi itímie baimo riinorenmona, afe tánofiredinona jae anáfenodiomoi, mei íaioi daináfuiái omoi íinoñena jira. Biniemo ite tánofiredinori itímie jabóidimie. <sup>5</sup> Afémaci Juzíñamuina bacáuairedinomo jaináidino, ie jira Juzíñamuina bacáuaido úritiaioi. Iemona biniemo ite Juzíñamuina ínoñedino afémacimo cacáreidiaioi. <sup>6</sup> Mei íadi cai Juzíñamui iédicai. Juzíñamuina onódimie caimo cacáreide. Mei íadi Juzíñamui íeñedimie caimo cacáreiñede. Afedo uafue uaina llófueinafuea onódicai; daje izói jífuetena llófueinafuea onódicai.

### *Juzíñamui izíruitimie*

<sup>7</sup> Izíruiga ámatiai, conímana cai izíruilla jitáirede; izíruillafue Juzíñamuimona bíteza. Nana izíruillafuiaredino Juzíñamui jitótiai. Afe llezica Juzíñamuina onódiaioi.

<sup>8</sup> Juzíñamui jamánomo izíruillafuiaina oruídímie, ie jira izíruillafuenidímie Juzíñamuina onóñede. <sup>9</sup> Juzíñamui daade ie Jitó ana éniemo orede afémiedo cáananona caimo íllena. Afedo ie caina izíruillafue caimo ácatate. <sup>10</sup> Afe óriado uáfuea izíruillafuea cai fidítate. Juzíñamuina cai duéruia nahí izíruillafueñede. Mei íadi afémie caina dúecaillano cáiconi ie Jitó ória, afe nahí izíruillafue. Ua Juzíñamui cai fiénidifuiái ícoinia cai jáinona duere finóllimiena ie Jitó orede.

<sup>11</sup> Izíruiga ámatiai, Juzíñamui daií caina izíruillamona, afe izói conímana cai izíruillafue jitáirede. <sup>12</sup> Juzíñamuina jaca buna cióñena; mei íadi conímana cai izíruia Juzíñamui cai comécimo ite. Afe illa dáaruído Juzíñamui izíruillafue caimo ñue riire comuíoicaide. <sup>13</sup> Juzíñamui dibénemo cai íllana, cai comécimo Juzíñamui íllana ónorede. Afena ie Ñuera Joreño caimo fecáinado onódicai. <sup>14</sup> Moo Juzíñamui ie Jitó orede afémiedo comini jíllloillena. Iena daní ciódicai. Afena jino uáfodo lloticai. <sup>15</sup> Nágamierie Jesús Juzíñamui Jitona onótatímie, jaca Juzíñamui díga ite. Daje izói Juzíñamui afémie comécimo ite.

<sup>16</sup> Daií Juzíñamui caina izíruillana fidítagacai. Aféfuea ínoticai. Juzíñamui jamánomo izíruillafuiaina oruídímie. Izíruillafuemo itímie Juzíñamuimo ite. Afe izói Juzíñamui afémie comécimo ite. <sup>17</sup> Daií jamánomo ñuera izíruillafue caimo comuíoicaide. Iemona íirairuimo facátalliruido ñue íena ínofiredinona íiticai. Mei Jesucristo bie éniemo ñue cáimamiena illa izói afe izói iticai. <sup>18</sup> Izíruinafueo jacíruillafue íñede. Mei jira ñue jáicina izíruillafue jácifuea jino orede. Mei jácifueo duere finótajano ite. Ie jira jacínaitímie ñue jáicina izíruioicaíñede.

<sup>19</sup> Cai Juzíñamuina izíruiticai, nano fueñe caina ie izíruilla jira. <sup>20</sup> Dámie daiíadi “Juzíñamuina izíruiticue” mei íadi afe llezica ie daano cómena éoia, afémie tánofueredimie. Uafue dámie ie ciona daano cómena izíruíñede, afe llezica cióñena Juzíñamuina izíruinide. <sup>21</sup> Juzíñamui caimo iga daa ocuífafue. Afe bie ocuífafue daide: “Juzíñamuina izíruitimie daje izói ie aino cómena izíruiri,” daide.

## 5

### *Cai dinena biniemo ite fiénidifuiaina anáfenoiticai*

<sup>1</sup> Nágamie Jesús Crístona ínotímie Juzíñamui jitó. Dámie come moona izíruitimie afe izói afe moo jitótiaína izíruite. <sup>2</sup> Moo Juzíñamuina cai izíruia, afe llezica ie ocuífafuea cai finóadi, Juzíñamui jitótiaína cai izíruillana ja ónoiticai. <sup>3</sup> ¿Minica Juzíñamuina izíruillafuea? Mei ie ocuífafuiaina jeire cai ua. Ie ocuífafuiái llégienide; <sup>4</sup> mei naga Juzíñamui jitó éniemo ite fiénidifuiaina anáfenorede. Ua cai ínuafuedo éniemo ite fiénidifuiaina anáfenodicai. <sup>5</sup> Dama Jesús Juzíñamui Jitona ínotímie éniemo ite fiénidifuiaina anáfenorede.

### *Juzíñamui Jitomo uai nabáillafue*

<sup>6</sup> Jesucristo jainoi die diga ciócaizaibitímie. Ie báutizaillaruimo Juzíñamui Jitona comini fidítagaiaioi. Afe izói ie tízaillaruimo, dama ie abi zóofiano, ie die tóillamona áfedo comini onótagaiaioi. Fia jáinoiñedeza, íadi jainoi die diga bite. Jesús Juzíñamui Jitónafuemo Ñuera Joreño uai nabáiraíma. Ñuera Joreño llogafue uafue. <sup>7</sup> Afe Jesús Juzíñamui Jitónafuemo damieámani uai nabáiraíma monamo ite: Moo Juzíñamui, Juzíñamuimona Uaillaí Lluáibitímie, Ñuera Joreño diga. Bie daámani come daináuai dáamiemo jainaide. <sup>8</sup> Eniemo daje izói daámani uai nabáiraíma ite: Ñuera Joreño, íemo Jesús báutizaja jainoi, íemo ie tíllaruimo totaca die diga. Bie daámanide dane dáamiede.

<sup>9</sup> Comini uai nabáillafue llínofiredicai, mei íadi Juzíñamui uai nabáillafue jamánomoide, ie jira ie Jitori uai nabáillafuena cai ínolle iere jitáirede. <sup>10</sup> Juzíñamui Jitona ínotímie bie uai nabáillafue dama ie comécido úcade. Juzíñamuimo ínoñedímie Juzíñamui tánofueredena cíotote, Juzíñamui ie Jitori uai nabáillafue dáinana ie ínoñena jira. <sup>11</sup> Afe daináfuedo Juzíñamui daide: zííñona cáanano afémie caimo iga. Afe cáanano ie Jitodo bite. <sup>12</sup> Juzíñamui Jitona comécido llínotímie afe zííñona cáanano ite. Mei íadi Juzíñamui Jitó comécido llínoñedímie afe cáanano íñede.

*Juan íraicaiño lluáfuiái fuizáillafue diga úrite*

<sup>13</sup> Ja Juzíñamui Jitona ínotíomoi. Jira bifue ómoimo cueticue zííñona cáanano ómoimo íllana omoi onóillena.

<sup>14</sup> Juzíñamui uáfue caimo cacáfirenana ínofiredicai. Daa minícana cai jicáadi ie comeci jítaina izói, afémie cai daina cacana onódicai. <sup>15</sup> Mei jira afémiemo cai úrillana Juzíñamui cacáfirenana onódicai. Afena onónamona cai jicácana afémie caimo fécana daje izói onódicai.

<sup>16</sup> Cómena títañeite fiénidifue ite. Dámie ie aino come afe fiénidifue fínuana cióadi, Juzíñamuimo afémieri jicari. Iemona Juzíñamui cáananona íemo fécaite. Títade fiénidifue ite. Afemo Juzíñamuimo omoi jicari daiñedicue. <sup>17</sup> Nana fiénidifuiái íaifue; come comécina títañeite. Mei íadi jíaie íaifue ite; afefue cómena títañeite.

<sup>18</sup> Juzíñamuina Móoredímie íaifuedo macáñedeza onódicai; mei Juzíñamui Jitó íena úíñoteza. Ie jira Taife íena ocuínide.

<sup>19</sup> Juzíñamui íedicaiza onódicai. Afe izói nana bínie comini Taife ocuícáfue anamo itíaióiza onódicai.

<sup>20</sup> Juzíñamui Jitó jaiái bíllana onódicai. Afémiedo ua nahí Juzíñamuina onótagacai. Afe Uámiemo jaináicana iticai. Afefue daiíacade Juzíñamui Jitó Jesucristo dibénemo iticai. Afémie nahí Juzíñamui. Afémiemo jaináicana cai íadi zííñona caina cáataite. <sup>21</sup> Jitótiaí, mai jánaraímo caimátaiñeno omoi iri; daje izói nana jíaie jífujete jóriaímona abi omoi rairuíri. Jae níe.

## MÉIFOIDIBE SAN JUAN CUEGABE

### Segunda Carta de San Juan

#### *Uafue íemo izíruillafue diga llóiticue*

<sup>1</sup> Ja éicomedicue; ocuiraímadicue. Jae Juzíñamui nizeca cue miringo izóidingodio. Bie rabe ómoímo cueticue naa o úruiairi. (Bimaci iglesia daina Juzíñamuimo gairífredino.) Naa o diga afémacina uáfuea izíruiticue, mei dama cúeñedeza. Nana uáfuea onódino daje izói afémacina naa ori izíruitiaioi. <sup>2</sup> Ñue uafue ícoínia ómoína izíruiticue. Afe uafue cai comécimo ite; ie mei afefue jaca ninomo cairi iite. <sup>3</sup> Moo Juzíñamui ie Jitó cai Ocuiraíma Jesucristo diga, ómoína cáimacaitaite. Afémie dúecaillano jamánomo izíruillafuea ómoímo llóite, naa comeci caimare uái illafue diga. Izíruillafuea uáfuea nana aféfuiaína cai onótate.

<sup>4</sup> O jitótiaimona dáarie uafue daina izói mácana fidídicue. Afefue cuena ióbitade, mei Moo Juzíñamui daíí cai ocuúdeza. <sup>5</sup> Miringo izóidingo cacai. Ja birui omo izire jicádíicue conímana cai izíruillena. Bie omo cuegafue comue ocuícáfueñede. Mei íadi afefue nanómona caimo ite. <sup>6</sup> Bie izíruillafue daííacade Juzíñamui ocuilla izói cai finóllena. Ja nanómona omoí cacana izói afe ocuícáfue daide: “Izíruillafuedo omoí macari.”

#### *Jífuerrairini ifue*

<sup>7</sup> Mei jíí, aillo jífuerridino bie éniado macádiaioi. Afémaci Jesucristo ua come izói bíllana uáitatiaioi. Daíítadímie jífuerriraíma. Afémie Crístona uáitaoide. <sup>8</sup> Afémiemona abi omoí rairuíoiri o táijnamona oga comeci ñúefue táinocaiñeillena. Iemo jíái afémiemona abí omoí rairuiri nana o táijina iba ñue Crístomona jaícina óllena.

<sup>9</sup> Níimie Cristo llogáfuemo comeciñeno nibéfodo jáidímie, afémie comécimo Juzíñamui ñede. Mei íadi Cristo llogáuaimo comeciídímie comécimo Moo Juzíñamui ite, ie Jitó diga. <sup>10</sup> Dámie ómoína llófuiabiadi, íemo bie Cristo llogáfuea atíñeniadi, íena uáidoñeno, jofe eromo llínoñeno omoí iri. <sup>11</sup> Iena uáidotímie, afémie lloga íaífue dáafuea llínoiteza.

#### *Fuizájidíuui*

<sup>12</sup> Omoína aillo daííacadicue, mei íadi rabedo cúeiacañedicue. Omoí dani conima uíécomo cue úrizaillena úiñoiticue. Afe daíí cai cáimafue jaícina íficaite. <sup>13</sup> Omoí ebuño izoide benomo ite iglesia daina Juzíñamuimo jaináidino daje izói Juzíñamui nizécamaci. Afémaci omo uai orédiaioi. Jae ñie.

## HIRAIBE SAN JUAN CUEGABE

### Tercera Carta de San Juan

#### *Gáyodo ñuefuena úritimaci*

<sup>1</sup> Ja éicomedicue, ocuiraimadicue. Cue izíruiga nabaimo bibe cueticue. Bímie mámeçi Gayo. Afémiena uáfueña izíruiticue.

<sup>2</sup> Cue izíruiga ama, ori Juzíñamuimo jicáfiredicue áfedo nana o finócafuiai ñue móonaillena. O abi caimare náireillena jicádicue, o joreño ñue nífuenina izói. <sup>3</sup> O ñúefuedo macáfírenafue dáarie ámatiaimona cue fídiamona, afe cuena iere ióbitade; mei ua onódicueza o jaca ñúefuedo macáfiredio. <sup>4</sup> Ua ie baimo cue ióbillena iñede. Afe cue cacana cue jitótiai uáfueño comécidíai; áferi jamánomo ióbidicue.

<sup>5</sup> Izíruiga ama, o illánomo ite ámatiaina o canóllena figura. Ie mei oni jíainomona bite ámatiaina o canóllena jamánomo ñuera. <sup>6</sup> Juzíñamui mámeçido gairídímaci uícomo íaioina o izíruillafue jino llotíai. Izire daidicue: Mai íaioi cano; íaioi jáilliruiño jitaica raana íaioina ine; áfedo caimare íaioi jáilleza. Ua Juzíñamuimo ióbillena izói íaioi cano. <sup>7</sup> Mei jira afémaci Jesucristo táijinafuedo jáizaidíai. Afe cánuana Juzíñamuina ónoñegamacimona llínoñediai. <sup>8</sup> Ie jira íaioi jitaica raana cai finóredíai, afémacina cai canóredíai. Afedo íaioi uáfueña llúana canódíai.

#### *Diótreres finino mácafue*

<sup>9</sup> Juzíñamui mámeçido gairífininomo cuegafue lluabe nauí orédicue, mei íadi Diótreres cai ocuilla riinona óiacañede, íaioi cígimo úicofiacadímie illa jira. <sup>10</sup> Ie jira cue jáiadi ie finini mácafue jino uáfodo onótaiticue, nana ie finini úrioinafue, ie táinofuerena caína uáitaoinafue diga. Ie mei afe baimo bitino ámatiaina afémie llínoñede. Afe llezica afe bitino llínoacadímacina rairuillano, afémie gairídímacimona íaioina jino jiude. <sup>11</sup> Izíruiga ámatiai, finini onótarafuíaído jáiñeno iri. Ñúefue finori. Ñúefueña finódímie Juzíñamui ímie, mei íadi íaifuiái finódímie Juzíñamuina jaca onóñede.

#### *Demetrio ñuera onótafue*

<sup>12</sup> Nana comini Demétriori ñue úritiaoi, mei afémie ñue mácafue uáfori cíóideza. Dani cai nane aféfuemo ñue uai nabáiraimacídíai. Iemona uáfueña cai daífírenana onódiomoi.

#### *Uai Fuizájillauai*

<sup>13</sup> Ona aillo daífacadicue, mei íadi rabelo cúeiacañedicue. <sup>14</sup> Ona raire cíoillena úiñoticue. Aféruido conima uícomo eróicana úriticoco.

<sup>15</sup> Começi caimare uái illáfuemo o iri. Benomo ite nabáñiaí omo uai orédíai. Izire daidicue nágamierie coco nabáñiaímo conima uícomo o uáidori. Jae ñie.

## SAN JUDAS CUEGABE

### La Carta del Apóstol San Judas Judas Juziñamui uáidoganomo cuete

<sup>1</sup> Jesucristo táijitagamie Júdadícue. Santiago ámadícue. Bibe Juziñamui mamécánomo cuetícue. Ua cai Moo Juziñamui uáidoganodiómoi, íeiena ñue finoda maiñócanomo omoí íllena. Jesucristomo omoí jaináinamona ñue eneno rairuícanodiómoi. <sup>2</sup> Mei Juziñamui jamánomo aillo caimo ie dúecaillafue, íemo jíái ñue uái omoí illífue, íemo jíái ñue izíruillafue, dígafue ómoímo llóíteza.

*Táínofuiaina llófueñredino*  
(2 Pe 2.1-7)

<sup>3</sup> Izíruiga ámatíai, cai comeci jíllóillífuedo izire ómoímo cúeiacadícue; mei afe jíllóillena Juziñamuimo cue íinua izoí, afe izoí íere ínotíomoíza. Mei íadí ómoína jíáífuedo rabedo llóredícue. Táínofuíai lluíáíbitino omoí jeire ogáfúena féítaíacadiáíoíza; ie jira izire ómoína daídícue: Ríire abí omoí mameri. Íaíoí díga fuírilla izoí omoí iri, omoí íinogafue íaíoí féítañeilleza. Afefue nauí nana Juziñamuimo jaináidinomo dácaíño iga. <sup>4</sup> Mei omoí cígímo ninena dámerie táínofue lluíáíbitiaíoí. Afémacina Juziñamui Cuegáuailai jaiái uícodo íaíoí olle duere finóllífúena lloite. Afémaci íáíbaníai. Afe ííñíai daíde: “Juziñamui ñúefúena jeire óíticai;” mei íadí afe dáínado rairuíñeno fiénidífúena íere nícidotiaíoí. Afémaci daíde cai Naama Juziñamuina ruífruítiaíoí. Daje izoí cai Ocuíraíma Jesucristo llogáuaina uáítatiaíoí.

<sup>5</sup> Mei ja onódiómoí íadí, como cue daííacanafuemo ómoína uibíoitaacadícue. Juziñamui Israel comínina Egipto éniemona oni orede. Oni uano daíí nana íaíoína ñue jíllotate. Mei íadí, íaíoí cígímona dáarie íñoñena jírrari, Juziñamui afe íñoñedinona jíáíruido niné táínocaitate.

<sup>6</sup> Afe izoí Juziñamui abí imácimona dáarie Juziñamui anamo ñue íaíoí illáfúena fáicanocaiacadiáíoí. Afe mei daní íaíoí illánona fáicanocaillano oni jíáínomo jáidiaíoí. Ie jira Juziñamui íaíoína íco izire íraícaíño íere jícánollíruimo íaíoína maítá jae íbaíca. Afémaci jae jíítinomo íere zábíñede llójejina maígáííoí.

<sup>7</sup> Daje izoí Juziñamui Sodoma jofue íemo Gomorra jofue díga bóotate, naa afe áinori íte jófúeniaírí. Mei afécuaí comíní Juziñamui abí imácimona fiénina jira dáarie llavécamací izoídiaíoí. Afe bimaci jamánomo daní jofo conímari ébecotaíírediaíoí. Naga Juziñamui comínimo mameca ñue illáfúena jíruíreíllena uáítaírediaíoí. Daíí íaíoí íllamona ziiño iraimo duere finócaííoí. Afe bifue, afémaci izoí cai íñeíllena, caimo cíotaga.

<sup>8</sup> Afe emódomo bie táino lluíáíbitino íaíoí táínomo comécíllafuíaido daní íaíoí abina bácadiaíoí. Daje llezica cai Ocuíraíma ríinona uáítatiaíoí. Caífo monamo íte jóriaí izoíde ríinoredinona íáíre dáííírediaíoí. <sup>9</sup> Mei íadí Juziñamui abí imácimona illaíma Miguel, Taífe díga fuírízaila llezica ñúefodo úrite. Tííde Moisés abina júfidotiaíllinoí. “¿Buna náamareíte?” daídíaíllinoí. Aféruimo Miguel íáírede uaido íena faidóñede, mei íadí fia íena daíde: “Ocuíraíma Juziñamui ona izire lléítaíteza,” daíde. <sup>10</sup> Mei bie táínodo llotínuaí íaíoí ónoñega ráfuedo fiení úrtiaíoí. Mei íadí comécina onóñede rílleníai izoí ítiaíoí. Fia íaíoí abí jíítaina ráfúemo comécíoidiaíoí. Daíí comécíillano áfeodo jáíllamona daní íaíoí niné táínocaitalliaíoí.

<sup>11</sup> ¡Níí íaíoína dúerena! Caín díbéfuedo jáidiaíoí. Aillo úcube óiacanamona Balaam izoí oni íaífuemo baíízaidiaíoí. Daje izoí jaiái íte Corena mámecíredímie, Moisés dotáacanamona niné táínocaitate naa íemo jaináidinori. Afe izoí biruí omoí cígírí íte fiénidífúiaí llotíno llícaítiaíoí. <sup>12</sup> Omoí finoca conímána izíruílla ráfúiaí cígírí meáíre

finódinona itíai. Juzíñamuina jacíruiño omoi cígiri caimare güillano jifáizaibitiai. Jiáimacina ñue úiñoño dani íaii abi úiñoñotíai. Jairifo oni niné ñaitaca mona úillie izóidiai. Ríaniaimona daana llizíllaruimo dúcide íadi llizíñede zena izóidiai. Afe izói bie comíni itíai. Afe amena are llizíñenia dúilla llezica aiñoda dotácaza. (Daje izói bimaci ráifiñenamona táinocaitíai.) <sup>13</sup> Monáillai jacire bagua izói itíai. Iaiimo ite meáire fiénidifuii bagua mulle izói, comíni eróicana jino ciotafirediaí. Daje izói úcuai íaii iómona oni jiáimomo féiraila izói itíai. Jamánomo jítirede jítinomo zíñona íllena riire mamécaiaí, dinomo duere zefuállena.

<sup>14</sup> Ua bimaciri jaiáidigima Enoc úrite. Adán jitó dinómona ie jitó, dinómona nane ie jitó, siete dígafue daí illa emódomo, bie Enoc mámeçiredimie jocoína. Afémie bie taino llófuetinodo uícodo úrite. Juzíñamui Joreño do úrillano daide: “Cai Ocuíraima jamánomo aillo ie abi náirairi bíllana ciódicue. <sup>15</sup> Afémie nana fiénide comínimo ite fiénidifuii iere riire jicánuaibite. Daje izói nana íaii íaire illáfuii iere jicánuano duere íaii ina finótaite. Fiénidino riire daináuaido cai Ocuíraimana uáitaoidiaí; bífuemona daje izói duere zéfuitalliaí.” Daí Enoc bie fiénidimacido úrite. <sup>16</sup> Afémaci iere fiéni cáillirediaí; ñue caimátaiñediaí. Dani íaii comeci fiéni jítainafuii jino denólledo úritiaí. Urillano aféfuiaína uáfueña finódiaí. Dani abi íaii ínua uáillaído ficire úritiaí, “Aillo jácimacídicaí,” daíllena. Daje izói caimare comínimo úritiaí, íaii ina bífuellena.

#### *Crístomo ínotino ñue lleta uailaí*

<sup>17</sup> Cue izíruiga ámatiaí, cai Ocuíraima Jesucristo orécamaci ómoína daináfueño omoi coméciri. <sup>18</sup> Afémaci ómoína daide: “Íco írairuillaído ñúefuiaína zánoitinona íteza. Iaii comeci íaire óiacanafuiaído íitiaíiza.” <sup>19</sup> Bimaci dánomo ñue itínomona oni eneno bózietaidiaí. Dani íaii abi óiacanafue jeire otíai. Mei afémaci Juzíñamui Joreño úicaiñegaiaíiza.

<sup>20</sup> Mei íadi izíruiga ámatiaí, omoi jeire Juzíñamuimona ogáfueño riire omoi jaináicairi. Daje izói Ñuera Joreño ríinodo Juzíñamuimo omoi úrifireiri. <sup>21</sup> Juzíñamui omoi izíruillafue dibéfuemo omoi iri. Cai Ocuíraima Jesucristo caimo dúecaillano zíñona cai illíruimo omoi úiñoiri.

<sup>22</sup> Nai jabóicana jizire ínotinona jaícina llóiri, ñúefueña jeire íaii ólleza. <sup>23</sup> Iráimona bairoca izói íaii ina jíllotari. Jiáimacimo omoi dúecairi; mei íadi íaii imo ite íaifuemo jíricaiño omoi iri. Afe fiénidifue íairede iniroi izoide. Iaii abimo jíideza; áfemona iere abí omoi rairuiri.

#### *Juzíñamuimo íraicaiño cai caimátailafue*

<sup>24-25</sup> Cai daade Juzíñamui jamánomo nágafuii baitádimie. Afémie Jesucristodo cai Jíllotaraima. Iemona cai fiénidifueño báíñelle rairuilla ríino íemo ite. Daje izói afémie caína íaifuenino caimare dama ie ebírede uíecomo caína izájirede. Afe Juzíñamuimo ebire ñúefuii íteza. Jamánomo ñuera ébifue íemo íteza. Daje izói nana ñuera ríino íemo íteza. Daje izói nana riire ocuállafuii íemo íteza. Nana bífuiaína cai Ocuíraima Jesucristodo nauí, íemo biruí, íemo jiáí uire daí jaca ninomo, Juzíñamuimo dúicaíteza. Maí. Jae ñie.

## IIRAIRUILLAIDO ITIFUIAI JINO CIOTAINA

### Juziñamui San Juaamo Jino Ciotagafue

### EL APOCALIPSIS

### O Revelación a San Juan

#### *Jesucristo jino onóitagafue*

<sup>1</sup> Bifue uire ítifuiái jino cíotainafue. Juziñamui bífuiaina Jesucristomo cíotate, afémie ie ocuífreganomo ácatallena. Daií Cristo uáfueña raíre ífcáitífueña jino íaíoi mo ácatate. Jesucristo ie ángel daína abí ímiedo bie jino cíotagana ie ocuífregamie Juaamo onótate. <sup>2</sup> Afe Juan nana ie cíónana uáfueña jino llote. Daje izói afémie Juziñamui lloga uaina nabáifrede. Afe Juziñamui lloga uai Jesucristodo ñue jaícina llócaiga. <sup>3</sup> Bie Juziñamuimona oga uaina jíáimacimo facáduana cacáño caimare itíai. Daje izói bie rabénicomo cuega uaina cacáillano ñue náfuéño caimare íóbitiaí. Mei bie rabénicomo llogáfuiái zúitirui ja ánozideza.

#### *Siete dígade iglésiai daína Juziñamuimo gáirifredinomo Juan cuete*

<sup>4</sup> Asia éniemo ite siete dígade iglésiai daína Juziñamuimo gáirifredinomo cueticue. Cue Juáadicue. Mai Juziñamui ñúefuiái dibénemo, naa ie caimare uái illafue dibénemo omoi iri. Mei afe Juziñamui birui itímieza, íemo jaca nanómona jaiaí itímieza, íemo uire jaca ninomo ítímieza. Daje izói ie ráirano uícomo siete dígade ñuera jóriai ite. Afe jóriai Juziñamui Ñuera Joreño jana. Afémie ñúefue dibénemo omoi iri. <sup>5</sup> Iemo daje izói Jesucristo lloga ñúefuiái jeire omoi oíri. Afémie jíáifo méidofinide uai nabáiraíma. Daje izói afémie nano tíllanomoná abido meine tíñellena cáatagamie. Iemo jíái aféniemo bínie illáicomini ocuilla ríino ite. Afe Cristo caina izíruillano ie totaca díedo caí fiénidífuiaina oni dote. <sup>6</sup> Iemo nane illáicomínina caina itátate ie Moo Juziñamuimo caí jaináillena. Daje izói comínido Juziñamuimo úrifredinona caina jóonete. Afe Juziñamui íena jóonegacái. Ie jira jaca ninomo áillue ébifue naa ocuilla ríino díga afémie íena íteza. Aquíe izóideza.

<sup>7</sup> ¡Ero, Cristo mona uílliedo bite! Nana comíni íena cíotiaí. Daje izói ie fatino íena cíotiaí. Iemo nana bínie naíraí afémie bíllana cíóillano éenaitiaí. Jíi, uafue daítadeza.

<sup>8</sup> Caí jamánomo riire Ocuídímie bie izói daíde: “Nana ráfuiái naí cómuíñenia uícodo itímiedicue. Daje izói fuizájillanomo itímiedicue. Abecedario A-do táinia izói nánoramiedicue. Daje izói abecedario Z-mo fuizailla izói íraíamiedicue,” daíde. Afémie birui itímie, íemo jaca nanómona itímie, íemo uire jaca ninomo ítímieza.

#### *Ebírede Cristo nicáirilla izói ciona*

<sup>9</sup> Omoi ama Juáadicue. Omoi duere zefuilla izói daane duere zefuídícue. Daa omoi izói Juziñamui illáimana illánomo jaináidícue. Iemo Jesucristo omoi úiñotaja izói daa omoi díga úiñotagacue. Jesucristodo fairíotaga Juziñamui ñuera uai jino cue llócailla jira llavécacue. Pátmosmo mámecirede monaillai cigí ídumo llavécamiedicue. <sup>10</sup> Iemo aféno mo caí Ocuíraíma caí ocózinaitaruimo Juziñamui Ñuera Joreño náamatagacue. Afe llezica vudugoi fúunua izoide ficírede uaina cue méifomo cacádicue. <sup>11</sup> Afe uai cuena daíde:

—Naga ráfuiái uícodo itímiedicue. Daje izói fuizájillanomo itímiedicue. Abecedario A-do taineca, íemo Z-mo fuilla izóidímiedicue. Mai nana o ciona díga daa rabénicomo cúeiri. Cuiano, Asia éniemo ite siete dígade iglésiai daína Juziñamuimo gáirifredinomo o oreri. Afe jófueniaí mámeciaí: Efeso, íemo Esmirna, íemo Pérgamo, íemo Tiatira, íemo Sardis, íemo Filadelfia, íemo Laodicea, —daíde.

<sup>12</sup> Bu cuemo úrilla dai'llena abido gírecaidicue. Gírecaillano, siete dígade oro finoína mechérana ciódicue. <sup>13</sup> Afe cígimo cómemona comuídimeña eróidena ciódicue. Afémie jitáogaroí éiba ícoimo dúcide. Ie jogóbemo lláidife oro finoína. <sup>14</sup> Afémie ifótirai iere úzerede, jaillici úzerena izóí úzerede. Iemo jiái nieve izóí úzerede. Ie ui irai bóua izóí cíoide. <sup>15</sup> Afémie éiba ñue queníretaga bronce izóí quenírede. Ua bronce iraimo ruílla lezica jamánomo quenírena izóí, ie idai quenírede. Iemo aillo imánillai nofíco tua ficírena izóí ie uai ficírede. <sup>16</sup> Afémie onoi nabézimo siete díga ucudu llíide. Ie fuémoma iere jáirede llojéfaí izoide raa jino billa; afefai nágafene jáirede. Ie uiéco jitoma iere riire egáíñua izóí riire egáíñote.

<sup>17</sup> Afémiena cíoillano, ie anamo tídimie izóí baiídicue. Mei íadi afémie ie nabezi cuemo bíitano cuena daide:

—Jacíruiñeno o iri. Cue bie nanóidimedicue; dáamedicue fuizájillanomo íitimedicue.

<sup>18</sup> Birui cáadimedicue. Mei nauí tídicue, mei íadi birui jaca ninomo cáaiticue. Tíilla zuitara llave izoide raa cuemo ite; daje izóí tíidino illano lláveniai cuemo ite. <sup>19</sup> O ciona díga mai cúeiri; birui itífuiiai cúeiri, íemo uire cómutifuiiai cúeiri. <sup>20</sup> Cue nabézimo o ciona siete dígade ucúduai rafue nauí báinino ite. Ja birui jino uáfodo llórede; daje izóí siete dígade mechera rafue llórede. Afe siete dígade ucúduai siete dígazie Juziñamuimo gairídino uai llócaítino jana. Iemo afe siete dígade mechera siete dígazie Juziñamuimo gairífredino jana, —daií afémie cuena daide.

## 2

*Siete dígade iglésiai daina Juziñamuimo gairífredinomo lollíuai: Efésomo ite ñnotinomo llogáuai*

<sup>1</sup> Cue cíonamie dáanomo cuena daide:

Efésomo ite Juziñamuimo gairídino úiñoraimamo bíuai cúeiri: “Afe nabézido siete dígade ucúduai llíidime daje izóí siete dígade oro finoína mechera cígido macáfiredo. (Afémie mechera cígido mácafírena izóí, comini ñue úiñolle jana.) Afémie afe úiñoraimana bie izóí daide: <sup>2</sup> Nana o finócafuiaina onódicue. O riiredemo táijidíozá onódicue, naa o comeci járitaiñedeza. Daje izóí fiénidino fiéni illáfuiaina iere izire o rairuíllana onódicue. Iemo jiái táinona “Jesucristo orécanodícaí” daidínona facátatíozá onódicue. Afemona afémaci táino llúana baitíozá. <sup>3</sup> Jaca o comeci járidoñedio, íemo iere cuedo o táijina lezica cue ícoínia iere duere zefuídíozá. Afe lezica zefuíruiñeno ñue táijidí. <sup>4</sup> Mei íadi daa figóñedífueña omo ite. Nano fueñe cue o izíruilla izóí birui cuena izíruíñedio. <sup>5</sup> Ie jira ninómona oni nibéfodo baiídíozá comeci uibi. Mai omo itífue méidori. Fueñe o illa izóí o iri. Bífueña o méidoñenia omo raire bíitídicue, omo ite egáíñote raa oni óllena. <sup>6</sup> Mei jiáifodo, daa ñúefueña nai omo ite. Afe nicolaítas fiéni finócafuiaimo naa íaíoi fiéni jiáifodo llógamo éoícana eróidí. Cue daje izóí áfena éoidídicue. <sup>7</sup> Ñuera Joreño Juziñamuimo jaináidínona dáinamo cacáacadimie áfemo cacai. Afe Ñuera Joreño bie izóí daiíacade: “Fiénidena anáfenodínona jáidímacína Juziñamui nífueninanomo ite cáatate amena llizíllana güitátaitídicue,” daide.

*Esmírnamo ite ñnotinomo llogáuai*

<sup>8</sup> Daje izóí Esmírnamo ite Juziñamuimo gairídino úiñoraimamo bíuai cúeiri: “Nanóidime dáamie íraimíena ómoimo úrite. Nauí bíniemo tídimie, íemo meine abido nane cáadimíena jaide. Afémie ona daide: <sup>9</sup> Nana o finócana onódicue. Daje izóí o duere zefuíllana onódicue, naa o ráanina díga. Mei íadi uáfueza Cristo dibénedo iere ráaredí. Jiáimaci fiéni omo úrillana onódicue. Afémaci, “Juziñamui nízeza Judíodícaí” daidíaiíoi, mei íadi íeñediaíoi. Afémaci dani Taife dibénemo jaináidíno. <sup>10</sup> Duere o zefuíllemo jacinaiñeno



o iri. Mei ómoimona dámierie Taife llavéracomo llavétaiteza, nana omoi facátallena. Daií omoi comeci ifue onóillena facátalliomoi. Diez dígarui duere zefuirediomoi. Mei íadi o tíllinomo zóofeñeno ñnofireiri. Daií o íadi zíñona cáallena o jirídotaiticue. <sup>11</sup> Ñuera Joreño Juzíñamuimo jaináidinona dáinamo cacáacadimie mai áfemo cacai. Afe Ñuera Joreño bie izói daiíacade: “Fiénidena anáfenodinona jáidimaci nane méifodo tíllamo raamo jírñeitíaiói,” daide.

*Pérgamomo ite ñnotinomo llogáuai*

<sup>12</sup> Daje izói Pérgamomo ite Juzíñamuimo jaináidino úiñoraímamo bíuai cúeiri: “Afe nágafene jáirede lloefai llíidimie bie izói ona daide: <sup>13</sup> Nana o finócana onódicue. Afe izói Taife ocuícano cígimo itioza onódicue. Afénomo itio íadi zóofeñeno cuemo ñue o ñnuana onódicue. Daje izói cuemo o ñnuana fáicanocaiñedio. Afe izói Antipas mámeciredimie cue ñue jaícina cue uai nabáifiredimie. Afémie omoi cígiri fatíaiói. Ie fáinaruido, cuemo omoi ñnuana zóofeñediomoi, Taife illánomo itiomoi íadi. <sup>14</sup> Mei íadi cue lletárafuíaína ómoimo ite. Omoimona dáarie jadí Pérgamomo Balaam llófuiana fáicanocaiacañediaói. Afe Balaam jaiái Balacna llófuete Israel comíni fiéni fínuaillena. Afe Balac Balaam llófuiamona Israel comínina jánaraimo fecaca rílleniaina ritátate. Afe dáaruido afémacina iere jiruítetade. <sup>15</sup> Nane jáie cue lletárafuena ómoimo ite. Omoi cígimo dáarie afe nicolaítas lloga uaina féitaiacañedino ite. Afémacina éoidicue. <sup>16</sup> Ie jira mai omoi comeci ifue méidori; mei íadi omoi méidoñenia, raire omoi díga fuirízaibitícue. Uáfueza cue fuémona bite jáirede lloéfaido omoi fiéni finódinona fáziaibitícue. <sup>17</sup> Ñuera Joreño Juzíñamuimo jaináidinona dáinamo cacáacadimie, áfemo cacai. Afe Ñuera Joreño bie izói daiíacade, “Fiénidena anáfenodimiena jáitimie afe báinino ite maná daina monámona cocide güillena güitátaiticue. (Bie maná Juzíñamui íaiói comécina náiretaillena jana.) Iemo afémiemo úzerede nofitofena fécaíticue. Afe nofitofemo buna ónoñega comue mámecei cuelle. Dama afe nofitofe llínoitimie áfena onóille.” Aquíe izói daide.

*Tiatíramo ite ñnotinomo llogáuai*

<sup>18</sup> Daje izói Tiatíramo ite Juzíñamuimo jaináidino úiñoraímamo bíuai cúeiri. “Juzíñamui Jitó ómoimo úrite. Afémie ui irai bóua izoide, íemo ie éiba ñue queníretaga bronce izói quenírede. Afémie bie izói ómoína daide. <sup>19</sup> Nana omoi finócana onódicue. Cuena omoi izíruillana onódicue, naa cuemo omoi ñnua díga. Daje izói cue dibénedo ñue omoi tájicaillana onódicue, naa omoi comeci járitaiñena díga. Fueñe omoi táinia baímo birui jamánomo finócaidiomoi. <sup>20</sup> Mei íadi ómoimo daa cue lletárafuena nai ite. Afe Jezabel mámeciredingo llógana rairuíñediomoi. Afengo, “Juzíñamui dibénedo úriticue,” daiífirede, mei íadi fiéni ie llócaigafuedo cue ocuífíreganona jífuete. Afe jífuia uaido íaioína iere jiruítetade. Daje izói jánaraimo fecaca rílleniaina íaioína ritátate áfemo caimátaillena. <sup>21</sup> Aféngomo are úiñoidicue afengo comeci ifue méidollena. Mei íadi afengo áfena méidoacañede. Afengo ie jiruífueña fáicanocaiacañede. <sup>22</sup> Mei jira birui afémaci afengo finócafuena fáicanocaiñenia, aféngona iere izire iráretaiticue. Daje llezica nana afengo díga jiruiredinona duere zefuítaiticue. <sup>23</sup> Afengo úruiaína títaiticue. (Afe úruiaí daina afengo llógamo jíeruitino.) Afemona naga come ífoci úrillana, ie comeci ifue díga ñue ícoímo cue onónana, nana Juzíñamuimo gairídino fídítíaiói. Iemo ómoimona illa dígamie fiéni omoi fínuaize ómoína duere fínoíticue. <sup>24</sup> Mei íadi ómoimona Tiatíramo ite jáíimaci afe Jezabel omoi llófuiá fiénide uaina náfueñediomoi. Afe Jezabélmo jaináidino íaiói llófueinana daidíaiói, “Cai llófueina uai Taife ie, iere báinide nai uáfodo ónonidífuiaí,” daidíaiói. Afe llófueinana onótañegaomoi. Iemo ómoimo ite nauí cue lloga baímo jáíiena ómoína ócuiñeitícue. <sup>25</sup> Daa bie llóitícue: Omoimo ite ñúefuíaí ñue rairuiri, nai cue bíñeille

dino. <sup>26</sup> Fiénidena anáfenodinona jáitina náiraiaí ócuitimacina jóneiticue. Afémaci cue jítainana ñue ícoimo fuitádino. Ocuille ríino íaioimo jóneiticue, <sup>27</sup> mei daí cue Moo cue ocuille ríinona cuemo jóneteza. Iemona náiraiaína riírede lloébici izóidedo riire ócuitiaíoi. Iaioimo cacáreacañedinona icírui lláia jéenino llairúngotailla izóí, afe izóí íaioina duere fínoitiaíoi. <sup>28</sup> Daje izóí monáiracudu iere ebire egáñua izóí, afémacina ebire fínoiticue. <sup>29</sup> Ñuera Joreño Juzíñamuimo jaináidinona dáinamo cacáacadimie mai áfemo cacai.” Aqué izóí daide.

### 3

#### *Sárdismo ite ñnotinomo llogáuai*

<sup>1</sup> Daje izóí Sárdismo ite Juzíñamuimo jaináidino úñoraímamo búai cúeiri: “Afe siete dígade Juzíñamui jóriaredimie, ñí afe Juzíñamui Ñuera Joreñoredimie Cristo, íemo afe siete dígade ucúduai llíidimie dáamie. Afémie bie izóí ona daide: Nana o finócana onódicue. Crístomo o jainaina izóinado jica jalleide, íadi onódicueza tíidimie izóí itio. <sup>2</sup> Come cazilla izóí mai abina onoiri. Nai omo due jiza fiévide ñnogafuiaína meine riire finori, mei aféfuiaí jae táinocaiacadeza. Eróidicuemo o finócafuaí cue Juzíñamui eróicana ñue jaícina jóñedeza. <sup>3</sup> O fueñe ñnoga íaíoi llófuiamo uibóicairi. Afena jeire o oíri. Afe llezica o comécimo itifue ñúefuena méidori. O abina ñue onóñenia, merírifiredimie ónonino billa izóí, duere omo fínuaibiiticueza. Cue billíruina óñoñeitio. <sup>4</sup> Mei íadi ómoimona jadí Sárdismo dáarie comécina ñúemacina ite. Afémaci iníroina íaíñedino izoide. Afémaci úzecuiruai jitada cue díga jáitiaíoi, mei afe daí íaioimo dúideza. <sup>5</sup> Fiénidena anáfenodinona jáidino úzecuirona jítaitiaíoi. Iemo zíñona cáaitino mámecei cuiánicomona íaíoi mámeceiaína dóñeiticue. Iemo daje izóí cue Moo Juzíñamui uícomo “Bie cúemaci” dáititicue; daje izóí ie abi imaci ángeles daínamací uícomo “Bie cúemaci” dáititicue. <sup>6</sup> Ñuera Joreño Juzíñamuimo jaináidinona dáinamo cacáacadimie mai áfemo cacai.” Aqué izóí daide.

#### *Filadélfiamo ite ñnotinomo llogáuai*

<sup>7</sup> Daje izóí Filadélfiamo ite Juzíñamuimo jaináidino úñoraímamo búai cúeiri: “Afe ñíifuenidimie omo úrite. Afémie uáfuena úrifiredimie. Afémiemo jiaí illaíma David naze tuiñora llave ite. Afémie Juzíñamui illáimana illano tuiñoadi buna íbáinide. Daje izóí afémie íbáia, buna zuitánide. <sup>8</sup> Bímie bie izóí ona daide: Nana o finócana onódicue. Buna íbáinide túide naze o uíecori jóneticue. Mei figo maíriñedio, íadi cue uaina náfuetio; cuena jaca jáanofinidio. <sup>9</sup> Iemona Taífemo jaináidinona o anamo caiñícido ana íaíoi dújutano óreiticue. Afémaci táinona úrillano bie izóí daífrediaíoi: “Caí bie Juzíñamui ñizeca judíuaidicai” daidíaíoi, mei íadi íeñediaíoi. Nana baimaci o anamo dújutaiticue, íemona ona cue izíruillana fídítiaíoi. <sup>10</sup> Cue ocuica uai jeire o úamona aféuai daína izóí comécina járidoñedio. Ie jira nana biniemo bite facátalliruimona ona ñue ráruiticue. Aféruído nana biniemo ite comini facátalliaíoi. <sup>11</sup> Raíre biticue. Omo ite ñúefuiaí ñue rairuiri, o jirídolle raa bu báiroñeilleza. <sup>12</sup> Fiénidena anáfenodinona jáitina cúeiena máíñoiticue. Máíñuano cue Juzíñamui gairíracomo ite maíride jáilliraí izóí íaioina óreiticue. Iemona Juzíñamui illánomona jaca jino jáíñeitiaíoi. Iaioimo cue Juzíñamui mámecei cúeiticue. Daje izóí cue Juzíñamui jofue mámecei íaioimo cúeiticue. Afe jofue mámecei “Comue Jerusalén.” Afe jofue cue Juzíñamuimona caífo monámona ana bite. Daje izóí afe fiénidena anáfenodinomo cue comue mámecei cúeiticue. <sup>13</sup> Ñuera Joreño Juzíñamuimo jaináidinona dáinamo cacáacadimie mai áfemo cacai.” Aqué izóí daide.

#### *Laodicéamo ite ñnotinomo llogáuai*

<sup>14</sup> Daje izói Laodicéamo ite Juzíñamuimo jaináidino úiñoraimamo bíuai cúeiri: “Uáfuenta llotímie omo úrite. Afémie jaícina uai nabáifiredimie; daje izói jaca méidoñeno uáfuenta úrifiredimie. Afémie nana Juzíñamui finócana tainérama. <sup>15</sup> Afémie bie izói ona daide: Nana o finócafuiaina onódicue. Ráairuillano figo o ínoñenana onódicue. O ínoga ñue uzírediji izóiñede. Daje izói o ínoga caimare mánaidiji izóiñede. Ñue o uzírenana jitáidicue, ñibai jiáifodo o mánaínana jitáidicue. <sup>16</sup> Mei íadi jabo uzírediji izóidío. Iemona jabo uzírediji jino tua izói ona jino dótaiticue. <sup>17</sup> Bie izói daiífiredío: “Ráaredimiedicue,” daidío. Iemo “Nana cue illafue ñue jóide. Cue jitaica raana íñede,” daiífiredío. Mei íadi jiáifodo o íllana onóñedio. Juzíñamui eróicana bu cáimadoñegamiedío. Iemo daje izói iere duere zefuítagao, íemo iere dúeredimiedío, íemo uina cíoiñedimie izóidío. Iemo jiái inícuironino emuíromade izóidío. Afe bie izói o íllana jaca onóñedio. <sup>18</sup> Mei jira omo llóiticue, “Iraimo ñue finoca órona cúemona íba, uáfuenta ráaredimiena o jáillena. Daje izói cúemona úzerede inícuirona íba, o meáire emuíromana íbáillena. Daje izói ui manórajina cúemona íba, o uimo jóniamona ñue o cíoillena. <sup>19</sup> Nana cue izíruiganona lletádicue; daje izói íaioina duere finódicue ñue íaioi íllena. Mei íemona Jesucristomo izire o jaináicaillano, iere o ínofireiri. O comeci ífuiái méidori, ona duere cue finoiza. <sup>20</sup> Ero cacai, come comeci naze ízoinamo iticue. Dinómona jíiriticue. Cue uaimo cacáreitímie ie naze tuiñóadi cue llínollena, afémie illánomo jofo jáiticue. Jaillano dájena afémie diga nabáiriticue. Daje izói conima diga caimare úriticoco. <sup>21</sup> Fiénidena anáfenodinona jáitínona, illáimana cue ráiiranomo afémiena cue diga ráitaiticue. Mei daií fiénidena cue anáfenamona cue Moo illáimana ráiiranomo ráinazaidicueza. <sup>22</sup> Ñuera Joreño Juzíñamuimo jaináidinona dáinamo cacácadimie, mai áfemo cacai.” Aquíe izói daide.

## 4

### *Monamo Crístomo lloga cáimafuiái*

<sup>1</sup> Bie méifomo éroidicuemo, monamo ite naze túinana ciódicue. Fueñe cue cacana uaina meine nane cacádicue. Afe uai vudugoi ficirena izói cacaide. Afe uai cuena daide:

—Caífo benomo bi. Bífuiái méifomo raire cómuitifuiaina omo ácataiticue, —daide.

<sup>2</sup> Afe llezica Ñuera Joreño anamo itábicaidicue. Iemona monamo ite illaíma ráiiranona ciódicue. Afénomo dáamie ráiinana ciódicue. <sup>3</sup> Afémie iere quérede ‘jaspe’ daina ráifide nofiji izói éroide. Aféjina jiáifo daina ‘cornalina.’ Afe ráiirano abido rózigüeo nágafene ífoina ite. Afe rózigüeo ‘esmeralda’ daina ráifide nofiji quenírena izói quenírede. <sup>4</sup> Iemo afe ráiirano abido veinticuatro diga jiáie illaíma ráiiranuaina nágafene ífoina íllana ciódicue. Afénuaimo veinticuatro diga mona ero ocuide éicomini ráiidiaioi. Afémaci úzerede iníroillai jitádiaioi. Iaiói ífomo oro finoina illaíma jitáfiregacuifoí jíiena. <sup>5</sup> Afe áillue ráiiranomona aillo boride. Afe llezica afénomona iere ficire mona gíría cácaide. Iemo afe ráiirano uícomo siete dígade áillue bobáieniai bóoide. Afe siete diga bóoide bobáieniai Juzíñamui Ñuera Joreño jana. <sup>6</sup> Dáanomo afe ráiirano uícomo, daa monáillaina eroide illa. Afe monáillai anáfenemo ñue cíoide vidrio izoide.

Afe ráiirano abido cuatro diga cáadimíai ífoina itíaioi. Afémaci erófene dibénemo aillo uíjiaí ite. Daje izói emodo dibénemo ite. <sup>7</sup> Bimácimona daa jánallarina eroide. Iemo jiáie juráreto íltona eroide. Iemo jiáie uíeco, come uíecona eroide. Iemo jiáie feede máajaiñona eroide. <sup>8</sup> Afe cuatro diga cáadimíaimo illa dígamíemo seis diga íaicuai ite. Afe íaicuai erófenemo uíjiaína oruide; daje izói emodo dibénemo ite. Afémaci mona naio diga llícaíñeno úritiaioi; Juzíñamuina daiíoidiaioi:

¡Iere íaífuenidío! ¡Iere íaífuenidío! ¡Iere íaífuenidío!

Iere ñuera caí Ocuíraimadio.

Jamánomo ríinorede Juzíñamuidío.

Jaca nanómona itímiedio,  
Iemo nai birui itímiedioza,  
Iemo uire jaca ninomo ziiñona íitímiedioza, —daíí daííofirediaioi.

<sup>9</sup> Illa dígacaiño afe cáadimaci, ráiiranomo ráiide Moo Juziñamuimo ebíredifue nitáadi, íemo ñúefue jóoneadi, íemo jíái figura íena dáíadi, <sup>10</sup> afe llezica afe veinticuatro díga ocuide éicomini áillue ráiiranomo ite Juziñamui anamo dújufirediaioi. Iemo afe jaca ninomo ziiñona itímiena caimátaidiaioi. Afe llezica íaioi oro finoina illaíma ifo icuífuaí ráiirano uícomo jóonefirediaioi. Jóneta daíífirediaioi:

<sup>11</sup> Cai Ocuíraíma Juziñamui,  
Iere ebíredifue omo nitáregaza,  
Daje izói ñúefuaí omo jóonefirediaioi.  
O jamánomo ríinorenana omo nitáregaza.  
Nana aféfuaí ona náamaredeza.  
Mei naga ráaniaí o comuítaga.  
Iemo o comeci jíitaina izói itíaioiza.  
Daje izói o comeci óiacanamona finócaiaioi.  
Aqué izói daíífirediaioi.

## 5

### *Ráiidimie líliga rabénicono ciódicue naa Cordero daínámie Cristo díga*

<sup>1</sup> Afe méifomo illaíma ráiiranomo ráiidimie nabézimo ite rabénicono ciódicue. Afénico ferínoga rabe. Erófenemo cuega, daje izói jinófenemo jíái cuega. Afénico siete díga sello daína ñue ibaira raado ibaica. <sup>2</sup> Iemo riírede ángel daína Juziñamui abi ímiena ciódicue. Afémie ficírede uaido jícanofiredie; daide:

—¿Bie sello mei cuatállena bu ñuena? ¿Bumo ñue dúide binico tuiñóllena? —daide.

<sup>3</sup> Mei íadi afénico tuiñoitímiena íñede. Caífo monamo íñede. Bíníemo íñede, íemo bíníe anamo tíidino illánomo jíái daje izói íñede. Daje izói afénícomo buna eróinide afe facádollena. <sup>4</sup> Afénico tuiñoite comécina ñúemiena baiñenamona iere éedicue. Daje izói afénico facádoitímie íñenamona, íemo jíái afénícomo eróillano ónoitímie íñenamona, iere éedicue. <sup>5</sup> Iemona veinticuatro díga eicomínimona dámie cuena daide:

—Mai benómona éeñeno o iri, mei Judá nairaí illaíma Jánallarina mamécámie, fiénidena jae ñue anáfenotateza. Afémie jaiaí illaíma David erófene ígímamona comuídimie. Afe íe anáfenuamona afémie binico tuiñolle ríino ote. Daje izói afe siete dígade sello cuatalle ríino íemo ite, —daide.

<sup>6</sup> Iemona afe ráiirano cígimo, íemo afe cuatro díga cáadimíiaí cígiri, íemo afe veinticuatro díga éicomini cígimo, Cordérona mameca Crístona ciódicue. Afémie táide, mei íadi Juziñamuimo ía fecállena íe íaioí fáina meífo cíoide. Afe Cordero siete díga zícáirede, íemo íe íe siete dígade. Afe siete dígade uíjiaí naga éníaímo oreca Juziñamui Ñuera Joreño jana.

<sup>7</sup> Afe Cordero illaíma ráiiranomo ráiidimie nabézimo ite rabénicono líínuaíde. <sup>8</sup> Afémie afénico líínua llezica afe cuatro dígade cáadimíiaí, íemo afe veinticuatro dígade ocuide éicomini afe Cordero anamo dújudiaioi. Afe eicomínimona illa dígamie ‘arpa’ daína rua roia taiga raa lííediaioi. Daje llezica afémaci oro finoina ugúciaína oruide íhecoí lííidiaioi. Afeniaí Juziñamuimo jaináidino afémíemo jícara uailaí jana. <sup>9</sup> Afe éicomini bie comue rua rotíaioi:

O íere comécina ñúemienamona bie rabénico líínota tuiñolle omo dúide.  
Mei nauí Juziñamuimo fatá fecácamedioza.  
Caina o díe tóillado Juziñamui íena íbádiaioza.  
Uáfueña nágaziemona,

Iemo nana jíáifo úritinomona,  
Iemo naga comini jófuiamona,  
Iemo nana náiraiamona Juziñamui íena caina ibáðioza.

<sup>10</sup> Cai Juziñamui ie illáinina caina jáitatio;

Daje izói cominado Juziñamuimo úrifreitnona caina jóonetio;

Iemona énie náiraiaina ócuiticai.

Aquíe izói rotíaiói.

<sup>11</sup> Afe mei eróðicue. Iemo aillo afe illaíma ráiiranomo ífoina ite ángeles ðaina Juziñamui abi imaci úrilla uaina cacáðicue. Daje llezica afe cuatro ðiga cáadimíai uaina cacáðicue. Iemo dáaruído éicomini uaina cacáðicue. Afe Juziñamui abi imaci iere jamánomo aillo itíaiói. Ua millones y millones dáinaze itíaiói. <sup>12</sup> Afémaci fíçirerie úritíaiói; ðaídíaiói:

Fatá Juziñamuimo fecaca Cordero comécina iere ñúenamona ñuera ríino maiñolle afémiemo dúide.

Daje izói aillo ráifide ráaniai dáamiemo dúide.

Iemo ifoci déillafuiái dáamiemo dúide.

Iemo nana ñuera máirie dáamiemo dúide.

Iemo nitárega ñúefue dáamiemo dúide.

Iemo ñuera ébifue dáamiemo dúide.

Iemo aillo afémiemo camátaille uai afe Cordéromo dúide.

<sup>13</sup> Afe llezica nana Juziñamui comútaganuiái úrilla uaina cacáðicue: nana monamo itínuiai, daje izói éniemo itínuiai, daje izói énie anamo itínuiai, daje izói monáillaimo itínuiai, naa afénuiaimo itínuiai úrilla uaina cacáðicue. Ðaídíaiói:

Nana camátaille uailai illaíma ráiiranomo ráiide Moo Juziñamuimo íredeza,

Daje izói jíai Cordéromo íredeza.

Afe izói ñúefue afe íaillinoimo nitáredeza, naa ñuera ébifue ðiga,

Iemo ñuera ríino íaillinoimo íredeza.

Nana aféfuiai íaillinoimo nana fimónaiáido, jaca ninomo zíñona ðaí ðaírenaza.

<sup>14</sup> Iemo afe cuatro ðiga cáadimíai aiáirilla izói ðaídíaiói:

—¡Ðaítadeza! —ðaíoiñírediaíoi.

Iemo afe veinticuatro ðigade éicomini ana dújuillano, jaca ninomo zíñona cáadimiemo camátaioiñírediaíoi.

## 6

### *Siete ðigade sello ðaina rabénico íbaira rafue*

<sup>1</sup> Cordero afe siete ðigade séllomona nánora tuíñuana cióðicue. Daje llezica cuatro ðigade cáadimíaimona dáamie dáinana cacáðicue. Ie úrilla uai, mona gíria fíçirena izói fíçirede. Ðaíde:

—Mai eróizaíbi, —ðaíde.

<sup>2</sup> Cue eroilla llezica úzerede cabállona cióðicue. Afe emódomo ráiicaiðimie zicuirá líicaide. Iemo illaíma ífo icuífoina ie jítadíaiói. Jita mei afémie naga náiraina anáfenocana jaide. Ie mei nágaruilláido afémie íaioina anáfenofirede.

<sup>3</sup> Méifoide séllona Cordero cuata llezica, tórna éroide cáadimie úrillana cacáðicue. Afémie:

—Mai eróizaíbi, —ðaíde.

<sup>4</sup> Afe llezica jíairede caballo jino bíllana cióðicue. Afe emódomo ráiicaiðimiemo féitalle ríino afémiemo iga. Afémie nana nairai camare uái illa féitaite, comini conimana fazítallena. Afe llezica áillue lloébicina afémiemo iga.

<sup>5</sup> Iemo Cordero nane jíaie tercer ðaina sello cuata llezica, jíaie cáadimie úrillana cacáðicue. Afémie:

—Mai eróizaíbi, —ðaíde.

Jira eróidicue. Eróidicujemo daa jítirede cabállona ciódicue. Afe emódomo ráiicaidimie mérenana onóillena facara raa llíicaide. <sup>6</sup> Iemo cáadimíai cígimona dáamie úrilla uai cacádicue. Aféuai daide:

—Daa kilo trigo daa mona táijina fidi. Iemo daámani kilo cebada daa mona táijina fidi. Iemo aceite vino diga jaca jeruúredeza, mei afe iballe úcube iñédeza, —daide.

<sup>7</sup> Afe mei Cordero jíáie ‘cuarto’ daina sello cuata llezica, cáadimíaimona íraimie úrillana cacádicue. Afémie:

—Mai, eróizaibi, —daide.

<sup>8</sup> Eróidicujemo borárede cabállona ciódicue. Afe emódomo ráiicaidimie titáfiredimie dainámie. Afémie óodana tíidino illano jana maméidimie bite. Enie cuatro diga fecácamona dáanie íemo iga, afénomo riire ocuúllena. Afénomo comínina fuiríllado íaioina tícoizitaite. Iemo daje izói júbiedo íaioina tícoizitaite. Iemo dúicuaído íaioina tícoizitaite. Iemo éniemo ite illáirede ríllenai íaioina tícoizitaite.

<sup>9</sup> Afe mei Cordero jíáie ‘quinto’ daina sello cuata llezica, ‘altar’ daina Juzíñamui caimátaitarano anamo ite, titaca comini coméciaina ciódicue. Afémaci Juzíñamui uai llócailla ícoina titácaiaioi. <sup>10</sup> Afe bimaci ficire úritiaioi; daidíaioi:

—Íaifuenide cai Ocuídime, uícodo o llógana méidoñoeno ñue fuitáfiredio. Eniemo ite cai titádino iere jicánota duere o finóllena, ¿nié dinó nai mozíñoitio? Cai fatino iba o ollirui, ¿nígarui nai bai dúiñoitio? —daidíaioi.

<sup>11</sup> Mei jira afe altar anamo itímaci úzecuiruaina igáiaioi. Afe llezica nai nano íanori ocózinaitagaiaioi. Mei nana íaioi tíilla izói uire titállino, Juzíñamui mámanomo nai dúciñede. Afe titállino, nauí íaioi titaca ámatiai izói, Cristo uaimo táijifrediaioi.

<sup>12</sup> Cordero nane jíáie ‘sexto’ daina sello cuata llezica, eróidicujemo, énie iere jacire docaide. Iemo jítoma zúunaillana, jítaca jítiroi izói éroide. Afe llezica fiui náauina jíairede die izói méidoficaide. <sup>13</sup> Afe dáaruido mona ero ucúduai cocídiaioi. Ua, higuera daina amena llizilla, jairifo riire begüñuamona cócia izói, afe izói ucúduai ana bíñiemo cocídiaioi. <sup>14</sup> Afe llezica, rabe jofo ferírioicailla izói, mona ferírioicaide. Iemona cióbicaíñena. Iemo dáaruido nana caifóneduai naa monáillai cigi íduai íaioi illánomona oni jirecaide. <sup>15</sup> Iemona nairai illaini caifóneduai anamo ite ífuaimo, naa jéerie nofíciái cígiedo retáiritiaioi. Afénomo jamánomoidino daje izói retáiritiaioi. Iemo aillo ráanaitino, íemo fuiríraini illáicomini, íemo iere riiredinuiái, íemo nana jacire rairuícano, daje izói buna ráiruiñegano, nana afénomo retáiritiaioi. <sup>16</sup> Afémaci caifóneduaina jéerie nofíciaina daífirediaioi:

—¡Mai caimo bai! Mai caina jüta, baie illaima ráiiranomo ráide Juzíñamuimona caina rétaido. Cordero finolle jacire cai duere finóllifuemona caina rétaido, —daífirediaioi.

<sup>17</sup> Mei jü, iere jacire comini duere finóllirui jae dúcideza. ¿Bu mei áfena mozíñoena?

## 7

### *Israel náiraímona náamana onóillena ciegámaciai*

<sup>1</sup> Bie méifomo bínie fuédaíaimo cuatro dígade ángeles daina Juzíñamui abi ímíai, naidáienana ciódicue. Afémaci nágafeniaimona jairifo jáiñuana mozíñotiaioi. Afe éniemo jairífona jaiñótañediaioi, daje izói monáillaimo jaiñótañediaioi, íemo jíái aménaíaimo jaiñótañediaioi. <sup>2</sup> Iemo jíáie Juzíñamui abi ímiena mona móimona bíllana ciódicue. Afémie caade Juzíñamui íeie daíllena sello daina jónelle raa llíicabite. Afémie ficire úrite. Enie fuédaíaimo cuatro diga naidáidimíaimo úrite. Afémaci bínie fieni íaioi finolle, naa monáillai diga rínona igámaci. Afémacina bímie daide:

<sup>3</sup> —Cai Juziñamui ocuífireganomo, íai*oi* ozócimo náamana onóillena máme*ci* nai jóoneñaena llezica, nai bíni*ena* duere finóñeno iri. Daje izói monáillai naa aména*ia* raire duere finóñeno iri.

<sup>4</sup> Jóonia mei, nígamaci náamana onóillena máme*ci*na jóonegano íai*oi* número*na* cacá*di*cue. Nana Israel náira*imo* itízia*imona* afe cuego*no* ciento cuarenta y cuatro mil díga*de*.

<sup>5</sup> Judá izié*mona* doce mil díga cúefide.

Iemo Rubén izié*mona* doce mil díga cúefide.

Iemo Gad izié*mona* doce mil díga cúefide.

<sup>6</sup> Iemo Aser izié*mona* doce mil díga cúefide.

Iemo Neftalí izié*mona* doce mil díga cúefide.

Iemo Manasés izié*mona* doce mil díga cúefide.

<sup>7</sup> Iemo Simeón izié*mona* doce mil díga cúefide.

Iemo Leví izié*mona* doce mil díga cúefide.

Iemo Isacar izié*mona* doce mil díga cúefide.

<sup>8</sup> Iemo Zabulón izié*mona* doce mil díga cúefide.

Iemo José izié*mona* doce mil díga cúefide.

Iemo Benjamín izié*mona* doce mil díga cúefide.

### *Aillo dáanomo úzecuiruai jitada gairídino*

<sup>9</sup> Afe méifomo eróillano jamánomo aillo comín*ina* ció*di*cue. Nana náira*imona* dáanomo bitía*oi*. Daje izói nágazie*mona* bitía*oi*. Iemo daje izói jiá*ifo* úritinua*imona* bitía*oi*. Iemo daje izói naga jófua*imona* bitía*oi*. Nana bimaci illa*ima* ráiirano uícomo naidáidía*oi*. Daje izói Cordero uícomo naidáidía*oi*. Afénomo aillo itía*oi*za buna facádonide. Nana afémaci úzecuiruai jitáoi*dia*oi. Daje llezica afémaci rafóruai llíedía*oi*. <sup>10</sup> Nana ficirerie daidía*oi*: Cai jíllonano, illa*ima* ráiiranomo ráiide cai Juziñamuimona comuide.

Daje izói cai jíllonano Cordéromona comuide, daidía*oi*.

<sup>11</sup> Afe llezica nana Juziñamui abi imá*cia*i, illa*ima* ráiirano onido ífo*ina* naidáiedía*oi*.

Daje izói veinticuatro díga*de* éicomini onido ífo*ina* naidáiedía*oi*. Iemo jiá*i* cuatro díga cáadimí*ia* onido ífo*ina* naidáidía*oi*. Afémaci afe ráiiranomo ráiidimie anamo éniemo fuego díne bíjicaidía*oi*. Bíjicaillano Juziñamuimo caimátaidía*oi*. <sup>12</sup> Daidía*oi*:

¡Bie izóideza! Ñúfui*ai* nitalle cai Juziñamuimo dúide, ñue ebíredifui*ai* díga.

Daje izói nana ñue onóigafue íemo dúide, naa figora daiífirena díga.

Daje izói afémiemo nitárede ñúfue dáamiemo dúide, naa áillue máirie díga.

Nana bífui*ai* cai Juziñamuina jaca ninomo zíiñona daií daiírenaza.

Aquíe izóideza, —daidía*oi*.

<sup>13</sup> Afe mei afe eicomín*imona* dáamie cuemo jícanote:

—¿Baie buo*i* úzecuiruai jitáoi*na*? ¿Afémaci mei ninena bitía*oi*? —daide.

<sup>14</sup> Jira íena daidicue:

—Afena onóñedicue. O ñue onódio, —daidicue.

Iemo afémie cuena daide:

—Bimaci aillo duere zefuilla íco*imo* jino bitino. Afémaci comé*ci*na iere íaifuenino íai*oi* illena ja Cordero díedo muiñócaza. Afémaci iere úzecuiro inícuio illa izói itía*oi*. <sup>15</sup> Ie jira Juziñamui ráiirano uícomo itía*oi*. Afe llezica nágaruillai, mona naio díga, Juziñamui gairíraco ero ie ocuíllana finófiredia*oi*. Iemo afe ráiiranomo ráiide Moo Juziñamui, íai*oi* díga íllado jácifuemona íaio*ina* ráiruie. <sup>16</sup> Afémaci jaca júbiemona duere finóbiñeitia*oi*. Daje izói jíróacanari duere zéfuiñeitia*oi*. Iemo jítoma íaio*ina* jiá*i* úzitañeite. Daje izói uzírediruimo mona uzíreña íaio*imo* uzire cácañeite. <sup>17</sup> Mei illa*ima* ráiirano abimo ite Cordero, ovejai uíñua izói íaio*ina* uíñoiteza. Afe llezica ñuera jaino*i* jino toránuaído íaio*ina* ífóicaite. Afe jaino*i* zíiñona cáatatiji. Iemo afémaci éeadi Juziñamui íai*oi* ui jeme nana oni dóite.

## 8

*Iraie sello cúatajana cióide, oro finoína uguci uillítara diga*

<sup>1</sup> Iemo Cordero llíga rabénicomu ite íraie sello daína íbáioide raa cuata llezica, daa hora átuedo mona tii daiíñoaíde. <sup>2</sup> Afe mei siete dígade Juzíñamui abi imaci Juzíñamui uícomo naídáienana ciódicue. Afémaci siete diga vudugoi izoide raana igáiaioi. <sup>3</sup> Afe mei jíaie ángel daínámie Juzíñamui abi ímie oro finoína uguci uillítara llícabillana ciódicue. Afémie altar daína Juzíñamui caimátairano uícomo naídaide. Iemo aillo ugúciai afémiemo fecácaza, áfena Juzíñamuimo uillítallena. Mei nana Juzíñamuimo jaináidino afémiemo íaioi jicáfírena uailai llua llezica, bímie dáanomo afe ugúciai Juzíñamuimo uillítaiteza.

Afe Juzíñamui ráirano uícomo ite oro finoína ie caimátairanomo, bímie afe ugúciai jutade; íemo afe llezica afe Juzíñamuimo jaináidino jicáfírena uailai llócaigaza. <sup>4</sup> Afe uguci uillie, Juzíñamui abi ímie áfena altarmo juta mei, Juzíñamui uícomo caifo uillíoicaide, nana Juzíñamuimo jaináidino jicáfírena uailai diga. <sup>5</sup> Afe mei Juzíñamui abi ímie uguci uillítara raa llínnote. Llínuano altármona oga caade iráiciaína áfena oruítate. Daií fínuano ana éniemo dotade. Afe dota llezica mona jacire giride naa ficíriede raari. Iemo aillo améuaí llairide. Iemo énie jacire docaide.

*Siete dígade vudúgoína eroide raa*

<sup>6</sup> Iemo afe siete dígade vudúgoína eroide llíide Juzíñamui abi imáciai afe vudugoi fúunollena maméritiaioi.

<sup>7</sup> Nanóidímie fúunua llezica, jéerie nocíjiaí éniemo cocítate. Afe dáaruído réici diga die taméricaide éniemo cocítate. Afe cóciamona éniemona jarífenie boode. Daje izói nana aménaiaimona jarífenaiaí boode. Daje izói nana caade ráitiaimona jarífene boode.

<sup>8</sup> Afe meifo Juzíñamui abi ímie ie vudugoi fúunua llezica, boode áillue íduna éroide raa monáillajimo dotaina. Iemona monáillajimona jarífeido díena jaide. <sup>9</sup> Afemona nana afénomo ite caade chámuniaimona jarífeniaí aillo tícoizitiaioi. Daje izói afénomo ite jéerie bárconiaimona jarífenedo aillo niné táinocaidiaioi.

<sup>10</sup> Iemo jíaie Juzíñamui abi ímie ie vudugoi fúunua llezica, áillue ucudu monámona éniemo baíide. Afe ucudu bobaie izói boode. Afe bóodicudu nana imánillaiaimona jarífemanimo baíide. Daje izói éniemona jainoi jino toránuaiaimo baíilla. <sup>11</sup> Afe ucudu mámece Eríredicudu. Iemona nana imánillaiaimona jarífemanillai eríriede. Iemona afe jainoi erire jáillamona aillo comíni tídiaioi.

<sup>12</sup> Ie mei nane jíaie Juzíñamui abi ímie ie vudugoi fúunua llezica, jítómamona jarífetomado jítirecaide. Daje izói fíuimona jarífeuido jítirecaide. Iemo jíai ucúduaímona jarífecududo daje izói jítirecaide. Ie jira nana afémacimona jarífenedo jítirecaide. Naga mona naio diga jarífemonana egáíñoñediaioi.

<sup>13</sup> Afe méifomo caifo monamo éroidicue. Afe mona erodo feede Juzíñamui abi ímiena cacádicue. Afémie ficire úrioicaide. Daide:

—Aii. Éniemo ite comíni níi dúerena; mei Juzíñamui abi imácimona daámani nai fiébide vudugoi fúunollena. Afémaci fúunua llezica énie imaci, ¡Níi duere zéfuitiaioi! —daide.

## 9

<sup>1</sup> Iemo nane jíaie Juzíñamui abi ímie ie vudugoi fúunua llezica, daa ucudu monámona éniemo baíillana ciódicue. Iemo fiénide jóriaí íbáirafo zuitara llave afe ucúdumo iga.

<sup>2</sup> Afemona afécudu aféfona tuiñode. Tuiñuamona aféfomona jacafai bóua uillia izói caifo uillide. Aféfomona caifo uillide uillie jítómamona dúitate. Afe llezica mona erona jítire finode. <sup>3</sup> Afe uilliemona bíniendo feede fíuaí comuide. Afémaci, éniemo ite acáiduaí izói molléroirediaioi. <sup>4</sup> Afémaci ráitie güllena rairuíaiaioi. Daje izói nana amena



rábaiaina guitatañegaiaioi, naa jáie mócore zicode ráaniai diga. Daa comini duere finóllena orécaiaioi. Mei íadi dani Juziñamui ie daítate mámece ozócimo cúeñeganona, afe fíuai duere fínoitiaioi. <sup>5</sup> Mei íadi afe fíuai comínina títatañegaiaioi. Mei jáifodo afémaci cinco diga fíui comínina izi cácataitaioi. Afe fíuai mailla, acaido come mailla izói izíreite. <sup>6</sup> Iemona aféruillaído comini, “Raire cue tílli” dáitíaioi, mei íadi tíñeitiaioi. Iere tíacaitaioi íadi, titáfiredede raa afémacimona oni jica jáite.

<sup>7</sup> Afe fíuai jóbairizaillena mamérilla cabállona eróidiaioi. Iaiói ifócimo oro finoina illaíma ifo icuífoina éroide jíina. Iemo íaiói uíeco come uíecona éroide. <sup>8</sup> Iaiói ifótti ringo ifóttiina éroide. Iaiói ízie ‘león’ daina jánallari íziena éroide. <sup>9</sup> Iemo llojécuiroi izoide abi ríidote icogí íaiói jogóbemo jíide. Iaiói féeoína jamánomo ficírede. Uafue, jóbairizailla caballo zonóicaiga ‘cárroniai’ ficírena izói ficírede. <sup>10</sup> Iemo afémacimo ite ooda acaido ooda izói molléroirede. Afe óodamo cinco diga fíui comini duere finolle ríino ite. <sup>11</sup> Afe fíuai illaíma ite. Afémie fiénide joríaí íbáirafo úiñotimie. Afémie mámece hebreo uaido Abadón; íemo griego uaido Apolión. Afeci daíacade “Niné tánocaitaimie.”

<sup>12</sup> Nanoide jacire izi cacánafue jae záaide. Mei íadi nai mena fiébide.

<sup>13</sup> Iemo nane jáie Juziñamui abi ímie ie vudugoi fúunua llezica, Juziñamui uícomo ite oro finoina altar daina afémie mo caimátairanomona úrilla uaina cacádícue. Afe uai afe caimátairanomo ite cuatro dígade caífo fáide zicaí cigimona cácaide. <sup>14</sup> Afe uai jae vudugoi fúunote Juziñamui abi ímiena daide:

—Afe cuatro dígade Eufrates imani abímo cuinaca ángeles izóidino mai zuitari, — daide.

<sup>15</sup> Jira zuitácaiaioi, nana comini jarífenairaido titállena. Mei aféruimo dúcinamona bai óllena eneno mamécaiaioi. Daje izói biruimo dúcinamona mamécaiaioi. Daje izói bie fíui íena mamécaiaioi. Iemo daje izói bie fimona íena mamécaiaioi. <sup>16</sup> Afe cuatro diga ángeles ocuállino aillo ite. Nana afémaci cabálloniai emódomo ráiiediaioi. Iemo afémaci dígadíaioi daínana cacádícue. Afémaci doscientos millones dígadíaioi.

<sup>17</sup> Bie izói éroide cabálluai nicaído çiona izói ciódícue. Afe cabálluai emódomo ráiidino jogóbiaimo llojeco jítaoidiaioi. Afe llojécuiromos jáire, mócore, borare cuega. Iaiói cabálluai ifo ‘león’ daina jánallari ifona éroide. Afémaci fuémona irai izói jino bite, íemo uíllie bite, íemo daje fuémona nairai iere uzire cóonaitalle raa jino bite. <sup>18</sup> Afe cabálluai fuémona bite daámani jacire tánocaitate ráamona aillo nairai fuite. Uafue, nana comínimona jarífenairai tíidiaioi. <sup>19</sup> Daje izói afe cabálluai óodamo jacire títaite ríino ite, mei afe ooda jaiona eróideza; ifóredeza. Afedo comínina ainízicana uite.

<sup>20</sup> Mei íadi tídinomona fiébidino, baie daámani jacíredemona tíñedino, íaiói finófireiga fiénidífuiaí féitaacañediaioi. Daje izói fiénide joríaímo caimátaitajana fáicanocaiñediaioi, naa jáiforie finoca jánaraiaína. Dáarie afe jánaraiaí oro finoina, jáie plata finoina, jáie bronce finoina; íemo jáie nofici finoina, íemo jáie amena finoina. Nana bie jánaraiaí jaca cióñede; daje izói minícana cacáñede, íemo daje izói macáñede. <sup>21</sup> Afe fiébidino jáímaci méiniana fáicanocaiñediaioi. Daje izói jáíma fue gáiana fáicanocaiñediaioi. Daje izói íaiói jiruírenana féitañediaioi. Daje izói íaiói merírifirenana féitañediaioi.

## 10

### *Daa ángel daínámie Juziñamui abi ímie duera rabénico líide*

<sup>1</sup> Afe méifodo rírede Juziñamui abi ímie monámoma ana bíllana ciódícue. Afémie uíllie cigído bite; íemo afémie ifomo rózígüeo izoide jíina. Ie uíeco jitoma egáíñua izói quenírede. Iemo ie ídai boode jáillirai izói éroide. <sup>2</sup> Afémie daa duera rabénico tuiñoda líide. Ie ídai nabezi monáillaimo bídade, íemo ie jarífezi éniemo bídade. <sup>3</sup> Iemo jánallari ficíre írilla

izói ficire úrite. Afémie úrilla mei, mona siete dígacaiño giride; ie giria come úrilla izói cácaide. <sup>4</sup> Afe siete dígacaiño mona giria llícailla mei, íaioi daina uailai cúeiacadicue. Mei íadi cúeiacadicuemo monámona daa uai cuemo úrillana cacádicue; daide:

—Afe siete dígacaiño mona giria uailai rabemo cueñeno iri; báinino comécimo o jóneri, —daide.

<sup>5</sup> Afe mei afe monáillaimo naidaide, éniemo naidaide Juzíñamui abi ímie, ie onoi nabezi monamo zitáaide. <sup>6</sup> Afe llezica ziiñona ite Juzíñamui mámeçi llínuano riire úrite. Afe dáaruido énie comútatímie mámeçi, daje izói monáillai comútatímie mámeçi, íemo nana afénomo ite cáadinuiai comútatímie mámeçi llínota riire daide:

—Benómona jaca ja móziñoñelleza. <sup>7</sup> Jabe siete dígademonia íraimie Juzíñamui abi ímie ie vudugoi fúunolliruimo dúcille llezica, Juzíñamui jica ia comécido báinino mamécáfue, ñue ícoimo zaita. Daí Juzíñamui ie uai jino llórainimo jaijai uícodo llote. Afémaci dani ie ocúfiregano, —aquíe izói daide.

<sup>8</sup> Naui monámona cue cacana uai nane meine cuemo úrite. Cuena daide:

—Afe éniemo monáillaimo naidáidímie ónoimo ite túide duera rabénico mai llínuai, —daide.

<sup>9</sup> Jira afe Juzíñamui abi ímiemo afe duera rabénico jícajidicue. Jicádicuemo afémie cuena daide:

—Llínua mai güi. Afe duera rabénico o fuemo cíiji naimérena izói cácaite, mei íadi o jébemo erire cácaite, —daide.

<sup>10</sup> Mei jira Juzíñamui abi ímie ónoimona afe duera rabénico llínota güitícue. Güitícue cue fuemo cíiji izói naimere cácaide. Mei íadi afe ja cue güilla méifodo cue jébemo erire cácaide. <sup>11</sup> Afe mei cuena daidíaioi:

—Juzíñamui daina aillo comíni jófuiaimo cómutifuijai, meine dáanomo llóredioza. Daje izói aillo náraiaina Juzíñamui dánana llóredioza. Iemo daje izói jáíforie úritinona Juzíñamui dánana llóredioza. Iemo jáí aillo illáinina Juzíñamui dánana llóredioza, —aquíe izói daidíaioi.

## 11

### *Uai nabáifirede íaillinoi*

<sup>1</sup> Afe mei árrera rázina cuemo itíaioi. Afezi jofo facáradozina eroide. Afezi cuemo fécano cuena daidíaioi:

—Mai náidacaillano dama Juzíñamui gairíraco nie dinóride fácaji. Daje izói Juzíñamuimo caimátairano o fácaji nie dinóride. Afe llezica afénomo nieze afémiemo caimátaidimacina ite mai fácado. <sup>2</sup> Mei íadi afeco jinófebirí facáñeno o iri; mei afeno jicánemacimo dúideza. Afémaci Jerusalén daina íaifuenide jófuena cuarenta y dos díga fiuido fiéni anáfenoitiaioi.

<sup>3</sup> Iemo cue dibénedo úrillena uai nabáifirede íaillinoina óreitícue; come zuure ia jítaca jíticuiro, jítaitiaillinoi. Afe íaillinoi mil doscientos sesenta dígaruillai cuedo úritiaillinoi. (Afe mil doscientos sesenta dígarui, cuarenta y dos díga fiui.)

<sup>4</sup> Bie cue uai nabáifirede íaillinoi ménade olivo amena izóidiaillinoi. Daje izói afe íaillinoi bínie comúitate Juzíñamui uícomo jóonega mena boode áillue lámpara izóidiaillinoi.

<sup>5</sup> Dáamie íaillinoina fiéni finóacaniadi, afe íaillinoi fuémona irai orédiaillinoi, afe íaillinoi fáiacadinona náamiena cuarítallena. Nana íaillinoina fiéni finóacadinona daí títateza.

<sup>6</sup> Bie cue uai nabáifirede íaillinoimo monámona noci bítañede ríino ite. Afe íaillinoi Juzíñamui dibénedo úricaille dinó, nocina bítañeitiaillinoi. Daje izói jainoi díena ória ríino íaillinoimo ite. Iemo jáí comíni duere fínoite nana jacírede duico comútaja ríino afe íaillinoimo ite. Afe íaillinoi comeci óiacana dinori comínina duere finórediaillinoi.

<sup>7</sup> Mei íadi afe íaillinoi tájina fuilla mei, iere jacire éroide caade rille afe fiénide jóriai íbáirafomona jino bite. Jino billano afe íaillinoi díga fúirite. Fuiríllano íaillinoina anáfenoite.

Anáfenua mei íaillinoína títaite. <sup>8</sup> Iaillinoi tílle mei, cai Ocuíraima coráinanomo, nii afe Jerusalemo, afe áillue jofue cigi iomo, íaillinoi tíide abi fiénocaigaiaillinoi. Afe jofue mámeçi, fiëni íllana onótate uaido Sodoma daina. Daje izói jíái Egípto daina. <sup>9</sup> Iemo daruiámani átuedo diga jófuiái nairai afe íaillinoi abi tíllamo acáritiaioi. Iemo íaillinoi abina raitátañeitiaioi. Daje izói dígazie íaillinoi abi bíinamo acáritiaioi, naa jíáifodo úritinuaíri. <sup>10</sup> Biniemo ite comini afe íaillinoi tíllari iere íobidiaioi. Daje izói caimare íitiaioi. Afe caimare íaioi íllamona conímamo ráaniaina raiñóñeno fécaitiaioi. Mei afe íaillinoi Juzíñamui dibénedo úricailla llezica, bimácina iere duere zefuítatiaillinoiza. <sup>11</sup> Mei íadi daruiámani átuedo jailla méifomo Juzíñamui afe íaillinoína meine abido cáatate. Iemo meine abido íaillinoína macátate. Iemona íaillinoímo acáritino jamánomo jacínaitiaioi. <sup>12</sup> Afe mei afe uai nabáifirede íaillinoi monámona ficírede uaina cacade. Aféuai íaillinoína daide:

—Caífo bené bi, —daide.

Jira íaillinoína éoidino éroidemo, caífo mona uílliedo monamo jáidiaillinoi. <sup>13</sup> Afe íaillinoi jailla llezica énie iere riire docaide. Afe riire docáillamona afe áillue jofue diez díganodemona dáagobe nana jáicoizite. Afemona siete mil comini tícoizitiaioi. Afemona fiébidino iere jacínaitiaioi. Jacínailano monamo ite Juzíñamuina caimátaidiaioi.

<sup>14</sup> Méifoide iere jácifue ja záide, mei íadi íiraie bille ja rairede.

### *Siete dígade vudugoi fúunotinomona ja íiraímie fúunote*

<sup>15</sup> Siete dígade ángeles daínámaci Juzíñamui abi ímiiaimona íiraímie ie vudugoi fúunote. Fúunua llezica, monámona diga ficíre úrilla uaillai cácaçai; daidíaioi:

—Nana bínie illaini illáimaillano naa íaioi ocuicanuaíri ja dájena cai Juzíñamuimo, íemo ie Crístomo Jaináitaga.

Iemo afe Cristo jaca ninomo zííñona ócuífireite, —daidíaioi.

<sup>16</sup> Iemona Juzíñamui uícomo ráide veinticuatro dígade éicomini íaioi illaíma ráíiranomona ana bíjicaidiaioi. Uáfueza, afe úrilla llezica éniemo fueco diné bíjicaillano, Juzíñamuina caimátaitadiaioi. <sup>17</sup> Iena daidíaioi:

Ona figora daidicai.

Jamánomo ocuide Juzíñamuidioza.

Birui íitimiedioza, íemo jaiái nanómona íitimiedioza, íemo jíái jaca ninomo zííñona íitimiedioza.

Figora ona daidicai, mei o áillue ríino maiñódioza.

Máíñuano ja nane como ocuízaidioza.

<sup>18</sup> Náiraíai icírinaizitiaioi, mei íadi íaioi duere o finólliruimo ja dúcizaide.

Daje izói tíidino iere riire o jicánolliruimo ja dúcizaide.

O dibénedo úrite o ocuífíreganomo íaioíena o mameca ñúfuiaina íaioímo fécaítio.

Daje izói o uaina ñue íinofírede ñue finócanomo íaioímo dúide ñúfuiaina fécaítio;

íemo daje izói o mámeçina jifánodoíñeno ñue llínotinomomo íitio.

Uáfueza, jamánomoidímiemo,

daje izói jamáimíemo íaioímo dúide raana íaioímo ífíredio.

Daje izói bínie ñúemacina fiéniruitadino o táinocaitalliruimo ja dúcizaide.

Aquíe izói afe éicomini daidíaioi.

<sup>19</sup> Iemona monamo ite Juzíñamui gairíraco tújicaide. Afénomo Juzíñamui comini diga caimare úrira raa uáfori cíocaide. Afe úrira raa emodo órona ibaica caja. Afe eromo Juzíñamui lloga uaillai éenotiaioi. Afe gairíraco tújicailla llezica améuai riire llairide, íemo ficíriede ráaniai cacaide; íemo mona ficíre giríde; íemo énie iere riire docaide; íemo iere mairide nocíjiaí cocide.

## 12

### *Ringo íemo jacírede zicínaimana eróidímie diga monamo cíocaide*

<sup>1</sup> Afe mei monámona jacírede onótate raa cíocaide. Afénono iníroido ferínua izói, jitómado ferínoga ringo cíoina. Afengo idai anamo fiui cíoina, íemo afengo ifomo doce dígade ucudu illácuifoí, illaíma jitáfíregacuifoí izoide jitáoi. <sup>2</sup> Afe ringo úrue jocóacade izínailla. Afe iere izírenari caillícade; mei afengo úrue jéiciacana llezica iere duere zefuídeza. <sup>3</sup> Afe méifodo jíáie jacírede onótate raa monamo cíocaide. Afénono áillue jíairede jacírede zicínaimana eróidímie cíocailla. Afémie siete diga ifórede. Iemo afémie diez diga zícairede. Afe ifóciaimo illa dígacimo illaíma jitáracuifoí jíina. Daa ie mámece Taife. <sup>4</sup> Ie óodado monamo ite úcuaimona jarífecuduna aillo dánomo jainánote. Jainánuano afécuduaina ana éniemo dotade. Afe ‘dragón’ daina zicínaimana éroidímie, afe úrue jocóacade ringo uiécomo jóoneoide, afe ie jocóacaga úrue jócuá llezica raíre ríllena. <sup>5</sup> Iemo afe ringo íza jocode. Afémie uire móonaia nana náiraiaia llojébici izóidedo riire ócuifireite. Afe úrue jócuá méifodo Juzíñamui bairoca. Bairoda ie illáimana ráiranonomo uiga. <sup>6</sup> Afe llezica afe ringo tázicimo botade. Afe dinomo afengo retáirillino uícodo Juzíñamui finoca. Afénono mil doscientos sesenta diga mona afengo ecáecaille.

<sup>7</sup> Afe méifodo áillue fuiríacana caifo mona eromo comuide. Afénono Juzíñamui abi imaci illaíma Miguel naa jíáie Juzíñamui abi imáciari afe dragón diga fuirídiaoí. Daje izói afe dragón naa ie abi imáciari fuirídiaoí, <sup>8</sup> mei íadi afémaci Miguel náiraia anáfenonidiaoí. Iemona dragón imaci illino monamo íñede. <sup>9</sup> Afe ie illino íñena jira afe riirede dragón monámona ja jino dotaca. Afe jaiaí nínomo ite jaio dainámie jíáfodo mameina Taife, íemo Satanás, íemo dáamie nana náiraia jífuefiredímie. Afémie naa ie abi imáciari ana éniemo dotácaiaoí.

<sup>10</sup> Afe méifomo monámona ficírede uaina cacádicue. Afe uai daide:

—Cai Juzíñamui bínie comíni jíilloilla mámiarui mo ja dúcide. Daje izói íemo ite ríino facállirui mo ja dúcide. Iemo daje izói illáimana ie illíruimo ja dúcide. Daje izói ie jitó Cristo riire ocuállirui mo ja dúcide. Mei cai ámatiaimo fiénidífue nitáfiredímie ja jino dotácaza. Afémie nágaruillaí, mona naio diga cai Juzíñamui uiécori afémacimo fiénidífue nitáfírede. <sup>11</sup> Cai ámatiaí Cordero díedo fiénidífue anáfenodiaí. Daje izói íaíoi jino meáiruiñeno lloga Juzíñamui uáillaído caifófecaídiaíoi, mei jaca tíllana jacíruiñediaíoi; mei jíáfodo jaca tíllemo ñue finóbidaíoi. <sup>12</sup> Iemona, mona naa afénono ite cáadinuiai ri mai omoi íóbiri. Mei íadi éniemo itino níi dúerena, naa monáillaimo itínuiari, mei Taife ómoímo ana iere icírillano jáideza. Afémie nano íanori ie íllena onódeza.

<sup>13</sup> Afe dragón ana éniemo ie dótajana onóillano, nauí íza jocódingo racade. <sup>14</sup> Mei íadi afe ringo mena áillue máajaiño íaícona iga, áfedo afe jaio dainámie dragómona jica tázicimo afengo féellena. Afénono daámani fimona átuedo afengo ecáecaiga. <sup>15</sup> Iemo jaio dainámie áillue jainoi ie fuémona orede, imánina comuillena, mei afe imánido afe ringo coróbaitallena. <sup>16</sup> Mei íadi énie ringona ríidote, mei afe dáaruído énie bócocaillano, afe dragón fuémona oreca imánina naitateza. <sup>17-18</sup> Afe bíemona afe dragón ringomo iere ríicaide. Ríicaillano aféngomona fiébide ie erófene ígímaiaí diga fuirízaide. Afémaci Juzíñamui ocuica uallaí jeire otíaoí. Daje izói afémaci Jesucristo lloga ua ráfueña fáicanocaiñeno nágarui jeire ófirediaíoi.

## 13

### *Mena áillue jacíre eroide rille cíocaide*

<sup>1</sup> Monáillai fuédamo cue naidáillano monáillaimona iere jacire eroide rille caifo bíllana ciódicue. Afémie ifo siete dígade, daje izói afémie diez diga zícárede. Afe illa diga zícáimo illaíma jitáracuifoí jíina. Afémie ifóciaímo Juzíñamuina fieni daína mámecei cúeina. <sup>2</sup> Afe cue ciona jacírede rille jánallarina eroide. Ie ídaíai oso ídaina eroína, íemo ie fue león fuena eroide. Bíniemo dragón íemo ite ríino naa ie illáimaillano diga afémiemo fecade. Afe llezica riire ocuífirenafue afémiemo lloga. <sup>3</sup> Afe jacírede rille ifóciaímona daaci titade áillue boáfena eroide illa. Mei íadi afe titáacade áillue boafe raíre jacaide. Iemona nana énie náiraíai áferi iere jacínaitiaíoi. Jacínaillano afémiemo ínotiaíoi. <sup>4</sup> Afémaci dragón uícomo éniemo fueco diné bíjicaillano íemo caimátaidiaíoi, mei dragón riire ocuille ríino afe jacírede rillemo ígaza. Iemo daje llezica jacírede rillemo caimátaidiaíoi. Caimátaillano daidíaíoi:

—¿Bu mei bie jacírede rille izoina? ¿Bu mei afémie diga fuirírena? ¡Afémie anáfenonide!  
—daidíaíoi.

<sup>5</sup> Afe llezica afe jacírede rille afémie úrilla bu llétañega. Iemona Juzíñamuina íaire daína uaina llote, naa fieni abi ínuafuiaíri. Afe izói cuarenta y dos diga fiui, daí ie ocuilla buna ráiruiñega. <sup>6</sup> Iemona afémie bie izói finode; Juzíñamuina uáitano, ie mámeceina íaire daíoi. Daje izói Juzíñamuimo úriranona íaire daíoi. Iemo monamo itínuiaina daje izói íaire daíoi. <sup>7</sup> Iemo jíai daje izói Juzíñamuimo jaináidino diga ie fuirilla buna ráiruiñega. Daje izói afémaci ie anáfenolle buna ráiruiñega. Iemo nágazie ocuille ríino afémiemo fecaca. Daje izói nana comíni jófuaíai ócuifireite, íemo daje izói nana jíáfodo úritinuaíai ócuifireite, íemo daje izói nana náiraíaina ócuite. <sup>8</sup> Nana bíniemo itino afe jacírede rillemo caimátaidiaíoi. Afémaci mámeceiaí zíñona íitino rabénicomo cúeñega. Ua énie taineina llezica baimaci mámeceiaí afénicomo cúeñega, mei afémaci ínoñena jira. Afénico nauí titaca Cordero ie.

<sup>9</sup> Bífuomo cacáacadímie mai bíemo cácarei. <sup>10</sup> Jíaimacina maitá uitino méifodo nane maitá uille. Iemo jíai lloéfaiido jíaimacina titáidino méifodo afémie daje izói lloéfaiido titalle. Mei jira Juzíñamuimo jaináidino coméceina járidonidiaíoi; daje izói jíai ñue ínorediaíoi.

<sup>11</sup> Afe méifodo jíai ie jacire eroide rille éniemona caifo bíllana ciódicue. Afémiemo mena zicaí ite; cordero zícaina eroide. Mei íadi afémie dragón úrilla izói úrite. <sup>12</sup> Nauí monáillaimona bite nanoide jacire éroide rillemo ite riire ocuille ríino, daje izói bie méifoidímie ite. Iemo nanoide jacírede rille uícori, bímie íemo ite ríino ácatate. Ie ríino ácata llezica afémie nana éniemo itínuiái, nanoide jacírede rillemo caimátaillena ocuide. Afe nanóidímie ifomo ite áillue boafe raíre jacáidímie. <sup>13</sup> Iemo afe méifoidímie daje izói iere jacímie daítate raana cíotate. Mei uafue, afémie nana comíni eróicana monámona iraici ana éniemo cocítate. <sup>14</sup> Iemo afe nanoide jacírede rille uícomo buna ráiruiñega ie finócaigado nana bíniemo itínuiaina jífujete. Afémacina jífuiano afe aillo bofédaite jacírede rillena eroide jánaraina afémacina finótate. Afe bofédaite jacírede rille lloéfaiido aillo bofeca, mei íadi nai caade. <sup>15</sup> Iemo afe méifoide jacírede rillemo, afe jánarai cáatalle ríino íemo íga. Iemona afe jánaraina cáatano, afémie afe jánaraina úritade. Daje izói nana afe jánaraimo camátaiñedinona afe jacírede rille jánarai íaíoina fatátate. <sup>16</sup> Nana afe baimo, nana náiraíaina bie izói itátate; nana jabóidímaci naa jamánomoidímiaíai diga, nana ráaredino naa dúeredino diga, nana ráiruiñegano naa rairuícano diga, íaíoi onoi nabézimo daa onótate número jóonetade. Afe onótate número nabézimo jóoneñenia íaíoi ozócimo jóonerede. <sup>17</sup> Naga afe onótate número na cúeñegamie jaca íbárinide, daje izói raana fecánide. Afe número nanoide jacírede rille ie. Afe número afémiemo dúide mámecei

daiácade. <sup>18</sup> Bifue onóillena iere báitajamo dúide. Afena onódime, mai afe jacire eroide rille número faca. Afémie número ima ie. Afe número seiscientos sesenta y seis.

## 14

### *144,000 dígado roga rua*

<sup>1</sup> Afe méifomo Cordero Sión mameina idu emódomo naidáinana ciódicue. Afénomo afémie diga ciento cuarenta y cuatro mil comini naidáiede. Afémaci ozócimo Cordero mámece naa ie Moo mámece diga cúeina. <sup>2</sup> Iemo monámona ficírede raana cacádicue. Afe ficírena aillo imánillai nofíco tua ficírena izoide. Jiái riire mona gíría ficírena izoide. Iemo jiái aillo arpa daina, rua roia taiga ráaniai ficírena izoide. <sup>3</sup> Afe llezica illaíma ráiirano uícomo afémaci comue rua rotíaioi. Daje izói cuatro diga cáadimíai, íemo éicomini uícomo rotíaioi. Afe rúana jaca buna ónide. Dani afe ciento cuarenta y cuatro mil diga éniemona jíllode comini afe rúana onona. <sup>4</sup> Afe bimaci ringomo jíriñedino, mei afémaci jaca íaifuenidino; dani íaioi abi rairuídíai. Daje izói afémaci Cordéromo jaináitagamaci. Afémaci cominimona jíllotagamaci, Juziñamuimo nanóidino ie dúidimacina íaioi íllena. Daje izói Cordéromo nanoide dúidino itíaioi. <sup>5</sup> Afémaci jaca táinona úriñediaioi, mei afémaci Juziñamui illáimana ráiirano uícori íaifuenino itínoza.

### *Daámani ángeles daínámaci Juziñamui abi ímie íllócaiga uai*

<sup>6</sup> Afe mei jiáie Juziñamui abi ímie mona dáafenedo féiana ciódicue. Afémiemo ziiñona jíllollíuai illa, bíniemo itínomo llóllena. Nana énie náiraiamo llórede, íemo nana jiáziemo. Daje izói nana jiáifodo úritinomo llórede, íemo daje izói nana comini jófuiado. <sup>7</sup> Afémie ficírede uaido daide:

—Juziñamuina ñue omoi jacírui; ñúfuiaina afémiemo omoi nitari, mei afémie iere riire jicánollíruimo ja dúcidez. Mai mona finódime, daje izói énie finódime, íemo monáillai finódime, íemo éniemona jainoi jino torano finódime; afémiemo omoi caimátaifireiri, —daide.

<sup>8</sup> Iemo nane jiáie Juziñamui abi ímie méifodo cíocaide; afémie daide:

—Ja jáicoizite, ja jáicoizite. Afe áillue Babilonia jofue jáicoizite. Mei aillo fiénide jiruífuiái izoide íaifuiái omoi finofirenado, nana nairai jífáidino izói itátatiomoiza, —daide.

<sup>9</sup> Afe méifodo íraie Juziñamui abi ímie ficire daióicaide:

—Dámie jacírede ríllemo caimátaíadi, íemo jiái afe jánaraimo caimátaíadi, íemo daje izói afe rille mámece ozócimo ninena ónoimo cuetátaíadi, <sup>10</sup> afe izóidino Juziñamui lloga jamánomo duere finóllinomo oréllíai. Mei afe izóidino afémie iere rícaide; rícaillano afémie duere íaioi finolle, féiñellena riire íaioimo mamécaza. Iemo Juziñamui abi imaci uícomo, daje izói Cordero uícomo, iraido íaioina iere izi cácatallíai. Iemo daje izói nairai iere uzire cónaitalle raado afe izóidínona iere izi cácatallíai. <sup>11</sup> Duere íaioi zefuítate irai uíllie jaca ninomo llícaíñeno caífo uíllíide. Afe jacírede ríllemo caimátaítino mona naio diga afe duere finóinamona jaca ócozinaiñeítíai. Afémaci naa afe ríllena eroide jánaraimo caimátaídnori, íemo jiái ie mámece onótate número otino diga nana jaca ócozinaiñeítíai. <sup>12</sup> Mei jira Juziñamuimo jainaide ie ocuica uaimo jíeruitino, naa Jesudo fáicanocaiñede jáidino diga, coméceina járidonidiaioi.

<sup>13</sup> Nane afe méifomo monámona daa uai cuemo úrillana cacádicue; daide:

—Bie cúeiri: “Benómona caí Ocuíraímamo ínote tíitino caimare ítíai.” Afena Juziñamui Ñuera Joreño “Jii” dáidez, mei afémaci íaioi táijnamona ocózinaitíai. Daje izói íaioi finócano, jiáima diga nabáirilla izói féitañegaza, —daí daide.

*Ria llizilla óina izói, énie comini jofo ollíruimo dúcide, Juziñamui duere íaioi finóllena*

<sup>14</sup> Afe mei eróillano úzere de mona ero uílliena ciódicue. Afe uíllie emódomo Nanoide fima Jitona Jesuna éroidimie ráina. Ie ifomo oro finoína illaíma jítaracuifoi jíina. Daje izói hozna mámecirede arroz izoide llízie ñetara llíide. (Afe raa jofo icuífoína néfide jáirede lloefai izoide.) <sup>15</sup> Iemo nane jíáie Juzíñamui abi ímie ie gairíracomona jino billa. Afémie ficírede uaido uíllie emódomo ráiidimiena daide:

—O llíga llízie ñetara raado tájiri. Ja jeede diga mai jofo ono. Ja jofo ollíruimo dúcidez. Enie comini finócafuiái ja jeede ríaniai izói fiénidifuenta iere oruídeza, —daide.

<sup>16</sup> Afe mei uíllie emódomo ráiidimie ie llíga llízie ñetara raado énie comínimo tájizaide. Afedo fiénidifuenta oruídino jofo ote.

<sup>17</sup> Afe mei jíáie Juzíñamui abi ímie monamo ite Juzíñamui gairíracomona jino bite. Daje izói afémie jáirede llízie ñetara raa llícabite. <sup>18</sup> Afe llezica jíáie Juzíñamui abi ímie Juzíñamuimo caimátairanomona jino bite. Afémiemo jobáitale ríinona ite. Iemo afémie, jáirede ñetara raa llíidimiena ficire jírillano daide:

—Mai omo ite jáirede ñetara raado tájiri; éniemo ite jíricoillai ollíruimo ja dúcidez. (Afe jíricoillai fiénide comini jana.) Mai jofo ono, mei afe jíricoillai ja iere jiduúdeza, —daide.

<sup>19</sup> Iemo afe jíáie Juzíñamui abi ímie, ie jáirede ñetara raado énie comínimo tájizaide. Afedo éniemo ite jeede jíricoillai izoide fiénidino jofo ote. Uano áillue iduíraco izóidinomo jofo dite, afénomo ríire iduíllena. Bie iduílla Juzíñamui bie izói duere afémacina finolle jana. <sup>20</sup> Afe jíricoillai izoide fiénidino áillue comini jofue jinomo iduica. Afe iduíracomona aillo díena tote. Afórede imani izoide; áfeji caballo táia ie fue illa dinori afórede. Daje izói áfeji trescientos kilómetros dinó tote.

## 15

### *Iraie siete dígade jacírede duere finóllifuiái Juzíñamui abi imaci mameca*

<sup>1</sup> Iemo monámona jíáie jacínaitade áillue raa jánana ciódicue. Siete dígade Juzíñamui abi imaci íraie siete dígade jacírede duere finóllifuiái lluíbitiaíoi. Afedo Juzíñamui ríicaillana záate.

<sup>2</sup> Daje izói, vídriona finóinana eroide monáillajina ciódicue. Afeji réici diga taméricaide; daí eroide. Jacírede ríllena anáfenodino afe fuédamo naidáiediaíoi; daje izói ie jánaraina anáfenodino; iemo jíái afe ie número mámecina ozócimo cúdeñegano diga. Nana dánomo afe vídriona eroide monáillai fuédamo naidáiediaíoi. Nana bimaci Juzíñamui íaíoi mo fecaca ‘arpa’ daína rua roia taiga raa llíiediaíoi. <sup>3</sup> Afémaci Juzíñamui jaiaí ocuífregamie Moisés rua rotíaíoi. Daje izói jíái Cordero rua rotíaíoi. Aférua bie izói daide:

Ocuíraíma, nana o finócanuiái iere ebíriede.

Jamánomo ríinorede Juzíñamuidio.

Náiraíai Illaíma, nana o jáifirena io uáfuenta jaícina jóide.

<sup>4</sup> Ocuíraíma, ona ñue jáciruíñeitimiena íñede.

Daje izói omo ñúefuenta jóoneñeitimiena íñede.

Mei dama o íaífuenidimienaza.

Naga náiraíai omo caimátai zaíbitiaíoi, mei o jaícina finófiregafuiaina ciódiaíoi za.

Aquíe izói rotíaíoi.

<sup>5</sup> Bie méifodo, monamo ite Juzíñamui gairíraco tújicaillana ciódicue. Afeco nofíbicimo cueda Juzíñamui ocuica uallai éenorano. <sup>6</sup> Afécomona Juzíñamui siete dígade abi imaci jino bite. Afémaci siete dígade jacírede duere finóllifuiái uite. Afémaci ráifide íáinide queníredicuiruai jítáoidiaíoi. Iaiíoi llaitáoi ga oro finoína ciraigi ífe jogóbemo dúcidez. <sup>7</sup> Ie mei cuatro dígade cáadimíaimona dáamie afe siete dígade Juzíñamui abi imácimona

illa dígamíemo oro finoina ichecoí fecade. Aféhecoí jaca ninomo zíñona ite Juzíñamui ocuica duere finóllifuenta oruide. <sup>8</sup> Iemo afe Juzíñamui gairíraco uílliena oruide. Afe uíllie Juzíñamui jamánomoidimiena íllamona, daje izóí ie iere ríinorenamona comuide. Afe llezica afécomo buna jofo jáinide. Nai afe siete dígade Juzíñamui abi imaci siete dígade jacírede duere finóllifuiái záiñena llezica buna jofo afécomo jáinide.

## 16

### *Juzíñamui duere finóllifuenta oruide ichécuaí*

<sup>1</sup> Afe mei Juzíñamui gairíracomona jino bite ficírede uaina cacádícue. Afe uai siete dígade Juzíñamui abi imácina daide:

—Juzíñamuimona bite siete dígade duere finuana oruídíchecuaí ana éniemo tótaji, —daide.

<sup>2</sup> Nanoide Juzíñamui abi ímie jaillano, afémiemo ite ichecoí ana éniemo totade. Afemona nana jacírede rille mámecina cuegánomo jacírede duico comuide. Afémacimo izírede jíllotañede ñozagí izoide duico comuide, daje izóí afe rille jánaraimo caimátáifiredinomo.

<sup>3</sup> Iemo méifoide Juzíñamui abi ímie afémiemo itíchechoí monáillaimo totade. Tótamona afe monaillai jáinoí tídimie die izóí jaide. Iemona nana monáillaimo ite cáadinuiai tícoizite.

<sup>4</sup> Iemo nane jáíie Juzíñamui abi ímie afémiemo itíchechoí imánillaimo, daje izóí éniemona jáinoí jino toránuaímo totade. Iemona afeno jáinoillai díena jaide. <sup>5</sup> Afe mei jáinoí fiéni finótate Juzíñamui abi ímie dáinana cacádícue; daide:

—Ocuíraíma, íaífuenide Juzíñamuidío. Bie izóí comíni duere o finóllena iere comécina jáícina jóidímiedío. <sup>6</sup> Mei omo jáináidinona títano íaíoi díena nauí totádiaíoi. Daje izóí o díbénedo úritino díena totádiaíoi. Iemo biruí afe íbana o afémacina díena jirótatio, mei daíí afémacimo dúideza.

<sup>7</sup> Afe mei nane Juzíñamuímo caimátairanomona dámie dáinana cacádícue; daide:

—Jíi, uáfueza, caí Ocuíraíma, o jamánomo ríírede Juzíñamuidío. Uáfuenta ñue jáícina iere ríire jícanotío, —daide.

<sup>8</sup> Ie mei nane jáíie Juzíñamui abi ímie afémiemo itíchechoí jítomamo totade. Afemona afe jíto ma comíni cóonaitalle ríino iga. <sup>9</sup> Iemona nana comíni jamánomo cóonaitaíoi. Mei íadi íaíoi comeci itífuiaína méidoñediaíoi. Daje izóí Juzíñamuímo caimátáíñediaíoi. Mei jáíifodo afe jacírede duere finóllifuiái ocuídimiena faidóírediaíoi.

<sup>10</sup> Iemo nane jáíie Juzíñamui abi ímie afémiemo itíchechoí jacire eroide rille illáimana ráíiranomomo totade. Afe llezica afémie náamataga illano jítrecaide. Iemona nana comíni afe uícodo íaíoi mo comuide duícuai izírenari dani abi ainízitiaíoi. <sup>11</sup> Mei daíí itíaíoi íadi, íaíoi finoca fiénidífuiái fáicanocaiñediaíoi. Mei jáíifodo, izi íaíoi cácana ícoínia, daje izóí jacire íaíoi ñozánaillamona, monamo ite Juzíñamuína íáire daídíaíoi.

<sup>12</sup> Iemo nane jáíie Juzíñamui abi ímie afémiemo itíchechoí áillue Eufrates mámecírede imánimo totade. Afemona afe imani zafénaite, áfedo illaini raíre ruica bille io tuiñóllena. Aféllaini naa íaíoi fuírírainiri jíto ma caífo biránomona bitíaíoi.

<sup>13</sup> Afe mei dragón daínámie fuémoma, daje izóí jacire eroide rille fuémoma, daje izóí taino uai jino llóíredímie fuémoma daámanide cúuraícina eroide fiénide jóriai jino bíllana cíodícue. <sup>14</sup> Afe daámanidino Taífe jóriai. Afémaci cíorainina raana cíotafiredino. Bie damieámanidino nana énie illaini naa íaíoi fuírírainiri dáanomomo gairítaite, jamánomo ríinorede Juzíñamui díga fuíríllena. Aferuí Juzíñamui aillo íba olliruí.

<sup>15</sup> Aféruido monámoma Cristo úrillana cacádícue; daide:



—Ero, cacai. Merízaibitímie billa izói, comini nai cuemo comécíñediaioimo déizaibiticue. Cue bille llezica iníñeno cuemo comeci facáoidímie caimare íite. Daje izói emuíroma mácañeillena iníroina ñue úiñotímie izói, íaifueмона abina ráiruitímie méairuíñeite, —daide.

<sup>16</sup> Iemo afe daámanide fiénide joríaí, nana illáinina dáanomo gairítate. Afeno mámecei hebreo uaido daína Armagedón.

<sup>17</sup> Iemo siete dígademona líraie Juzíñamui abi ímie afémiemo itíchechoi caifo táifomo totade. Tota llezica monamo ite gairíracomona ficírede uai cácaide. Afe uai illaíma ráiranomona jino bite; daide:

—Ja fuite, —daide.

<sup>18</sup> Afe méifodo, améuai llairilla. Mona gíría naa ficíriede ráaniai diga cácaide. Afe llezica énie iere riire docaide. Nanómona biniemo comini ia docáifirena baimo, jamánomo riire docaide. <sup>19</sup> Iemona afe áillue comini jofue daámani dieze bójjicaide. Jiáie biniemo ite jofue jáicoizite. Afe llezica Juzíñamui áillue Babilonia jófueмо úibicaide, duere íaioina finóllena. Afe duere finóllifue comini títaite ríjji júrua izói íite. Afémie rícaillano daí íaioina fínoite. <sup>20</sup> Afe dáaruido nana monáillaji cigi íduai naa jiáie caifóneduairi niné táinocaide. <sup>21</sup> Afe llezica aillo jéerie nocíjiaína monámona comínimo cocide. Aféjiaimona dáarie cuarenta kilos méereде. Iemona afénomo ite comini afe áillue nocíjiaí cóciari Juzíñamuina íaire daídíaioi, mei afe bimaci duere fínua iere jamánomoideza.

## 17

### *Jamánomo jiruúredingo duere finóinafue*

<sup>1</sup> Afe méifomo siete dígachecoí llíide Juzíñamui abi imácimona dáamie cuemo úrizaibite. Cuena daide:

—Eróizaibi. Jamánomo jiruúrede izoide íaifueredingo duere finóinana omo ácataiticue. Afengo monáillajillaimo ite. Afe bie izói daíacade aillo nairai afengo anamo itíaioi.

<sup>2</sup> Bínie illaini afengo diga aillo fiénide íaifuiái finófirediaioi. Iemo bínie comini afengo íaifuerenamona jifáifiredino izói íaire jáidiaioi, —daide.

<sup>3</sup> Afe mei Juzíñamui Ñuera Joreño nicáirilla izói cuemo ácataja llezica, daa Juzíñamui abi ímie táizicimo cue uite. Afénomo daa ringo jáirede jacire eroide rille emódomo ráinana ciódicue. Afe rillemo diga Juzíñamui íaire daína uaillai cúeina. Afe rille siete diga ífócirede, daje izói afémie zicai diez dígade. <sup>4</sup> Afe ringo jitáoigacuiro jáirede, íemo morádonna eroide. Afengo oro finoina íena ebire finóbide, íemo ráifide ñue finoca nofíciaina, íemo ‘perla’ daína zíriona finóbide. Iemo afengo oro finoina ichecoí llíide. Aféchechoi íairede raana oruide, íemo jiái afengo jiruúrena llezica finoca íaifuiaina oruide. <sup>5</sup> Afengo ozócimo cuetá jónega ónonide mámecei illa. Afeci bie izói daide: “Aillue Babilonia jofue, nana fiénidifuiái jillaci, aféfuiai ei daína izói mameide. Iemo nana biniemo ite éoigafuiái ei daína izói mameide.”

<sup>6</sup> Iemo diga Juzíñamuimo jaináidino afe ringo ícoinia fazícaiaioi. Afémaci Jesús uai llócaína jira afengo titácaiaioi. Iaioi fazícanori afengo, come jifáifirena izói, iere íóbide. Afena cíoillano iere jacire fáigacaidicue. <sup>7</sup> Ie jira Juzíñamui abi ímie cuena daide:

—¿Minícarí jacínaitio? Afe ringo ónonino daíacanafue jino omo onótaiticue. Daje izói afengo uífirede jacírede rille maméinafueña omo onótaiticue. Afe rille ífo siete dígade, íemo diez diga zícairede. <sup>8</sup> Afe o ciona jacírede rille jaiái nino itímie, mei íadi ie tílla mei jae íñede. Mei íadi afémie líraicaiño ie tílle uícodo meine abido fiénide joríaí íbáirafomona caifo biite. Mei íadi billano zíñona ie duere finóllinomo orelle. Eniemo ite comínimona zíñona ille rabénicomo énie taíneína llezica mámeceína cúeñegano, afe rillena cíoillano

iere jacinaificaitiaioi, mei afemie jaiiai iteza, íemo birui jae inédeza, íemo meine abido uire bíteza.

<sup>9</sup> Birui cai uaina féiruiñedinomo nai benó jáie lollífuenta ite: Cácarei. Afe siete dígade ifóciai baie ringo ráina siete dígade caifóneduai jana. <sup>10</sup> Iemo afe llezica afe siete dígade ifoci daje izói siete dígade illaini jana. Afe siete dígade illáinimona cinco diga ja dotácaiaioi. Afe mena fiébidemona daa nai illáimana ite. Iemo jáimie nai illáimaizaibiñede. Afémacimona íraillaíma bíadi are ineno táinocaite. <sup>11</sup> Naui caade íocirede rille, tíde íadi, nane birui caade illaíma. Afemie siete dígademona afémaci emódoidillaíma. Mei íadi afemie siete dígademona dáamie. Afe mei afemie íraicaiño ie tíllinomo jáite.

<sup>12</sup> Afe o ciona diez dígade zicai, diez dígade nai illáinina jáiñedino jana. Mei íadi jacírede rille diga dáaruído afémaci nano íanori dieze illaini ocuífrena ríino lláinoitiaioi. <sup>13</sup> Bie diez dígade illaini conímamo daje izói comécidiaioi. Iemo íaioimo ite ocuille ríino jacírede ríllemo fécaítiaioi. <sup>14</sup> Iemona Cordero daina Jesucristo diga fúiritiaioi; mei íadi Cordero íaioina anáfenote. Mei afemie nana ocuídinomona Jamánomo Ocuídímieza. Daje izói afemie nana illáinimona Jamánomoidillaímaza. Afemie diga jáicadino Juzíñamui nizada jáirigano. Daje izói afémaci fáicanocaiño Juzíñamuimo ñue ínofiredino, —daí afemie cuena daide.

<sup>15</sup> Juzíñamui abi ímie nane dáanomo cuena daide:

—O ciona monáillajillai, nái afe íaifueredíngo illano, afe monáillajillai aillo jófueniai jana. Daje izói aillo comíni jana, íemo jáíforie úritino jana, íemo aillo náiraiai jana. <sup>16</sup> Jacire eroide ríllemo o ciona zicainiai jáie illáimaiai jana. Afémaci bie jiruédíngona éoitiaioi. Eoillano aféngona zóofeítiaioi, íemo jáí aféngona emuírogi óreitíaoi. Afe mei afengo íeizina rítiaioi. Iemo jáí aféngona iraimo cóonaitaitiaioi. <sup>17</sup> Juzíñamui comeci jítaina izói afe ringona duere íaioi finóllena ónonino íaioi comécimo úrite. Ie jira dájena comécidiaioi íaioimo ite jacire ocuille ríino jacírede ríllemo fecállena. Iemona afemie jamánomo ríirede. Daí Juzíñamui daina uáillaína fuillíruimo dúcia llezica finófrediaioi. Iemona afemie daina uaina ñue ícoimo záitatiaioi. <sup>18</sup> Afe naui o ciona jiruédíngo, nana énie jamánomo ocuífredillaíma illágobe jana, —aquíe izói daide.

## 18

### *Babilonia jofue táinoicailla*

<sup>1</sup> Bie méifodo monámona jáie ángel dainámie, Juzíñamui abi ímie ana bíllana ciódicue. Afemie aillo ríino diga bite. Afe llezica ie quenire bóodedo bínie egáíñote. <sup>2</sup> Afe llezica afemie ficire úrite; daide:

—Aillue Babilonia jofue ja jáicoizite, ja táinocaide. Taife ocuífregano illánona jaide. Daje izói nana jáíforiede íairede joríaí uíñoracona jaide. Afe izói nana íaire féedíno jilláillinona jaide, naa jáí cai éoiga féedínuaíri. <sup>3</sup> Mei aillo fiénide íaífuiaí afengo finófirenado, nana nairaí jifáidíno izói itíaoíza. Iemo naga énie illaini afengo diga aillo jiruífue izoide íaífuiaína finófrediaioi. Bíníemo ráaniaí fecáfiredíno iere úcuberedínona jáidiaioi. Mei uafue, afe áillue jofue comíni izire jicaca táinomo faitátate ráaniaí íaioi jicáfírenamona bimaci aillo úcubenaídiaioi.

<sup>4</sup> Afe mei monámona jáie uaina cacádicue; daide:

—Omoí cúeíedímoíza bie jófuemona oni omoí jai; íaioí finoca fiénidífue afémaci fínua izói omoí fínoñeílleza. Daje izói íaioímo zúite jacíredífuaí ómoímo jíriñeílleza. <sup>5</sup> Mei afémacimo ite fiénidífuaí ofilla ja monamo dúcidez. Íaioí finoca fiénidífuaímo Juzíñamui ja uíbicaídeza. <sup>6</sup> Iemo Juzíñamuína daide:

—Jíáimacimo íaioi feca izói, afe izói íaioimo fecari. Iaioi fiēni fínua izói, afe baimo ménacaiño afémacimo finori. Afémaci ñuēmacimo eriredena jóoneta jirota izói duere íaioina finódiaioi. Afe íaioi fínua izói, afe íbana ménacaiño afémacimo riire duere íaioina finori. <sup>7</sup> Aillo táinodo abi íaioi ínua dieze, íemo cómena canóñedemo fáififirena dieze, áfeze afémacina duere finori; afe izói íaioina duere zefuitari. Mei bie ringo izoide jofue comini afengo ie comécido daífiredeza: “Benomo illáingona ráidicue. Jaca fécinaíñeíticue; jaca dúeníticue,” —afengo daide. <sup>8</sup> Ie jira bie izói úrillamona, dáaruido omo dúide jaciredifuiái cómuite: tíilla íemo duere zefuilla, íemo júbie. Iemo iraimo cóonaitio. Mei o duere finótate Juzíñamui jamánomo ríinoredeza. Afémie jaca cai Ocuíraima.

<sup>9</sup> Afengo diga jiruúde bínie illáicomini, daje izói afengo diga cómena canóñedemo fáifidino aféngori iere éenaitiaioi. Mei uafue, afengo cóonaila uílliena cióillamona aféngori cáillicailli éeítiaioi. <sup>10</sup> Afengo iere duere finóinari jacinaillamona oni jica íítiaioi. Afemona dáítiaioi:

—¡Aii, ñii o dúerena! Jamánomo riirede Babilonia jófuedio, ¡ñii duere o zefuilla! ¡Mei raire dáaruido o duere finoína comuíbicaide! —dáítiaioi.

<sup>11</sup> Bínie ráaniai fecáfiredino aféngori cáillicailli éenaitiaioi, mei ja íaioi atica ráaie íbaitino íñede. <sup>12</sup> Iaioi atífirega ráaniai, be ñie: Oro, plata, ráifide nofciaí, ‘perla’ daina ráifide zírío, ráifide úzecuiro, íemo jíairede ‘sédacuiro,’ morádona eroide seda diga, íemo jíái diga jíáfodo zióriede aménaíai, íemo ebírede ‘marfil’ daina elefante zicai finoína ráifide raana, íemo ráifide amena finoína raa, íemo ‘bronce’ daina borárede lloébici finoína raa, íemo jamai lloébici finoína raa, íemo ‘marmol’ daina nofici finoína raa, <sup>13</sup> daje izói ‘canela’ daina güíllemo faiga raa, íemo jíáiforie ráifide ziórede raa, íemo ziórede uguci, íemo ‘mira’ daina ziórede raa, íemo come abi jilláiraniai, íemo ‘vino’ daina jirórají, íemo cáiredíjii, íemo ñuera pan finófirena harina, íemo trigo, íemo daje izói abífirede cáadino, íemo ovéjaíai, íemo cabálluai, íemo ‘carros’ daina arínellaíai, daje izói jacire rairuica comínina fecádiaioi. Bie izói daina cáadino íima ringo diga jíáimacimo fecádiaioi riire íaioi ocuíllena. <sup>14</sup> Afe jofue comínina dáítiaioi:

—¡Baie omoi gaiga caimárede amena llizíllaniai izoide ráaie jae íñede. Nana omoi ofítaga ebíriede ráaniai ja táinocaide! —dáítiaioi.

<sup>15</sup> Afe ráaniai fécajano íba úcube ófiredino bie áillue jofue comínimona otíaioi. Uano aillo úcuberediaioi. Mei íadi aféruído afe jofue iere duere finóinari jacinaillamona oni jica íítiaioi. Afénomona aféngori cáillicailli éeítiaioi. <sup>16</sup> Iemo dáítiaioi:

—¡Aii. Aillue jófuedio ñii dúerena! Naui ñuera ráifide úzecuiro jítádingo izóidío. Daje izói o comini jíairede ráifide iníroi, íemo morádona eroide ráifide iníroi jítáfrediaioi. Afe llezica oro íena finóritiaioi; daje izói ráifide nofici finoína raana finóritiaioi, íemo jíái ‘perla’ daina zíriona jítáfrediaioi. <sup>17</sup> Iemo dáaruido naado aillo ráaniai ñiné táinocaide.

Daje izói nana ‘barco’ daina áillue nocáe ocuídillaini, naa afécaedo jáidino diga, áfena jacíruillano oni jícarie itíaioi; daje izói afécaedo táijidínori naa jíáfodo monáillajimo táijide comíniri oni jícarie itíaioi. <sup>18</sup> Iemo afe jofue bóua úilliana cióillano caillídiaioi:

—Bie izoide naui áillue jófuena, ¿Ñinomo cóiticaí? Bie izoide jofue jaca íñeite, —daídíaioi.

<sup>19</sup> Iere zúucaillano íaioi ífomo énie júdaídiaioi. Daíí ñiano cáillicailli éediaioi. Daídíaioi:

—¡Aii! ¡Aillue jofue ñii dúerena! Nana monáillajido ráaniai fecáfiredino afe ráaniai o comini úamona afémaci aillo úcuberediaioi. ¡Mei íadi dáaruido afe áillue comini jofue ja ñiné táinocailla! —daídíaioi.

<sup>20</sup> Afe mei áfena ciódimie daide:

—Monamo itínuiái, mai afe áillue jofue táinocaillari omoi ióbiri. Uáfueza, Jesucristo orécano, naa Juzíñamui dibénedo úritinori mai ióbiri, naa Juzíñamuimo jaináidino diga. Mei Juzíñamui afengo niné táinocaitajado, omoi duere zefuitaja ñue jaícina iba ote, —daide.

<sup>21</sup> Afe mei riírede Juzíñamui abi ímie áillue nofici caifo raiñode. Afeci áillue ‘molina’ daina trigo llaira mérede nofici finoina eroide. Caifo ráiñuano afécina monáillajimo dotade. Dótajano daide:

—Afe bie izói áillue Babilonia jofue ana cáicoizite, ímona jaca ninomo meine cíõeille.

<sup>22</sup> Benómona jaca o cígido joide iomo ‘arpa’ daina rua roia taiga raa rúaniaina meine cácaiñeille. Daje izói totíbacui uai naa bainada uai diga ja meine cácaiñeille. Afe izói nana jiáiforie táijiana baitádinomona buna fiébiñena. Iemo daje izói dobérilla ficirena izói ‘molina’ daina nofici uaina cácaiñeille. <sup>23</sup> Afe daje llezica o jófuiái eromo bóofirede mechera izói boode ráaniai abido bóõeite. Iemo aféruimo áirena llezica iráizie caimare ficirerie íaioi úrilla uáillaina meine jaca cácaiñeille. Mei nauí omo ite ráaniai fecáfiredino bínie comínimona jamánomoidiaioi íadi, ja birui afe caimárede uailai cácaiñeille. Nauí aféruimo aima bífuefirena uai izóidedo náiraiaina jífuefiredio; mei íadi afe jífuefirena ona nabáñede.

<sup>24</sup> Mei uafue, afe o jofue cígimo Juzíñamui dibénedo úrifiredino díena ciona. Daje izói Juzíñamuimo jaináidino naa jiáie bíniemo fagano díena aféno ciona. Afe ciona die, afe jofue comini jiáimaci títaja ícoinia daí illa jana, —daide.

## 19

<sup>1</sup> Afe bie méifomo monamo ite aillo comini ficirede uáillaina cacádícue. Daidíaioi: ¡Aleluya! Cai jíllonano cai Juzíñamuimo dúide.

Daje izói iere ebíredífue afémiemo mamérede, íemo naa ñuera ríino diga.

<sup>2</sup> Mei afémie ñue jaícina ua uaido iere riire jicánofiredeza.

Afe iere jiruíredingona afémie riire duere finótateza.

Afengo iere ie jiruírenado énie comínina íaire finode.

Juzíñamuimo táijitagano tilla iba aféngomo oga, daidíaioi.

<sup>3</sup> Nane dáanomo daidíaioi:

—¡Aleluya! mei afengo jobailla uíllie jaca ninomo líicaiñeno uillíoite, —daidíaioi.

<sup>4</sup> Afe llezica veinticuatro dígade éicomini, íemo jiái cuatro diga cáadimíai diga, ana éniemo bíjicaillano, Juzíñamuimo caimátaidiaioi. Illaíma ráiiranomo ráide Juzíñamuimo caimátaillano daidíaioi:

—¡Daiítadeza! ¡Aleluya! —daidíaioi.

<sup>5</sup> Nane afe mei illaíma ráiiranomona jiáie uaina cacádícue; aféuai daide:

—Cai Juzíñamuimo nana afémie ocuícano afémiemo ñúefuiái omoi mameri. Daje izói íena caimare jacíruitino, illáicomini naa jiba comíniri, ñúefuiái afémiemo jónefireiri.

### *Cordero daina Cristo áirena rafue*

<sup>6</sup> Nane daje izói aillo comini uailai izóidena cacádícue. Afe uailai aillo imánillai ficirena izói ficirede, íemo jiái afe uailai ficire mona gíría ficirena izói ficirede. Afe uailai daide: ¡Aleluya! Jamánomo riírede cai ocuide Juzíñamui nane meine como ócuite.

<sup>7</sup> Mai cai ióbili; daje izói iere caimare cai illi.

Afémiemo ebíredífue cai mamelli.

Mei Cordero áirena izóidiruimo ja dúcideza.

Afémie ai izóidinona jáitino ja ñue finóbidaioi. Afémaci Crístomo ua ínotimaci.

<sup>8</sup> Ráífide úzecuirona jítaírediaioi.

Mei uafue, íainino quenírediroi Juzíñamui afémacina jíataga.

Mei afe ñuera ráífide úzecuiro Juzíñamuimo jaináidino comécina jaícina jóoina jánaza.

<sup>9</sup> Iemo Juzíñamui abi ímie cuena daide:

—Mai cúeiri: Cordero áirena ráfuego uáidogano ja caimare itíai, —daide.

Nane cuena daide:

—Bíuai Juzíñamui lloga ua uai, —daide.

<sup>10</sup> Iemona afe Juzíñamui abi ímiemo cue caimátailena ie anamo dújudicue. Mei íadi afémie cuena daide:

—Cuemo daí íñeno, mei o izói cue Juzíñamui ocuícamedicueza. Jí, Jesús llócaiga ua uaimo féitañeno ínote o ámatiai izóidicue. ¡Cuemo caimátañeno; Juzíñamuimo cáimatai! —daide.

Mei afe Jesús llócaiga ua uai, Juzíñamui dibénedo lloga uailai jino llotino comeci úritade.

### *Uzerede cabállomo ráicaidimie*

<sup>11</sup> Nane afe méifomo mona tuiñuana ciódicue. Aféno uzerede caballo cíocaide. Afe emódomo ráicaidimie mámecei “Fiel” íemo jíai “Verdadero” daínámie. Mei afémie ñue jaícina illáfuedo ocuúdeza; daje izói áfedo fiénidino diga fuirítateza. <sup>12</sup> Ie ui irai bóua izói quere cíoide. Ie ífócimo diga illaíma jítaracuifoí jítáide. Daje izói aféno dama ie onoíga mámecei cúeina. <sup>13</sup> Afémie jítacacuiro díemo mutácaroi. Afémie mámecei Juzíñamui Uai. <sup>14</sup> Afe llezica nana monamo ite Juzíñamui ocuica fuirídino afémie ódana jáidiaíoi. Afémaci ráífide úzecuiro jítáoidiaíoi. Aferoi jaca íáinide. Baie nana afémiedo jáidino úzerede cabállomo ráicaidiaíoi.

<sup>15</sup> Afémaci ífódimie fuémona jáirede lloefai jino bite, áfedo nana nairai boféllena. Afe llezica afémie lloébici izóidedo náiraíaina ócuite. Vino finóacano uvaíai íduíllena riire záizia izói, afe izói afémie afémacimo iere riire jicánoite. Iemo jamánomo riinorede Juzíñamui ráicallamona cómuite iere duere finóillifue, vino jirótaja izói afémacina duere finótaiteza.

<sup>16</sup> Ie ínícuiro emódomo jítacacuiromo cueda mámecei illa. Daje izói ie riázimo cueda. Afeci daide: “Nana illáinimona Jamánomoidillaíma,” íemo jíai “Nana Ocuídinomona Jamánomo Ocuídime.” Afémie níi cai Ocuíraíma Cristo.

<sup>17</sup> Afe mei Juzíñamui abi ímie jítoma riire egáíñuano naidáinana ciódicue. Afémie nana mona erodo féedínuaí ficire jíríte; daide:

—Juzíñamui finoca áillue güille nana dáano omoi riáibi, <sup>18</sup> mei benomo illáini íeizi ríitimoíza, naa fuiríraini illáicomini íeizi diga. Dáano íocirede fuiríredino íeizi ríitimoí, naa caballo íeizi diga. Daje izói afe emódodo ráicaidino íeizi ríitimoí. Iemo nana fiébidino íeizi ríitimoí. Buna ráiruñegano, daje izói jacire rairuícano, íemo jíai jamáimaci íeizi, naa jamánomoidimaci diga daje izói ríitimoíza, —daide.

<sup>19</sup> Afe mei afe jacire eroide ríllena ciódicue naa bínie illáicomini naa íaíoi fuirírainiaí diga. Nana bimaci fuiríllena dáano ofídiaíoi. Afémaci afe úzerede cabállomo ráicaidimie diga fuirízaíbitiaíoi. Afémie “Juzíñamui Uai” daínámie. Daje izói afémie canode fuiríraini diga fuiríllena maméritaíoi. <sup>20</sup> Afe mei afe jacirede rille, taino uai jino llócaidimie diga ja llaveca. Afe taino uai jino llotímie, jacirede rille eróicana, jacínaitade cíorainina raa cíótate. Aféfuiaído afe taino uai jino llotímie, nana afe jacirede rille mámeceina cuetátaganona jífuete. Daje izói afe jacirede rille jánaraimo caimátaídnona afémie jífuete. Iemona ‘monstruo’ daína jacire eroide rille, daje izói taino uai jino llotímie, cáanori dáano duere finolle jorai izoide bóodimo dotácaiaíllinoí. Afe jorai izoide duere finóllino iere uzire boode. <sup>21</sup> Nana áfemona fiébidino úzerede cabállomo ráicaidimie fuémona bite lloéfado titácaiaíoi. Iemona nana féedínuaí bie titácano riáibillano íaíoi íeiziri jérediaíoi.

## 20

*Mil diga fimona dino comini caimare útiaíoi*

<sup>1</sup> Bifue méifomo ángel dainámie Juzíñamui abi ímie monámona ana bíllana ciódicue. Afémie afe fiénide jóríai íbáirafo zuitara llave naa áillue llójeo diga llíicabite. <sup>2</sup> Afe bie Juzíñamui abi ímie ‘dragón’ daina jáiaira áillue jaio lláitano anáfenode. Afe jaio jíáifodo mameina Taife, dáamie Satanás. Anáfenuano afémiena mil diga fimona llaveca. <sup>3</sup> Ana fiénide jóríai íbáirafo óriano íena llavede. Lláviano afe nazemo ‘sello’ daina “buna zuitánide” daide raa jónete. Daií finoca náiraiaina mil diga fimona dinori jífueñeillena. Afe mil diga fimona jaille méifomo, afémie nano íanori zuitalle.

<sup>4</sup> Afe mei illaini ráirranuaina ciódicue. Afénomo ráiiedino iere riire jicánolle riinona igáiaioi. Afe dáaruido ífóciaina jáicoicano coméciaina ciódicue. Afémaci Jesús jaícina lloga Juzíñamui uai íaioi llócailla ícoina ífócina jaitácaiaioi. Afémaci afe jacire eroide ríllemo caimátaiñediaioi; daje izói afe jánaraimo caimátaiñediaioi. Daje izói afémaci ozócimo ie mámecei cuetátaiñediaioi, íemo daje izói íaioi ónoimo. Afémaci abi meine abido cáaillano mil fimona dino Cristo diga illáimaitiaioi. <sup>5</sup> Afe bie meine abido cáadino, nanóidino meine cáailliruimo abido cáaitiaioi, jae cai daina Cristo diga illáimaillena. (Mei íadi jíáie tíidino mil diga fimona záiñena dino meine abido cáaiñeitiaioi.) <sup>6</sup> Nana afe nanoide cáailliruimo meine abido cáaitino caimare itíaioi. Daje izói afémaci Juzíñamui ñue finócano. Afe meífoide tulle afémacimo jaca jíriñeite. Mei íadi afémaci comínido Juzíñamuimo úrifireitínona íitiaioi; daje izói Cristo íeiena zíiñona íitiaioi. Iemona mil fimona dino afe Cristo diga illáimaitiaioi.

<sup>7</sup> Afe mil diga fimona záilla méifomo, Taife ie llavéinafomona zuitalle. <sup>8</sup> Jáillano nana énie náiraiaina jífueite. Aféruído “Gogna” mámeceirede náiraiaina jífuaite, “Magog” daina náiraiaina diga. Afe náiraiaiaí fúiritinuiaina Taife dáanomo jofo óite, íiraicaiño fuiríllena. Afémaci monáillajimo ite guamaí dígadeza facádonidiaioi. <sup>9</sup> Afemona énie nániena afémaci iere oruíbicaite. Iemona Juzíñamuimo jaináidino illánona nágafene fállena cirínotiaioi. Afe illano Juzíñamui izíruiga Jerusalén daina jofue; áfena cirínotiaioi. Mei íadi Juzíñamui monámona irai afémacimo orede. Afe iraido fiébiñeno cóonaitiaioi. <sup>10</sup> Afe llezica afémaci jífueoicaide Taife boode jóraimo dotaca. Afe jorai iere uzire boode. Afe dáanomo jacire eroide rille, íemo jíái taino uai jino llócaidímie nauí dotaca. Afénomo mona naio diga jaca ninomo zíiñona iere duere finócaiaioi.

*Aillue úzerede ráirrano illaíma ie, íemo afe úcomo iere riire jicánollino cioina*

<sup>11</sup> Afe méifodo áillue úzerede ráirrano illaíma íena ciódicue. Iemo afénomo ráiidimiena ciódicue. Afémie úcomona nana énie mona diga niné cióbicaíñena. Afe mona énie diga illino jae íñede; jae niné táinocaidiaioi. <sup>12</sup> Daje llezica Juzíñamui úcomo nauí Juzíñamuimo íinoñeno tíidino naidáienana ciódicue. Afeno jamánomoidinori naa jamáimaciri dáanomo naidáiediaioi. Afe llezica comini finócafuaiaí cuiánicuaí túide. Daje izói afénomo jíáie zíiñona íitino mámecei cuiánico túide. Bie tíidino íaioi finócafuaiaí íllaze riire jicánogaiaioi, mei afe íaioi finócafuaiaí cuiánicomo cúeina dieze riire jicánogaiaioi. <sup>13</sup> Afe llezica monáillajimo báide tíidino meine abido Juzíñamui úcomo caifo náidacaitagaiaioi. Daje izói nana jíáiforie tíidinuaiaí íaioi tíillanomona meine abido Juzíñamui úcomo caifo náidacaitagaiaioi. Afe nana náidacaitagano íaioi finócafuaiaí íllaze afémacimo riire jicánogaiaioi. <sup>14</sup> Afe mei ‘muerte’ daina comini tíillafue boode jóraimo dotaca, ie mei niné táinocaide. Daje izói dáanomo nauí tíidino íbáinaco afénomo dotaca. Dotaca mei niné táinocaide. Afe bie boode jorai, íiraie tíillana mameide. <sup>15</sup> Iemo afe zíiñona íitino mámecei cuiánicomo mámeceina cúeñegano afe boode jóraimo dotácaiaioi.

## 21

*Comue mona comue énie diga*

<sup>1</sup> Afe méifodo comue mona, comue énie diga ciódicue. Mei nanoide mona nanoide énie diga ja niné cióbicaifnenaza. Daje llezica monailai jae iñede. <sup>2</sup> Afe llezica comue Jerusalén daína íaifuenide jofue, Juziñamui uícomona monámona ana billana ciódicue. Afena ciódimiedicue, Júaadícue. Afe jofue, óllena jicánoga ringo ebire finóbina izói ebire cíoide. <sup>3</sup> Iemo monámona ficire daínana cacádícue. Afe uai daide:

—Ero, comini cigiri birui Juziñamui illa. Afémaci diga ífireite, íemo afémaci afémie comínina íitiaioi. Ja birui dama afémie afémaci cigiri íite, afémaci Juziñamuina ie íllena. <sup>4</sup> Juziñamui afémaci ui jémena zafénaitaite. Aféruimo tílle íñeite. Daje izói eia íñeite, íemo jíaí duere zefuillamona eia íñeite. Daje izói comini abi izírena íñeite, mei jaiái itífuiaí jae záaideza.

<sup>5</sup> Iemo illaíma ráíiranomo ráíidímie cuena daide:

—Ero. Nana cómuena méidotícue.

Iemo nane daide:

—Bie uai iere ua uaiza, mai cúeiri. Daje izói bie uai iere ínofiregaza, —daide.

<sup>6</sup> Nane afe mei cuena daide:

—Ja ñue ícoímo finócaza. Cue bie naga ráfuiaína nai cómuiñenia uícodo itímiedicue. Daje izói dáamiedicue fuillínomo itímiedicue. Abecedario A-mona táinia izóidímiedicue. Daje izói abecedario Z-mo fuizajilla izóidímiedicue. Jáinoína jiróacadímie ñúejina jirótaja izói, afe izói ñúefuiaí dibénemo íacadímie raiñoñoeno afémie zííñoa illáfuea ífireitícue. <sup>7</sup> Fíénidena anáfénodímie nana bíena feci raa fia máíñua izói, máíñoite. Afe llezica afémie Juziñamuitícue, íemo daje llezica afémie cue jítóite.

<sup>8</sup> Mei íadi nana ínoñedíno dibéfodo duere zefuille afémacimo dúide. Uáfueza, ñúefuea jacíruitino daje izói ínoñedíno, íemo jíaímana éoidíno, íemo jíaímana titádíno, íemo jíaí jiruífuea finófredíno, íemo jíaíma fue gáiana fibídíno, íemo jíaí jánaraimo caimátaidíno, íemo nana táinona úritino; nana bie izóidíno boode jóraimo dotárediaioi. Afe jorai iere uzire boode. Afe bie boode jorai íiraie tíllana mameide, mei afénomo dotácana jaca ninomo Juziñamuimona oni eneno duere finócanona íitiaioíza.

### *Comue Jerusalén*

<sup>9</sup> Afe mei siete dígade ángeles daínamaci Juziñamui abi imácimona daa cuemo úrizaibite. Afémie nauí Juziñamui ocuica siete dígade íiraie jacírede duere finuana oruide ichecoí uitímie. Afémie cuena daide:

—Ero, Cordero ai izóidena jáitínona o ácatatícue, —daide.

<sup>10</sup> Iemo Juziñamui Ñuera Joreño bie izóidena nícaí anado cuena cíotate. Afe Juziñamui abi ímie áillue caifónedumo cue uite. Afénomo monámona Juziñamui uícomona ana bite jamánomo ñuera Jerusalén jofue cuemo ácatate. <sup>11</sup> Juziñamui abi ebire quenírena izói afe jofue quenírie cíoide. Daje izói iere ráifide nofici quenírena izói queníriede. ‘Jaspe’ daína nofici vidrio enéfecomo cíoina izói cíoide. <sup>12</sup> Afe jofue jinófenedo nágafene áillue cirínua bairo raa íte. Afe cirínogamo doce dígaze naze íte. Iemo illa diga nazemo Juziñamui abi ímie naidaina. Iemo afe náziaimo doce dígade Israel naíraí mámeciaí cúeina. <sup>13</sup> Afe jofue náziaimona, fuírífenemo dazeámani íte. Iemo jíaíe dazeámani onífenemo íte; íemo jíaíe dazeámani féífenemo íte; íemo jíaíe dazeámani afáífenemo íte. <sup>14</sup> Afe jofue jinófene cirínua anamo nofici finoina mozíoidíbani doce dígade. Illa dígabanimo Cordero nágabaimo orécana ‘apóstoles’ daínamaci mámeciaí cúeina.

<sup>15</sup> Afe cue diga úrite Juziñamui abi ímie, oro finoina facáradozi llíide, afe jofue facállena. Daje izói íe náziaí facállena, íemo jíaí afe jinófene cirínua facállena. <sup>16</sup> Afe jofue fueda nagaámariede; nágafene daje dínóriede. Íe árera dibene daje dínóriede; íemo íe ruica dibene daje dínóriede. Afe Juziñamui abi ímie íe llíga radózido jofue facade. Facádemo dos mil

doscientos kilómetros árrera. Daje izói ruica diné eróicana dos mil doscientos kilómetros. Iemo caifo diné eróicana jáíi daje izói dos mil doscientos kilómetros. Nárafeniai daje dinóriede. <sup>17</sup> Afe mei jinófene cirínubani facade. Facádemo sesenta y cuatro metros caifo ite. Afena Juzíñamui abi ímie come facáfírena izói facade.

<sup>18</sup> Afe jinófene cirínubani ‘jaspe’ daina nofici finoína. Afe jofue íáinide oro niina. Ñue enéfecomo cíoide vídriona eroide. <sup>19</sup> Jinófene cirínua anamo mozíoidíbanillai nana jáíforiede ráifide noficiáido ebire ñue finoína. Nanóidíbaní ‘jaspe’ daina noficiáido ebire ñue finoína, íemo jáíbaní ‘zafiro’ daina noficiáido ebire ñue finoína, íemo jáíbaní ‘ágata’ daina noficiáido ebire ñue finoína, íemo jáíbaní ‘esmeralda’ daina noficiáido ebire ñue finoína, <sup>20</sup> íemo jáíbaní ‘ónice’ daina noficiáido ebire ñue finoína, íemo jáíbaní ‘cornalina’ daina noficiáido ebire ñue finoína, íemo jáíbaní ‘crisólito’ daina noficiáido ebire ñue finoína, íemo jáíbaní ‘berilo’ daina noficiáido ebire ñue finoína, íemo jáíbaní ‘topacio’ daina noficiáido ebire ñue finoína, íemo jáíbaní ‘crisoprasa’ daina noficiáido ebire ñue finoína, íemo jáíbaní ‘jacinto’ daina noficiáido ebire ñue finoína, íemo jáíbaní ‘amatista’ daina noficiáido ebire ñue finoína. <sup>21</sup> Afe doce dígade naze íbáirabíci áillue perla. Illa dígaze daa perla ie finoína. Afe jofue cígido joide áillue macárao íáinide oro finoína. Afe macárao enéfecomo ñue cíoide vídriona eroide.

<sup>22</sup> Afe jofue eromo Juzíñamuimo gairíraco jaca ninó daa cíñedícue; mei jamánomo ríinorede Juzíñamuimo ebena nárafeniaimo caimátáidíaióiza. Afémiána jáífodo daina cai Ocuíraíma. (Afe jofue gairíraco Juzíñamui abíza. Daje izói jáíi Cordero abíza.) <sup>23</sup> Afe jofue jítómado egáíñuamo dúíñede; daje izói fíuido egáíñonide. Mei afe jofue Juzíñamui abímo ite ebírede quenírededo egáíñogaza. Daje izói jáíi Juzíñamui Cordero afe jofue egáíñogaza. <sup>24</sup> Nana jíllotaga nairai afe jofue egáíñuado mácaítáíoi. Bíníe nairai illáini afe jófúemo íáíoi ite aillo ebíriede illáima daíllena ráaniána átítáíoi. Atiano Juzíñamuimo, íemo jáíi Crístomo izájítáíoi. Daje llezica afe jofue ocuídímíe íáillínoímo aillo ñúefuena mámeítáíoi. <sup>25</sup> Afe jofue naze jaca monari íbaiñelle. Iemo afénoímo jaca mona náuíñeite. Jira náziái íbáíllírui íñeite. <sup>26</sup> Eníe náiraíai íáíoi ite ebíriede ráaniána afénoímo átítáíoi. Daje izói afénoímo aillo ñúefuíai mámeítáíoi. <sup>27</sup> Mei íadí comécina íáiredíno jaca afénoímo jofo jáinide. Daje izói comécina éoidíno dínoímo jofo jáinide, naa táino llotínori. Dama zííñona ítíno mámeíci cueránícomo mámeíci cuezámáí dani afénoímo jofo jáille. Aféníco Cordero daina Jesucrístomo ite.

## 22

<sup>1</sup> Afe mei Juzíñamui abi ímie íáinide imánina cue ácatate. Afémani jáinoí cómena zííñona cáatate. Afejí vidrío enéfenemo uáfori cíoiána izói cíoide. Afe imaní Juzíñamui illáimana ráíiranoímona tote. Afe ráíirano daje izói Cordero ie. <sup>2</sup> Afe jofue cígido áillue macárao illa. Afe macárao dáafenedo comínina zííñona cáatate aménaíai ríina. Daje izói afénoímo ite imaní fuédado nárafene daje ie aménaíai ríina. Afe aménaíai illa díga fíui llízífírede. Iemo jáíi afe aménaíai íbái nairai ñue manóllena ite. <sup>3</sup> Aféruílláido afénoímo faidórafuena jae íñeite. Juzíñamui illáimana ráíirano afe jófúemo ite; daje izói Cordero ráíirano afénoímo ite. Ie ocuífíregano daa afémiemo caimátáítáíoi. <sup>4</sup> Afe llezica afémáí Juzíñamuimo, meáíruiñeno jofo conímamo éroítáíoi. Afémáí ozócímo afémíe mámeíci cúeína. <sup>5</sup> Afénoímo mona jaca náuíñeite. Afénoímo ítíno mechera izoide egáíñuána jítaíñeítáíoi. Daje izói jítoma egáíñuána jítaíñeítáíoi, mei cai Ocúide Juzíñamui íáíoiána egáíoiite. Iemo afémáí jaca nínoímo zííñona illáímáítáíoi.

*Jesucristo bíllírui ja áínozide*

<sup>6</sup> Afe méífoímo Juzíñamui abi ímie nane cuena daide:



—Bie uai iere ua uaiza. Daje izói bie uai iere ñnofiregaza. Afe cai Ocuíraima nauí Juzíñamui uai jino llóraini comécimo úritimie. Afémie birui ie abi ímie orede, ie ocuícamacimo raire cómutifuiaina onótallena, —daide.

<sup>7</sup> Iemo Jesucristo daide:

—¡Raíre biticue! Binícomo cuega Juzíñamui uáillaina jíéruitimie caimare ite, —daide.

<sup>8</sup> Cue Juáadicue. Bífuiaina cacádicue, daje izói bífuiaina ciódicue. Bífuiaina cacáillano, íemo daje izói cue ciona méifomo, cuemo ácatate Juzíñamui abi ímie anamo dújudicue afémiemo caimátaillena. <sup>9</sup> Mei íadi afémie cuena daide:

—Jadíe izói cuemo íñeno. O izói Juzíñamui ocuícamiedicue. Daje izói Juzíñamui dibénedo úrifirede o ámatiai izóidicue. Iemo jíái binícomo cuega uáillaina náfuetino izóidicue. Cuemo caimátaiñeno; dama Juzíñamuimo caimátaiñeiri, —daide.

<sup>10</sup> Nane dáanomo cuena daide:

—Binícomo cuega Juzíñamui uaina báinino o comécimo jóoneño o iri. Mei bífuiái ícoimo ñue fuizájillirui ja ánozideza. <sup>11</sup> Nai bie fuiñena llezica, fiénidimaci íaiói finófirega fiénidifuenta dama íaiói finócaza. Fia eroi, mei afe izói íaiói íllado jamánomo duere finólliaioiza. Daje izói comécina íáiredino dama comécina íáireoicaideza. Fia eroi, mei áfedo duere finólliaioiza. Mei íadi ñue itino íaiói illa báimo ñue iri. Daje izói Juzíñamui íena ñue finócamie fáicanocaiñeno afémie íena íñeiri, —daide.

<sup>12</sup> Iemo Jesucristo daide:

—Jii, raíre biticue. Illa dígamíemo cue fecalle fia jíridoga izoide raa atídicue. Illa dígamíemo afémie finoca dieze fécaiticue. <sup>13</sup> Nanóidimedicue. Iemo jíái íiraimedicue. Daje izói naga ráfuiái uícodo itímicue. Daje izói fuizájillanomo itímicue. Iemo jíái abecedario A-mona táinia izóidimedicue. Daje izói abecedario Z-mo fuizájilla izóidimedicue.

<sup>14</sup> Íaiói íniraina jocófiredino izói, comeci ífue ñuérana méidotino caimare itíaiói. Íemona cáatate amena llizíllana gürediaioi. Afe bie izói daííacade zíñona íaiói íllena. Daje izói íaiói iniroi ñue jócuamona, afe jofue nazedo Juzíñamui illánomo jofo jáirediaioi. <sup>15</sup> Mei íadi comécina íáiredino afénomo jofo jáinidiaioi. Iemo daje izói jíáima fue gáiana fibídino, íemo daje izói nana jíáíforiede jíruífue finódino, daje izói cómena méinetino, daje izói jánaraimo caimátaidino, daje izói jíáíe comínina iere jífuefiredino, naa afe izoide fibídinori; nana bie izoide comini afe jófuego jofo jáinidiaioi; jáíñeno jino fiébitiaioi.

<sup>16</sup> Cue Jesúsicue. Juzíñamuimo ua jáináidinomo nana bífuiái jino llóllena cue abi ímie ja cue oreca. Jáiai illaíma David comuilla moi ímicue; daje izói afémiemona jebuídino comútagamiedicue. Iemo iere egáíñote monáíracudu izóidimedicue, —daide.

<sup>17</sup> Iemona Juzíñamui Ñuera Joreño daide:

—Mai bi, —daide.

Daje izói Cordero ai dáina afémiemo ua jáináidino íena daide:

—Mai bi, —daide.

Daje izói búuallaina cacáidino afémiena:

—Mai bi, —omoi daíri.

Iemo Cristo daide:

—Jiróacaitimie zíñona cáataite jáinoina íbáñeno mai fia jíruaíbiri. Afe bie izói daííacade zíñona illáfuenta óiacadimie mai cuemo bi; raíñóñeno omo fécaiticueza.

<sup>18</sup> Nana binícomo cuega Juzíñamui uaimo cacáreidinona bie izói llétaiticueza, cacai: Dáamie bie ráfuenta báimo zotáadi, Juzíñamui binícomo cuega jáírede duere finuaniaina afémiemo jóoneite. <sup>19</sup> Daje izói binícomo cuega Juzíñamui uáimona dáamie daa uai oni óiadi, Juzíñamui afe zíñona cáaitino mámecei cuiánícomo cuega afémie mámeceina oni óite. Daje izói binícomo lloga nífuenide jófuego Juzíñamui afémiena jofo jáítañeite. <sup>20</sup> Bífue jino llotímie nane dáanomo llote:

—Jii, raíre biticue, —daide.

Afemona Juan daide:

—Aquíe izóideza. ¡Cai Ocuíraima Jesús, mai bi!

<sup>21</sup> Cai Ocuíraima Jesucristo nana ómoina ñue fínoiteza. Daítadeza. Jae ñie.